




**Laulau na Vinalu**  
mine  
**Salemo**



Meramera New Testament

**Laulau na Vinalu mine Salemo**  
**The New Testament in the Meramera language of West New**  
**Britain, Papua New Guinea**  
**Nupela Testamen long Tokples Meramera long Niugini**

copyright © 2023 Wycliffe Bible Translators, Inc.

Language: Meramera

Contributor: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-08-20

---

PDF generated using Haiola and XeLaTeX on 25 Aug 2024 from source files dated 20 Aug 2024  
9d00e979-54c5-56a4-94a8-abc318213e72

## Contents

Matiu . . . . .	1
Mak . . . . .	45
Luk . . . . .	72
Ioanes . . . . .	115
Aposel . . . . .	146
Rom . . . . .	189
1 Korin . . . . .	210
2 Korin . . . . .	230
Galesia . . . . .	244
Epesus . . . . .	251
Pilipai . . . . .	258
Kolosi . . . . .	263
1 Tesalonaika . . . . .	268
2 Tesalonaika . . . . .	272
1 Timoti . . . . .	275
2 Timoti . . . . .	281
Taitus . . . . .	285
Pilemon . . . . .	288
Hibru . . . . .	289
Iemus . . . . .	304
1 Pita . . . . .	309
2 Pita . . . . .	315
1 Ioanes . . . . .	319
2 Ioanes . . . . .	324
3 Ioanes . . . . .	325
Iudas . . . . .	326
Inade i Ovu . . . . .	328

## Matiu Malongolongona Kubaana mine Iesu Matiu ei niage

*Aisaisa ne sou a abune tubutubune Iesu*

*Krais*

*(Luk 3:23-38)*

<sup>1</sup> Ieli ei e sou a abune tubutubune Iesu Krais.\* Iesu ei mina abuna mine Devit me Devit ei a abuna mine Abraham.

<sup>2</sup> Abraham ei e tamane Aisak. Me Aisak ei e tamane Iekop. Me Iekop ei e tamane Iuda pilu e sou e tatasina.

<sup>3</sup> Iuda ei e tamane Peres pilu e Sera. Tinane sulu e Tamar. Peres ei e tamane Hesron, me Hesron ei e tamane Ram.

<sup>4</sup> Me Ram ei e tamane Aminadap, Aminadap ei e tamane Nason, Nason ei e tamane Salmon.

<sup>5</sup> Salmon ei e tamane Boas. Me tinane Boas ei e Rahap. Me Boas ei e tamane Obet. Me tinane Obet ei e Rut. Me Obet ei e tamane Iesi.

<sup>6</sup> Iesi ei tamana Mapana e Devit.

Me Devit ei e tamane Solomon. Me tinane Solomon, lisa ei e susune Uria.

<sup>7</sup> Me Solomon ei e tamane Rehoboam, me Rehoboam ei e tamane Abiia, Abiia ei e tamane Asa.

<sup>8</sup> Me Asa ei e tamane Iehosapat, me Iehosapat ei e tamane Iehoram, Iehoram ei e tamane Usia.

<sup>9</sup> Usia ei e tamane Iotam, me Iotam ei e tamane Ahas, Ahas ei e tamane Heskia.

<sup>10</sup> Heskia ei e tamane Manase, Manase ei e tamane Emon, me Emon ei e tamane Iosaia.

<sup>11</sup> Me Iosaia ei e tamane Iehoiakin pilu e sou e tatasina. Na ilala do sou e Babilon sou peltaselele sou e Israel usino ne Babilon.

<sup>12</sup> Tauluna sou asu usino ne Babilon, Iehoiakin ei e tamane Sealtiel, me Sealtiel ei e tamane Serubabel.

<sup>13</sup> Me Serubabel ei e tamane Abiut, me Abiut ei e tamane Eliakim, me Eliakim ei e tamane Asor.

<sup>14</sup> Me Asor ei e tamane Sadok, me Sadok ei e tamane Akim. Me Akim ei e tamane Eliut.

<sup>15</sup> Me Eliut ei e tamane Eleasar, me Eleasar ei e tamane Matan, me Matan ei e tamane Iekop.

<sup>16</sup> Me Iekop ei e tamane Iosep, me Iosep ei e suane Maria. Me Maria ei maalepose e Iesu, sou vate ei e Krais.

<sup>17</sup> Maido me sou a abuna mine Abraham i asu pea ne Devit, ei a abuna savulu tasa

timana iva. Me sou a abuna mine Devit i asu pea na ilala sou asu ugu ne Babilon, ei a abuna savulu tasa timana iva. Me soke na ilala sou peltaselele e sou e Israel usino ne Babilon pea na ilala Krais ei sibitala, sou vuso tamai odo abuna i savulu tasa timana iva.

*Maria ei maalepose Iesu Krais  
(Luk 2:1-7)*

<sup>18</sup> A mapamulina mine Iesu Krais ei alaposi, ei maido. Tinane ei e Maria, sou mavuniosi ei ni tavui e Iosep. Moni na ilala sulu saboa su ngolo pilu, sou ite Maria ei saavu. Maolona Nunu moni ei toe Maria saavu.

<sup>19</sup> Suane ei e Iosep, ei a bilesina bibi. Maido me ei ma kale ete ni mamaele Maria na matane sou a vanunua ma tavivine. Maido me ei kale ni iavetase kekeke moni ei.

<sup>20</sup> Iosep ei saboa damutaletaleta a golu iedo, me na tinada bineanea tasa mine Bibi Taula ei palea le ei. Ma bineanea ei vei maido, "Iosep, oo a bibi na abuna mine Devit, oo ma laelae lou a gualene Maria ei ne susumu. A bibaini ino na tiane ei odo, a Maolona Nunu ei bilii e ei.

<sup>21</sup> Ei ni maalepose a bibaini, me oo no vate a aisana e Iesu,<sup>†</sup> vuna maido, ei ni gualeliu e sou a vanunua ma tavivine minei maino na sinusu mine sou."

<sup>22</sup> Golugolu vuso ieli palea mina toeseselena inade tasa Bibi Taula ei goli na asena profet. Ei vei maido,

<sup>23</sup> "Oite. Tavine tasa ei saboa ngolo pilu a bibi tasa, ei ni saavu mei ni maalepose a bibaini tasa. Me ne sou maaise e ei e Emanuel."<sup>‡</sup> Masovana aisa do ei maido, Salemo ei eili pilu e eitou.<sup>§</sup>

<sup>24</sup> Ilala Iosep ei ilisi a ngunolo, io ei guale a susuna tomane a bineanea mine Bibi Taula ei vei le ei.

<sup>25</sup> Moni ei ma ngolo pilu oto e ei, i asu pea na ilala Maria ei maalepose a bibaini. Me ei vate a aisana e Iesu.

## 2

*Sou a vanua na muadana sou masala sou sibitala ne sou ite Iesu*

<sup>1</sup> Na ilala Herot ei ino a mapana, Maria ei maalepose Iesu ne Betlehem na avena ne Iudia. Me mulimuli vanua na muadana sanii maino na avena oaso i tala i sou asu usinani ne Ierusalem me sou tagu maido,

<sup>2</sup> "Bibaini alaba ei a mapana mine sou e Iuda, ei ino iva? Amiteu ite a mataidoido minei na avena oaso i tala i, me amiteu asu usinani ve namiteu kaka ane ei."

\* **1:1** Malibuuna mine Krais i maido, a bibi Salemo ei vileale ni mamauli e sou a vanunua ma tavivine minei. † **1:21** Malibuuna mine Iesu i maido, Salemo ei gualeliu e sou a vanunua ma tavivine. Na inade mine Hibru Iesu ei e Iosua.

‡ **1:23** Aisaisa 7:14 § **1:23** Aisaisa 8:8,10

<sup>3</sup> Mapana e Herot pilu a vanunua ma tavivine vuso ne Ierusalem sou longe a inade iedo me sou damutatala papai.

<sup>4</sup> Io Herot ei toleale sou vuso a munugana prist pilu e sou a vanua na muadana binea mine Israel. Sou viepilu me ei tagi e sou maido, "Krais ei ni alaposa ne sei abubu?"

<sup>5</sup> Me sou adeliu maido, "Ei ni alaposa ne Betlehem ne Iudia. A profet ei niagesi a inade maido,

<sup>6</sup> "Oo Betlehem, a magamaga mine Iuda, oo ma mamulumuli lou ana abubu vuso ne Iuda.

Vuna maido, bibi tasa minio ei ni palea a munugana bibi mina itealalene sou a abuna minau, e Israel.\*"

<sup>7</sup> Herot ei longe a inade do mei tole oovi moni a vanua na muadana. Sou asu maino me ei tagi kube sou, sei ilala a mataidoido do ei palea.

<sup>8</sup> Me ei peltase sou usino ne Betlehem mei vei, "Amutou asu mu pipigo sagali a punogena bibaini iedo. Na ilala amutou itesi ei, io mu maliu a inade usinani, me eau tamai na asu na kaka ane ei."

<sup>9</sup> Sou longesi a inade mina mapana, io sou asu. Me sou ite lei a mataidoido iedo lisa sou ite na avena oaso i tala i. A mataidoido do ei muga pala ane sou asu muina oata na luma bibaini ino i.

<sup>10</sup> Ilala sou ite a mataidoido, lilone sou i mongemonge mamau sele.

<sup>11</sup> A vanua na muadana sou gali ulilo na luma, me sou ite a mongomongo baini pilu e tinana e Maria. Me sou totopatulu me sou lagu motudu utano na magamaga me sou kaka ana mongomongo baini. Me sou pee a palakulu mine sou, me sou bilii e ei a gol ma nanu manginana doana ma mira.†

<sup>12</sup> Me na tinada Salemo ei vei le sou maido, ne sou ma veteliu liu lou usino ne Herot. Maido me sou ogomuli a vea tasa sea me sou veteliu usino na abubu mine sou.

*Iosep pilu e Maria me natuna sou asu usino ne Isip*

<sup>13</sup> Sou a vanua na muadana sou veteliu-osi, a bineanea mine Bibi Taula ei palea le Iosep na tinada. Ei vei maido, "Oo ilisi mo guale bibaini pilu e tinana, ne mu oava usino ne Isip. Mu muine amutou ne Isip mapigogoi a ilala eau na vei lei le oo, vuna Herot ei kale ni poge a bibaini ni valipute."

<sup>14</sup> Io Iosep ei ilisi mei guale a bibaini pilu e tinana na lodo do, mei maasi e sulu usino ne Isip.

<sup>15</sup> Me Iosep ei muina ne Isip mapigogoi Herot ei mate. Golu iedo ei palea mina

toeseselena inade tasa Bibi Taula ei adesi na asena profet. Ei vei maido, "Natugu bibi ei ino ne Isip, eau toleale ei usinani."‡

*Mapana e Herot ei valipute selebanini makuba*

<sup>16</sup> Ilala Herot ei muada i maido, sou a vanua na muadana sou auala ane ei, io lilone ei tivula sele. Me ei peltase a vanua sanii usino ne Betlehem ma abubu vuso agavi na abubu buo do, me sou valipute selebanini vuso sou a bibi avalane sou i lua me matano. Herot ei tagi kubesi e sou a vanua na muadana ne sei ilala ivu a mataidoido do ei paleasi, vuna ei isa a damutatalana mina valiputene selebanini tinatinane sou i maalepose sou na ilala ie.

<sup>17</sup> Golugolu sou ieli i toeselese a inade tasa Salemo ei adesi na asena profet e Ieremaia. Ei vei maido,

<sup>18</sup> "Tinangi buo ma inala mina dinodo i palea ne Rama.

Resel ei tangi dododo e natatuna sou mamatesi.

Me ei ma kale ete sou a vanunua ma tavivine ne sou maalilime ei, vuna natatuna vuso sou ino boasi."§

*Iosep pilu e susuna me natune sulu sou veteliu*

<sup>19</sup> Ilala Herot ei matesi, io ne Isip a bineanea mine Bibi Taula ei palea le Iosep na tinada.

<sup>20</sup> Ei vei le Iosep maido, "Oo ilisi mo guale natumu pilu e tinana, mu veteliu usino ne Israel. Vanunua sou kale ne sou valipute a bibaini, sou matesi."

<sup>21</sup> Io Iosep ei ilisi mei guale natuna pilu e tinana, me sou veteliu usino ne Israel.

<sup>22</sup> Moni e Iosep ei longe a inade maido, Akelaus ei puisobe a muine tamana e Herot mei ugu a mapana mine Iudia. Maido me Iosep ei lae a inasu usino na avena do. Moni e Salemo ei bilii e ei a inade na tinada, me Iosep ei asu usino na avena ne Galili.

<sup>23</sup> Me ei malu na abubu tasa sou vate e Nasaret. Me na inigogona ieli ei toeselese a inade mine sou a profet, "Ne sou vate ei a bibi mine Nasaret."\*

### 3

*Ioanes a bibi na maavuvutuna ei veipale a inade*

(Mak 1:1-8; Luk 3:1-18; Ioa 1:19-28)

<sup>1</sup> Na ilala do Ioanes, a bibi na maavuvutuna, ei sibitala. Ei ino na avena a vanua boa ne Iudia, mei malongo ane sou a vanunua ma tavivine.

\* 2:6 Maika 5:2 † 2:11 Ei a bulu tasa sou savevei a aitolana bibi mate ni ma manggegelu oto. ‡ 2:15 Hosea 11:1

§ 2:18 Ieremaia 31:15 \* 2:23 Aisaia 11:1 Na inade HIBRU, malibuuna inade mine Nasaret ei a lalana obu.

<sup>2</sup> Ei vei maido, “Amutou sauvule a lilone amutou. Niitealalena mine Salemo ei maino agaviosi.”

<sup>3</sup> Ioanes ei a bibi Salemo ei adesi e ei na asena profet e Aisaia. Ei vei maido, “Na avena a vanua boa, a bibi tasa ei tola maido,

‘Masusulu a vea mine Bibi Taula. Toe-bilelesi a veavea vuso minei.’”\*

<sup>4</sup> Ioanes ei kai a kinainai sou goli a aivuna kamel, mei pale a loaloo na aina. Me ei aniani a keadodoo pilu a madu na tibulu.

<sup>5</sup> Na ilala do sou e Ierusalem me sou vuso ne Iudia me sou vuso a vanunua sou ugu agavi na nanu e Iordan, sou asu usino ne Ioanes.

<sup>6</sup> Me sou veipale a sinusu mine sou, me Ioanes ei maavuvuti e sou na nanu e Iordan.

<sup>7</sup> Ioanes ei ite papaina mine sou e Parisi me Sadusi sou asu usinani ne sou guale a maavuvutuna, me ei vei le sou maido, “Amutou a natatuna aliusu pagu. Sei vei le amutou namutou oava me mu asuleletase a ilala pagu i kale ni sibitala ne amutou ie?

<sup>8</sup> Mane amutou sauvule ivu a lilone amutou, io a inigogone amutou ni maite i maido, amutou sauvulesi a lilone amutou.

<sup>9</sup> Amutou ma damutaletale lei maido, ‘Abraham ei e tubune tamane amiteu, maido me Salemo ei ni ma toegegeli ete amiteu.’ Eau vei le amutou, Salemo ei mapigogoi ni goli a vatuvatu sou ieli ni palea abune tubutubune natatune Abraham.

<sup>10</sup> Uaba inosi na vuna obu, ma obuobu vuso sou ma vua kubakuba oto, ede ne sou tale me sou pitase sou usino na oavi.

<sup>11</sup> “Eau maavuvutivuti e amutou a nanu tomene a matailala mine amutou mu sauvulesi a lilone amutou. Moni a bibi ei ni divi mulimuli ne eau, sagagaline ei ei muge a sagagalina minau. Eau ma mapigogoi ete na oudi a ubupolo minei. Ei ni maavuvuti e amutou a Maolona Nunu ma oavi.

<sup>12</sup> Ei asu usinani tomene a bibi ei lapitole a gona pakulina na limane ei mina taulelana noanoa vuso ino na vit. Me ei ni laipili a vit na luma na vit minei. Moni a noa ei ni tuni na oavi ei ma matemate oto.”

*Ioanes ei maavuvuti e Iesu  
(Mak 1:9-11; Luk 3:21-22)*

<sup>13</sup> Na ilala do Iesu ei ilisitase Galili mei asu usino na nanu e Iordan. Ei asu usino ne Ioanes ni guale a maavuvutuna na limane Ioanes.

<sup>14</sup> Moni Ioanes ei ma kale ete mei vei, “Kubaana eau na guale a maavuvutuna maino minio. Moni vuna matina oo asuale eau?”

<sup>15</sup> Moni e Iesu ei adeliu maido, “Muinasi, seidei oo no goli tomene eau vei. Na inigogona li neitou toesesele a golugolu Salemo ei kale neitou goli.” Maido me Ioanes ei longemuli e Iesu.

<sup>16</sup> Iesu ei gualesi a maavuvutuna, ma tabaa oto ei tululanga uata. Ma langi ei peo, me ei ite a Nunu mine Salemo i sivo utano mei ugu muata ne ei tomene a manua kuaa.

<sup>17</sup> Me na langi a tinola tasa ei ade maido, “Telili e Natugu, eau kale sele ei. Lilogu i mongemonge sele e ei.”

## 4

*Satan ei tove e Iesu*

*(Mak 1:12-13; Luk 4:1-13)*

<sup>1</sup> Na ilala do a Maolona Nunu ei maasi e Iesu usino na avena vanua boa, ne Satan ni tove ei.

<sup>2</sup> Me Iesu vavae e ei a inani mapigogoi a malada savulu iva na oaso me na lodo. Me mulimuli ei vitolo.

<sup>3</sup> Ma bibi na tinovo ei asu maino mei sibitala le Iesu mei vei lei maido, “Mane patotona oo Natune Salemo, de oo vei ana vatu ieli ni sauvule mei ni palea a ulalu.”

<sup>4</sup> Moni e Iesu ei maliu a inade maido, “Laulau mine Salemo ei isa a inade maido, ‘Vanunua ma tavivine sou ma mapigogoi ete ne sou mauili a gona inani moni, boa. Moni ne sou mauili a inadenade vuso maino na asene Salemo.’”\*

<sup>5</sup> Me Satan ei guale e Iesu usino na maolona aubu buo e Ierusalem mei tau ei oata oto na luma mine Salemo.

<sup>6</sup> Me Satan ei vei lei maido, “Mane patotona oo Natune Salemo, de oo seu utano. Laulau mine Salemo ei isa a inade maido, ‘Ei ni vei le sou a bineanea minei ne sou ulage e oo.

Me ne sou lapitole oo a limane sou, dae a vatu tasa ni ubi a ubumu.’”†

<sup>7</sup> Moni e Iesu ei vei lei, “Laulau mine Salemo i vei lou maido, ‘Oo ma tovetove lei e Salemo, Bibi Taula minio.’”‡

<sup>8</sup> Satan ei guale lei e Iesu usino na loena tasa oata oto sele. Mei maite ei a aveavena vuso na magamaga ieli pilu a golugolu doana mine sou.

<sup>9</sup> Me ei vei le Iesu maido, “Mane oo topatuliale eau me oo kaka agu, io eau na bilii e oo a golugolu vuso ie.”

<sup>10</sup> Me Iesu ei vei lei, “Satan, oo avulo. Laulau mine Salemo i vei, ‘Oo no matano moni ne Salemo, Bibi Taula minio, me oo no kaka ane ei tasa moni.’”§

<sup>11</sup> Maido me Satan i asutase ei, me sou a bineanea mine Salemo sou buloi e Iesu.

\* 3:3 Aisaia 40:3

\* 4:4 Binea 8:3

† 4:6 Laulau na Inala 91:11-12

‡ 4:7 Binea 6:16

§ 4:10 Binea 6:13

*Iesu ei soke a pipigona ne Galili  
(Mak 1:14-15; Luk 4:14-15)*

<sup>12</sup> Ilala Iesu ei longe a inade maido, sou tauosi e Ioanes na luma na tunuui, io ei asu usino na avena mine Galili.

<sup>13</sup> Mulimuli ei asutase Nasaret mei asu ugu ne Kapenaum. Kapenaum ei ino na lili na pou na nanu e Galili, na avena mine Sebulun me Naptali.

<sup>14</sup> Na inigogona li Iesu ei toeselese a inade tasa Salemo ei adesi i na asena profet e Aisaia maido,

<sup>15</sup> “A vanunua ma tavivine mine Sebulun me Naptali,

ei a magamaga ino agavuale a vea buobuo usino na dasi ma avena maino na nanu e Jordan,

ei a magamaga mina avena ne Galili,

avena do a vanunua ma tavivine makuba mina aveavena sea tamai sou ino i.

<sup>16</sup> Sou a vanunua ma tavivine do sou ugu na tunuui buo, sou itesi a muada taula.

Sou a vanunua ma tavivine sou ugu na magamaga tunuui na minate do,

a muada ei sibalatala ne sou.”\*

*Iesu ei toleale a bibi iva me sou ogomuli e ei*

*(Mak 1:16-20; Luk 5:1-11)*

<sup>17</sup> Na ilala do Iesu ei soke a malongona inade usino ne sou a vanunua ma tavivine. Ei vei maido, “Amutou sauvule a lilone amutou, vuna niitealalena mine Salemo ei agaviosi.”

<sup>18</sup> Na ilala Iesu ei asuasu na lili na nanu e Galili, ei ite tametasi lua, Saimon, sou tole e Pita, me tasina e Andru. Su langelange a vuo na pou na nanu. Pipigona ne sulu ei a nilangena vuo.

<sup>19</sup> De Iesu ei vei le sulu maido, “Amulu vele mu ogomuli e eau, me eau na matetengi e amulu a inigogona gualena vanunua ma tavivine.”

<sup>20</sup> Ma tabaa oto sulu ilisitase a vuo me sou ogomuli e ei.

<sup>21</sup> Iesu ei asu sapa lou, mei ite tametasi lua lou, e Iemus, natune Sebedi pilu e tasina e Ioanes. Su ino na bot pilu e tamane sulu, e Sebedi me sou toekubekube a vuo mine sou i maututu. De Iesu ei toleale sulu.

<sup>22</sup> Ma tabaa oto sulu ilisitase a bot me su asutase tamane sulu, me sulu ogomuli e Iesu.

*Iesu ei malongo a inade mei toekube a vanunua ma tavivine papaina  
(Luk 6:17-19)*

<sup>23</sup> Iesu ei asu gaga usino na aububu vuso na avena ne Galili. Ei gali ulilo na lumaluma na kinaka mine sou e Iuda mei

matetengi e sou. Ei malongo a malongo-longona kubaana mina niitealalena mine Salemo, mei toekube sou so isa a mata-matana sinobe.

<sup>24</sup> Sou mapamuli e ei na aububu vuso na avena buo ne Siria. Maido me sou a vanunua ma tavivine sou maasi sou a vanua matamatana sinobe i toegegeli e sou me sou tabule a davutina pagu, me sou a vanua sou isa a nunu pagu, me sou a vanua sou isa a matana sinobe ei goli e sou so bosa ma vovone sou i palili mamau, me sou a vanua tuane sou i mate vuso. Me Iesu ei toekube sou me sou kubaana lou.

<sup>25</sup> Ma abuna vanunua ma tavivine makuba ne Galili, me ne Dekapolis, me ne Jerusalem me Iudia, me na magamaga maino na nanu e Jordan, sou ogomulimuli ei.

## 5

*Iesu ei malongo oata na loena*

<sup>1</sup> Iesu ite sou a abuna vanunua ma tavivine buo sou asu maino, me ei asu uata na loena. Ei ugu me sou a disaipel minei sou asuale ei.

*Iesu ei ade ane sou a abuna vanunua ma tavivine ne sou mongemonge*

*(Luk 6:20-23)*

<sup>2</sup> Me Iesu ei matetengi e sou a disaipel minei maido,

<sup>3</sup> “Sou a vanunua ma tavivine sou muada, sou kapelabe sele na matane Salemo, ne sou mongemonge, vuna niitealalena mina langi ei mine sou.

<sup>4</sup> Sou a vanunua ma tavivine sou tangitangi, ne sou mongemonge, vuna Salemo ni toekube a lilone sou.

<sup>5</sup> Sou a vanunua ma tavivine sou ma toebue-bue ete sou oto, ne sou mongemonge, vuna Salemo ni bilii e sou a magamaga vuso.

<sup>6</sup> Sou a vanunua ma tavivine sou vitolo sele a ogomulina inigogona bilesi, ne sou mongemonge, vuna Salemo ni maaani e sou me sou masu sele.

<sup>7</sup> Sou a vanunua ma tavivine sou dodode sou sanii, ne sou mongemonge, vuna Salemo ni dode sou tamai.

<sup>8</sup> Sou a vanunua ma tavivine lilone sou i maolo, ne sou mongemonge, vuna ne sou ite e Salemo.

<sup>9</sup> Sou a vanunua ma tavivine sou valimatemate a inigogona sinoana ma maubina, ne sou mongemonge, vuna ne sou vate e sou e natatune Salemo.

\* 4:16 Aisaia 9:1-2

<sup>10</sup> “Sou a vanunua ma tavivine sou ogomuli a inigogona bilesi, ma vuna moni ieli sou guale a mavaana mine sou maino, ne sou mongemonge, vuna niitealalena mina langi ei mine sou.

<sup>11</sup> “Mane sou ite amutou a abuna minau, me sou lobe amutou me sou toegegeli amutou me sou ubi amutou a matamatana aualana inade, ede ei kubaana sele ane amutou.

<sup>12</sup> Amutou mu lilokuba me mu mongemonge sele, vuna maido, mapa taula ei magitali e amutou na langi. Vanunua sou goliosi a matamatana inigogona pagu usino ne sou a profet sou muga pala ane amutou.

*Amutou tomane a masi ma muada  
(Mak 9:50; Luk 14:34-35)*

<sup>13</sup> “Amutou tomane a masi mina magamaga ie. Moni mane a masi a mamisina i buale, neitou toematina ma masi ni palea doana lou? Matana masi maido ei a pipigona ana boasi, ma vanunua sou taulele moni me sou soetole a ubone sou.

<sup>14</sup> “Amutou tomane a muada mina magamaga ieli. Aubu tasa oata na loena, ei ma mapigogoi ete ni ovu.

<sup>15</sup> Me tamai, vanunua sou masoe a lada me sou ma tau ete matano na taogo tasa. Sou tau oata na poso, me ei ni bilii a muada na vanunua vuso na luma.

<sup>16</sup> Maido ma muada mine amutou ni sili-davei a matane sou a vanunua ma tavivine, ne sou ite a inigogona doana amutou goli, me ne sou masalalai a aisane Tamane amutou ei ino oata na langi.

*Inade na binea mine Salemo*

<sup>17</sup> “Amutou ma damudamu lou eau asu usinani mina taulelena inade mina binea ma inade mine sou a profet. Eau ma asu oto usinani mina taulelena, eau asu usinani mina teaseselena.

<sup>18</sup> Eau ade patotona ane amutou, pea na ilala langi ma magamaga ni pulu, a malevina banini mina niagona me sou a matailala banini sou niage na binea, sou vuso do ne sou muina. Binea ni muina maido moni mapigogoi a golugolu vuso i paleasi.

<sup>19</sup> Maido me mane sei bibi ei ite a malevina binea tasa tomane a golu sabubu, me ei matetengi e sou a vanunua tamai maido, a aisana bibi iedo ni alabaini sele na niitealalena mina langi. Moni mane sei bibi ei ogomuli a binea mei matetengi e sou a vanunua ma tavivine simaido, ei ni isa a aisa buo na niitealalena mina langi.

<sup>20</sup> Eau vei le amutou, mane a inigogona bilesi mine amutou ei ma vululusi ete a inigogona bilesi mine sou a vanua na muadana binea pilu e sou e Parisi, amutou

ma mapigogoi ete ne mu gali ulilo na niitealalena mina langi.

*Amutou ma sinoanoa lou ane sou a vanunua ma tavivine  
(Luk 12:57-59)*

<sup>21</sup> “Amutou longesi a inade li sou e tubu-tubune amutou sou guale, ‘Amutou ma vali-putepute lei a vanunua ma tavivine. Me mane a bibi tasa i valipute a bibi tasa, ei ni magili na vavasana.’\*

<sup>22</sup> Moni eau vei le amutou maido, sei bibi ei sinoa ane tamaina, ei ni magili na vavasana. Ma bibi ei lobe gegeli e tamaina, ei ni magili na vanua na avelulusena inade. Me sei bibi ei vei ana bibi tasa maido, ‘Oo vauta,’ ei ni asu usino na oavi mina aubu na davutina.

<sup>23</sup> “Maido me mane oo maasi a niabi minio usino na poso na niabi mine Salemo, me oo damutale tamaimu ei isa a sinoanoa usino ne oo,

<sup>24</sup> io oo no tautase a niabi minio masae na poso na niabi me no asu pala mo toebilelesi a inade pilu e tamaimu. Toebilelesios, io o no asu bilii a niabi minio usino ne Salemo.

<sup>25</sup> “Mane a bibi tasa ei kale ni vavasa ane oo, me amulu saboa mu asuas na vea usino na muina vavasana, oo no toeasi a toebilelesina inade pilu e ei. Dae a bibi iedo ni tau e oo na limana vanua na avelulusena inade, me ne sou tau e oo na limane sou a papai, me sou a papai ne sou tau e oo na luma na tunuu.

<sup>26</sup> Eau vei patotona ane oo, oo no ugu na luma na tunuu mapigogoi oo oli a vatu vuso sou vilealesi minio.

*Iesu ei ade a inigogona sualolona*

<sup>27</sup> “Amutou longesi lisa sou vei maido, ‘Amutou ma goligoli lei a inigogona sualolona.’†

<sup>28</sup> Moni eau vei le amutou maido, mane sei bibi ei ite a tavine tasa mei isuale ei, a bibi iodo ei goliosi a inigogona sualolona na lilone ei.

<sup>29</sup> Mane a matamu e gata ei lapuale oo no goli a sinusu, oo no osetase ei mo pitase. Ei puiale avena vovomu tasa ni buale, dae ne sou lange a vovomu vuso usino na aubu na davutina.

<sup>30</sup> Mane a limamu e gata ei goli e oo bosa a sinusu, oo no valiutitase mo pitase. Ei puiale avena vovomu tasa ni buale, dae ne sou lange a vovomu vuso usino na aubu na davutina.

*Iesu ei ade a bibi i taulele e susuna  
(Mak 10:11-12; Luk 16:18)*

\* 5:21 Gualeliuna 20:13; Binea 5:17 † 5:27 Gualeliuna 20:14; Binea 5:18 ‡ 5:31 Binea 24:13



<sup>31</sup> “Lisa sou vei maido, ‘Mane a bibi tasa ei taulele e susuna, ei ni bilii e ei a laulau tasa mina taulelena taulaina.’<sup>‡</sup>

<sup>32</sup> Moni eau vei le amutou, mane a bibi ei taulele e susuna na ilala tavine ei ma goli ete a inigogona sualolona, a bibi edo ei toe a tavine goli a inigogona sualolona. Me a bibi ei tavui a tavine tasa, lisa suana taulele ei, ei tamai goli a inigogona sualolona.

*Amutou ma ade ivuvu lou uata*

<sup>33</sup> “Amutou longesi a inade tasa lou sou e tubutubune amutou sou guale, ei maido, ‘Oo ma aualala lou na ilala oo vei ivu uata. Oo no toesele a inademu ivu uata na matane Bibi Taula.’<sup>§</sup>

<sup>34</sup> Moni eau vei le amutou, amutou ma gologoli lei a inade ivu uata. Umana sele. Amutou ma ade ivu lou uata na langi, vuna langi ei a niuguguna mapana mine Salemo.

<sup>35</sup> Me amutou ma ade ivu lou uata a magamaga, vuna magamaga ei a muine Salemo ei tau a ubuna muata ne ei. Me amutou ma ade ivu lou uata e Ierusalem, vuna Ierusalem ei a aubu buobuo mina Munugana Mapana.

<sup>36</sup> Me oo ma vei ivuvu lou a letemu mina toesagalina inade, vuna oo ma mapigogoi ete no goli a aivumu tasa mina letemu ni palea keakea ue paululu.

<sup>37</sup> Amutou namutou vei moni ‘E’ ue ‘Boa.’ Ei mapigogoi. Inade sou adesui iodo, ede maino ne Satan.

*Amutou ma vosa adoado lou  
(Luk 6:29-30)*

<sup>38</sup> “Amutou longesi lisa sou vei maido, ‘Mane sei bibi ei toegegeli a matana bibi tasa, namutou toegegeli a matane ei. Mane sei bibi ei valilote a livona bibi tasa, namutou valilote a livone ei tamai.’<sup>\*</sup>

<sup>39</sup> Moni eau vei le amutou maido, amutou ma vosa adoado lou ana bibi ei toegegeli e amutou. Mane a bibi tasa ei sapegalegale a galemu e gata, oo no sauvule a galemu meli tamai usino ne ei.

<sup>40</sup> Mane a bibi tasa ei kale ni vavasa ane oo mei guale a tavamu, oo no bilii e ei a kinainai usalasala minio tamai.

<sup>41</sup> Mane a bibi tasa ei sagali ve oo no tabule a gologolu minei mapigogoi a bulagona kilomita tasa, oo no tabule a gologolu usino mapigogoi a bulagona kilomita lua.

<sup>42</sup> Mane a bibi tasa ei tagi e oo no bilii e ei a golu tasa, oo no bilii e ei. Mane a bibi ei kale ni gau a golu tasa minio, oo no ma lametasetase lei e ei.

*Iesu ei ade a inigogona mina kinalene sou a butu  
(Luk 6:27-28, 32-36)*

<sup>43</sup> “Amutou longesi lisa sou vei maido, ‘Oo no kale sele sou tamtamaimu, me oo no lilogegele ane sou a butu minio.’<sup>†</sup>

<sup>44</sup> Moni eau vei le amutou maido, namutou kale sou a butu mine amutou, me namutou kake Salemo ni dode sou a vanua sou goli a inigogona pagu usino ne amutou.

<sup>45</sup> Maidolo me ne amutou muine amutou e natatune Tamane amutou ei ino oata na langi. Ei toe a oaso minei ni silidavei na vanua sou pagu me sou a vanua doanana tamai. Me ei goli a adavu i pu utano ne sou a bilesina vanua ma vanua sou ma bilesi oto tamai.

<sup>46</sup> Mane amutou kale moni a vanua sou kale amutou, ne amutou guale sei mapa? Sou a vanua na gualena takis, sou tamai sou goli a matana inigogona simaido.

<sup>47</sup> Mane amutou vate oaso doana moni usino ne tamtamaine amutou, ne amutou vululusi a vanua sanii ne sei golu? Sou a vanua masala tamai sou goli simaido.

<sup>48</sup> Ne amutou muina a bilesina vanunua ma tavivine ivu, tomane Tamane amutou ei ino oata na langi mei bilesi sele.

## 6

*Iesu ei ade a inigogona mina buloine sou sanii sea*

<sup>1</sup> “Tilale amutou. Amutou ma gologoli lei a inigogona kubaana mine amutou na matane sou a vanunua ma tavivine, ne sou ite. Mane amutou goli maido, amutou ma mapigogoi ete ne amutou guale a mapa maino ne Tamane amutou na langi.

<sup>2</sup> “Mane oo kale no bilii a golu tasa usino ne sou a kapelabena vanua, oo no ma pusi ete a tuai muga pala ane oo tomane sou a vanua na ade iototona sou goli lilo na luma na kinaka mine amutou me na vea tamai. Sou a vanua do sou kale ne sou auala ane sou a vanunua ma tavivine, ne sou a vanunua ma tavivine sou damu sou a doanana vanua me sou beilange a aisa ne sou. Eau ade patotona sele ane amutou, sou a vanunua ieli sou gualesi a mapane sou.

<sup>3</sup> Mane oo kale no buloi e sou a kapelabena vanua, a limamu e meli ei ni ma muada oto a golu a limamu e gata ei goli.

<sup>4</sup> Maido ma pipigona dinodo oo goli ni muina ovu. Me Tamamu ei muada a gologolu i ovu, ei ni malii a mapa usino ne oo.

*Iesu ei ade a inigogona kinaka  
(Luk 11:2-4)*

<sup>5</sup> “Ilala amutou kaka, amutou ma gologoli lei tomane aualana vanua sou gologoli. Sou kale mamai sele ne sou magili me sou kaka

§ 5:33 Pipigona mina Prist 19:12; Savuluna 30:2; Binea 23:21  
Binea 19:21 † 5:43 Pipigona mina Prist 19:18

\* 5:38 Gualeliuna 21:24; Pipigona mina Prist 24:20;

lilo na luma na kinaka mine sou me na apulotoloto na vea buobuo, ve ne sou a vanunua ne sou ite sou. Eau vei ivu ane amutou, sou gualesi a mapane sou.

<sup>6</sup> Moni na ilala oo kale no kaka, oo no gali ulilo na vilo minio mo kapi a tema mo kaka ane Tamamu ei ino na avena i ovu. Me Tamamu ei iteite a golu i ovu, ei ni maliu a mapa ane oo.

<sup>7</sup> Na ilala amutou kaka, umana namutou goli a matamatana inade sabubu makuba tomane a vanua masala sou kaka. Sou damu ve mane sou goli a matamatana inade makuba, Salemo ni longe sou.

<sup>8</sup> Amutou ma ogomulimuli lei a inigogona mine sou. Ilala amutou saboa mu tagi e Tamane amutou a golu tasa, ei muadasi a golugolu vuso amutou boto i.

<sup>9</sup> “Maidolo me namutou kaka maido, ‘Tamane amiteu, oo tubu na langi, aisamu ei ni muina maolo.

<sup>10</sup> Niitealalena minio ni sibitala usinani. Toesagali e amiteu namiteu ogomuli a masagana minio na magamaga tomane sou ogomuli na langi.

<sup>11</sup> Oo no billi e amiteu a gona inani mapi-gogoi a malada seidei ie.

<sup>12</sup> Me oo no lilotase a sinusu mine amiteu, tomane amiteu lilotase a sinusu sou goli le amiteu.

<sup>13</sup> Oo no ma itetasetase lei e amiteu namiteu bosa na tinovo, moni gualeliu e amiteu maino na golugolu pagu.’

<sup>14</sup> “Mane amutou lilotase a sinusu mine sou a vanunua ma tavivine, Tamane amutou na langi ei ni lilotase a sinusu mine amutou tamai.

<sup>15</sup> Moni mane amutou ma lilotase ete a sinusu mine sou a vanunua ma tavivine, Tamane amutou ei tamai ei ni ma lilotase ete a sinusu mine amutou.

*Isu ei ade a inigogona mina vavaena inani*

<sup>16</sup> “Mane amutou vavae e amutou a inani, io namutou ma lagu mainiini lou tomane a vanua na ade iototona sou goligoli. Sou lagu mainiini, ve a vanunua ma tavivine ne sou muada sou vavae e sou a inani. Eau vei ivu ane amutou, sou gualesi a mapa ne sou.

<sup>17</sup> Moni e oo, mane oo vavae e oo a gona inani, oo no tau a lomo na letemu mo loloi a lagumu.

<sup>18</sup> Maido a vanunua ne sou ma muada oto e oo vavae e oo a inani. Tamamu ei ino ovu, ei tasa moni ei ni muada. Ei ite a golugolu i ovu, ei ni maliu le oo a mapamu.

*Inigogona taupiluna golu doadoana na langi*  
(Luk 12:33-34)

<sup>19</sup> “Amutou ma taupilipili lei a golugolu doadoana mine amutou na magamaga ie. Na magamaga ieli a loto ma veveana sou toegegeli a golugolu, ma vanua na lilimana sou utipee a bigomu me sou paaali.

<sup>20</sup> Moni amutou ne mu taupili a golugolu doadoana mine amutou oata na langi. Na aubu odo a loto ma veveana sou ma toegegeli ete a golugolu, ma vanua na lilimana sou ma utipee ete a bigomu me sou paaali.

<sup>21</sup> Na avena a golugolu doadoana minio ino i, na avena moni iedo a lilomu tamai ei ni ino i.

*Matamu ei a lada mina vovomu*  
(Luk 11:34-36)

<sup>22</sup> “Matamu ei a lada mina vovomu. Mane a matamu ei kubaana, io a vovomu vuso ei ni muada,

<sup>23</sup> moni mane a matamu i pagu, io a vovomu vuso ei ni tunuui. Maido me mane a muada ei ino minio ei tunuui, tunuui iodo ei ni buo sele.

*Bibi ei ma mapiogoi ete ni pipigo ana mapana lua olu*  
(Luk 16:13)

<sup>24</sup> “A bibi tasa ei ma mapiogoi ete ni muina matano na mapana lua olu. Ei ni kale tasa, me ei ni lilogegelu ane tasa. Ei ni longemuli a inade ne tasa, mei ni lametase tasa. Amutou ma mapiogoi ete namutou muina matano ne Salemo me na vatu pilu i.

*Ma damutala papaipai lou*  
(Luk 12:22-31)

<sup>25</sup> “Maido me eau vei le amutou maido, amutou ma damutatala papaipai lou a maulina mine amutou me mu vei, ‘Neitou ani a sava? Neitou ini a sava?’ Me namutou ma damutatala papaipai lou a vovone amutou me mu vei, ‘Neitou kai a sei kinainai?’ A maulina ei muge a gona inani, ma vovone eitou ei muge a kinainai.

<sup>26</sup> Amutou ite a manumanu. Sou ma danidani ete a gona inani me sou ma taupilipili ete me sou ma tautau ete na luma na inani. Moni e Tamane amutou na langi ei maaniani e sou. Nane amutou ma muge ete a manumanu sou ie, io?

<sup>27</sup> Me sei bibi mine amutou ei mapiogoi ni adesui a matailala baini lou na maulina mine ei a inigogona damutatala papaina minei?

<sup>28</sup> “Posa matina amutou damutatala papaipai a gona kinainai? Amutou ite kube a sesesena obu. Sou palea matina? Sou ma mangava oto me sou ma vivili ete a malo.

<sup>29</sup> Moni eau vei le amutou, lisa a mapana e Solomon ei kai a gona kinainai doadoana na vovone ei, moni a malasana doana mina

sesese na obu ie ei vululusi sele a malolom-ena mine Solomon.

<sup>30</sup> Seidei a gulugulu ino maisaba, maisavulo moni a vanunua ne sou valiuti me sou pitase sou usino na oavi. Mane matana gulugulu maido Salemo ei malolome, Salemo ni malolome amutou tamai. Silimulina mine amutou ei alabaini moni!

<sup>31</sup> Maido me amutou ma damutala pa-papai lou ne mu vei ve, 'Neitou ani a sava? Neitou ini a sava? Neitou kai a sava?'

<sup>32</sup> Sou a vanunua masala moni sou lilibuu a punogena golugolu vuso ie. Moni e Tamane amutou tubu na langi ei muadasi maido amutou gege a matamatana golugolu sou ie.

<sup>33</sup> Moni a munugana golu ne mu goli ei maido, palapala namutou guale a nitealalena mine Salemo ma inigogona bilesi minei, mane amutou goli maido, Salemo ei ni bilii e amutou a golugolu vuso tamai.

<sup>34</sup> Maido me amutou ma damutaletale vaute lei a malada savulo, vuna malada savulo ei ni damutaletale vaute ei oto. Mavaana mina malada tasa, ei mapigogoi moni a malada iede.

## 7

*Amutou ma vilemulialale lei a inigogona mine sou sanii*

*(Luk 6:37-38, 41-42)*

<sup>1</sup> "Amutou ma vilemulialale lei e sou sanii, maidolo me Salemo ei ni ma vilemulialale ete amutou, dae Salemo ni goli a inigogona tasa maido usino ne amutou tamai.

<sup>2</sup> Salemo ei vilemuliale amutou na inigogona tasa moni tomane amutou goli le sou sanii. Ma golu amutou goli le sou sanii, na golu moni iedo Salemo ei ni maliu le amutou.

<sup>3</sup> "Posa matina oo ite a molomolo ino na matane tamaimu, moni oo ma damutale ete a obu taula ino na matamu oto?"

<sup>4</sup> Mane a obu ino na matane oo oto, vuna matina oo mapigogoi no vei le tamaimu, 'Tamaigu, eau kale na taulele a molomolo ino na matamu?'

<sup>5</sup> Oo a bibi na ade iototona, palapala oo no taulele a obu taula ino na matane oo oto, me mulimuli oo no gemu kuba me no taulele a molomolo baini ino na matane tamaimu.

<sup>6</sup> "Amutou ma biliilii lei e busebuse a golu ei maolo, dae ne sou sauvule me sou aleale amutou. Me amutou ma langelange lei a gapu malasolosolo mine amutou usino na bolobolo, dae ne sou soetole moni a ubune sou.

*Tagu, mo tilomuli, mo lalaba*  
*(Luk 11:9-13)*

<sup>7</sup> "Amutou namutou kaka ane Salemo ni bilii e amutou a golu, me ei ni bilii e amutou. Namutou tilomuli, me namutou poge. Namutou lalaba na tema, me a tema ni peo ane amutou.

<sup>8</sup> A vanua sou kaka ane Salemo, ne sou gualeale a golu. Bibi ei tilomuli, ei ni poge. Ma bibi ei labe a tema, tema ni peo ane ei.

<sup>9</sup> "Mane natune amutou tasa ei kaketagi e tamana ni bilii e ei a ulalu, tamana ni bilii e ei a vatu tasa? Boa.

<sup>10</sup> Mane natuna ei kake tamana ni bilii e ei a aia, tamana ni bilii e ei a aliusu? Boa.

<sup>11</sup> Mane amutou goli a inigogona makuba i pagu, moni amutou muada iiti a biliina golugolu doana usino ne natatune amutou. Maido me namutou muada iiti, Tamane amutou tubu na langi ei ni mongemonge sele a biliina golugolu kubaana usino ne sou a vanua sou tagi e ei.

<sup>12</sup> Inigogona vuso amutou kale ne sou a vanunua ma tavivine ne sou goli le amutou, sou a inigogona moni maido ne mu goli le sou. Ieli a vuna inade mina binea me sou a profet.

*Namutou gali ulilo na tema baini*  
*(Luk 13:24)*

<sup>13</sup> "Amutou ne mu gali ulilo na tema baini. Tema usino na aubu na bualena ei buo, ma vea usino na aubu iedo ei peo mamau mei malamala a ogomulina, maidolo ma vanunua ma tavivine papaina sou ogomulimuli a vea do.

<sup>14</sup> Moni a tema usino na aubu na gualena maulina ei alabaini sele, ma vea usino na aubu odo ei tivula sele a ogomulina, maidolo ma bibi ma tavine tastasa moni sou ite me sou ogomuli a vea do.

*Eitou tilale eitou e sou a aualana profet*  
*(Luk 6:43-44, 13:25-27)*

<sup>15</sup> "Amutou mu tilale sou a aualana profet. Sou tomane a buse aou sou kai a aivuna sipsip, ne sou asu agavuale amutou a sipsip me sou aleale amutou.

<sup>16</sup> Amutou ite a inigogona mine sou me mu muada i sou a aualana profet ue boa. Vuna, obu ooloo ei ma vuale ete a vain, gulugulu momosa ei ma vuale ete a fik.

<sup>17</sup> Tomane moni a obuobu doana sou vuale a vuana i doana, ma obu pagu ei vuale a vuana pagu.

<sup>18</sup> Obu doana ei ma mapigogoi ete ni vuale a vuana pagu. Ma obu pagu ei ma mapigogoi ete ni vuale a vuana doana.

<sup>19</sup> Obuobu vuso sou ma vua kubakuba oto, iede sou tale me sou lange usino na oavi.

<sup>20</sup> Maido me namutou ite a inigogona mine sou oto me mu muada e sou a aualana profet.

21 “Vanunua ma tavivine vuso sou vatevate eau, ‘Bibi Taula, Bibi Taula,’ ne sou gali ulilo na niitealalena mina langi? Boa. Bibi ei ogomulimuli a masagana mine Euma tubu na langi, ei moni ni gali ulilo.

22 Na malada na vavasana buo mine Salemo, vanunua ma tavivine makuba ne sou vei le eau maido, ‘Bibi Taula, Bibi Taula, amiteu goli a pipigona malongolongona na aisamu. Na aisamu amiteu taulele a nunu pagu me amiteu goli a gona sinaga makuba.’

23 Na ilala do eau na veipale le sou maido, ‘Eau ma muada sapa oto e amutou. Amutou a vanua na gunolina inigogona pagu, amutou mavulo.’

*Ve a lua mina tinigena luma  
(Luk 6:47-49)*

24 “Maido me a bibi ei longe a inadegu ieli mei ogomuli, ei tomane a bibi ei isa a damutatalana doana mei tige a luma minei muata na vatu buo.

25 Ma adavu i pu, ma sinali na nanu i palea ma avivili i ilisi sagali, ma golugolu vuso do iune a luma do, moni ei ma tavuvu oto, vuna luma do ei tabatotola sele muata na vatu buo lilo na magamaga.

26 Moni a bibi ei longe a inadegu mei ma ogomuli ete, ei tomane a bibi ei vauta i tige a luma minei muata na magamaga lealea moni.

27 Ma adavu i pu, ma sinali na nanu i palea ma avivili ei ilisi sagali, ma golugolu sou iedo ei iune a luma do, ma luma i tavuvu utano. E, ei tavuvu gegelu sele.”

28 Iesu ei ademudasi a inade sou ie, io a vanunua ma tavivine makuba sou saga sele a matetengina minei.

29 Vuna maido, ei ma matetengi ete e sou tomane a vanua na muadana binea. Ei matetengi e sou tomane a bibi ei isa a aisa buo.

## 8

*Iesu ei toekube a bibi tasa ei isa a sinobe a kolokolo*

*(Mak 1:40-45; Luk 5:12-16)*

1 Iesu ei asutase a loena mei sivo utano, ma vanunua ma tavivine makuba sele sou ogomuli e ei.

2 A bibi tasa ei isa a sinobe a kolokolo i sibitala le Iesu mei totopatulu, ei vei, “Bibi Taula, mane oo kale, oo mapigogoi no toekube e eau.”

3 Me Iesu ei tau a limana na bibi iedo mei vei, “Eau kale. Oo palea kuba.” Io ma tabaa oto, a sinobe a kolokolo minei ei pulu mei palea kuba.

4 Me Iesu ei vei lei maido, “Oo tilale, oo ma veivei lei ana bibi tasa a golu i palea minio

ie. Oo asu mo maite a vovomu na prist, me oo goli a niabi tomane Moses ei vei. Me sou a vanunua ne sou muada, sinobe minio ei pulosi.”\*

*Iesu ei toekube a bibi na pipigona mina munuganuga na vanua na maubina  
(Luk 7:1-10)*

5 Iesu ei gali ulilo ne Kapenaum, ma munuganuga na vanua na maubina† mine sou e Rom ei asu maino mei tagi sagali e Iesu maido,

6 “Bibi Taula, bibi na pipigona minau ei sobe mei ino mavutavuta moni na poso. Tuatane ei mamate sele, ei isa a davutina buo sele.”

7 Io Iesu ei vei lei, “Eau na asu na toekube ei.”

8 Moni a munuganuga do ei maliu a inade minei maido, “Bibi Taula, eau a bibi ne Iuda boa, maido me eau a bibi kubaana boa mapigogoi oo no gali ulilo na luma minau. Oo ade moni, ma bibi na pipigona minau ei ni kuba lou.

9 Eau tamai eau ino matano na vanua sou isa a aisa buo mina itealalene eau. Me eau oto eau isa a vanua na maubina sou matano minau. Mane eau vei le tasa, ‘Oo asu,’ io ei asu. Mane eau vei le tasa, ‘Oo vele,’ io ei asu usinani. Na ilala eau vei ana a bibi na pipigona minau, ‘Oo goli a pipigona ie,’ io ei goli.”

10 Iesu ei longe a inade li mei saga sele. Me ei vei le sou a vanunua sou ogomuli e ei maido, “Eau vei ivu le amutou, eau saboa ite a bibi tasa balivua mina abuna mine Israel ei isa a matana silimulina tomane a bibi ie.”

11 “Me eau vei le amutou, vanunua ma tavivine makuba ne sou ilisitase a avena oaso tala i ma avena oaso solo i, ne sou asu maino me ne sou ugu pilu e Abraham, Aisak me Iekop lilo na niitealalena mina langi.

12 Moni a vanunua ma tavivine papaina mine sou e Iuda palapala Salemo ei vileale mina niuguna na avena minei, Salemo ni taulele sou usino na aubu na tunuui. Na avena do ne sou tangi mamau me ne sou gado kasesele a livolivo ne sou.”

13 Me Iesu ei vei le a munuganuga do maido, “Oo asu. Ma golugolu ni sibitala le oo tomane oo silimuliosi.” Me na ilala bilesi iodo, bibi na pipigona mina munuganuga do ei palea kuba lou.

*Iesu ei toekube a maulune Pita  
(Mak 1:29-31; Luk 4:38-39)*

14 Iesu ei gali ulilo na luma mine Pita, me ei ite a maulune Pita ei mavuta na poso, ei isa a sinobe ma vovona ei tuntunu sele.

\* 8:4 Pipigona mina Prist 14:2 † 8:5 A munugana bibi ei itealale a vanua na maubina savulu sobo tasa.

15 Me Iesu ei lapitole a limane ei me a sinobe i bualetase ei. Me ei ilisi mei masusulu a gona inani ane ei.

*Iesu ei toekube a vanunua ma tavivine makuba*

*(Mak 1:32-34; Luk 4:40-41)*

16 Na lavilavi sou maasi a vanunua ma tavivine makuba sou isa a nunu pagu ino ne sou, me sou asuale Iesu. Me ei ade moni, ma nunu pagu sou odo sou asutase sou a vanunua ma tavivine do. Me ei toekube a vanunua vuso sou sobe tamai.

17 Me na inigogona li ei toeselese a inade tasa Salemo ei goli na asena profet e Aisaia. Ei vei maido,  
“Ei oto ei tabule a matamatana sinobe ma mavaana mine eitou.”<sup>‡</sup>

*Iesu ei ade a inigogona ogomuline ei*

*(Luk 9:57-60)*

18 Iesu ei ite a abuna vanunua ma tavivine buo sou magili saili ei, me ei vei le sou a disaipel minei maido, “Eitou asu usino na lili na nanu maino.”

19 Ma bibi na muadana binea tasa ei asu usinani mei vei le Iesu maido, “Magiligilina, aububuna vuso oo asu i, eau na asu pilu e oo.”

20 Me Iesu ei vei lei maido, “Busebuse aou sou isa a aova na magamaga, ma manumanu sou isa a noa ne sou. Moni e Natuna Bibi ei ma isa oto a muina ngunolo.”

21 Ma bibi tasa mine sou a disaipel, ei vei le Iesu maido, “Bibi Taula, longo ane eau na asu na peilai muge uma.”

22 Moni Iesu ei vei lei, “Muina. Sou a vanua sou matesi, ne sou peilai e sou a abuna mine sou oto, moni oo ogomuli e eau.”

*Iesu ei ade, me a avivili taula ei mate*

*(Mak 4:35-41; Luk 8:22-25)*

23 Io Iesu ei sae na bot, me sou a disaipel minei sou ogomuli e ei.

24 Me saga i a avivili taula sele ei mailisi a dasi mei lange laulau a bot. Moni e Iesu ei ino ngolo.

25 Me sou asu toleluti ei, me sou vei, “Bibi Taula, buloi e amiteu. Bisii moni neitou palolo.”

26 Me ei vei le sou maido, “Silimulina mine amutou ei alabaini sele. Vuna matina amutou lae?” Me ei ilisi mei sinoa ana avivili pilu a dasi. Ma avivili ei mate, ma dasi ei ma vuvule sapa oto.

27 Me sou saga sele me sou vei, “Ei sei matana bibi, ma avivili pilu a dasi su longemuli a inadene ei?”

*Iesu ei taulele a nunu pagu na bibi lua*

*(Mak 5:1-20; Luk 8:26-39)*

28 Iesu ei asu sibitala na lili na nanu maino ne Galili, na magamaga mine sou e Gadara. Ma bibi lua su isa a nunu pagu me sulu malu maisaba na muina minate, su asuale Iesu. Sulu iou sele, maido me sou a vanunua ma tavivine sou ma mapigogoi ete ne sou asu na vea do.

29 Sulu tola sagali maido, “Oo natune Salemo, oo kale no toematine e amilu? Ilala saboa, oo asu usinani mina toegegeline amilu, io?”

30 Abuna bolobolo makuba ino bulago sapa me sou aaniani a muine sou.

31 Me sou a nunu pagu sou tola sagali usino ne Iesu maido, “Mane oo votetase amiteu, oo no malonge amiteu gali ulilo na bolobolo vuso ie.”

32 Me Iesu ei vei le sou maido, “Amutou asu.” De sou a nunu pagu sou ilisitase a bibi lua do, me sou gali ulilo na bolobolo. Ma abuna bolobolo do sou vele vauta sele usino na babangi. Me sou bosa utano na dasi, me sou pumutu me sou mate.

33 A vanua na itealalena bolobolo sou ite me sou oava. Sou asu sibitala na aubu buobuo me sou vei le sou a golugolu vuso ei palea. Me sou mapamuli a golu i palea le a bibi lua do su isa a nunu pagu.

34 Io, sou a vanunua ma tavivine makuba na aubu odo sou asu usinani ne Iesu. Na ilala sou ite ei, sou ade sagali ane ei ni ilisitase a avena mine sou.

## 9

*Iesu ei toekube a bibi tasa limana ma ubuna i mamate*

*(Mak 2:1-12; Luk 5:17-26)*

1 Iesu ei sae na bot tasa, mei voleutu me veteliu usino na aubu minei.

2 Me sanii sou tabulebule a bibi tasa i sobe usinani minei, tuatuane ei mamate sele, maido ei mavuta moni na poso. Me Iesu ei ite maido sou silimuli sele, me ei vei ana a bibi sobe do maido, “Natugu, lilomu ni tabuli mea. Eau taulelesi a sinusu vuso minio.”

3 Vanua na muadana binea sanii sou longe a inade ne Iesu, me sou ade balivua ne sou oto maido, “A bibi iedo ei puisobe a muine Salemo!”

4 Iesu ei muadasi a damutatalana mine sou, mei vei, “Posa matina amutou isa a damutatalana pagu na lilone amutou?”

5 Sei inade ei malamala eau na goli, ‘Eau taulelesi a sinusu minio,’ ue ‘Oo ilisi mo asu?’

6 Moni eau kale ne amutou muada i maido, Natuna Bibi ei isa a sagagalina na magamaga ie, mei mapigogoi ni taulele a sinusu vuso.” Iesu ei adesi, mei gemualale

a bibi iedo mei vei lei maido, “Oo ilisi mo guale a mavutavutana minio, mo asu usino na luma minio.”

<sup>7</sup> Maido ma bibi iedo ei ilisi mei asu usino na luma minei.

<sup>8</sup> Vanunua ma tavivine sou ite maido me sou lae, me sou beilange a aisane Salemo, vuna ei bilii a matana sagagalina usino ne sou a vanua.

*Iesu ei toleale Matiu*

*(Mak 2:13-17; Luk 5:27-32)*

<sup>9</sup> Iesu ei asu usino mei ite a bibi tasa, aisana e Matiu, ei ugugu na luma na gualena takis. Me Iesu ei vei lei maido, “Ogomuli e eau.” Me Matiu ei ilisi mei ogomuli e Iesu.

<sup>10</sup> Me Iesu ei ugu aani na luma mine Matiu, ma vanunua makuba na gualena takis ma vanunua na gunolina sinusu sou asu usinani. Sou ugu me sou aani pilu e Iesu me sou a disaipel minei.

<sup>11</sup> Sou e Parisi sou ite maido, me sou tagi e sou a disaipel mine Iesu maido, “Posa matina bibi na matetengina mine amutou ei aani pilu a vanua na gualena takis me sou a vanua na gunolina sinusu?”

<sup>12</sup> Iesu ei longe a inade do, mei vei maido, “Vanunua sou ma isa oto a sinobe, sou ma asuasu oto usino na bibi na toekubena. Sou a vanunua sou sobe moni sou asu usino na bibi na toekubena.

<sup>13</sup> Amutou asu mu guale a muadana inade ieli ino na Laulau mine Salemo, “Eau ma kale ete a niabi sabubu amutou gologoli. Eau kale mamai sele ne amutou goli a inigogona dinodo ane sou sea.\*” Me Iesu ei ade lou maido, “Eau ma asu oto usinani mina tolealene sou a bilesina vanunua. Eau asu usinani mina tolealena vanunua na sinusu.”

*Iesu ei ade a inigogona mina vavaena inani*

*(Mak 2:18-22; Luk 5:33-39)*

<sup>14</sup> Na ilala do sou a disaipel mine Ioanes sou asu usinani ne Iesu me sou tagi e ei maido, “Amiteu pilu e sou e Parisi amiteu vavae amiteu a gona inani, moni posa matina disaipel minio sou ma vavae ete sou a gona inani?”

<sup>15</sup> Me Iesu ei vei le sou maido, “Mane na ilala bibi tasa ei taulai mei muina pilu e sou minei, ne sou vavae e sou? Boa. Moni mulimuli, na ilala sou guale a bibi na taulaina iedo usinosi, ne sou vavae sou a gona inani.

<sup>16</sup> “Bibi tasa boa ei ni guale a maduna malo alaba mina saisobena masingena kinainai mumugu. Mane ei goli maido, a malo mina saisobena masingena do ei ni

toemasinge a kinainai lou, ma masingena do ni palea buo mamau lou.

<sup>17</sup> Ma bibi tasa ei ma singi voni ete a vain alaba na uliulina meme mumugu. Boa. Mane sou goli maido, io a uliulina meme ni masinge, ma vain ni singi utano na magamaga, ma uliulina meme tamai ni mamau. Maido me sou singi a vain alaba na uliulina meme alaba, me sulu pilu ne su doana.”

*Iesu ei mamauli a tavine baini tasa mei toekube a tavine ei lapitole a kinainai minei*

*(Mak 5:21-43; Luk 8:40-56)*

<sup>18</sup> Iesu ei saboa ino adeade ane sou a disaipel mine Ioanes, ma bibi buo tasa ei asu maino mei totopatulu agavuale a ubune Iesu mei vei, “Natugu tavine ei matesi simonimoni ie. Moni oo vele, no tau a limamu ne ei, me ei ni mauili lou.”

<sup>19</sup> Me Iesu ei ilisi mei ogomuli e ei usino, me sou a disaipel minei sou asu pilu.

<sup>20</sup> Moni a tavine tasa ino, a dala i singi ne ei taliuliu mapigogoi a avala savulu tasa timana lua. Tavine do ei asu na taulu ne Iesu, mei tau a limana na aisuna kinainai lagolago mine Iesu.

<sup>21</sup> Ei vei le ei oto maido, “Mane eau pige moni a kinainai minei, eau na kuba lou.”

<sup>22</sup> Moni e Iesu ei sauvule mei ite a tavine do, mei vei, “Natugu, lilomu ni tabuli mea. Oo silimuli eau, maido me oo palea kuba lou.” Na ilala moni iodo tavine do ei palea kuba lou.

<sup>23</sup> Io Iesu ei asu sibitala na luma mine bibi buo do, mei ite sou a vanunua ma tavivine sou tangitangi. Sou a vanunua sou pusipusi a vivigo me sou a vanunua ma tavivine sou goli a mangelengelenana buo.

<sup>24</sup> Me Iesu ei vei, “Amutou avulo. Tavine baini ei ma mate oto. Ei ngolo moni.” Me sou polivai e ei.

<sup>25</sup> Moni Iesu ei votetase sou a vanunua ma tavivine usala, me Iesu ei gali ulilo mei lapitole a limane tavine alaba do, me ei ilisi.

<sup>26</sup> Ma inade na golu Iesu goli iodo ei vele-bubula na aububuna vuso mina avena iedo.

*Iesu ei toekube a mata ego lua me a bibi tasa asena i sobo*

<sup>27</sup> Iesu ei ilisitase a aubu odo mei asu usino. Ma bibi lua mata ego sulu ogomuli e ei me su tola maido, “Oo Natune Devit, oo lilomuli e amilu.”

<sup>28</sup> Ei gali ulilo na luma, ma mata ego lua do su asuale ei. Iesu ei tagi e sulu maido, “Amulu silimuli tomane eau mapigogoi na goli a golu ieli?” Me sulu vei lei, “E, Bibi Taula.”

<sup>29</sup> Io ei tau a limane ei na matane sulu, mei vei maido, “Amulu silimuli e eau. Maido moni a golu ielili ni palea le amulu.”

\* 9:13 Hosea 6:6

<sup>30</sup> Maido ma matane sulu i peo. Me Iesu ei bilii e sulu a inade sagali maido, “Amulu ma veivei lei ana bibi tasa a golu ei palea le amulu ie.”

<sup>31</sup> Moni e sulu asu me su vei le sou a vanunua ma tavivine na aububuna vuso mina avena do a golugolu vuso Iesu ei goli.

<sup>32</sup> Na ilala bibi lua do su ilisitase Iesu me su asu, sou a vanunua ma tavivine sou guale a bibi tasa asena sobo ei isa a nunu pagu, me sou maasi ei usinani ne Iesu.

<sup>33</sup> Iesu ei votetase a nunu pagu iedo, ma bibi asena sobo do ei ade lou. Ma vanunua ma tavivine sou saga me sou vei, “Lisa a matana golu maido ei ma palea oto na avena vuso ne Israel.”

<sup>34</sup> Moni sou e Parisi sou vei, “Ei votetase-tase sou a nunu pagu a sagagalina mina mapana mine sou a nunu pagu.”

*Iesu ei lilomuli e sou a vanunua ma tavivine*

<sup>35</sup> Iesu ei asu gaga na aubu buobuo vuso ma aububuna banini. Ei matetengi e sou a vanunua ma tavivine lilo na luma na kinaka mine sou e Iuda. Ei veipale a malongolongona kubaana mina niitealalena mine Salemo, mei toekube sou a matamatana sinobe ino na vovone sou.

<sup>36</sup> Ei ite sou a abuna vanunua ma tavivine taula, mei lilomuli sele sou, vuna damutatalana mine sou ei maisaba sele me sou lagu dododo sele tomane a sipsip sou ma isa oto a bibi na niitealene sou.

<sup>37</sup> Maido me ei vei le sou a disaipel minei maido, “Gona inani makuba sele i matuasi na mauma, moni a vanua na pipigona sou ma makuba oto.

<sup>38</sup> Maido me namutou kake Tamana mauma ni peltase a vanua na pipigona usino ne sou taupili a gona inani minei.”

## 10

*Aisaisa ne sou a aposel savulu tasa timana lua*

*(Mak 3:13-19; Luk 6:12-16)*

<sup>1</sup> Iesu ei toleale a disaipel minei savulu tasa timana lua mei bilii e sou a sagagalina mina taulelene sou a nunu pagu me mina toekubena matamatana sinobe vuso.

<sup>2</sup> Aisaisa ne sou a aposel\* savulu tasa timana lua ei maido, munugana e Saimon, ei isa a aisana tasa lou e Pita, me tasine ei e Andru. Me Iemus natune Sebedi, pilu e tasine ei e Ioanes.

<sup>3</sup> Me Pilip, Batolomeus, Tomas, me Matiu, ei a bibi na gualena takis. Me Iemus, ei e natune Alpius, me Tadius,

<sup>4</sup> me Saimon, ei a abuna ne Selot,† me Iudas Iskariot, ei a bibi mulimuli ni bilii e Iesu na lima ne sou a butu.

*Iesu ei bilii a pipigona ne sou a aposel savulu tasa timana lua*

*(Mak 6:7-13; Luk 9:1-6)*

<sup>5</sup> Iesu ei peltase a vanunua savulu tasa timana lua do usino, mei bilii e sou a inadenade maido, “Amutou ma asuasou lou usino na vanunua mine sou a abuna sea. Me namutou ma galigali lou ulilo na aubu buobuo mine sou e Samaria.

<sup>6</sup> Amutou ne mu asu bilesi usino ne sou a sipsip na abuna mine Israel, sou bualesi.

<sup>7</sup> Mu asu mu veipale a inade maido, ‘Niitealalena mine Salemo i maino agaviosi.’

<sup>8</sup> Mu asu mu toekube a vanua sou sobe me mu mailisiliu a vanua sou matesi, me mu toekube a vanua sou isa a sinobe a kolokolo ne sou palea alaba lou, me mu taulele a nunu pagu ne sou a vanunua ma tavivine. Golu amutou guale ie, iede amutou guale sabubi, mapana boa. Maido me namutou bilii sabubi e sou a vanunua ma tavivine. Namutou ma gualeale lei a mapa.

<sup>9</sup> “Namutou ma iudidi lei a gol ue a silva ue a kopa.

<sup>10</sup> Ilala amutou asuasou namutou ma iudidi lei a bie. Me amutou ma gualeale lei a kinainai lua ma ubupolo ma butu na inasu pilu e amutou. Ne sou bilii a bibi na pipigona a gona inani ma golugolu sanii.

<sup>11</sup> Mane amutou asu ulilo na aubu buobuo tasa ue a aubu baini tasa, namutou poge a bibi tasa na aubu odo ei a bilesina bibi ni buloi e amutou. Ne amutou ugu pilu a bibi iedo mapigogoi na ilala amutou ilisitase a aubu odo.

<sup>12</sup> Mane amutou gali ulilo na luma tasa, namutou vei le sou a vanunua ma tavivine na luma do maido, ‘Salemo ei ni maibalave amutou.’

<sup>13</sup> Mane sou a vanunua ma tavivine na luma do sou mongemonge a gualene amutou, a inade doana mine amutou ni muina ne sou. Moni mane sou ma mongemonge oto a gualene amutou, namutou gualeliu a inade doana mine amutou.

<sup>14</sup> Mane a bibi tasa ei ma kale ete ni guale amutou usino na luma minei mei ma kale ete ni longe a inade mine amutou, ilala amutou ilisitase a luma do ue a aubu do, namutou saveitase a kavou na ubune amutou.

<sup>15</sup> Eau vei ivu ane amutou, na malada Salemo ei vilealesi ni vavasa ane sou a vanunua ma tavivine, a mavaana do ei ni palea vululusi ivu a mavaana ei palea ne Sodom me Gomora.

\* **10:2** Aposel sou a vanua Salemo ei peltase mina gunolina pipigona minei. Disaipel mine Iesu sou savulu tasa timana lua pilu e Pol me Banabas, sou odo sou a aposel mine Iesu. † **10:4** Ilala do, abuna mine Selot sou kale ne sou peltaselele sou e Rom maino ne Israel.

*Matamatana mavaana ni sibitala  
(Mak 13:9-13; Luk 21:12-17)*

<sup>16</sup> “Longe. Eau peltase amutou usino tomane a sipsip balivua ne sou a busebuse aou. Maido ma muadana mine amutou ni tomane a aliusu, moni namutou maolo tomane a manu kuaa.

<sup>17</sup> Amutou tilale kube amutou e sou a vanunua. Ne sou vavasa ane amutou na vanua na toebilelesina inade mine sou, me ne sou tibi e amutou lilo na luma na kinaka mine sou.

<sup>18</sup> Ne sou lapuale amutou usino na vanua na itealena avena me sou a mapana, vuna amutou a vanunua ma tavivine minau. Moni na ilala do, amutou mapigogoi namutou veipale a malongolongona kubaana usino ne sou a vanua buobuo do me sou a vanunua seasea masala tamai.

<sup>19</sup> Na ilala sou maasi e amutou usino na vavasana, namutou ma laelae lou me ne mu damu, ‘Namiteu goli sei matana inade? Me namiteu maliu sei inade?’ Na ilala bilési iedo Salemo ei ni maite e amutou a inade namutou veipale.

<sup>20</sup> Vuna, amutou oto ne mu ma veipale ete a inade. Nunune Tamane amutou, ei ni veipale a inade na asene amutou.

<sup>21</sup> “Mulimuli a bibi ni vavasa ane tasine ei mei vei le sou ne sou valipute tasina. Me tamatamana ne sou butuale e natatune sou. Me natatuna ne sou butuale tamtamane sou me tinatinane sou, me sou vei ana a vanua ne sou valipute sou.

<sup>22</sup> Ma vanunua vuso ne sou lilogegelule sele ane amutou, vuna amutou a vanunua ma tavivine minau. Moni a vanunua ma tavivine sou magili sagali pea na punuluna malada, Salemo ni gualeliu e sou.

<sup>23</sup> Mane a vanunua ma tavivine mina aubu tasa sou toegegeli e amutou, io namutou oava usino na aubu tasa sea. Eau vei ivu ane amutou, amutou saboa mu mapalipali a pipigona na aububuna vuso ne Israel, me Natuna Bibi ni asu usinani.

<sup>24</sup> “Bibaini na nilongena matetengina ei ma seleuli ete a bibi na matetengina minei, ma bibi na pipigona ei ma oata oto na bibi buo minei.

<sup>25</sup> Moni mane a bibaini na nilongena matetengina ei palea tomane a bibi na matetengina minei, ei mapigogoi ane ei. Mane a bibi na pipigona ei palea tomane a bibi buo minei, ei tamai mapigogoi ane ei. Sou bilii a aisa e Belsebul<sup>‡</sup> ne tamana luma, maido me eitou muada, ne sou bilii a aisa pagu mamau sele lou ne sou a abuna minau.

*Namutou lae moni e Salemo  
(Luk 12:2-7)*

<sup>26</sup> “Amutou ma laelae lou a vanunua sou kale ne sou toegegeli e amutou. Golugolu vuso sou avisobe ni palea na avena muada. Ma inadenade vuso ino ovu, ne sou muada i.

<sup>27</sup> Inade eau goli le amutou na tunuu, iede namutou veipale na oaso. Ma inade amutou longe sou ade pakisikisi i na tagilane amutou, iede namutou magili oata na luma me mu adepalea i ane sou a vanunua ma tavivine.

<sup>28</sup> Amutou ma laelae lou a vanua sou valipute a vovo, moni sou ma mapigogoi ete ne sou valipute a nunune amutou. Amutou namutou lae moni e Salemo. Ei moni mapigogoi ni valipute a vovo, mei toegegeli a nunu na aubu na davutina.

<sup>29</sup> Amutou muada, sou a vanua sou olioli a manu banini lua a vatu tasa moni, moni Tamane amutou tubu na langi ei itealale kube sou a manumanu odo. Mane ei ma longo oto, tasa ne sou ma mapigogoi ete ni pu utano na magamaga.

<sup>30</sup> Me tamai, Salemo ei gi palipaliosi a aivu vuso na letene amutou, ei muada iiti sele e amutou.

<sup>31</sup> Maido me amutou ma laelae lou. Amutou seleuli a manu banini makuba.

<sup>32</sup> “A bibi ei veipale e eau masae ne sou a vanunua ma tavivine, eau tamai ea na veipale e ei masae ne Euma na langi.

<sup>33</sup> Moni a bibi ei ma veipale ete e eau masae ne sou a vanunua ma tavivine, eau tamai ea na ma veipale ete ei masae ne Euma na langi.

*Vanunua ma tavivine ne sou kale mamai  
sele Iesu*

*(Luk 12:51-53, 14:26-27)*

<sup>34</sup> “Amutou ma damudamu lou ve eau asu usinani mina valimatena maubina vuso na magamaga. Eau ma asu oto usinani mina valimatena maubina. Eau maasi a viso usinani.

<sup>35</sup> Eau asu usinani mina gunolina butualena ni palea tomane ‘a bibi ei ni butuale tamane ei, me natuna tavine ei ni butuale tinane ei, me tameeaana ne sulu maibutuala liu.

<sup>36</sup> Sou tamenatātuna na bibi odo sou oto ne sou butuale ei.<sup>§</sup>

<sup>37</sup> “Bibi ei kale mamai sele tamana ue tinana ane eau, ei ma mapigogoi ete ni muina e tamaigu. Ma bibi ei kale mamai sele natuna bibi ue natuna tavine ane eau, ei tamai ma mapigogoi ete ni muina e tamaigu.

<sup>38</sup> Ma bibi ei ma tabule ete a tauvaleuti minei mei ogomuli e eau, ei ma mapigogoi ete ni muina e tamaigu.

<sup>‡</sup> 10:25 Belsebul, a aisana tasa lou e Satan. <sup>§</sup> 10:36 Maika 7:6



<sup>39</sup> Bibi ei damu ve ei guale a maulina minei oto, maulina minei ni buale. Moni bibi ei bilii a maulina minei usinani ne eau, ei ni guale a maulina ivu.

*Bibi ei buloi e sou a abuna mine Kraisi ei ni guale a mapa doa*

*(Mak 9:41)*

<sup>40</sup> "Mane a bibi ei guale amutou mei toekube amutou, ei guale eau mei toekube eau tamai. Ma bibi ei guale eau, ei guale Salemo i peltase eau usinani.

<sup>41</sup> Mane a bibi tasa ei kale ni buloi a profet, mei guale ei usinani na luma minei mei iteale ei, Salemo ei ni bilii a bibi iedo a golugolu doana tomene a profet sou gualeale. Ma bibi ei kale ni buloi a bilesina bibi, me ei guale a bilesina bibi tasa usinani na luma minei mei iteale ei, a bibi edo ei ni guale a golugolu doana tomene a bilesina bibi ei gualeale.

<sup>42</sup> Ma bibi ei kale ni buloi a disaipel mine Iesu, mei bilii a taogo na nanu maigi tasa moni usino na bibi tasa sabubu ino na abuna disaipel minau, eau ade ivu ane amutou, mapana bibi iedo ei ni ma mapigogoi ete ni buale."

## 11

*Ioanes a bibi na maavuvutuna ei peltase a disaipel minei usino ne Iesu*

*(Luk 7:18-35)*

<sup>1</sup> Iesu ei ademudadasi a inade li usino ne sou a disaipel savulu tasa timana lua minei, io ei ilisitase a aubu odo mei asu usino na aububuna mina avena do mei matetengi a vanunua ma tavivine mei veipale a inade mine Salemo usino ne sou.

<sup>2</sup> Ioanes ei ino na luma na tunuu, ma ilala ei longe a inade na pipigona vuso Kraisi ei goli, ei peltase a disaipel minei usino ne Iesu.

<sup>3</sup> Me sou tagi e Iesu maido, "Oo a bibi moni e Salemo ei adegatunasi ni peltase usinani, ue namiteu magitali e tasa sea?"

<sup>4</sup> Iesu ei maliu le sou a inade maido, "Amutou asu mu vei le Ioanes a golugolu vuso amutou longe me mu ite.

<sup>5</sup> Sou a mata ego sou gemu lou, me sou a ubune sou pagu sou asu lou. Sou a vanunua sou isa a kolokolo sou palea alaba, me sou a tagilane sou sobo sou longe a inade. Sou a vanunua sou matesi sou ilisiliu. Sou a vanunua sou kapelabe sou longe a malongolongona doana.

<sup>6</sup> Me sou a vanunua sou ite eau, moni silimulina mine sou ei ma bosa oto, ne sou mongemonge."

<sup>7</sup> Sou a disaipel mine Ioanes sou asuosi, de Iesu ei vei le sou a vanunua ma tavivine e Ioanes maido, "Ilala amutou asu usino

na avena a vanua boa, amutou asu mina niitena a sava? Nane amutou asu mina niitena matana unei tasa avivili ei iune maisabe? Boa.

<sup>8</sup> Moni amutou asu mina niitena a sava? Nane amutou asu mina niitena bibi tasa ei kai a kinainai doadoana? Boa. Vanunua sou kai a kinainai doadoana, sou ino mina luma mine sou a mapana.

<sup>9</sup> Moni vuna matina amutou asu? Mina niitena profet, io? Iede moni. Me eau vei le amutou, ei vululusi sele a profet sanii.

<sup>10</sup> Na bibi moni ieli Laulau mine Salemo ei vei maido,

'Oite. Eau na peltase a bibi tasa mina veipalena inade minau, me ei ni muga pala ane oo. Mei ni masusulu a vea minio.\*

<sup>11</sup> "Eau ade ivu ane amutou, Ioanes a bibi na maavuvutuna ei vululusi e sou a vanunua sou palea na magamaga. Moni a bibi ei alabaini sele na niitealalena mina langi, ei vululusi e Ioanes.

<sup>12</sup> Soke na ilala Ioanes a bibi na maavuvutuna ei veipale a inade i asu mapigogoi seidei, sou a vanunua sou pipigo sagali a gualena niitealalena mina langi tomene vanunua mina maubina sou goli.

<sup>13</sup> Vuna sou a profet vuso ma laulau mina binea tamai, sou veipale a inade mine Salemo mapigogoi na ilala Ioanes ei sibitala.

<sup>14</sup> Mane amutou kale ne mu longe, mu longe. Laulau mine Salemo ei vei maido a profet Elaiia ei ni asu usinani, ei vei moni e Ioanes.

<sup>15</sup> Bibi ei isa a tagilana, ei ni longe a inade ie.

<sup>16</sup> "Mane eau kale na veipale a inigogona mine sou a vanunua ma tavivine mina ilala seidei, eau na goli sei matana adetinovona? Sou tomene moni e selebanini sou ugu na muina viepiluna me sou tola ane selebanini sanii maido,

<sup>17</sup> 'Amiteu pusi a vivigo ve ne amutou tilia, moni e amutou ma kale ete namutou tilia.

Me amiteu ale a inala mina dinodo, moni amutou ma tangitangi oto.'

<sup>18</sup> "Ioanes ei diviosi mei ma aani mamau-otou mei ma inini ete a vain. Me sou vei, 'A nunu pagu ino ne ei.'

<sup>19</sup> Me Natuna Bibi ei asu usinani, mei aani mei inu, me sou vei, 'Oite, ei a bibi na aanina mamau sele, me ei a bibi na niinu na vain makuba sele. Ei e tamaine sou a vanua na gualena takis me mine sou vanua na gunolina sinusu.' Sou veivei maido, moni a pipigona vuso mine Salemo ei maite i maido muadana mine Salemo ei a golu ivu."

\* 11:10 Malakai 3:1

*Mavaana ni palea le sou a vanunua ma tavivine sou ma sauvule ete a lilone sou*  
(Luk 10:13-15)

<sup>20</sup> Na aubu buobuo sanii Iesu ei pipigo a gona sinaga makuba, moni sou ma sauvule ete a lilone sou. Maido ma ilala dolo Iesu ei sinoa ane sou a vanunua ma tavivine mina aubu buobuo do.

<sup>21</sup> Ei vei maido, “Amutou a vanunua ma tavivine mine Korasin, mavaana ni palea le amutou. Amutou a vanunua ma tavivine mine Betsaida, mavaana ni palea le amutou tamai. Mane a bibi tasa ei asu usino na aubu buobuo Tair mei Saidon ei sou a gona sinaga tomane eau goli balivua ne amutou, lisa na malada sou e Tair me Saidon sou mapigogoi ne sou sauvule a lilone sou me sou pale a kinainai na dinodo me sou ugu mina kavou na oavi mina maitene sou oto sou lilomavaa sele a sinusu vuso sou goli.

<sup>22</sup> Maido eau vei le amutou, na malada Salemo ei vileale mina vavasana ane sou a vanunua ma tavivine, a mavaana ni palea le amutou ei ni vululusi sele a mavaana ei paleasi le sou e Tair me Saidon.

<sup>23</sup> Me amutou e Kapenaum, ne sou beilange amutou uata sele na langi, io? Ne amutou asu utano oto sele na muina vanunua sou matesi. Mane a bibi tasa ei asu usino na aubu buobuo e Sodom me ei goli a gona sinaganaga tomane eau goli balivua ne amutou, io Sodom ei ni saboa ino muina.

<sup>24</sup> Maido me eau vei le amutou, na malada Salemo ei vileale mina vavasana ane sou a vanunua ma tavivine, a mavaana ei ni palea le amutou ei ni vululusi sele a mavaana ei paleasi ne sou e Sodom.”

*Mu asuale eau mu guale a manoana*  
(Luk 10:21-22)

<sup>25</sup> Na ilala do Iesu ei vei maido, “Ouma, oo Bibi Taula na langi me na magamaga, eau vate kubaana usino minio, vuna maido oo tau oovi a golugolu iedo usino ne sou a vanunua sou isa a damutatalana doana ma muadana, me oo maite sou e selebanini moni.

<sup>26</sup> E, Ouma, oo ogomuli moni a masagana minio mo goli simaido.”

<sup>27</sup> “Euma ei tauosi a golugolu vuso na limagu. Ma bibi tasa ino boa ei muada e Natuna. Euma tasa moni ei muada i. Ma bibi tasa ino boa ei muada e Euma. Natuna pilu e sou a vanunua Natuna oto ei kale ni maite e Euma usino ne sou, sou moni sou muada e Euma.

<sup>28</sup> “Amutou a vanunua amutou mangava sele a tabulena mavaana buo sou ie, amutou vuso mu asuale eau me eau na bilii e amutou a manoana.

<sup>29</sup> Eau a bibi na lilomeana me eau a bibi na toebisiina, maido me amutou mu guale a pipigona minau tomane sou tau a obu na loona bulmakau ne sou lapuale a golugolu, me mu guale a muadana mainani ne eau. Mane maido, lilone amutou ni guale a manoana.

<sup>30</sup> A obu eau tau na loone amutou ie ei malamala a tabulena. Ma golu eau bilii e amutou namutou tabule, ei ma mavaa oto.”

## 12

*Tamana Maolona Malada*  
(Mak 2:23-28; Luk 6:1-5)

<sup>1</sup> Mulimuli, na Maolona Malada tasa mine sou e Iuda, Iesu ei asu balivua na mau-mauma mina vit. Ma disaipeel minei sou vitolo, me sou boni a vuavuana vit, me sou ani.

<sup>2</sup> Sou e Parisi sou ite me sou vei le Iesu maido, “Oite, a inigogona sou a disaipeel minio sou goli ieli ei ma kubaana oto na Maolona Malada.”

<sup>3</sup> Me Iesu ei adeliu ane sou maido, “Amutou ma gi ete a mapamulina Devit ei goli lisa pilu e sou a abuna minei sou vitolo?”

<sup>4</sup> Me Devit ei gali ulilo na luma bale mine Salemo mei guale a ulalu sou tautau ino na lagune Salemo, me ei pilu e sou a abuna minei sou ani. A ulalu odo sou valisobe le sou, moni a prist moni sou mapigogoi ne sou ani.\*

<sup>5</sup> Nane amutou ma gi tamai ete a inade ei ino na laulau mina binea? Ei ade e sou prist sou pope a binea mina Maolona Malada na luma mine Salemo, moni sou ma isa oto a sinusu.†

<sup>6</sup> Eau vei le amutou, bibi eili ie, ei vululusi a luma mine Salemo.

<sup>7</sup> Moni inade tasa ino na Laulau mine Salemo, ‘Eau ma kale ete a niabi sabubu, eau kale mamai namutou goli a inigogona doana usino ne sou sanii sea.‡ Mane amutou muada iiti a vuna inade ie, ne amutou ma mapigogoi ete ne mu tau a mavaana usino ne sou a vanunua sou ma isa oto a sinusu.

<sup>8</sup> Vuna Natuna Bibi ei a Tamana Maolona Malada.”

*Iesu ei toekube a bibi a limana mamau*  
(Mak 3:1-6; Luk 6:6-11)

<sup>9</sup> Iesu ei ilisitase a avena do mei gali ulilo na luma na kinaka mine sou e Iuda.

<sup>10</sup> Ma bibi tasa ino, limana tasa i mate. Vanunua sanii sou kale ne sou vavasa ane Iesu, maido me sou tagi e ei, “Nane neitou toekube a vanunua sou isa a sinobe na Maolona Malada, ue boa?”

\* 12:4 1 Samuel 21:6 † 12:5 Binea 28:9-10 ‡ 12:7 Hosea 6:6

11 Iesu ei vei le sou maido, “Mane a bibi tasa balivua ne amutou ei isa a sipsip tasa, ma sipsip iodo ei pu utano na lulu na Maolona Malada, amutou muada, a bibi iedolo ei ni lapitole a sipsip mei beilange ei uata.

12 Moni a bibi ei vululusi sele a sipsip. Maidolo me ei puiale ne eitou goli a inigogona doana na Maolona Malada.”

13 Me ei vei ana bibi iedo maido, “Toebilelesi a limamu.” Ma bibi iedo ei toebilelesi a limana, ma limane ei i palea kuba lou tomane a limane ei tasa lou do.

14 Moni sou e Parisi sou asutase a luma me sou maiademuli a punogena vea mina valiputene Iesu.

*Iesu ei a bibi na pipigona ivu mine Salemo*

15 Iesu ei muada a golu sou e Parisi sou kale ne sou goli le ei. Maido me ei ilisitase a aubu odo. Vanunua ma tavivine makuba sou ogomuli e ei, me ei toekube a vanunua ma tavivine vuso sou isa a sinobe.

16 Me Iesu ei ade sagali ane sou ne sou ma veipalele lei a pipigona minei usino ne sou a vanunua ma tavivine sanii.

17 Na inigogona ieli, Iesu ei toeselese a inade tasa Salemo ei goli na asena profet e Aisaia. Ei vei maido,

18 “Teli ei a bibi na pipigona minau. Eau oto eau vileale ei.

Eau kale mamai e ei, ma lilogu ei mongemonge mamau sele e ei.

Eau na tau a Nunugu ne ei, me ei ni veipale a inade mina bilesina inigogona na abuna vanunua ma tavivine vuso na magamaga.

19 Ei ni ma goli ete a adesinoana ma adev-ilivilina.

Vanunua ma tavivine ne sou ma longe ete ei ni adeade na vea.

20 Ei ni ma sagilote ete a tabua i poposi mei ni ma valimate ete a sulu ei ma lulu kuba oto,

mapigogoi ei goli a bilesina inigogona ni vululusi sele.

21 Me sou a vanunua ma tavivine na avena vuso ne sou silimuli e ei, me sou magitali e ei ni buloi e sou.”§

*Iesu me Belsebul*

*(Mak 3:20-30; Luk 11:14-23)*

22 Na ilala do sou maasi a bibi tasa ei isa a nunu pagu ino minei usino ne Iesu. Bibi iedo ei mata ego ma asena sobo. Me Iesu ei toekube ei, ma bibi a asena sobo do ei ade mei gemu.

23 Vanunua ma tavivine vuso sou saga mamau sele me sou vei, “Nane a bibi ieli ei e Natune Devit, io?”

24 Moni sou e Parisi sou longe a inade do me sou vei maido, “Bibi ieli ei taulelele a nunu pagu na sagagalina mine Belsebul ei a mapana mine sou a nunu pagu.”

25 Moni e Iesu ei muada a damutatalana mine sou mei vei le sou maido, “Mane a avena buo tasa ei mapola abuna lua me sou maubi, a avena buo do ei ni mamau. Mane a vanunua mina aubu tasa ue mina luma sou mapola abuna lua me sou maubi, aubu ue a luma do ei ni ma mapigogoi ete ni muina sagali.

26 Tomane moni, mane Satan ei taulele Satan, eitou muada abuna minei i villiuesi. Maido ma niitealalena minei ni magili matina?

27 Mane eau taulele a nunu pagu mina sagagalina mine Satan, ei patotona ve natatune amutou tamai sou taulele a nunu pagu mina sagagalina mine Satan? Sou a abuna mine amutou oto ne sou maite e amutou maido, inade mine amutou ieli ei ma patotona oto.

28 Moni mane a Nunu mine Salemo ei buloi e eau mea taulele sou a nunu pagu, io ne amutou muada, niitealalena mine Salemo ei sibitalasi usinani ne amutou.

29 “Mane a bibi tasa ei kale ni gali ulilo na luma mina bibi tasa sagali mei guale a golugolu minei, ei ni guale matina? Ei ni papale bubuli muge a bibi sagali iedo a mota sagaligali. Mane ei goli maido, de ei ni mapigogoi ni guale a golugolu ino na luma mina bibi iedo.

30 “Bibi ei ma maitamaina oto e eau, ei butualale eau. Ma bibi ei ma buloi ete eau a viepiline sou a vanunua ma tavivine, ei vote maisabasabe sou usino.

31 Maidolo me eau vei le amutou, Salemo ei ni taulele a sinusu vuso ma maillobena mamau vuso mine vanunua ma tavivine sou goli. Moni a bibi ei goli a inade mamau ana Maolona Nunu, Salemo ei ma mapigogoi ete ni taulele a sinusu minei.

32 Bibi ei goli a inade mamau usino ne Natuna Bibi, Salemo ei ni lilotase a sinusu minei iodo. Moni a bibi ei goli a inade mamau ana Maolona Nunu, Salemo ei ni ma taulele ete a sinusu minei iodo seidei me na ilala mulimuli tamai.”

*Obu pagu ei vualale a vuana pagu*

*(Luk 6:43-45)*

33 Iesu ei ade lou maido, “Mane amutou vei ve a obu ei doana, amutou mu goli a inade tasa tomane vuane ei tamai doana. Me mane amutou vei ve a obu ei mamau, amutou mu goli a inade tasa tomane vuane ei tamai mamau. Vuna vanua sou ite a vuavua pala, me sou muada, a obu ei doana ue pagu.

<sup>34</sup> Amutou a vanunua mamau, amutou tomane a aliusu pagu. Amutou mapigogoi mu goli a inade doana matina? Bibi ei ademuadada a matana damutatalana ei vonu mina lilone ei.

<sup>35</sup> Bibi kubaana ei isa a damutatalana doana makuba lilo na lilone ei. Maidolo me ei goligoli a inigogona doana. Bibi pagu ei isa a damutatalana pagu papaina lilo na lilone ei, maidolo me ei goli a inigogona pagu.

<sup>36</sup> Moni eau vei le amutou, mulimuli na malada Salemo ei vileale mina vavasana, ei ni damutale a inade maisaba vuso amutou goli, me namutou adeliu ane ei a golu ie.

<sup>37</sup> Na inade minio oto, Salemo ei ni vate e oo a bilesina bibi. Me na inade minio oto, Salemo ei ni vavasa ane oo.”

*Gona sinaga mine Iona  
(Mak 8:11-12; Luk 11:29-32)*

<sup>38</sup> Io a vanua na muadana binea sanii me Parisi sanii sou vei le Iesu maido, “Magiligilina, amiteu kale no goli a gona sinaga tasa tomane a matailala mina maitene amiteu tomane oo goli a pipigona mine Salemo.”

<sup>39</sup> Moni ei malii a inade mine sou maido, “Vanunua ma tavivine mina ilala seidei, sou a abuna vanunua ma tavivine pagu me sou ma lilo ivuvu oto ane Salemo. Taliuliu sou tolatola a niitena matailala. Moni sou ma mapigogoi ete ne sou ite a matailala tasa. Matailala tasa moni ne sou ite, ede a matailala mina profet e Iona.

<sup>40</sup> Iona ei muina malada tolu ma lodo tolu lilo na tiana aia taula, me tomane moni e Natuna Bibi ei ni muina malada tolu ma lodo tolu lilo na magamaga.

<sup>41</sup> Na malada Salemo ei tau mina vavasana ane sou a vanunua ma tavivine, sou e Ninive ne sou magili na vavasana me sou veipale a inigogona pagu mine sou a vanunua ma tavivine mina ilala seidei ie. Vuna maido, sou e Ninive sou longe a inade Iona ei ademuada i me sou sauvule a lilone sou. Moni a bibi tasa nana balivua ne amutou, ei vululusi sele e Iona.

<sup>42</sup> Ilala Salemo ei vavasa ana vanunua ma tavivine, tavine buo a mapana mina avena malilo ei ni magili na vavasana mei veipale a inigogona pagu mine sou a vanunua ma tavivine mina ilala seidei ie. Vuna maido, tavine a mapana do, ei ino na sinuana sele mina magamaga, moni ei asu usinani mina nilongene Solomon ei veimuade a muadana doana minei. Moni a bibi tasa ei eili ie, ei vululusi sele e Solomon.”

*Nunu pagu ei veteliu lou  
(Luk 11:24-26)*

<sup>43</sup> “Mane a nunu pagu ei iavetasesi a bibi tasa, a nunu pagu iedo ei asu maisabasaba na avena i tagasa mina punogena mui ei ni

manoa i. Moni ei ma ite ete a avena tasa ei doana,

<sup>44</sup> me ei vei maido, ‘Eau na veteliu usino na luma lisa eau malu i iodo.’ Me ei asu mei ite a luma do ei bualoalo, me sou kakale me sou malolomesi.

<sup>45</sup> Maido me ei asu mei guale a nunu padilua sea sou vululusi e ei na gunolina inigogona pagu. Me sou vuso gali ulilo na luma do. Palapala a bibi iedo ei ino pagu, moni seidei niugu minei mamau sele lou. Matana inigogona maido ei ni palea le sou a vanunua ma tavivine pagu mina ilala seidei ie.”

*Tinane Iesu me tatasine Iesu  
(Mak 3:31-35; Luk 8:19-21)*

<sup>46</sup> Iesu ei saboa ino biliilii a inade usino ne sou a vanunua ma tavivine, me tinana pilu e tatasina sou asu me sou magili masala. Sou kale ne sou ade pilu e ei.

<sup>47</sup> Ma bibi tasa ei vei le ei, “Oite. Tinamu pilu e tatasimu sou sala do. Sou kale ne sou ade pilu e oo.”

<sup>48</sup> Moni e Iesu ei malii a inade mina bibi edo maido, “Sei e eina? Me sei e tatasigu?”

<sup>49</sup> Me ei usiale sou a disaipel minei mei vei, “Mu ite eina pilu e tatasigu.”

<sup>50</sup> A bibi ue a tavine ei ogomulimuli a masagana mine Euma ei tubu na langi, ei e tasigu, latavinegu me eina.”

## 13

*Iesu ei adetinovo a bibi ei lange a vuavua vit*

*(Mak 4:1-9; Luk 8:4-8)*

<sup>1</sup> Na malada moni iedo Iesu ei ilisitase a luma mei gali usala, me ei ugu mina lili na pou na nanu.

<sup>2</sup> Ma abuna vanunua ma tavivine makuba sele sou asuale ei. Maidolo me ei sae na bot tasa mei ugu, ma vanunua ma tavivine vuso sou magili na mado.

<sup>3</sup> Me Iesu ei goli a adetinovona makuba ane sou. Ei vei maido, “Oite. A bibi tasa ei asu mei lange a vuavua vit na mauma.

<sup>4</sup> Ei pipigo a nilangena vit usino, ma vuavua vit sanii sou pu na vea, ma manu-manu sou lovo maino me sou ani.

<sup>5</sup> Ma vuavua vit sanii sou pu utano na avena vatuvatu ino i. Magamaga ei ma butolu vauta oto, maido ma vit sou odo sou uusi asi.

<sup>6</sup> Moni na ilala oaso ei vele uata ei voe a vit iodo. Ma vit a aana boa, maido me sou magolu vuso.

<sup>7</sup> Ma vuavua vit sanii sou pu utano balivua na mota ooloo. Ma motamota ooloo sou palea buo me sou avisobe a vit.

<sup>8</sup> Moni a vuavua vit sanii sou pu na magamaga doana, me sou mapale a vuavua. Sanii sou vuale savulu sobo tasa,

me sanii sou vuale savulu pantasa, me sanii sou vuale savulu tolu.

<sup>9</sup> Bibi ei isa a tagilana, ei ni longe a inade ie.”

*Iesu ei veipale a masovana mina adetinovona a vit*

*(Mak 4:10-12; Luk 8:9-10)*

<sup>10</sup> Mulimuli sou a disaipel sou asuale Iesu me sou tagi e ei, “Vuna i matina oo goli a adetinovona ane sou a vanunua ma tavivine?”

<sup>11</sup> Me Iesu ei maliu a inade maido, “Salemo ei mamuadesi e amutou a vuna inade ova mina niitealalena mina langi, moni ei ma maite ete sou a vanunua ma tavivine ie.

<sup>12</sup> Mane a bibi tasa ei isasi a golu sanii, Salemo ei ni bilii e ei sanii lou, me ei ni isa i papaina. Moni mane a bibi ei ma isa oto a golugolu, Salemo ei ni taulele a golu banini ei lapitolei.

<sup>13</sup> Na vuna moni ieli, eau adetinovo ane sou.

“Matane sou ei gemugemu, moni sou ma ite ete a golu tasa.

Sou longo tagigi, moni sou ma longe ete a inade me sou guale a muadana.

<sup>14</sup> “Inade tasa mina profet e Aisaia ei palea ivu sele na vanunua ma tavivine sou ie. Ei vei maido,

‘Ne amutou longe a inade mapapaina, moni ne amutou ma muada oto a vuna.

Ne amutou gemugemu mapapaina, moni ne amutou ma iteilale ete a golu tasa.

<sup>15</sup> Lilone sou a abuna vanunua ma tavivine do ei sobosi,

ma tagilane sou ei bale a nilongena inade, me sou tabesobesi a matane sou, dae a matane sou ei ni ite a golu tasa, ma tagilane sou i ni longe a inade, ma lilone sou ei ni muada a vuna inade, me ne sou sauvule a lilone sou me ne sou veteliuale eau, me eau na toe sou palea kuba lou.\*

<sup>16</sup> “Moni amutou namutou mongemonge. Matane amutou ei peo, maido me amutou iteite a malibuuna mina inade mine Salemo, ma tagilane amutou ei peo, maido me amutou guale a muadana.

<sup>17</sup> Eau vei patotona le amutou, lisa papaina mine sou a profet me sou a billesina vanua sou isa a masagana buo na niitena golugolu seidei amutou ite, moni sou ma ite ete. Me sou isa a masagana buo na nilongena inadnade amutou longelonge sou ie, moni sou ma longe ete.”

*Vuna adetinovona mina vuana vit*  
*(Mak 4:13-20; Luk 8:11-15)*

<sup>18</sup> “Seidei namutou longe a vuna adetinovona mina bibi ei lange a vuavua vit na mauma.

<sup>19</sup> Vanunua sou longe a malongolongona doana mina niitealalena mina langi me sou ma muada oto a vuna inade do, sou tomane a vuana vit ei pu na vea. Me Satan ei asu usinani ne sou me saga i ei taulele a inade Salemo ei dani na lilone sou.

<sup>20</sup> Ma vuavua vit sou pu utano na magamaga ei isa a vatuvatu, ei tomane a bibi ei longe a inade mei guale asi mei mongemonge.

<sup>21</sup> Moni ei ma isa oto a aane ei, me ei muina sapa bisii moni. Ilala vanunua ma tavivine sou kale ne sou taupui a inade mine Salemo, sou bilii e ei a mavaana me sou toegegelei ei, io silimulina minei ei ni bosa asasi.

<sup>22</sup> Ma vuana vit ei pu balivua na mota oloolo, ei tomane a bibi ei longe a inade, moni ei damutala papai a golugolu mina magamaga, me ei damutale mamai a taupilina vatu makuba. Golugolu sou ieli ei taboboli a inade mine Salemo, me ei ma mapale ete a vuavua.

<sup>23</sup> Moni a vuavua vit sou pu na magamaga doana, ei tomane a bibi ei longe a inade mei muada kuba a vuna inade do. Ei mapale a vuavua mapigogovi savulu sobo tasa, ue savulu pantasa, ue savulu tolu.”

*Adetinovona mina gulugulu pagu ei palea na mauma*

<sup>24</sup> Iesu ei bilii a adetinovona sea ane sou maido, “Niitealalena mina langi ei tomane a bibi tasa ei lange a vuana vit doadana na mauma minei.

<sup>25</sup> Moni ilala vanunua ma tavivine sou ngolo, a butu mina bibi iedo ei asu maino, me ei lange a vuavua gulugulu pagu balivua na vit sou odo.

<sup>26</sup> Mulimuli a vit iodo ei uusi buo mei vua, me sou ite a gulugulu pagu ei uusi pilu i.

<sup>27</sup> “Maido me sou a vanua na pipigona sou asu usino na tamana mauma me sou vei lei maido, ‘Bibi buo, amiteu damu i oo lange moni a vuavua vit doana na mauma minio. Moni posa matina a gulugulu pagu odo sou uusi?’

<sup>28</sup> “Me ei vei le sou, ‘A butu tasa ei goli a matana inigogona iede.’ Ma vanua na pipigona sou tagi e ei, ‘Oo kale ne amiteu asu namiteu lulusitase a gulugulu pagu odo?’

<sup>29</sup> Moni ei vei le sou maido, ‘Boa. Dae ne amutou lusi a gulugulu pagu pilu a vit tamai.

<sup>30</sup> Puiale ne mu itetase sulu ne sulu uusi pilu mapigogovi na ilala mina gualena gona inani. Me na ilala na gualena gona inani eau na vei le sou a vanua na pipigona

\* 13:15 Aisaia 6:9-10

maido, “Amutou taupili muge a gulugulu pagu, me mu papale a pinalanalana me mu tuni na oavi. Moni amutou taupilipili a vit me mu tau ino na luma na tinaunau na gona inani minau.” ’ ’

*Adetinovona mina vuavua na mastet  
(Mak 4:30-32; Luk 13:18-19)*

<sup>31</sup> Iesu ei bilii a adetinovona sea ane sou maido, “Niitealalena mina langi ei tomane a vuana mastet. Bibi tasa ei guale a vuana mastet mei dani na mauma minei.

<sup>32</sup> Vua na mastet ei alabaini sele ana vuavua na obu vuso. Moni na ilala ei palea buo, ei vululusi a matana gona inani vuso na mauma. Ei palea tomane a obu, ma manumanu sou vele maino me sou tau a noane sou na lalane ei.”

*Adetinovona mina is  
(Luk 13:20-21)*

<sup>33</sup> Iesu ei veipale a adetinovona sea ane sou maido, “Niitealalena mina langi ei tomane a is. Tavine tasa ei guale a is iodo mei sauvule pilu a taogo na ulalu taula. Me mulimuli a ulalu vuso do ei sosoge.”

*Iesu ei veipale a vuna adetinovona  
(Mak 4:33-34)*

<sup>34</sup> Inade vuso Iesu ei goli le sou a vanunua ma tavivine do, ei goli na adetinovonovona. Ei ma veimuade pale ete a inade tasa usino ne sou. Ei ade i na adetinovona moni.

<sup>35</sup> Me na inigogona ieli, ei toesele a inade tasa a profet tasa ei ademuada i. Ei vei maido,

“Eau na adetinovo usino ne amutou, me eau na veipale a matamatana golu ei ino ovu sele lisa, na ilala magamaga ei palea asu mapigogoi seidei.”†

*Vuna adetinovona mina gulugulu pagu*

<sup>36</sup> Iesu ei ilisitase sou a vanunua ma tavivine mei gali ulilo na luma. Me sou a disaipel minei sou asuale ei me sou vei, “Oo no vei le amiteu a vuna adetinovona mina gulugulu pagu ei palea na mauma.”

<sup>37</sup> Me Iesu ei maliu a inade usino ne sou maido, “Bibi ei lange a vuana vit doana, ei e Natuna Bibi.

<sup>38</sup> Ma mauma do ei a magamaga vuso ie. Ma vuavua vit sou doana, ede sou a vanunua ma tavivine mina niitealalena mina langi. Ma gulugulu pagu, ede sou a vanunua ma tavivine mine Satan.

<sup>39</sup> A butu ei lange a vua na gulugulu pagu odo, ede Satan. Ilala mina gualena gona inani, ei a punulu na magamaga ie. A vanua na pipigona, ede sou a bineanea mine Salerno.

<sup>40</sup> “Vanunua sou taupilipili a gulugulu pagu me sou tuni na oavi, tomane moni ne

sou goli na punuluna malada mina magamaga ie.

<sup>41</sup> Natuna Bibi ei ni peltase sou a bineanea minei me ne sou taulele maino na niitealalena mine Salerno a golugolu vuso sou toegegeligeli a silimulina mina bibi pilu a vanunua vuso sou goli a inigogona pagu.

<sup>42</sup> Me ne sou lange sou usino na oavi taula. Lilo na oavi iodo ne sou tangi mamau me sou gado kasele a livone sou.

<sup>43</sup> Na ilala iedo sou a bilesina vanunua ma tavivine ne sou silida tomane a oaso lilo na niitealalena mine Tamane sou. Bibi ei isa a tagilana ei ni longe a inade ie.

*Adetinovona mina malasana vatu*

<sup>44</sup> “Niitealalena mina langi ei tomane a malasana vatu sou tau oovi na mauma tasa. Bibi tasa ei poge mei tau oovipole lei. Ei mongemonge sele, me ei asu masosove a golugolu vuso minei, me ei oli a mauma do.

*Adetinovona mina gapu malasolosolo*

<sup>45</sup> “Niitealalena mine langi ei tomane a bibi na vuvutina tasa ei tilotilo a gapu sou malasalasa.

<sup>46</sup> Ma ilala ei poge a gapu tasa mapana ei oata oto sele, ei asu masosove a golugolu vuso minei mei oli a gapu doana do.

*Adetinovona mina vuo*

<sup>47</sup> “Niitealalena mina langi ei tomane a vuo tasa sou lange utano na dasi, me ei guale a matamatana aia.

<sup>48</sup> Vuo ei vonu, io sou lapuale a vuo ulilo na mado. Me sou ugu me sou vileale a aia doadoana me sou tau na taogo tasa. Moni a aia pagupagu sou pitase.

<sup>49</sup> Na punuluna malada mina magamaga ieli ei ni tomane moni simaido. Sou a bineanea ne sou asu usinani me sou guale a vanunua pagupagu ino balivua ne sou a bilesina vanunua.

<sup>50</sup> Me ne sou lange sou usino na oavi taula. Lilo na oavi iedo ne sou tangi mamau me sou gado kasele a livone sou.”

<sup>51</sup> Me Iesu ei tagi e sou a disaipel maido, “Amutou muada a vuna inade vuso ieli?” Me sou longo ane ei, “E.”

<sup>52</sup> Io ei vei le sou maido, “Maido ma vanua na muadana binea, sou a disaipel mina niitealalena mina langi, sou tomane a tamana luma tasa buo. Ei gali ulilo na vilo tasa a matamatana golu doadoana ino i, me ei guale a golugolu vuso alaba ma golugolu vuso lisasi pilu tamai, me ei maasi sou usala.”

*Sou e Nasaret sou lametase Iesu  
(Mak 6:1-6; Luk 4:16-30)*

<sup>53</sup> Iesu ei adesi a adetinovona sou odo, io ei ilisitase a aubu odo

† 13:35 Laulau na Inala 78:2

<sup>54</sup> mei asu usino na vuna aubu minei. Me ei asu usino na luma na kinaka mine sou e Iuda mei bilii a inade mine Salemo ne sou a vanunua ma tavivine. Sou longe a inade minei me sou saga mamau me sou vei, “Bibi ieli ei guale a muadana ieli iva? Me vuna matina ei mapigogoi ni goli a gona sinaga?”

<sup>55</sup> Eitou muada, bibi ieli ei e natuna bibi na gagatuna tasa, me Maria ei e tinane ei. Me Iemus, Iosep, Saimon me Iudas sou e tatasine ei.

<sup>56</sup> Me latavivine ne ei vuso, sou eili pilu e eitou. Vuna matina ei mapigogoi ni goli a golugolu sou ie?”

<sup>57</sup> Sou vei maido me sou lilogegele ane ei. Moni e Iesu ei vei le sou maido, “Profet ei isa a aisa na aububuna vuso. Moni na vuna aubu me mina luma minei bilesi ei ma isa oto a aisa.”

<sup>58</sup> Me ei ma goli ete a gona sinaga makuba na aubu odo, vuna sou ma silimuli ete ei.

## 14

*Herot ei damu e Iesu ei e Ioanes a bibi na maavuvutuna*

*(Mak 6:14-29; Luk 3:19-20, 9:7-9)*

<sup>1</sup> Na ilala do Herot\* a mapana, ei itealale a avena buo, ei longe a mapamulina na golugolu Iesu ei goli

<sup>2</sup> mei vei le sou a vanua na pipigona minei maido, “A bibi ie ei e Ioanes a bibi na maavuvutuna. Ei ilisiliu na minate minei. Maido me ei isa a sagagalina mina gunolina matamatana gona sinaga sou ie.”

<sup>3-4</sup> Lisa Herot ei tavui e Herodias, ei e susune Pilip, tasine Herot. Me Ioanes ei vei le Herot maido, “Oo guale a tavine ieli, ei ma bilesi oto.” Maido me Herot ei lapitole Ioanes mei papale ei mei tau e ei na luma na tunuu.

<sup>5</sup> Me Herot ei kale ni valipute Ioanes, moni ei lae e sou a vanunua ma tavivine, vuna sou damu e Ioanes ei a profet.

<sup>6</sup> Na damutaleliuna alaposana mine Herot, vanua sanii sou asu maino me sou aani pilu e Herot. Me na ilala do natuna tavine mine Herodias ei asu mei tilia balivua ne sou. Me Herot ei kale sele a tiliana minei.

<sup>7</sup> Maido me Herot ei adegatuna ane ei maido, “Ivu uata, sei golu oo kake usinani minau, ede eau na bilii e oo.”

<sup>8</sup> Io Herodias, tinana, ei bilii e ei a damutatalana, ma tavine do ei vei le Herot maido, “Eau kale no bilii e eau a letene Ioanes a bibi na maavuvutuna na taogo tasa.”

<sup>9</sup> A bibi a mapana ei longe a inade do, ma lilone ei i mavaa. Moni ei damutale a adegatunana ei goli, me ei ma kale ete ni

guale a maelana na matane sou a vanunua sou ugu pilu e ei. Maido me ei vei le sou a vanua na maubina ne sou goli tomane a tavine ei vei.

<sup>10</sup> Ei peltase a bibi tasa usino na luma na tunuu ni vei le sou a vanunua na maubina ne sou valiuti a loone Ioanes.

<sup>11</sup> Me sou maasi a letene ei na taogo tasa, me sou bilii a tavine alaba do. Me ei maasi usino ne tinane ei.

<sup>12</sup> Me sou a disaipel mine Ioanes sou asu maino sou guale a aitolane ei me sou tabule usino me sou peilai. Sou peilaiosi, me sou vei le Iesu.

*Iesu ei bilii a gona inani na vanunua savuluvulu lima*

*(Mak 6:30-44; Luk 9:10-17; Ioa 6:1-14)*

<sup>13</sup> Iesu ei longesi a inade sou valipute Ioanes, me ei ilisitase a aubu odo mei guale a bot usino na avena tasa a vanua ino boa. Ei pilu a disaipel sou moni sou asu. Moni a abuna vanunua ma tavivine makuba sou longe a inade e Iesu ei asu, me sou ilisitase a aubu buobuo, me sou vasale usino me sou poge ei.

<sup>14</sup> Maido ma ilala Iesu ei asu ontola mei ite a abuna vanunua ma tavivine makuba ino. Me ei lilomuli e sou mei toekube sou a vanunua na sinobe.

<sup>15</sup> Mina lavilavi sou a disaipel sou asu usinani ne Iesu me sou vei lei maido, “Avena li a vanua boa mei bisii moni na oaso ni solo. Puiale oo no peltase sou a vanunua ma tavivine ne sou asu. Me ne sou mapigogoi ne sou asu maisaba na aububuna me sou oli a gona inani.”

<sup>16</sup> Moni e Iesu ei vei le sou a disaipel maido, “Vuna matina ne sou asu? Amutou oto ne mu bilii e sou a gona inani.”

<sup>17</sup> Me sou vei lei, “Amiteu ma isa oto a gona inani makuba eili. A ulalu lima ma aia lua moni.”

<sup>18</sup> Me ei vei, “Mu guale a ulalu ede pilu a aia usinani minau.”

<sup>19</sup> Me Iesu ei vei le sou a vanunua ma tavivine ne sou ugu na gulugulu. Me ei guale a ulalu lima pilu a aia lua do mei gemu uata na langi mei maibalave mei lee a ulalu sou odo mei bilii e sou a disaipel. Me sou a disaipel sou bilii e sou a vanunua ma tavivine,

<sup>20</sup> me sou vuso sou ani me sou masu sele. Ma matevuavua vuso saboa ino, iede sou taupili me sou totongivoni a tanga savulu tasa timana lua.

<sup>21</sup> A vanunua sou aani iodo, sou mapigogoi savuluvulu lima (5,000). Sou ma gi ete sou a tavivine pilu e seleanini.

\* 14:1 Herot ieli, aisana tasa lou e Antipas. Ei itealale a avena mine Galili. Ei e natune Herot ei kale ni valipute a bibaini Iesu tomane sou niage lilo ne Matiu 2:1-20.

*Iesu ei asu muata na dasi**(Mak 6:45-52; Ioa 6:15-21)*

<sup>22</sup> Io Iesu ei vei le sou a disaipel ne sou sae na bot me sou muga pala ane ei usino na avena pou na nanu maino. Ei oto ei kale ni muina mei peltase sou a vanunua ma tavivine ne sou muga pala.

<sup>23</sup> Ei peltase sou a vanunua ma tavivine usinosi, io ei vululu ei asu uata mina loena ni kaka. Me na lodo, ei vululu moni ei ino na loena.

<sup>24</sup> Bot ei bulagosi, ma avivili ei vali masae na muga, ma dasi ei vali maisabe a bot.

<sup>25</sup> Agavualesi ni malada Iesu ei asu muata na dasi mei sibalata le sou a disaipel.

<sup>26</sup> Sou ite ei asuas muata na dasi, me sou lae sele ma vovone sou i palili. Sou vei, "Iede a masalangi tasa." Sou lae me sou ngala mamau.

<sup>27</sup> Moni ma tabaa oto Iesu ei vei le sou maido, "Amutou mu sagali. Ieli eau moni. Amutou ma laelae lou."

<sup>28</sup> Me Pita ei malii a inadene ei maido, "Bibi Taula, mane iede oo moni, vei le eau mea na asu muata na nanu usino minio."

<sup>29</sup> Me Iesu ei vei, "Oo asu usinani." Io Pita ei ilisitase a bot mei asu muata na nanu usino ne Iesu.

<sup>30</sup> Moni ei ite a avivili ei sagali mamau mei lae, me ei pumutu sapa utano na nanu. Maido me ei tola maido, "Bibi Taula, buloi e eau."

<sup>31</sup> Ma tabaa oto Iesu ei beli a limane ei mei lapitole e Pita. Me Iesu ei vei lei maido, "Oo isa a silimulina alabaini moni. Posa matina oo isa a damutatalana lua?"

<sup>32</sup> Me sulu sae na bot, ma avivili ei mate.

<sup>33</sup> Me sou a vanunua ino na bot, sou kaka ane Iesu me sou vei, "Patotona sele, oo Natune Salemo."

*Iesu ei toekube a vanunua makuba sou sobe ne Genesaret*

*(Mak 6:53-56)*

<sup>34</sup> Iesu pilu e sou a disaipel sou voleutuosi a pou na nanu me sou divi na avena mine Genesaret.

<sup>35</sup> Sou a vanunua mina avena do sou ite Iesu me sou masosove a inade mina aububuna vuso ino agavi, me sou maasi e sou a vanua sou sobe usinani minei.

<sup>36</sup> Me sou nai sagali e Iesu ve ne sou pige a aiskusuna kinainai minei. Ma vanunua ma tavivine sou goli maido, sou kuba lou.

**15**

*Binea mine Salemo ei vululusi a inade ne sou buobuo lisa*

*(Mak 7:1-13)*

<sup>1</sup> Na ilala do sou e Parisi me a vanua na muadana binea maino ne Ierusalem sou asuale Iesu. Me sou tagi e Iesu maido,

<sup>2</sup> "Vuna matina sou a disaipel minio sou pope a inigogona tubutubune eitou sou bilii e eitou? Ilala sou kale ne sou aani, sou ma lololoi ete a limane sou."

<sup>3</sup> Iesu ei malii a inade mine sou maido, "Posa matina amutou pope a binea mine Salemo a inigogona mine amutou?"

<sup>4</sup> Salemo ei vei, "Oo matano moni ne tamamu me tinamu me mu ogomuli a inade mine sou,\* ma 'Bibi ei goli a inade pagu ane tamana ue tinana, ei ni mate.'†

<sup>5</sup> Moni amutou adeade maido, 'Mane a bibi tasa ei isa a vatu ue sei golu mina buloine tamana ue tinana, moni ei vei le sulu, eau vilealesi iede mina biliiine Salemo.'

<sup>6</sup> Io a bibi iodo ei ni ma damutaletale lei e tamana ue tinana. Me amutou vei ve ei kubaana. Moni na inigogona ieli amutou taupuipui a inade mine Salemo me amutou beilange a inigogona amutou guale maino ne tubutubune amutou.

<sup>7</sup> Amutou a vanua na aualana. Profet e Aisaia ei veipale sele a inigogona mine amutou na ilala ei vei maido,

<sup>8</sup> 'Sou a abuna vanunua ma tavivine do sou beilangelange a aisagu na asene sou, moni a lilone sou ma damutatalana mine sou ei ino bulago sele ane eau.

<sup>9</sup> Sou veipale a binea mine sou a vanunua moni me sou vei, "Ieli ei a inade mine Salemo."

Maido me sou kaka sabubu moni ane eau.‡"

*Iesu ei ade a golu i toemumugi a bibi*

*(Mak 7:14-23)*

<sup>10</sup> Iesu ei toleale sou a vanunua ma tavivine usinani minei, mei vei le sou maido. "Amutou longe me mu damutale kube.

<sup>11</sup> A golu ei gali ulilo na asena bibi tasa, ei ma goli ete a bibi ei palea mumugu. Moni a golu a asemu ei veipale, iede moni ei goli a bibi ei mumugu."

<sup>12</sup> Mulimuli sou a disaipel sou asu sou vei le Iesu maido, "Oo muada i maido, sou e Parisi sou longe a inade minio me sou lilogegele?"

<sup>13</sup> Me Iesu ei malii a inade maido, "Euma tubu na langi, ei ni lusipipili a golugolu vuso ei oto ei ma dani ete.

<sup>14</sup> Amutou ma lilo mavaavaa lou a vanunua do. Sou tomene sou a mata ego, me sou kale ne sou maite e sou sanii a vea. Moni mane a mata ego ei maite a vea ane sou a mata ego sanii, io sou pilu ne sou bosa na lulu."

\* 15:4 Gualeliuna 20:12 † 15:4 Gualeliuna 21:17; Pipigona mina Prist 20:9 ‡ 15:9 Aisaia 29:13



<sup>15</sup> Me Pita ei tagi e Iesu maido, “Mapigogoi no lube a vuna adetinovona oo bilii e sou a vanunua ma tavivine do ane amiteu?”

<sup>16</sup> Me Iesu ei vei, “Amutou tamai saboa mu muada?”

<sup>17</sup> Amutou ma muada oto, golugolu vuso ei vele ulilo na asemu, ei gali ulilo na aputu, mulimuli ei vele usala na luma na kunoko.

<sup>18</sup> Moni a golu asemu ei veipale, iedele ei palealea maino na damutatalana. Ma golu iedo moni ei toe a bibi ei palea mumugu.

<sup>19</sup> A matamatana golugolu ei palea na damutatalana bibi sou maido, damutatalana pagu, ma inigogona valiputena bibi ma sualolona, ma inigogona toegegeline taulaina, ma inigogona paaalina, ma inigogona adeaulana mina vavasana, ma inigogona mailobena.

<sup>20</sup> A inigogona sou odo ei toe a bibi ei mumugu na matane Salemo. Moni mane a bibi ei aani mei ma loloi pale ete a limana, a inigogona maido i ma toe ete ei mumugu.”

*Tavine mine Kenan ei silimuli sele e Iesu (Mak 7:24-30)*

<sup>21</sup> Iesu ei ilisitase a aubu odo mei asu usino na avena mine Tair me Saidon.

<sup>22</sup> Ma tabaa oto a tavine tasa mina abuna mine Kenan ei ino na avena do, ei asu maino mei tola maido, “Bibi Taula, oo Natune Devit, oo no lilomuli e eau. A nunu pagu ei toegegeli sele e natugu tavine.”

<sup>23</sup> Moni e Iesu ei ma malii ete a inade tasa usino ne ei. Me sou a disaipel minei sou asuale ei me sou vei lei maido, “A tavine do ei tolatola mei ogomulimuli e eitou usinani. Oo peltase ei usino.”

<sup>24</sup> Me Iesu ei malii a inade maido, “Salemo ei peltase eau usinani ne sou a abuna mine Israel moni mina buloine sou a sipsip sou buale do.”

<sup>25</sup> Moni a tavine ei asu agavuale Iesu mei totopatulu mei lagu motudu, me ei vei, “Bibi Taula, oo no buloi e eau.”

<sup>26</sup> Me Iesu ei malii a inadene ei maido, “Ei ma puiale ete neitou guale a gona inani mine seleaninini me eitou lange usino na busebuse.”

<sup>27</sup> Moni a tavine ei vei, “Bibi Taula, oo ade patotona. Moni a busebuse sou aniani a matevua i pu matano na luuva na poso mine tamtamane sou.”

<sup>28</sup> Iesu ei longe a inade do mei malii a inade maido, “Tavine, a silimulina minio ei buo sele. A golu oo kale ni palea le oo, ei ni palea.” Na ilala bilisi iodo, natuna tavine minei ei palea kuba lou.

*Iesu ei toekube a vanunua na sinobe makuba*

<sup>29</sup> Iesu ei ilisitase a aubu iodo mei asu na lili na pou na nanu e Galili. Me ei asu uata na loena mei ugu.

<sup>30</sup> Ma abuna vanunua ma tavivine makuba sou asuale ei. Me sou maasi e sou a ubune sou mamau, me sou a mata ego, me sou a tuane sou i makoko, me sou a asene sou i sobo, ma vanunua sanii sou sobe ino tamai, me sou tau e sou agavuale a ubune Iesu. Me ei toekube sou me sou palea kuba lou.

<sup>31</sup> Me sou a vanunua ma tavivine sou ite sou a asene sou sobo do sou adeade lou, me sou a tuane sou makoko sou palea kuba lou, me sou a ubune sou pagu sou asuasou lou, me sou a mata ego sou gemugemu lou, me sou saga mamau. Me sou beilange a aisane Salemo mine Israel.

*Iesu ei bilii a gona inani usino ne sou a vanunua savuluvulu iva*

*(Mak 8:1-10)*

<sup>32</sup> Iesu ei toleale sou a disaipel minei usinani mei vei le sou maido, “Eau lilomuli sele sou ie. Sou eili pilu eau mapigogoi a malada toluosi, moni sou ma ani ete a golu tasa. Eau ma kale ete na peltase liu e sou, dae a matane sou ni lilili me ne sou bossa na vea.”

<sup>33</sup> Me sou a disaipel sou vei lei maido, “A avena li a vanua boa. Neitou guale a ulalu makuba iva me neitou bilii e sou a abuna vanua buo maido?”

<sup>34</sup> Me Iesu ei tagi e sou, “Amutou isa a ulalu visa?” Me sou vei, “Amiteu isa a ulalu padilua ma aia banini sanii.”

<sup>35</sup> Io Iesu ei vei le sou a vanunua ma tavivine me sou ugu na magamaga.

<sup>36</sup> Me ei guale a ulalu padilua pilu a aia, me ei toledadangi e Salemo, me ei lee mei bilii e sou a disaipel. Ma sou a disaipel sou bilii e sou a vanunua ma tavivine.

<sup>37</sup> Me sou vuso sou aani me sou masu. Me sou taupili a matevuavua na gona inani saboa ino me sou totongivoni a tanga padilua.

<sup>38</sup> Savuluna vanunua sou aani iodo ei savuluvulu iva (4,000). Me sou ma gi ete sou a tavivine me seleaninini.

<sup>39</sup> Me Iesu ei peltase sou a vanunua ma tavivine usino, me ei sae na bot mei asu usino na avena mine Magadan.

## 16

*Sou vei le Iesu ni goli a gona sinaga (Mak 8:11-13; Luk 12:54-56)*

<sup>1</sup> Sou e Parisi me Sadusi sou asu usino ne Iesu me sou kale ne sou tove ei. Sou vei le ei ni goli a gona sinaga tasa maino na langi mina maitene sou.

<sup>2</sup> Moni ei malii a inade ne sou maido, “Na lavilavi sele amutou veivei ve, ‘A langi i kasoso, ma ilala ni doana sie.’

<sup>3</sup> Me na autupola amutou veivei ve, ‘A ausa i paulu ma langi i kasoso. Maido me seidei ni avivili mei ni adavu.’ Amutou

iteite a matailala mina langi me mu vivilemuliale kube. Moni amutou ma mapigogoi ete ne amutou vivilemuliale a matailala mina ilala seidei ie.

<sup>4</sup> Sou a vanunua ma tavivine mina ilala seidei ie, sou a abuna vanunua ma tavivine pagu me sou ma lilo ivuvu oto ane Salemo. Taliuliu sou tolatola a niitena matailala. Moni matailala tasa ne sou ite, ei a matailala mine Iona\* moni." Me Iesu ei ilisitase sou mei asu.

*Adetinovona mina is mine sou e Parisi me sou e Sadusi  
(Mak 8:14-21)*

<sup>5</sup> Iesu pilu e sou a disaipel sou asu sibitala na lili na pou na nanu maino, moni sou a disaipel sou danivuse a gualena ulalu usinani pilu e sou.

<sup>6</sup> Me Iesu ei vei le sou maido, "Amutou ulago kuba. Amutou tilale a is mine sou e Parisi me sou e Sadusi."

<sup>7</sup> Me sou a disaipel sou maiade balivua mine sou oto maido, "Ei goli a inade iedo, vuna eitou ma guale ete a ulalu usinani."

<sup>8</sup> Iesu ei muada a inade sou goli iedo, me ei vei le sou maido, "Ai, amutou a vanunua mu isa a silimulina alabaini moni. Posa matina amutou adeade maido, 'Eitou ma isa oto a ulalu.'

<sup>9</sup> Amutou saboa mu muada, io? Nane amutou ma damutale ete a ulalu lima sou a vanunua savuluvulu lima (5,000) sou ani, ma tanga visa amutou totongivoni?

<sup>10</sup> Me nane amutou ma damutale ete a ulalu padilua iedo sou a vanunua savuluvulu iva (4,000) sou ani, ma tanga visa amutou totongivoni?

<sup>11</sup> Vuna matina amutou ma muada oto i maido, eau ma adeade oto ane amutou a ulalu? Eau vei, amutou tilale kube a is mine sou e Parisi me sou e Sadusi."

<sup>12</sup> Sou longe a inade iedo me sou muada, ei ma vei ete ne sou tilale a is mina gunoli a ulalu. Ei vei ne sou tilale kube a matetengina mine sou e Parisi me sou e Sadusi.

*Pita ei ademuada e Iesu ei e sei  
(Mak 8:27-30; Luk 9:18-21)*

<sup>13</sup> Iesu ei asu usino na avena ne Sisaria Pilipai, me na ilala do ei tagi e sou a disaipel minei maido, "Sou a vanunua ma tavivine sou vei ve e Natuna Bibi ei e sei?"

<sup>14</sup> Me sou ade, "Sanii sou vei, oo e Ioanes a bibi na maavuvutuna. Me sanii sou vei ve oo e Elaiia. Me sanii sou vei ve oo e Ieremaia ue a profet tasa."

<sup>15</sup> Me Iesu tagi e sou, "Me amutou oto amutou vei eau e sei?"

<sup>16</sup> Saimon Pita ei maliu a inade maido, "Oo Kraiss, oo e Natune Salemo ei mauli taliuliu."

<sup>17</sup> Iesu ei maliu a inadene ei maido, "Saimon, natune Ioanes, oo no mongemonge. Bibi tasa na magamaga i ma vei ete lio a inade ie. Euma ei tubu na langi ei moni ei maite e oo a golu ie.

<sup>18</sup> Me eau vei lio maido. Oo Pita,† eau na mamagili a abuna minau muata na vatu ie. Ma sagagalina mina minate ei ni ma toebouse ete a abuna ie.

<sup>19</sup> Eau na bilii e oo a ki mina niitealalena mina langi. A golu oo palesobe na magamaga, iede Salemo ni palesobe na langi tamai. Ma golu oo lube na magamaga, iede Salemo ni lube na langi."

<sup>20</sup> Me Iesu ei ade sagali sele ane sou a disaipel ne sou ma veivei lou ana bibi tasa maido ei e Kraiss.

*Iesu ei vei ve ei ni mate mei ni ilisiliu  
(Mak 8:31-9:1; Luk 9:22-27)*

<sup>21</sup> Na ilala do Iesu i soke a inade ane sou a disaipel maido ei ni asu usino ne Ierusalem, me ei ni tabule a davutina makuba na li-mané sou a vanua buobuo pilu e sou a munugana prist me sou a vanua sou muada a binea. Me ne sou valipute ei, me na malada tolunai ei ni ilisiliu.

<sup>22</sup> Pita ei guale Iesu usino na aliali mei soke a sinoana ane ei maido, "Bibi Taula, boa vuso sele. Golu ieli ei ma mapigogoi ete ni palea le oo."

<sup>23</sup> Me Iesu ei sauvule ei mei vei le Pita maido, "Satan, oo asu mamuli na taulugu. Oo kale no tabulisobe a veagu. Oo ma ogomuli ete a damutatalana mine Salemo. Oo ogomuli moni a damutatalana mine sou a vanunua ma tavivine."

<sup>24</sup> Me Iesu ei vei le sou a disaipel minei maido, "Mane a bibi tasa ei kale ni ogomuli e eau, io ei ni taupui a masagana minei oto, me ei ni tabule a tauvaleuti minei mei ogomuli e eau.

<sup>25</sup> Mane a bibi tasa ei kale ni lapitole obi a maulina minei oto, maulina minei ni buale. Moni mane a bibi tasa ei damutale eau mei iabitase a maulina minei usinani minau, ei ni guale a maulina.

<sup>26</sup> Mane a bibi tasa ei guale a golugolu vuso mina magamaga, moni a maulina minei oto i buale, io a golugolu vuso do ni buloi e ei matina? A bibi ni bilii a sei mapa mina olilualena a maulina minei?

<sup>27</sup> Na ilala Natuna Bibi ei ni asu usinani na malasana buo mine Tamana pilu e sou a bineanea minei, ei ni bilii a mapa ne sou a vanunua vuso i mapigogoi a inigogona sou goli.

\* **16:4** Matailala mine Iona i maite a ilisiliuna minate mine Iesu. Gemu lilo ne Matiu 12:39-40. † **16:18** Malibuuna mine Pita ei a vatu buo.

28 “Eau vei ivu sele le amutou, vanunua sanii sou magili ie ne sou ma mate oolo oto. Me ne sou ite e Natuna Bibi ni asu usinani tomane a mapana.”

## 17

*Vovone Iesu ei palea sea  
(Mak 9:2-13; Luk 9:28-36)*

1 Malada pantasa i pulosi, Iesu ei guale Pita me lemus pilu e tasina e Ioanes, me sou moni asu usino na loena tasa i oata oto. Me sou moni muine sou.

2 Ma vovone Iesu ei sauvuvule mei palea sea sele na matane sou. Ma lagune ei mala-solosolo tomane a oaso, ma malo minei ei palea kea tomane a muada.

3 Na ilala do Moses pilu e Elaiia sulu palea, me sou a disaipel sou ite sulu ade pilupilu e Iesu.

4 Pita ei vei le Iesu maido, “Bibi Taula, ei kubaana neitou muine eitou na. Mane oo kale, io eau mapigogoi na mamagili a bale na malolovina tolu, tasa minio, tasa mine Moses, me tasa mine Elaiia.”

5 Pita ei saboa ino adeade maido, ma ausa tasa ei kea muada mamau sele mei avisobe sou. Ma baligoluna bibi tasa ino lilo na ausa do ei vei maido, “Telili ei e Natugu, eau kale mamai sele ei mea mongemonge e ei. Amutou longemuli a inade minei.”

6 Sou a disaipel sou longe a inade li, me sou totopatulu me sou lagumotudu utano na magamaga, me sou lae mamau sele.

7 Me Iesu ei asu agavuale sou mei lapitole sou mei vei, “Amutou ilisi. Amutou ma laelae lou.”

8 Me sou gemu uata, me sou ma ite ete a bibi sea. Sou ite Iesu vululu moni.

9 Sou veletase a loena do me sou sivo liuliu utano, me Iesu ei ade sagali ane sou maido, “A golu amutou ite do, amutou ma veivei lei ana bibi tasa mapigogoi a ilala Natuna Bibi ei ilisili na minate.”

10 Me sou a disaipel sou tagi e ei maido, “Posa matina sou a vanua na muadana binea sou veivei ve Elaiia ei ni asu pala usinani?”

11 Me ei malii a inade maido, “Inade li ei patotona. Elaiia ei ni asu usinani mei ni tobbilelesi lei a gologolu vuso.

12 Moni eau vei le amutou maido, Elaiia ei asوسي usinani, moni sou ma muada oto e ei. Sou ogomuli a masagana mine sou oto me sou goli a matamatana inigogona usino ne ei. Na inigogona tasa moni ne sou toegegeli e Natuna Bibi.”

13 Maido me sou a disaipel sou muada, ei adeade e Ioanes a bibi na maavvutuna.

*Iesu ei toekube a bibaini tasa ei isa a nunu pagu  
(Mak 9:14-29; Luk 9:37-42)*

14 Iesu pilu a disaipel tolu sou sibitala na abuna vanunua ma tavivine taula, ma bibi tasa ei asuale Iesu mei totopatulu ane ei

15 mei vei, “Bibi Taula, oo no lilomuli e natugu bibi. Ei manununu ma vovona ei mamau sele. Me mapapaina sele ei bosealale a oavi ma nanu.

16 Eau maasi ei usino ne sou a disaipel minio, moni sou ma mapigogoi ete ne sou toekube ei.”

17 Me Iesu ei malii a inade maido, “Amutou a abuna vanunua ma tavivine amutou ma silimuli ete, damutatalana ma inigogona mine amutou ei ma bilei oto. Mavisa lou eau na muina pilu e amutou? Mavisa lou eau na tabule a mavaana mine amutou? Maasi a bibi iede usinani minau.”

18 Me Iesu ei sinoa ana nunu pagu oto, ma nunu pagu odo ei ilisitase a bibi alaba do, ma tabaa oto sinobe minei i pulu.

19 Mulimuli sou a disaipel moni sou asuale Iesu me sou tagi e ei maido, “Posa matina amiteu ma mapigogoi ete namiteu taulele a nunu pagu odo?”

20-21 Me ei vei le sou maido, “Silimulina mine amutou ei alabaini sele, maido me amutou ma mapigogoi ete. Eau ade ivu ane amutou, mane amutou isa a silimulina mapigogoi tomane a vuana mastet, namutou vei ana loena ie, ‘Oo ilisi mo asu usino nado,’ me ei ni asu. Golu tasa ni ma sana oto le amutou.”

*Maluanai Iesu ei vei ni mate mei ni ilisili*

22 Iesu pilu e sou a disaipel sou viepilu na avena ne Galili, me Iesu ei vei le sou maido, “Ne sou tau e Natuna Bibi na limane sou a vanunua,

23 me ne sou valipute ei. Me na malada tolu ei ni ilisili.” Sou a disaipel sou longe a inade do me sou lilomavaa sele.

*Iesu ei bilii a takis mina luma mine Salemo*

24 Mulimuli Iesu pilu e sou a disaipel sou asu sibitala ne Kapenaum, me sou a vanua na gualena takis na luma mine Salemo sou asuale Pita me sou tagi e ei maido, “A bibi na matetengina mine amutou ei iabi a takis mina luma mine Salemo?”

25 Pita ei vei, “E.”

Na ilala Pita ei asu ulilo na luma, moni ei saboa goli a inade tasa, Iesu tagi e ei maido, “Saimon, oo damutale matina? Sou a mapana mina magamaga li sou gualeale a mapa mina matamatana takis mine sei sou? Sou gualeale mine sou e natatune sou oto ue mine sou a vanunua seasea?”

26 Me Pita ei vei, “Ne sou a vanunua seasea.” Me Iesu ei vei le ei, “Maido me natatune sou oto ne sou ma langelange lei a takis.

<sup>27</sup> Moni dae ne eitou goli e sou ne sou sinoa ane eitou, oo asu usino na pou na nanu mo viliti. Ma munugana aia oo lapuale, iedo oo guale mo pee a asena, mo no ite a vatu tasa ino lilo. Oo guale a vatu odo mo bilii e sou, ede a takis mine eitau pilu.”

## 18

*Sei ei buo sele na niitealalena mina langi?*

*(Mak 9:33-37; Luk 9:46-48)*

<sup>1</sup> Na ilala do sou a disaipel sou asuale Iesu me sou tagi e ei maido, “Sei ni buo sele na niitealalena mina langi?”

<sup>2</sup> Io Iesu ei toleale a bibaini tasa usinani, mei mamagili e ei balivua ne sou.

<sup>3</sup> Ei vei maido, “Eau vei ivu ane amutou, mane amutou ma sauvule ete amutou tomane selebanini, amutou ma mapigogoi ete ne mu gali ulilo na niitealalena mina langi.

<sup>4</sup> Bibi ei taupui e ei oto mei palea tomane a bibaini ie, bibi iede ei ni buo sele na niitealalena mina langi.

<sup>5</sup> Me mane a bibi tasa ei damutale eau mei buloi a bibaini tasa tomane a bibaini ie, io ei buloi e eau.

*Inigogona pagu ei toegegeligeli a silimulina*

*(Mak 9:42-48; Luk 17:1-2)*

<sup>6</sup> “Mane sei bibi ei toe a bibi tasa tomane bibaini ei silimuli e eau ni goli a sinusu, io kubaana ne sou papale a vatu buo tasa na loona bibi iedo me sou lange ei na tiana autu.

<sup>7</sup> Mavaana ni palea le sou a vanunua ma tavivine na magamaga ie, sou toe a vanunua sou goli a sinusu. Ivu, a inigogona pagu ie ei ni palea. Moni a mavaana buo ni palea le a bibi ei magoli e sou ne sou goli a sinusu.

<sup>8</sup> Mane a limamu ue a ubumu ei lapuale oo na gunolina sinusu, io oo no mogeuti mo pitaselele. Kubaana oo isa a limamu tasa moni, ue a ubumu tasa moni, me oo no guale a maulina ei muina taliuliu. Dae oo no isa a limamu lua ue a ubumu lua me sou lange oo usino na oavi ei ma matemate oto.

<sup>9</sup> Me mane a matamu ei lapuale oo no goli a sinusu, io oo no osetase mo pitaselele. Kubaana oo isa a matamu tasa moni mo guale a maulina ei muina taliuliu. Dae oo no isa a matamu lua me ne sou lange oo usino na oavi mina aubu na davutina.

<sup>10-11</sup> “Amutou tilale kube. Dae ne amutou damu e tasa balivua ne sou a vanunua sabubu, ei tomane a golu sabubu. Eau vei le amutou, na niitealalena mina langi sou a

bineanea mine sou, taliuliu sou ite a lagune Euma ei tubu na langi.\*

*Adetinovona mina sipsip ei buale (Luk 15:3-7)*

<sup>12</sup> “Amutou damu i matina? Mane a bibi tasa ei isa a sipsip savulu sobo tasa, me a sipsip tasa i buale, nane ei ni ma tilomuli ete, io? Boa. Ei ni asutase a sipsip savulu ialasue timana ialasue muine sou na loena, me ei ni asu mei tilomuli a sipsip i buale do.

<sup>13</sup> Eau vei patotona sele ane amutou, mane ei gualesi a sipsip tasa ei buale do, io ei ni mongemonge sele. Ei mongemonge a sipsip savulu ialasue timana ialasue sou ma buale oto, moni na ilala ei gualeliu a sipsip tasa ei buale iedo, munonge minei ni buo mamau lou.

<sup>14</sup> Tomane moni maido Tamane amutou ei ino na langi ei ma kale ete tasa mine sou e selebanini ieli ni buale.

*Inigogona mina toebilelesine tamaimu ei goli a inigogona pagu*

<sup>15</sup> “Mane tamaimu ei goli a sinusu usino minio, oo asu ite ei. Ilala amulu moni ino, oo no tove a toebilelesina inade pilu e ei. Mane ei longemuli a inademu, io oo no gualeliu e ei.

<sup>16</sup> Me mane ei ma longemuli ete a inademu, io oo no guale a bibi tasa ue bibi lua lou ne sulu asu pilu e oo me ne sulu toesagali a inade.

<sup>17</sup> Moni mane ei ma kale ete ni longemuli a inade ne sou, io oo no vei le sou a viepiluna kinaka. Me mane ei ma kale ete ni longemuli a inade ne sou tamai, io oo no itetase ei tomane a bibi tasa masala me tomane a bibi na gualena takis.

<sup>18</sup> “Eau vei ivu ane amutou, golugolu vuso amutou papale na magamaga, iede Salerno ei ni papale na langi tamai. Ma golugolu vuso amutou lube na magamaga, iede Salerno ei ni lube na langi tamai.

<sup>19</sup> “Eau vei lei le amutou. Mane taolua mine amutou nani na magamaga mu lilo tasa a golu tasa, me amulu kaka a gualena golu odo, io Euma ino na langi, ei ni bilii e amulu.

<sup>20</sup> Mane a bibi lua ue tolu sou viepilu na aisagu, eau oto eau ino balivua ne sou.”

*Mapamulina mina lilotasena*

<sup>21</sup> Na ilala do Pita ei asuale Iesu mei tagi e ei, “Bibi Taula, mane tamaigu ei goli a sinusu usinani minau, mavisana i eau na lilotase a inigogona pagu minei? Nane mapigogoi mapadiluanai?”

\* **18:10-11** Na laulau na vinalu sanii, sou tau a inade sanii lou na malevina ieli maido, “Natune bibi ei asu usinani ni gualeliu a vanunua ma tavivine sou bualesi.”

<sup>22</sup> Me Iesu ei vei lei maido, “Eau ma vei ete le oo no lilotase mapigogoi moni mapadiluanai. Eau vei, oo no lilotase mapigogoi savulu padilua timana padiluanai.

<sup>23</sup> “Io niitealalena mina langi ei tomane a mapana tasa, ei kale ni toebilelesi pilu e sou a vanua na pipigona minei na vatu ei bilii e sou odo.

<sup>24</sup> Ei soke a toebilelesina ginau, me sou maasi a bibi tasa usinani minei, ei isa a ginau mapigogoi savuluvulu savulu tasa (10,000) talant.†

<sup>25</sup> Moni ei ma isa oto a vatu mapigogoi ni malii a ginau odo. Maido ma mapana ei vei le sou ne sou oabi a bibi edo oto pilu e susuna me natatuna, ne sou palea a vanunua ma tavivine na pipigona sabubu. Me ne sou oabi tamai a golugolu vuso minei, me na inigogona li ne sou guale a vatu mina maliuna ginau.

<sup>26</sup> “Bibi na pipigona ei longe a inade do mei totopatulu agavuale a ubune mapana mei vei maido, ‘Oo no lilomuli e eau mo magitali sape eau. Eau na mapuisobe a ginau vuso eau guale minio.’

<sup>27</sup> Ma bibi buo mina bibi na pipigona do ei lilomuli e ei mei tauleletase a ginau minei mei litase ei ni asu.

<sup>28</sup> “Moni a bibi na pipigona do ei asu usala mei ite a bibi tasa su maitamaina a pipigona, ei isa a ginau usino ne ei mapigogoi savulu sobo tasa denarii‡ moni. Me ei lapitole a bibi su maitamaina a pipigona do mei inke sagali a loona mei vei lei maido, ‘Oo no mapuisobe a ginau vuso oo guale minau odo.’

<sup>29</sup> “A bibi su maitamaina a pipigona do ei totopatulu mei vei ana bibi iedo maido, ‘Oo no lilomuli e eau mo magitali sape eau. Eau na mapuisobe a ginau eau guale minio.’

<sup>30</sup> “Moni a bibi iedo ei ma kale ete. Ei asu mei tau a bibi su maitamaina a pipigona do na luma na tunuui mapigogoi ei mapuisobe a ginau.

<sup>31</sup> A vanunua sanii sou pipigo pilu a bibi iedo sou ite a inigogona ei goli iedo me sou lilogegele se. Me sou asu sou vavasa ana bibi buo mine sou a inigogona vuso a bibi na pipigona do ei goli.

<sup>32</sup> “Maido ma bibi buo do ei toleale a bibi na pipigona do mei vei lei maido, ‘Oo a bibi na pipigona pagu. Palapala oo tangi agu, me eau tauleletase a ginau vuso minio.’

<sup>33</sup> Eau lilomuli e oo. Moni posa matina oo ma lilomuli tamai ete a bibi amulu pipigo pilu?”

<sup>34</sup> Ma bibi buo minei ei sinoa mei tau e ei na limane sou a vanua mina biliine ei a

davutina mapigogoi ei mapuisobe a ginau vuso minei.

<sup>35</sup> “Mane amutou ma lilotase ivu ete a sinusou sou tamtamaimu sou goli le amutou, Euma ei ino na langi ei tamai ni goli a matana inigogona tasa moni usino ne amutou.”

## 19

*Iesu ei ade a inigogona valiutina taulaina*

*(Mak 10:1-12)*

<sup>1</sup> Iesu ei mapuli a inade minei ie, mei ilisitase Galili mei asu usino na avena ne Iudia mina lili na nanu maino e Iordan.

<sup>2</sup> Me sou a abuna vanunua ma tavivine buo sou ogomuli e ei. Me na avena do ei toekube sou so isa a sinobe.

<sup>3</sup> Me sou e Parisi sou asuale Iesu me sou kale ne sou tove ei. Sou tagi e ei maido, “Nane a binea mine eitou ei longo a bibi ei ni taulele e susuna na masagana minei oto?”

<sup>4</sup> Me Iesu i malii a inade maido, “Amutou ma gi ete a inade ino na Laulau mine Salemo? Inade do ei vei maido, ‘Lisa oto sele ilala Salemo ei mapale a golugolu vuso, ei mapale sou a vanunua ma tavivine, me ei toe e sou palea a bibi ma tavine.’

<sup>5</sup> Me Salemo ei vei, ‘Maido ma bibi ei asutase tamana me tinana mei valitole pilu e susuna, me sulu palea tomane a vovo tasa moni.’\*

<sup>6</sup> Maidolo me sulu ma taolua lou otosi. Sulu palea tomane a vovo tasa moni. Maido ma golu Salemo ei papaletolesi, iede a bibi i ma mapigogoi ete ni valiuti.”

<sup>7</sup> Me sou e Parisi sou vei lei maido, “Io, posa matina Moses ei bilii e eitou a binea mei vei, a bibi ei mapigogoi ni niage a laulau mina valiutina taulaina mei bilii a tavine mei taulele ei usino?”†

<sup>8</sup> Me Iesu ei vei le sou maido, “Amutou a vanua mina longetasena inade, maido me Moses ei itetase amutou mu taulele a tavine. Moni lisa oto sele a inigogona li i boa.

<sup>9</sup> Eau vei le amutou maido. Mane a susuna tasa ei ma goli ete a inigogona sualolona, moni a suana ei taulele ei mei tavui lei a tavine tasa, a bibi oto do ei goli a inigogona sualolona.”

<sup>10</sup> Sou a disapel sou longe a inade do me sou vei le Iesu maido, “Mane a bibi ei ogomuli a matana inigogona maido mei muina moni pilu e susuna, io puiale lou a bibi ei ni ma taulai oto.”

<sup>11</sup> Me Iesu ei vei le sou maido, “A vanunua ma tavivine vuso sou ma mapigogoi ete ne

† 18:24 Na ilala Iesu ei eili na magamaga, talant tasa ei a vatu tomane a bibi tasa i pipigo mapigogoi a avala savulu tasa timana lima. ‡ 18:28 Na ilala do, denarii tasa ei a mapana mina pipigona na malada tasa. \* 19:5 Sinokona 2:24

† 19:7 Binea 24:1-4

sou guale a inade do. Salemo ei bilii a inade li usino na vanua sanii moni.

<sup>12</sup> A matamatana vanua ino sou ma taulai oto. Sanii, a vovone sou i mamau na ilala tinane sou ei maalepose sou. Me sanii, a vanua sou moge sou me sou ma mapigogoi ete ne sou natua. Me sanii lou, sou damutale a gunolina pipigona mina niitealalena mina langi me sou valisobe sou oto me sou ma taulai oto. Moni a bibi ei mapigogoi ni guale a inade li, ei ni guale.”

*Litase selebanini ne sou asu usinani minau*

*(Mak 10:13-16; Luk 18:15-17)*

<sup>13</sup> Na ilala do sou a vanunua ma tavivine sou maasi e selebanini usinani ne Iesu. Sou kale ei ni tau a limane ei muata ne sou mei goli a kinaka. Moni sou a disaipel sou sinoa ane sou a vanunua ma tavivine.

<sup>14</sup> Me Iesu ei vei le sou a disaipel maido, “Amutou litase selebanini ne sou asuale eau. Amutou ma matileilei lei e sou. Niitealalena mina langi ei mina matana bibi tomane selebanini ie.”

<sup>15</sup> Me ei tau a limana muata ne selebanini, me mulimuli ei ilisitase a avena do.

*Vuvutina bibi alaba ei ade pilu e Iesu*

*(Mak 10:17-31; Luk 18:18-30)*

<sup>16</sup> Bibi tasa ei asuale Iesu mei vei, “Magiligilina, eau na goli sei inigogona doana mea na guale a maulina i doana taliuliu?”

<sup>17</sup> Me Iesu ei vei lei maido, “Vuna matina oo tagi e eau a inigogona doana? Salemo tasa moni ei kubaana. Mane oo kale no guale a maulina i doana taliuliu, oo no ogomuli a binea vuso mine Salemo.”

<sup>18</sup> Ma bibi iedo ei tagi e Iesu maido, “Oo ade e sei sou a binea?” Me Iesu ei vei, “A binea sou ie ei isa a inade maido, ‘Amutou ma valiputepute lei e sou a vanunua ma tavivine sanii. Amutou taulalai, amutou ma toegegeli lei a taulaina. Amutou ma paaaliali lou. Amutou ma aualala lou me amutou ma vavasa sabubu lou ana vanunua ma tavivine sanii sea.”

<sup>19</sup> Tade mavae tamane amutou me tinane amutou. Oo no kale tamtamaimu tomane oo kale oo oto.”<sup>‡</sup>

<sup>20</sup> Ma bibi alaba ei vei le Iesu maido, “Eau ogomuli moni a binea vuso ie. Moni eau saboa boto a sei golu lou?”

<sup>21</sup> Me Iesu ei vei lei maido, “Mane oo kale no palea bilesi sele, io oo asu sosove a golugolu vuso minio, me a vatu oo guale do oo no bilii e sou a kapelabe. Oo goli maido, me oo no guale a golugolu doana sele na niitealalena mina langi. Me mulimuli oo vele o ogomuli e eau.”

<sup>22</sup> Bibi alaba do ei longe a inade li, ma lilone ei i mavaa mei asu. Vuna, ei isa a golugolu papaina sele.

<sup>23</sup> Me Iesu ei vei le sou a disaipel minei maido, “Eau vei ivu ane amutou, ei sana sele e sou a vanua na vuvutina ne sou gali ulilo na niitealalena mina langi.

<sup>24</sup> Eau vei lei le amutou, ei sana sele a kamel ei gali ulilo na salu na sasaina, moni ei sana mamau lou ana bibina vuvutina i gali ulilo na niitealalena mina langi.”

<sup>25</sup> Sou a disaipel sou longe a inade li me sou saga mamau sele. Me sou vei, “Mane maido, sei mapigogoi ni guale a maulina i doana taliuliu?”

<sup>26</sup> Me Iesu ei gemuale bilesi e sou mei vei, “Sou a vanunua ma tavivine sou ma mapigogoi ete. Salemo ei moni mapigogoi ni goli a golugolu vuso.”

<sup>27</sup> Maido me Pita ei malii a inade mei vei lei maido, “Oite. Amiteu ilisitase a golugolu vuso me amiteu ogomuli e oo. Namiteu guale sei golu?”

<sup>28</sup> Me Iesu ei vei le sou maido, “Eau vei ivu ane amutou, na ilala a golugolu vuso ne sou palea alaba, me Natuna Bibi ni isa a aisa buo mei ni ugu na niugugu a mapana minei, na ilala do amutou a vanua mu ogomulimuli eau, amutou tamai namutou ugu na niugugu doana savulu tasa timana lua me mu iteale sou a abuna savulu tasa timana lua mine Israel.

<sup>29</sup> Ma vanunua ma tavivine sou damutale a aisagu me sou ilisitase a luma ue tasina ue latavinena ue tamana ue tinana ue natatuna ue a mauma, ne sou guale savulu sobo tasa lou, me ne sou guale a maulina i doana taliuliu tamai.

<sup>30</sup> Moni a vanua makuba seidei sou a munugana, ne sou mulisobo sele. Ma vanua makuba seidei sou mamuli, ne sou muga.”

## 20

*Adetinovona mina mauma na vain*

<sup>1</sup> Iesu ei ade lou maido, “Niitealalena mina langi ei tomane a bibi tasa ei isa a magamaga i makuba me na autupola siisii sele ei asu usino mina gualene sou a vanua na pipigona mina mauma na vain minei.

<sup>2</sup> Me sou a vanua na pipigona do sou longo a gualena vatu a denarii tasa na malada do, ma tamana mauma ei peltase sou usino ne sou pipigo na mauma na vain minei.

<sup>3</sup> “Me na matailala ialasue na autupola a tamana mauma ei asu mei ite sou a vanunua sou magili sabubu na avena mina viepiluna.

<sup>4</sup> Mei vei le sou maido, ‘Amutou tamai mapigogoi namutou asu mu pipigo na mauma na vain, eau na bilii e amutou a

<sup>‡</sup> 19:18 Gualeliuna 20:12-16; Binea 5:16-20    § 19:19 Pipigona mina Prist 19:18

mapa mapigogoi a pipigona amutou goli.' Me sou asu.

<sup>5</sup> Me na oaso posa me na matailala tolu na lavilavi, a tamana mauma ei asu lou mei goli a inigogona tasa moni.

<sup>6</sup> Io na matailala nane lima na lavilavi ei asu mei ite a vanunua sanii sou magili sabubu a muine sou. Me ei tagi e sou maido, 'Posa matina amutou magili sabubu moni nani na oaso vuso ie?'

<sup>7</sup> Me sou maliu a inade maido, 'Bibi tasa boa ei bilii e amiteu a pipigona.' Ma tamana mauma do ei vei le sou, 'Amutou tamai mu asu pipigo na mauma na vain minau.'

<sup>8</sup> "Lavilaviosi, io tamana mauma na vain ei vei ana bibi na niitealalena pipigona minei, 'Oo toleale sou a vanua na pipigona me oo bilii e sou a mapa. Oo soke ne sou a vanua sou sibitala mulimuli sele, me oo bilii e tastasa ne sou a mapa asu mapigogoi a vanua sou sibitala pala.'

<sup>9</sup> "Io a vanua sou soke a pipigona na matailala lima na lavilavi, sou asu usinani me sou guale a vatu a denarii tastasa.

<sup>10</sup> Me na ilala vanunua sou soke a pipigona pala sele sou divi, sou damu ve ne sou guale a vatu makuba sele. Moni sou tamai sou guale a vatu a denarii tasa moni.

<sup>11</sup> Me ilala sou guale a vatu do, me sou adesinoa ane tamana mauma maido,

<sup>12</sup> "Sou a vanunua li sou sibitala mulimuli sele, sou pipigo a maduna matailala tasa moni, me oo bilii e sou a mapa tasa tomane a mapa ne amiteu. Moni amiteu pipigo sagali sele soke na autupola siisii asu mapigogoi lavilavi sele ie, ma oaso ei voeke sele amiteu.'

<sup>13</sup> "Tamana mauma ei longe a inade do mei maliu a inade maido ne tasa mine sou, 'Tamaigu, eau ma goli ete a inigogona pagu usino minio. Palapala eitaou longo a pale-sobena vatu a denarii tasa, ue boa?'

<sup>14</sup> Oo guale a mapamu mo asu. Na masagana minau moni, eau bilii a mapa tasa usino na bibi ei sibitala mulisobo sele.

<sup>15</sup> Iede a golu minau. Nane eau ma mapi-gogoi ete na ogomuli a masagana minau oto na soebulena vatu minau, io? Mane eau kale na goli a inigogona doana usino ne sou a vanunua do, io posa matina oo liloegeluu? "

<sup>16</sup> Me Iesu ei vei, "Tomane moni sou a vanunua sou mulisobo, ne sou muga. Ma vanunua sou muga, ne sou mulisobo sele."

*Matolunai Iesu ei vei ei ni mate mei ni ilisiliu*

*(Mak 10:32-34; Luk 18:31-33)*

<sup>17</sup> Iesu ei kale ni asu usino ne Ierusalem mei polo pilu e sou a disaipel savulu tasa timana lua moni usino na avena tasa, mei vei le sou maido,

<sup>18</sup> "Oite. Neitou asu usino ne Ierusalem. Me ne sou bilii e Natuna Bibi na limane sou a munugana prist me sou a vanua na muadana binea. Me ne sou vavasa ane ei me ne sou maiademuli a valiputene ei.

<sup>19</sup> Me ne sou bilii e ei usino na vanunua mine sou a abuna sea, me sou a abuna do ne sou adeptintola ane ei me ne sou tibi e ei me ne sou gatitole ei na tauvaleuti. Me na malada tolu ei ni ilisiliu."

*Iemus me Ioanes su kale ne sulu palea bibi buo*

*(Mak 10:35-45)*

<sup>20</sup> Mulimuli tinane natatune Sebedi pilu e natuna lua, sou asuale Iesu. Me ei totopat-ulu mei tagi e Iesu a golu tasa.

<sup>21</sup> Me Iesu ei tagi e ei maido, "Oo kale a sava?" Ma tavine do ei vei le Iesu maido, "Eau kale oo no vei maido natugu lua do ne sulu ugu agavuale oo na avena minio, tasa na limamu e gata me tasa na limamu e meli."

<sup>22</sup> Iesu ei longe a inade do, mei maliu a inade maido, "Amutou ma muada kuba oto a golu amutou tagi e eau odo. Nane amutou mapigogoi ne mu inu a taogo mina mavaana eau na inu i?" Me sulu vei le ei, "Amilu mapigogoi."

<sup>23</sup> Me Iesu ei vei le sulu, "Ivu, amulu ne mu inu a taogo minau. Moni e sei ni ugu na limagu e gata me na limagu e meli, ieli ei a golu minau boa. Niugugu sou ie, iede mine sou a vanua Euma ei masusuluosi ane sou."

<sup>24</sup> Ilala sou a disaipel savulu tasa sou longe a inade na golu tametasi lua su tagi e Iesu, sou sinoa ane sulu.

<sup>25</sup> Moni e Iesu ei toleale sou usinani minei mei vei maido, "Amutou muada, sou a mapana mina abuna sea sou toe sou a abuna mine sou ne sou matano mina masagana minei moni. Ma vanua buobuo mine sou so sagali sele a vanunua ma tavivine ne sou ogomuli a inade mine sou.

<sup>26</sup> Moni a inigogona maido ei ma mapi-gogoi ete ni muina balivua ne amutou. Bibi ei kale ni muina a bibi buo balivua ne amutou, ei ni muina a bibi na buloina mine amutou.

<sup>27</sup> Ma bibi ei kale ni palea a munugana mine amutou, ei ni muina tomane a bibi na pipigona sabubu mine amutou.

<sup>28</sup> Tomane moni e Natuna Bibi eau ma asu oto usinani ne sou buloi e eau. Boa. Eau asu usinani mina buloine sou, me mina biliina maulina minau mina oliiune sou a vanunua ma tavivine makuba."

*Iesu ei toekube a mata ego lua*

*(Mak 10:46-52; Luk 18:35-43)*

<sup>29</sup> Iesu pilu e sou a disaipel minei sou ilisitase Ieriko, ma vanunua ma tavivine makuba sele sou ogomuli e Iesu.

<sup>30</sup> Ma bibi lua su ugugu na aana vea. Sulu mata ego, ma ilala su longe a inade ve Iesu ni asu maino, su tola vauta, "Oo Natune Devit, oo no lilomuli e amilu."

<sup>31</sup> Sou a vanunua ma tavivine sou longe sulu tola, me sou adesinoa ane sulu ne sulu vale, moni e sulu tola vauta sele lou, "Bibi Taula, oo Natune Devit, oo no lilomuli e amilu."

<sup>32</sup> Iesu ei magili mei toleale sulu mei vei, "Amulu kale eau na goli a sava usino ne amulu?"

<sup>33</sup> Me sulu maliu a inadene ei maido, "Bibi Taula, amilu kale oo no pee a matane amilu."

<sup>34</sup> Me Iesu ei lilomuli e sulu mei tau a limane ei na matane sulu, ma tabaa oto matane sulu i kuba me su gemugemu lou. Me sulu ogomuli e Iesu usino.

## 21

*Iesu gali ulilo ne Ierusalem tomane a manana*

(Mak 11:1-11; Luk 19:28-40; Ioa 12:12-19)

<sup>1</sup> Iesu pilu e sou a disaipel minei sou sibitala agavuale Ierusalem, me sou sibitala na aubu e Betpage na loena e Oliv. Me Iesu ei peltase a disaipel lua,

<sup>2</sup> mei vei le sulu, "Amulu asu usino na aubu iedo simonimoni eitou gemualale ie. Ma tabaa oto ne mu ite a donki tasa sou papale pilu e natuna. Lube a mota me mu guale sulu usinani minau.

<sup>3</sup> Me mane a bibi tasa ei goli a inade tasa usino ne amulu, ne mu vei lei maido, 'Bibi Taula ei kale sulu. Muli odo, ei ni peltaseliu e sulu.'"

<sup>4</sup> Golu ieli ei palea mina toeseselena inade a profet ei goli lisa,

<sup>5</sup> "Veipale a inade li usino ne a vanunua ma tavivine mine Saion,\*

'Mu ite. Mapana mine amutou ei maino asuasu ie.

Ei asu usinani tomane a bibi ei toebisii e ei me ei ugu oata na donki alaba.'"<sup>†</sup>

<sup>6</sup> Disaipel lua su asu me su goli tomane Iesu ei vei le sulu.

<sup>7</sup> Sulu maasi maino a donki, tinana pilu e natuna, me su oave a kinainai lagolago muata na donki lua. Me Iesu ei ugu oata.

<sup>8</sup> Ma vanunua makuba sou kaitase a kinainai lagolago mine sou me sou oave na vea. Me sanii sou valiuti a lalana obu me sou tau na vea.

<sup>9</sup> Ma vanunua ma tavivine sou asu muge-muge e Iesu me a vanunua ma tavivine

sou asu mamuli ne Iesu sou vuso sou tola maido,

"Hosanna usino ne Natune Devit.

Maibalave a bibi ieli ei asu usinani na aisane Bibi Taula.

Hosanna usino ne Salemo oata oto sele."

<sup>10</sup> Iesu ei gali ulilo ne Ierusalem, a vanunua ma tavivine vuso mina aubu buobuo do sou saga mamau sele, me sou tagi mais-aba maido, "Bibi iede, ei e sei bibi ivu?"

<sup>11</sup> Ma vanunua ma tavivine sou vei, "Ede Iesu, ei a profet maino ne Nasaret ne Galili."

*Iesu ei toetalabe a luma mine Salemo*

(Mak 11:15-19; Luk 19:45-48; Ioa 2:13-22)

<sup>12</sup> Iesu ei gali ulilo na bigomu mina luma mine Salemo mei votelele a vanunua vuso sou olioli me sou sosovesove na avena do. Ei subulai a posoposo mine sou a vanua sou pipigo a maiadevusena vatu pilu a niugugu mina vanua sou sosovesove a manu.

<sup>13</sup> Ei vei le sou maido, "Laulau mine Salemo ei isa a inade maido, 'Luma minau ei ni muina a luma mina kinaka.'<sup>‡</sup> Moni amutou goli ei tomane a muina unovuna mina vanua na paaalina."<sup>§</sup>

<sup>14</sup> Iesu ei ino lilo na luma mine Salemo, me sou a mata ego me sou a ubune sou pagu sou asu usino ne ei, me ei toekube sou.

<sup>15</sup> Moni sou a munugana prist me sou a vanua na muadana binea, sou ite a gona sinaganaga ei goli, me sou longe seleanini sou tolatola lilo na bigomu mina luma mine Salemo, "Hosanna usino ne Natune Devit." Maido me sou lilogegel.

<sup>16</sup> Me sou tagi e Iesu maido, "Nane oo longe a inade sou adeade iedo?" Me Iesu ei maliu a inade ne sou maido, "E, nane amutou ma gi ete a inade do,

'Sou seleanini me sou a mongomongo

sou beilangelange a aisamu."<sup>\*</sup>

<sup>17</sup> Me ei ilisitase sou mei asu usala na aubu buobuo mei asu muina ne Betani na lodo iedo.

*Iesu ei sinoa ana obu a fik me ei magolu*

(Mak 11:12-14, 20-24)

<sup>18</sup> Na autupola siisii sele Iesu ei asu liu usino na aubu buobuo, me ei vitolo.

<sup>19</sup> Ei ite a obu a fik tasa na aana vea, mei asu agavuale ei. Moni ei ma ite ete a vuana tasa. A laulauna moni ino. Me ei vei ana obu a fik maido, "Oo no ma vuavua asa lou." Ma tabaa oto, obu odo i magolu.

<sup>20</sup> A disaipel sou ite do, me sou saga mamau. Sou vei, "Posa matina a obu a fik ie i magolu asi?"

\* **21:5** Aubu buobuo Ierusalem ei ino oata na loena Saion, maido me malibuuna mina vanunua ma tavivine mine Saion ei tasa moni tomane a vanunua ma tavivine mine Ierusalem. † **21:5** Aisaia 62:11 ‡ **21:13** Aisaia 56:7 § **21:13**



<sup>21</sup> Me Iesu ei maliu a inade mine sou maido, "Eau vei ivu sele le amutou, mane amutou silimuli sele, me amutou ma isa oto a damutatalana lua, io ne amutou mapigogoi namutou goli a inigogona tasa moni tomane eau goli na obu a fik ie. Me tamai, mane amutou vei ana loena ie, 'Oo ilisi mo seu utano na dasi,' io a golu odo ei ni palea tomane amutou vei.

<sup>22</sup> Maido me mane amutou silimuli me mu goli a kinaka, golugolu vuso amutou tagi i, iede namutou guale."

*Sou tagi e Iesu sei bilii e ei a aisa buo*  
(Mak 11:27-33; Luk 20:1-8)

<sup>23</sup> Iesu ei gali ulilo na luma mine Salemo mei matetengi e sou a vanunua ma tavivine. Me sou a munugana prist pilu e sou a vanua buobuo mine sou e Israel sou asuale ei me sou tagi e ei, "Oo guale a aisa buo ieli iva me oo goli a golugolu sou ie? Sei bilii e oo a aisa buo iede?"

<sup>24</sup> Me Iesu ei maliu a inade ne sou maido, "Eau tamai eau kale na tagi e amutou a golu tasa. Mane amutou maliu bilisi a tinagu minau, io eau na vei le amutou e sei bilii e eau a aisa buo mina gunolina pipigona ie.

<sup>25</sup> Ilala Ioanes ei maavuvuti e sou a vanunua, ei guale a aisa buo do iva? Ei a golu mina langi, ue mina vanua moni?"

Sou adeliu ane sou oto maido, "Mane eitou vei, 'Ei a golu mina langi,' ei ni tagi e eitou, 'Posa matina amutou ma silimuli ete ei?"

<sup>26</sup> Me mane eitou vei, 'Ei a golu mina vanua moni,' io ne eitou lae e sou a vanunua ma tavivine, vuna sou vuso sou damu e Ioanes ei a profet ivu."

<sup>27</sup> Maido me sou maliu a inade mine Iesu maido, "Amiteu ma muada oto." Me Iesu ei vei le sou maido, "Eau tamai eau na ma vei ete le amutou e sei bilii e eau a aisa buo me eau goli a pipigona ie."

*Adetinovona mine tametatasi lua*

<sup>28</sup> "Amutou damutale matina? Bibi tasa ei isa a natuna lua, ei asu usino ne natuna matalagu mei vei lei maido, 'Natugu, seidei oo asu pipigo na mauma na vain minau.'

<sup>29</sup> "Me natuna ei vei, 'E, ouma.' Moni ei ma asu oto.

<sup>30</sup> "Me tamana i asu usino ne natuna maluanai tamai mei goli a inade tasa moni usino ne ei. Me natuna i vei, 'Eau ma kale ete.' Moni mulimuli ei sauvule a damutatalana mei asu.

<sup>31</sup> "Io, ne natuna lua do, sei ogomuli a inade mine tamana?" Me sou vei, "Natuna maluanai."

Me Iesu ei vei le sou maido, "Eau vei ivu ane amutou, a vanua na gualena takis me sou a tavivine na vea sou galigali ulilo na

niitealalena mine Salemo muga pala ane amutou.

<sup>32</sup> Vuna, Ioanes ei sibitala ne amutou mei maite e amutou a vea i bilisi, me amutou ma silimuli ete ei. Moni e sou a vanua na gualena takis me sou a tavivine na vea sou silimuli e ei. Me amutou itesi ieli, moni amutou ma sauvule ete a damutatalana mine amutou me mu ma silimuli ete ei."

*Adetinovona mina vanua pagupagu sou iteale a mauma na vain*

(Mak 12:1-12; Luk 20:9-19)

<sup>33</sup> "Amutou, longe a adetinovona tasa lou. Tamana mauma tasa ei pipigo a mauma na vain tasa, mei puisobe a bigomu. Me lilo na mauma ei pesi a aova tasa mei tau a taogo buo mina soetolena ma soepapasena vuavua na vain, me ei tige a luma mina vanua na ulagena mauma. Me ei tau a mauma do na limana vanunua sanii sou kale ne sou pipigo a gualena vatu. Me ei asu usino na avena tasa i bulago.

<sup>34</sup> Agavuale a ilala mina obu a vain ni vua i, ei peltase a vanua na pipigona usino na mauma ne sou boni a vuavua na vain minei.

<sup>35</sup> "Moni a vanua sou pipigo na mauma sou guale a vanua na pipigona minei, me sou valibili e tasa, me sou valiputemate tasa, me sou ubi e tasa a vatu.

<sup>36</sup> Me mulimuli tamana mauma ei peltase a vanua na pipigona sanii lou usino ne sou. Ei seleuli a savulu na vanunua ei peltase pale sou odo. Ma vanua sou pipigo na mauma sou goli a inigogona tasa moni usino na vanua na pipigona do.

<sup>37</sup> Mulimuli tamana mauma ei peltase e natuna bibi minei oto usino ne sou. Tamana ei vei maido, 'Ne sou tade e natugu.'

<sup>38</sup> "Moni a vanua sou pipigo na mauma sou ite natune ei asuas maino, me sou maiademuli maido, 'Bibi maino ieli ei ni guale a golugolu vuso mine tamane ei. De eitou valipute ei, me neitou guale a mauma minei ie.'

<sup>39</sup> Maido me sou lapitole ei me sou lange ei usala na mauma, me sou valipute ei.

<sup>40</sup> "Maido na ilala tamana mauma mina vain ei asu maino mei ni toematine e sou?"

<sup>41</sup> Me sou a munugana prist ma vanua buobuo mine sou e Israel sou vei lei maido, "Ei ni toegegeli sele sou a vanunua pagu odo mei ni iabipole a mauma na vain usino na abuna sanii ne sou bilii liu e ei a tinaunau na ilala mina gualena gona inani."

<sup>42</sup> Me Iesu ei tagi e sou maido, "Nane amutou ma gi ete a malibuuna inade ino na Laulau mine Salemo?"

'A vatu odo, sou a vanua na gagatuna sou pitaselele, seidei ei palea a munugana vatu mina toesagalina inapua na luma.

Bibi Taula oto ei goli a golu ieli i palea,  
me ei malasa sele na mata ne amiteu.<sup>†</sup>

<sup>43</sup> “Maido me eau vei le amutou, Salemo ei ni taulele a niitealalena mina langi na limane amutou, mei ni labipole usino na abuna vanunua ma tavivine tasa sou mapalele a vuavuaana doana Salemo ei kale.

<sup>44</sup> Ma bibi ei bosa muata na vatu odo, a vatu do ei ni valilote vuse ei. Mane a vatu do i pu muata na bibi tasa, vatu ei ni valimolemole ei.”

<sup>45</sup> Ilala sou a munugana prist me sou e Parisi sou longe a adetinovona Iesu ei goli, me sou muada, ei ade e sou oto.

<sup>46</sup> Moni ilala sou kale sele ne sou lapitole e Iesu, sou lae a vanunua ma tavivine, vuna vanunua ma tavivine sou damu i e Iesu ei a profet.

## 22

*Adetinovona mina inani buo mina taulaina*

*(Luk 14:15-24)*

<sup>1</sup> Iesu ei goli a adetinovona sea lou maido,  
<sup>2</sup> “Niitealalena mina langi ei tomane a mapana tasa ei masusulu a inani buo mina taulaina ane natuna bibi minei.

<sup>3</sup> Palapala ei vei le sou a vanua ne sou asu usinani na inani mina taulaina. Me na malada mina inani ei peltase sou a vanua na pipigona minei usino mina tolealene sou usinani. Moni sou ma kale ete ne sou asu usinani.

<sup>4</sup> “Me ei peltase a vanua na pipigona sanii lou mei vei le sou maido, ‘Amutou asu usino ne sou a vanunua eau toleale sou, me mu vei le sou maido, ‘Oite. Eau masusuliosi a inani minau. Sou a bulmakau togo me sou a aitubuna golu vivi minau, amiteu vali-putesi e sou. Ma golugolu vuso i masusuliosi. Amutou asu usinani na inani mina taulaina.’”

<sup>5</sup> “Moni sou ma kale ete ne sou longo, me sou asu maisaba. Tasa ei asu usino na mauma minei, me tasa ei asu goli a pipigona vuvutina minei.

<sup>6</sup> Moni sanii sou saavi a vanua na pipigona mina mapana me sou valibili gegeli sele sou, me sou valipute sou.

<sup>7</sup> Maido ma mapana ei sinoa mei peltase sou a vanua na maubina minei usino, me sou mapuli sele a vanunua sou valiputemate sou a vanua na pipigona minei, me sou sulii a aubu mine sou.

<sup>8</sup> “Ma mapana ei vei le sou a vanua na pipigona minei maido, ‘Inani mina taulaina ei masusuliosi, moni a vanunua eau toleale sou, sou ma kubaana vanua oto mapigogoi ne sou asu usinani na inani ie.

<sup>9</sup> Maidolo me namutou asu usino na vea vuso, ma vanunua vuso amutou ite, namutou toleale sou usinani na inani mina taulaina ie.’

<sup>10</sup> Ei vei maido, ma vanua na pipigona do sou asu maisaba na vea vuso me sou viepili a vanunua ma tavivine vuso sou ite, sou a vanunua pagupagu pilu a vanunua doadoana. Me sou asu usinani me sou ugu a inani, ma luma i vonu sele.

<sup>11</sup> “Ilala a mapana ei gali ulilo mina nitene sou, mei ite a bibi tasa ei ma kai ete a kinainai doana sou kaikai na malada na taulaina.

<sup>12</sup> Ma mapana i tagi e ei, ‘Tamaigu, posa matina oo ma kai ete a kinainai doana me oo asu usinani?’ Me a bibi iodo i ma ade oto.

<sup>13</sup> “Io a mapana ei vei le sou a vanua na pipigona, ‘Mu papale a ubuna ma limana me mu lange ei usala ni muina na aubu na tunuui. Na aubu na tunuui iedo ei ni tangi mamau sele mei ni gado kaselese a livone ei.’

<sup>14</sup> “Salemo ei tolealale a vanunua papaina, moni ei vilealale sanii moni mina ginali ulilo.”

*Ne sou iabi a takis usino ne Sisar ue boa?*  
*(Mak 12:13-17; Luk 20:20-26)*

<sup>15</sup> Sou e Parisi sou asu me sou maiademuli a inade mina punogena vea mina vavasana ane Iesu. Sou damutale a niubina tabune Iesu ni goli a inade sanii i ma bilesi oto ve ne sou vavasa ane ei na inade minei oto.

<sup>16</sup> Sou peltase sou a disaipel mine sou pilu a vanua sanii mina abuna mine Herot, me sou asu usino ne Iesu me sou vei lei maido, “Magiligilina, amiteu muada, oo a bibi mina adeivuna. Me na adeivuna moni oo matetengitengi e sou a vanunua ma tavivine a inigogona mine Salemo. Oo ma laelae oto a bibi tasa. Oo goli a matana inade tasa moni ne sou a vanunua vuso, sou isa a aisa ue sou ma isa oto a aisa.

<sup>17</sup> Maido me oo no vei le amiteu. Oo damutale matina? Ei puiale ne eitou iabi a vatu usino ne Sisar ue boa?”

<sup>18</sup> Moni e Iesu ei muadasi a damutatalana pagu mine sou, mei vei, “Amutou a vanua na aualana, amutou tove eau ili?”

<sup>19</sup> Amutou maite e eau a vatu tasa na takis iede.” Me sou maasi a vatu tasa usino ne ei.

<sup>20</sup> Me Iesu ei tagi e sou maido, “A nunu ieli ma aisa ieli ei mine sei?”

<sup>21</sup> Me sou vei, “Mine Sisar.” Me ei vei le sou, “Golu mine Sisar, iede bilii e Sisar. Ma golu mine Salemo, iede bilii e Salemo.”

<sup>22</sup> Sou longe a inade do, me sou saga sele. Me sou ilisitase ei me sou asu.

<sup>†</sup> 21:42 Laulau na Inala 118:22

*Sadusi sou tagi e Iesu a minate ma ilisili-una*

(Mak 12:18-27; Luk 2:27-40)

<sup>23</sup> Na malada moni iedo sou e Sadusi sou asuale Iesu. Sou a abuna vanua do sou veivei ve vanunua ma tavivine sou matesi, sou ma mapigogoi ete ne sou ilisiliu. Sou tagi e Iesu maido,

<sup>24</sup> “Magiligilina, Moses ei vei maido, ‘Mane a bibi tasa ei ma isa oto a natuna tasa mei mate, io tasine ei ni tavui e susuna mei ni mapale e natatuna, io a abuna mine tuana ni ma pulu oto.’”

<sup>25</sup> De lisa tametatasi padilua sou ino balivua ne amiteu. Me matalagu ei taulai me ei mate, moni e natuna ana boa. Maido me tasina ei tavui e susuna.

<sup>26</sup> Me tasina maluanai iodo, ei tamai a natuna boa mei mate, me tasina matolunai ei tamai ei tomane maido, i asu mapigogoi a vuapulu, iede tasina padiluanai.

<sup>27</sup> Sou vuso sou matesi, me mulimuli oto tavine tamai ei mate.

<sup>28</sup> De na ilala vanua sou matesi iodo sou ilisiliu, tavine do ei ni susune sei mine tametatasi padilua do? Sou vuso do sou tavui e ei.”

<sup>29</sup> Iesu ei malii a inade mine sou, “Amutou ma muada oto a inadenade ino na Laulau na vinalu mine Salemo. Me amutou ma muada oto a sagagalina mine Salemo tamai. Maidolo me amutou goli a inade i pagu.

<sup>30</sup> Na ilala vanua sou matesi me sou ilisiliu, sou a abuna vanunua ma tavivine do ne sou ma taulai oto. Ne sou muina tomane sou a bineanea mina langi.

<sup>31</sup> Moni na inade mina vanua sou mate me sou ilisiliu odo, nane amutou ma gi ete a inade do Salemo ei vei le amutou? Ei maido,

<sup>32</sup> ‘Eau e Salemo mine Abraham, Salemo mine Aisak me Salemo mine Iekop.’ Salemo ei ma Salemo oto mina vanua sou matesi. Ei e Salemo mine sou a vanua sou mauli.”<sup>†</sup>

<sup>33</sup> Sou a vanunua ma tavivine sou longe a inade do, me sou saga a inade minei.

*Munugana binea mine Salemo*

(Mak 12:28-31; Luk 10:25-28)

<sup>34</sup> Ilala sou e Parisi sou longe a inade maido Iesu ei sausobe a asene sou e Sadusi, sou asu usinani minei.

<sup>35</sup> Balivua ne sou, a bibi na muadana binea tasa ino. Ei kale ni tove e Iesu mei tagi e ei maido,

<sup>36</sup> “Magiligilina, sei binea ei vululusi sele a binea vuso?”

<sup>37</sup> Me Iesu ei vei lei maido, “‘Ne amutou kale sele Salemo, Bibi Taula mine eitou.

Ne amutou kale sele ei na lilo ne amutou vuso, me na nunu ne amutou vuso, me na damutatalana mine amutou vuso.’”<sup>‡</sup>

<sup>38</sup> Binea ieli ei buo mei a munugana sele.

<sup>39</sup> Me a maluana binea ei tomane moni ie. ‘O no kale sele tamtamaimu tomane oo kale oo oto.’<sup>§</sup>

<sup>40</sup> Binea lua ieli ei a vuna inadenade vuso mina binea me mine sou a profet.”

*Krais ei e sei?*

(Mak 12:35-37; Luk 20:41-44)

<sup>41</sup> Sou e Parisi saboa ino sou viepilu, Iesu ei tagi e sou,

<sup>42</sup> “Amutou damutale matina e Krais? Ei e natune sei?” Me sou vei lei maido, “Natune Devit.”

<sup>43</sup> Me Iesu ei tagi e sou maido, “De posa matina Maolona Nunu ei bilii e Devit a damutatalana me Devit ei tole a bibi iedo ‘Bibi Taula’? Devit ei vei maido,

<sup>44</sup> ‘Bibi Taula ei vei le Bibi Taula minau maido,

“Oo ugu na limagu e gata mapigogoi eau na tau e sou a butu minio matano na ubumu.”’<sup>\*</sup>

<sup>45</sup> “Devit oto ei tole a bibi iedo Bibi Taula minei. Io posa matina a bibi iedo ei e natune Devit?”

<sup>46</sup> Me tasa mine sou ma mapigogoi ete ni malii a inade mine Iesu. Me soke na malada do, sou lae a tinagine Iesu a golu tasa lou.

## 23

*Sou e Parisi me sou a vanua na muadana binea sou gologoli a inigogona pagu*

(Mak 12:38-39; Luk 11:37-52, 20:45-46)

<sup>1</sup> Mulimuli Iesu ei veimuade a inade usino ne sou a vanunua ma tavivine pilu e sou a disaipel minei.

<sup>2</sup> Ei vei maido, “Sou a vanua na muadana binea pilu e sou e Parisi sou matetengitengi e amutou a binea tomane Moses ei goli.

<sup>3</sup> Maido ma inadenade vuso sou bilii e amutou, iede namutou longe me mu ogomuli. Moni a inigogona sou gologoli, iede namutou ma ogomulimuli lei. Sou gologoli a inade makuba, moni sou ma ogomuli ete a inade mine sou.

<sup>4</sup> Ei tomane sou papale a golu i mavaa sele me sou tau muata na baune sou a vanunua, me sou a vanunua do sou tivula sele a tabulena. Moni e sou oto sou ma kale ete ne sou tau sape a uune sou mina buloine sou a vanunua a tabulena.

<sup>5</sup> “Golugolu vuso sou goli, iede sou goli mine sou a vanua ne sou ite. Sou papalepale a palakulu mina kinaka”<sup>\*</sup> na palalane sou

\* 22:24 Binea 25:5 † 22:32 Gualieluna 3:6 ‡ 22:37 Binea 6:5 § 22:39 Pipigona mina Prist 19:18 \* 22:44 Laulau na Inala 110:1 \* 23:5 Sou niage a laulau mina inade mine Salemo ilona palakulu iedo.

ue na limane sou, me sou papalepale sou a maduna mota lago na aisuna kinainai lagolago mine sou.

<sup>6</sup> Vuna sou kale a gualena munugana niugugu na gona inani buo vuso, me sou a munugana muina niugugu mina luma na viepiluna.

<sup>7</sup> Sou kale mamai sele sou a vanunua ma tavivine ne sou vate oaso ane sou na muina viepiluna vuso, me sou kale sou a vanunua ne sou tole e sou a 'Bibi na matetengina.'

<sup>8</sup> "Moni amutou ma itetase lei a vanua ne sou vatevate e amutou a 'Bibi na matetengina.' Tasa vululu moni ei a bibi na matetengina mine amutou, me amutou vuso amutou tametatasi.

<sup>9</sup> Me na magamaga ieli amutou ma vatevate lei a bibi tasa e tamane amutou. Ei moni e Tamane amutou ino na langi.

<sup>10</sup> Me ne sou ma vatevate lei e amutou a 'Munuganuga.' Amutou isa a munuganuga tasa moni, ei e Kraisi.

<sup>11</sup> Bibi buo mine amutou ei ni muina a bibi na pipigona mine amutou.

<sup>12</sup> Bibi ei beilange a aisane ei oto, aisana ni vele utano. Ma bibi ei taupui ei oto, ei ni guale a aisa buo.

<sup>13-14</sup> "Amutou a vanua na muadana binea me amutou e Parisi, mavaana buo ei ni palea le amutou. Amutou a vanua na aualana. Amutou kapi a tema na ni-itealalena mina langi na lagune sou a vanunua ma tavivine. Amutou oto amutou ma galigali oto ulilo. Moni ilala sou a vanunua ma tavivine sou kale ne sou gali ulilo, amutou tabesobesobe a vea ne sou.

<sup>15</sup> "Amutou a vanua na muadana binea me amutou e Parisi, mavaana buo ei ni palea le amutou. Amutou a vanua na aualana. Amutou gagaga usino na aveavena vuso na dasi ma magamaga mina punogena bibi tasa ni palea a disaipel mine amutou. Ma ilala ei paleasi a disaipel, amutou toesusu e ei ni palea a bibi mina aub na davutina tomane amutou. Amutou goli ei vululusi sele amutou a inigogona vuso pagu.

<sup>16</sup> "Amutou mata ego, amutou kale namutou maite sou a vanunua a vea, mavaana buo ei ni palea le amutou. Amutou adeade maido, 'Mane a bibi ei vei ivu uata a luma mine Salemo, ei a golu sabubu. Moni mane a bibi ei vei ivu uata a gol ino na luma mine Salemo, io ei ni goli tomane ei ade i.'

<sup>17</sup> Amutou a vauta me mu mata ego, sei golu ei muga pala na matane Salemo? Nane a gol ei muga? Ue a luma mine Salemo ei muga? Amutou muada, a luma mine Salemo ieli moni ei goli a gol i palea a golu mine Salemo.

<sup>18</sup> Me tamai, amutou vei ve, 'Mane a bibi ei vei ivu uata a poso na niabi, ei a golu

sabubu. Moni mane ei vei ivu uata a niabi ino muata na poso, io ei ni goli tomane ei vei ivu uata i.'

<sup>19</sup> Amutou mata ego, sei golu ei muga na matane Salemo? Nane a niabi ei muga? Ue a poso ei muga? Amutou muada, a poso ieli moni ei goli a gona inani i palea a golu mine Salemo.

<sup>20</sup> Maido me a bibi ei vei ivu uata a poso, ei vei ivu uata na poso pilu a golugolu vuso ino oata ne ei.

<sup>21</sup> Me a bibi ei vei ivu uata a luma mine Salemo, ei vei ivu uata a luma mine Salemo pilu e Salemo oto ei ino na luma minei.

<sup>22</sup> Me a bibi ei vei ivu uata a langi, ei vei ivu uata na niugugu mine Salemo pilu e Salemo oto ei ugu na niugugu odo.

<sup>23</sup> "Amutou a vanua na muadana binea me amutou e Parisi, mavaana buo ei ni palea le amutou. Amutou a vanua na aualana. A laulau na inani malabanini ue sei golu mina mauma, iede amutou soebule a maduna i savulu tasa me amutou bilii e Salemo a maduna tasa. Moni amutou danivusesi a malibuuna inade buobuo mina binea, tomane a inade mina inigogona bilesi, ma inigogona dinodo, ma inigogona silimulina. Ei kubaana amutou sagali a ogomulina inadenade mine sou a binea buo li, me amutou ma litasetase lei a bineanea banini odo tamai.

<sup>24</sup> Amutou mata ego, amutou kale namutou maite a vanua a vea. Amutou tomane a bibi ei ite a malalavu banini ino na nanu na inani minei mei taulele, moni ei ma ite ete a kamel ino na nanu odo mei ini mei busonge vuse.

<sup>25</sup> "Amutou a vanua na muadana binea me amutou e Parisi, mavaana buo ei ni palea le amutou. Amutou a vanua na aualana. Amutou loloi iiti a masala mina taogo na niinu ma taogo na inani, moni lilona taogo ei vonu a luumona pilu a inigogona munonge na vovo.

<sup>26</sup> Oo Parisi, oo mata ego. Palapala oo no lolovei a lilona taogo, ma vovona taogo tamai ni palea alaba.

<sup>27</sup> "Amutou a vanua na muadana binea me amutou e Parisi, mavaana buo ei ni palea le amutou. Amutou a vanua na aualana. Amutou tomane a muina minate sou malolome a malolomena keakea. Masala mina muina minate ei malasa mina niitena, moni lilo a tuatuaana vanua sou matesi ma golugolu vuso sou mumugu sou ino vonu.

<sup>28</sup> Amutou tamai amutou ino maido moni. Sou a vanua sou ite a vovone amutou, sou damu e amutou a bilesina vanua. Moni lilo na lilone amutou amutou vonu a inigogona aualana ma inigogona punope na binea.

<sup>29</sup> “Amutou a vanua na muadana binea me amutou e Parisi, mavaana buo ei ni palea le amutou. Amutou a vanua na aualana. Amutou gologoli a muina minate doana mine sou a profet, me amutou mal-olomelome a muina minate mine sou a bilesina vanunua.

<sup>30</sup> Me amutou veivei, ‘Mane amiteu ino na ilala ne sou a tubutubune eitou, io amiteu ma buloi ete sou a valiputematene sou a profet.’

<sup>31</sup> De, na inade li amutou oto maite i maido, amutou a abune natatuna vanua sou valiputemate sou a profet, me amutou ogomuli a inigogone tubutubune amutou tamai.

<sup>32</sup> Io, amutou asu toeselese a inigogona pagu mine sou e tubutubune amutou, me guale a malaitabena tamai.

<sup>33</sup> “Amutou a natatuna aliusu pagu. Salemo ni vavasa ane amutou me namutou asu usino na aubu na davutina. Me namutou oavetase matina?”

<sup>34</sup> Maido me amutou longe. Eau peltase sou a profet me sou a vanua sou isa a damutatalana doana me sou a vanua na muadana inade mine Salemo ne sou asu usinani ne amutou. Moni namutou valipute sanii me mu gatitole sanii na tauvaleuti me mu tibi sanii lilo mina luma na viepiluna mine amutou. Me namutou votetase sou na aubu buobuo mine amutou me aubu buobuo sanii sea.

<sup>35</sup> Maido ma daladala mine sou a vanua na bilesina sou valipute na magamaga ie, daladala iedo ni muina moni ne amutou. Sou valiputemate sou a bilesina vanunua, soke ne Abel i asu pea ne Sekaraia, natune Berekia, a bibi iedo amutou valipute balivua mina luma mine Salemo me na poso na niabi.

<sup>36</sup> Eau ade patotona ane amutou, mapa na inigogona pagu vuso ieli, ei ni palea na abuna vanunua ma tavivine seidei sou eili ie.

*Iesu ei lilomuli e Ierusalem  
(Luk 13:34-35)*

<sup>37</sup> “Ierusalem, Ierusalem, oo valipute sou a profet, me oo ubi a vatu sou a vanunua e Salemo i peltase sou usino minio. Mapapaina sele eau kale na viepili e sou e natatune oo, tomane a kuleko tina ei viepilipili e natatuna matano na velevelene ei. Moni e amutou ma kale ete.

<sup>38</sup> Oite. Seidei a luma ne amutou ni mau mei ni muina sabubu.

<sup>39</sup> Eau vei le amutou maido, namutou ma ite lei ete e eau mapigogoi na ilala namutou vei, ‘Maibalave ei, ei asu usinani na aisane Bibi Taula.’ ”

## 24

*Luma mine Salemo ni mamau  
(Mak 13:1-2; Luk 21:5-6)*

<sup>1</sup> Na ilala Iesu ei ilisitase a luma mine Salemo mei asuasus, me sou a disaipel minei sou asuale ei. Sou kale ne sou maite ei a lumaluma mine Salemo.

<sup>2</sup> Moni ei goli a inade li usino ne sou, “Amutou ite a luma vuso ieli, io? Eau vei bilesi le amutou, a vatu tasa nali ie ni ma tabuli oto muata na tasa ne sou, me ne sou valipopole vuse me ne sou lange utano.”

*Iesu ei ade a mavaana papaina ni palea  
(Mak 13:3-13; Luk 21:7-19)*

<sup>3</sup> Iesu ei ugu na loena e Oliv, me sou a disaipel moni sou asuale ei me sou tagi e ei maido, “Oo vei le amiteu, sei ilala a golugolu sou odo ni palea? Sei matailala ni palea pala na ilala o no veteliu ma magamaga ieli ni pulu?”

<sup>4</sup> Iesu ei malii a inade mine sou, “Amutou tilale, dae a bibi tasa ni auala ane amutou.

<sup>5</sup> Vanunua makuba ne sou asu maino me ne sou vate a aisagu me sou vei, ‘Eau oto eau e Kraisi.’ Me ne sou ioto ana vanunua ma tavivine makuba.

<sup>6</sup> Amutou ne mu longe a mangelengelenena mina maubina buo ma adesabubuna mina maubina buo. Amutou tilale. Amutou ma sagasaga lou. Golugolu sou ieli ei ni palea, moni a punuluna malada ei saboa.

<sup>7</sup> Sou a vanunua mina abuna sanii ne sou mailisi a maubina ane sou a abuabuna seasea sanii. Me sou a abuna mina mapana sanii ne sou mailisi a maubina ane sou a abuna mina mapana seasea sanii. Na avena sanii ne sou isa a ilala mina vitolona buo, ma malugulugu ni vuli.

<sup>8</sup> Golugolu vuso ieli ei tomane a davutina ei palea pala na tavine ei ni vasusuale a bibaini.

<sup>9</sup> “Na ilala do ne sou guale amutou mina biliine amutou a davutina ma mavaana, me ne sou valipute amutou. Ma abuna vanunua ma tavivine vuso ne sou lilogegelulu sele ane amutou vuna aisane eau.

<sup>10</sup> Me na ilala do a vanunua ma tavivine papaina sou silimuli e eau, ne sou litase a silimulina ne sou, me ne sou butuale e sou oto me ne sou tau e sanii ne sou oto na limane sou a butu.

<sup>11</sup> Ma profet auala makuba, ne sou ilisi me ne sou auala ana vanunua ma tavivine papaina.

<sup>12</sup> Inigogona pagu ei ni palea buo, maido ma vanunua makuba ne sou litase a inigogona mina kinalena.

<sup>13</sup> Moni e sou a vanunua ma tavivine sou magili sagali pea na punuluna malada, Salemo ei ni gualeliu e sou.

<sup>14</sup> Me ne sou ademuada a malongolong-ona kubaana mina niitealalena mina langi iedo na avena vuso mina magamaga, na abuna vanunua ma tavivine vuso ne sou longe, me na tauluna moni ie, a punuluna malada ei ni palea.

*Golu pagu sele ni palea  
(Mak 13:14-23; Luk 21:20-24)*

<sup>15</sup> "Ilala namutou ite 'a golu pagu sele ie' \* a profet e Daniel ei ade i, ma golu odo ei ni magili ino na luma mine Salemo oto, bibi ei gi a inade ie, ei ni damutatata kuba.

<sup>16</sup> Io sou a vanunua ma tavivine ino na avena ne ludia ne sou oava usino na loeloena.

<sup>17</sup> Ma bibi ino oata na mapana luma, ei ni ma sivo oto utano mina gualena golugolu minei ino na luma.

<sup>18</sup> Ma bibi ei ino na mauma, ei ni ma veteliu oto uluma mina gualena kinainai lagolago minei.

<sup>19</sup> Maule sou a tavivine sou tiana me sou a tavivine sou masususu na ilala do!

<sup>20</sup> Me amutou namutou kaka, ne amutou ma oava oto na ilala mina maigina ue na Maolona Malada ne sou e Iuda.

<sup>21</sup> Vuna na ilala do a mavaana ni buo sele. Soke na ilala magamaga i palea i asu mapigogoi seidei, matana mavaana maido ei ma palea oto lisa. Me mulimuli tamai a matana mavaana maido ei ni ma sibitala lou oto.

<sup>22</sup> "Mane Salemo i ma toebote ete a ilala na mavaana do, io a maulina mine vanunua ma tavivine vuso ne sou buale. Moni ei damutaletale sou a vanunua ma tavivine ei vilealesi, maidolo me ei ni toebote a ilala do.

<sup>23</sup> Mane a bibi tasa ei vei le amutou, 'Mu ite, Krais ei eili ie,' ue 'Ei ino na avena do,' amutou ma silimulimuli lei a inade mine sou.

<sup>24</sup> Vuna, vanunua sanii ne sou asu maino me sou ade auala maido, 'Eau e Krais,' ue 'Eau a profet tasa.' Me ne sou goli e sou a gona sinaga buo, me ne sou goli a mata-matana golugolu seasea ni palea. Mane sou mapigogoi, ne sou toemaisabe sou a vanunua ma tavivine tamai Salemo ei vileale minei oto.

<sup>25</sup> Oite, palapala eau veiosi le amutou a golugolu sou odo.

<sup>26</sup> "Maido me mane sou vei le amutou, 'Oite, ei ino na avena a vanua boa.' Moni amutou ma asuasu lou usino na avena do. Me mane sou vei, 'Oite, ei ino na vilo na luma do,' moni namutou ma silimulimuli lei a inade mine sou.

<sup>27</sup> Amutou muada, ilala sima ei silida, ladana do i palealea na avena mina oaso i tala i mei asu usino na avena oaso ei solo i.

Tomane moni Natuna Bibi ei ni goli simaido na ilala ei palea, ma vanunua ma tavivine vuso ne sou ite.

<sup>28</sup> Na avena a aitola ino i, na avena iedo a loaaulu sou viepilupilu i.

*Mulimuli Natuna Bibi ei ni asu usinani  
(Mak 13:24-27; Luk 21:25-28)*

<sup>29</sup> "Ilala mina mavaana buo sou ieli i pilu, 'io saga i a oaso ni palea tunuui, ma game ni ma silida oto lou, ma mataidoido ne sou ilisitase a langi me sou pu utano, ma golugolu sou sagali ino na langi ne sou palili.' †

<sup>30</sup> "Na ilala do matailala mine Natuna Bibi ei ni palea na langi, ma abuna vanunua ma tavivine vuso mina magamaga ne sou tangi. Me ne sou ite e Natuna Bibi ei ino oata na ausa mina langi mei asu maino pilu a sagagalina buo ma aisa buo sele.

<sup>31</sup> Ma tuai ni tangi sagali sele, mei ni peltase sou a bineanea minei, me ne sou viepili sou a vanunua ma tavivine ei vilealesi minei oto maino na sinuana sele na magamaga.

*Namutou guale a muadana a obu a fik  
(Mak 13:28-31; Luk 21:29-33)*

<sup>32</sup> "Amutou namutou guale a muadana a obu a fik. Ilala a lalana ei apaputa, amutou muada, ilala mina oaso doana ei ni palea.

<sup>33</sup> Na vea tasa moni, ilala amutou ite a golugolu sou odo i paleasi, namutou muada, Natuna Bibi ei maino agavigaviosii mei ino na tema.

<sup>34</sup> Eau ade ivu ane amutou, ilala a vanunua ma tavivine seidei ie saboa sou mate, a golugolu vuso do ei ni palea.

<sup>35</sup> Langi pilu a magamaga ei ni buale, moni a inadegu ei ni ma buale oto.

*Bibi tasa boa i muada a ilala golugolu ieli ni palea*

*(Mak 13:32-37; Luk 17:26-30, 34-36)*

<sup>36</sup> "Moni a bibi tasa ei ma muada oto i sei malada ue sei matailala a golugolu sou ieli ni palea. Sou a bineanea mina langi sou ma muada oto, me Natuna tamai ei ma muada oto i. Euma tasa moni ei muada i.

<sup>37</sup> Matana inigogona sou goli na ilala mine Noa, ne sou goli a matana inigogona tasa moni na ilala Natuna Bibi i sibitala.

<sup>38</sup> Ilala sinali na nanu buo i saboa palea, sou aaniani me sou ininu, me sou a vanunua sou tavuivui a tavivine, i asu mapigogoi a ilala Noa ei gali ulilo na kuta.

<sup>39</sup> Sou ma muada oto a ilala a sinali buo i sibitala mei mapalipali a vanunua ma tavivine vuso do. Io a inigogona maido moni ei ni palea na ilala Natuna Bibi ei sibitala.

\* 24:15 Daniel 9:27, 11:31, 12:11 † 24:29 Aisaia 13:10, 34:4

<sup>40</sup> Maido ma bibi lua ne su ino na mauma, me Salemo ni guale tasa, mei itetase tasa muina.

<sup>41</sup> Tavine lua ne sulu vuli a plaua mina ulalu, me Salemo ei ni guale tasa mei itetase tasa muina.

<sup>42</sup> “Maidolo me namutou ulago kuba. Amutou ma muada oto i sei malada Bibi Taula mine amutou ei ni asu usinani.

<sup>43</sup> Amutou damutale a golu ie. Mane a tamana luma ei muada pala e sei ilala na lodo a bibi na paaalina ni asu usinani, io ei ni ulage a muina mei ni ma itetase ete a bibi na paaalina ni utipee a luma mei gali ulilo.

<sup>44</sup> Maidolo me amutou tamai ne mu masusulu. Natuna Bibi ei ni asu usinani na ilala tasa amutou ma damu oto i ei ni sibitala.

*Bibi na pipigona doana ma bibi na pipigona pagu*

*(Luk 12:42-48)*

<sup>45</sup> “Sei bibi na pipigona ei isa a damutatalana kubaana me a pipigona minei ni doana taliuliu? Bibi buo ei vilealale a matana bibi na pipigona do mina itealene sou a vanunua na pipigona sanii na luma minei, me mina soebulena gona inani usino ne sou na ilala bibi buo ei tau.

<sup>46</sup> Matana bibi na pipigona maido ei ni mongemonge sele na ilala bibi buo minei i veteliu mei ite ei goli a pipigona minei maido.

<sup>47</sup> Eau vei ivu ane amutou, bibi buo ei ni tau a bibi na pipigona do mina itealena golugolu vuso minei.

<sup>48</sup> Moni mane a bibi na pipigona do ei a bibi pagu mei damu i na lilone ei, ‘Bibi buo minau ei ni ma asu asi oto usinani,’

<sup>49</sup> me ei soke a valibiline sou a maitamaina pipigona minei mei aaniani mei inu pilu e sou a vanua na matalililina,

<sup>50</sup> io a bibi buo ni veteliu na malada tasa bibi na pipigona do ei ma masusulu oto, ue na ilala ei ma muada oto i.

<sup>51</sup> Ma bibi buo ei ni toegegeli sele a bibi na pipigona do, mei ni tau ei na avena tasa pilu e sou a vanua na aualana. Na avena do ne sou tangigegelu me sou gado kasesele a livone sou.

## 25

*Adetinovona mina tavivine alalaba savulu tasa*

<sup>1</sup> “Niitealalena mina langi ei tomane a tavivine alalaba savulu tasa sou guale a lam mine sou, me sou asu ne sou pauti a bibi taulai alaba.

<sup>2</sup> Lima mine sou a vautana tavivine, me lima mine sou so isa a damutatalana.

<sup>3</sup> Sou a vautana tavivine sou maasi a lam mine sou, moni sou ma polo pilu oto a nanu mina siningi.

<sup>4</sup> Moni a tavivine sou isa damutatalana, sou singi vovoni a nanu na batega vuso mine sou me sou polo pilu e sou a lam mine sou.

<sup>5</sup> A bibi i taulai alaba do ei ma asu asi oto usinani, maidolo ma matane sou a tavivine do i mavaa me sou ngolo.

<sup>6</sup> “Me na lodo punosa sele sou longe a bibi tasa i tola maido, ‘Bibi taulai alaba do maino ie. Amutou vele, neitou asu to pauti e ei.’

<sup>7</sup> “Io tavivine alalaba vuso do sou lulutu, me sou masusulu a lam mine sou.

<sup>8</sup> Ma tavivine sou vauta, sou vei le sou a tavivine sou isa damutatalana maido, ‘Amutou singi ane amiteu a nanu bisii, a lam vuso mine amiteu bisii moni ni mate.’

<sup>9</sup> “Moni a tavivine sou isa a damutatalana sou malii a inade maido, ‘Boa. Nanu ieli ei ma mapigogoi ete ane amiteu me amutou tamai. Kubaana amutou asu mu oli ane amutou oto.’

<sup>10</sup> “Io tavivine lima sou vauta do sou asuosi mina unolina nanu, me a bibi taulai alaba do ei asu maino. Me sou a tavivine sou masusulu sou gali ulilo na luma pilu e ei na inani buo mina taulaina. Me sou kapi a tema.

<sup>11</sup> “Mulimuli sou a tavivine alalaba odo sou asu maino, me sou vei, ‘Bibi buo, bibi buo, vele oo peeale amiteu.’

<sup>12</sup> “Moni ei adeliu maido, ‘Eau vei ivu ane amutou, eau ma muada oto e amutou.’

<sup>13</sup> “Maido me namutou ulago kuba. Vuna amutou ma muada oto a malada ma matailala Bibi Taula ei ni veteliu.

*Adetinovona mina talant*

*(Luk 19:11-27)*

<sup>14</sup> “Niitealalena mina langi ei tomane a bibi tasa ei kale ni asu usino na aubu tasa bulago. Ei toleale sou a vanua na pipigona minei, me ei tau a golugolu minei na limane sou ne sou iteale.

<sup>15</sup> Ei damutale a pipigona mine sou tastasa, me ei soebule sou a vatu. Ei bilii e tasa a talant lima, mei bilii e tasa lou a talant lua, mei bilii e tasa lou a talant tasa. Ei goli maido mei asu.

<sup>16</sup> Io ma tabaa oto a bibi ei guale a vatu a talant lima ei pipigo vuvuti a vatu odo, mei guale muata i mapigogoi a vatu talant lima lou.

<sup>17</sup> Ma bibi ei guale a vatu a talant lua do, ei tamai ei pipigo vuvuti, mei guale a vatu talant lua lou muata.

<sup>18</sup> Moni a bibi ei guale a vatu a talant tasa, ei pesi a lulu na magamaga mei tau oovi a vatu mina bibi buo minei.

19 "I tabaa mamau selesi, a bibi buo mine sou a vanua na pipigona do ei veteliu. Me ei kale ni toebilelesi pilu e sou a vatu ei bilii e sou odo.

20 Bibi ei guale a vatu a talant lima ei asu maino, mei langetase a vatu a talant lima lou, mei vei maido, 'Bibi buo, oo bilii e eau a vatu a talant lima. Oite, eau pipigo a vuvutina me eau guale talant lima lou.'

21 "Ma bibi buo minei ei vei lei maido, 'Oo a bibi na pipigona i doana sele. Oo iteale kube sele a pipigona minio. Oo iteale kube sele a golugolu banini, maido me eau kale oo no iteale a golu papaina. Oo vele usinani mo monge pilu e eau.'

22 "Bibi ei guale a vatu a talant lua ei tamai asu maino, mei vei maido, 'Bibi buo, oo bilii e eau a vatu a talant lua. Oite, eau pipigo vuvuti i me eau guale a vatu a talant lua muata lou.'

23 "Ma bibi buo minei ei vei lei maido, 'Oo a bibi na pipigona i doana sele. Oo iteale kube sele a pipigona minio. Oo iteale kube a golugolu banini, maidolo me eau kale oo no iteale a golu papaina. Oo asu usinani mo monge pilu e eau.'

24 "Ma bibi ei guale a vatu a talant tasa, ei tamai asu maino, mei vei maido, 'Bibi buo, eau muadasi i oo a bibi na lilotivulana. Oo lusilusi a gona inani na maumauma a vanunua polo sou dani. Me oo gualeale a gona inani na avena magamaga a bibi tasa sea ei lange a vuavua na gona inani ne ei.

25 Maidolo me eau lae mea tau oovi a vatu a talant tasa minio do na magamaga. A vatu minio ie.'

26 "Moni a bibi buo minei ei adeliu maido, 'Oo a bibi na pipigona pagu. Oo koea na bibi sele. Oo muada iiti i maido eau lusilusi a gona inani na mauma a vanunua polo sou dani, me eau gualeale a gona inani na avena magamaga a bibi tasa sea i lange a vuavua na gona inani i.

27 Io, posa matina oo ma tau ete a vatu minau na luma na tinauna vatu? Maido na ilala eau veteliu eau mapigogoi na guale a vatu minau pilu a vatu sanii muata lou.

28 Maido me namutou guale a vatu a talant tasa do maino ne ei me namutou bilii a bibi ie ei isa a vatu a talant savulu tasa.

29 Vuna, vanunua vuso sou isasi a golugolu sanii, eau na bilii e sou sanii lou. Moni mane a bibi tasa ei ma isa oto a golugolu, a golugolu banini ei lapitole, iede eau na taulele maino minei.

30 Ma bibi na pipigona pagu ieli, amutou taulele ei usala na avena tunuui. Na avena do ne sou tangi mamau, me ne sou gado kasese na livone sou.'

*Natuna Bibi ei ni vivileale a abuna vanua vuso*

31 "Ilala e Natuna Bibi ei veteliu tomene a mapana pilu a bineanea vuso, ei ni ugu na malasana niugugu a mapana minei.

32 Ma abuna vanunua ma tavivine vuso ne sou asu maino me ne sou viepilu na lagune ei. Me ei ni soebule sou mei ni tau e sou na tetena lua, tomene a bibi na ulagena ei soebulebule a sipsip usino na li, me sou a meme usino na do.

33 Ei ni tau e sou a sipsip na limane ei e gata, me sou a meme na limane ei e meli.

34 "Io mapana ei ni vei le sou a vanunua ma tavivine ino na limane ei e gata maido, 'Amutou isa a maibalavana mine Euma. Amutou asu usinani mu guale a maulina doana Euma ei masusulu mei vilealesi mine amutou soke na ilala magamaga i palea.

35 Lisa eau ino a vitolo, me amutou bilii e eau a gona inani. Eau mate a malouna, me amutou bilii e eau a nanu. Eau a bibi mina avena sea me amutou maasi e eau usino na luma mine amutou.

36 Eau ma isa oto a malo, me amutou bilii e eau a malo. Eau sobe, me amutou iteale eau. Eau ugu na luma na tunuui, me amutou asu maino mu ite eau.'

37 "Me sou a vanunua ma tavivine bilisi ne sou adeliu ane ei maido, 'Bibi Taula, ne sei ilala amiteu ite oo ino vitolo, me amiteu bilii e oo a gona inani? Me ne sei ilala oo mate a malouna, me amiteu bilii e oo a nanu?

38 Ne sei ilala amiteu ite oo ino a bibi mina aubu sea, me amiteu maasi e oo usino na luma mine amiteu? Me ne sei ilala oo ma isa oto a malo, me amiteu bilii e oo a malo?

39 Ne sei ilala amiteu ite oo ino sobe, ue oo ino na luma na tunuui, me amiteu asu ite oo?'

40 "Ma bibi a mapana ni adeliu ane sou maido, 'Eau ade patotona ane amutou, golugolu vuso amutou goli le tasa mine sou e tamtamaigu i ma isa sapa oto a aisa, golugolu sou iedo amutou goli le eau.'

41 "Io, a mapana ei ni vei le sou a abuna ino na limana e meli maido, 'Amutou a vanunua ma tavivine isa a mavaana maino ne Salemo, amutou mavulo na, me mu asu usino na oavi i ma matemate oto, a oavi iedo sou masusuliosi ane Satan pilu e sou a bineanea minei.

42 A vuna maido, lisa eau vitolo, me amutou ma bilii ete eau a gona inani. Eau malou a nanu, me amutou ma bilii ete eau a nanu.

43 Eau a bibi maino mina aubu polo sea, me amutou ma maasi ete eau usino na luma mine amutou. Eau ma isa oto a malo, me amutou ma bilii ete eau a malo. Eau sobe me eau ino na luma na tunuui, moni amutou ma asu oto usinani me mu ite eau.'



44 “Me sou tamai ne sou malii a inadene ei maido, ‘Bibi Taula, ne sei ilala amiteu ite oo ino vitolo, ue oo mate a malouna, ue oo a bibi mina aubu polo, ue oo ma isa oto a malo, ue oo isa a sinobe, ue oo ino na luma na tunuui, me amiteu ma toekube ete oo?’

45 “Me ei ni malii a inade mine sou maido, ‘Eau vei ivu le amutou, sei golu amutou ma goli ete usino ne tasa mina vanunua ma tavivine sou ma isa sapa oto a aisa, golu sou odo ede amutou ma goli ete usinani minau tamai.’

46 “Ma abuna sou edo ne sou guale a davutina i muina taliuliu. Moni e sou a vanunua ma tavivine bilisi ne sou guale a maulina taliuliu taliuliu.”

## 26

*Vanunua buobuo sou maiademuli a vali-putene Iesu ni mate*

(Mak 14:1-2; Luk 22:1-2; Ioa 11:45-53)

1 Iesu ei ademuadasi a inade vuso do, io ei vei le sou a disaipel minei maido,

2 “Amutou muada, tauluna malada lua a Malada na Asuleletasena\* ei ni palea. Me ne sou tau e Natuna Bibi na limane sou a butu me ne sou gatitole ei na tauvaleuti.”

3 Na ilala do sou a munugana prist me sou a vanua buobuo mine Israel sou viepilu na luma mina mapana prist, aisana e Kaiapas.

4 Me sou goli a matamatana inade ve ne sou poge a vea na aualana ane Iesu me na lapitolene ei, ne sou valipute ei.

5 Moni e sou vei maido, “Neitou ma gologoli lei a golu ie na malada buo mina kinaka. Dae a vanunua ma tavivine ne sou ite me ne sou mailisi a maubina.”

*Tavine tasa ei singi a nanu manginangina na letene Iesu*

(Mak 14:3-9; Ioa 12:1-8)

6 Iesu ei ino na luma mine Saimon na aubu e Betani, lisa ei isa a sinobe a kolokolo.

7 Ma tavine tasa ei guale a malasana taogo tasa ei isa a nanu manginangina a mapana i buo sele, me ei asuale a luma do. Ilala Iesu ei aaniani, a tavine do ei singi a nanu manginangina dolo na letene Iesu.

8 Sou a disaipel sou ite, sou lilogegele. Sou vei, “Vuna matina ei mapalipali sabubi a nanu manginangina iede?”

9 Mane eitou masosove, eitou mapigogoi neitou guale a vatu buo me neitou bilii e sou a kapelabe.”

10 Iesu ei muada a inade mine sou, mei vei le sou maido, “Posa matina amutou bilii a mavaana usino na tavine ie? Ei gologoli a inigogona doana sele usinani minau.

11 Taliuliu sou a kapelabe ne sou muina pilu e amutou. Moni eau na ma ugu pilu oto e amutou taliuliu.

12 Tavine ei singi a nanu manginangina li na vovogu, ei goli maido mina masusuluna vovogu mina minate.

13 Eau ade ivu ane amutou, na aveavena vuso sou asu usino i me sou ademuada a malongolongona kubaana ieli, ne sou ade tamai a golu a tavine ieli ei goli, me ne sou damutaleliu e ei.”

*Iudas ei adegatuna ni bilii e Iesu na limane sou a vanua buobuo*

(Mak 14:10-11; Luk 22:3-6)

14 Na ilala do tasa mine sou a disaipel savulu tasa timana lua, aisana e Iudas Iskariot, ei asu usino ne sou a munugana prist.

15 Me ei tagi e sou maido, “Mane eau bilii e Iesu na limane amutou, ne amutou bilii e eau a sava?” Io sou bilii e ei a vatu silva savulu tolu.

16 Me Iudas ei soke a punogena vea mina biliine Iesu na limane sou.

*Iesu ei aani pilu e sou a disaipel*

(Mak 14:12-21; Luk 22:7-14, 21-23; Ioa 13:21-30)

17 Na munugana malada mine sou a Malada Buo mina ulalu a is boa, sou a disaipel sou asuale Iesu me sou vei maido, “Oo kale ne amiteu masusulu a golugolu ne sei avena me oo no ani a gona inani mina Malada na Asuleletasena?”

18 Me Iesu ei vei le sou, “Amutou asu ulilo na aubu buobuo me mu asu usino na bibi tasa me mu vei lei maido, ‘Bibi na matetengina ei vei, ilala minau i agavigavioi. Eau pilu e sou a disaipel minau amiteu kale namiteu asu usinani na luma minio me namiteu ani a gona inani mina Malada na Asuleletasena.’”

19 Io sou a disaipel sou goli tomene Iesu ei vei le sou, me sou masusulu a gona inani iedo.

20 Me na mataviliolio Iesu ei ugu na poso pilu e sou a disaipel savulu tasa timana lua.

21 Sou aaniani, mei vei, “Eau vei ivu ane amutou, tasa mine amutou ei ni bilii e eau na limane sou a vanunua sou butuale eau.”

22 Sou a disaipel sou longe a inade do me sou lilomavaa sele, me sou tastasa sou soke a tinagine ei maido, “Bibi Taula, oo veivei eau, io?”

23 Me ei malii a inade maido, “Bibi ei kale ni masosove e eau na limane sou a butu, ei a bibi ei tau a limana na taogo pilu e eau.

24 Natuna Bibi ei ni mate tomene a Laulau mine Salemo ei adesi i ei ni mate. Moni mavaana buo ei ni palea le a bibi iedo ei bilii e Natuna Bibi na limane sou a butu.

\* 26:2 Na ilala do sou e Iuda sou damutaleliu e Salemo ei lilomuli e tubutubune sou mei gualeliu e sou maino ne Isip.

Kubaana lou ane ei mane tinana ni ma maalepose ete ei.”

<sup>25</sup> Iudas, ei a bibi ie ei kale ni tau e ei na limane sou a butu, ei tagi e Iesu maido, “Magiligilina, nane oo adeade eau, io?” Me Iesu ei vei le ei, “Tomane moni oo vei.”

*Iesu ei bilii a ulalu ma vain ne sou a disaipel*

(Mak 14:22-26; Luk 22:15-20; 1Ko 11:23-25)

<sup>26</sup> Sou saboa aniani, me Iesu ei guale a ulalu tasa, mei toledadangi e Salemo, me ei lee mei bilii e sou a disaipel. Me ei vei, “Amutou guale me mu ani. Ielili a mainigu.”

<sup>27</sup> Me ei guale a taogo tasa na vain, mei vate kubaana ane Salemo, mei bilii e sou mei vei, “Amutou vuso oini.

<sup>28</sup> Ielili ei a dalagu mina magilipiluna. Eau singi mina taulelena sinusu mina vanunua ma tavivine makuba.

<sup>29</sup> Eau vei le amutou, eau na ma ini ete a vain soke seidei asu pea na malada eau na ini a vain alaba pilu e amutou lilo na aubu na munonge mine Euma.”

<sup>30</sup> Io sou ale a inala tasa, me sou asu usino na loena e Oliv.

*Iesu ei vei maido Pita ei ni lametase ei*

(Mak 14:27-31; Luk 22:31-34; Ioa 13:36-38)

<sup>31</sup> Iesu ei vei le sou a disaipel minei maido, “Amutou namutou ite a golugolu ni palea le eau na lodo ie ma silimulina mine amutou vuso ni bosa, vuna, Laulau mine Salemo ei isa a inadade maido,

‘Eau na valipute a bibi na niitealalena, me sou a sipsip ne sou oava maisaba.’†

<sup>32</sup> “Moni eau na ilisiliu me eau na muga pala ane amutou usino ne Galili.”

<sup>33</sup> Pita ei malii a inadena maido, “Muina, mane sou sanii sou ite a golu i palea le oo me a silimulina mine sou vuso i bosa me sou asutase oo, moni eau na ma asutase ete oo.”

<sup>34</sup> Me Iesu ei vei lei maido, “Eau ade patotona le oo, seidei na lodo ieli, ilala a kuleko i saboa tangi, oo no vei matolu maido oo ma muada oto e eau.”

<sup>35</sup> Me Pita ei vei le ei, “Muina, mane eau na mate pilu e oo, eau na ma ade oto ve eau ma muada oto e oo.” Ma disaipel vuso sou goli a inadade tasa moni.

*Iesu ei kaka ne Getsemani*

(Mak 14:32-42; Luk 22:39-46)

<sup>36</sup> Iesu ei asu pilu e sou a disaipel usino na avena tasa sou vate e Getsemani. Me ei vei le sou maido, “Amutou ugu nani na, me eau na asu usino na avena do mea na kaka.”

<sup>37</sup> Ei guale Pita pilu e natune Sebedi lua usino pilu e ei. Ma lilona i mavaa, mei somiale i gegeli sele.

<sup>38</sup> Me ei vei le sou maido, “Lilogu i mavaa sele, me bisii moni eau na mate. Amutou muine amutou na, me mu ulago pilu e eau.”

<sup>39</sup> Me ei asu sapa bisii lou mei totopatulu mei lagu motudu utano na magamaga mei kaka maido, “Ouma, mane oo mapigogoi, no taulele a taogo ieli mainani ne eau. Moni oo ma ogomulimuli lei a masagana minau. Oo no ogomuli moni a masagana minio.”

<sup>40</sup> Me Iesu ei asu usino na disaipel tolu mei ite sou ngolo. Mei tagi e Pita maido, “Posa matina amutou ma mapigogoi ete namutou ulago pilu e eau mapigogoi a matailala tasa, io?”

<sup>41</sup> Amutou mu ulago me mu kaka. Dae a tinovo ni palea le amutou me mu bosa. Ivu, nunu ei isa a masagana, moni a vovo ei ma isa oto a sagalina.”

<sup>42</sup> Ei asu lou mei kaka maido, “Ouma, mane a taogo li ei ma mapigogoi ete ni asuleletase eau, eau na inu i. Io, oo no goli moni a masagana minio.”

<sup>43</sup> Me ei asu lou usino ne sou a disaipel mei ite sou ngolo, vuna, matane sou i mavaa.

<sup>44</sup> Me ei asutase sou lou mei kaka matolunai, me ei goli a matana kinaka tasa moni tomane ei goli palesi.

<sup>45</sup> Mulimuli ei asu usino ne sou a disaipel mei vei le sou maido, “Amutou saboa nana mu ngolongolo me mu manoa, io? Oite. Ilala i paleasi, me seidei sou bilii e Natuna Bibi na limane sou a vanua mina gunolina sinusu.

<sup>46</sup> Amutou ilisi, neitou asu. Mu ite, bibi ei kale ni bilii e eau na limane sou, ei maino agaviosi.”

*Iudas ei bilii e Iesu usino na limane sou a butu*

(Mak 14:43-50; Luk 22:47-53; Ioa 18:3-12)

<sup>47</sup> Iesu ei saboa ino adeade, me Iudas, ei e tasa mina disaipel savulu tasa timana lua, ei asu maino. A abuna vanunua buo sou asu maino pilu e ei, me sou lapitole a viso na maubina pilu a butu. Sou a munugana prist pilu e sou a buobuo mina vanunua ma tavivine sou peltase sou.

<sup>48</sup> Ma bibi ei kale ni bilii e Iesu na limane sou, ei veiosi le sou a matailala tasa maido, “Eau na gamumi a galena bibi tasa, a bibi ie e Iesu. Amutou saavi e ei.”

<sup>49</sup> Me ma tabaa oto ei asuale Iesu mei vei, “Lodo, magiligilina,” mei gamumi a galena.

<sup>50</sup> Me Iesu ei vei lei maido, “Tamaigu, oo asu usinani a sava? No goli asi a golu oo kale.” Me a vanunua sou asu maino, sou lapitole e Iesu.

<sup>51</sup> Bibi tasa ino pilu e Iesu, ei lapuale a viso na maubina minei. Me ei valibili a bibi na

† 26:31 Sekaraia 13:7

pipigona mina mapana prist mei uti a tuline ei ma tulina i pu.

<sup>52</sup> Moni e Iesu ei vei lei maido, “Tau liu a viso minio na muina. Vanua vuso sou maubi a viso, viso ni toegegeli e sou.

<sup>53</sup> Nane oo ma muada oto i, eau mapigogoi na kake Euma ni peltase a abuna bineanea savulu tasa timana lua, me ne sou asu usinani mina buloine eau?

<sup>54</sup> Moni mane eau goli maido, io a inade ino na Laulau mine Salemo ei ni ma mapi-gogoi ete ni palea ivu. Laulau mine Salemo i vei, a golugolu sou ie ni palea le eau.”

<sup>55</sup> Na ilala moni odo Iesu ei vei ana abuna vanunua do maido, “Amutou guale a viso na maubina ma butu, me amutou asu usinani mina lapitolene eau tomane amutou kale namutou lapitole a bibi na lilimana tasa, io? Maladalada vuso eau ugu lilo na luma mine Salemo me eau matetengi a vanunua ma tavivine, moni amutou ma kale ete namutou lapitole eau na ilala do.

<sup>56</sup> Moni a golugolu vuso li ei palea ni toesesele a inade mine sou a profet sou niage.” Me sou a disaipel sou ilisitase Iesu me sou oava.

*Sou vavasa ane Iesu*

(Mak 14:53-65; Luk 22:54-55, 63-71; Ioa 18:12-14, 19-24)

<sup>57</sup> Vanunua sou lapitole Iesu sou maasi e ei usino na luma mina mapana prist e Kaiapas. Me sou a vanua na muadana binea pilu e sou a vanua buobuo sou viepilupilu.

<sup>58</sup> Pita ei ogomuli e Iesu usino, moni ei ino bulago sapa. Ei gali ulilo na bigomu mina luma na mapana prist, mei ugu pilu e sou a papai. Ei kale ni ite sei golu ni palea le Iesu.

<sup>59</sup> Sou a munugana prist pilu e sou a vanua na avelulusena inade sou toleale a vanunua sanii ne sou lange a inade na aualana a inigogona vuso Iesu ei goli. Sou kale ne sou poge a sinusu tasa ei goli mapi-gogoi ne sou valipute ei.

<sup>60</sup> Ma vanunua makuba sou asu maino me sou ubi ei a inade na aualana. Moni sou ma veipale ete a sinusu tasa ei goli mapi-gogoi ne sou valipute ei. Moni mulimuli bibi lua sou asu maino

<sup>61</sup> me sulu vei maido, “A bibi ieli ei vei, ‘Eau na mapigogoi na lope a luma mine Salemo me na mamagili liu na malada tolu.’ ”

<sup>62</sup> Ma mapana prist ei magili mei tagi e Iesu maido, “Oo ma kale ete no maliu a inade tasa, io? A inadenade sou ie sou ubi e oo a sava?”

<sup>63</sup> Moni e Iesu ei ma goli ete a inade tasa. Ma mapana prist ei vei lei, “Eau tagi e oo na aisane Salemo ei isa a maulina, oo no ade ivu seidei. Oo e Krai, Natune Salemo, ue boa?”

<sup>64</sup> Me Iesu ei vei lei maido, “Seido moni, oo veiosi. Moni eau vei le amutou, mulimuli namutou ite Natuna Bibi ni ugu na lima gata mine Salemo ei isa a sagagalina buo. Me ei ni asu usinani a ausa na langi.”

<sup>65</sup> Ma mapana prist ei saga mamau a inade do mei singe a kinainai minei oto mei vei maido, “Ei damutale nane ei kale ni puisobe a muine Salemo. Ne eitou ma tolealale lei a vanunua sanii lou mina veipalena inigogona mina bibi ie. Oite. Seidei moni amutou longe ei adepintola ane Salemo.

<sup>66</sup> Amutou damutale ne eitou goli a sava usino ne ei?” Me sou maliu a inade maido, “Ei isa a sinusu. Ei ni mate.”

<sup>67</sup> Io sou apisosoli a lagune Iesu, me sou valibili e ei. Me sanii sou sapegaleale ei

<sup>68</sup> me sou vei, “Oo e Krai, mane oo a profet ivu, oo vei le amiteu sei valibili e oo?”

*Pita ei vei, ei ma muada oto e Iesu*

(Mak 14:66-72; Luk 22:56-62; Ioa 18:15-18, 25-27)

<sup>69</sup> Pita ei ugu masala na muina na vavasana do. Ma tavine na pipigona tasa ei asu agavuale ei mei vei, “Oo tamai oo ino pilu e Iesu mine Galili.”

<sup>70</sup> Moni e Pita ei taitase na matane sou a vanunua vuso maido, “Eau ma muada oto a inade oo goli ie.”

<sup>71</sup> Me mulimuli ei asu usino na luma ino na tema na bigomu, ma tavine na pipigona tasa lou ei ite ei mei vei le sou a vanunua ma tavivine ino agavi maido, “A bibi ieli ei pilupilu e Iesu mine Nasaret.”

<sup>72</sup> Me Pita ei vei lou maido, “Ivu uata, eau ma muada oto a bibi ie.”

<sup>73</sup> Mulimuli sapa vanunua sou magili agavi, sou asu maino me sou vei le Pita maido, “Ivu sesele, oo a bibi mina abuna mine sou. Baligolumu ei mapalesi e oo.”

<sup>74</sup> Io seido Pita ei vei maido, “Ivu uata, eau ma muada oto a bibi ie. Mane eau auala Salemo, ei ni bilii e eau a mavaana” Ei adesi, ma tabaa oto a kuleko ei tangi.

<sup>75</sup> Me Pita ei damutale lei a inade Iesu ei goli iedo, “Ilala a kuleko i saboa tangi, oo no vei matolu maido oo ma muada oto e eau.” Me Pita ei asu usala mei papaduale sele a tinangina.

## 27

*Sou maasi e Iesu usino ne Pailat*

(Mak 15:1; Luk 23:1-2; Ioa 18:28-32)

<sup>1</sup> Na autupola siisii, sou a munugana prist me sou a vanua buobuo sou adeade a valiputene Iesu.

<sup>2</sup> Me mulimuli sou papale ei a mota me sou maasi e ei usino ne Pailat, ei a munugana bibi ei iteale a avena.

*Iudas ei matesi**(Apo 1:18-19)*

<sup>3</sup> Iudas, ei a bibi iodo ei bilii e Iesu na limane sou a butu, ei ite sou tau e Iesu utano na vavasana me sou kale ne sou valipute ei. Me ei sauvule a damutatalana minei me guale a vatu silva savulu tolu do, me ei labi liu usino ne sou a munugana prist me sou a vanua buobuo.

<sup>4</sup> Ei vei maido, "Eau goli a sinusu. Vuna, a bibi eau bilii na limane amutou iedo ei ma goli ete a sinusu, moni amutou kale namutou valipute ei." Moni sou adeliu ana maido, "Iede a golu mine amiteu boa. Ede a lilomoluna minio moni."

<sup>5</sup> Me Iudas ei lange a vatu silva do ulilo na luma mine Salemo, me ei asu mei oikulikuli e ei oto mei mate.

<sup>6</sup> Sou a munugana prist sou guale a vatu silva do me sou vei, "Vatu iedo ei a mapa na daladala. Ei ma puiale ete neitou tau a vatu ieli na luma mine Salemo."

<sup>7</sup> Me sou maiademuli i maido, na vatu odo sou oli a avena magamaga mina a bibi ei goli a taogo a magamaga. Sou kale a magamaga do ni muina a muina minate mine sou a vanua na aubu polo.

<sup>8</sup> Maido me sou vate ei a Magamaga mina Daladala pea seidei.

<sup>9</sup> Maido ma inade tasa lisa Salemo ei goli na asena profet e Ieremaia ei palea ivu. Ei vei maido, "Sou guale a vatu silva savulu tolu do. Sou e Israel sou tau a mapa do tomane a mapa na unoli na bibi.

<sup>10</sup> Me na vatu odo sou oli a magamaga na bibi na gunolina taogo a magamaga tomane Bibi Taula ei vei le eau."\*

*"Oo a mapana mine sou e Iuda, io?"**(Mak 15:2-5; Luk 23:3-5; Ioa 18:33-38)*

<sup>11</sup> Iesu ei magili na matane Pailat, a munugana bibi ei iteale a avena, me Pailat ei tagi e ei maido, "Oo a mapana mine sou e Iuda, io?" Me Iesu ei vei, "Oo oto oo vei simaido."

<sup>12</sup> Me sou a munugana prist pilu e sou a vanua buobuo sou ubi a inade papaina usino ne Iesu. Moni ei ma maliu ete a inade tasa.

<sup>13</sup> Maido me Pailat ei tagi e ei lou maido, "Nane oo ma longe ete a inade vuso sou ubi e oo?"

<sup>14</sup> Me Iesu ei ma maliu ete a inade tasa usino ne Pailat. Maido me Pailat ei damutatala papai.

*Pailat ei vei a gatitolene Iesu na tauvaleuti**(Mak 15:6-15; Luk 23:13-25; Ioa 18:39-19:16)*

<sup>15</sup> Na malada buo na kinaka do a inigogona tasa ino i. Ei maido, a munugana bibi ei iteale a avena ei lubetatase a bibi tasa ino na luma na tunuui. Mane sou a vanunua ma tavivine oto ne sou vate a aisana bibi tasa ino na luma na tunuui, me Pailat ni lubetase a bibi odo usino ne sou.

<sup>16</sup> Me na ilala do bibi tasa mamau sele ei ino na luma na tunuui, aisana e Barabas.

<sup>17</sup> Sou a vanunua ma tavivine sou viepilusi, io Pailat ei tagi e sou maido, "Amutou kale eau na lubetase sei usino ne amutou? Na lubetase Barabas, ue eau na lubetase Iesu sou vei e Kraisi?"

<sup>18</sup> Vuna, ei muada sou lilomamau moni ane Iesu me sou guale ei usinani na vavasana.

<sup>19</sup> Me tamai, na ilala Pailat ei ugu na niugugu na toebilelesina inade, susuna ei sosove a inade usino ne ei maido, "Oo ma goligoli lei a golu tasa usino na bibi ei bilisi iede. Na lodo eau ite ei na tinada tasa, me eau somiale a mavaana buo."

<sup>20</sup> Moni sou a munugana prist pilu e sou a vanua buobuo sou mailisi a lilone sou a vanunua ma tavivine, ne sou tola ane Pailat ni lubetase Barabas mei ni valipute Iesu.

<sup>21</sup> Ma munugana bibi ei iteale a avena ei tagi e sou lou maido, "Amutou kale eau na lubetase sei mine sulu ie?" Me sou a vanunua ma tavivine sou tola maido, "Barabas."

<sup>22</sup> Me Pailat ei tagi e sou, "Amutou kale eau na toematine e Iesu sou vei e Kraisi?" Me sou vuso sou tola maido, "Gati e ei na tauvaleuti!"

<sup>23</sup> Me Pailat ei tagi e sou, "Gona sava? Ei goli e sei sinusu?" Moni sou tola sagali sele, "Gati e ei na tauvaleuti!"

<sup>24</sup> Pailat ei muadasi i, sou ma longemuli ete a inadene ei, moni a maubina taula ei ni palea. Maido me ei guale a nanu mei loloi a limana na matane sou a vanunua ma tavivine. Me ei vei maido, "Iede a sinusu minau boa, mane a bibi iede ei mate, iede a golu mine amutou moni."

<sup>25</sup> Me sou vuso a vanunua ma tavivine sou adeliu maido, "Sinusu odo ei ni muina ne amiteu me ne sou e natatune amiteu!"

<sup>26</sup> Maido me Pailat ei lubetase Barabas usino ne sou. Me ei vei le sou a vanua na maubina ne sou umamasi e Iesu. Me mulimuli ei bilii e Iesu na limane sou a vanua na maubina, ne sou gati e ei na tauvaleuti.

*Sou a vanua na maubina sou adepintola ane Iesu**(Mak 15:16-20; Ioa 19:2-3)*

<sup>27</sup> Sou a vanua na maubina mina munugana bibi ei iteale a avena sou maasi

\* 27:10 Ieremaia 19:1-13; Sekaraia 11:12-13

e Iesu ulilo na luma mina bibi na niitealena avena buo, me sou viepili pilu a vanua na maubina vuso na lagune Iesu.

<sup>28</sup> Me sou taulele a kinainai minei, me sou makai e ei a kinainai kastososo.

<sup>29</sup> Me sou guale a tuaga me sou goli a kele na mapana, me sou tau na letene ei. Me sou masimitole e ei a butu tasa mina limana e gata. Me sou totopatulu ane ei, me sou adeptintola ane ei maido, "Oaso, mapana mine sou e Iuda."

<sup>30</sup> Me sou apisosoli e ei, me sou gualeliu a butu maino na limane Iesu me sou vali a letena.

<sup>31</sup> Sou goli a inigogona vuso mina adeptintolana ane ei pulosi, io sou taulele a kinainai sou makai e ei iodo me sou makai liu e ei a kinainai minei oto. Me sou guale ei usino ne sou gatitole ei na tauvaleuti.

*Sou gati e Iesu na tauvaleuti*

(Mak 15:21-32; Luk 23:26-43; Ioa 19:17-27)

<sup>32</sup> Sou asuasu usino, me sou ite a bibi tasa maino ne Sairini, aisana e Saimon. Me sou guale ei me sou matabule ei a tauvaleuti mine Iesu.

<sup>33</sup> Sou sibatala ne Golgota. A vuna aisa do ei maido, muina sigouna bibi.

<sup>34</sup> Me sou bilii e Iesu a vain sanii sou sauvule pilu a bunu ei ni ini. Me ei dame tove, moni ei ma ini ete.

<sup>35</sup> Sou a vanua na maubina sou gatitolei e Iesu na tauvaleuti, io sou mailaba a soebulena kinainai minei balivua ne sou oto.

<sup>36</sup> Me sou ugu na avena odo, me sou ulage ei.

<sup>37</sup> Muata na letene ei sou niage a inade do sou vavasa ane ei. Sou niage a inade maido, "Iede e Iesu a mapana mine sou e Iuda."

<sup>38</sup> Agavuale Iesu sou gatitole a bibi lua na maubina ma paaalina na tauvaleuti. Sou gatitole tasa na limane Iesu e gata, me tasa na limane Iesu e meli.

<sup>39</sup> Me sou a vanunua ma tavivine sou asu usinani usino, sou adeptintola ane ei. Sou uneune a letene sou

<sup>40</sup> me sou vei, "O kale no lope a luma mine Salemo me no mamagili lei ei na malada tolu? Mane ei patotona oo e Natune Salemo, oo no buloi e oo oto mo sivo utano na tauvaleuti."

<sup>41</sup> Sou a munugana prist pilu e sou a vanua na muadana binea me sou a vanua buobuo tamai sou adeptintola maido,

<sup>42</sup> "Ei buloiloi e sou a vanunua sea, moni ei ma mapigogoi ete ni buloi e ei oto. Ei a mapana mine Israel. Io ei ni sivo utano na tauvaleuti, me ne eitou silimuli e ei.

<sup>43</sup> Ei silimuli e Salemo mei vei, 'Eau e Natune Salemo.' Io, mane Salemo ei kale ei, Salemo ei ni buloi e ei seidei."

<sup>44</sup> Bibi na paaalina lua sou gatitole e sulu na tauvaleuti agavuale Iesu, sulu tamai su adeptintola ane ei.

*Iesu ei mate*

(Mak 15:33-41; Luk 23:44-49; Ioa 19:28-30)

<sup>45</sup> Na matailala savulu tasa timana lua na oaso, tunuui ei avisobe a magamaga vuso, i asu mapigogoi na matailala tolu na lavilavi.

<sup>46</sup> Mei agavuale a matailala tolu Iesu ei ngala vauta sele maido, "Eli, Eli, lema sabaktani?" A masovana inade do i maido, "Salemo minau, Salemo minau, posa matina oo litase eau?"<sup>†</sup>

<sup>47</sup> Vanunua sanii sou magili agavi, sou longe a inade do, me sou vei, "Bibi iedo ei toleale Elaiia."

<sup>48</sup> Ma tabaa oto tasa ne sou i vele usino mei guale a musamusa tasa mei bubi na vain viniga. Ma ilala vain i vonu ne ei, ei papale na butu tasa mei bilii e Iesu ni ini.

<sup>49</sup> Moni sou sanii sou vei, "Mage i, neitou ite muge. Nane Elaiia ni asu usinani ni buloi e ei, ue boa?"

<sup>50</sup> Iesu ei ngala vauta sele lou, me ei luetase a ngalana.

<sup>51</sup> Na ilala moni iodo, a malo taula ei kulukulu lilo na luma mine Salemo ei masinge muata asu mapigogoi utano mei palea a maduna lua. Ma malugulugu i vuli ma vatuvatu buobuo sou mapopola.

<sup>52</sup> Me sou a muina minate sou peo, ma vanunua ma tavivine papaina mine Salemo lisa sou matesi, seidei sou ilisi.

<sup>53</sup> Sou ilisitase a muina minate, me taulune Iesu ei ilisiliuosi, sou asu ulilo ne Ierusalem ma vanunua papaina sou ite sou.

<sup>54</sup> A munuganuga pilu e sou a vanua na maubina sou ulage Iesu odo, sou ite a magamaga ei vuvule ma golugolu sou palea, me sou lae mamau sele. Me sou vei maido. "Ivu sele, bibi iede ei e Natune Salemo."

<sup>55</sup> Tavivine papaina tamai ino, sou ilisitase Galili me sou asu usinani mina buloinea ei. Sou a tavivine do sou magili bulago sapa me sou gemugemu.

<sup>56</sup> Tasa balivua ne sou e Maria mine Makdala. Me tasa e Maria, tinane Iemus me Iosep. Me tasa ei e tinane natune Sebedi lua.

*Sou tau a aitolane Iesu na aova na vatu*

(Mak 15:42-47; Luk 23:50-55; Ioa 19:38-42)

<sup>57</sup> Na lavilavi sele a bibi na vuvutina tasa mina aubu e Arimatea, aisana e Iosep, ei asu usinani. Ei tamai ei a disaipel mine Iesu.

<sup>58</sup> Ei asu usino ne Pailat mei tagi e Pailat ni longo ane ei ni guale a aitolane Iesu. Io

<sup>†</sup> 27:46 Laulau na Inala 22:1

Pailat ei vei le sou a vanua na maubina ne sou bilii e Iosep a aitolane ei.

<sup>59</sup> Me Iosep ei guale a aitolana mei avisobe ei a malo keakea alaba.

<sup>60</sup> Me ei tau ei ulilo na muina minate alaba minei oto, muina minate iede sou pesi lilo mina vatuvatu. Me Iosep ei buli a vatu tasa buo usinani mei taboboli a asena aova do. Ei goli maido pulosi mei asu.

<sup>61</sup> Maria mine Makdala pilu e Maria tasa sea, sulu ugu agavuale a muina minate.

*Sou a vanua na maubina sou ulage a muina minate*

<sup>62</sup> Malada savulo ei a Maolona Malada mine sou e Iuda, maido me sou a munugana prist pilu e sou e Parisi sou asu sou ite Pailat.

<sup>63</sup> Sou vei lei maido, "Bibi buo, amiteu damutale a inade tasa bibi na nioto do ei goli na ilala ei saboa ei mauili. Ei vei, 'Mulimuli na malada tolu eau na ilisiliu.'

<sup>64</sup> Maido me no ade ne sou ulage kube a muina minate mapigogoi a malada tolu. Dae ne sou a disaipel minei sou asu me sou paaali a aitolane ei, me sou vei le sou a vanunua ma tavivine maido, 'Ei ilisiliu na minate.' Ma nioto na inade alaba mine sou ei ni vululusi a nioto ei goli lisa."

<sup>65</sup> Pailat ei vei le sou maido, "Amutou guale a vanua na maubina sanii lou me mu vei le sou ne sou ulage kube a muina minate do."

<sup>66</sup> Io sou asu me sou kapi sagali a muina minate. Sou tau a melalobo mina valisobena vatu odo ino na asena aova, me sou tau e sou a vanua na maubina ne sou ulage a muina minate.

## 28

*Iesu ei ilisiliu*

*(Mak 16:1-10; Luk 24:1-10; Ioa 20:1-18)*

<sup>1</sup> Maolona Malada mine sou e Iuda ei pulosi, me na autupola siisii sele mina munugana malada na wik, Maria mine Makdala pilu e Maria tasa sea sulu asu usino ne su ite a muina minate.

<sup>2</sup> Ma tabaa oto, a malugulugu taula ei vuli. A bineanea mine Bibi Taula ei ilisitase a langi mei sivi utano, me ei bulilele a vatu na asena aova, mei ugu muata na vatu.

<sup>3</sup> Laguna bineanea ei lada tomane a sima, ma kinainai minei i kea sele tomane a ausa.

<sup>4</sup> Sou a vanua na maubina sou ulage a muina minate sou lae e ei, ma vovone sou palili sele, me sou palea tomane sou a vanua sou matesi.

<sup>5</sup> Moni a bineanea i vei ana tavine lua do maido, "Amulu ma laelae lou. Eau muada, amu asu usinani mina punogene Iesu, ei a bibi sou gatitole ei na tauvaleuti.

<sup>6</sup> Ei eili boa. Ei ilisiliuosi tomane lisa ei vei. Amulu asu usinani mu ite a muina ei tabuli i.

<sup>7</sup> Me amulu asu asi mu vei le sou a disaipel minei maido, ei ilisiliuosi na muina minate. Me ei ni muga pala ane amutou usino ne Galili, me ne amutou ite ei na avena do. Oite, eau asu usinani na bilii a inade li usino ne amutou."

<sup>8</sup> Tavine lua su lae sele, moni sulu mongemonge mamau sele, ma tabaa oto sulu asutase a muina minate me sulu vele vauta usino ne su vei le sou a disaipel minei.

<sup>9</sup> Me Iesu ei poge sulu na vea mei vei, "Autupola sele." Me sulu asu agavi me sulu lapitole a ubune ei, me sulu kaka ane ei.

<sup>10</sup> Me Iesu ei vei le sulu maido, "Amulu ma laelae lou. Amulu asu mu vei le tamtamaigu ne sou asu usino ne Galili. Ne sou ite eau na avena do."

*Inade mine sou a vanua na maubina*

<sup>11</sup> Tavine lua su saboa asuasou, ma vanunua sanii mina maubina sou ulagelage a muina minate sou asu ulilo na aubu buobuo, me sou vei le sou a munugana prist a golugolu vuso i palea.

<sup>12</sup> Me sou a munugana prist sou viepili pilu e sou a vanua buobuo, me sou goli a inade tasa. Sou bilii a vatu papaina usino ne sou a vanunua na maubina,

<sup>13</sup> Me sou vei, "Ne amutou vei maido, 'Sou a disaipel minei sou asu usinani na lodo, me na ilala amiteu ngolo, sou paaali a aitolane ei.'

<sup>14</sup> Me mane a munugana bibi ei iteale a avena ei longe a inade do, io ne amiteu toebilelesi a inade pilu e ei, me ne amutou ma isa oto a mavaana."

<sup>15</sup> Io sou a vanunua na maubina sou guale a vatu, me sou ogomuli a inade mine sou a vanua buobuo do. Ma inade do ei vele maisaba balivua ne sou e Iuda, me sou e Iuda sou goli a inade do i asu mapigogoi seidei.

*Iesu ei vei le sou a disaipel a pipigona ne sou goli*

*(Mak 16:14-18; Luk 24:36-49; Ioa 20:19-23)*

<sup>16</sup> A disaipel savulu tasa timana tasa sou asu usino ne Galili, me sou sibatana na loena do lisa Iesu ei vei maido ne sou asuale ei.

<sup>17</sup> Me sou ite Iesu me sou kaka ane ei. Moni sanii ne sou so isa a damutatalana lua.

<sup>18</sup> Me Iesu ei asu agavi usino ne sou mei vei le sou maido, "Salemo ei bilii e eau a sagagalina buo mina itealena golugolu vuso na langi me na magamaga.

<sup>19</sup> Maido me ne amutou asu mu toe sou a abuna vanunua ma tavivine vuso ne sou

palea a disaipel minau. Me amutou maavuvuti e sou a aisane Euma me mine Natuna me mina Maolona Nunu.

<sup>20</sup> Me mu matetengi e sou a ogomulina inade vuso eau bilii e amutou. Eau vei ivu sele, eau na pilu e amutou na maladalada vuso i asu mapigogoi na punuluna malada.”

## Mak Malongolongona Kubaana mine Iesu Mak ei niage

*Ademuadana mine Ioanes a bibi na maavuvutuna*

*(Mat 3:1-12; Luk 3:1-18; Ioa 1:19-28)*

<sup>1</sup> Ieli ei a malongolongona kubaana mine Iesu Krai, Natune Salemo.

<sup>2</sup> Malongolongona kubaana ieli ei sibitala tomane a profet e Aisaia ei niage, “Longe, eau na peltase a bibi tasa ni veipale a inadegu, mei ni muga pala ane oo.

Me ei ni masusulu a vea ane oo.\*

<sup>3</sup> Na avena a vanua boa a tinola tasa ei tola maido,

‘Masusulu a vea mine Bibi Taula. Toe-bilelesi a veavea ane ei.’ †

<sup>4</sup> Me Ioanes, ei a bibi na maavuvutuna, ei sibitala na avena a vanua boa mei veipale a inade usino na vanunua ma tavivine ne sou sauvule a lilone sou me ne sou guale a maavuvutuna, me Salemo ni lilotase a sinusu mine sou.

<sup>5</sup> Me sou vuso ne Iudia me sou a vanunua ma tavivine ne Ierusalem sou asuale Ioanes. Me sou veipale a sinusu mine sou, me Ioanes ei maavuvuti e sou na nanu e Iordan.

<sup>6</sup> Ioanes ei kai a kinainai sou goli a aivuna kamel mei pale a loaloa na aina. Gona inani minei a keadodoo pilu a madu na tibulu.

<sup>7</sup> Ei veipale a inade maido, “A bibi tasa ei ni mulimuli ne eau, sagagalina ei buo lou ana sagagaligu. Eau a bibi i ma mapigogoi ete ni totopatulu me lube a mota na ubupolo minei.

<sup>8</sup> Eau maavuvuti e amutou a nanu, moni ei ni maavuvuti e amutou a Maolona Nunu.”

*Maavuvutuna ma tinovona*

*(Mat 3:13-17; Luk 3:21-22)*

<sup>9</sup> Na malada iedo Iesu ei sibitala na nanu e Iordan maino ne Nasaret mina avena mine Galili, mei guale a maavuvutuna maino ne Ioanes.

<sup>10</sup> Me Iesu ei ilisitase a nanu, ma tabaa oto ei ite a langi i peo ma Maolona Nunu ei sivo utano minei tomane a manu a kua.

<sup>11</sup> Me muata na langi a baligolu tasa ei tola maido, “Oo e Natugu. Eau kale sele oo. A lilogu ei mongemonge sele e oo.”

<sup>12</sup> Ma tabaa oto, a Maolona Nunu ei toe e Iesu asu usino na avena a vanua boa.

<sup>13</sup> Me Iesu ei ugu na avena do mapigogoi a malada savulu iva, me Satan ei tove ei.

Ei muina pilu e sou a viuvui, me sou a bineanea mine Salemo sou buloi e ei.

*Iesu ei soka a pipigona ne Galili*

*(Mat 4:12-17; Luk 4:14-15)*

<sup>14</sup> Tauluna sou tauosi e Ioanes lilo na luma na tunuui, Iesu ei sibitala ne Galili, mei veipale a malongolongona kubaana mine Salemo.

<sup>15</sup> Ei vei maido, “Ilala Salemo ei vileale, ei sibitalasi, ma niitealalena mine Salemo ei maino agaviosi. Maido me amutou sauvule a lilone amutou me mu silimuli a malongolongona kubaana.”

*Iesu ei toleale a bibi iva*

*(Mat 4:18-22; Luk 5:1-11)*

<sup>16</sup> Iesu ei asu na lili na pou na nanu e Galili, mei ite e Saimon pilu e tasina Andru sulu langelange a vuo na pou na nanu. Sulu a bibi na vuoalena aia.

<sup>17</sup> Me Iesu ei vei le sulu maido, “Amulu asu usinani me mu ogomuli e eau, eau na matetengi e amulu a gualena vanunua ma tavivine usino ne Salemo tomane amulu langelange a vuo.”

<sup>18</sup> Ma tabaa oto sulu ilisitase a vuo mine sulu me su ogomuli e ei.

<sup>19</sup> Iesu ei asu usino sapa lou, mei ite e Iemus, natune Sebedi pilu e tasina Ioanes sulu ugugu na bot me sulu toekubekube a vuo.

<sup>20</sup> Ma tabaa oto ei tole sulu, me sulu veletase e tamane sulu e Sebedi na bot pilu e sou a vanunua na pipigona, me sulu asu ogomuli e Iesu.

*Iesu ei taulele a nunu pagu ino na bibi tasa*

*(Luk 4:31-37)*

<sup>21</sup> Iesu pilu e sou a disaipele sou asu usino ne Kapenaum. Me na Maolona Malada ne sou e Iuda ei gali ulilo na luma na kinaka mine sou mei malongo a inade usino ne sou.

<sup>22</sup> Sou longe a inadena, sou saga sele, vuna ei ma matetengi ete sou tomane sou a vanua na muadana binea. Ei matetengi e sou tomane a bibi ei isa a sagagalina buo.

<sup>23</sup> Mina malada do a bibi tasa ino na luma na kinaka mine sou, ma nunu pagu tasa ino minei. A bibi iodo ei tola maido,

<sup>24</sup> “Iesu maino ne Nasaret, oo asu usinani no goli le amiteu a sava? Nane oo asu usinani no toegegeli e amiteu? Eau muada e oo, oo a maolona bibi maino ne Salemo oto.”

<sup>25</sup> Moni Iesu ei adesinoa ana nunu pagu do mei vei lei maido, “Oo vale mo asutase a bibi iede.”

<sup>26</sup> Ma nunu pagu ei iune a bibi iedo, mei ngala vauta sele, mei veletase a bibi do.

<sup>27</sup> Me sou a vanunua ma tavivine sou saga sele, me sou maiade baoli lilo ne sou oto

\* 1:2 Aisaia 40:3; Malakai 3:1 † 1:3 Aisaia 40:3



maido, “Sei golu ei sibitala seidei? Ei a matetengina tasa alaba i isa a sagagalina. Ei vei le sou a nunu pagu, sou longemuli a inadene ei.”

<sup>28</sup> Ma tabaa oto a mapamulina mina gologu Iesu ei goli i vele bubula na avena vuso ne Galili.

*Iesu ei toekube a vanunua ma tavivine makuba*

(Mat 8:14-17; Luk 4:38-41)

<sup>29</sup> Iesu pilu e sou a disaipel sou asutase a luma na kinaka do me sou gali usala, me sou asu bilesi usino na luma mine Saimon me Andru. Me Iemus me Ioanes sulu tamai asu pilu.

<sup>30</sup> Maulune Saimon ei mavuta na poso, vuna, vovona ei tuntunu sele. Me sou vei le Iesu ve ei sobe.

<sup>31</sup> Me Iesu ei asu mei lapitole a limana mei mailisi ei. Ma sinobe i bualetase a tavine do mei masusulu a gona inani ane sou.

<sup>32</sup> Na matavilioliona, sou maisibitale sou a vanunua ma tavivine sou isa a sinobe usino ne Iesu. Me sou maisibitale tamai sou a vanunua ma tavivine a nunu pagu ino ne sou.

<sup>33</sup> Me sou a vanunua ma tavivine vuso lilo mina aubu odo sou asu me sou viepilu agavuale a tema na luma do.

<sup>34</sup> Me Iesu ei toekube e sou papaina sou isa a matamatana sinobe, me ei taulele a nunu pagu makuba tamai. Sou a nunu pagu sou muada ei, maidolo me ei magilisobe sou ne sou ma adeade lou.

*Iesu ei gaga lilo ne Galili*

(Luk 4:42-44)

<sup>35</sup> Na autupola siisii sele Iesu ei ilisi mei asu usino na avena baa tasa, mei kaka nado.

<sup>36</sup> Na ilala do Saimon pilu e tamtamaina sou asu sou tilomuli e Iesu.

<sup>37</sup> Sou poge ei me sou vei lei maido, “Sou a vanunua ma tavivine sou tilotilo e oo.”

<sup>38</sup> Me ei vei le sou maido, “Muina, neitou asu usino na aubu sanii lou sou ino agavi. Eau kale na veimuade a inade usino ne sou tamai. Vuna, a pipigona moni ieli eau asu usinani.”

<sup>39</sup> Me ei gaga usino na avena vuso mine Galili, mei malongo a inade lilo na lumaluma na kinaka mine sou, mei taulele sou a nunu pagu tamai.

*Iesu ei toekube a bibi tasa ei isa a sinobe a kolokolo*

(Mat 8:1-4; Luk 5:12-16)

<sup>40</sup> A bibi tasa ei isa a sinobe a kolokolo i asuale Iesu mei kake sagali ei. Bibi iedolo ei totopatuliale Iesu mei vei maido, “Mane o kale, oo mapigogoi no toekube eau na palea alaba.”

<sup>41</sup> Me Iesu ei lilomuli sele ei, mei tau a limana muata minei, mei vei lei maido, “Eau kale. No palea alaba.”

<sup>42</sup> De, simoni iodole a sinobe a kolokolo do i bualetase a bibi iedo mei palea maolo.

<sup>43</sup> Me Iesu ei peltase asi ei mei vei sagali le ei maido,

<sup>44</sup> “Oo tilale, o no ma veivei lei ana bibi tasa a golu ieli i palea le oo. Oo asu maite a vovomu usino na prist, mo iabi a niabi na matailalana maido a vovomu ei palea maolosi, tomane a binea mine Moses ei vei.‡ Me sou a vanunua ne sou muada i, a sinobe minio i bualesi.”

<sup>45</sup> Moni a bibi iedo ei asu mei vei le sou a vanunua ma tavivine a golugolu vuso i palea le ei. Ei veimuade a mapamulina do na aububu vuso. Maidolo me Iesu ei ma mapigogoi ni asu lou ulilo mina aubu tasa na matane sou a vanunua ma tavivine. Ei muina moni sala na baa, moni sou a vanunua ma tavivine mina aububu vuso sou asuale ei.

## 2

*Iesu ei toekube a bibi tasa limana ma ubuna ei mamate*

(Mat 9:1-8; Luk 5:17-26)

<sup>1</sup> Tauluna malada sanii Iesu i veteliu lou usino ne Kapenaum. Me sou a vanunua ma tavivine sou longe a inade ve ei ino na luma tasa.

<sup>2</sup> Me sou a vanunua ma tavivine makuba sou viepilu, maido ma luma do i vonu sele. Masala na tema tamai i vonu sele. Me Iesu ei matetengi e sou.

<sup>3</sup> Me sou maasi a bibi tasa tuatuaana i mate usino ne ei. Ma vanua iva sou tabule ei usinani.

<sup>4</sup> Moni a mui sobo sele, i ma mapigogoi ete ne sou maasi ei usinani agavuale Iesu. Maidolo me sou tabule ei uata na mapa na luma Iesu ino i. Me sou peetase a mapa na luma do me sou volipui a poso a bibi ei mavuta i utano lilo na luma.

<sup>5</sup> Iesu ei ite a silimulina mine sou, mei vei ana bibi sobe do maido, “Natugu, eau lilotasesi a sinusu vuso minio.”

<sup>6</sup> Sou a vanua na muadana binea sanii sou ugu lilo na luma do, me sou damutatala maido,

<sup>7</sup> “Vuna matina ei ade maido? Ei kale ni guale a muine Salemo? Sei bibi ei mapigogoi ni lilotase a sinusu? Boa. Iedele a pipigona mine Salemo tasa moni.”

<sup>8</sup> Ma tabaa oto Iesu ei muada a damutatalana mine sou na lilo na nunu minei. Mei tagi e sou maido, “Vuna matina amutou damutatala maido na lilone amutou?”

‡ 1:44 Pipigona mina Prist 14:2-32

<sup>9</sup> Sei inade ei puiale ne eau na vei usino na bibi iede? 'Eau lilotasesi a sinusu minio,' ue 'Oo ilisi mo guale a mavutavutana minio, mo asu?'

<sup>10</sup> Moni eau kale ne amutou muada i maido, Natuna Bibi ei isa a sagagalina mina lilotasena sinusu mina magamaga ie." Maido me Iesu ei gemu usino na bibi a tuatane ei matesi, mei vei lei maido,

<sup>11</sup> "Eau vei lio, oo ilisi mo guale a mavutavutana minio, mo asu usino na luma minio."

<sup>12</sup> Ma bibi iedo ei ilisi mei guale a mavutavutana minei mei asu na matane sou a vanunua ma tavivine vuso. Maido ma vanunua ma tavivine sou saga sele, me sou beillage a aisane Salemo me sou vei, "Lisa amiteu ma ite ete a golu tasa maido."

*Iesu ei toleale Livai*

(Mat 9:9-13; Luk 5:27-32)

<sup>13</sup> Iesu ei asu lou usino na lili na pou na nanu e Galili. Ma abuna vanunua ma tavivine sou asuale ei, me ei matetengi e sou a inade mine Salemo.

<sup>14</sup> Me ei asu usino, mei ite Livai, natune Alpius, ei ugu na luma na takis. Me Iesu ei vei lei maido, "Oo vele ogomuli e eau." Me Livai ei ilisi mei ogomuli e ei.

<sup>15</sup> Iesu ei ugu mei aani na luma mine Livai. Ma vanua papaina mina gualena takis ma gunolina sinusu, sou ugu sou aani pilu e Iesu me sou a disaipel minei. A matana vanunua papaina do sou ogomulimuli e Iesu taliuliu.

<sup>16</sup> Sou a vanua na muadana binea sanii, sou a abuna mine Parisi, sou ite Iesu ei aani pilu e sou a vanua na sinusu ma gualena takis. Me sou tagi e sou a disaipel mine Iesu maido, "Posa matina ei aani pilu e sou a vanua na gualena takis ma gunolina sinusu?"

<sup>17</sup> Iesu ei longe a inade ne sou mei vei le sou maido, "Vanunua sou ma isa oto a sinobe so ma asuasus oto usino na bibi na toekubena, moni vanunua sou isa a sinobe so asuasus usino na bibi na toekubena. Maidolo moni, eau ma asu oto usinani na toleale a vanua so bilesi. Boa. Eau asu usinani na tole a vanua na sinusu."

*Iesu ei vei a inigogona mina vavaena*

(Mat 9:14-17; Luk 5:33-39)

<sup>18</sup> Sou a disaipel mine Ioanes me sou e Parisi sou vavae sou a gona inani. Me sou a vanua sanii sou asu usinani me sou tagi e Iesu maido, "Sou a disaipel mine Ioanes me Parisi sou vavaevae sou a gona inani, moni posa matina sou a disaipel minio sou ma vavae ete sou a gona inani?"

<sup>19</sup> Iesu ei vei le sou maido, "Na ilala bibi tasa ei taulai mei ino pilu e sou e tamtamaina, sou ma vavae ete sou a inani.

<sup>20</sup> Moni mulimuli oto, vanua sanii sou guale a bibi iedo usinosi me ei ma pilu oto e sou, na ilala do ne sou vavae sou a gona inani.

<sup>21</sup> "Longe! Bibi tasa ei ni ma guale ete a maduna malo alaba mina saisobena masingena mumuguna kinainai. Mane ei goli maido, de na malada sou loloi a kinainai iedo malo na saisobena masingena dolo ei ni toemasinge lei a kinainai iedo. Alaba ei ni toesinge mumugu, maido ma masingena ei ni patea buo lou.

<sup>22</sup> Tomane moni bibi tasa ei ni ma singi voni ete a vain alaba usino na mumuguna uliulina meme. Mane ei toe maido, de a vain ei ni toesinge a uliulina meme, ma vain ma uliulina meme ni mamau pilu. Sou singisingi a vain alaba usino na uliulina meme alaba."

*Iesu ei iteale a Maolona Malada ne sou e Iuda*

(Mat 12:1-8; Luk 6:1-5)

<sup>23</sup> Na Maolona Malada tasa Iesu ei polo lilo na maumauma na vit. Me sou a disaipel minei sou asu pilu e ei, me sou pa a vuavua vit sanii.

<sup>24</sup> Me sou e Parisi sou tagi e Iesu maido, "Oite, posa matina sou goli a inigogona maido na Maolona Malada eitou valisobesi?"

<sup>25</sup> De Iesu ei tagi liu e sou maido, "Amutou ma gi ete a mapamulina golu e Devit ei goli lisa? Na malada iedo ei pilu e sou a vanunua minei sou ma isa oto a gona inani me sou vitolo.

<sup>26</sup> Ilala do Abiatar ei a mapana prist, me Devit ei gali ulilo na luma mine Salemo, mei ani a ulalu na niabi mine Salemo. A ulalu odo i maolo, me sou a prist moni mapigogoi ne sou ani. Moni Devit ei ani mei bilii e sou a vanunua minei tamai.\*

<sup>27</sup> Me Iesu ei vei lou ane sou maido, "Salemo ei ma tau ete sou a vanunua ma tavivine mina buloina Maolona Malada. Ei tau a Maolona Malada mina buloine sou a vanunua ma tavivine.

<sup>28</sup> Maidolo me Natuna Bibi ei iteale a Maolona Malada tamai."

**3**

*Na Maolona Malada Iesu ei toekube a bibi tasa a limana i pagu*

(Mat 12:9-14; Luk 6:6-11)

<sup>1</sup> Iesu ei gali lou ulilo na luma na kinaka mine sou e Iuda. Ma bibi tasa ino, a limana tasa i matesi.

\* 2:26 1 Samuel 21:1-6

<sup>2</sup> Me sou a vanunua sou ulage kube e Iesu, vuna sou kale ne sou muada i ei ni toekube a bibi iedo na Maolona Malada ne sou e Iuda, ue boa. Sou damutale, mane Iesu ei goli a inigogona maido, ne sou vavasa ane ei.

<sup>3</sup> De Iesu ei vei ana bibi a limana mamate odo maido, "Magili masae ne amiteu vuso."

<sup>4</sup> Me Iesu i tagi e sou maido, "Ei ni puiale ne eitou goli a inigogona kubaana mina Maolona Malada, ue neitou goli a inigogona pagu? Ei ni puiale ne eitou buloi e sou a vanua ne sou ugu kuba, ue ne eitou vali-putemate sou?" Moni a vanunua sou ma adeliu oto a inade tasa.

<sup>5</sup> Me Iesu ei gemuale liu e sou, mei sinoa. Ei ite a lilone sou sobo, me a lilona i mavaa a golu ie. Mei vei ana bibi iedo maido, "Toebilelesi a limamu." De ei toebilelesi a limana, ma limana ei palea kuba lou.

<sup>6</sup> Ma tabaa oto sou e Parisi sou ilisitase a luma me sou asu, me sou viepili pilu a abuna mine Herot. Sou goli a inade mina punogena vea mina valiputene Iesu.

*Abuna vanunua ma tavivine sou viepilu agavuale a pou na nanu*

*(Luk 6:17-19)*

<sup>7</sup> Iesu pilu e sou a disaipel minei sou ilisitase a aubu odo, me sou asu usino na pou na nanu e Galili. Ma abuna vanunua ma tavivine taula sou ogomuli e ei usino.

<sup>8</sup> Sou a vanunua ma tavivine mina avena mine Galili, me ne Iudia, Ierusalem, Idumea, me nanu e Iordan, me ne Tair me Saidon, sou longe a inade na golugolu Iesu i goli, ma abuna vanunua ma tavivine taula sele sou asu usino ne ei.

<sup>9</sup> Me Iesu ei vei le sou a disaipel maido, "Guale a bot tasa usinani ni ulago. Maido me mane a abuna vanunua ma tavivine taula sele so bole eau, eau na sae na bot mea na matetengi e sou."

<sup>10</sup> Lisa Iesu ei toekube a vanunua ma tavivine papaina, maidolo ma vanunua ma tavivine sou sobe sou kale ne sou tuli e ei, me sou maibobomuli a asualene ei.

<sup>11</sup> Me na ilala sou a nunu pagu sou ite ei, sou totopatuliale ei, me sou tola maido, "Oo e Natune Salemo."

<sup>12</sup> Moni Iesu ei magilisobe sagali e sou ne sou ma veipale le lei ei oto.

*Iesu i vileale sou a disaipel savulu tasa timana lua*

*(Mat 10:1-4; Luk 6:12-16)*

<sup>13</sup> Iesu ei asu uata na loena. Ei kale ni vileale a vanua sanii ne sou ugu pilu e ei. Me ei toleale sou a vanua do, me sou asu usino ne ei.

<sup>14</sup> Me ei vileale a vanua savulu tasa timana lua ve ne sou pilu e ei, me ei maaise a aisane sou a aposel. Ei kale ni peltase

sou usino, ne sou veimuade a inade mine Salemo.

<sup>15</sup> Ei kale ni bilii e sou a sagagalina, ne sou taulele a nunu pagu.

<sup>16</sup> Me ei vileale savulu tasa timana lua. Tasa e Saimon, me Iesu i maaise e ei a aisana tasa lou Pita.

<sup>17</sup> Me ei vileale tamai e Iemus, natune Sebedi, pilu e tasina e Ioanes. Ei tole e sulu a aisa Boaneges. Malibuuna inade do i maido, "Sou a vanua sou tomene a natuna sima ei tupaulu."

<sup>18</sup> Me ei vileale tamai e Andru, Pilip, Batoromeus, Matiu, Tomas, Iemus, ei e natune Alpius, me Tadius, Saimon, ei a bibi mine sou e Selot,

<sup>19</sup> me Iudas Iskariot, ei a bibi tasa mulimuli ni bilii e Iesu na lima ne sou a butu.

*Iesu me Belsebul*

*(Mat 12:22-32; Luk 11:14-23, 12:10)*

<sup>20</sup> Iesu ei gali ulilo na luma tasa. Me sou a abuna vanunua ma tavivine sou asu usinani sou viepilu lou, maidolo me Iesu pilu e sou a disaipel minei sou ma isa oto a matailala na inani.

<sup>21</sup> Sou a mautune Iesu sou longe a inade na golugolu Iesu ei goli, me sou asu usinani ve ne sou guale ei. Sou vei maido, "Damutalatalana minei ei maisabasi."

<sup>22</sup> Vanua na muadana binea sanii ino ne Ierusalem sou asu maino, me sou vei maido, "Belsebul valimuli e ei. Ei taulelele a nunu pagu na sagagaline Belsebul moni, ei a pana mine sou a nunu pagu."

<sup>23</sup> Me Iesu ei toleale sou agavi usino ne ei, mei lange a adetinovona sanii usino ne sou. Ei vei maido, "I matina Satan i mapigogoi ni votetase e Satan?"

<sup>24</sup> Mane sou a vanunua mina avena buo tasa ne sou vilelue sou me sou maubi, a avena buo do ni ma mapigogoi ete ni magili sagali.

<sup>25</sup> Mane sou a vanua mina luma tasa sou vilelue sou me sou maubi, a luma do ni ma magili sagali oto. Boa.

<sup>26</sup> Mane Satan ni maibutuale ei oto, me sou minei sou vilelue sou, de ei ni ma mapigogoi ete ni magili sagali. Ei ni pulu sele.

<sup>27</sup> A bibi tasa ei ma mapigogoi ete ni gali ulilo na luma mina bibi tasa sea i sagali sele mei ni guale sabubi a golugolu minei. Boa. Palapala ei ni papale a bibi sagali iedo a mota. Mane ei goli maido, de ei mapigogoi ni guale a golugolu ino na luma mina bibi iedo.

<sup>28</sup> Eau vei patotona usino ne amutou maido, Salemo ei ni lilotase a sinusu vuso ma mailobena vuso sou a vanunua ma tavivine sou goli.

<sup>29</sup> Moni mane a bibi ei goli a inade pagu usino na Maolona Nunu, Salemo i ma mapigogoi ete ni lilotase a sinusu minei, seidei me mulumuli tamai. A sinusu odolo ei ni muina minei taliulu taliulu.”

<sup>30</sup> Iesu ei vei maido, vuna sou vei, “Ei isa a nunu pagu ino minei.”

*Sei e tinana me tatasine Iesu?*

*(Mat 12:46-50; Luk 8:19-21)*

<sup>31</sup> Mina malada do tinana pilu e sou e tatasine Iesu sou divi. Sou magili sala, me sou sove a inade usino ne ei. Sou kale ve Iesu ei ni asuale sou.

<sup>32</sup> Abuna vanunua ma tavivine taula sou ugu saili ei, me sou vei lei maido, “Longe. Tinamu pilu e tatasimu me latavivinemu sou ino sala me sou gemugemu e oo.”

<sup>33</sup> Me ei adeliu usino ne sou maido, “Sei e eina me tatasigu?”

<sup>34</sup> Ei gegemu ulilo mine sou a vanunua ma tavivine sou ugu saili ei, mei vei, “Oite, sou ieli e eina me tatasigu.”

<sup>35</sup> A bibi ue a tavine ei ogomulimuli a masagana mine Salemo, sou e tatasigu me latavivinegu me eina.”

## 4

*Adetinovona mina nilangena vuavuana vit*

*(Mat 13:1-9; Luk 8:4-8)*

<sup>1</sup> Iesu ei matetengi lou a vanunua ma tavivine mina lili na pou na nanu. Ma abuna vanunua ma tavivine taula sou asuale ei. Maidolo me ei sae na bot tasa ino na pou na nanu, mei ugu i. Ma vanunua ma tavivine vuso ino na mado agavuale a nanu.

<sup>2</sup> Me Iesu ei goli a adetinovona makuba mina matetengine sou. Ei bilii e sou a inade maido,

<sup>3</sup> “Longe. Bibi tasa ei lange a vuavuana vit na mauma.

<sup>4</sup> Ei pipigo a nilangena usino, ma vuavuana vit sanii sou pu na vea, ma manumanu sou lovo maino me sou ani.

<sup>5</sup> A vuavuana vit sanii sou pu mina avena magamaga vatuvatu ino i, moni magamaga ma butolu oto mei ma tano vauta oto, maido ma vit iedo ei uusi asi,

<sup>6</sup> moni ilala a oaso i vele uata, ei voe a vit iedo me a vit ei magolu mei mate, vuna a vit iedo a aana boa.

<sup>7</sup> Ma vuavuana vit sanii sou pu balivua na mota ooloo. Ma mota ooloo do ei uusi mei avipope a vit, ma vit ei ma vua oto.

<sup>8</sup> Moni a vuavuana vit sanii pu utano na magamaga i doana, ma vit i palea buo, mei vua. Sanii ei vuale savulu tolu, me sanii ei vuale savulu pantasa, me sanii ei vuale savulu sobo tasa.”

<sup>9</sup> Me Iesu ei vei le sou maido, “Bibi ei isa a tagilana ei ni longe a inade ie.”

<sup>10</sup> Na ilala abuna vanunua ma tavivine sou asuosi, de disaipel savulu tasa timana lua pilu e sou a vanua sou ugu pilu e Iesu, sou tagi e ei a vuna adetinovona.

<sup>11</sup> Me Iesu ei vei le sou maido, “Salemo i matetengiosi amutou a vuna adeoovuna mina niitealalena mine Salemo. Moni a vanunua ino sala, sou longe a inade vuso a adetinovona moni.

<sup>12</sup> Maido me,  
‘Ne sou gegemu mapapaina, moni ne sou ma iteilale ete a golu tasa.

Me ne sou longe a inade taliulu, moni ne sou ma muada oto a vuna inade, dae ne sou savvule a lilone sou, me Salemo ei ni lilotase a sinusu mine sou.’\*,”

<sup>13</sup> Me Iesu ei vei le sou a disaipel maido, “Amutou ma muada oto a vuna adetinovona ieli? Maido me ne amutou muada a vuna adetinovona vuso matina?”

<sup>14</sup> Bibi ei lange a vuavua, ei lange a inade mine Salemo usino ne sou a vanunua ma tavivine.

<sup>15</sup> Inade ei pu na vea ei tomane sou a abuna vanunua ma tavivine sou longe a inade, ma tabaa oto Satan ei asu maino mei taulele a inade Salemo ei daniosi na lilone sou.

<sup>16</sup> Ma vanunua ma tavivine sanii sou tomane a vuavuana vit i pu utano mina magamaga na vatuvatu. Sou longe a inade, me sou guale asiasi, me sou mongemonge i.

<sup>17</sup> Moni a aane sou boa, maido me sou muina sapa bisii moni. Me malada a mavaana ma madavuvusona i palea le sou na inade mine Salemo moni, ma tabaa oto sou bosa.

<sup>18</sup> Ma vanunua ma tavivine sanii sou tomane a vuavuana vit ei pu utano balivua mina mota ooloo. Sou a abuna do sou longe a inade,

<sup>19</sup> moni sou damutatala papai a gologolu mina magamaga, me sou lilibuu a taupiluna vatu papai me sou isuale a matamatana gologolu. A gologolu odo sou avisobe a inade mine Salemo, mei ma vua oto.

<sup>20</sup> Moni a vanunua ma tavivine sanii sou tomane a vuavuana vit ei pu utano na magamaga doana. Sou longe a inade, me sou guale me sou sautole, me sou vuale a vuna. Sanii sou vuale savulu tolu, me sanii sou vuale savulu pantasa, me sanii sou vuale savulu sobo tasa.”

*Lada matano na taogo*

*(Luk 8:16-18)*

<sup>21</sup> Iesu ei vei lou le sou a disaipel maido, “Nane sou a vanua sou guale a lada usinani me sou tau matano na taogo tasa ue matano

\* 4:12 Aisaia 6:9-10

na poso tasa? Boa. Sou tautau muata na poso.

<sup>22</sup> A golugolu vuso i tabuli oovu, mulimuli ei ni palea. Ma golugolu vuso sou a vanua sou tau oovi edo, mulimuli ei ni palea.

<sup>23</sup> Bibi ei tagilana ei ni longe a inade ie.”

<sup>24</sup> Me ei vei le sou maido, “Inade amutou longe, iede amutou damutale kube. Inade amutou bilii e sou a vanunua, inade moni iedo Salemo ei ni bilii liu e amutou. Me ei ni adesui sanii lou usino ne amutou.

<sup>25</sup> Mane a bibi tasa ei isa a golugolu, de Salemo ei ni bilii e ei sanii lou. Moni mane a bibi ei ma isa oto a golugolu, de Salemo ei ni taulele a golugolu banini ei isa i.”

#### *Adetinovona vuavua na inani i palea*

<sup>26</sup> Iesu ei ade lou maido, “Niitealalena mine Salemo ei tomane a bibi tasa ei lange a vuavua na gona inani na magamaga.

<sup>27</sup> Na lodo taliulu bibi iedo ei ngolongolo, na oaso ei ilisi gaga mei goli a pipigona minei. Ma vuavua na gona inani iedo ei palea, moni a bibi iedo ei ma muada oto i a vuavua sou buo matina.

<sup>28</sup> Magamaga oto ei goli me sou uusi, mulimuli sou vua. Palapala laulauna i palea, mulimuli gelune sou i palea, mulimuli a vuavua i palea buo lilo mina gelune sou.

<sup>29</sup> Na malada gona inani i matua, de bibi iedo ei valiuti, vuna ilala na gualena gona inani i paleasi.”

#### *Adetinovona mina vuavua na mastet (Mat 13:31-32; Luk 13:18-19)*

<sup>30</sup> Me Iesu ei vei lou maido, “Neitou vei, a niitealalena mine Salemo ei tomane a sava? Eitou neitou goli sei matana adetinovona?”

<sup>31</sup> Ei tomane a vuavua na golu tasa sou vate a mastet. Vuavua na mastet ei ma tomane ete a vuavua na gona inani sanii mina magamaga. Ei malabanini sele na malada sou dani na magamaga.

<sup>32</sup> Sou daniosi, ei uusi mei buo, ei seleuli a golugolu vuso sou tubu na mauma. Ei tau a lalalana buobuo, me a manumanu sou mapigogoi ne sou lovo usinani ne sou toa na lalana, me sou tau a noane sou na miau.”

#### *Iesu ei vei a adetinovona moni (Mat 13:34-35)*

<sup>33</sup> Iesu ei ade ane sou a vanunua ma tavivine a adetinovona makuba maido, mapigogoi ne sou muada i.

<sup>34</sup> Ei veimuade a inade usino na vanunua ma tavivine na inigogona mina adetinovona. Na malada sou a disaipel moni sou ino pilu e ei, ei veimuadade a vuna inadenade vuso usino ne sou.

#### *Iesu ei ade ma avivili buo i mate (Mat 8:23-27; Luk 8:22-25)*

<sup>35</sup> Mataviliolio na malada moni iedo, Iesu ei vei le sou a disaipel maido “Neitou asu na avena lili na pou na nanu maino.”

<sup>36</sup> De sou ilisitase a abuna vanunua ma tavivine do, me sou sae na bot Iesu ei ugugu i, me sou vole pilu e ei. Ma bot sanii tamai sou ogomuli e sou.

<sup>37</sup> Me saga i avivili taula i ilisi, ma dasi ei sao ulilo na bot, ma lomu bisii moni ni vonu.

<sup>38</sup> Me Iesu ino na muga na bot, ei ngolo na tagana tasa. De sou toleluti ei me sou vei, “Magiligilina, bisii moni eitou neitou buale, nane oo ma lilomuli sape ete eitou neitou mate?”

<sup>39</sup> Me Iesu ei ilisi mei sinoa ana avivili mei vei ana dasi maido, “Oo pea moni simaido, oo pulu sele me oo mate!” Seido a avivili ei mate ma dasi ei ma vuvule sapa oto.

<sup>40</sup> Me ei tagi e sou a disaipel maido, “Amutou lae i matina? Saboa amutou a silimulina boa, io?”

<sup>41</sup> Me sou lae mamau sele, me sou ade balivua ne sou oto maido, “Ei sei bibi oto, me a avivili ma dasi su longemuli a inadene ei?”

## 5

#### *Iesu i taulele a nunu pagu ino na bibi tasa (Mat 8:28-34; Luk 8:26-39)*

<sup>1</sup> Iesu pilu e sou a disaipel minei sou asu sibitala na lili na pou na nanu mina magamaga mine Gerasa.

<sup>2</sup> Ei ilisitasesi a bot, ma tabaa oto a bibi tasa ei isa a nunu pagu ei asu sibitala le Iesu maino na muina minate.

<sup>3</sup> Ei malu maisabasaba moni mina muina minate. Mei ma mapigogoi ete a bibi tasa ni papaletole ei a sen.

<sup>4</sup> Malada taliulu sou papalepale ei a maomao ma sen. Moni ei sagiutiuti a sen ma maomao. Ei sagali mamau sele, ma bibi tasa ei ma mapigogoi ete ni lapitole ei.

<sup>5</sup> Mina oaso me mina lodo taliulu ei muina moni mina muina minate me na loeloena, mei ngala gegelugelu sele mei ooleole a vovone ei oto a vatu.

<sup>6</sup> Ei ite Iesu maino oto sele, mei vele usino mei totopatulu agavuale sele a ubune Iesu.

<sup>7</sup> Mei tola vauta sele maido, “Iesu, oo Natune Salemo oata oto sele, oo kale no toematine eau? Eau nai sagali oo na aisane Salemo, oo ma toegegeligeli lei e eau.”

<sup>8</sup> Ei tola maido, vuna Iesu ei veiosi lei maido, “Oo a nunu pagu, oo no avulutase a bibi iede.”

\* 5:9 Ei a Legion, a abuna vanua na maubina ne Rom. A savulu mina Legion tasa ei savuluvulu pantasa (6,000).

<sup>9</sup> De Iesu ei tagi e ei maido, “Aisamu e sei?” Me ei vei maido, “Aisagu a vanua na maubina. Vuna, amiteu makuba.”\*

<sup>10</sup> Me ei nai sagali e Iesu ni ma taulelele lei sou a nunu pagu edo dae ne sou asutase a avena magamaga do.

<sup>11</sup> Abuna bolo taula tasa sou aaniani na loena baini tasa i agavi.

<sup>12</sup> Me sou a nunu pagu sou nai sagali e Iesu maido, “Oo no peltase amiteu ulilo na bolobolo do.”

<sup>13</sup> Seido Iesu ei longo ane sou a nunu pagu ne sou ilisitase a bibi iedo me sou gali ulilo mina bolobolo do. Ma abuna bolobolo iedo sou dulu sele utano na babangi. Me sou pumutu utano na pou na nanu, me sou inu a nanu me sou mamate. A savulu na bolobolo vuso do ei mapigogoi savuluvulu lua (2,000).

<sup>14</sup> Sou a vanua na itealalena bolobolo sou ite me sou oava, me sou maivele a inade usino na aubu buobuo me na aubu sanii tamai. Ma vanunua ma tavivine sou asu usinani me sou ite a sei golu sele oto ei palea.

<sup>15</sup> Sou sibitala le Iesu, me sou ite a bibi lisa sou a nunu pagu makuba ino minei iedo. Seidei ei lavalava a malo, ma damutatalana minei ei muada, mei ugugu a muina. Sou a vanunua ma tavivine sou ite me sou lae.

<sup>16</sup> Me sou a vanua sou ite a gologolu Iesu ei goli, me sou mapamuli le sou a vanunua ma tavivine a gologolu ei palea le a bibi iedo, lisa sou a nunu pagu ino minei. Me sou mapamuli tamai a bolobolo.

<sup>17</sup> Vanunua ma tavivine sou longe me sou vei sagali le Iesu ni ilisitase a magamaga mine sou mei ni asu usino na avena tasa.

<sup>18</sup> Seido Iesu ei sae na bot, a bibi lisa sou a nunu pagu ino minei iedo, ei nai sagali e Iesu maido, “Mapigogoi no longo eau na ogomuli e oo?”

<sup>19</sup> Moni Iesu ei ma longo oto ana. Ei vei ana bibi iedo maido, “Oo asu usino na luma minio me ne sou minio. Mo no vei le sou a gologolu vuso Bibi Taula ei goli mina buloine oo, me mina dinodene oo.”

<sup>20</sup> Maido ma bibi iedo ei asu, mei veimuade a inade mina avena vuso mine Dekapolis a gologolu vuso Iesu ei goli mina buloine ei. Me sou a vanunua ma tavivine sou longe me sou saga sele.

*A tavine baini tasa ma tavine a dala singisingi minei*

*(Mat 9:18-26; Luk 8:40-56)*

<sup>21</sup> De Iesu ei sae na bot mei voleutu lou mina pou na nanu e Galili. Ei sibitala mina lili maino, ma abuna vanunua ma tavivine sou asu usinani me sou viepilu mina nilongena inadene ei. Me Iesu ei ino agavuale a pou na nanu.

<sup>22</sup> Ma bibi buo tasa mina luma na kinaka mine sou e Iuda ei asu maino, aisana e Iairus. Ei ite Iesu mei totopatulu agavuale a ubune ei.

<sup>23</sup> Me ei nai sagali e Iesu maido, “Natugu a tavine baini bisii moni ni mate. Kubaana o no asu usinani mo tau a limamu muata ne ei, me ei ni kuba lou mei ni mauli.”

<sup>24</sup> Me Iesu i asu pilu e ei. Ma abuna vanunua ma tavivine sou ogomuli e ei, me sou vaitole sele ei.

<sup>25</sup> Ma tavine tasa ino, a dala i singi ne ei taliulu mapigogoi a avala savulu tasa timana lua.

<sup>26</sup> Tavine do ei itesi a vanua na toekubena papaina, me sou billi e ei a davutina makuba sele moni, me ei iabitasesi a vatu minei vuso mina unoline sou. Moni a sinobe minei ilisi buo lou.

<sup>27</sup> A tavine do ei longe a pipigona Iesu ei gologoli. Maido me ei asu maino, mei ino balivua mine sou a vanunua ma tavivine. Ei asu mamuli na taulune Iesu, mei pige a aisuna kinainai mine Iesu.

<sup>28</sup> Ei vei le ei oto maido, “Mane eau pige a aisuna kinainai minei, eau na kuba lou.”

<sup>29</sup> Tavine do ei pige a aisuna kinainai mine Iesu, ma tabaa oto a dala i pulu minei, me a vovona ei somiale a sinobe do ei bualesi.

<sup>30</sup> Me Iesu ei muada i, a sagagalina sanii ei bualetasesi ei. Maido me ei sauvule mei tagu maido, “Sei pige a kinainai minau?”

<sup>31</sup> Me sou a disaipel minei sou vei lei maido, “Oite, a abuna vanunua ma tavivine sou agavuale sele oo. Posa matina o vei, ‘Sei pige a kinainai minau?’”

<sup>32</sup> Moni e Iesu ei gegemu maisaba ve ni poge sei ei lapitole a kinainai minei.

<sup>33</sup> Ma tavine do ei muada a golu ei palea minei, me ei lae ma vovona ei palili. Mei asu maino, ei totopatulu agavuale Iesu, mei veimuade a gologolu vuso.

<sup>34</sup> Me Iesu ei vei lei maido, “Natugu tavine, oo silimuli e eau, maido me oo palea kuba lou. Oo asu, ma lilomu ni mea. Sinobe minio ni buale.”

<sup>35</sup> Iesu ei saboa adeade, ma vanua sanii mina luma mina munugana mina luma na kinaka mine sou e Iuda sou asu maino. Sou vei ana bibi edo maido, “Natumu ei matesi. Muinasi, ma bililili ase a mavaana usino na bibi na matetengina.”

<sup>36</sup> Moni e Iesu ei ma longemuli ete a inade sou lange. Ei vei ana munugana mina luma na kinaka mine sou e Iuda maido, “Oo ma laelae lou. Oo no silimuli moni.”

<sup>37</sup> Me ei magilisobe sou a vanunua ma tavivine ne sou ogomulimuli ei. Pita me Iemus me tasine Iemus, Ioanes, sou tao tolu moni sou ogomuli e ei.

<sup>38</sup> Sou asu sou sibitala na luma mina munugana mina luma na kinaka mine sou e Iuda, me Iesu ei ite a vanunua ma tavivine sou goli a mangengelena buo ma tinangi buo sele.

<sup>39</sup> Me ei gali ulilo mei vei le sou maido, “Vuna i matina amutou tangitangi me mu goli a mangengelena buo sele? Bibaini ieli ei ma mate oto. Ei ngolo moni.”

<sup>40</sup> Me sou polivai sele ei. Moni ei peltaselele sou a vanunua ma tavivine vuso usala mei guale tamana me tinana tavine baini pilu a disaipel minei tolu, me sou gali ulilo na vilu tavine baini ei ino i iodo.

<sup>41</sup> Me Iesu ei lapitole a limana tavine baini iedo, mei vei lei maido, “Talita kum.” Malibuuna inade do ei maido, “Tavine baini, eau vei lio, oo ilisi.”

<sup>42</sup> Ma tabaa oto a tavine baini iedo ei ilisi mei asu. Sou ite maido, me sou saga mamau sele. Tavine do a avalana i savulu tasa timana lua.

<sup>43</sup> De Iesu ei vei sagali le sou maido, “Mu ma veivei lei ana bibi tasa a golu ieli.” Me ei vei le sou ne sou bilii a tavine baini iedo a gona inani sanii.

## 6

*Sou e Nasaret sou lametase e Iesu  
(Mat 13:53-58; Luk 4:16-30)*

<sup>1</sup> Iesu ei ilisitase a aubu odo mei asu usino na aubu minei oto. Me sou a disaipel minei sou ogomuli e ei.

<sup>2</sup> Na Maolona Malada ei asu usino na luma na kinaka mine sou e Iuda mei bilii a inade mine Salemo usino ne sou a vanunua ma tavivine. Papaina mine sou a vanunua ma tavivine sou longe a inadene ei, sou saga sele me sou vei, “A bibi ieli ei guale a inade li iva? Muadana ino minei iodo, sei bilii e ei? Sei bilii e ei a sagagalina me ei goli a matamatana gona sinaganaga?”

<sup>3</sup> Eitou muada i, a bibi iede ei a bibi na gagatuna tasa. Ei e natune Maria, mei e tuane Iemus, Iosep, Iudas me Saimon. Sou e latavivine ei sou eili pilu e eitou.” Sou vei maido, me sou lilogetelu ane ei.

<sup>4</sup> Moni e Iesu ei vei le sou maido, “A profet ei isa a aisa na aububuna vuso. Moni na vuna aubu minei, me balivua mine sou a maututune ei, me na luma minei bilisi, ei a aisana boa.”

<sup>5</sup> Me ei ma mapigogoi ete ni goli a gona sinaga tasa na aubu iede. Ei tau a limana na vanua ma tavivine na sinobe tastasa moni mei toekube e sou.

<sup>6</sup> Me ei damutatata papai e sou a vanunua ma tavivine sou ma silimuli ete ei.

*Iesu ei peltase a disaipel savulu tasa timana lua  
(Mat 10:1, 5-15; Luk 9:1-6)*

De Iesu ei gaga na aububuna avena do, mei bilii a inade mine Salemo usino ne sou a vanunua ma tavivine.

<sup>7</sup> Me ei toleale sou a disaipel savulu tasa timana lua usinani, mei peltase tao lualua usino. Ei bilii e sou a sagagalina mina taulelana nunu pagu ino ne sou a vanunua ma tavivine.

<sup>8</sup> Me ei vei le sou maido, ne sou lapitole a too, moni ne sou ma gualeale lei a golugolu sanii mina inasu usino pilu e sou, me ne sou ma gualeale lei a ulalu, me ne sou ma gualeale lei a tanga ue sei golu, me ne sou ma gualeale lei a vatu lilo mina palakulu,

<sup>9</sup> me ne sou kai a ubupolo, moni ne sou ma kaikai lei a kinainai lua.

<sup>10</sup> Me ei vei le sou maido, “Mane amutou divi na aubu tasa, me amutou gali ulilo mina luma tasa, de ne amutou ugu moni mina luma do mapigogoi a malada ne amutou asutase a aubu iedo.

<sup>11</sup> Mane a aububuna sanii sou ma guale ete amutou usino na luma mine sou me sou ma kale ete ne sou longemuli a inade ne amutou, de ne amutou ilisitase a aubu iedo. Na malada amutou asutase a aubu iedo, ne amutou mu saveitase a kavou ma magamaga na ubune amutou. Maido ne sou muada i, sou isa a mavaana na inigogona sou goli.”

<sup>12</sup> De sou a disaipel sou asu, me sou veipale a inade usino ne sou a vanunua ma tavivine maido, “Mu sauvule a lilone amutou.”

<sup>13</sup> Me sou taulele a nunu pagu makuba ino ne sou a vanunua ma tavivine, me sou tau a wel muata ne sou a sinobe makuba me sou toekube sou so kuba lou.

*Minate mine Ioanes a bibi na maavuvutuna  
(Mat 14:1-12; Luk 9:7-9)*

<sup>14</sup> Herot a mapana ei longe a inade na golugolu ieli ei palea, vuna aisansa Iesu i vele bubulasi na avevena vuso. Vanunua ma tavivine sanii sou vei, “Ei e Ioanes a bibi na maavuvutuna ei ilisiliu na muina minate. Maido me ei goli a gona sinaga ieli pilu a sagagalina.”

<sup>15</sup> Me sanii sou vei, “Ei e Elaiia.” Me sanii sou vei, “Ede a Profet, tomane sou a profet lisa.”

<sup>16</sup> Herot ei longe do mei vei maido, “Lisa eau mogeuti a loone Ioanes, moni seidei ei ilisiliu lou.”

<sup>17-18</sup> Lisa Herot ei tavui e Herodias, susune Pilip, tasine Herot. Me Ioanes ei vei le Herot maido, “Oo guale susune tasimu, ei ma puiale ete.” Maido me Herot i peltase a vanua usino ne sou saavi e Ioanes, me sou papaletole ei a sen me sou tau ei na luma na tunuui.

<sup>19</sup> Herodias ei sinoa mamau sele ane Ioanes mei kale ni valiputemate ei, moni ei ma mapigogoi ete,

<sup>20</sup> vuna Herot ei lae e Ioanes. Ei muada, Ioanes ei a billesina bibi mei maolo na matane Salemo. Maido me Herot ei ulage kube sele e ei. Malada ei longe a inade ne Ioaanes, ei damutatata papai ma tiana i mavaa, moni ei kale sele ni longe a inadene ei.

<sup>21</sup> Mulimuli Herodias ei poge a vea maido. Herot ei goli a inani taula mina damutalena alaposana minei. Ei goli a inani taula ane sou a vanua sou buloi e ei a nitealena avena buobuo minei, me mine sou a munuganugana vanua na maubina, me mine sou a vanua buobuo mina avena buobuo e Galili.

<sup>22</sup> De sou aaniani a muina, me natune Herodias a tavine ei gali ulilo mei tilia. Me Herot pilu e sou a vanunua sou aani pilu e ei, sou kale mamai sele a tiliana do. Maido ma mapana ei vei ana tavine alaba do maido, "Eau na bilii e oo a sei golu oo kale? Oo vei moni le eau, mea na bilii e oo."

<sup>23</sup> Me Herot ei goli a adegatuna sagali maido, "Ivu uata, sei golu oo tagi e eau, eau na bilii e oo. Mane oo vei le eau na valipole a avena buo minau ni palea lua, me na bilii e oo a avena tasa."

<sup>24</sup> Ma tavine do ei gali usala mei tagi e tinana maido, "Eau na vei le ei ni bilii e eau a sava?" Me tinana i vei, "No vei le ei ni guale a letene Ioanes a bibi na maavvutuna mei ni bilii e oo."

<sup>25</sup> De a tavine alaba do ei veteliu asi lou usino na mapana, mei vei lei maido, "Simonimoni nali eau kale no tau a letene Ioanes a bibi na maavvutuna na taogo tasa, no bilii e eau."

<sup>26</sup> Mapana ei longe a inade do ma lilona i mavaa mamau. Moni ei damutale a adegatuna ei goli, me ei ma kale ete ei ni maela na matane sou a vanunua sou ugu a inani pilu e ei. Maido me ei ma kale ete ni longetase a inadena tavine do.

<sup>27</sup> De ma tabaa oto a mapana i peltase a bibi na maubina minei tasa usino ni guale a letene Ioanes usinani. Bibi na maubina do ei asu usino na luma na tunuui, mei mogeuti a loone Ioanes.

<sup>28</sup> Mei tau a letene Ioanes na taogo tasa mei maasi usino mei bilii e tavine alaba. Ma tavine alaba do ei bilii e tinana.

<sup>29</sup> Disaipel mine Ioanes sou longe a inade na golu Herot ei goli, me sou asu sou guale a aitolane Ioanes me sou tabule usino me sou peilai na aubu na minate.

*Iesu ei maaani a vanunua savuluvulu lima (5,000)*

*(Mat 14:13-21; Luk 9:10-17; Ioa 6:1-14)*

<sup>30</sup> Sou a aposel sou veteliu me sou viepili pilu e Iesu. Me sou mapamuli a pipigona sou goli, me a inadnade vuso sou bilii e sou a vanunua ma tavivine.

<sup>31</sup> Moni a vanunua ma tavivine makuba sou asuasusino usinani, maido me Iesu pilu e sou a aposel sou ma isa oto a matailala mina inani. Iesu ei vei le sou a aposel maido, "De, eitou moni to asu usino na avena baa tasa, me ne amutou manoa sapa."

<sup>32</sup> Me sou guale a bot, me sou moni asu usino na avena baa tasa.

<sup>33</sup> Moni e sou a vanunua ma tavivine sou ite sou asu usino, me sou iteilale e sou. Maido ma vanunua ma tavivine mina aubu buobuo vuso sou vele usino na avena Iesu ma aposel sou kale ne sou asuale, me sou divi pala ane Iesu.

<sup>34</sup> Na ilala Iesu ei ontola, ei ite a abuna vanunua ma tavivine taula sou ino. Me ei lilomuli sele e sou, vuna sou tomane a sipsip sou ma isa oto a bibi na itealalene sou. Me ei soke a matetengine sou.

<sup>35</sup> Mulimuli, a oaso i kale ni vele utano, sou a disaipel mine Iesu sou asuale ei me sou vei lei maido, "Avena ieli a vanua boa, ma oaso i velevelesi utano."

<sup>36</sup> Kubaana o no peltase liu a vanunua ma tavivine usino. Ei puiale ne sou asu usino na avena maisaba me na aubu, me ne sou oli a gona inani ane sou."

<sup>37</sup> Moni Iesu ei adeliu ane sou a disaipel minei maido, "Amutou oto mu bilii e sou a gona inani." Me sou tagi e ei, "Nane o kale namiteu asu te oli a ulalu a denarii\* savulu sobo lua, me namiteu bilii e sou, io?"

<sup>38</sup> Me ei tagi e sou, "Amutou a ulalu visa nana? Mu asu mu gemu." Sou itesi me sou veteliu me sou vei le Iesu maido, "Amiteu isa a ulalu lima ma aia lua."

<sup>39</sup> Me Iesu ei ade ane sou maido, "Sou a vanunua ma tavivine ne sou viepilu me ne sou ugu na gulugulu doana."

<sup>40</sup> De sou ugu, ma abuna vanunua sanii sou mapigogoi a savulu sobo tasa, me sanii mapigogoi savulu lima.

<sup>41</sup> Me Iesu ei guale a ulalu lima do pilu a aia lua, mei gemu uata mina langi, mei toledadangi e Salemo. Mei lee a ulalu sou odo mei bilii e sou a disaipel ne sou seobule usino na vanunua ma tavivine. Ma aia lua tama'i ee lee mei bilii e sou a vanunua ma tavivine.

<sup>42</sup> Me sou vuso sou ani me sou masu.

<sup>43</sup> Me a matevuavua na ulalu ma aia saboa ino, me sou taupili me sou totongi voni na tanga savulu tasa timana lua.

<sup>44</sup> Savulu na vanunua sou ani i savuluvulu lima.

\* 6:37 Denarii tasa ei a mapana mina pipigona mina malada tasa.



*Iesu ei asu muata na nanu  
(Mat 14:22-33; Ioa 6:15-21)*

<sup>45</sup> Ma tabaa oto Iesu ei ade ane sou a disaipel minei ne sou sae na bot me ne sou muga pala ane ei usino na avena pou na nanu maino, a aubu e Betsaida. Ei oto ei kale ni muina mei peltase pale sou a vanunua ma tavivine usino.

<sup>46</sup> Ei peltasesi e sou a vanunua ma tavivine, de ei asu uata mina loena ve ni kaka.

<sup>47</sup> Matavilioliosi me a bot peasi balivua na pou na nanu, me Iesu vululu moni ei ino na mado.

<sup>48</sup> Me ei ite a avivili i vali masae na muga na bot mei lange laulau e sou, me sou mangava sele a vunolena. Agavuale ni malada, Iesu ei asu muata mina pou na nanu usino ne sou. Ei kale ni gaoli e sou,

<sup>49</sup> moni sou a disaipel sou ite ei asuas muata na pou na nanu, me sou damu ve ei a masalangi tasa, me sou ngala mamau sele.

<sup>50</sup> Sou vuso so ite ei, me sou lae sele. Ma tabaa oto Iesu ei ade ane sou maido, "Amutou magili sagali. Ieli eau moni. Amutou ma laelae lou."

<sup>51</sup> Me ei sae na bot mei ugu pilu e sou, ma avivili i mate. Me sou saga mamau sele,

<sup>52</sup> vuna sou ma muada kuba oto a gona sinaga Iesu ei goli a ulalu. Damutatalana mine sou saboa ino sobo.

*Iesu ei toekube a vanunua papaina sou  
sobe ne Genesaret*

*(Mat 14:34-36)*

<sup>53</sup> Iesu pilu e sou a disaipel sou voleutuosi a pou na nanu, me sou ontola na avena ne Genesaret, me sou paletole a bot.

<sup>54</sup> Sou ilisitasesi a bot, ma tabaa oto sou a vanunua ma tavivine sou itesi e Iesu me sou iteilale ei.

<sup>55</sup> Na ilala vanunua ma tavivine sou longe e Iesu ei ino na avena ne sou, sou mamavute sou a vanua na sinobe mina poso, me sou tabule sou usino ne ei.

<sup>56</sup> Me na aububuna me na aubu buobuo vuso me na aubu banini mina avena do Iesu ei asu i, sou tau e sou a vanua na sinobe na muina viepiluna. Me sou nai sagali e Iesu maido, sou a vanua na sinobe ne sou pige a aisuna kinainai minei moni. Me sou goli maido, sou palea kuba lou.

## 7

*Binea mine Salemo ei vululusi a inade  
mine sou selebuobuo*

*(Mat 15:1-9)*

<sup>1</sup> Sou e Parisi pilu e sou a vanua na muadana binea sanii sou ilisitase e Ierusalem me sou asu usinani, ne sou ite Iesu.

<sup>2</sup> Me sou ite a disaipel minei sanii sou aaniani, me sou ma loloi pale ete a limane sou.

<sup>3</sup> (Sou e Parisi me sou e Iuda sou ogomuli a inigogona mine selebuobuo, me mane sou ma loloi kube pale ete a limane sou, ne sou ma aani oto.

<sup>4</sup> Malada sou asu usino na muina oolina me sou veteliu, mane sou ma avutu oto, ne sou ma aani oto. Me sou ogomulimuli a inigogona papaina sanii tamai sou guale maino ne sou selebuobuo, sou loloiiloa a taogo na niinu ma taogo na gugutuna ma taogo na tinauna inani ma poso na inani.)

<sup>5</sup> De sou e Parisi me sou a vanua na muadana binea sou tagi e Iesu maido, "Posa matina sou a disaipel minio sou ma ogomuli ete a inigogona mine sou selebuobuo? Limane sou i mumugu, moni sou aani."

<sup>6</sup> Me Iesu ei vei le sou maido, "A profet e Aisaia, ei veipale sele amutou a vanua na aualana. Ei niage a inade maido,

'Sou a abuna vanunua ma tavivine iedo sou beilange a aisagu na asene sou, moni a lilone sou ma damutatalana mine sou ei bulago sele agu.

<sup>7</sup> Sou veimuadade a binea mina vanua moni usino ne sou a vanunua ma tavivine, me sou vei, "Telili a inade mine Salemo.

Maido me sou kaka sabubu moni agu."\*

<sup>8</sup> Amutou litasesi a binea mine Salemo, me amutou lapitole sagali a inigogona vanua moni."

<sup>9</sup> Me Iesu ei vei lei le sou maido, "Amutou ogomulimuli a inigogona mine amutou oto, moni amutou longetase a inade mine Salemo.

<sup>10</sup> Moses ei vei, 'Oo no matano moni ne tinamu me tamamu me oo no ogomuli a inade ne sulu,' me 'Mane a bibi ei goli a inade pagu usino ne tamana me tinana, ei ni mate.'

<sup>11</sup> Moni amutou veivei maido, mane a bibi tasa ei isa a vatu ue sei golu mina buloine tamana me tinana, moni ei vei le sulu, 'A vatu ieli eau maaisesi ve na bilii e Salemo,'

<sup>12</sup> de a bibi iedo ei ni ma goli ete a gologolu mina buloine tamana me tinana.

<sup>13</sup> Maido me amutou ogomuli a inigogona amutou guale maino ne sou selebuobuo, me amutou toebosa a inade mine Salemo. Me amutou goli a matamatana inigogona makuba maido."

*A golu ei toe a bibi i mumugu*

*(Mat 15:10-20)*

<sup>14</sup> De Iesu ei toleale lei a vanunua ma tavivine, mei vei le sou maido, "Amutou

\* 7:7 Aisaia 29:13

vuso mu longe a inadegu me mu damutale kube.

<sup>15</sup> A golu ei muina sala na bibi tasa mei gali ulilo minei, ei ni ma mapigogoi ete ni toe a bibi ni mumugu.

<sup>16</sup> A golu ei muina lilo na bibi mei gali usala, iedolo moni ei ni toe a bibi ni mumugu.”

<sup>17</sup> Iesu ei ilisitase a abuna vanunua ma tavivine mei asu usino na luma. Me sou a disaipel minei sou tagi e ei a vuna adetinovona do.

<sup>18</sup> Me ei vei le sou maido, “Amutou tamai a damutatalana ane amutou boa, io? Nane amutou ma muada oto, a golugolu vuso ei ino sala na bibi mei gali ulilo minei, ei ni ma mapigogoi ete ni toe a bibi ni mumugu, io?”

<sup>19</sup> Vuna, a inigogona golu maido ei ni ma gali sele oto ulilo na nununa bibi. Ei asu ulilo na tiana mei vele usala.” Ma inade ieli Iesu ei vei maido a gona inani vuso i alaba na matane Salemo.

<sup>20</sup> Me Iesu ei vei lou maido, “A golu ei muina lilo mina bibi mei gali usala, iedele ei toe a bibi ni mumugu.

<sup>21</sup> Eau vei a matana golugolu ei palea maino na damutatalana bibi, ede a golugolu maido, damutatalana mamau, ma inigogona sualolona, ma inigogona paaalina, ma inigogona valiputematena bibi, ma inigogona sualolona pilu e sou a taulaina,

<sup>22</sup> ma inigogona luumona, ma inigogona butualena, ma inigogona aualana, ma inigogona matamatana sualolona, ma inigogona isualena, ma inigogona nilobene sou sani, ma inigogona toehibibina maisaba, ma inigogona toevautautana.

<sup>23</sup> Inigogona mamau vuso dolo ei ino lilo na bibi mei gali usala, ei toe a bibi ni mumugu na matane Salemo.”

*Tavine na avena e Ponisia ei silimuli sele e Iesu*

(Mat 15:21-28)

<sup>24</sup> Me Iesu ei ilisi mei asutase a avena do, mei asu usino na avena ne Tair. Ei gali ulilo mina luma tasa, me ei ma kale ete na bibi tasa ni muada ve ei ino. Moni ei ma mapigogoi ete ni ugu oovu.

<sup>25</sup> Tavine tasa ei longe a inade ve ei ino. Tavine do ei isa a natuna tavine. Me natuna do ei isa a nunu pagu. Maido ma tavine do ei asu asi mei totopatulu agavuale a ubune Iesu.

<sup>26</sup> Tavine do ei a tavine Grik, mei maino ne Ponisia na avena buo e Siria. Ei nai sagali e Iesu ni taulele a nunu pagu ino ne natuna tavine.

<sup>27</sup> Me Iesu ei vei lei maido, “Ne amiteu bilii pale natatune amiteu a gona inani. Ei ma puiale ete namiteu guale a gona inani mine natatune amiteu me namiteu lange usino na busebuse.”

<sup>28</sup> Moni a tavine ei adeliu usino ne ei maido, “Bibi Buo, a busebuse ino matano mina luuvana poso na inani sou tamai sou gualeale a matevua na gona inani mine sou selebanani.”

<sup>29</sup> Me Iesu ei vei lei, “Oo vei maido, de oo veteliu. Nunu pagu ei bualetasesi e natumu.”

<sup>30</sup> Me a tavine odo ei veteliu usino na luma minei, mei ite a natuna i ngolo na poso, ma nunu pagu i bualetasesi e ei.

*Iesu ei toekube a bibi tasa tagilana ma asena i sobo*

<sup>31</sup> Seido Iesu ei ilisi lou mei asutase a avena ne Tair, mei asu usino na avena ne Saidon. Me ei asu lou usino na avena ne Dekapolis, mei sibitala na pou na nanu e Galili.

<sup>32</sup> Me sou maasi a bibi tasa usinani minei, tagilana i sobo ma tabelena i mavaa, mei ma mapigogoi ete ni ade kuba. Me sou nai e Iesu ni tau a limana muata na bibi iedo.

<sup>33</sup> Me Iesu ei guale a bibi iedo usino, me sulu asutase sape a vanunua ma tavivine, me sulu moni ino. Me Iesu i tau a uuna lua na tagilagilana bibi iedo. Me mulimuli ei apisosoli a uune ei oto, mei tau a uuna lua na tabelena bibi iedo.

<sup>34</sup> Me Iesu i gemu uata na langi, mei ati tangi mei lapuale sagali a ngalane ei. Mei vei ana bibi iedo maido, “Epata.” A malibu-una inade do maido, “Oo peo.”

<sup>35</sup> Ma tabaa oto a tagilagilana bibi iedo i peo, ma golu ei tabesobe a tabelena ei buale, me ei mapigogoi ni ade kukuba.

<sup>36</sup> Me Iesu ei magilisobe sagali e sou a vanunua ma tavivine ne sou ma veivei lei le sou a golu sou oite. Ei magilisobe sele, moni boa, sou sagali sele lou a veipalena inade do.

<sup>37</sup> Ma vanunua ma tavivine sou longe a inade iedo, me sou saga mamau sele, me sou ade maido, “A golugolu vuso ei goli, ei goli kubaana moni. Ei toekube e sou a tagilagilane sou sobo sou longe a inade, me sou a asene sou sobo sou ade lou.”

## 8

*Iesu ei bilii a gona inani usino na vanunua savuluvulu iva (4,000)*

(Mat 15:32-39)

<sup>1</sup> Na malada iedo abuna vanunua ma tavivine taula sou asu usinani me sou viepilu lou, me sou a gona inani boa. Me Iesu ei toleale sou a disaipel minei usinani, mei vei le sou maido,

<sup>2</sup> “Eau lilomuli e sou a vanunua ma tavivine eili ie. Sou ugu pilu e eau mapigogoi a malada toluosi, moni sou a gona inani boa.

<sup>3</sup> Mane eau na peltase liu e sou usino na luma mine sou, a matane sou ni lilili me

ne sou bosa na vea. Sanii sou asu maino i bulago usinani."

<sup>4</sup> Me sou a disaipel sou sie a inadena maido, "Avena ieli a vanua boa. Me ne eitou guale a ulalu iva me neitou bilii e sou?"

<sup>5</sup> Iesu ei tagi e sou, "Amutou isa a ulalu visa nana?" Me sou vei, "Padilua moni."

<sup>6</sup> De Iesu ei vei le sou a vanunua ma tavivine ne sou ugu mina magamaga. Me ei guale a ulalu padilua do, mei toledadangi e Salemo, mei lee mei bilii e sou a disaipel minei ne sou soebule. Me sou soebule sou a vanunua ma tavivine.

<sup>7</sup> Me sou isa a aia banini tastasa tamai. Me Iesu i toledadangi e Salemo a aia sou odo, mei vei le sou a disaipel ne sou soebule e sou tamai.

<sup>8</sup> Ilala sou a vanunua ma tavivine sou aani me sou masu, sou taupili a matevuavua na gona inani, me sou totongi voni a tanga padilua.

<sup>9</sup> Savulu ne sou a vanunua sou aani odo i savuluvulu iva. De Iesu ei peltase sou usino,

<sup>10</sup> ma tabaa oto ei sae na bot pilu e sou a disaipel minei, me sou asu usino na avena ne Dalmanuta.

*Sou vei le Iesu ni goli a gona sinaga*

*(Mat 16:1-4)*

<sup>11</sup> Sou e Parisi sou asu usinani me sou soke a maivovolona pilu e Iesu a inade. Sou vei ei ni goli a gona sinaga tasa mina langi. Sou kale ne sou tove moni ei.

<sup>12</sup> Iesu ei somiale a mavaana mina nunune ei, mei vei, "Vuna i matina vanunua ma tavivine mina ilala iedo sou tola a niitena matailala. Eau vei patotona ane amutou, ne sou ma mapigogoi ete ne sou ite a matailala tasa."

<sup>13</sup> Me ei asutase sou mei sae lou na bot mei voleutu usino na avena pou na nanu maino.

*Is mine sou e Parisi me Herot*

*(Mat 16:5-12)*

<sup>14</sup> Sou a disaipel sou danivuse a gualena ulalu pilu e sou. Sou isa a ulalu tasa moni na bot.

<sup>15</sup> Me Iesu ei ade sagali ane sou maido, "Amutou ulago kuba. Amutou tilale a is mine sou e Parisi me Herot."

<sup>16</sup> De sou a disaipel sou maiade balivua mine sou oto maido, "Nane ei goli a inade ieli, vuna eitou a ulalu boa."

<sup>17</sup> Iesu ei muada a inadene sou goli iedo, mei vei le sou maido, "Vuna i matina amutou ade maisabasaba maido, 'Eitou a ulalu boa'? Nane amutou saboa mu muada? Amutou saboa mu isa a damutatalana? A damutatalana mine amutou i sobo, io?"

<sup>18</sup> A matane amutou nana, moni amutou ma ite ete a golugolu, io? A tagilane amutou nana, moni amutou ma longe ete a inade,

io? Damutatalana mine amutou i bualesi, io?

<sup>19</sup> Malada eau lee a ulalu lima ane sou a vanunua savuluvulu lima, amutou totongi voni a tanga visa na matevuavua ulalu?" Me sou vei, "Savulu tasa timana lua."

<sup>20</sup> "Ma malada eau lee a ulalu padilua ane sou a vanunua savuluvulu iva, amutou totongi voni a tanga visa na matevuavua ulalu?" Me sou vei, "Padilua."

<sup>21</sup> Me ei vei le sou, "Amutou saboa mu muada i, io?"

*A bibi tasa matana i ego ne Betsaida*

<sup>22</sup> Iesu pilu e sou a disaipel sou asu sibitala na aubu e Betsaida. Me sou maasi a bibi tasa matana i ego. Me sou vei le Iesu ni tau a limana na bibi iedo.

<sup>23</sup> Me Iesu ei lapitole a limana bibi mata ego do, mei maasi ei usala na aubu. Me ei apiso usino na matane ei, mei tau a limana muata ne ei, mei tagi e ei maido, "Oo ite a golu tasa, ue boa?"

<sup>24</sup> Ma bibi iedo ei gegemu mei vei maido, "Eau ite a vanua sanii, moni eau ite sou tomana obu sou asuasu."

<sup>25</sup> Me Iesu ei tau lei a limana na matane ei. Ma bibi iedo ei gegemu sagali, ma matane ei i palea kubaana, mei ite a golugolu vuso i palea muada.

<sup>26</sup> Me Iesu ei peltase ei usino na luma minei, mei vei, "Oo ma asuasu lou ulilo na aubu."

*Pita ei adepalea e Iesu ei e sei*

*(Mat 16:13-20; Luk 9:18-21)*

<sup>27</sup> Iesu ei ilisi pilu e sou a disaipel minei, me sou asu usino na aububuna ino agavuale a aubu buobuo e Sisaria Pilipai. Na vea ei tagi e sou a disaipel minei maido, "Vanunua ma tavivine sou vei ve eau e sei ivu?"

<sup>28</sup> Me sou vei lei maido, "Sanii sou vei ve oo Ioanes a bibi na maavuvutuna. Me sanii sou vei, oo e Elaiia. Me sanii sou vei ve oo a profet tasa."

<sup>29</sup> Me Iesu tagi e sou maido, "Me amutou oto amutou vei ve eau e sei?" Me Pita ei sie a inadene ei maido, "Oo Krai."

<sup>30</sup> Me Iesu ei magilisobe sou ne sou ma veivei lei ana bibi tasa ve ei e sei ivu.

*Iesu ei vei ve ei ni mate mei ni ilisiliu*

*(Mat 16:21-28; Luk 9:22-27)*

<sup>31</sup> De Iesu ei soke a matetengine sou a disaipel maido, "Natuna Bibi ei ni tabule a mavaana papaina, me sou a mapana me sou a munugana prist me sou a vanua na muadana binea ne sou lametase me ne sou valiputemate ei. Tauluna malada tolu ei ni ilisiliu."

<sup>32</sup> Ei veimuade pale sele a inade iedo usino ne sou. Me Pita ei guale Iesu usino na aliali mei soke a sinoana ane ei.

<sup>33</sup> Me Iesu ei sauvule mei gegemuale sou a disaipel minei, mei adevili ane Pita maido, “Satan, oo avulo! Asu mamuli na taulugu! Oo ma ogomuli ete a damutatalana mine Salemo, oo ogomuli a damutatalana mina vanunua moni.”

<sup>34</sup> Me Iesu ei toleale a vanunua ma tavivine usinani minei pilu a disaipel minei. Mei vei le sou maido, “Mane a bibi tasa ei kale ni ogomuli e eau, de a masagana minei oto ni matano moni, mei ni tabule a tauvaleuti minei mei ni ogomuli e eau.

<sup>35</sup> Mane a bibi tasa ei kale ni sautole obi a maulina minei oto, maulina minei ni buale. Moni mane a bibi tasa ei damutale eau ma malongolongona kubaana minau, mei iabitase a maulina minei, de maulina minei ni muina kubaana.

<sup>36</sup> Mane a bibi tasa ei guale a golugolu vuso mina magamaga, moni a maulina minei oto ni buale, de a golugolu vuso do ei ni buloi e ei matina?

<sup>37</sup> A bibi ni bilii a sei mapa mina oliliualena maulina minei?

<sup>38</sup> Me mane a bibi tasa ei maela e eau ma inadegu na malada seidei sou lametase e Salemo me sou goli a matamatana sinusu pagu, de mulimuli na ilala Natuna Bibi pilu e sou a bineanea maolo sou asu usinani pilu a aisa buo mine Tamana, ei ni maela tamai a bibi iedo.”

## 9

<sup>1</sup> Me Iesu ei vei le sou maido, “Eau vei patotona ane amutou, vanunua sanii sou eili saboa so mate, ne sou ite a niitealalena mine Salemo ni palea pilu a sagagalina taula minei.”

*Vovone Iesu ei sauvule mei palea sea  
(Mat 17:1-13; Luk 9:28-36)*

<sup>2</sup> Malada pantasa i pulosi, Iesu ei guale e Pita me Iemus me Ioanes, mei maasi e sou usino na loena tasa oata oto sele, me sou moni ino. Na ilala sou saboa ino sou gemugemu, vovone Iesu ei sauvule mei palea sea.

<sup>3</sup> Kinainai minei ei palea tomana muada mei kea sele. A bibi tasa mina magamaga i ma mapigogoi ete ni goli a kinainai ni palea kea maido.

<sup>4</sup> Me Elaiia pilu e Moses sulu sibitala, me sulu ade pilupilu e Iesu.

<sup>5</sup> Pita ei vei le Iesu maido, “Magiligilina, ei kubaana neitou muine eitou sina. Ne amiteu tige a bale na malolovina tolu, tasa minio, tasa mine Moses, me tasa mine Elaiia.”

<sup>6</sup> Pita ei ma muada oto i ve ei goli sei inade, vuna sou lae sele.

<sup>7</sup> De a ausa tasa i palea mei avisobe sou. Ma tinola tasa lilona ausa do ei vei maido, “Iede ei e Natugu, eau kale mamai sele ei. Amutou longemuli a inadena.”

<sup>8</sup> Ma tabaa oto sou a disaipel sou gegemu maisaba, me sou ma ite ete lei a bibi tasa. Iesu vululu moni ino pilu e sou.

<sup>9</sup> De sou ilisitase a loena me sou sivo utano, me Iesu ei vei le sou maido, “Golu amutou ite do amutou ma veivei lei ana bibi tasa pea na malada Natuna Bibi ei ni ilisiliu na muina minate.”

<sup>10</sup> Me sou somitole obi a inade do, me sou adeade balivua mine sou oto maido, “A inade li mina ilisiliuna muina minate, ei a sei golu?”

<sup>11</sup> Me sou tagi e Iesu maido, “Posa matina sou a vanua na muadana binea sou veivei ve Elaiia ei ni asu pala usinani?”

<sup>12</sup> Iesu ei sie a inade ne sou maido, “Inade iede ei moliana. Elaiia ni veteliu pala usinani mei ni toebilelesi liu a golugolu vuso. Moni posa matina a inade iede ino na Laulau mine Salemo, ei ade e Natuna Bibi ei ni tabule a mavaana papai, ma vanunua ne sou adepintola ane ei?”

<sup>13</sup> Moni eau vei le amutou maido, Elaiia ei eliosio. Moni vanua sou ogomuli a masagana mine sou oto me sou goli a matamatana inigogona pagu usino ne ei, tomane a inade ino na Laulau mine Salemo.”

*Bibaini tasa ei isa a nunu pagu  
(Mat 17:14-21; Luk 9:37-43)*

<sup>14</sup> Iesu pilu a disaipel tao tolu sou veteliuale sou a disaipel sanii odo, me sou ite a abuna vanunua ma tavivine taula sou magili sailli e sou. Me sou a vanua na muadana binea sanii sou maubi a inade pilu e sou.

<sup>15</sup> Vanunua ma tavivine vuso do sou ite Iesu i asu maino, me sou saga sele. Sou vele usino ne ei, me sou vate oaso kubaana usino ne ei.

<sup>16</sup> Me Iesu ei tagi e sou maido, “Amutou maisaukiki a inade pilu e sou a sava?”

<sup>17</sup> Ma bibi tasa balivua mina abuna vanunua ma tavivine do ei sie a inade ne Iesu maido, “Magiligilina, natugu a bibi ie ei isa a nunu pagu tasa i valitole ei me ei ma ade oto, me eau maasi ei usinani minio.

<sup>18</sup> Taliulu a nunu pagu odolo ei sautole sagali ei, mei langelange ei utano na magamaga. Ma palapalana i palea na asene ei, me ei alatola gado, ma vovone ei utoto sele. Me eau kake e sou a disaipel minio ne sou taulele a nunu pagu iede, moni sou ma mapigogoi ete.”

<sup>19</sup> Iesu ei longe a inade iedo, mei vei le sou maido, “Amutou a vanunua na silimulina boa. Mavisa eau ugupiluosi e amutou?”

Mavisa lou eau na tabule a mavaana mine amutou? Maasi a bibaini iede usinani.”

<sup>20</sup> Me sou maasi a bibaini iedo usino ne ei. Nunu pagu odo ei ite e Iesu, ma tabaa oto ei iune gegeli sele a bibaini iedo, ma bibaini i bosa utano na magamaga, mei vuvule maisabasaba, ma palapalana i palea na asena.

<sup>21</sup> Me Iesu ei tagi e tamana bibaini iedo maido, “Malada visa ei muina moni maido?” Me tamana i vei, “Ei soke mina malada ei saboa alabaini.

<sup>22</sup> Malada papai a nunu pagu iedo ei lange ei utano na oavi ma nanu, mei kale ni valipute ei ni mate. Moni mane oo mapigogoi, de oo no lilomuli e amiteu mo no buloi e amiteu.”

<sup>23</sup> Me Iesu ei vei lei maido, “Vuna i matina oo vei, ‘Mane oo mapigogoi?’ Mane sei bibi ei silimuli, ei mapigogoi ni goli a golugolu vuso.”

<sup>24</sup> Ma tabaa oto tamana bibaini iedo ei tola maido, “Eau silimuli, moni a silimulina minau i boto, no buloi e eau.”

<sup>25</sup> Iesu ei ite a abuna vanunua ma tavivine sou vele usinani agavuale sou, mei sinoa ana nunu pagu iedo maido, “Oo nununa asebuuna ma tagilasobona, eau vei lio, oo no asutase a bibaini iede. Oo no ma galigali asa ulilo minei.”

<sup>26</sup> Ma nunu pagu iedo ei ngala mamau, mei iune mamai a bibaini lou, mei veletase ei usinosi. Ma bibaini iedo ei lagu tomane ei matesi. Vanunua papaina sou ite me sou vei, “Ei matesi.”

<sup>27</sup> Moni e Iesu ei lapitole a limana mei mailisi ei, me ei magili.

<sup>28</sup> Mulimuli e Iesu ei asu usino na luma, me sou a disaipel moni ino me sou tagi e ei maido, “Posa matina amiteu ma mapigogoi ete ne amiteu taulele a nunu pagu iede?”

<sup>29</sup> Me ei vei le sou, “Kinaka moni ei mapigogoi ni taulele a matana nunu pagu iede. A vea tasa lou boasi.”

*Maluana inade Iesu ei vei ei ni mate mei ni ilisiliu lou*

(Mat 17:22-23; Luk 9:43-45)

<sup>30</sup> Iesu pilu e sou a disaipel sou ilisitase a avena odo me sou asu usino balivua ne Galili. Me Iesu ei ma kale ete na bibi tasa ni muada ve ei ino,

<sup>31</sup> vuna ei pipigo a matetengine sou a disaipel minei. Ei vei le sou maido, “Ne sou tau e Natuna Bibi na limane sou a vanunua, me ne sou valipute ei ni mate. De mina malada tolu ei ni ilisiliu.”

<sup>32</sup> Moni sou ma muada oto a vuna inade iedo me sou lae a tinagine ei.

*Sei ei a munugana?*

(Mat 18:1-5; Luk 9:46-48)

<sup>33</sup> Sou sibitala ne Kapenaum. Sou galiosu ulilo na luma, me Iesu i tagi e sou a disaipel maido, “Na vea amutou maiademulimuli a sava?”

<sup>34</sup> Moni sou vale moni, vuna maido na vea sou maivovolomuli i sei ei ni muga ane sou.

<sup>35</sup> Me Iesu ei ugu, mei toleale sou a disaipel minei savulu tasa timana lua usino ne ei. Mei vei le sou maido, “Mane a bibi tasa ei kale ni muga, de ei ni mulisobo oto sele, tomane a bibi na pipigona mina buloine sou a vanunua vuso.”

<sup>36</sup> Me ei guale a bibaini tasa mei mamagili ei balivua ne sou. Me Iesu ei sautole a bibaini mei vei le sou a disaipel maido,

<sup>37</sup> “Sei bibi ei damutaletale eau mei buloi a bibaini tasa tomane a bibaini ieli, ei buloi eau. Ma bibi ei buloi eau, ei ma buloi moni ete eau. Boa. Ei buloi e Euma, ei peltase eau usinani.”

*Bibi ei ma butuale ete eitou, ei e tamaine eitou*

(Luk 9:49-50)

<sup>38</sup> Ioanes ei vei le Iesu maido, “Magiligilina, amiteu ite a bibi tasa ei pipigo a taulelana nunu pagu na aisane oo. Moni ei ma ogomuli ete eitou. Maido me amiteu magilisobesi ei.”

<sup>39</sup> Me Iesu ei vei le ei, “Amutou ma magilisobesobe lei ei. Mane a bibi tasa ei goli a gona sinaga na aisane eau, ei ni ma mapigogoi ete ni adegegeli e eau na ilala do.

<sup>40</sup> Bibi ei ma butuale ete eitou ei e tamaine eitou.

<sup>41</sup> Mane a bibi tasa ei ite amutou mei damutale, ‘Eau kale na buloi e sou a abuna vanunua mine Krais,’ me ei billi a taogo na nanu usino ne amutou, de eau vei ivu ane amutou, mapa na bibi iedo ei ma mapigogoi ete ni buale.”

*Inigogona pagu ei toegegeligeli a silimulina*

(Mat 18:6-9; Luk 17:1-2)

<sup>42</sup> Iesu ei vei lou maido, “Mane a bibi tasa ei ni toebose tasa mine sou e selebanini sou silimuli eau na inigogona sinusu, de puiale sele ne sou a vanua ne sou papale a vatu taula tasa na loona bibi iedo, me ne sou lange ei utano na dasi mei ni mate.

<sup>43-44</sup> Mane a limamu ei lapuale oo mina gunolina sinusu, de oo no valiuti mo pitase. Puiale oo no isa a limamu tasa moni me no guale a maulina muina taliuliu. Dae oo no isa a limamu lua me ne sou lange oo usino na avena davutina taliuliu, a oavi ei ma matemate oto.

<sup>45-46</sup> Mane a ubumu ei lapuale oo usino na inigogona sinusu, de oo valiuti mo pitase. Puiale oo no isa a ubumu tasa moni mo no guale a maulina muina taliuliu. Dae oo no

isa a ubumu lua me ne sou pitase oo usino na avena oavi ma davutina taliulu.

<sup>47</sup> Mane a matamu ei lapuale oo usino na inigogona sinusu, de oo no osetase a matamu mo pitase usino. Kubaana oo no isa a matamu tasa moni, me oo no gali ulilo na niitealalena mine Salemo. Dae oo no isa a matamu lua me ne sou lange oo usino na avena davutina.

<sup>48</sup> Na avena do

‘A pasepase banini ne sou ma mate oto.

Ma oavi tamai ni ma mate oto.’

<sup>49</sup> Sou vuso ne sou iagegelo a oavi.

<sup>50</sup> “Masi ei a golu kubaana, moni mane a minasina masi ei pulu, ne amutou mapigogoi ne mu goli a sava na masi iedo ei ni palea masi lou? Masi ei goli a inani ma golugolu vuso ni kubaana, tomane moni ne amutou palea tomane a masi doana ei mapale a niugugu kubaana balivua ne tamamaine amutou.”

## 10

*Iesu ei ade a valiutina taulaina*  
(Mat 19:1-12; Luk 16:18)

<sup>1</sup> Iesu ei asutase a avena iedo, mei asu usino ne Iudia me na avena ne Iordan maino. Vanunua ma tavivine papaina sou asu sou viepilu lou pilu e ei. Me Iesu ei ogomuli a inigogona minei, mei matetengi e sou a inade mine Salemo.

<sup>2</sup> Me sou e Parisi sou asu usino ne Iesu, me sou kale ne sou tove ei. Sou tagi e ei maido, “Binea ne eitou ei puiale na bibi ni taulele susuna, ue boa?”

<sup>3</sup> Iesu ei sie a inade ne sou maido, “Moses i bilii e sei binea usino ne amutou?”

<sup>4</sup> Sou vei, “Moses ei longo a bibi ni niage a laulau mina valiutina taulaina mei taulele ei.”\*

<sup>5</sup> Moni e Iesu ei vei le sou maido, “Amutou a vanua na toevautautana, maido me Moses ei niage a binea li mei bilii e amutou.

<sup>6</sup> Longe. ‘Lisa otosi, ilala Salemo i goli a golugolu vuso, ei mapale a bibi na tavine.†

<sup>7</sup> Maido ma bibi ei asutase tamana me tinana, mei ugu pilu e susuna,‡

<sup>8</sup> me sulu palea tomane a vovo tasa moni.’ Salemo ei vei maido ne sulu ma ugu oto tomane tao lua lou. Sulu palea tomane a vovo tasa moni.

<sup>9</sup> Maido ma golu e Salemo ei papalesi, bibi tasa ni ma valiuti ete lei.”

<sup>10</sup> Mulimuli e Iesu pilu e sou a disaipel minei sou veteliu usino na luma, me sou a disaipel sou tagi lei e ei a inade mina valiutina taulaina iedo.

<sup>11</sup> Me ei vei le sou maido, “Mane a bibi tasa ei taulele susuna mei tavui lei a tavine tasa,

bibi iedo ei goli a sinusu ne susuna, mei goli a inigogona susulolona.

<sup>12</sup> Mane a tavine tasa ei veletase suana mei tavui lei a bibi tasa, tavine iedo ei goli a inigogona sualolona.”

*Iesu ei vei ne sou litase selebanini usino ne ei*

(Mat 19:13-15; Luk 18:15-17)

<sup>13</sup> Sou a vanunua ma tavivine sou maasi e selebanini usino ne Iesu. Sou kale ei ni tau a limana muata ne sou. Moni sou a disaipel sou ite, me sou sinoa ane sou a vanunua ma tavivine.

<sup>14</sup> Moni Iesu ei ite maido, ma lilona i ma puiale ete. Ei vei le sou a disaipel maido, “Amutou litase selebanini usinani minau. Amutou ma matilelei lei e sou. Umana! Niitealalena mine Salemo ei mine sou a matana vanunua tomane selebanini ie.

<sup>15</sup> Eau vei patotona le amutou, mane a bibi tasa ei ma guale ete a niitealalena mine Salemo tomane sou selebanini sou guale ie, ei ma mapigogoi ete ni gali ulilo. Boa vuso sele!”

<sup>16</sup> Me ei goe selebanini mei tau a limana muata mine sou mei kake Salemo ni maibalave sou.

*Bibi na vuvutina ei ade pilu e Iesu*  
(Mat 19:16-30; Luk 18:18-30)

<sup>17</sup> Na ilala Iesu ei asuasu, a bibi tasa i vele maino mei totopatulu ane ei mei tagi e ei maido, “Magiligilina kubaana, eau na goli a sava me na guale a maulina i kubaana taliulu taliulu?”

<sup>18</sup> Iesu ei vei lei maido, “Vuna i matina oo vate eau eau kubaana? Salemo tasa moni ei kubaana.

<sup>19</sup> O muadasi i a inadenade mina binea. ‘Amutou ma valiputepute lei e sou a vanunua ma tavivine. Amutou ma goligoli lei a inigogona sualolona. Amutou ma paaliali lou. Amutou ma aualala lou me ma vavasa sabububu lou ane sou a vanunua ma tavivine sanii. Amutou ma toesabububi lei a gualena golugolu mine tasa. Amutou ne mu taupui e amutou matano ne tamane amutou me tinane amutou, me mu longemuli moni a inade ne sou.’”

<sup>20</sup> Ma bibi iodo ei vei le Iesu maido, “Magiligilina, ilala eau saboa alabaini asu mapigogoi seidei, eau ogomulimuli a binea vuso iede.”

<sup>21</sup> Iesu ei gemuale ei mei kale mamai sele ei. Me Iesu ei vei lei maido, “Oo saboa boto a golu tasa. Oo asu mo no sosove a golugolu vuso minio, ma vatu oo guale iedo oo no bilii e sou a kapelabe. Oo no goli maido, mo no

\* 10:4 Binea 24:1 † 10:6 Sinokona 1:27 ‡ 10:7 Sinokona 2:24

isa a golugolu kubaana sele ino mina langi. Me oo vele ogomuli e eau.”

<sup>22</sup> A bibi iedo ei longe a inade do, ma laguna i lagumasimasi, ma liloni i mavaa, mei asu, vuna ei isa a golugolu makuba sele.

<sup>23</sup> Me Iesu ei gegemuale sou a disaipel minei mei vei, “Sou a vanua sou isa a golugolu makuba ei ni sana sele ane sou a ginalina ulilo mina niitealalena mine Salemo.”

<sup>24</sup> Me sou a disaipel minei sou saga sele a inadene ei. Moni Iesu ei vei le sou lou maido, “Natatugu, ei sana sele ane sou a vanua ne sou gali ulilo na niitealalena mine Salemo.

<sup>25</sup> Ei sana sele tamai a kamel ni gali ulilo na salu na sasaina, moni ei sana mamau lou ana bibina vuvutina i gali ulilo na niitealalena mine Salemo.”

<sup>26</sup> De sou a disaipel minei sou saga mamau sele, me sou adeade balivua ne sou oto maido, “Mane maido, sei mapigogoi ni guale a maulina i kubaana taliuliu?”

<sup>27</sup> Me Iesu ei gemuale bilesi e sou mei vei, “Vanua oto sou ma mapigogoi ete, moni Salemo ei mapigogoi ni goli a golugolu vuso.”

<sup>28</sup> Me Pita ei goli a inade tasa usino ne Iesu maido, “Oite. Amiteu veletase a golugolu vuso me amiteu ogomuli e oo.”

<sup>29</sup> Me Iesu ei vei, “Eau vei patotona ane amutou, vanunua vuso sou damutale eau ma malongolonga kubaana, me sou iaveatase a luma ue tuatuaana me tatasina ue latavivina ue tinana me tamana ue natuna ue a mauma,

<sup>30</sup> ne sou guale lei a golugolu vuso i masavulu sobo tasa. Me ilala sou saboa eili na magamaga Salemo ei ni bilii e sou a lumaluma makuba me tuatuaana me tatasina makuba me latavivine makuba me tinatinana makuba me natatuna makuba ma mauma makuba. Me tamai, a vanunua sanii ne sou goli a inigogona mamau usino ne sou. Mulimuli sou ne sou guale a maulina i kubaana taliuliu.

<sup>31</sup> Moni a vanunua papaina seidei sou muga, ne sou mulisobo sele. Ma vanunua papaina seidei sou mulisobo sele, ne sou muga.”

*Matolunai Iesu ei vei ei ni mate  
(Mat 20:17-19; Luk 18:31-34)*

<sup>32</sup> Iesu pilu e sou a disaipel minei sou asu na vea me sou kale ne sou asu usino ne Ierusalem. Iesu ei muga pala ane sou. Me sou a disaipel minei sou damutatata papai me sou a vanunua ma tavivine sou ogomuli e sou, sou lae. Iesu ei guale lou a disaipel savulu tasa timana lua, mei soke a vinei ane sou a golugolu ni palea le ei.

<sup>33</sup> Ei vei maido, “Mu longe. Seidei neitou asu usino ne Ierusalem, me ne sou bilii e Natuna Bibi usino na limane sou a mapana prist me sou a vanua na muadana binea. Me ne sou vavasa ane ei, me ne sou maiveimuli a inade mina valiputene ei. Me ne sou bilii e ei usino ne sou a abuna vanua sea.

<sup>34</sup> Me sou a vanunua dolo ne sou adepin-tola ana, me ne sou apisosoli ei, me ne sou umamasi e ei, me ne sou valipute ei. Me na malada tolu ei ni ilisiliu lou.”

*Iemus me Ioanes su kale ne su muga  
(Mat 20:20-28)*

<sup>35</sup> De Iemus me Ioanes, sulu e natatune Sebedi, su asuale Iesu me sulu vei lei maido, “Magiligilina, amilu kale nami tagi e oo a golu tasa, amilu kale no goli a golu iede usinani ne amilu.”

<sup>36</sup> Me ei tagi e sulu maido, “Amulu kale na goli a sava usino ne amulu?”

<sup>37</sup> Sulu vei lei, “Malada oo palea a mapanasi, amilu kale ne amilu tasa ni ugu mina limamu e gata, me tasa ni ugu na limamu e meli.”

<sup>38</sup> Moni Iesu ei vei le sulu maido, “Amulu ma muada kuba oto a golu amu tagi e eau. Nane amulu mapigogoi namu inu a taogo li seidei eau na ini. Amulu mapigogoi namu guale a maavuvutuna seidei eau na guale li?”

<sup>39</sup> Me sulu vei lei maido, “Amilu mapigogoi.” Iesu ei vei le sulu maido, “Ivu, a taogo na nanu ieli seidei eau na ini i, iede amulu tamai ne mu ini i. Ma maavuvutuna seidei eau na guale, ieli ne amulu tamai ne mu guale.

<sup>40</sup> Moni sei ni ugu na limagu e gata me sei ni ugu na limagu e meli, ielili a golu minau boa. Niuguguna sou ieli, iede mine sou a vanunua ma tavivine Salemo ei masusuliosii ane sou.”

<sup>41</sup> Ilala sou a disaipel savulu tasa sou longe a inade mina golu e Iemus me Ioanes sulu tagi e Iesu, sou sinoa ane sulu.

<sup>42</sup> Moni Iesu ei toleale sou usino ne ei, mei vei le sou maido, “Amutou muada i, sou a vanua sou ugu tomane sou a mapana, sou iteale sele a abuna mine sou sea. Me a vanunua buobuo mine sou so ade sagali sele ane sou a vanunua ma tavivine ne sou ogomuli a inade ne sou.

<sup>43</sup> Moni a inigogona do ei ni ma palea oto balivua mine amutou. Boa. A bibi ei kale ni bibi buo balivua ne amutou, ei ni muina a bibi na pipigona mine amutou.

<sup>44</sup> Mane a bibi ei kale ni muga ane amutou, ei ni a bibi na pipigona sabubu mina vanunua vuso.

<sup>45</sup> Natuna Bibi tamai ei ma asu oto usinani ne sou goli a pipigona buloine ei. Boa. Ei asu

usinani mina buloine sou, me mina biliina mauline ei oto mina olialeliuna vanunua ma tavivine papaina.”

*Iesu ei toekube a bibi tasa matana i ego  
(Mat 20:29-34; Luk 18:35-43)*

<sup>46</sup> Iesu pilu e sou a disaipel minei sou divi na aubu buobuo e Ieriko. Me Iesu ei ilisitase lou e Ieriko mei asu usino, sou a disaipel minei pilu a abuna vanunua ma tavivine taula, sou asu pilu e ei. Na ilala do Batimeus, matana i ego, natune Timeus, ei ugu na aana vea mei kakaka a vatu ue sei golu ne sou a vanunua ma tavivine.

<sup>47</sup> Ei longe a inade e Iesu mine Nasaret ei asu maino, me ei soke a tinolana sagali maido, “Iesu, o Natune Devit, oo no lilomuli e eau.”

<sup>48</sup> Vanunua papaina sou sinoa ana me sou vei lei maido, “Oo ma adeade lou.” Moni ei tola mamau sele lou maido, “Natune Devit, oo no lilomuli eau.”

<sup>49</sup> Me Iesu ei magili mei vei, “Toleale ei usinani.” Me sou toleale a bibi a matana i ego do, me sou vei lei maido, “Atemu ma pansaesae lou. Oo ilisi. Ei toleale oo.”

<sup>50</sup> Seido ei pitase a kinainai minei mei magili asi, mei asu usino ne Iesu.

<sup>51</sup> Me Iesu ei tagi e ei maido, “Oo kale eau na toematinei e oo?” Ma bibi matana ego do ei vei lei maido, “Magiligilina, eau kale na gemu.”

<sup>52</sup> Me Iesu ei vei lei, “Oo asu. A silimulina minio ei toekube oo mo kuba.” Ma tabaa oto a matane ei kuba mei gemu. Mei ogomuli e Iesu na vea.

## 11

*Iesu ei gali ulilo ne Ierusalem tomane a mapana*

*(Mat 21:1-11; Luk 19:28-40; Ioa 12:12-19)*

<sup>1</sup> Iesu pilu e sou a disaipel minei sou agavualesi e Ierusalem, me sou divi ne Betpage me Betani mina loena e Oliv. Me Iesu ei peltase a disaipel lua,

<sup>2</sup> mei vei le sulu maido, “Amulu asu usino na aubu seidei eitou iteite do. Amulu asu usino na aubu odo, me ne amulu ite a donki alaba tasa sou papaletole, a bibi tasa ei saboa ugu i. Lube a mota me mu guale usinani.

<sup>3</sup> Mane a bibi tasa ei tagi e amulu, ‘Posa matina amulu guale a donki usino?’ Ne amulu adeliu a inade maido, ‘Bibi Taula, ei isa a pipigona a donki ie, maido me ei ni iabi liu usinani.’”

<sup>4</sup> De sulu asu, me sulu ite a donki alaba tasa ei magiligili na vea, sou papalesi a donki iedo agavi na tema na luma tasa. De sulu lubetase a mota.

<sup>5</sup> Ma vanua sou magili agavi sou tagi e sulu maido, “Amulu kale ne mu goli a sava me mu lubetase a donki ie?”

<sup>6</sup> Me sulu malii a inade tomane Iesu ei veiosi le sulu. Me sou longo ane sulu a gualena donki usino.

<sup>7</sup> Seido sulu guale a donki usino ne Iesu. Me sulu tau a kinainai mine sulu muata ne ei, me Iesu ei ugu i.

<sup>8</sup> Ma vanunua makuba sele sou taulele a kinainai mine sou me sou oave na vea. Me sanii sou asu usino na mauma me sou valiuti a lala na obuobu me sou tau na vea.

<sup>9</sup> Ma vanunua ma tavivine sou asu muge-muge e Iesu me sanii sou asu mamuli ne Iesu, me sou tola maido,

“Hosanna! Maibalave a bibi ieli ei asu usinani na aisane Bibi Taula.

<sup>10</sup> Salemo ei ni maibalave a Mapana iede, ei a mapana i asu maino na avena mine tubune eitou e Devit.

Beilange a aisane Salemo i oata oto sele.”

<sup>11</sup> Me Iesu ei sibitala ne Ierusalem, mei gali ulilo na luma mine Salemo, mei gegemumuliale a golugolu vuso. Moni mata vililiosii, maido me ei veteliu usino ne Betani pilu e sou a disaipel minei savulu tasa timana lua.

*Obu a fik ei ni ma vuavua lou  
(Mat 21:18-19)*

<sup>12</sup> Maisavulo sou ilisitase e Betani me sou asu bisii sapa lou, me Iesu ei vitolo.

<sup>13</sup> Ei ite a obu a fik tasa i magili bulago sapa ma laulauna i makuba. Maido me ei asu agavuale a obu ve ni gemu a vuavuaana sanii, moni ei ma ite ete a vuana tasa. A laulauna moni ino, vuna a ilala ni vua i saboa.

<sup>14</sup> Me Iesu ei vei ana obu a fik odo maido, “O no ma vuavua asa ana vanunua ne sou ani oo.” Me sou a disaipel minei sou longe a inade iedo.

*Iesu ei toemaole a luma mine Salemo  
(Mat 21:12-17; Luk 19:45-48; Ioa 2:13-22)*

<sup>15</sup> Iesu pilu e sou a disaipel sou asu me sou divi ne Ierusalem. Me Iesu ei gali ulilo na luma mine Salemo mei soke a votetasene sou a vanunua sou pipigo a gualena vatu mina luma do. Ei sauvule a poso mine sou a vanunua sou pipigo a maiadevusena vatu, pilu a niugugu mine sou a vanunua sou pipigo a gualena vatu na manu a kua.

<sup>16</sup> Me ei tau a melalobo ne sou ma tabule ete a golugolu mina masosovena usino usinani lilo na luma mine Salemo.

<sup>17</sup> Mei vei le sou maido, “Laulau mine Salemo ei isa a inade maido, ‘Luma minau ei a luma mine sou a vanunua ma tavivine mina aveavena vuso ne sou asu usinani ne sou kaka agu.’ Moni amutou goli ei palea



tomane a muina unovu mine sou a vanua na paaalina.”\*

<sup>18</sup> Sou a munuganuga mina prist pilu e sou a vanua na muadana binea sou longe a inade do, me sou soke a punogena vea mina valiputene Iesu. A vuna, sou a vanunua ma tavivine sou saga mamau a inade Iesu ei langelange, maido me sou lae e ei.

<sup>19</sup> Me na mataviliolio Iesu pilu e sou a disaipel minei sou ilisitase e Ierusalem me sou asu.

*Obu a fik ei malaios  
(Mat 21:20-22)*

<sup>20</sup> Na autupola siisii Iesu pilu e sou a disaipel sou asu usino, me sou ite a obu a fik ei magoluosi. A laulauna pilu a aana sou vuso so malaios.

<sup>21</sup> Me Pita ei damutale a golu e Iesu ei goli, me ei vei, “Magiligilina, oite. Lavi o ade ana obu a fik ei ni mamau, me seidei ei magoluosi.”

<sup>22</sup> Me Iesu ei adeliu ane sou maido, “Amutou silimuli e Salemo.

<sup>23</sup> Mane a bibi tasa ei vei ana loena iodo maido, ‘Oo ilisi, mo seu utano na dasi,’ me a bibi iedo ei ma isa oto a damutatalana lua mei silimuli sele a golu odo ni palea tomene ei vei, de eau vei bilesi le amutou, a golu iedo ei ni palea tomene ei vei.

<sup>24</sup> Maido me mane amutou kaka mina gualena golu tasa me amutou silimuli sele maido, ne amutou guale a golu odo, de eau vei le amutou, a golu iedo ei ni palea tomene amutou silimuli.

<sup>25-26</sup> Ilala amutou magili me mu goli a kinaka, me amutou damutale a sinusu bibi tasa ei goli le amutou, de amutou danivuse-tase a sinusu mina bibi iedo. Maidolo me Tamane amutou oata na langi ei ni lilotase a sinusu mine amutou.”

*Sou tagi e Iesu sei bilii e ei a aisa buo  
(Mat 21:23-27; Luk 20:1-8)*

<sup>27</sup> Iesu pilu e sou a disaipel sou sibitala lou ne Ierusalem. Me Iesu ei asu ulilo na luma mine Salemo, me sou a prist pilu e sou a vanua na muadana binea me sou a vanua buobuo sou asuale ei.

<sup>28</sup> Me sou tagi e ei maido, “Oo guale a aisa buo ma sagagalina iva, me oo goli a golugolu iede? Sei bilii e oo a sagagalina iede mei vei lio no goli a pipigona iede?”

<sup>29</sup> Me Iesu ei vei le sou maido, “Eau tamai eau kale na tagi e amutou a golu tasa. Mane amutou sie bilesi a tinagu minau, de eau na vei le amutou e sei ei bilii e eau a sagagalina mina gunolina pipigona ie.

<sup>30</sup> Mina malada e Ioanes ei maavuvuti e sou a vanunua, amutou damu i iedele a golu

mina langi, ue ei a golu mina vanua moni? Amutou vei le eau.”

<sup>31</sup> De sou maiademuli i lilone sou oto maido, “Mane eitou vei, ‘Ei a golu mina langi,’ ei ni vei, ‘De posa matina amutou ma silimuli ete ei?’

<sup>32</sup> Moni mane eitou vei, ‘Ei a golu mina vanua moni,’ ma inade ieli tamai ei ma mapigogoi etc.” Sou vei maido, vuna sou lae a vanunua ma tavivine. Sou a vanunua ma tavivine sou damu ve Ioanes ei a profet ivu mine Salemo.

<sup>33</sup> Maido me sou sie a inade ne Iesu maido, “Amiteu ma muada oto i.” Me Iesu ei vei le sou maido, “Eau tamai eau na ma vei ete le amutou e sei bilii e eau a sagagalina me eau goli a pipigona ie.”

## 12

*Adetinovona mine sou a vanua na pipigona mina mauma na vain*

*(Mat 21:33-46; Luk 20:9-19)*

<sup>1</sup> Iesu ei vei a adetinovona sanii usino ne sou e Iuda. Ei vei maido, “A bibi tasa ei totoe a mauma na vain tasa, mei tau a bigomu, mei pesi a aova tomana taogo sou soetotole me sou bebebe i a vuavua na vain, mei tige a luma mine sou a vanua na itealena mauma. Me ei tau a mauma iedo na limana vanua sanii sou kale ne sou pipigo a gualena vatu. Mulimuli odo ei asu usino na avena tasa i bulago.

<sup>2</sup> Na ilala a obu a vain sou matuasi, ei peltase a bibi na pipigona tasa usino ne sou a vanua sou pipigo mina mauma na vain. Ei kale ve ne sou bilii e ei a gona inani sanii mina mauma iedo.

<sup>3</sup> Moni sou a vanua sou pipigo mina mauma sou saavi a bibi na pipigona do me sou ubi gegeli sele ei, me sou peltase sabubi moni ei usino.

<sup>4</sup> Ma tamana mauma ei peltase lei a bibi na pipigona tasa lou usino ne sou. Me sou valipole a letena me sou toegegeli sele ei.

<sup>5</sup> Me ei peltase lei a bibi na pipigona tasa lou. Me sou valipute a bibi na pipigona do. Me mulimuli ei peltase lei a vanua na pipigona sanii lou usino ne sou. Me sou ubi sanii me sou valipute sanii.

<sup>6</sup> “Me a bibi tasa lou ino, iede natuna, ei kale mamai sele. Moni mina punuluna sele, ei peltase e natuna iedo usino ne sou a vanunua sou pipigo mina mauma. Tamana i vei maido, ‘Ne sou tade ei me sou longemuli a inade ne natugu.’

<sup>7</sup> “Moni sou a vanua sou pipigo mina mauma do sou adeade lilo balivua mine sou oto maido, ‘A bibi ieli ei ni guale a golugolu vuso mine tamana. De neitou valipute ei, me ne eitou oto neitou sautole a mauma ie.’

\* 11:17 Aisaia 56:7; Ieremiaia 7:11

<sup>8</sup> Maidolo me sou saavi ei me sou valipute ei. Me sou lange a aitolane ei usala mina mauma.

<sup>9</sup> “De tamana mauma na vain ei ni goli a sava? Ei ni asu usinani ni valipute sou a vanua sou pipigo mina mauma iedo. Me ei ni bilii a mauma na vain iedo usino na vanunua sanii.

<sup>10</sup> Amutou ma gi ete a malibuuna inade li ino na Laulau mine Salemo, io? A inade do ei maido,

‘A vatu odo sou a vanua na gagatuna sou pitaselele, seidei ei palea a munugana vatu tasa mina masagalina inapu na luma.

<sup>11</sup> Bibi Taula, ei oto ei goli a golu ieli i palea, me ei malasa sele na matane amiteu.’”\*

<sup>12</sup> Sou kale sele ne sou lapitole e Iesu, vuna maido sou muadasi i, Iesu ei ubi a adetinovona usino ne sou moni. Moni sou lae a vanunua ma tavivine. Maido me sou ilisitase ei me sou asu.

*Ne sou iabi a vatu usino ne Sisar, ue boa? (Mat 22:15-22; Luk 20:20-26)*

<sup>13</sup> Sou a vanua buobuo sou peltase sou e Parisi sanii pilu e abuna mine Herot usino ne Iesu. Sou kale ne sou masulitase Iesu a inade sanii i ma puiale ete.

<sup>14</sup> De sou asu usinani me sou vei lei maido, “Magiligilina, amiteu muada, oo a bibi na adeptotonana. Oo ma laelae oto a bibi tasa. Oo goli a inade tasa moni usino na vanunua vuso, sou isa a aisa ue boa. Na inade patotonana moni oo matetengitengi e sou a vanunua ma tavivine mina inigogona mine Salemo. De oo damutale matina? Ei puiale ne eitou bilii a vatu usino ne Sisar, ue boa?”

<sup>15</sup> Moni Iesu ei muadasi i a aualana mine sou, me ei vei le sou maido, “Posa matina amutou tove eau? Bilii e eau a vatu tasa usinani, me eau na ite.”

<sup>16</sup> Me sou guale a vatu tasa usino ne ei. Me ei tagi e sou, “A nunu ma aisa ieli ei mine sei?” Me sou vei, “Mine Sisar.”

<sup>17</sup> Me Iesu ei vei le sou maido, “De a golu mine Sisar, bilii e Sisar, ma golu mine Salemo, bilii e Salemo.” Sou longe a inadene ei, me sou saga gegelu sele.

*Sou e Sadusi sou tagi e Iesu a ilisiliuna (Mat 22:23-33; Luk 20:27-40)*

<sup>18</sup> Seido sou e Sadusi sou asu usinani ne Iesu. Sou a abuna vanunua do sou vei ve, sou a vanunua ma tavivine sou matesi, ne sou ma mapigogoiosi ne sou ilisiliu. De sou tagi e Iesu maido,

<sup>19</sup> “Magiligilina, Moses ei niage a inade tasa usinani mine eitou maido. ‘Mane a bibi tasa ei mate, mei ma natatua oto, moni

susuna saboa ino, de tasina bibi iedo ei ni tavui a tavine do mei ni mapale a natuna, maido me abuna ne tuana ni ma pulu oto.’

<sup>20</sup> De, lisa tametatasi padilua sou ino. Matalagu ei tavui a tavine, mulimuli ei mate, moni ei ma natua oto.

<sup>21</sup> Maido me tasina ei guale lei a tavine do, moni ei tamai i mate mei ma natua oto. Me matoluna tasina ei tamai ei goli tomana inigogona tasa moni iodo.

<sup>22</sup> Tomane moni sou a tametatasina padilua iedo sou tavui a tavine do me sou ma natatua oto, me sou vuso sou mate. Me mulimuli a tavine tamai do ei mate.

<sup>23</sup> De mulimuli, malada sou a vanunua ma tavivine sou matesi me sou ilisiliu, ma tavine do ei ni susune sei bilesi? O muada, sou tametasi padilua sou guale ei, me sou muina susune sou.”

<sup>24</sup> De Iesu ei vei le sou maido, “Amutou ma muada oto a inadene ino na Laulau mine Salemo. Me amutou ma muada oto a sagagaline Salemo tamai. Maidolo me amutou goli a inade i ma puiale ete.

<sup>25</sup> Na malada sou a vanunua sou matesi, sou ilisiliu na muina minate, ne sou ma mapigogoiosi ne sou taulai. Ne sou muine sou tomane sou a bineanea mine Salemo ino na langi.

<sup>26</sup> Moni a inade mine sou a vanua sou matesi me sou ilisiliu, amutou ma gi ete a laulau mine Moses na mapamulina mina obu baini tasa i lulu, io? Mina mapamulina do Salemo i vei le Moses maido, ‘Eau e Salemo mine Abraham, me mine Aisak, me mine Iekop.’†

<sup>27</sup> Salemo ei ma Salemo oto mine sou a vanua sou matesi. Ei e Salemo mine sou a vanua sou mauili. Maidolo ma inade ne amutou ei ma patotona oto.”

*Munugana binea mine Salemo (Mat 22:34-40; Luk 10:25-28)*

<sup>28</sup> A bibi na muadana tasa mina binea ei asu usinani, mei longe sou e Sadusi sou maubi a inade pilu e Iesu. Me ei longe Iesu ei sie a inade ne sou kubaana sele. Maidolo me ei tagi e Iesu, “Sei binea ei vululusi a binea vuso mei muga sele?”

<sup>29</sup> Iesu ei sie a inadene ei maido, “A munugana binea ei maido, ‘Amutou e Israel, mu longe kube. Bibi Taula tasa moni ei e Salemo mine eitou.

<sup>30</sup> Namutou kale sele Salemo Bibi Taula mine amutou na lilone amutou vuso me na nunune amutou vuso me na damutatalane amutou vuso me na sagagaline amutou vuso.’‡

<sup>31</sup> Me maluana binea ei maido, ‘Oo no kale sou tamtamaimu tomane oo kale oo oto.’§

\* 12:11 Laulau na Inala 118:22-23 † 12:26 Gualeliuna 3:6 ‡ 12:30 Binea 6:4 § 12:31 Pipigona mina Prist 19:18

A binea tasa lou boa ei muga mei vululusi a binea lua ie.”

<sup>32</sup> De a bibi na muadana binea ei vei le Iesu maido, “Magiligilina, inademu kubaana. Ei patotona, Bibi Taula tasa moni ei e Salemo, me Salemo tasa lou boasi.

<sup>33</sup> Ne eitou kale sele ei a lilone eitou vuso, me a damutatalane eitou vuso, me a sagagaline eitou vuso. Me ne eitou kale tamtaine eitou tomane eitou kale e eitou oto. Mane eitou ogomuli a binea lua li, a inigogona ieli ei vululusi sele a niabi vuso sou tuni na oavi mei vululusi sele a matamatana niabi vuso.”

<sup>34</sup> Iesu ei longe a bibi iedo ei sie a inade tomane a bibi ei isa a muadana kubaana, me Iesu ei vei lei maido, “Oo agavualesi a nitealalena mine Salemo.” Me sou a vanunua vuso sou lae a tinagine Iesu a golu tasa lou.

*Iesu ei tagi e sou a vanunua ma tavivine e Krai*

(Mat 22:41-46; Luk 20:41-44)

<sup>35</sup> Iesu ei lilo na luma mine Salemo mei matetengi a inade usino ne sou a vanunua ma tavivine. Ei vei maido, “Posa matina sou a vanua na muadana binea sou vei maido, Krai, ei e natune Devit?”

<sup>36</sup> Maolona Nunu ei bilii e Devit a damutatalana, me Devit oto i vei,

‘Bibi Taula ei vei ane Bibi Taula minau maido,

“Oo ugu mina limagu e gata i mapigogoi eau na tau e sou a butu minio matano na ubumu.”\*<sup>37</sup>

Devit oto ei vate a bibi iedo e Bibi Taula minei. De posa matina a bibi iedo ei e natune Devit?”

A abuna vanunua ma tavivine sou mongonge sele a nilongena inade ne Iesu.

*Amutou tilale e sou a vanua na muadana binea*

(Mat 23:1-36; Luk 20:45-47)

<sup>38</sup> Me Iesu ei matetengi e sou, mei vei maido, “Amutou tilale amutou e sou a vanua na muadana binea. Sou kale mamai sele ne sou kai a kinainai lagolago me ne sou asu usino usinani. Me sou kale mamai sele sou a vanunua ma tavivine ne sou vate oaso kubaana usino ne sou na muina viepiluna vuso.

<sup>39</sup> Me sou kale sele ne sou ugu na niugugu kubaana mina luma na kinaka mine sou e Iuda, me sou kale sele ne sou guale a munugana niugugu kubaana mina inani buo vuso.

<sup>40</sup> Me sou goletasetase sou a buasasu, me sou paaali a lumaluma mine sou. Me sou aualala a kinakana tabaa. Na malada na

vavasana ne sou guale a mavaana buo sele lou.”

*Niabi mine kapelabena buasu tasa*  
(Luk 21:1-4)

<sup>41</sup> Iesu ei ugu agavuale a taogo na vatu na luma mine Salemo. Me ei ite a vanunua ma tavivine sou tau a niabi lilona taogo. Ma vanunua na vuvutina sou tau a vatu papaina.

<sup>42</sup> Ma kapelabena buasu tasa, ei asu usinani mei tau a vatu banini lua moni.

<sup>43</sup> Me Iesu ei toleale sou a disaipel minei usinani mei vei le sou maido, “Eau vei patotona le amutou, a kapelabena buasu ieli, ei oabi a vatu i buo sele i vululusi a vatu vuso na niabi a vanunua ma tavivine sanii sou tau.

<sup>44</sup> Ma vanunua ma tavivine vuso ieli sou isa a vatu papaina, me sou lange moni a avena sanii na taogo. Moni a tavine li ei kapelabe sele, moni ei lange vuse a vatu vuso minei, maido me ei a vatu boasi mina unolina gona inani.”

## 13

*Iesu ei vei a luma mine Salemo ni mamau*  
(Mat 24:1-2; Luk 21:5-6)

<sup>1</sup> Iesu ei ilisitase a luma mine Salemo mei asu, me a disaipel minei tasa i vei lei maido, “Magiligilina, ite a malasana vatuvatu talala ma lumaluma doadoana ie!”

<sup>2</sup> Me Iesu i vei liu le ei maido, “Oo ite a lumaluma talala ieli? Ne sou ma itetase ete a vatu tasa ni muina muata mina vatu tasa. Ne sou valipopole vuse me ne sou lillii utano.”

*Matailala na punuluna malada*  
(Mat 24:3-14; Luk 21:7-19)

<sup>3</sup> Iesu ei ugu mina loena e Oliv mei ite a luma mine Salemo ino nado. Me Pita me Iemus me Ioanes me Andru sou moni sou asu usino ne ei. Me sou tagi e ei maido,

<sup>4</sup> “Oo vei le amiteu, sei malada a golugolu sou odo ni palea? Sei matailala ni palea pala, me ne amiteu muada i a golugolu sou odo bisii moni ni palea?”

<sup>5</sup> Me Iesu i adeliu usino ne sou maido, “Amutou tilale, dae a bibi tasa ni auala ane amutou.

<sup>6</sup> Vanunua papaina ne sou sibitala me ne sou vate a aisagu me ne sou vei, ‘Eau moni a bibi iedo.’ Me ne sou auala ane sou a vanunua ma tavivine makuba.

<sup>7</sup> Me na malada amutou longe a malatagumu mina maubina taula ma inade sabubu mina maubina taula i palea na avena sanii, de amutou ma sagasaga lou. A golugolu sou odo ei ni palea, moni a punuluna malada i saboa.

\* 12:36 Laulau na Inala 110:1

<sup>8</sup> Sou a vanunua mina abuna sanii ne sou mailisi a maubina ane sou a abuna vanunua seasea. Me sou a abuna vanunua mina mapana sanii ne sou mailisi a maubina ane sou a abuna mapana seasea. Na avena sanii a malugulugu ni vuli, me a vitolona taula ni palea le sou. Golugolu sou odo ei tomane a davutina i palea pala ana tavine ei kale ni vasusu.

<sup>9</sup> “Na malada iedo amutou tilale kube amutou. Me ne sou vavasa ane amutou usino na vanua na toebilelesina mine sou. Me ne sou valibili e amutou lilo na luma na viepilu ne sou. Sou ne sou tove a tinauna aisagu utano, me ne sou mamagili e amutou na lagune sou a vanua buobuo me sou a mapana. Maido me ne amutou veipale a malongolongona kubaana usino ne sou.

<sup>10</sup> Palapala a abuna vanunua vuso ne sou longe pale muge a malongolongona kubaana.

<sup>11</sup> Na malada sou papale amutou me sou maasi amutou usino na muina vavasana, amutou ma lae sabububu lou me ne mu damutale, ‘Amiteu namiteu goli e sei inade?’ A inade vuso e Salemo ni bilii e amutou na malada bilesi iedo, iede namutou veipale. Vuna maido, amutou oto ne mu ma veipale ete a inade, moni Maolona Nunu ei ni veipale.

<sup>12</sup> “Bibi ei ni vavasa ane tatasina mei ni vei le sou a vanunua ne sou valiputemate tatasina do. Me sou a tamatamana ne sou goli a inigogona tasa moni usino ne natatune sou. Me sou a natatuna ne sou butuale tamane sou me tinane sou, me ne sou vei le sou a vanua ne sou valiputemate sou.

<sup>13</sup> Ma vanunua vuso ne sou lilogegelule sele ane amutou, vuna maido, aisagu ei ino ne amutou. Moni sou a vanunua ma tavivine sou magili sagali pea na punuluna malada, Salemo ei ni mamauli e sou.

<sup>14</sup> “Amutou ne mu ite a golu pagu sele i magili na avena i maolo. Bibi ei gi a inade li, ei ni damutale kube. Na malada iedo sou a vanunua ma tavivine ino mina avena ne Iudia ne sou oava usino na loena.

<sup>15</sup> Mane a bibi ino oata na mapana na luma, ei ni ma sivo oto utano mei ni ma gali oto ulilo na luma mina gualena golugolu minei.

<sup>16</sup> Ma bibi ino na mauma, ei ni ma veteliu oto usino na luma mina gualena kinainai minei.

<sup>17</sup> Maule sou a tavivine sou tiana me sou masususi e sou a mongomongo na ilala iedo.

<sup>18</sup> Ne mu kaka, a golugolu sou odo ni ma palea oto mina ilala na maigina.

<sup>19</sup> Mina malada do a mavaana buo sele ni palea. Soke na malada e Salemo ni mapale

a golugolu vuso i asu mapigogoi seidei, a matana mavaana maido ei ma palea oto lisa. Mulumuli tamai a matana mavaana maido ni ma palea lou oto.

<sup>20</sup> “Mane Salemo ei ma taubote ete a ilala na mavaana iede, sou a vanunua ma tavivine ne sou buale. Moni ei damutaletale sou a vanunua ma tavivine ei vilealesi e sou minei oto, maidolo me ei taubote a malada iedo.

<sup>21</sup> Mina malada iedo, mane a bibi tasa ei vei le amutou, ‘Oite, Krai, ei eili ie,’ ue, ‘Oite, ei ino do,’ amutou ma silimulimuli lei a inade ne sou.

<sup>22</sup> Vanunua sanii ne sou asu usinani ne sou auala a inade maido, ‘Eau e Krai’ ue ‘Eau a profet tasa,’ me ne sou goli a gona sinaga me ne sou goli a matamatana golugolu ni palea. Patotona sele, mane sou mapigogoi, ne sou ioto ane sou a vanunua ma tavivine Salemo i vilealesi e sou minei oto tamai.

<sup>23</sup> Maido me amutou tilale. Eau veiosi le amutou a golu vuso ei ni palea.

*Mulumuli e Natuna Bibi ei ni asu usinani (Mat 24:29-31; Luk 21:25-28)*

<sup>24</sup> “Ilala a mavaana taula iedo i pulosi,

‘na malada do oaso ni lodoalo,  
ma game ei ni ma silida oto,

<sup>25</sup> me sou a mataidoio ne sou veletase a langi me ne sou pu utano,  
me sou a golugolu mina langi ni palili.’

<sup>26</sup> “Me na ilala iedo a vanunua ma tavivine ne sou ite Natuna Bibi ei ino na ausa mei asu pilu a sagagalina taula ma malasana taula minei.

<sup>27</sup> Na malada do ei ni peltase sou a bineanea minei usino, me ne sou viepili sou a vanunua ma tavivine ei vilealesi maino na aveavena vuso me na sinuana magamaga pilu a langi.

*Amutou ne mu guale a muadana mina obu a fik*

*(Mat 24:32-35; Luk 21:29-33)*

<sup>28</sup> “Amutou mu guale a adetinovona a obu a fik. Ilala lalana ei apaputa, amutou muada i, ilala na oaso kubaana ei kale ni palea.

<sup>29</sup> Tomane moni, na ilala amutou ite a golugolu sou odo i palea, amutou muada i, Natuna Bibi ei maino agaviosi mei ino na tema.

<sup>30</sup> Eau vei patotona le amutou, ilala sou a vanunua ma tavivine seidei ie saboa sou mate, a golugolu vuso iedo ne sou palea.

<sup>31</sup> Langi pilu a magamaga ni buale, moni a inade minau ni ma buale oto.

*Amutou ulago kuba (Mat 24:36-44)*

<sup>32</sup> “Moni a bibi tasa boa ei muada e sei malada me sei matailala a golugolu sou odo ni palea. Sou a bineanea na langi sou ma muada oto i, me Natuna Bibi tamai ei ma muada oto i. Euma tasa moni ei muada i.

<sup>33</sup> Amutou tilale. Amutou ulago moni, vuna amutou ma muada oto i sei malada a golugolu sou odo ni palea.

<sup>34</sup> Ei tomane a bibi tasa ei asutase a luma minei mei asu usino na avena tasa. Ei vei ane sou a vanua na pipigona ne sou iteale a golugolu minei, mei soebule a pipigona usino ne sou tastasa, mei vei ana bibi na itealena tema ni ulago kuba.

<sup>35</sup> “Maido me amutou ulago kuba. Amutou ma muada oto i sei ilala tamana luma ni asu usinani, ei ni asu usinani na lavilavi ue na lodo punosa ue na ilala kuleko ei tangi ue na autupola, iede amutou ma muada oto i.

<sup>36</sup> Dae ei ni asu asi usinani mei ni ite amutou ngolo.

<sup>37</sup> A inade eau bilii e amutou odo, iede eau bilii e sou a vanunua ma tavivine vuso. ‘Amutou ulago kuba.’ ”

## 14

*Sou a buobuo sou maiademuli a vali-putene Iesu*

(Mat 26:1-5; Luk 22:1-2; Ioa 11:45-53)

<sup>1</sup> Tauluna malada lua, Malada na Asuleletasena me a Malada Buo mina ulalu a is boa ni palea. Me sou a munuganuga mina prist me sou a vanua na muadana binea sou vei maido, “Neitou auala ane Iesu me neitou lapitole ei me neitou valipute ei matina?”

<sup>2</sup> Sou vei, “Eitou ma goligoli lei a inigogona ieli na malada buobuo. Dae ne sou a vanunua ma tavivine sou ite me ne sou sinoa me ne sou mailisi a maubina.”

*Tavine tasa ei singi a nanu manginangina na letene Iesu*

(Mat 26:6-13; Ioa 12:1-8)

<sup>3</sup> Iesu ei ino na aubu e Betani na luma mine Saimon, ei a bibi tasa lisa ei isa a sinobe a kolokolo. Ilala ei aaniani, tavine tasa ei asuale ei. Tavine dolo ei iududi a malasana taogo na vatu tasa, a nanu manginangina sele<sup>\*</sup> ino i, ma mapana i oata oto sele. Me ei valipole a taogo dolo mei singi a nanu manginangina do na letene Iesu.

<sup>4</sup> Moni a vanunua sanii ino do sou ite ma lilone sou i mamau i. Me sou maiadeade balivua mine sou oto maido, “Posa matina ei mapuli sabubi a nanu manginangina do?”

<sup>5</sup> Mane eitou masosove ieli, eitou mapigogoi neitou guale a vatu denarii savulu sobo tolu ma gegena me neitou bilii e sou a kapelabe.” Me sou sinoa ane tavine do.

<sup>6</sup> Moni e Iesu ei vei, “Amutou litase a tavine de. Posa matina amutou bilii e ei a mavaana? Ei goli a inigogona kubaana sele usinani minau.

<sup>7</sup> Taliuliu sou a kapelabena vanunua ne sou muina pilu e amutou. Sei malada amutou isa a masagana buloine sou, de ne amutou buloi e sou. Moni eau na ma malu pilu oto e amutou taliuliu.

<sup>8</sup> A golu a tavine do ei mapigogoi ni goli, ei goliosi. Ei tauosi a nanu manginangina na vovogu mina masusuluna peilaine eau.

<sup>9</sup> Eau vei patotona le amutou, na aveavena magamaga vuso sou asuale me sou malongo a malongolongona kubaana, ne sou ade tamai a golu a tavine ieli ei goli, me ne sou damutaletale ei.”

*Iudas ei adegatuna ni bilii e Iesu usino na limane sou a vanua buobuo*

(Mat 26:14-16; Luk 22:3-6)

<sup>10</sup> Na malada iedo, Iudas Iskariot, ei a bibi tasa mine sou a disaipel savulu tasa timana lua, ei asu usino ne sou a munuganuga mina prist. Ei kale ni bilii e Iesu usino ne sou.

<sup>11</sup> Sou longesi me sou mongemonge. Me sou ade ivu ne sou bilii e ei a vatu sanii. Seido Iudas ei soke a punogena vea mina biliine Iesu usino ne sou.

*Iesu ei aani pilu e sou a disaipel*

(Mat 26:17-25; Luk 22:7-14; Ioa 13:21-30)

<sup>12</sup> Munugana malada mina Malada Buo mina inani na ulalu a is boa ei palea. Na malada iedo sou valiputepute a natatuna sipsip mina inani. Me sou a disaipel sou vei le Iesu maido, “Oo kale ne amiteu asu usiva me namiteu masusulu a gona inani oo no ani na Malada na Asuleletasena?”

<sup>13</sup> De Iesu ei peltase a disaipel lua usino mei vei le sulu maido, “Amulu asu ulilo na aubu buobuo. Me a bibi tasa ei tabulebule a taogo na nanu taula, amulu ni poge ei na vea. Amulu ogomuli e ei.

<sup>14</sup> Mane amulu ite ei gali ulilo na luma tasa, amulu vei ana tamana luma maido, ‘Bibi na matetengina ei tagu, “Vilo minau ino iva ne eau pilu e sou a disaipel minau namiteu aani a inani mina Malada na Asuleletasena?”’

<sup>15</sup> Me ei ni maite e amulu a vilo tasa buo ino muata, a poso ma niugugu ma golugolu ino masusuluosi. Amulu masusulu a inani mine eitou na vilo iedo.”

<sup>16</sup> De a disaipel sulu asu sibitala na aubu buobuo do, me su ite a golugolu vuso ino tomene Iesu ei vei le sulu. Me sulu masusulu a gona inani.

<sup>17</sup> Matavilioliona Iesu ei sibitala pilu a disaipel savulu tasa timana lua.

\* 14:3 Sou vate a golu ieli a *nard*.

<sup>18</sup> Sou ugu me sou aaniani, me Iesu ei vei maido, "Eau vei patotona le amutou, bibi tasa balivua ne amutou ei ni bilii e eau usino na limane sou a vanunua sou butuale eau. Ei a bibi tasa ei aani pilu e eau ie."

<sup>19</sup> Sou a disaipel sou longe a inade maido, lilone sou i mavaa, me sou tastasa sou soke a tinagine ei maido, "Nane oo veivei eau, io?"

<sup>20</sup> Iesu ei vei le sou, "A bibi iedo ei e tasa balivua ne amutou savulu tasa timana lua. Ei a bibi tasa ei guale a ulalu mei tau ulilo mina taogo pilu e eau.

<sup>21</sup> Ivu, e Natuna Bibi ei ni mate tomana Lau lau mine Salemo ei veiosi ve ei ni mate. Moni maula bibi iedo ei bilii e Natuna Bibi usino na limane sou a butu. I puiale tinana ni ma maalepose ete ei."

<sup>22</sup> Sou saboa so aaniani, me Iesu ei guale a ulalu tasa, mei toledadangi e Salemo mei lee mei bilii e sou a disaipel. Me ei vei, "Amutou guale. Ieli ei a mainigu."

<sup>23</sup> Me ei guale a taogo na vain tasa mei toledadangi e Salemo mei bilii e sou. Me sou vuso sou inu.

<sup>24</sup> Me Iesu ei vei le sou maido, "Ieli ei a dalagu ni toesagali a magilipiluna pilu e Salemo. Eau singi mina buloine sou a vanunua ma tavivine papaina.

<sup>25</sup> Eau vei patotona le amutou, eau na ma ini ete a vain lou mapigogoi a malada eau na ini a vain alaba lilo na niitealalena mine Salemo."

<sup>26</sup> De sou ale a inala tasa, me sou ilisitase a aubu buobuo me sou asu usino na loena e Oliv.

*Iesu ei vei maido Pita ni lametase ei*

(*Mat 26:31-35; Luk 22:31-34; Ioa 13:36-38*)

<sup>27</sup> Iesu ei vei le sou a disaipel minei maido, "Silimulina mine amutou vuso ni bosa, vuna, a Lau lau mine Salemo ei isa a inade maido,

" 'Eau na valipute a bibi ni itealalena, me sou a sipsip ne sou oava maisaba.'†

<sup>28</sup> Moni eau na ilisiliu, mea na muga pala ane amutou usino ne Galili."

<sup>29</sup> Pita vei le ei, "Muina, mane a silimulina mine sou pilu e sou a vanunua sanii i bosa me sou veletase oo, moni eau na ma asutase ete oo."

<sup>30</sup> Me Iesu ei vei lei maido, "Eau vei patotona lio, seidei na lodo ieli, a kuleko ei saboa tangi malua, oo no vei matolu maido oo ma muada oto e eau."

<sup>31</sup> Moni e Pita ei ade sagali lou, "Muina, mane eau na mate pilu e oo, eau na ma mapigogoi ete na vei maido eau ma muada oto e oo." Me sou a disaipel sou goli a inade tasa moni.

*Iesu ei kaka ne Getsemani*

(*Mat 26:36-46; Luk 22:39-46*)

<sup>32</sup> Iesu pilu e sou a disaipel sou asu sou sibitala na avena tasa sou tole e Getsemani. Me Iesu ei vei le sou maido, "Mu ugu na. Eau kale na kaka."

<sup>33</sup> Me ei guale e Pita me Iemus me Ioanes, me sou ogomuli e ei. A lilona i mavaa, mei somiale gegeli sele.

<sup>34</sup> Me ei vei le sou maido, "Lilogu i mavaa mamau sele, bisii moni eau na mate. Amutou muine amutou nani me mu ulago kuba."

<sup>35</sup> Me ei asu sapa usino, mei totopatulu na magamaga mei kaka maido, mane a vea tasa ino, ei kale a matailala odo ni asuleletase ei.

<sup>36</sup> Ei kaka maido, "Aba,‡ Ouma, oo mapigogoi no goli a golugolu vuso. Eau kale no tauleletase a mavaana minau ie. Moni oo ma ogomulimuli lei a masagana minau. Boa. Oo ogomuli moni a masagana minio."

<sup>37</sup> Me Iesu ei veteliuale sou a disaipel tao tolu, mei ite sou ngolo. Me ei tagi e Pita maido, "Saimon, o ngolo, io? O ma mapigogoi ete no ulago mapigogoi a maduna matailala tasa, io?"

<sup>38</sup> Amutou ulago me mu kaka. Dae a tinovo ni palea le amutou me ne amutou bosa. Ivu, lilone amutou ei kale ni goli a golu, moni a vovone amutou ei ma sagali oto."

<sup>39</sup> Me Iesu ei asu lou mei goli a kinaka tasa lou tomane ei goli palesi.

<sup>40</sup> Me ei veteliu lou usino ne sou a disaipel mei ite sou so ngolongolo, vuna, matane sou i mavaa sele. Me na ilala ei toleluti e sou, sou ma muada oto ve ne sou goli a sei inade usino ne ei.

<sup>41</sup> Mulimuli Iesu ei veteliu matolunai, mei vei le sou a disaipel maido, "Amutou manoa me mu ngolongolo, io? Ei mapigogioosi. A ilala i paleasi, me seidei sou bilii e Natuna Bibi usino na limane sou a vanua na sinusu.

<sup>42</sup> Amutou ilisi, neitou asu. Mu ite, a bibi ei kale ni bilii e eau usino na limane sou, ei diviosii."

*Iudas ei bilii e Iesu usino na limane sou a butu*

(*Mat 26:47-56; Luk 22:47-53; Ioa 18:3-12*)

<sup>43</sup> Iesu ei saboa adeade, saga e Iudas, ei tasa mine sou a disaipel savulu tasa timana lua, ei asu maino. Abuna vanunua taula sou asu pilu e ei, me sou lapitole a viso ma butu. Sou a munuganuga mina prist me sou a vanua na muadana binea me sou a vanua buobuo sou peltase sou usinani.

<sup>44</sup> Bibi ei kale ni bilii e Iesu usino na limane sou, ei veiosi le sou a matailala tasa

† 14:27 Sekaraia 13:7 ‡ 14:36 Na inade Aram, Aba ei e euma.

maido, “Eau na gamumi a galena bibi tasa. Bibi iedolo e Iesu. Ne mu saavi ei me mu maasi ei usino.”

<sup>45</sup> De Iudas ei sibitala mei asu asi usino ne Iesu, mei vei, “Magiligilina.” Me ei gamumi a galena.

<sup>46</sup> Me sou sautole e Iesu me sou saavi e ei.

<sup>47</sup> Tasa mine sou a disaipel i magiligili odo, ei lapuale a viso minei mei vali a bibi na pipigona mina mapana prist mei uti a tulina me a tulina i pu.

<sup>48</sup> Me Iesu ei vei le sou maido, “Amutou guale a viso ma butu, me mu asu usinani mina saavine eau, tomane amutou kale ne mu saavi a bibi na paaalina tasa, io?”

<sup>49</sup> Maladalada vuso eau pilu e amutou lilo na luma mine Salemo, me eau matetengi e sou a vanunua ma tavivine, amutou ma kale ete ne mu saavi na malaada iodo. Moni muina, inade ino na Laulau mine Salemo ei ni palea ivu.”

<sup>50</sup> Me sou a disaipel sou ilisitase e Iesu me sou oava.

<sup>51</sup> A bibi alaba tasa ei ogomuli e Iesu usinani, ei avisobe ei a malo keakea tasa. Me sou saavi ei,

<sup>52</sup> ei lubetase a malo keakea do mei iava a aina moni.

*Iesu ei magili na matane sou a vanua na toebilelesina inade*

*(Mat 26:57-68; Luk 22:54-55, 63-71; Ioa 18:13-14, 19-24)*

<sup>53</sup> Vanunua sou saavi e Iesu me sou maasi ei usino na luma mine mapana prist. Me sou a munuganuga mina prist me sou a vanua buobuo me sou a vanua na muadana binea sou viepilu.

<sup>54</sup> Pita ei ogomuli e Iesu usino, moni ei ino bulago sapa. Ei asu ulilo mina bigomu na luma mina mapana prist. Me ei ugu pilu e sou a papai mei amimilu na oavi.

<sup>55</sup> Sou a munuganuga mina prist pilu e sou a vanua na toebilelesina inade, sou toleale a vanunua sanii usinani ne sou veipale a inigogona vuso Iesu ei goli. Sou kale ne sou poge a sinusu tasa Iesu ei goli i mapigogoi ne sou valipute ei, moni sou ma poge ete.

<sup>56</sup> Vanunua papaina sou ubi ei a inadana aualana, moni a inade ne sou i ma tasa moni oto.

<sup>57</sup> Ma vanunua sanii sou magili me sou auala ane Iesu a inade maido,

<sup>58</sup> “Amiteu longe ei vei maido, ‘Eau oto na lope a luma mine Salemo sou a vanunua so tige a limane sou. Mulimuli na malada tolu eau na mamagili lei tasa sea, moni eau na ma tige ete a limagu.’”

<sup>59</sup> Moni a inade sou goli iedo, ei tamai maisaba mei ma tasa moni oto.

<sup>60</sup> De a mapana prist ei magili na matane sou mei tagi e Iesu maido, “Oo ma kale ete no adeliu a inade tasa, io? Inade sou ubi e oo do i matina?”

<sup>61</sup> Moni e Iesu ei asebuu moni, mei ma adeliu oto a inade tasa usino ne ei. De a mapana prist ei tagi lei e ei, “Oo Kraiss? Oo e Natune Salemo oata oto sele ue boa?”

<sup>62</sup> Me Iesu ei vei, “Tede eau moni. Me ne amutou ite e Natuna Bibi ni ugu na limane Salemo e gata, ei isa a sagalina buo, mei ni asu usinani pilu a ausa na langi.”

<sup>63</sup> Ma mapana prist ei singe a kinainai minei oto mei vei maido, “Neitou ma tolealale lei a vanunua sanii lou ne sou vavasa a bibi ie. Boa.

<sup>64</sup> Amutou longesi, ei salaitavole e Salemo. Amutou damutale neitou goli a sava usino ne ei?” Me sou vuso sou vei maido, “Ei isa a sinusu, ei ni mate.”

<sup>65</sup> Seido a vanunua sanii sou soke a apisosoline ei. Me sou papalesobe a matane ei a malo me sou ubi ei, me sou vei, “O no vei sei ubi e oo.” Me sou a papai so guale ei me sou valigaleale ei.

*Pita ei vei maido ei ma muada oto e Iesu (Mat 26:69-75; Luk 22:56-62; Ioa 18:15-18, 25-27)*

<sup>66</sup> Pita ei ino masala na muina vavasana lilo mina bigomu na luma. Ma tavine na pipigona tasa mina mapana prist ei asu maino,

<sup>67</sup> me ei ite Pita ei amimilumilu. Ma tavine na pipigona do ei amusepute ei, me ei vei, “Oo tamai o pilu e Iesu maino ne Nasaret.”

<sup>68</sup> Moni e Pita ei vei maido, “Boa. Eau ma muada oto a inade oo goli iede.” Me ei gali usala agavuale a tema na luma. Ma kuleko tasa i tangi.

<sup>69</sup> Ma tavine na pipigona do ei ite lei ei, me ei vei le sou a vanunua sou magili agavuale ei maido, “Bibi ieli ei a bibi mina abuna mine sou.”

<sup>70</sup> Moni ei vei lou, “Boa.” Ma tabaa oto, sou a vanunua sou magili agavi sou vei lou ane Pita maido, “Patotona sele, oo moni oo a bibi maino ne sou. Oo a bibi ne Galili moni.”

<sup>71</sup> Seido Pita ei ade sagali sele maido, “Ivu uata, eau ma muada oto a bibi amutou veivei iede. Mane eau ma vei patotona oto, de Salemo ei ni toegegeli eau.”

<sup>72</sup> Ei veiosi, me ma tabaa oto kuleko ei tangi maluanai. Me Pita ei damutale lei a inade Iesu ei vei le ei, “Matailala a kuleko ei saboa tangi malua, oo no vei matolu maido oo ma muada oto e eau.” Me Pita i tangi mamau sele.

## 15

*Sou maasi e Iesu usino ne Pailat*

(*Mat 27:1-2, 11-14; Luk 23:1-5; Ioa 18:28-38*)

<sup>1</sup> Na autupola siisii sele sou a munuganuga mina prist pilu e sou a vanua buobuo me sou a vanua na muadana binea me sou a vanua na toebilelesina inade sou viepili me sou maiademuli kuba i a golu sou ne sou goli. Mulimuli sou papale Iesu a mota, me sou guale ei usino me sou tau ei na limane Pailat.

<sup>2</sup> Me Pailat ei tagi e Iesu maido, “Oo a mapana mine sou e Iuda, io?” Me Iesu ei adeliu maido, “Oo oto oo vei maido.”

<sup>3</sup> Sou a munuganuga mina prist sou ubi e Iesu a inade papaina,

<sup>4</sup> me Pailat ei tagi lei e ei maido, “Oo ma kale ete no adeliu a inade tasa, io? Oo longesi a inadenade papaina sou ubi e oo.”

<sup>5</sup> Moni e Iesu ei ma adeliu oto a inade tasa lou, maidolo ieli goli e Pailat i saga mamau.

<sup>6</sup> Na avalavala vuso mina Malada Buobuo, Pailat ei lubelube a bibi tasa ei ugu na luma na tunuu.

<sup>7</sup> Bibi tasa aisana e Barabas ei ino na luma na tunuu. Ei a bibi tasa mina abuna tasa sou mailisi a maubina me sou valipute a vanunua sanii.

<sup>8</sup> De sou a vanunua ma tavivine sou sibitala me sou tagi e Pailat ni goli tomane lisa ei goli le sou.

<sup>9</sup> Me Pailat ei adeliu a inade usino ne sou maido, “Amutou kale eau na lube a mapana ne sou e Iuda usino ne amutou, io?”

<sup>10</sup> Vuna, ei muada e sou a munuganuga mina prist sou lilogegelu ane Iesu, me sou maasi ei usinani mina vavasana.

<sup>11</sup> Moni sou a munuganuga mina prist sou mailisi a lilone sou a vanunua ma tavivine ve ne sou tola usino ne Pailat ni lube e Barabas usino ne sou.

<sup>12</sup> Me Pailat ei tagi lei e sou maido, “Me amutou kale eau na goli a sava usino na bibi amutou vate ei a mapana mine amutou e Iuda?”

<sup>13</sup> Me sou tola lou maido, “Gati ei na tauvaleuti!”

<sup>14</sup> Me Pailat ei tagi e sou, “Vuna matina? Ei goli sei sinusu?” Moni sou tola sagali lou, “Gati ei na tauvaleuti!”

<sup>15</sup> Me Pailat ei kale ni goli e sou a vanunua ma tavivine ne sou mongemonge. Maido me ei lube e Barabas usino ne sou mei bilii e Iesu usino na limane sou a vanua na maubina, ne sou umamasi e ei me ne sou gati ei na tauvaleuti.

*Sou a vanunua na maubina sou adeptintola ane Iesu*

(*Mat 27:27-31; Ioa 19:2-3*)

<sup>16</sup> Vanua na maubina sou magali e Iesu ulilo mina bigomu na luma mina bibi na itealalena avena, me sou toleale sou a vanua na maubina vuso usinani.

<sup>17</sup> Sou makai a kinainai kasososo mine Iesu. Me sou guale a tuaga me sou goli a letepolo tomane a letepolo mina mapana, me sou tau na letena.

<sup>18</sup> Me sou vei lei maido, “Autupola i doana, mapana mine sou e Iuda!”

<sup>19</sup> Me sou guale a butu tasa me sou poe a letene ei. Me sou apisosoli ei. Me sou totopatulu na ubune ei.

<sup>20</sup> Sou adeptintolasi ane ei, me sou taulele a kinainai kasososo do, me sou makai liu e ei a kinainai minei oto. Me sou guale ei usino ne sou gatitole ei na tauvaleuti.

*Sou gatitole Iesu na tauvaleuti*  
(*Mat 27:32-44; Luk 23:26-43; Ioa 19:17-27*)

<sup>21</sup> Bibi tasa, aisana e Saimon asu maino na aubu buo e Sairini, ei e tamane Aleksander pilu e Rufus, ei asuasu maino. Me sou a vanunua na maubina sou guale ei me sou matabule ei a tauvaleuti mine Iesu.

<sup>22</sup> Sou guale Iesu usino na avena tasa, aisana e Golgota. A malibuuna inade do ei a muina sigou na bibi.

<sup>23</sup> Sou kale ne sou bilii e Iesu a vain sanii sou taupili a mira. Moni ei ma ini ete.

<sup>24</sup> De sou a vanua na maubina sou gati e Iesu na tauvaleuti. Me sou maiseeutumuli a gualena golgolou, mulimuli sou soebule a kinainai minei usino ne sou oto.

<sup>25</sup> Na matailala ialasue mina autupola, sou gatitole ei na tauvaleuti.

<sup>26</sup> Muata na letena sou niage a inade sou vavasa ane ei maido, “Mapana mine sou e Iuda.”

<sup>27-28</sup> Agavuale Iesu sou paletole a bibi lua na maubina ma paaalina. Sou paletole tasa na tauvaleuti mina limana e gata, me tasa na limana e meli.

<sup>29</sup> Ma vanunua ma tavivine sou asuasu usino usinani sou adeptintolatala ana. Sou uneune a letene sou me sou vei, “Oo a bibi na nilopena luma mine Salemo mo no tige lei na malada tolu moni.

<sup>30</sup> De, oo buloi liu e oo oto. Sivotase a tauvaleuti utano.”

<sup>31</sup> Sou a munuganuga mina prist me sou a vanua na muadana binea sou tamai sou adeptintola. Sou ade lilo oto ne sou maido, “Ei buloiloi e sou sanii, moni ei ma mapi-gogoi ete ni buloi liu ei oto.

<sup>32</sup> A bibi iedo e Krais, iedele a mapana mine Israel, ei ni veletase a tauvaleuti mei sivo utano, me ne eitou ite me neitou silimuli.” Bibi lua sou paletole sulu mina tauvaleuti agavuale Iesu, sulu tamai su adeptintola ane ei.



*Iesu ei mate*

(*Mat 27:45-56; Luk 23:44-49; Ioa 19:28-30*)

<sup>33</sup> Mina matailala savulu tasa timana lua mina oaso, tunuu i avisobe a magamaga vuso pea na matailala tolu mina lavilavi.

<sup>34</sup> Na matailala tolu Iesu ei ngala vauta maido, "Eloi, Eloi, lema sabaktani?" A malibuuna inade iedo ei maido, "Salemo minau, Salemo minau, posa matina oo ite-tase eau?"

<sup>35</sup> Vanunua sanii sou magili agavi, sou longe a inade do me sou vei maido, "Longe. Ei tole Elaiia."

<sup>36</sup> Ma bibi tasa ei vele usino mei tau a musamusa tasa utano na vain viniga. Ma vain i vonuosi mina musamusa do, ei guale mei papale a butu tasa mei bilii e Iesu ve ei ni ini. Ma bibi iedo ei vei, "Mage i, neitou ite muge, nane Elaiia ni asu usinani ni masive ei utano, ue boa?"

<sup>37</sup> Me Iesu ei ngala mamau sele lou mei mate.

<sup>38</sup> Me a malo taula sou saulai lilo na luma mine Salemo ei masinge muata oto i pea tano oto, mei palea maduna lua.

<sup>39</sup> Me a munuganuga mine sou a vanunua na maubina ei magili agavi mei ite a minate ne Iesu. Mei vei, "Patotona sele, a bibi ieli ei e Natune Salemo."

<sup>40</sup> Ma tavivine sanii tamai sou magili bulago sapa me sou gemu usino. Tasa mine sou, e Maria, ei maino ne Makdala. Me tasa lou e Maria, ei e tinane Iemus bisiisii me Ioses, me Salome.

<sup>41</sup> Na malada Iesu ei ino ne Galili tavivine do sou ogomulimuli ei me sou buloiloi ei. Me sou a tavivine sanii lisa sou asu usinani ne Ierusalem pilu e Iesu sou tamai sou ino nado.

*Sou tau a aitolane Iesu ulilo mina aova na vatu taula*

(*Mat 27:57-61; Luk 23:50-56; Ioa 19:38-42*)

<sup>42-43</sup> Na lavilavi Iosep mine Arimatea ei asu usinani. Ei e tasa mine sou a vanua na toebilelesina inade, me ei isa a aisa kubaana na matane sou a vanunua ma tavivine. Ei tamai ei kale ni ite a nitealalena mine Salemo. A malada do ei a malada na masusuluna mina Maolona Malada. De Iosep ei ma lae oto mei gali ulilo mei magili na matane Pailat. Ei nai e Pailat ve ni longo ane ei ni guale a aitolane Iesu.

<sup>44</sup> Pailat ei damutala papai, mei vei, "Ei matesi, io?" Me ei toleale a bibi ei muge sou a vanua na maubina usinani, mei tagi e ei, "Iesu ei matesi, ue boa?"

<sup>45</sup> Pailat ei longesi a inadena bibi ei muge sou a vanua na maubina, de ei vei le Iosep ni guale a aitolana.

<sup>46</sup> De Iosep ei asu mei oli a malo keakea tasa i lago, mei guale a aitolane Iesu utano. Me ei avisobe ei a malo keakea do, mei guale a aitolane Iesu mei tau ei ulilo mina muina minate tasa. Muina minate dolo ei a aova tasa na vatu sou a vanunua sou goli. Me Iosep ei buli a vatu tasa usinani mei kapisobe a tema na aova.

<sup>47</sup> Maria maino Makdala pilu e Maria, tinane Ioses, sulu ite a muine Iesu sou tau i.

**16***Iesu ei ilisiliu*

(*Mat 28:1-8; Luk 24:1-12; Ioa 20:1-10*)

<sup>1</sup> Maolona Malada ne sou e Iuda i pulosi, Maria maino ne Makdala pilu e Maria, tinane Iemus, me Salome, sou oli a nanu manginangina. Sou kale ne sou savei a aitolane Iesu.

<sup>2</sup> Na autupola siisii mina munugana malada, sou asu usino na muina minate.

<sup>3</sup> Me sou maiadepilu lilo ne sou oto maido, "Sei ni buloi e eitou a bulilelena vatu maino na asena aova?"

<sup>4</sup> Moni na ilala sou agaviosi, sou gemu usino, me sou ite a vatu ino na asena aova do i bualesi. Sou bulilelesi a vatu usinosi. A vatu odo i buo mamau sele.

<sup>5</sup> De sou gali ulilo mina muina minate, me sou ite a bibi alaba tasa ei ugu na limane ei e gata. Ei kai a kinainai keakea i lago. Me sou ite me sou saga sele a bibi iedo.

<sup>6</sup> Me ei vei le sou maido, "Amutou ma sagasaga lou. Eau muada, amutou asu usinani ve ne mu gemu e Iesu maino ne Nasaret, sou gati ei na tauvaleuti. Ei ilisiosi. Ei eili nani boa. Mu ite a muine ei sou tau i.

<sup>7</sup> Moni amutou asu me mu vei a inade ieli usino ne sou a disaipel minei me usino ne Pita tamai maido, 'Iesu ei ni muge amutou usino ne Galili. Ne amutou ite ei ne Galili, tomane lisa ei veiosi le amutou.'

<sup>8</sup> Ma tavivine sou gali usala, me sou asutase a muina minate me sou oava. Lilone sou i pansae ma vovone sou i palili. Me sou ma vei ete a inade tasa usino na bibi tasa, vuna sou lae.

*Maria maino ne Makdala ei ite Iesu*

(*Mat 28:9-10; Ioa 20:11-18*)

<sup>9</sup> Iesu ei ilisi na autupola siisii na munugana malada. Me ei palea pala ane Maria maino ne Makdala. A tavine iedo lisa Iesu ei tauleletase a nunu pagu padilua ino ne ei.

<sup>10</sup> Maria ei asu mei vei le sou a vanunua sou asu pilupilu e Iesu. Sou a vanunua do sou lilobuu me sou tangitangi.

<sup>11</sup> Maria ei vei le sou maido, "Iesu ei mauliliuosi me eau itesi ei." Sou longe a inade do, moni sou ma silimuli ete.

*A disaipel lua su ite Iesu na vea  
(Luk 24:13-35)*

<sup>12</sup> Me mulimuli a disaipel lua sulu veletase a aubu buobuo me sulu asu usino. Me Iesu ei palea sea mei sibitala le sulu.

<sup>13</sup> Me sulu asu su veipale a inade do usino ne sou a disaipel sanii. Moni sou ma silimuli ete a inade mina bibi lua do.

*Iesu ei vei le sou a disaipel a pipigona ne sou goli*

*(Mat 28:16-20; Luk 24:36-49; Ioa 20:19-23; Apo 1:6-8)*

<sup>14</sup> Mulimuli sou a disaipel savulu tasa timana tasa sou ugu me sou aani, me Iesu ei palea le sou. Me ei adevili ane sou, vuna sou ma silimuli ete ma lilone sou i sobo me sou ma silimuli ete a inade mina vanunua ma tavivine sou ite ei ilisiliuosi.

<sup>15</sup> Me ei vei le sou maido, "Amutou mu asu usino na aveavena vuso na magamaga me mu malongo a malongolongona kubaana usino na vanunua ma tavivine vuso.

<sup>16</sup> Bibi ei silimuli mei guale a maavuvutuna, Salemo ei ni mamauli e ei. Moni a bibi ei ma silimuli ete, ei ni magili na vavasana.

<sup>17</sup> Salemo ei ni goli a gona sinaga na limane sou a vanunua sou silimuli. Na aisagu ne sou taulele a nunu pagu, me ne sou ade a matamatana inade alaba.

<sup>18</sup> Ne sou lapitole a aliusu a limane sou, me mane sou ini a bunu na minate, moni ei ma mapigogoi ete ni toegegeli e sou. Ne sou tau a limane sou muata ne sou so sobe me ne sou kuba lou."

*Salemo ei guale Iesu uata mina langi  
(Luk 24:50-53; Apo 1:9-11)*

<sup>19</sup> Tauluna Bibi Taula Iesu ei veimuadesi a inade usino ne sou, Salemo ei guale ei uata na langi. Me ei ugu na limane Salemo e gata.

<sup>20</sup> Me sou a disaipel sou asu me sou veimuade a inade usino na aveavena vuso. Ma Bibi Taula ei pipigo pilu e sou, mei goli a gona sinaganaga i palea ve ni masagali a inade ne sou.

## Luk Malongolongona Kubaana mine Iesu Luk ei niage

### *Inade usino ne Tiopilus*

<sup>1</sup> Bibi buo Tiopilus, lisa vanunua makuba sou tove a niagen mapamulina na golugolu vuso Salemo ei mapale balivua ne amiteu.

<sup>2</sup> Sou ogomuli a inade ne sou a vanunua sou ite a golugolu odo a matane sou, soke na ilala a golugolu sou odo i palea. Sou a vanunua ie sou ino tomane a vanunua mina pipigona na inade mine Salemo, me sou bilii e amiteu a mapamulina ie.

<sup>3</sup> Maido me eau tamai ea kale na niage a mapamulina ieli mea na sosove usino ne oo. Palapala eau gegemuale iiti a vuna golugolu vuso ie, me seidei eau niage bilesi moni, tomane a golugolu sou odo ei paleasi.

<sup>4</sup> Maido me mane oo gi, o no muada iiti i maido, a inade sou matetengi e oo iedo, ei patotona vuso.

### *Ioanes ni alaposa*

<sup>5</sup> Ilala Herot ei muina a mapana mine Iudia, a prist tasa ino, aisana e Sekaraia. Ei a prist mine sou a abuna mine Abiia. Susuna ei a abuna mine Aron, ma aisane susuna e Elisabet.

<sup>6</sup> Sulu bilesi sele na matane Salemo. Sulu ogomulimuli a binea vuso ma inade vuso mine Bibi Taula, me sulu ma isa oto a maana na matane ei.

<sup>7</sup> Moni e sulu ma isa oto a bibaini, vuna Elisabet ei ma mapigogoi ete ni natua. Me sulu buo mamausoi.

<sup>8</sup> Na bai tasa sou a abuna mine Sekaraia sou goli a pipigona mina prist, me Sekaraia ei goli a pipigona prist na lagune Salemo.

<sup>9</sup> Na inigogona mina pipigona prist iedo sou vileale Sekaraia na maisalosona, me ei gali ulilo na luma mine Bibi Taula mina gunolina niabi a muo ei mangina.

<sup>10</sup> Na ilala ei goli a niabi iedo, a abuna vanunua ma tavivine taula sou muina sala me sou kaka.

<sup>11</sup> A bineanea tasa mine Bibi Taula ei palea le Sekaraia mei magili na limana e gata na poso na niabi na muo ei isa a manginana.

<sup>12</sup> Sekaraia ei ite a bineanea mei saga mei lae.

<sup>13</sup> Moni a bineanea ei vei lei maido, "Sekaraia, oo ma laelae lou. Salemo ei longesi a kinaka minio. Susumu e Elisabet ei ni maalepose a bibaini. Me oo no tole a aisana e Ioanes.

<sup>14</sup> Lilomu ni muina doana, me oo no mongemonge. Ma vanunua ma tavivine

makuba ne sou mongemonge na ilala a bibaini dolo ni alaposa,

<sup>15</sup> vuna ei ni isa a aisa buo na matane Bibi Taula. Ei ni ma ini ete a vain ma nanu sagaligali. Ilala ei saboa ino na tiane tinana, a Maolona Nunu ei ni vonu sele ne ei.

<sup>16</sup> Ei ni toe a vanunua ma tavivine makuba mine Israel ne sou veteliu usino ne Salemo, Bibi Taula mine sou.

<sup>17</sup> Ei ni guale a inigogona ma sagagalina mine Elaiia mei ni muga pala ane Bibi Taula. Ei ni toe selebanini pilu e tamatamane sou ne sou lilo tasa moni. Me ei ni toebilelesi a damutatalana mina vanua na saukikina inade, me ne sou guale a damutatalana doana tomane sou a bilesina vanunua. Ei ni masusulu a vanunua ne sou pipigo ane Bibi Taula."

<sup>18</sup> Me Sekaraia ei vei ane bineanea maido, "Eau na muada a inade minio ieli matina? Eau buo sosousoi, me susugu tamai ei buo mamausoi."

<sup>19</sup> Ma bineanea ei adeliu maido, "Eau e Gebriel, eau magiligili na lagune Salemo. Salemo oto ei peltase eau na vei lio mea maasi a malongona doana ieli usinani ne oo.

<sup>20</sup> Io, oo longe. Oo ma silimuli ete a inade minau, maido me seidei asemu ni sobo, me oo no ma adeade oto mapigogoi na ilala a golugolu vuso do i palea. Inadegu ieli ei ni palea ivu na ilala Salemo ei tau."

<sup>21</sup> Vanunua ma tavivine sou magitali e Sekaraia, sou damutatala papai sei golu i palea me ei muina tabaa lilo na luma mine Salemo.

<sup>22</sup> Me mulimuli ei gali usala mei ma mapigogoi ete ni ade ane sou. Maido me sou damu, ei ite a golu sea sanii lilo na luma mine Salemo. Ei matailala ane sou a limana moni. Ma asena i sobo moni muina.

<sup>23</sup> Mulimuli, na ilala pipigona mine Sekaraia i pulu, ei veteliu usino na aubu minei.

<sup>24</sup> Me mulimuli susuna e Elisabet ei saaavu, mei ovu moni muina mapigogoi a game lima. Elisabet ei vei maido,

<sup>25</sup> "Bibi Taula ei dode eau mei goli a golu ieli ni palea le eau mina mapulina maelana minau na matane sou a vanunua ma tavivine."

### *Iesu ni alaposa*

<sup>26</sup> Na game pantasanai mine Elisabet ei saaavu, Salemo ei peltase a bineanea e Gebriel usino na aubu tasa ne Galili, aisana e Nasaret.

<sup>27</sup> Ei asu usino na tavine alaba tasa sou mavuni ni taulaiale a bibi tasa mina abuna mine Devit, aisana e Iosep. Aisana tavine alaba do e Maria.

28 Io Gebriel ei asu usino ne ei mei vei maido, "Oaso, tavine. Bibi Taula ei ino pilu e oo, mei maibalave oo mei toekube oo."

29 Maria ei longe a inade do mei saga mei damutale maido, "Teli sei matana inade?"

30 Ma bineanea ei vei lei maido, "Maria, oo ma laelae lou. Salemo ei lilokuba sele ane oo.

31 Longe. Oo no tiana me oo no maalepose a bibaini. Me oo no tole ei e Iesu.

32 Ei ni a bibi buo. Me ne sou tole ei e Natune Salemo oata oto sele. Me Salemo ni tau ei a mapana tomane tubune ei e Devit.

33 Ei ni muina a mapana mine sou a abuna mine Iekop taliulu. Ma pipigona mapana minei ei ni ma pulu oto."

34 Me Maria ei tagi e bineanea maido, "Golu ieli ni palea matina? Eau saboa ngolo pilu a bibi tasa."

35 Ma bineanea ei maliu a inade minei maido, "A Maolona Nunu ni asu usinani ne oo, ma sagalina mine Salemo oata oto ei ni avisobe oo. Maido ma bibaini mulimuli oo no maalepose, ei ni muina a bilesina bibi mine Salemo, me ne sou tole ei e Natune Salemo.

36 Longe. Eisamu e Elisabet ei buosi, moni ei saavuosi mei ni maalepose a bibaini. Lisa sou veivei ve ei ma mapigogoi ete ni natua. Moni seidei ei saavuosi, ma gamena i pantasasi.

37 A golu tasa i ma mapigogoi ete ni loi e Salemo."

38 Me Maria ei vei maido, "Longe. Eau a tavine na pipigona mine Bibi Taula. Ei mapigogoi ni toe eau tomane oo vei." Io bineanea ei ilisitase ei mei asu.

#### *Maria ei gagoale Elisabet*

39 Na ilala do Maria ei ilisi mei asu usino na aubu tasa ino na avena loena ne Iudia.

40 Me ei gali ulilo na luma mine Sekaraia mei vate oaso doana usino ne Elisabet.

41 Elisabet ei longe Maria i vate oaso doana, ma bibaini lilo na tiane Elisabet ei seu. Ma Maolona Nunu ei vonu ne Elisabet,

42 me ei tola mamau sele maido, "Salemo ei toekube sele oo mei bilii e oo a maibalavana ei vululusi a maibalavana ei bilii e sou a tavivine vuso sea. Ma bibaini lilo na tiamu iede, ei tamai ei guale a maibalavana mine Salemo.

43 Eau e sei me tinane Bibi Taula minau ei gagoale eau?

44 Longe. Ilala tagilagu ei longe a oaso kubaana minio, io a bibaini eili lilo na tiagu ei mongemonge mei seu.

45 Oo silimulioi maido Bibi Taula ei ni toe tomane ei vei le oo, maido me ei ni maibalave e oo."

#### *Inala mine Maria*

46 Maria ei vei maido,

"Lilogu i beilange a aisane Bibi Taula.

47 Ma nunugu ei mongemonge e Salemo, ei a Buloina minau.

48 Eau a tavine na pipigona minei, eau a golu sabubu,

moni ei ite eau mei dode eau.

Seidei me mulimuli tamai a abuna vanunua ma tavivine vuso

ne sou vei maido, Salemo i toekube sele eau.

49 Salemo ei isa a sagalina buo, ei goli a golu buo sele mina buloine eau, ma aisane ei ni muina maolo.

50 Ei dodode a vanunua ma tavivine sou matano moni ne ei.

Ei ni goli maido moni usino ne sou a vanunua ma tavivine seidei sou eili, me ne sou a vanunua ma tavivine sou palea mulimuli mapigogoi taliulu taliulu.

51 Limane ei goli a pipigona sagali.

A vanunua sou damu i sou a munugana sele me sou beilange a aisane sou oto, ei ni taulele sou maisaba.

52 Ei taupui e sou a mapamapana, mei beilange a vanunua sou taupui e sou.

53 Ei bilii a golu doana papaina usino na vanunua sou vitolo ne sou masu sele.

Moni a vanunua sou isa a golu papaina, ei taulele me sou asu sabubu.

54-55 Ei lilomuli a bibi na pipigona minei, e Israel, mei buloi e ei

mei damutaletale a adegatunana ei goli le sou e eikusune eitou, mei ni dode taliulu e Abraham ma abuabuna mine ei."

56 Maria ei malu pilu e Elisabet mapigogoi a game tolu, mulimuli ei veteliu usino na abu minei.

#### *Elisabet ei maalepose e Ioanes*

57 Ilala i paleasi mine Elisabet ni maalepose a bibaini, me ei vasusiale a bibi baini.

58 Sou mina aubu mine Elisabet me sou a abuna minei sou longe a inade e Bibi Taula ei dode sele ei, me sou mongemonge pilu e ei.

59 Na malada pantolunai sou asu usinani ne sou moge a bibaini. Sou kale ne sou bilii e ei a aisa e Sekaraia tomane a aisane tamana.

60 Moni e tinane bibaini ei vei, "Boa. Neitou tole a aisana e Ioanes."

61 Me sou vei lei, "Tasa mine sou a abuna mine amutou i ma isa oto a aisa maido."

62 Me sou goli a inade a limane sou me sou tagi e tamana ni bilii e sei aisa usino na bibaini.

63 Ei vei le sou ne sou guale a golu tasa ni niage i, mei niage a inade maido, "Aisana e Ioanes." Me sou saga sele.

<sup>64</sup> Ma tabaa oto a asene Sekaraia ei peo, mei mapigogiosi ni ade lou. Io ei adeade mei beilange a aisane Salemo.

<sup>65</sup> Me sou minei vuso, sou ite a golu sea sele i palea do, me sou lae. Ma inade mina golugolu vuso do ei vele maisaba na aububuna vuso na avena loeloena mine Iudia.

<sup>66</sup> Vanunua vuso sou longe a inade do, sou damutala papai me sou tagu maido, “Mulimuli a bibaini ieli ni palea sei matana bibi?” Sou muada, sagagalina mine Bibi Taula ei ino pilu e ei.

### *Inade na malongolongona mine Sekaraia*

<sup>67</sup> Io a Maolona Nunu i vonu ne Sekaraia, tamane bibaini iodo, me ei goli a inade na malongolongona maido,

<sup>68</sup> “Eitou beilange a aisane Salemo, Bibi Taula mine Israel. Ei asu usinani me ei buloi e eitou a vanunua ma tavivine minei mei gualeliu e eitou.

<sup>69</sup> Na abuna mina bibi na pipigona minei e Devit, Bibi Taula ei mapale a bibi tasa sagali mina gualeliune eitou.\*

<sup>70</sup> tomane lisa otosi ei ade i na asene sou a profet maolo minei.

<sup>71</sup> Ei vei ei ni gualeliu e eitou maino na limane sou a butu mine eitou me sou a vanunua sou lilogegelu sele ane eitou.

<sup>72</sup> Ei damutatala a magilipiluna iedo lisa ei oto i goli.

Mei dode sou e eikusune eitou mei buloi e sou.

<sup>73</sup> Ei vei ivu uata ne eikusune eitou, e Abraham.

Me seidei ei kale ni goli le eitou tomane lisa ei vei.

<sup>74</sup> Ei kale ni gualeliu e eitou maino na limane sou a butu,

me neitou lapitole a pipigona minei, me ne eitou ma lae oto.

<sup>75</sup> Maidolo ma ilala vuso eitou mauili, eitou mapigogoi neitou asu a inigogona vuso i billesi na matane ei,

me eitou mapigogoi neitou vonu a inigogona doadoana ei kale.

<sup>76</sup> Me oo natugu, mulimuli ne sou tole oo a profet mine Salemo oata oto sele.

Oo no muga pala ane Bibi Taula, mina masusuluna vea minei.

<sup>77-78</sup> Oo no matetengi e sou a vanunua ma tavivine minei me ne sou muada,

na dinodo buo minei, Salemo ei kale ni taulele a sinusu mine sou mei ni gualeliu e sou.

Ei ni sosove a oaso mina langi usinani ne eitou,

<sup>79</sup> mina silidaveina vanunua sou malu na tunuui me na nilaena minate.

Me ei ni iteale kube a ubune eitou, me neitou asu na vea mina lilomeana.”

<sup>80</sup> Mulimuli a bibaini iedo ei palea buo, ma nununa i palea sagali. Me ei asu mei malu na avena a vanua boa mapigogoi na ilala ei palea muada na matane sou e Israel.

## 2

### *Maria i maalepose Iesu*

*(Mat 1:18-25)*

<sup>1</sup> Na ilala dolo Sisar Ogastus ei tau a binea tasa usino ne sou ne sou niage a aisaisa ne sou a vanunua ma tavivine vuso lilo ne Rom.

<sup>2</sup> Ieli a munugana ilala a vanunua mina niitealalena avena sou guale a aisane sou, me na ilala do Kurinius ei ino a munugana bibi ei iteale a avena buo ne Siria.

<sup>3</sup> Maido ma vanunua ma tavivine vuso sou asu usino na vuna aubu mine sou mina niagena aisaisane sou.

<sup>4</sup> Iosep ei a mautu ne mapana e Devit. Maido me ei ilisitase Nasaret mina avena mine Galili, me ei asu usino na avena ne Iudia, na aubu mine Devit, sou tole e Betlehem.

<sup>5</sup> Ei asu pilu e Maria, ne sou niage a aisane sulu. Me na ilala do Maria ei saaavu.

<sup>6</sup> Sulu saboa ino ne Betlehem, ma ilala i sibitala mine Maria ni maalepose a bibaini.

<sup>7</sup> Me ei maalepose a matalagu bibi baini minei. Me ei avisobe ei a malo, me ei mamavute ei lilo na taogo na gona inani mine sou a bulmakau, vuna maido a luma na mosi ei vonuosi.

### *Sou a bineanea sou maasi a inade usino ne sou a vanua na niitealalena sipsip*

<sup>8</sup> Na avena do a vanunua sanii na itealena sipsip ino sala na aubu buobuo, me sou ulage a sipsip mine sou na lodo.

<sup>9</sup> Ma bineanea mine Bibi Taula ei palea le sou, me a muada buo mine Bibi Taula ei lada sailli e sou, me sou lae sele.

<sup>10</sup> Moni a bineanea ei vei le sou maido, “Amutou ma laelae lou. Longe. Eau maasi a malongona doana usinani ne amutou, ieli a malongona mina tinoena vanunua ma tavivine vuso ne sou mongemonge sele.

<sup>11</sup> Seidei na aubu mine Devit, a tavine tasa ei maalepose a bibaini. Ma bibaini ei ni gualeliu e amutou vuso. Ei e Bibi Taula, me ei a bibi e Salemo ei matoale ni gualeliu e sou a vanunua ma tavivine minei.

\* **1:69** Na laulau mina inade Grik ei a siili mina gualeliune eitou.

<sup>12</sup> Ne amoutou ite a bibaini tasa sou aviso be ei a malo, me ei ngolo lilo na taogo na gona inani mina bulmakau.”

<sup>13</sup> Bineanea ei adesi, io ma tabaa oto a abuna bineanea mina langi sou palea me sou muina pilu a bineanea do. Me sou beilange a aisane Salemo maido,

<sup>14</sup> “Beilange a aisane Salemo ei ino oata oto sele. Me na magamaga a lilone sou a vanunua ma tavivine ni muina mea. Salemo ni lilokuba ane sou.”

*Vanua na itealalena sipsip sou asu sou ite Iesu*

<sup>15</sup> Sou a bineanea sou ilisitase sou me sou veteliuosi usino na langi, io sou a vanunua na niitealalena sipsip sou vei maido, “De, eitou asu usino ne Betlehem me neitou ite a golu ei palea do, tomane e Bibi Taula ei vei le eitou maido.”

<sup>16</sup> Io sou asu asi usino, me sou ite e Maria me Iosep, me a bibaini ei ngolo na taogo na gona inani mina bulmakau.

<sup>17</sup> Sou itesi, me sou veipale a inade na golugolu a bineanea ei vei le sou a bibaini iodo.

<sup>18</sup> Ma vanunua vuso sou longe a inade sou a vanua na itealalena sipsip sou vei, sou saga sele i.

<sup>19</sup> Moni e Maria ei tau a inade vuso do na lilone ei, me ei damutale moni muina.

<sup>20</sup> Ilala vanua na itealalena sipsip sou veteliulu, sou masalai me toledadangi e Salemo a golugolu vuso sou longe me sou ite tomane a bineanea i veiosi le sou.

*Sou bilii e Iesu a aisana*

<sup>21</sup> Na malada pantolunai sou moge ei, me sou tole a aisana e Iesu, tomane bineanea ei vate palesi a aisana do ilala ei saboa palea na tiane tinana.

*Simeon me Ana su ite a bibaini Iesu na luma mine Salemo*

<sup>22</sup> Ilala i paleasi mine Iosep pilu e Maria ne su ogomuli a inigogona tomane a binea mine Moses ei vei, io sulu guale a bibaini usino ne Ierusalem mina biliine ei usino ne Bibi Taula.

<sup>23</sup> Sulu kale ne su ogomuli a inade ino na binea mine Bibi Taula maido, “Sou a matalagu a bibi tinane sou ei maalepose, sou odo ne amoutou bilii e Bibi Taula.”\*

<sup>24</sup> Su maasi tamai a manumanu ne su goli a niabi, tomane a binea mine Bibi Taula ei vei, “A kua lua, ue a manu lua alaba.”†

<sup>25</sup> Na ilala do a bibi tasa ino ne Ierusalem, aisana e Simeon. Ei a billesina bibi me ei a bibi mina totopatulialene Salemo. Ei magitali a bibina toemeana e Salemo ei vileale ni toekube a lilone sou e Israel. Ma Maolona Nunu ei ino ne Simeon.

<sup>26</sup> Maolona Nunu ei veiosi le ei maido, ei ni ma mate oolo oto mapigogoi ei ite e Kraiss, Bibi Taula.

<sup>27</sup> A Maolona Nunu ei mailisi ei me ei gali ulilo na luma mine Salemo. Me tamana me tinana su maasi e natune sulu e Iesu usinani mina gunolina inigogona do usino ne ei tomane a binea ei vei.

<sup>28</sup> Me Simeon ei goe ei mei beilange a aisane Salemo maido,

<sup>29</sup> “Bibi Taula, eau a bibi na pipigona minio, me seidei oo longo agu na manoa, ma lilogu ei ni mea muina, tomane lisa oo vei.

<sup>30</sup> Matagu itesi a golu o goli mina gualeliuna vanunua ma tavivine vuso.

<sup>31</sup> Oo masusulu a golu iede na matane sou a abuna vanunua ma tavivine vuso.

<sup>32</sup> Ei a muada tasa, me ei ni bilii a muada usino na vanunua mine sou a abuna sea,

me ei ni bilii a aisa buo usino ne sou e Israel, iede sou a abuna vanunua ma tavivine minio.”

<sup>33</sup> Tamane Iesu pilu e tinana su longe a inade Simeon ei goli usino ne ei iodo, me su saga i.

<sup>34</sup> Me Simeon ei maibalave sou, me ei vei le Maria, tinana bibaini, maido, “Longe. Salemo ei vileale a bibaini ieli ni toe Israel makuba ne sou bosa, me ei ni toe makuba ne sou ilisi lou. Ei ni muina tomane a matailala tasa, ma vanunua makuba ne sou adegegeli e ei.

<sup>35</sup> Maido ma damutatalana ovu mina vanunua makuba ei ni palea muada. Ma viso tasa ei ni ubi a buumu tamai.”

<sup>36</sup> A tavine profet tasa e Ana, ei e natune Panuel mina abuna ne Aser. Ei buo selesi. Lisa ei taulai, me ei muina a avala padilua pilu e suana.

<sup>37</sup> Me mulimuli suana i mate, me ei buasu. Seidei a avalana i savulu pantolu timana iva. Ana ei ma asutasetase ete a luma mine Salemo. Ei vavaevae a inani me ei kaka moni a muina, me ei lapitole a pipigona mine Salemo na oaso me na lodo.

<sup>38</sup> Na ilala do ei tamai ei asu agavuale a bibaini me ei toledadangi e Salemo. Me ei veimuade a inade na bibaini iedo na vanunua ma tavivine vuso sou magitali e Salemo ni gualeliu e sou mine Ierusalem.

*Iosep ei veteliu usino ne Nasaret*

<sup>39</sup> Sou goliosi a golugolu vuso tomane a binea mine Bibi Taula ei vei, sou veteliu usino ne Nasaret mine Galili.

<sup>40</sup> Ma bibaini ei palea buo me ei sagali. Ei isa a muadana doana makuba, ma dinodo mine Salemo ino muata ne ei.

\* 2:23 Gualeliuna 13:2, 12 † 2:24 Pipigona mina Prist 5:11

*Bibi baine e Iesu ei gali utilo na luma mine Salemo*

<sup>41</sup> Na avalavala vuso tamane Iesu me tinana su asuasusino ne Jerusalem mina niitena Malada buo na Asuleletasena.

<sup>42</sup> Ilala Iesu a avalana i savulu tasa timana lua, sou ogomuli a inigogona mina malada buo do me sou asu usino ne Jerusalem.

<sup>43</sup> Na ilala a malada buo mina kinaka do i pulu, sou veteliu usino na aubu. Moni a bibaine e Iesu ei saboa ino ne Jerusalem. Me tamana me tinana su ma muada oto i ve ei saboa ino ana.

<sup>44</sup> Su damu ve ei veteliu pilu a vanunua ma tavivine sanii, me sulu asu a malada tasa vululu. Mulimuli su tilomuli e ei balivua na abuna mine sulu me sou e tam-tamaine sulu.

<sup>45</sup> Sulu tilotilo, moni su ma ite ete ei. Maido me sulu veteliu usino ne Jerusalem mina tilomuline ei.

<sup>46</sup> Sulu tilotilo e ei mapigogoi a malada tolu, me mulimuli sulu ite ei ino lilo na luma mine Salemo. Ei ugu balivua ne sou a vanunua na matetengina. Ei longelongo a inade mine sou mei tagiliulu e sou tamai.

<sup>47</sup> Vanunua sou longe a inade minei, sou saga a muadana minei ma inade ei maliu le sou.

<sup>48</sup> Sulu ite ei me su saga mamau sele. Me tinana i vei lei maido, "Natugu, posa matina oo goli a inigogona maido usinani ne amilu? Lilone amilu i mavaa sele me amilu tilotilo e oo."

<sup>49</sup> Moni ei adeliu ane sulu maido, "Amulu tilomulimuli e eau ili? Nane amulu ma muada oto i, eau na muigu na luma mine Euma?"

<sup>50</sup> Moni e sulu ma muada oto a malibuuna inade ei goli le sulu odo.

<sup>51</sup> Ei veteliu pilu e sulu, me sou sibitala ne Nasaret, me taliulu ei ogomuli a inade mine sulu. Me tinana ei tau a inade vuso dolo na lilone ei me ei lapitole muina.

<sup>52</sup> Ma muadana minei ma vovone ei palea buo. Me Salemo ei kale sele ei ma vanunua tamai sou kale ei.

### 3

*Ioanes a bibi na maavvutuna i malongo a inade*

(Mat 3:1-12; Mak 1:1-8; Ioa 1:19-28)

<sup>1</sup> Na avala savulu tasa timana lima mine Sisar Taiberius ei ino a mapana mine Rom, e Pontius Pailat ei ino munugana mina niitealena avena buo ne Iudia. Na ilala do Herot ei muge a avena mine Galili. Me tasine ei e Pilip ei muge a avena ne Ituria me Trakonitis, me Lisanias ei muge a avena ne Abilene.

<sup>2</sup> Me Anas pilu e Kaiapas sulu a mapana prist. Na ilala do e Ioanes, natune Sekaraia, ei ino na avena a vanua boa, me Salemo i bilii a inade minei usino ne Ioanes.

<sup>3</sup> Maido me Ioanes ei asu na avena vuso ino agavuale a nanu e Iordan, mei malongo a inade usino na vanunua ma tavivine ne sou sauvule a lilone sou me sou guale a maavvutuna, me Salemo ni taulele a sinusu mine sou.

<sup>4</sup> Golu odo i palea tomane a inade ino na laulau mina profet e Aisaia,

"Na avena a vanua boa, a baligoluna bibi tasa ei tola maido,

'Masusulu a vea mine Bibi Taula.

Toebilelesi a vea minei.

<sup>5</sup> A maluluna vuso ne sou onevoni, me a loeloe vuso ne sou kesileletase utano. Vea vuso i makoko ne sou toebilelesi.

Ma vea vuso ei ma doana oto, ne sou toebilelesi iiti.

<sup>6</sup> Ma vanunua ma tavivine vuso ne sou ite a pipigona e Salemo ei ni goli mina gualeliune eitou.' ")\*

<sup>7</sup> Abuna vanunua ma tavivine makuba sou asu usinani mina gualena maavvutuna maino ne Ioanes, me ei ade ane sou maido, "Amutou a natatuna aliusu mamau, Salemo ei sinoa ane amutou me ei ni toegegeli e amutou. Sei vei le amutou namutou oava me mu asuleletase a ilala pagu odo ei kale ni palea le amutou?"

<sup>8</sup> Maido me namutou maite sou a vuavua sauvalena lilone amutou. Me umana ne amutou lange a inade ne amutou oto maido, 'Abraham ei e eisune tamane amiteu.' Eau vei le amutou, Salemo ei mapigogoi ni goli a vatu vuso ieli ni palea e natatune Abraham.

<sup>9</sup> Uaba inosi na vuna obu, ma obu vuso sou ma vua kubakuba oto, iede ne sou tale me ne sou lange usino na oavi."

<sup>10</sup> Vanunua ma tavivine sou longe a inade mine Ioanes, me sou tagi e ei maido, "Nमितेु goli a sava?"

<sup>11</sup> Me ei maliu a inade usino ne sou maido, "Bibi ei isa a kinainai lua, ei ni bilii tasa usino na bibi ei ma isa oto i. Ma bibi ei isa a gona inani, ei tamai ni goli maido."

<sup>12</sup> Vanunua sanii mina gualena takis sou tamai sou asu usinani ne sou guale a maavvutuna. Me sou tagi e ei, "Magiligilina, namiteu goli a sava?"

<sup>13</sup> Me ei vei le sou maido, "Nanutou guale bilesi savuluna vatu tomane a vanunua na niitealena avena sou vei le amutou, me amutou ma lapualale lei sanii lou."

<sup>14</sup> Vanunua mina maubina sanii tamai sou tagi e ei, "Me ne amiteu goli a sava?" Me ei maliu a inade mine sou maido, "Amutou

\* 3:6 Aisaia 40:3-5

ma paaliali lei a vatu mine sou. Me amutou ma gologoli lei a aualana vavasana ane sou mina lapualena vatu mine sou. Namutou damutale maido a mapane amutou ei mapigogoi e amutou.”

<sup>15</sup> Vanunua ma tavivine sou ite a gologolu odo ma lilone sou ilisi me sou damutatala papai maido, “Nane Ioanes ei a bibi e Krais?”

<sup>16</sup> Maido me Ioanes ei malii a inade usino ne sou maido, “Eau maavuvuti e amutou a nanu moni. Moni mulimuli a bibi tasa ni asu usinani, ma sagaline ei i vululusi a sagaligu. Eau ma doana bibi oto mapigogoi eau na lube a mota na ubupolo minei. Ei ni maavuvuti e amutou a Maolona Nunu ma oavi.

<sup>17</sup> Ei ni asu usinani tomene a bibi ei lapitole a gona pakulina na limane ei mina taulelena noa vuso ino na vit minei. Me ei ni laipili a vit mina luma na vit. Moni a noana ei ni tuni na oavi ei ma matemate oto.”

<sup>18</sup> Ioanes ei veipale a malongolonga kubaana usino ne sou a vanunua ma tavivine, mei veisui lei a inade makuba sea tamai mina niubina lilone sou.

#### *Herot i tau e Ioanes na luma na tunuui*

<sup>19</sup> Ioanes ei adesinoa ane Herot a munugana niitealena avena na inigogona pagu ei goli le Herodias, ei e susune tasine Herot, me na inigogona sanii pagu lou Herot i goli tamai.

<sup>20</sup> Me Herot ei adesui a inigogona pagu tasa lou muata na inigogona pagu vuso ei goli e sou iodo, ei tau e Ioanes na luma na tunuui.

#### *Ioanes i maavuvuti e Iesu (Mat 3:13-17; Mak 1:9-11)*

<sup>21</sup> Ilala vanunua ma tavivine vuso sou guale a maavuvutuna, Iesu tamai ei guale. Ei guale a maavuvutuna me ei kaka, na ilala do a langi ei peo,

<sup>22</sup> ma Maolona Nunu i sivo utano ne ei tomene a manu a kuau. Me maino na langi a tinola tasa i tola maido, “Oo e natugu. Eau kale sele oo. Lilogu ei mongemonge e oo.”

#### *Aisane sou a abuna mine tubutubune Iesu*

*(Mat 1:1-17)*

<sup>23</sup> Ilala Iesu ei soke a pipigona, avala ne ei tomene savulu tolu. Me sou a vanunua ma tavivine sou damu i ei e natune Iosep. Iosep ei e natune Heli,

<sup>24</sup> me Heli ei e natune Matat, me Matat ei e natune Livai, me Livai ei e natune Melki, me Melki ei e natune Ianai, me Ianai ei e natune Iosep,

<sup>25</sup> me Iosep ei e natune Matatias, me Matatias ei e natune Amos, me Amos ei e

natune Nahum, me Nahum ei e natune Esli, me Esli ei e natune Nagai,

<sup>26</sup> me Nagai ei e natune Mat, me Mat ei e natune Matatias, me Matatias ei e natune Semen, me Semen ei e natune Iosek, me Iosek ei e natune Ioda,

<sup>27</sup> me Ioda ei e natune Ioanan, me Ioanan ei e natune Resa, me Resa ei e natune Serubabel, me Serubabel ei e natune Sealtiel, me Sealtiel ei e natune Neri,

<sup>28</sup> me Neri ei e natune Melki, me Melki ei e natune Adi, me Adi ei e natune Kosam, me Kosam ei e natune Elmadam, me Elmadam ei e natune Er,

<sup>29</sup> me Er ei e natune Iosua, me Iosua ei e natune Elieser, me Elieser ei e natune Iorim, me Iorim ei e natune Matat, me Matat ei e natune Livai,

<sup>30</sup> me Livai ei e natune Simeon, me Simeon ei e natune Iuda, me Iuda ei e natune Iosep, me Iosep ei e natune Ionam, me Ionam ei e natune Eliakim,

<sup>31</sup> me Eliakim ei e natune Melea, me Melea ei e natune Mena, me Mena ei e natune Matata, me Matata ei e natune Natan, me Natan ei e natune Devit,

<sup>32</sup> me Devit ei e natune Iesi, me Iesi ei e natune Obet, me Obet ei e natune Boas, me Boas ei e natune Salmon, me Salmon ei e natune Nason,

<sup>33</sup> me Nason ei e natune Aminadap, me Aminadap ei e natune Atmin, me Atmin ei e natune Arni, me Arni ei e natune Hesron, me Hesron ei e natune Peres, me Peres ei e natune Iuda,

<sup>34</sup> me Iuda ei e natune Iekop, me Iekop ei e natune Aisak, me Aisak ei e natune Abraham, me Abraham ei e natune Tera, me Tera ei e natune Nahor,

<sup>35</sup> me Nahor ei e natune Seruk, me Seruk ei e natune Reu, me Reu ei e natune Pelek, me Pelek ei e natune Eber, me Eber ei e natune Sela,

<sup>36</sup> me Sela ei e natune Kainan, me Kainan ei e natune Arpaksat, me Arpaksat ei e natune Siem, me Siem ei e natune Noa, me Noa ei e natune Lamek,

<sup>37</sup> me Lamek ei e natune Metusela, me Metusela ei e natune Enok, me Enok ei e natune Iaret, me Iaret ei e natune Mahalalel, me Mahalalel ei e natune Kenan,

<sup>38</sup> me Kenan ei e natune Enos, me Enos ei e natune Set, me Set ei e natune Adam, me Adam ei e natune Salemo.

## 4

#### *Satan ei tove Iesu*

*(Mat 4:1-11; Mak 1:12-13)*

<sup>1</sup> Maolona Nunu ei vonu ne Iesu, me Iesu i veteliu maino ne Iordan. Ma Maolona Nunu i guale ei usino na avena a vanua boa.



<sup>2</sup> Iesu ei muina na avena a vanua boa mapigogoi a malada savulu iva, me Satan i tove ei. Na ilala do Iesu ei ma aani oto me ei vitolo.

<sup>3</sup> Me Satan i vei lei maido, "Mane oo e Natune Salemo, o ade ana vatu ieli ni sauvule mei ni palea a ulalu."

<sup>4</sup> Moni Iesu i malii lei maido, "Laulau mine Salemo ei vei maido, 'Vanunua ma tavivine sou ma mapigogoi ete ne sou mauli a ulalu moni.'\*"

<sup>5</sup> Me Satan i maasi e ei uata na loena, ma tabaa oto ei maite e Iesu a aveavena vuso na magamaga do.

<sup>6</sup> Me Satan ei vei lei maido, "Eau na bilii e oo a sagalina vuso ieli me a aisa buo. Golugolu vuso ieli sou minausi. Mane eau kale na bilii a bibi tasa, de eau na bilii e ei."

<sup>7</sup> Mane oo totopatualiale eau, eau na bilii e oo a golugolu vuso ie."

<sup>8</sup> Moni Iesu ei malii lei maido, "Laulau mine Salemo ei vei maido, 'Oo no totopatualiale Bibi Taula, Salemo minio, me oo no matano moni ne ei.'\*"

<sup>9</sup> Me Satan i maasi e Iesu usino ne Jerusalem me ei tau ei oata oto na luma mine Salemo. Me ei vei lei maido, "Mane oo e Natune Salemo, oo seu utano."

<sup>10</sup> Vuna maido, Laulau mine Salemo ei vei maido,

'Ei ni vei ane sou a bineanea minei ne sou ulage kube oo.

<sup>11</sup> Me ne sou sie oo

dae a vatu tasa ni ubi a ubumu.'\*"

<sup>12</sup> Me Iesu ei malii lei maido, "Laulau mine Salemo ei vei maido, 'Oo no ma tove-tove lei e Bibi Taula, Salemo minio.'§"

<sup>13</sup> Tauluna Satan ei tove Iesu a mata-matana tinovo do, ei ilisitase Iesu mei tilo a vea ni tove lei e Iesu.

*Iesu ei soke a pipigona ne Galili  
(Mat 4:12-17; Mak 1:14-15)*

<sup>14</sup> Na sagalina mina Maolona Nunu, Iesu ei veteliu usino na avena ne Galili. Me sou a vanunua ma tavivine ino na avena vuso do, sou longe a inade ve Iesu ei veteliu usino ne Galili.

<sup>15</sup> Ei pipigo a matetengine sou a vanunua ma tavivine na luma na kinaka mine sou e Iuda. Ma vanunua ma tavivine vuso sou beilange a aisane ei.

*Sou e Nasaret sou lilotivula ane Iesu  
(Mat 13:53-58; Mak 6:1-6)*

<sup>16</sup> Iesu ei asu usino ne Nasaret. Ei muina na aubu ei buo i. Maolona Malada mine sou e Iuda ei gali ulilo na luma na kinaka mine sou e Iuda. Ei magili ni gi,

<sup>17</sup> me sou bilii e ei a laulau mina profet e Aisaia. Ei pee a laulau mei poge a avena do ei isa a inade maido,

<sup>18</sup> "Maolona Nunu mine Bibi Taula ei eili pilu e eau,

vuna Bibi Taula ei singi a wel na letegu na malongo a malongolonga kubaana usino ne sou a kapelabe.

Me ei peltase eau na veipale a malamalana usino ne sou ino na luma na tunuu, me eau na toekube sou a mata ego ne sou gemu lou.

Ei peltase eau usinani mina taulelena mavaana i palea maino mine sou sanii.

<sup>19</sup> Me eau na veipale a dinodo mine Bibi Taula ei paleasi.'\*"

<sup>20</sup> Iesu ei vivili a laulau me ei bilii liu a bibi mina niitealene sou a laulau me ei ugu. Vanunua ma tavivine vuso ino na luma na kinaka mine sou e Iuda sou gemualepote moni e Iesu.

<sup>21</sup> Io ei vei le sou maido, "Inade na Laulau mine Salemo amutou longesi ie, seidei ei palea ivu."

<sup>22</sup> Me sou beilange aisana me sou saga a inade doadoana minei. Moni sou vei, "Bibi ieli ei e natune Iosep, io? Ei goli a matana inade maido matina?"

<sup>23</sup> Me Iesu ei vei le sou maido, "Nane namutou vei le eau a inade do, 'Bibi mina toekubena, oo no toekube a vovomu oto.' Tomane namutou vei le eau, 'Amiteu longesi a inade mina golugolu oo goli ne Kape-naum. Io seidei oo no goli nani na vuna aubu minio tamai.' "

<sup>24</sup> Me ei vei, "Eau vei ivu sele le amutou, vanunua sou ma tade ete a profet tasa na vuna aubu minei oto.

<sup>25</sup> Eau vei ivu sele ane amutou, na ilala mine Elaiia a langi ei sobo vuso ma adavu ma pu oto mapigogoi na avala tolu ma game pantasa, me a vitolona taula i palea na magamaga vuso. Na ilala do a buasu papaina ino ne Israel.

<sup>26</sup> Moni Salemo ei ma peltase ete Elaiia usino ne sou buasasu. Boa. Ei peltase ei usino na buasu ta na aubu e Sarepat mina avena buo e Saidon.

<sup>27</sup> Na ilala profet e Elisa, a vanunua papaina sou isa a sinobe a kolokolo ino ne Israel, moni sinobe mine sou ma pulu oto. Naman moni na avena buo mine Siria ei puiale."

<sup>28</sup> Vanunua vuso ino na luma mina kinaka ne sou e Iuda sou longe a inade do, me sou lilotivula mamau sele.

<sup>29</sup> Me sou ilisi me sou peltaselele Iesu usala na aubu buobuo. Me sou maasi e ei

\* 4:4 Binea 8:3 † 4:8 Binea 6:13 ‡ 4:11 Laulau na Inala 91:1 § 4:12 Binea 6:16 \* 4:19 Aisaia 61:1-2

uatasi na loena tasa a aubu buobuo ino i, me sou kale ne sou lange ei utano na babangi iodo.

<sup>30</sup> Moni ei ilisitase sou me ei asu balivua ne sou usinosi.

*Iesu ei taulele a nunu pagu na bibi tasa*  
(Mak 1:21-28)

<sup>31</sup> Io Iesu i asu utano ne Kapenaum ne Galili. Me na Maolona Malada vuso ne sou e Iuda ei matetengitengi e sou.

<sup>32</sup> Me sou saga mamau sele, vuna inade minei sagali.

<sup>33</sup> Bibi tasa ino na luma na kinaka mine sou e Iuda, a nunu pagu tasa ino ne ei. Me ei ngala vauta mamau sele maido,

<sup>34</sup> “Ae, Iesu mine Nasaret, oo kale a sava ne amiteu? Oo asu usinani no toegegeline amiteu? Eau muada e oo. Oo a maolona bibi mine Salemo.”

<sup>35</sup> Moni e Iesu ei adesinoa ana nunu pagu odo me ei vei lei maido, “Oo vale mo asutase a bibi ie.” Ma nunu pagu odo me ei goli a bibi iodo i bosa balivua ne sou me ei asutase a bibi iodo, me ei ma toegegeli etesi ei.

<sup>36</sup> Me sou vuso a vanunua ma tavivine sou saga, me sou maiadeade balivua ne sou oto maido, “Ede sei matana inade? Ei vei sagali ane sou a nunu pagu a aisa buo ma sagaline ei me sou ilisitase a bibi odo me sou asu.”

<sup>37</sup> Ma mapamulina vuso mina golugolu Iesu ei goli i vele bubula na avena vuso.

*Iesu ei toekube maulune Pita*  
(Mat 8:14-17; Mak 1:29-34)

<sup>38</sup> Iesu i ilisi mei asutase a luma na kinaka mine sou e Iuda, me ei gali ulilo na luma mine Saimon. Maulune Saimon ei isa a sinobe, ma vovo tuntunu. Me sou tagi e Iesu ni buloi e ei.

<sup>39</sup> Io Iesu i magili agavuale ei me ei adesinoa ana sinobe na vovo tuntunu. Ma sinobe i bualetase ei, ma tabaa oto a tavine do i ilisi me ei masusulu a gona inani mine sou.

*Iesu ei toekube a vanunua ma tavivine papaina*

<sup>40</sup> A oaso i solosolosi, sou maasi a vanunua sou isa a matamatana sinobe usino ne Iesu. Ei tau a limana muata ne sou a vanunua ma tavivine tastasa me ei toekube sou.

<sup>41</sup> Ma nunu pagu tamai sou ilisitase a vanunua ma tavivine papaina me sou ngala maido, “Oo e Natune Salemo.” Moni ei adesinoa ane sou me ei madetase sou ne sou ma adeade lou, vuna sou muada, ei e Kraisi.

*Iesu ei gaga na aubu sanii*  
(Mak 1:35-39)

<sup>42</sup> Na autupola siisii Iesu i ilisi mei asu usino na avena tasa a vanua boa. Me sou a vanunua ma tavivine sou tilomuli e ei,

ilala sou poge ei, sou madeuti e ei ni ma asutasetase lei e sou.

<sup>43</sup> Moni ei vei le sou maido, “Eau na veipale a malongolongona kubaana mina niitealalena mine Salemo ne sou a aubu sanii tamai. Salemo i peltase eau mina pipigona ie.”

<sup>44</sup> Me ei malongo a inade na luma na kinaka mine sou e Iuda mina avena ne Iuda.

## 5

*Iesu i toleale a munugana disaipel*  
(Mat 4:18-22; Mak 1:16-20)

<sup>1</sup> Ilala tasa Iesu ei magili na mado mina pou na nanu e Genesaret, ma vanunua ma tavivine papaina sou asuale ei mina nilongena inade mine Salemo, me sou magili saaili sele ei.

<sup>2</sup> Me Iesu i ite a bot lua na mado, me a vanunua na gualena aia sou tautase a bot mine sou me sou loloiloi a vuo.

<sup>3</sup> De Iesu ei sae na bot tasa, ei a bot mine Saimon. Me ei tagi e Saimon ni suitase a bot ni veletase sape a mado. Me Iesu i ugu na bot me ei matetengi a vanunua ma tavivine.

<sup>4</sup> Ei matetengi e sou pulu, ei vei le Saimon maido, “Vole usino balivua na nanu, me mu lange a vuo utano mina gualena aia.”

<sup>5</sup> Me Saimon vei maido, “Bibi buo, na lodo amiteu pipigo sagali sele mapigogoi malada, me amiteu ma poge ete a aia tasa. Moni eau na ogomuli a inademu me eau na lange a vuo.”

<sup>6</sup> Sou goli maido me sou guale a aia papaina sele. Me a vuo bisii moni ni mautu.

<sup>7</sup> Maidolo me sulu toleale tamtamaine sulu ino na bot tasa sea ne sou vole usinani mina buloine sou. Me sou vole maino sou totongi a aia na bot. Me a bot lua su vonu sele me bisii moni ne sulu palolo.

<sup>8</sup> Saimon Pita ei ite, mei totopatulu agavuale a ubune Iesu me ei vei, “Bibi Taula, o ilisitase eau. Eau a bibi na sinusu.”

<sup>9</sup> Me ei pilu e tamtamaina sou saga gegelu sele a aia makuba sou guale.

<sup>10</sup> Tamaine Saimon e Iemus pilu e Ioanes, natune Sebedi, sulu tamai su saga. Iesu ei vei le Saimon maido, “Oo ma laelae lou. Mulimuli oo no lapuale vanunua ma tavivine usinani minau.”

<sup>11</sup> De sou vole ulilo me sou ontola me sou ilisitase a golugolu vuso mine sou me sou ogomuli e Iesu.

*Iesu ei toekube a bibi tasa ei isa a sinobe a kolokolo*

(Mat 8:1-4; Mak 1:40-45)

<sup>12</sup> Na ilala tasa Iesu ino na aubu buobuo tasa, ma bibi tasa ino, ei isa a sinobe a kolokolo i makuba sele na vovone ei. Ei ite Iesu, me ei totopatulu me ei tapute a laguna utano na magagama me ei vei le Iesu maido,

“Bibi Taula, mane o kale, oo mapigogoi no toekube eau na alaba.”

<sup>13</sup> Me Iesu i tau a limana ne ei mei vei lei maido, “Eau kale. Oo no palea alaba.” Ma tabaa oto sinobe a kolokolo i bualetase a bibi iedo, me ei alaba lou.

<sup>14</sup> Me Iesu ei vei sagali le ei maido, “Oo ma veivei lei ana bibi tasa a golu i palea le oo ie. O asu maite a vovomu usino na prist, me o goli a niabi tomane Moses ei vei.”

<sup>15</sup> Moni a mapamulina mina golu Iesu ei goli ei vele bubula sele. Maido ma vanunua papaina sou asu usinani mina nilongena inade minei, me mine ei ni taulele a sinobe mine sou.

<sup>16</sup> Moni ilala sanii ei asu usino na avena a vanua boa me ei kaka.

*Iesu ei toekube a bibi tasa limana ma ubuna i pagu*

(Mat 9:1-8; Mak 2:1-12)

<sup>17</sup> Malada tasa Iesu ei matetengitengi a vanunua ma tavivine, sou e Parisi me sou a vanua na matetengina mina binea sou ino sou ugu. Sou asu usinani maino ne Ierusalem ma abuu vuso ne Galili me Iudia. Ma sagalaina mine Bibi Taula ei ino ne Iesu, me ei toekube e sou a vanunua ma tavivine.

<sup>18</sup> Ma vanua sanii sou tabule a bibi tasa na mavutavutana. Tuatuana bibi odo i mamate vuso. Sou kale ne sou tau e ei agavuale Iesu,

<sup>19</sup> moni sou ma poge ete a vea na maasine ei usino, vuna mui boa. Maidolo me sou sae uata na mapa na luma me sou labevuselele a avena tasa mina mapa na luma, me sou volipui a bibi pilu a poso. Me sou tau e ei masae na lagune Iesu.

<sup>20</sup> Iesu ei ite a silimulina mine sou, me ei vei, “Tamaigu, eau taulelesi a sinusu vuso minio.”

<sup>21</sup> Sou a vanua na muadana binea me sou e Parisi sou soke a adepapaina maido, “Bibi iede ei e sei mei kale ni guale a muine Salemo mei goli a inade ie? Bibi tasa i ma mapigogoi ete ni taulele a sinusu. Salemo tasa moni ei mapigogoi.”

<sup>22</sup> Iesu ei muadasi a damutatalana mine sou, me ei adeliu ane sou maido, “Vuna matina amutou damutala papai na lilone amutou?”

<sup>23</sup> Mane eau vei ve, ‘Eau na taulele a sinusu vuso minio’ ue ‘O ilisi mo asu’, sei inade lua li i ma sana oto na vei?

<sup>24</sup> Moni eau vei ane amutou maido, Natuna Bibi ei isa a sagalaina na taulelena sinusu na magamaga ie.” Me Iesu ei vei ana bibi a tuatuana i mate do maido, “Eau vei lio, o ilisi o guale a mavutavutana minio mo asu usino na luma minio.”

<sup>25</sup> Ma tabaa oto bibi iodo i ilisi na matane sou a vanunua ma tavivine me ei guale

a mavutavutana minei. Me ei beilange a aisane Salemo me ei asu usino na luma minei.

<sup>26</sup> Me sou vuso a vanunua ma tavivine sou saga sele. Me sou beilange a aisane Salemo me sou lae sele me sou vei maido, “Seidei eitou ite a matana golu sea sele i palea.”

*Iesu i toleale Livai*

(Mat 9:9-13; Mak 2:13-17)

<sup>27</sup> Mulimuli Iesu i asu usino me ei ite a bibi tasa mina gualena takis ei ugu na luma na gualena vatu. Aisana bibi edo e Livai, me Iesu ei vei lei maido, “Oo ogomuli e eau.”

<sup>28</sup> Me ei tautase a golugolu vuso me ei ilisi me ei ogomuli e Iesu.

<sup>29</sup> De Livai i masusulu a inani tasa buo ane Iesu na luma minei. A vanunua papaina mina gualena takis me sou a vanunua sanii tamai sou ugu me sou aani pilu e sulu.

<sup>30</sup> Me sou e Parisi pilu e sou a vanua na muadana binea, sou ade papai ane sou a disaipel mine Iesu. Sou vei, “Posa matina amutou aaniani mu ininu pilu e sou a vanua na gualena takis me sou a vanua na gunolina sinusu?”

<sup>31</sup> Me Iesu i adeliu ane sou maido, “Sou a vanunua ma isa oto a sinobe, sou ma tolealale ete a bibi na toekubena. Sou a vanunua sou sobe moni sou tolealale a bibi na toekubena.

<sup>32</sup> Eau ma asu oto usinani mina tolealena vanunua sou bilesi. Eau asu usinani mina tolealena vanua na sinusu ne sou sauvule a lilone sou.”

*Inigogona mina vavaena inani*

<sup>33</sup> Ma vanunua sou vei le Iesu maido, “Ilala papaina sou a disaipel mine Ioanes sou vavae e sou a gona inani me sou kaka. Me sou a disaipel mine sou e Parisi tamai sou goligoli simaido. Moni sou a disaipel minio sou aaniani me sou ininu.”

<sup>34</sup> Me Iesu ei vei le sou maido, “Amutou mapigogoi namutou vavae a inani na ilala bibi na taulaina ei saboa ino pilu e amutou, io? Boa.

<sup>35</sup> Na ilala sou guale a bibi iodo usinosi, de na ilala dolo ne sou vavae e sou a inani.”

<sup>36</sup> Iesu ei vei le sou a adetinovona tasa maido, “Bibi ei ma gualeale ete a maduna malo alaba maino na kinainai alaba me saisobe a masingena malo mumugu. Mane ei goli maido, ei ni toegegesi a kinainai alaba, me a maduna malo alaba iodo sou ma mapigogoi ete ni sai pili a kinainai mumugumu.”

<sup>37</sup> Ma bibi tasa i ma singsingi ete a vain alaba na uliulina meme i mumugu. Mane ei goli maido, a vain alaba ni utisinge a uliulina meme ma vain ni singi. Ma uliulina meme ni masingene vuso.

<sup>38</sup> Maidolo me ne sou singi a vain alaba na uliulina meme alaba.

<sup>39</sup> Ma bibi ei iniosi a vain mumugumugu, ei ma kale ete a vain alaba. Ei veivei ve, 'Mumugumugu ei doana.' "

## 6

*Inigogona mina mavaluna pipigona na Maolona Malada mine sou e Iuda*  
(Mat 12:1-8; Mak 2:23-28)

<sup>1</sup> Na Maolona Malada tasa mine sou e Iuda, Iesu i asu balivua mina mauma na vit. Me sou a disaipel minei sou logo a vuavua vit, me sou loi a limane sou mina taulelena uliulina vit, me sou ani.

<sup>2</sup> Moni sou e Parisi sanii sou vei maido, "A inigogona maidolo i unana a bibi ni goli na Maolona Malada, moni posa matina amutou goli?"

<sup>3</sup> Me Iesu ei adeliu ane sou maido, "Amutou ma gi ete a laulau Devit ei goli na ilala ei vitolo pilu e sou a abuna minei?"

<sup>4</sup> Devit i gali ulilo na luma mine Salemo me ei gualu e ulalu odolo sou tautau muina na lagune Salemo, ulalu iedo ei maolo me prist moni ni ani, moni Devit ei ani mei bilii e sou a abuna minei tamai."

<sup>5</sup> Me Iesu ei vei lou ane sou maido, "Natuna Bibi ei a Tamana Maolona Malada."

*Na Maolona Malada ne sou e Iuda Iesu i toekube a bibi limana i mamau*  
(Mat 12:9-14; Mak 3:1-6)

<sup>6</sup> Na Maolona Malada tasa lou mine sou e Iuda Iesu ei gali ulilo mina luma na kinaka ne sou me ei matetengtengi. Ma bibi tasa ino, limana e gata i matesi.

<sup>7</sup> Sou a vanua na muadana binea me sou e Parisi sou ulage iiti e Iesu, nane ei ni toekube na Maolona Malada, vuna sou kale ne sou poge a vea mina vavasana ane Iesu.

<sup>8</sup> Moni Iesu i muada a damutatalana mine sou, me ei vei ana bibi a limana matesi maido, "O ilisi mo magili nani na matane sou a vanunua." Io bibi edo ei ilisi me ei magili.

<sup>9</sup> Me Iesu ei vei le sou maido, "Nane na Maolona Malada neitou goli a inigogona doana ue a inigogona pagu? Nane neitou toekube a vanunua ue toegegeli e sou? Eau tagi e amutou sei golu ei doana?"

<sup>10</sup> Me Iesu i gemuale sou a vanunua vuso, me ei vei ana bibi iedo maido, "Toebilelesi a limanu." Bibi ei goli maido, me a limana i doana lou.

<sup>11</sup> Moni sou Parisi sou lilotivula sele me sou maiademuli ne sou oto maido, "Neitou toematine e Iesu?"

*Iesu i matoale a aposel savulu tasa timana lua*

(Mat 10:1-4; Mak 3:13-19)

<sup>12</sup> Na ilala iedo Iesu ei asu uata na loena tasa ni kaka. Na lodo vuso do ei kaka.

<sup>13</sup> Na autupola, ei toleale sou a disaipel minei usinani ne ei. Me ei matoale savulu tasa timana lua mei maaise sou a aposel.

<sup>14</sup> E Saimon, me Iesu i maaise ei Pita. Me Andru, ei e tasine Saimon, me Iemus, Ioanes, Pilip, Batolomu,

<sup>15</sup> Matiu, Tomas, Iemus ei e natune Alpius, me Saimon, sou toleale ei na abuna minei Selot,\*

<sup>16</sup> me Iudas ei e natune Iemus, me Iudas Iskariot, ei tau e Iesu na limane sou so butuale ei.

*Iesu ei toekube a vanunua ma tavivine makuba*

(Mat 4:23-25)

<sup>17</sup> Iesu pilu e sou so sivo mei magili na tia pilu e sou abuna disaipel taula minei. Ma vanunua ma tavivine papaina sele sou maino ne Iudia, Ierusalem me na mado ne Tair me Saidon.

<sup>18</sup> Sou asu usinani ne sou longe a inade minei, me ei toekube a vanunua sou sobe. Ma vanunua ma tavivine sou isa a nunu pagu i toegegeli e sou, Iesu i toekube sou tamai.

<sup>19</sup> Ma vanunua ma tavivine vuso sou kale a tinauna limane sou ne ei, vuna maido ei isa a sagagalina na toekubekubena vanunua vuso.

*Kapelabena vanunua ne sou mongemonge*

(Mat 5:1-12)

<sup>20</sup> Me Iesu i gemuale sou a disaipel minei mei vei maido,

"Amutou a kapelabena vanua, namutou mongemonge,

vuna avena mina niitealalena mine Salemo ei mine amutou.

<sup>21</sup> Amutou a abuna eili mu vitolo seidei, namutou mongemonge, vuna mulimuli namutou masu.

Amutou a abuna seidei amutou tangitangi, namutou mongemonge, vuna mulimuli namutou polipoli.

<sup>22</sup> Ne amutou mongemonge na ilala a vanunua ne sou ite amutou ogomuli e Natuna Bibi me ne sou lilogegelu sele ane amutou,

me sou peltaselele amutou me sou lobe amutou, me sou damu ve amutou tomane a vanunua pagu.

<sup>23</sup> "Na ilala iedo namutou mongemonge sele me namutou seuseu. Mapa mine amutou i buo sele uata na langi. Eिसusune

\* 6:15 Selot ei a abuna tasa ne Israel i maubi pilu e Rom mina peltaselelene sou na magamaga mine Israel.

sou tamai goliosi a inigogona tasa moni usino ne sou a profet.

<sup>24</sup> “Moni e amutou a vanunua na vuvutina, mavaana buo ei ni palea le amutou.

Amutou gualesi a golu mina toekubena lilone amutou.

<sup>25</sup> Amutou seidei amutou aani me amutou masu, mavaana buo ei ni palea le amutou.

Mulimuli namutou vitolo.

Amutou vanunua seidei amutou polipoli, mavaana buo ei ni palea le amutou.

Mulimuli namutou lilomomolu me mu tangi.

<sup>26</sup> Ilala vanunua vuso sou ade kuba ane amutou, mavaana buo ei ni palea le amutou.

Vuna eisuusne sou tamai sou goliosi a inigogona tasa moni ane sou a aualana profet.

*Inigogona mina kinalene sou a butu  
(Mat 5:38-48, 7:12)*

<sup>27</sup> “Eau vei le amutou a vanunua mu longe eau, namutou kale sou a butu mine amutou, me namutou goli a inigogona doana ne sou a vanunua sou lilogegelugelu ane amutou.

<sup>28</sup> Amutou maibalave a vanunua sou adegegeli e amutou. Me namutou kake Salemo ane sou a vanunua sou toegegeli e amutou.

<sup>29</sup> Mane a bibi tasa i sapegalegale a galemu tasa, o no sauvule tasa tamai usino ne ei. Mane a bibi tasa i lapuale a kinainai usalasila minio, muina ni guale a kinainai ulilolilo tamai.

<sup>30</sup> Oo no bilii e sou a golugolu sou tagi e oo, me oo no ma tagiliuluu lou i.

<sup>31</sup> Amutou goli usino ne sou tomane amutou kale ne sou goli usinani ne amutou.

<sup>32</sup> “Mane amutou kale moni a vanunua sou kale amutou, de amutou ma damu-damu lou ve Salemo ei ni maibalave amutou. A vanua na sinusu sou tamai sou kale a vanunua sou kale sou.

<sup>33</sup> Me mane amutou goli a inigogona doana usino na vanunua sou goli a inigogona doana usino ne amutou, de sei ni damu ve amutou vanunua ma tavivine doanana? Sou a vanua na sinusu tamai sou goli a inigogona tasa moni.

<sup>34</sup> Me mane amutou bilii e sou a vanunua a ginau amutou damu sou mapigogoi ne sou malii a ginau, io sei ni damu ve amutou vanunua doanana? Vanua na sinusu sou tamai sou bilii a ginau usino na vanua na sinusu, vuna sou damu ve abuna vanua do ne sou malii a ginau ne sou.

<sup>35</sup> Moni amutou namutou kale sou a butu mine amutou. Namutou goli a inigogona doana usino ne sou. Amutou magau e sou me amutou ma damudamu lou ve ne sou

malii a ginau usino ne amutou. Mapa mine amutou ni buo sele. Me ne amutou muina e natatune Salemo oata oto sele, vuna ei goligoli a inigogona doana tamai usino na vanunua sou ma toledadangi ete ei me ane sou a butu.

<sup>36</sup> Namutou lilomuli e sou a vanunua ma tavivine, tomane Tamane amutou ei lilo-mulimuli e sou.

*Ma vilemulialale lei a vanunua  
(Mat 7:1-5)*

<sup>37</sup> “Amutou ma vilemulialale lei a inigogona mine sou, me ne sou ma vilemuliale lei e amutou. Me amutou ma vavasa lou ana vanunua me ne sou ma vavasa lou ane amutou. Namutou lilotase a sinusu mina vanunua, me ne Salemo ni lilotase a sinusu mine amutou.

<sup>38</sup> Namutou oabi a golugolu usino ne sou sea, me ne Salemo ni bilii e amutou a golugolu. Ei ni vileale doana sele usino ne amutou, mei ni onevoni sele, mei ni soetotole utano, mei ni mavoni sele mapigogoi a golugolu ni titigi, mei ni bilii e amutou. Tomane amutou vilemuliale a vanunua usino, na vilemulialena moni odo Salemo ni malii le amutou.”

<sup>39</sup> Me Iesu i bilii a adetinovona tasa ane sou maido, “Nane mata ego tasa ei mapigogoi ni maite a mata ego tasa sea a vea? Boa. Sulu pilu ne su bosa na aova.

<sup>40</sup> Bibaini na gualena matetengina ei ma vululusi ete a bibi na matetengina minei. Moni mane ei guale kubesi a matetengina, ei ni palea tasa moni tomane a bibi na matetengina minei.

<sup>41</sup> “Posa matina oo ite a molomolo baini ino na matane tamaimu, moni o ma muada oto a obu buo ino na matamu oto?

<sup>42</sup> Mane oo ma ite ete a obu buo ino na matane oo oto, posa matina oo mapigogoi no vei le tamaimu maido, ‘Tamaigu, eau na taulele a molomolo ino na matane oo?’ O a bibi mina ade iototona, palapala oo no taulele a obu buo ino na matane oo oto. Mulimuli oo no mapigogoi no gemu iiti mo osetase a molomolo baini ino na matane tamaimu.

*Obu pagu ei vualale a vuana i pagu  
(Mat 7:17-20, 12:34-35)*

<sup>43</sup> “Obu doana ei ma vualale ete a vuana pagupagu, tomane moni a obu pagu ei ma vualale ete a vuana i doana.

<sup>44</sup> Vanunua sou muada a obu tastasa na ilala sou gegemuale a vuavua ne sou oto. A mota ooloo i ma vualale ete a fik. Me a obu ooloo i ma vualale ete a vain.

<sup>45</sup> Tomane moni a bibi doana ei goligoli a inigogona doana na lilone ei. Moni a bibi pagu ei goligoli a inigogona pagu na lilone ei

tamai. Vuna, matana damutatalana ei vonu lilo, iedele asena i veipalele.

*Inigogona mina mamagilina luma  
(Mat 7:24-27)*

<sup>46</sup> “Vuna i matina amutou tole eau ‘Bibi Taula, Bibi Taula,’ moni amutou ma longemuli ete eau?”

<sup>47</sup> Eau na vei le amutou sei bibi i asuale eau mei longe a inadegu mei ogomuli e eau.

<sup>48</sup> Bibi odo ei tomane a bibi tasa i kale ni tige a luma. Palapala ei pesi a lulu, mei tau a baobao i damsoe sele a vatu taula. Ma ilala a sali bulabula ei palea me ei iune a luma do, ei ma mapigogoi ete ni talolo utano, vuna bibi iedo ei tige a luma i doana me sagali.

<sup>49</sup> Moni a bibi i longesi a inadegu me ei ma ogomuli ete, ei tomane a bibi tasa ei mamagili a luma na magamaga lealea moni. Mulimuli a sali bulabula i iune a luma do, me saga i ei tavuvu, me ei mamau vuso sele.”

## 7

*Iesu ei toekube a bibi na pipigona mina munuganuga na vanunua na maubina  
(Mat 8:5-13; Ioa 4:43-54)*

<sup>1</sup> Iesu ei malongo ane sou a vanunua ma tavivine pulu, me ei gali ulilo ne Kapenaum.

<sup>2</sup> Munuganuga tasa mina vanunua na maubina savulu sobo tasa ino, ei isa a bibi na pipigona tasa i sobe me bisii moni ei ni mate. Ei kale mamai a bibi na pipigona minei odo.

<sup>3</sup> Ei longe a inade ve Iesu ino, io ei peltase a bibi buo mine sou e Iuda usino ne ei ne sou tagi e ei ni asu usinani me ei toekube a bibi na pipigona minei.

<sup>4</sup> Sou sibitala le Iesu me sou vei sagali sele ane ei maido, “Mapigogoi oo no buloi ei.

<sup>5</sup> Ei kale mamaimai sele amiteu Iuda me ei tige a luma na kinaka mine amiteu.”

<sup>6</sup> Io Iesu i asu pilu e sou. Ei sibitala agaviosi na luma, me munuganuga do ei peltase tamtamaina ne sou ade ane Iesu maido, “Bibi Taula, muina oo mangava mamau sele. Eau ma doana bibi oto mapigogoi oo no gali ulilo na luma minau.

<sup>7</sup> Maido me eau ma damu oto ve eau mapigogoi na asu usino ne oo. Oo ade moni, ma bibi na pipigona minau ni kubaana lou.

<sup>8</sup> Vuna maido, eau tamai ea ino matano na bibi ei isa a aisa mina niitealene eau. Me eau oto eau isa a vanunua na maubina ino matano ne eau. Me eau vei ane tasa, ‘Oo asu,’ io ei ni asu. Mane eau vei ane tasa lou sea, ‘Oo asu usinani,’ io ei ni asu usinani. Na ilala eau vei ana bibi na pipigona minau, ‘Oo goli a pipigona de,’ io ei ni goli.”

<sup>9</sup> Iesu ei longe a inade do, me ei saga sele. Me ei sauvule me ei vei ana abuna vanunua ma tavivine taula sou ogomuli e ei iodo

maido, “Eau vei le amutou, lilo ne Israel eau ma ite ete a matana silimulina buo iedo.”

<sup>10</sup> Ma vanunua ei peltase sou usino do, sou asu liu usinani na luma, me sou ite a bibi na pipigona ei kubasi.

*Iesu ei mailisiliu a bibi alaba na aubu e Nain*

<sup>11</sup> Mulimuli sapa Iesu ei asu usino na aubu tasa aisana e Nain. Disaipel minei pilu a abuna vanunua ma tavivine taula sou asu pilu e ei.

<sup>12</sup> Ei pea agavi na tema buo na aubu, me ei poge a vanunua sanii sou tabulebule a aitolana bibi tasa. Tinana bibi ei isa a natuna tasa moni iedo, me ei buasu. Ma abuna vanunua ma tavivine taula mina aubu do sou pilu a tavine do.

<sup>13</sup> Iesu, Bibi Taula i ite a tavine do, me ei lilomuli sele ei, me ei vei ana tavine do maido, “Oo ma tangitangi lou.”

<sup>14</sup> Me ei asu agavi mei tau a limana na poso na minate. Ma vanunua sou tabulebule do sou magili, Iesu ei vei, “Bibi alaba, eau vei lio, oo ilisi.”

<sup>15</sup> Me ei ilisi me ei ugu, me ei soke a inade. Me Iesu ei bilii liu e ei usino ne tinana.

<sup>16</sup> Maido ma vanunua ma tavivine vuso sou lae, me sou beilange a aisane Salemo. Me sou vei, “A profet buo ei paleasi balivua ne eitou. Salemo i asuosi usinani mina buloina vanunua ma tavivine minei.”

<sup>17</sup> Maido ma mapamulina Iesu ei goli iedo i vele bubula lilo ne Iuda ma avena maisaba tamai.

*Ioanes mina maavuvutuna i peltase a disaipel lua usino ne Iesu  
(Mat 11:2-19)*

<sup>18</sup> Disaipel mine Ioanes sou vei ane ei a golugolu vuso do Iesu ei goli.

<sup>19</sup> Me Ioanes ei toleale a disaipel lua minei, me ei peltase sulu usino ne Bibi Taula. Me sulu tagi e ei maido, “Oo a bibi e Salemo ei peltase usinani, ue ne amiteu magitali e tasa sea?”

<sup>20</sup> Bibi lua do su sibalalasi ne Iesu, me su vei, “Ioanes mina maavuvutuna ei peltase amilu usinani ne oo, me ei kale ni tagi e oo maido, ‘Oo a bibi e Salemo ei peltase usinani, ue ne amiteu magitali e tasa sea?’”

<sup>21</sup> Na ilala do Iesu ei toekube a vanunua ma tavivine makuba sou isa a sinobe ma davutina, ma vanunua sou isa a nunu pagu ino ne sou. Me ei toekube e sou a mata ego ne sou gemu.

<sup>22</sup> Me Iesu ei adeliu ane sulu, “Amulu asu mu vei le Ioanes a golugolu vuso amulu ite me amulu longe. Sou so mata ego sou gemu lou, me sou a ubune sou i mamau sou asu lou. Vanunua sou isa a sinobe a kolokolo i palea alaba lou, me sou a tagilane sou i sobo sou longe a inade. Vanunua sou matesi, sou

ilisiliu, me sou a kapelabena sou longe a malongolongona kubaana.

<sup>23</sup> Bibi ei ni mongemonge mane silimulina minei i ma bosa oto a pipigona eau goli."

<sup>24</sup> Ilala a disaipel lua mine Ioanes su asuosi, Iesu ei vei ana vanunua ma tavivine e Ioanes, "Vuna matina amutou asu usino na avena a vanua boa? Amutou asu a niitena avivili ei une a tabua tasa?"

<sup>25</sup> Amutou asu mina niitena sei golu? Amutou asu mina niitena bibi tasa ei kai a kinainai doanana? Oite, vanunua sou kai a malasana kinainai me sou isa a golu doanana mina vovo, sou malumalu na luma mine sou a mapana.

<sup>26</sup> Moni amutou asu a niitena sava? A profet tasa? Iede moni. Eau vei le amutou, ei vululusi vuse sou a profet sanii sea.

<sup>27</sup> Na bibi moni iodo Laulau mine Salemo i vei maido,

'Oite, eau na peltase a bineanea minau pala ane oo,

ei ni masusulu a veamu.\*

<sup>28</sup> "Eau vei le amutou maido, bibi tasa boa ei vululusi e Ioanes, moni a bibi ei alabaini sele lilo na niitealalena mine Salemo, ei vululusi e Ioanes.

<sup>29</sup> "Vanunua ma tavivine pilu a vanua na gualena takis sou longesi a inade do, me sou vei ve, 'Inigogona mine Salemo ei bilesi vuso.' Sou vei maidolo, vuna sou gualesi a maavuvutuna maino ne Ioanes.

<sup>30</sup> Moni sou e Parisi ma vanua na muadana binea sou lametase a vea doana mine Salemo, me sou ma guale ete a maavuvutuna ne Ioanes.

<sup>31</sup> "Maido me eau na goli sei matana adetinovona? Vanunua ma tavivine na ilala seidei sou tomane sei matana vanunua?"

<sup>32</sup> Sou tomane selebanini sou ugu na muina viepiluna me sou tola ane selebanini sanii sea maido,

'Amiteu pusi a vivigo, moni amutou ma tilia oto.

Me amiteu ala dododo, moni amutou ma tangi oto.'

<sup>33</sup> "Vuna Ioanes bibi na maavuvutuna ei maino, me ei ma ani ete a ulalu mei ma inini ete a vain, me amutou vei ve, 'A nunu pagu ino ne ei.'

<sup>34</sup> Natuna Bibi ei asu usinani, me ei aani me ei oinu, me amutou vei ve, 'Oite, a bibi mina anipepeina sele, me a bibi mina niinuna vain mapapaina sele. Ei e tamaine sou a vanua na gualena takis me na vanua na sinusu.'

<sup>35</sup> Amutou veivei simaido, moni a vanunua ma tavivine sou guale a muadana

mine Salemo sou maite e eitou maido, muadana minei ei ivu sele."

### *Tavine tasa ei savei a ubune Iesu*

<sup>36</sup> Parisi tasa ei kake Iesu ni aani pilu e ei, me Iesu i gali ulilo na luma mine Parisi mei ugu a inani.

<sup>37</sup> Tavine tasa ei a tavine na sinusu na aubu buo. Ei muada ve Iesu ei aani na luma mine Parisi, maido ma tavine do ei lapitole a taogo a vatu ei isa a nanu manginangina doana ino i.

<sup>38</sup> Me ei magili mamuli na ubune Iesu, mei tangitangi, matananuna i kokolo na ubune ei, mei saveitagase a aivuna letene ei, me ei gamumi a ubune ei, me ei singi a nanu manginangina na ubune ei.

<sup>39</sup> Parisi ei toleale Iesu usinani ne ei, ei ite do me ei vei le ei oto, "Mane a bibi ieli ei a profet, ei ni muada a inigogona mina tavine dolo i tau a limana ne ei, ei a tavine mina gunolina sinusu."

<sup>40</sup> Iesu ei vei lei maido, "Saimon, eau isa a inade tasa eau kale na bilii e o." Me Saimon ei vei, "Magiligilina, oo vei."

<sup>41</sup> "Bibi lua isa a ginau na bibi tasa. Tasa ei isa a ginau savulusobo lima denarii, me tasa ei isa a ginau savulu lima denarii.

<sup>42</sup> Sulu ma mapigogoi ete ne su maliu a ginau ma bibi iedolo ei taulele a ginau mine sulu. De sei mine sulu ni kale mamai e ei?"

<sup>43</sup> Saimon ei sie a inade maido, "Eau damutala maido bibi ei isa a ginau taula minei." Me Iesu ei vei le ei, "Damutatalana minio i bilesi."

<sup>44</sup> Me Iesu ei sauvule ei me ei gemuale a tavine do, me ei vei le Saimon maido, "Oo ite a tavine ie? Eau gali ulilo na luma minio, me oo ma bilii ete eau a nanu mina loloina ubugu. Moni a tavine ieli ei loloi a ubugu a matananu ne ei. Me ei saveitagase a aivune ei.

<sup>45</sup> Oo ma gamumi ete eau. Moni na ilala eau gali ulilo, tavine ieli ei ma pulu oto a gamumina ubugu.

<sup>46</sup> Oo ma guale ete a nanu manginangina mo singi na letegu. Moni a tavine li ei guale a nanu manginangina usinani me ei singi na ubugu.

<sup>47</sup> Maido me eau vei lio, Salemo ei lilotase a sinusu papaina minei, vuna maido ei kale sele Salemo. Moni a bibi ei goli a sinusu baini me Salemo ei lilotase a sinusu minei, kinalene ei ni alabaini moni."

<sup>48</sup> Me ei vei ana tavine do maido, "Eau taulelesi a sinusu minio."

<sup>49</sup> Vanunua sou aani pilu e ei sou soke a inade balivua ne sou oto maido, "Bibi ieli e sei me ei taulelele a sinusu?"

\* 7:27 Malakai 3:1

<sup>50</sup> Me Iesu vei ana tavine do maido, “Silimulina minio ei gualeliu e oo. Oo asu me a lilomu ni mea.”

## 8

### *Tavivine sanii sou ogomuli e Iesu*

<sup>1</sup> Mulimuli sapa Iesu ei gaga na aubu buobuo ma aubu banini mei veipale a malongolongona kubaana mina niitealalena mine Salemo. Ma disaipel minei savulu tasa timana lua sou asu pilu e ei.

<sup>2</sup> Ma tavivine sanii, lisa Iesu ei taulele a nunu pagu mei toekube a sinobe mine sou sou tamai pilu e Iesu. Me Maria, sou tole ei Maria mina aubu Makdala, lisa Iesu ei taulele a nunu pagu padilua ne ei,

<sup>3</sup> me Ioana ei e susune Kusa, ei a bibi na itealalena mina luma mine Herot, me Susana ma tavivine papaina sea sou buloi e sou a golugolu mine sou.

*Iesu ei adetinova a bibi ei lange a vuana vit na mauma*

*(Mat 13:1-9; Mak 4:1-9)*

<sup>4</sup> De abuna vanunua ma tavivine maino na aubu buobuo tastasa sou viepilu me sou asu usinani ne Iesu, me ei bilii e sou a adetinovona tasa,

<sup>5</sup> “Bibi tasa ei asu ni lange a vuavua vit minei. Ma ilala ei langelange, sanii sou pu na vea. Me a vanunua sou soetole, ma manumanu na langi sou ani.

<sup>6</sup> Me sanii sou pu na vatuvatu. Me a vit sou uusi, ma tabaa oto sou magolu, vuna ei ma isa oto a nanu.

<sup>7</sup> Me sanii sou pu utano balivua na mota ooloo. Me a mota ooloo sou uusi pilu me sou avisobe a vit.

<sup>8</sup> Me sanii sou pu utano na magamaga doana, me sou uusi, me sou vuale savulu sobo tasa.” Iesu ei veiosi me ei tola maido, “Bibi isa a tagilana ei ni longe.”

*Iesu ei veipale a masovana na adetinovona a vit*

*(Mat 13:18-23; Mak 4:13-20)*

<sup>9</sup> Sou a disaipel minei sou tagi e ei a malibuuna na adetinovona do.

<sup>10</sup> Me ei vei le sou maido, “Salemo ei bilii e amutou a muadana vuna inade ovu mina niitealalena mine Salemo, moni a vanunua ma tavivine sanii sou longelongo moni a adetinovona. Maido me,

‘Ne sou gemugemu, moni sou ma iteilale ete,

me ne sou longe, moni sou ma muada oto i.\*”

<sup>11</sup> “Vuna adetinovona ieli ei maido. Vuana vit ei a inade mine Salemo.

<sup>12</sup> Vuana vit sanii sou pu na vea, sou tomane a vanunua ma tavivine sou longe,

moni mulimuli e Satan ei asu mei taulele a inade ieli na lilone sou, maido me ne sou ma silimuli ete me Salemo ni ma gualeliu ete e sou.

<sup>13</sup> Ma vuana vit sanii sou pu na vatu, sou tomane a vanunua sou longe me sou mongemonge, moni a aane sou boa. Maido me sou silimuli na ilala ei boto moni, me na ilala mina tinovo sou bosa.

<sup>14</sup> Ma vuana vit sanii sou pu balivua na mota ooloo, sou tomane a vanunua sou longe, moni damutatalana mina golugolu na magamaga, ma vatu, ma munongena a golugolu mina magamaga sou avisobe a silimulina mine sou, me sou ma vua kuba oto.

<sup>15</sup> Ma vuana vit sanii sou pu na magamaga doana, sou tomane a vanunua sou longe iiti a inade me sou tau a inade do na lilone sou i kubaana me doana, me sou lapitole, me sou magili sagali me sou vua.

*Vanunua sou ma tau oovi ete a sulu matano na taogo*

*(Mak 4:21-25)*

<sup>16</sup> “Vanunua sou vai a sulu, sou ma taboboliboli ete a taogo, me sou ma tau ete matano na poso. Boa. Moni sou tautau muata na poso na sulu, ve a vanunua sou gali ulilo ne sou ite a muada odo.

<sup>17</sup> Golugolu vuso ino ovu, mulimuli ei ni palea, ma golugolu vuso a vanunua sou taboboli e sou, mulimuli ne sou muada, ma vanunua ne sou muada e sou.

<sup>18</sup> “Maido me amutou tilale namutou longe, mane a bibi tasa ei isa i a golu sanii, Salemo ei ni bilii sanii lou ne ei. Moni mane a bibi i ma isa oto a golugolu, Salemo ni taulele a golugolu ei damu ve ei isasi i.”

*Sei e tinane Iesu me tatasina?*

*(Mat 12:46-50; Mak 3:31-35)*

<sup>19</sup> Me tinane me tatasine Iesu sou asu usinani ne ei. Moni a vanunua ma tavivine papaina ino, maidolo sou ma mapigogoi ete ne sou asu viepilu e ei.

<sup>20</sup> Me vanunua sanii sou vei le Iesu maido, “Tinamu pilu e tatasimu sou sala, me sou kale ne sou ite oo.”

<sup>21</sup> Moni ei maliu a inade usino ne sou maido, “Vanunua ma tavivine sou longe a inade mine Salemo me sou ogomuli, sou e eina me tatasigu.”

*Iesu ei ade, ma avivili buo i mate*

*(Mat 8:23-27; Mak 4:35-41)*

<sup>22</sup> Malada tasa Iesu ei sae na bot tasa pilu e sou a disaipel minei, me ei vei le sou maido, “Neitou asu usino na lili na pou na nanu maino.” Maido me sou asu.

<sup>23</sup> Me sou volevole me Iesu ei ngolo. Ma avivili tasa buo i palea mina pou na nanu,

\* 8:10 Aisaia 6:9



ma nanu i sao mei vonu na bot me bisii moni ne sou palolo.

<sup>24</sup> Me sou asu sou toleluti ei, me sou vei maido, “Bibi Buo, Bibi Buo, bisii moni neitou palolo.” Me ei lutu me ei adesinoa ana avivili ma nanu taula do. Maido me a avivili mate, ma dasi i malilo.

<sup>25</sup> Me ei vei ane sou maido, “Silimulina mine amutou ive?” Sou lae, me sou damutatala papai, me sou maiade balivua ne sou maido, “Bibi ieli ei e sei? Ei ade sagali ana avivili ma nanu, me sulu longemuli a inadene ei.”

*Iesu ei taulele a nunu pagu na bibi tasa  
(Mat 8:28-34; Mak 5:1-20)*

<sup>26</sup> Tesu pilu e sou a disaipele sou sibitala na avena mine Gerasa. Aubu odo ino na lili maino ne Galili.

<sup>27</sup> Iesu ei ontola na mado, ma bibi tasa mina aubu buobuo dolo i asuale ei, ei isa a nunu pagu, me na ilala tabaa sele ei ma lavalava oto, me ei ma malutola oto na luma tasa moni. Ei muina na avena minate.

<sup>28</sup> Bibi iedo ei ite Iesu, me ei ngala me ei bosa agavuale a ubune Iesu, me ei tola vauta sele maido, “O kale no toematine e eau? Iesu, oo Natune Salemo oata oto sele. Eau tagi e oo, oo ma toegegeligeli lei e eau.”

<sup>29</sup> Ei tola maido, vuna maido Iesu ei vei sagaliosi ana nunu pagu ni asutase a bibi iedo. Nunu pagu ei lapitole e ei na ilala tabaa, me sou papalepale ei a sen ma palasobo me sou ulage ei. Moni ei sagimauti a sen ma palasobo, ma nunu pagu odo i toe ei velevele usino na avena baa.

<sup>30</sup> Iesu ei tagi e ei maido, “Aisamu e sei?” Me ei vei, “Aisagu a vanunua na maubina,” vuna nunu pagu papaina i gali ulilo minei.

<sup>31</sup> Ma nunu pagu sou odo sou maluu a inade usino ne Iesu maido, “Oo ma peltaselelele lei e amiteu usino na lulu a sinuana boa.”

<sup>32</sup> Ma abuna bolobolo taula tasa sou aanianani na loena tasa, me sou a nunu pagu sou nai sagali e Iesu, “O longo ane amiteu namiteu gali ulilo na bolobolo odo.” Io Iesu ei longo ane sou.

<sup>33</sup> Ma nunu pagu sou veletase a bibi iedo me sou gali ulilo na bolobolo, ma abuna bolobolo do sou vele vauta sele utano na babangi. Me sou bosa mina pou na nanu, me sou pumutu.

<sup>34</sup> Sou a vanunua mina itealena bolo sou ite a golu odo, sou oava me sou vei a inade usino na aubu buobuo ma aubu banini.

<sup>35</sup> Ma vanunua ma tavivine sou asu maino me sou ite sei golu ei palea, me sou asu usino ne Iesu, me sou ite a bibi iedo a nunu pagu sou veletasesi. Ei lavalava a malo ma damutatalana minei i muada, me

ei ugu agavuale a ubune Iesu. Vanunua ma tavivine sou lae.

<sup>36</sup> Me a vanunua sou ite a golu ei palea, sou mapamuli a golugolu Iesu ei goli usino na bibi iedo, lisa ei isa a nunu pagupagu, me seidei ei palea kubasi.

<sup>37</sup> Ma abuna vanunua vuso mina aveavena ne Gerasa, sou tagi e ei ni ilisitase sou, vuna sou lae mamau sele. Maidolo me Iesu ei sae na bot mei veteliu.

<sup>38</sup> Moni a bibi sou a nunu pagu sou veletase ei odo, ei tagi e Iesu ni longo ei ni ogomuli e ei, moni e Iesu ei peltase ei mei vei lei maido,

<sup>39</sup> “Oo asu liu usino na luma minio, me oo ademuada a golugolu vuso Salemo ei goli lio.” Ma bibi iedo ei asu, me ei veipale a golugolu vuso Iesu ei goli usino ne ei na aubu buobuo mine sou.

*Iesu ei mailisiliu a tavine baina tasa me ei  
toekube a tavine ei tuli a kinainai minei*

*(Mat 9:18-26; Mak 5:21-43)*

<sup>40</sup> Io Iesu ei veteliu, ma vanunua ma tavivine vuso sou mongemonge e ei, vuna sou ugutalitali e ei.

<sup>41</sup> Ma bibi tasa ei sibitala, aisana e Iairus. Ei a munuganuga tasa mina luma na kinaka mine sou e Iuda. Ei totopatulu agavuale a ubune Iesu, me ei tagi e Iesu sagali ni asu usino na luma minei.

<sup>42</sup> Ei isa a natuna tavine baina tasa moni, ma avalana i savulu tasa timana lua. Me bisii moni ei ni mate.

De Iesu ei asu usino ne ei, ma abuna vanunua ma tavivine sou vaitole sele ei.

<sup>43</sup> Ma tavine tasa ino, a dala i singi ne ei taliuliu me ei muina moni mapigogoi a avala savulu tasa timana lua. Moni a bibi tasa i ma mapigogoi ete ni toekube ei.

<sup>44</sup> Tavine dolo ei asu na taulune Iesu, me ei pige a aisuna kinainai, me matasa moni dala i pulu.

<sup>45</sup> Me Iesu ei tagu maido, “Sei pige a kinainai minau?” Me sou vuso sou vei, “Eau boa. Eau boa.” Me Pita i vei, “Bibi Buo, abuna vanunua ma tavivine taula eili sou magari sailli e oo, me sou vaitole sele oo.”

<sup>46</sup> Moni Iesu i vei, “Tasa i pige eau. Eau muada a sagalina ei bualetasesi e eau.”

<sup>47</sup> Tavine do ei muadasi i, ei ma mapigogoi ete ni ovu, mei palili me totopatulu agavuale Iesu. Me na matane sou a vanunua ma tavivine vuso ei veimuada a vuna ei tau a limana ne Iesu, me ma tabaa oto sinobe minei bualesi.

<sup>48</sup> Me Iesu ei vei ane ei maido, “Natugu, silimulina minio ei gualieluosi oo. Oo asu ma lilomu ni mea moni.”

<sup>49</sup> Iesu ei saboa ino adeade, ma bibi tasa mina munuganuga mina luma na kinaka mine sou e Iuda ei divi maino na luma mine

Iairus, mei vei lei, “Natumu ei matesi. Ma bililili ase a mavaana na bibi na matetengina.”

<sup>50</sup> Me Iesu ei longe mei vei, “O ma laelae lou. Oo silimuli moni, me natumu ei ni kuba.”

<sup>51</sup> Iesu ei asu usino na luma, me ei ma longo oto ana a vanua ne sou gali ulilo na luma pilu e ei. Moni Pita, Ioanes, Iemus me tamana tavine baini odo me tinana sou gali ulilo pilu e ei.

<sup>52</sup> Ma vanunua ma tavine vuso, sou lilo-muli sele e tavine baini odo me sou tangitangi. Moni e Iesu ei vei le sou maido, “Amutou ma tangitangi lou. Ei ma mate oto. Ei ngolo moni.”

<sup>53</sup> Me sou polivai sele ei, vuna maido sou muada i tavine baini ei matesi.

<sup>54</sup> Moni Iesu ei lapitole a limana tavine baini odo me ei tole ei maido, “Tavine baini, o ilisi.”

<sup>55</sup> Io nununa i veteliuale ei me ma tabaa oto ei ilisi. Me Iesu ei vei le sou ne sou bilii e ei a gona inani sanii.

<sup>56</sup> Me tamana me tinana sulu saga sele. Moni e Iesu ei ade sagali ane sulu maido, “Ma veivei lei ana bibi tasa a golu i palea ie.”

## 9

*Iesu ei bilii a pipigona usino ne sou a aposel savulu tasa timana lua*

(Mat 10:5-15; Mak 6:7-13)

<sup>1</sup> Iesu ei toleale a disaipel minei savulu tasa timana lua, me ei bilii e sou a sagalina i buo ma aisa mina taulelena nunu pagu vuso me mina toekubena vanunua.

<sup>2</sup> Me ei peltase sou usino mina malongona inade mina niitealalena mine Salemo, me mina toekubena vanunua sou sobe.

<sup>3</sup> Me ei vei le sou maido, “Amutou ma gualeale lei a golu tasa na inasu ne amutou na vea. Amutou ma iudidi lei a too me a tanga me a ulalu me a vatu me a kinainai lua.

<sup>4</sup> Mane amutou gali ulilo na luma tasa, de namutou muine amutou moni na luma do mapigogoi na ilala amutou kale namutou ilisitase.

<sup>5</sup> Mane a bibi tasa ei ma guale ete amutou, io namutou ilisitase a aubu do. Me namutou labeveitaselele a molomolo na magamaga ino na ubune amutou, ne sou muada i, sou isa a mamauna na inigogona sou goli iodo.”

<sup>6</sup> Io sou a disaipel sou asu maisabana aububuna. Me sou veipale a malongolongona kubaana me sou toekube a vanunua sou sobe na avena vuso.

*Herot ei kale ni muada Iesu ei e sei ivu*

(Mat 14:1-12; Mak 6:14-29)

<sup>7</sup> Mapana mina avene Iuda e Herot ei longe a inade na golugolu vuso Iesu ei

goli, me ei damutala papai, vuna maido vanunua sanii sou aadeade maido, “Ioanes ei ilisiliu na minate.”

<sup>8</sup> Me sanii sou veivei ve, “Elaiia i palea.” Me sanii sou vei, “Tasa mine sou a profet lisa ei ilisiliu.”

<sup>9</sup> Me Herot i vei maido, “Eau valiutiosi a loone Ioanes. Moni a bibi iede ei e sei me eau longe a pipigona sea sele ei goli?” Me ei kale ni ite Iesu.

*Iesu ei bilii a gona inani usino na vanunua savuluvulu lima (5,000)*

(Mat 14:13-21; Mak 6:30-44; Ioa 6:1-14)

<sup>10</sup> Me sou a aposel sou veteliu, me sou vei le Iesu a golugolu vuso sou goli. Me Iesu i guale sou, me sou ilisi me sou moni sou asu usino ne Betsaida.

<sup>11</sup> Moni abuna vanunua ma tavine sou muada ve Iesu i inosi, de sou ogomuli e ei, me ei mongemonge e sou so sibitala me ei ade ane sou a inade mina niitealalena mine Salemo, me ei toekube a vanunua ma tavine sou isa a matamatana sinobe.

<sup>12</sup> Na lavilavi sele disaipel savulu tasa timana lua sou asuale ei me sou vei lei maido, “Oo peltase a vanunua ma tavine usino na aububuna me na aveavena maisaba, ne sou poge a gona inani ma muina ngunolo. Avena ieli a vanua boa.”

<sup>13</sup> Moni e Iesu ei vei le sou a disaipel maido, “Amutou oto namutou bilii e sou a gona inani.” Me sou vei maido, “Amiteu ma isa oto. A ulalu lima ma aia lua moni eili. Nane namiteu oli a gona inani mina abuna vanunua ma tavine vuso ie?”

<sup>14</sup> Savulune sou mapigogoi savuluvulu lima (5,000).

Me Iesu ei vei ane sou a disaipel minei maido, “Mu mauge sou tomane abuna savulu lima tastasa.”

<sup>15</sup> Sou goli maido, ma vanunua ma tavine vuso sou ugu.

<sup>16</sup> Me Iesu i guale a ulalu lima dolo pilu a aia lua, me ei gemu uata na langi me ei toledadangi. Me ei lee me ei bilii e sou a disaipel ne sou soebule ane a vanunua ma tavine.

<sup>17</sup> Me sou vuso sou aani me sou masu. Me sou guale a matevuavua me sou totongi voni na tanga savulu tasa timana lua.

*Pita ei veipale Iesu ei e sei*

(Mat 16:13-19; Mak 8:27-29)

<sup>18</sup> Na ilala tasa Iesu vululu ei kaka, ma disaipel minei sou ino pilu e ei. Me ei tagi e sou maido, “Sou a vanunua ma tavine sou veivei, eau e sei?”

<sup>19</sup> Me sou adeliu maido, “Ioanes bibi mina maavvutuna, me sanii sou veivei, o Elaiia, me sanii sou vei, o tasa mine sou a profet lisa ei ilisiliu.”

<sup>20</sup> Me ei tagi e sou, “Me amutou oto vei, eau e sei?” Me Pita i maliu a inade maido, “Oo e Krai mine Salemo.”

*Iesu ei vei ei ni mate me ni ilisiliu*  
(*Mat 16:20-28; Mak 8:30-31*)

<sup>21</sup> Iesu i ade sagali ana disaipel ne sou ma veivei lou ana bibi tasa ve ei e sei.

<sup>22</sup> Me ei vei, “Natuna Bibi ei ni tabule a davutina makuba, me sou buobuo, me sou a munuganugana prist, ma vanua na muadana binea ne sou lametase me sou valipute ei. Me na malada tolunai ei ni ilisiliu.”

<sup>23</sup> Me ei ade ane sou maido, “Mane a bibi tasa ei kale ni ogomuli e eau, de ei ni taupui a masagana minei oto, me ei ni tabule a tauvaleuti minei na malada vuso, me ei ni ogomuli e eau.

<sup>24</sup> Mane a bibi tasa i kale ni guale a maulina minei oto, maulina minei ni buale. Moni mane a bibi tasa i iabitase a maulina minei ane eau, ei ni guale a maulina minei.

<sup>25</sup> Mane a bibi tasa i guale a golugolu vuso mina magamaga, moni mane ei oto i mamau me ei buale, de golugolu vuso do ni buloi e ei matina?

<sup>26</sup> Mane a bibi tasa i maela e eau ma inade minau, ilala Natuna Bibi asu usinani pilu a muada minei, ma muada mine Tamana me sou a bineanea maolo ei ni maela tamai a bibi iedo.

<sup>27</sup> “Me eau vei ivu le amutou, vanunua sanii sou magili eili ie ne sou ma mate oto mapigogoi ne sou ite a niitealalena mine Salemo.”

*Vovone Iesu i palea sea sele*  
(*Mat 17:1-8; Mak 9:2-8*)

<sup>28</sup> Malada pantolu mamuli ne Iesu ei vei a inade sou odo, ei guale Pita, Ioanes me Iemus, me sou asu uata na loena ni kaka.

<sup>29</sup> Me ei kakaka ma laguna i palea sea sele, ma kinainai minei i palea kea sele, me ei lada mamau sele.

<sup>30</sup> Me saga i a bibi lua su ade pilupilu e ei, sulu e Moses me Elaiia.

<sup>31</sup> Sulu palea pilu a malasana mine Salemo me sulu adeade ve mulimuli Iesu ei ni mate ne Ierusalem.

<sup>32</sup> Pita pilu a disaipel lua do sou ngolon-golo. Moni ilala sou lutu, sou ite a muada i palea le Iesu ma bibi lua su magili pilu e Iesu odo.

<sup>33</sup> Ma ilala sulu ne su ilisitase ei, de Pita i vei le Iesu maido, “Bibi Taula, eitou ugu nani ieli, ei kubaana. Ne amiteu tige a luma mina malolovina tolu, tasa minio, me tasa mine Moses, me tasa mine Elaiia.” Ei ma muada oto e sei matana inade ei ade.

<sup>34</sup> Ei saboa ino adeade, ma ausa tasa i palea mei avisobe sou me sou lae ilala sou ino lilo na ausa do.

<sup>35</sup> Ma baligolu tasa malilo na ausa do i vei maido, “Iedele ei e natugu. Eau matoalessi e ei. Amutou longemuli e ei.”

<sup>36</sup> Tauluna Inade do, sou ite Iesu vululu moni. Me sou ma vei oto ana bibi tasa a golu sou ite do.

*Iesu ei toekube a bibaini tasa i isa a nunu pagu*  
(*Mat 17:14-18; Mak 9:14-27*)

<sup>37</sup> Na malada savulo sou sivo utano na loena, ma abuna vanunua ma tavivine taula sou poge e ei.

<sup>38</sup> Ma bibi tasa balivua mine sou ei tola vauta maido, “Magiligilina, eau tagi sagali e oo no ite bibaini minau. Eau isa e natugu tasa moni sie.

<sup>39</sup> A nunu tasa pagu i lapitole ei, me saga i ei ngala mamaumau sele me ei toe a vovone ei palili gegelu sele pilu a palapalana asena me ei toegegeli sele a vovone ei, me ei ma bualetase ete ei.

<sup>40</sup> Me eau tagi sagali e sou a disaipel minio ne sou taulele a nunu odo. Moni sou ma mapigogoi ete.”

<sup>41</sup> Me Iesu i adeliu maido, “Amutou a vanunua ma tavivine amutou ma silimuli ete, damutatalana mine amutou ma bilesi oto. Mavisa eau na ugu pilu e amutou me eau tabule a mavaana mine amutou? Guale natumu mo maasi e ei usinani.”

<sup>42</sup> Ma ilala bibaini ei asu agavuale Iesu, nunu pagu odo i lange ei utano me ei toe ei palili mamau sele. Moni e Iesu i adesinoa ana nunu pagu odo, me ei toekube a bibaini me ei bilii liu e ei usino ne tamana.

*Maluanai Iesu ei vei ei ni mate*  
(*Mat 17:22-23; Mak 9:30-32*)

<sup>43</sup> Ma vanunua ma tavivine vuso sou saga mamau sele a sagalina buo mine Salemo. Vanunua ma tavivine saboa ino sou saga papaipai a golugolu vuso Iesu ei goli, me Iesu ei vei le sou a disaipel minei maido,

<sup>44</sup> “Amutou beli kube a tagilane amutou na inade ie. Ne sou tau e Natuna Bibi na limane sou a vanunua.”

<sup>45</sup> Moni sou ma muada oto a vuna inade iedo. Vuna, inade do ei ovu ne sou, maido me sou ma muada kuba oto i. Me sou lae a tinagine ei a inade ei vei.

*Sei ei buo?*  
(*Mat 18:1-5; Mak 9:33-37*)

<sup>46</sup> A inadena maisaukikina palea ne sou a disaipel, sei ei buo ane sou.

<sup>47</sup> Me Iesu ei muada a damutatalana mine sou, me ei guale a bibaini tasa me ei mamagili ei agavuale ei.

<sup>48</sup> Me ei vei le sou maido, “Mane a bibi tasa ei guale a bibaini ieli mina aisagu, ei guale e eau. Me a bibi ei guale e eau, ei guale e

Euma i peltase eau. Sei bibi ei toe bisii e ei oto, ei ni buo ane amutou vuso.”

*Bibi ei ma butuale ete amutou, ei e tamaine amutou*  
(Mak 9:38-40)

<sup>49</sup> Ioanes ei sie maido, “Bibi Buo, amiteu ite a bibi tasa ei taulele a nunu pagu na aisane oo me amiteu madetase ei, vuna ei ma ogomuli ete eitou.”

<sup>50</sup> Moni Iesu ei vei lei maido, “Amutou ma madetasetase lei e ei. Bibi ei ma butuale ete amutou, ei e tamaine amutou.”

*Sou Samaria sou ma longo oto ane Iesu ni asu usino na aubu ne sou*

<sup>51</sup> Ilala Salemo ei ni gualo Iesu usino na langi i agaviosi, me ei damutatata sagali sele ni asu usino ne Ierusalem.

<sup>52</sup> Me ei peltase pale a vanunua sanii me sou asu ulilo na aubu tasa e Samaria ne sou masusulu a gologolu minei.

<sup>53</sup> Moni a vanunua mina aubu odo sou muada i Iesu ei kale ni asu usino ne Ierusalem, maidolo me sou ma gualo ete ei.

<sup>54</sup> Disaipel lua, Iemus me Ioanes, su ite a inigogona mine sou, me sulu vei, “Bibi Taula, o kale ne amiteu toleale a oavi muata na langi ni tununi a vanunua vuso ie?”

<sup>55</sup> Moni ei sauvule me ei sinoa ane sulu.

<sup>56</sup> Me sou asu usino na aubu tasa sea.

*Iesu ei ade a inigogona mina ogomuline ei*

(Mat 8:19-22)

<sup>57</sup> Sou asu usino na vea, ma bibi tasa i vei ana maido, “Avena vuso oo asuale, eau na ogomuli e oo.”

<sup>58</sup> Me Iesu ei vei lei maido, “Busebuse aou sou isa a aova tano na magamaga, ma manumanu na langi sou isa a noa ne sou. Moni e Natuna Bibi ei ma isa oto a muina tinau na letena.”

<sup>59</sup> Me Iesu ei vei ana bibi tasa sea maido, “Oo ogomuli e eau.” Moni a bibi iodo i vei, “Bibi Taula, longo muga agu na asu na peilai pale e euma.”

<sup>60</sup> Me ei vei lei, “Umana. Vanunua sou matesi ne sou peilai liu e sou oto. Moni e oo, o asu mo malongo a niitealalena mine Salemo.”

<sup>61</sup> Bibi tasa sea i vei le ei maido, “Bibi Taula, eau na ogomuli e oo. Moni mapigogoi no longo agu na asu pala na langetase muge sou minau?”

<sup>62</sup> Me Iesu ei vei lei maido, “Bibi ei lapitole a inaunau, moni ei gemu liuliu, ei ma mapigogoi ete ni goli a pipigona mina niitealalena mine Salemo.”

## 10

*Iesu ei peltase a vanunua savulu padilua timana lua*

<sup>1</sup> Tauluna malada sanii lou Bibi Taula i vileale a vanunua savulu padilua timana lua lou, me ei peltase sou tao lua lua muga pala ane ei usino na aububu vuso ei kale ni asu.

<sup>2</sup> Me ei vei le sou maido, “Gona inani papaina i matutuasi na mauma, moni a vanunua na pipigona i ma makuba oto mina gualena, maidolo me namutou kake tamana mauma ei ni peltase a vanunua mina pipigona usino na mauma ne sou taupili a gona inani.

<sup>3</sup> Amutou asu. Longe. Eau peltase amutou usino tomane a natatuna sipsip sou asu balivua na busebuse aou.

<sup>4</sup> Namutou ma polopolo lou a maloputu na vatu ma bie ma ubupolo pilu e amutou. Me namutou ma vevei lei oaso doana ana vanunua ma tavivine na vea.

<sup>5</sup> “Mane amutou gali ulilo na luma tasa, de palapala ne amutou vei maido, ‘Lilomeana usino ne amutou.’

<sup>6</sup> Mane a bibi tasa mina lilomeana ino na luma do, lilomeana mine amutou ni muina na bibi iedo. Moni mane a matana bibi maido boa, lilomeana mine amutou ni veteliu usino ne amutou.

<sup>7</sup> Namutou muine amutou na luma iodo, me namutou aani me inu a gologolu sou bilii e amutou, vuna bibi na pipigona ei mapigogoi ni gualo a mapa ne ei. Namutou ma asu maisabasaba lou na lumaluma.

<sup>8</sup> “Mane amutou gali ulilo na aubu tasa, me sou gualo amutou, namutou ani a gona inani sou soebule e amutou.

<sup>9</sup> Ne amutou toekube a vanunua sou sobe na aubu do, me namutou malongo ane sou maido, ‘Niitealalena mine Salemo i agaviosi usinani ne amutou.’

<sup>10</sup> Moni mane amutou asu ulilo na aubu tasa, me sou ma gualo ete amutou, io amutou asu magili na vea mina aubu do, me namutou vei maido,

<sup>11</sup> ‘Amiteu saveitaselele a molomolo na magamaga mina aubu mine amutou i tabatotola na ubune amiteu. Moni namutou muada, niitealalena mine Salemo ei agaviosi.’

<sup>12</sup> Eau vei le amutou, malada na mavaana ni palea na aubu ie, ei ni vululusi a mavaana i palea le sou e Sodom.

*Mavaana buo ei ni palea le sou a vanunua ma tavivine sou ma sauvule ete a lilone sou*

<sup>13</sup> “Mavaana buo ei ni palea le amutou e Korasin, mavaana buo ei ni palea le amutou e Betsaida. Mane gona sinaganaga palea ne Tair me Saidon tomane eau goli balivua ne amutou, ne sou mapigogoiisi ne sou sauvule a lilone sou me sou kai a kinainai mina dinodo me sou ugu na kavou na oavi.

14 Moni na malada na vavasana mavaana ei lila ne amutou ei ni vululusi sele a mavaana ei palea le sou e Tair me Saidon.

15 Me amutou e Kapenaum, nane ne sou beilange amutou oata oto sele na langi, io? Boa. Ne amutou vele utano oto sele na aubu na tunuu.\*

16 “Bibi ei longemuli a inade mine amutou, ei longemuli a inadegu. Ma bibi ei lametase amutou, ei lametase eau. Ma bibi ei lametase eau, ei lametase Salemo ei peltase eau.”

*Vanunua savulu padilua timana lua sou veteliu*

17 Vanunua savulu padilua timana lua sou veteliu pilu a munonge. Sou vei, “Bibi Taula, amiteu taulele a nunu pagu a aisamu me sou longemuli e amiteu.”

18 Me Iesu ei vei ane sou maido, “Eau ite Satan ei pu muata na langi tomane a sima.

19 Longe. Eau biliosu e amutou a sagagalina, me amutou mapigogoi namutou soetole a aliusu na tumailu, me a sagagaline ei vuso mina butualene amutou. Me a golu tasa i ma mapigogoi ete ni toegegeli e amutou.

20 Moni ne amutou ma mongemonge oto e sou a nunu pagu sou longemuli e amutou. Boa. Amutou mongemonge moni e Salemo ei niagesi a aisane amutou na langi.”

*Iesu ei mongemonge me ei toledadangi e Salemo Tamana*

(Mat 11:25-27, 13:16-17)

21 Na ilala iedo ei mongemonge a Maolona Nunu, me ei vei maido, “Eau toledadangi e oo, Ouma Bibi Taula mina langi ma magamaga, o tau oovi a gologolu sou ieli na vanunua sou isa a muadana buo ma damutatalana, me oo maite sou tomane seleanini moni. E, Ouma, o toe simaido na masagana minio.

22 “Euma ei tauosi a gologolu vuso na limagu, ma bibi tasa i ma muada oto e Natuna, Tamana moni i muada e ei. Natuna pilu a vanunua Natuna i maite e sou e Tamana, sou moni sou muada e Tamana.”

23 Me ei sauvule usino ne sou a disaipel minei me ei vei maido, “Vanunua sou ite a gologolu amutou iteite, ne sou guale a maibalavana.

24 Eau vei le amutou, lisa profet makuba me sou a mapana papaina sou kale ne sou ite a gologolu seidei amutou ite, moni sou ma ite ete. Me sou kale ne sou longe a inadenede amutou longelonge, moni sou ma longe ete.”

*Iesu ei mapamuli a bibi tasa doana mine Samaria*

25 De a bibi na muadana binea tasa ei ilisi ni tove e Iesu me ei tagi e ei maido, “Magiligilina, eau na goli a sava me eau na guale a maulina i doana taliulu taliulu?”

26 Me ei vei lei maido, “Sei inade ino na binea? Oo gi matina?”

27 Me ei adeliu maido, “ ‘Oo no kale Bibi Taula, Salemo minio a lilomu vuso, me a nunumu vuso, me a sagalimu vuso, me a damutatalana minio vuso tamai, me o no kale sele tamtamaimu tomane o kale oo oto.’”

28 Me Iesu ei vei lei maido, “Oo malii a inade i bilesi. Oo toe simaido, me o no guale a maulina.”

29 Moni ei kale ni maite ei oto ve ei a bilesina bibi, maido me ei tagi e Iesu maido, “Sei tamtamaigu sou agavuale eau?”

30 Iesu ei adeliu maido, “Bibi tasa ei ilisitate Ierusalem mei asu utano ne Ieriko. Me a vanua na paaalina sou ovu na vea, me sou kaitase a kinainai minei me sou valibili e ei me sou guale a gologolu vuso minei, me ei tabulibuli na vea a muina, me bisii moni ei ni mate.

31 Me na ilala do, prist tasa ei ogomulimuli a vea do utano. Me ei ite a bibi iedo me ei pololeletase ei, me ei asu moni na aana vea usinosi.

32 Tomane moni e Livai tasa ei asu maino pea na avena do, me ei ite a bibi iedo, me ei pololeletase ei, me ei asu moni na aana vea usinosi.

33 Moni a bibi tasa mine Samaria ei asuasu na vea me ei poge a bibi iedo. Ei ite ei, me a lilona i momolu sele e ei.

34 Ei asu agavuale ei, me ei singi a wel ma vain na vatala minei me ei avisobe. Mei maugi e ei na donki minei oto. Me ei langetase ei usino na luma na mosi tasa me ei iteale kube ei.

35 Me maisavulo ei guale a denarii<sup>‡</sup> lua mei bilii a tamana luma na mosi, mei vei lei maido, ‘Oo iteale a bibi ie. Mane oo oli a gologolu a vatu sanii lou minio mina itealene ei, de malada eau veteliu, eau na malii usino minio.’

36 “Maidolo me oo damutale matina? Sei mine tao tolu iodo ei e tamaina ivu mina bibi sou valibili e ei iodo?”

37 Me ei vei, “Bibi ei lilomuli ei iodo.” Me Iesu ei vei ana maido, “Oo asu mo goli simaido.”

*Iesu ei ino na luma mine Marta me Maria*

38 Me Iesu pilu e sou a disaipel sou asuasu usino, me Iesu ei asu ulilo na aubu tasa, me tavine tasa, aisane e Marta, ei guale Iesu usino na luma minei.

\* 10:15 Na inade Grik ieli e *Hades*, malibuuna mine *Hades* ei a aubu na davutina. † 10:27 Binea 6:5; Pipigona mina Prist 19:18 ‡ 10:35 Denarii ei a vatu tomane a mapa na pipigona mina malada tasa.

<sup>39</sup> Marta ei isa e tasina tasa, aisana e Maria. Maria ei ugu agavuale a ubune Bibi Taula, me ei longe a inadenade minei.

<sup>40</sup> Moni e Marta ei damutala papai a pipigona buo. Maido me ei asu usino ne Iesu me ei vei, “Bibi Taula, oo ma damutale ete ie? Tasigu ei iavetase eau me eau vululu moni eau pipigo. O vei le ei ni buloi e eau.”

<sup>41</sup> Moni e Bibi Taula ei malii a inade maido, “Marta, Marta, oo damutatala papai me oo lilibuu a golugolu makuba.

<sup>42</sup> Oo no damutale moni a golu tasa. Maria ei vileale a golu i doana, me a bibi tasa ni ma gualelele lei maino ne ei.”

## 11

### *Inigogona mina kinaka*

*(Mat 6:9-15, 7:7-11)*

<sup>1</sup> Me Iesu ei ino kaka na avena tasa, ei kaka pulosi, e tasa mine sou a disaipel i vei le ei maido, “Bibi Taula, o matetengi e amiteu a kinaka, tomane lisa Ioanes ei matetengi e sou a disaipel minei.”

<sup>2</sup> Me Iesu ei vei le sou maido, “Ilala amutou kaka, namutou vei maido,

‘Ouma, toe amiteu namiteu beilange a maolona aisamu.

A niitealalena minio ei ni asu usinani.

<sup>3</sup> Bilii e amiteu a gona inani seidei ie.

<sup>4</sup> Lilotase a sinusunusu mine amiteu, tomane amiteu oto amiteu lilotase a sinusu sou goli le amiteu.

Me o no ma itetase lei a tinovona ni palea le amiteu.”

<sup>5</sup> Me Iesu ei vei ane sou maido, “Mane a bibi tasa balivua ne amutou ei isa e tamaina tasa, me na lodo punosa sele tamaina do i asu me ei vei le ei, “Tamaigu, eau kale no bilii e eau a ulalu tolu.

<sup>6</sup> Tamaigu tasa ei asu na vea bulago sele me ei sibitala na luma minau, me eau a gona inani boa na bilii e ei.”

<sup>7</sup> Nane a bibi lilo na luma do ei malii a inade maido, ‘O no ma toemaisabesabe lei e eau. Tema ei kapiosi, me eau pilu e natatugu, amiteu ngolosi. Maido me eau ma mapigogoi ete na bilii e oo’?

<sup>8</sup> Eau vei le amutou, tamana luma dolo ei ni ilisi mei ni bilii e tamaina a golugolu vuso ei boto i. Vuna ei bale moni a nilongene tamaina tola mapapaina, maidolo me ei lutu mei bilii e tamaina a golugolu. Ivu, ei ma damutale ete tomane ei kale ni buloi e tamaina mei goli maido. Boa.

<sup>9</sup> “Maido me eau vei le amutou, mu tagu me ei ni bilii e amutou. Mu tilo, me namutou ite. Mu lalaba, me ei ni pee a tema ane amutou.

<sup>10</sup> Sei ei tagu, ei ni guale, me sei ei tilotilo, ei ni ite. Me sei ei lalaba, Salemo ni pee a tema ane ei.

<sup>11</sup> “Me amutou vanunua, sei bibi ni bilii e natuna a aliusu mane natuna ei tagu a ia?”

<sup>12</sup> Me mane natuna ei tagi e tamana ni bilii e ei a tolutolu, tamana ni bilii e ei a tumailu tasa pagu, io?”

<sup>13</sup> Amutou tamatamane selebanini, amutou goli a inigogona pagu makuba, moni amutou muada sele a bilii ne natatune amutou a golu doadoana. Maido me amutou muada sele ie, Tamane amutou na langi ei ni mongemonge a biliina Maolona Nunu na vanunua sou tagu i.”

### *Sou vei ve Iesu ei pipigo pilu e Belsebul* *(Mat 12:22-30; Mak 3:20-27)*

<sup>14</sup> Ei votetaselele a nunu pagu i goli a asena bibi tasa i sobo. Nunu pagu i asutasesi ei, io a bibi iedo i ade. Me a vanunua ma tavivine sou saga mamau.

<sup>15</sup> Moni a vanua sanii sou vei, “Ei taulelele a nunu pagu a sagaline Belsebul, ei a munuganuga mine sou a nunu pagu.”

<sup>16</sup> Ma vanunua sanii sou kale ne sou tove Iesu me sou tagi e ei ni goli a gona sinaga tasa maino na langi tomana matailalana pipigona mine Salemo.

<sup>17</sup> Moni Iesu ei muada a damutatalana mine sou, mei vei ane sou maido, “Mane a vanunua vuso mina avena buo tasa i mapola avena lua me sou maubi, avena buo do ni mamau. Mane tametatasi tamai sou maisinoa me sou maubi balivua ne sou oto, io tametatasina do ne sou mamau.

<sup>18</sup> Me amutou vei maido, eau taulelele a nunu pagupagu a sagalina ne Belsebul, moni mane abuna mine Satan sou vilelue sou me sou maibutuala liu lilo ne sou oto, de ei ni iteale abuna minei matina?”

<sup>19</sup> Moni mane eau voteleletase a nunu pagupagu a sagalina ne Belsebul, de abuna mine amutou sou voteleletase sou a nunu pagu a sagalina mine sei? Maido me a inade mine amutou iede i ma bilesi oto.

<sup>20</sup> Moni mane eau voteleletase a nunu pagupagu a sagalina mine Salemo, io namutou muada, niitealalena mine Salemo ei nanasi ne amutou.

<sup>21</sup> “Mane a bibi tasa sagali i lapitole a viso tasa lago ue sei golu mei ulagelage a luma minei, io a golugolu vuso minei ni muina kuba.

<sup>22</sup> Moni mane a bibi tasa sagali mamau lou i asu mei maubi pilu a bibi iedo mei vululusi e ei, ei ni guale a lumusu vuso ma viso ue a golugolu na maubina i toe a bibi iedo i sagali, mei ni soebule a golugolu vuso minei iodo usino.

<sup>23</sup> “Bibi ei ma tamaigu oto, ei butualale eau. Me a bibi ei ma buloi ete eau a viepilina

vanunua ma tavivine, ei vote maisabesabe sou.

*Nunu pagu ei veteliu lou*  
(Mat 12:43-45)

<sup>24</sup> “Mane a nunu pagu i bualetasesi a bibi tasa, de nunu ieli ei vele maisabasaba na gona i tagasa ni poge a mui tasa ni manoa i. Moni ei ma ite ete a mui tasa i doana, io ei vei maido, ‘Eau na veteliu lou usino na luma lisa eau malu i iodo.’

<sup>25</sup> Me ei asu mei ite a luma dolo, sou kakale me sou malolomesi.

<sup>26</sup> Me ei ni asu guale a nunu pagu padilua sea sou vululusi lei e ei a gunolina inigogona pagu. Me ne sou gali ulilo me sou ugu na luma do. Palapala bibi iodo ei malu gegelu i, moni seidei minalu minei nado ni mamau gegelu sele lou.”

*Sei sou a vanua ne sou mongemonge sele?*

<sup>27</sup> Na ilala Iesu i malongo a inade do, tavine tasa balivua ne sou ei tola maido, “Tavine i maalepose oo mei masusi e oo do, ei ni mongemonge.”

<sup>28</sup> Moni e Iesu ei vei, “Boa, vanunua ma tavivine sou longe a inade mine Salemo me sou ogomuli, ede ne sou mongemonge.”

*Vanua sanii sou tagi e Iesu ni goli a gona sinaga*

(Mat 12:38-42; Mak 8:12)

<sup>29</sup> A vanunua ma tavivine makuba sele lou, Iesu ei vei ane sou maido, “Sou a abuna vanunua ma tavivine mina ilala seidei ie, sou pagu. Sou kale a niitena gona sinaga mine Salemo. Moni ne sou ma ite ete a matailala tasa. Boa. Matailala tasa moni ne sou ite, ei a matailala mine Iona.

<sup>30</sup> Iona i palea tomene a matailala Salemo i maite e sou e Ninive. Me tomene moni Natuna Bibi ei ni a matailala Salemo i maite e sou na ilala seidei ie.

<sup>31</sup> Tavine a mapana mina avena malilo ni magili a vavasana mei ni veipale a inigogona pagu mina ilala seidei ie. Vuna maido, tavine a mapana do ei malu na sinua na magamaga ivu, moni ei asu usinani mina nilongene Solomon ei veipale a muadana doa minei. Moni a bibi tasa nana balivua ne amutou, ei vululusi ivu e Solomon.

<sup>32</sup> Ilala Salemo i vavasa ane sou a vanunua ma tavivine, sou a vanua mine Ninive ne sou magili na vavasana pilu e sou a abuna vanunua ma tavivine mina ilala seidei ie. Vuna, sou e Ninive sou longe a inade ne Iona me sou sauvule a lilone sou. Moni a bibi tasa eili, ei vululusi ivu e Iona.

*Lada mina vovo*

(Mat 5:15, 6:22-23)

<sup>33</sup> “Vanunua sou vaisoe a lada sou ma tau oovi ete a lada do lilo na taogo. Boa. Sou

tautau muata na poso, ma vanunua sou gali ulilo ne sou ite a muada iedo.

<sup>34</sup> Matane oo ei a lada mina vovomu. Mane a matamu ei doana, de muada ei ni vonu na vovomu vuso. Moni mane a matamu ei pagu, io vovomu ni tunuui.

<sup>35</sup> Maido me oo no ulago kuba, dae a muada ino lilo ne oo iedo ni tunuui.

<sup>36</sup> Mane a vovomu vuso ei isa a muada, ma avena tasa ei ma tunuui oto, de vovomu do ni muada vuso, tomene a muada mina lada i ladevei e oo.”

*Sou Parisi me sou a vanua na muadana binea sou goligoli a inigogona pagu*

(Mat 23:1-36; Mak 12:38-40; Luk 20:45-47)

<sup>37</sup> Iesu ei pulu a malongona, me Parisi tasa i tagi e ei ni aani pilu e ei. Maido me Iesu i gali ulilo me ei ugu na poso na inani.

<sup>38</sup> Moni Parisi iedo i ite Iesu ma loloi pale ete a limana, me ei saga.

<sup>39</sup> Moni e Bibi Taula i vei lei maido, “Amutou Parisi, amutou loloi kubekube sele a taogo na niinu ma taogo na aanina. Moni lilo, amutou vonu sele a inigogona mina lilimana ma matamatana inigogona pagu.

<sup>40</sup> Amutou a vautana vanunua! Salemo ei mapale a vovo, ei mapale tamai a lilone sou.

<sup>41</sup> Moni a golugolu ino lilona taogo, ede mu bilii a vanunua sou boto. Maido ma golugolu vuso mine amutou ni muina alaba sele na matane Salemo.

<sup>42</sup> “Moni amutou Parisi, mavaana buo ei ni palea le amutou. Gona inani banini vuso ma laulau na inani ue sei golu mina mauma, iedo amutou soebule a maduna i savulu tasa me mu oabi a maduna tasa usino ne Salemo. Moni amutou litatase a inigogona i bilesi ma inigogona mina kinalene Salemo. Puiale sele ne amutou sagali a gunolina inigogona ieli me amutou ma litatase lei a binea sanii tamai.

<sup>43</sup> “Amutou Parisi, mavaana buo ei ni palea le amutou. Amutou kale mamai a gualena munugana niugugu na luma mina kinaka ne amutou, me amutou kale mamai a vanunua ne sou vate oaso doana ane amutou na muina viepiluna.

<sup>44</sup> “Mavaana buo ei ni palea le amutou. Amutou tomene a muina minate ino ovu matano na magamaga, me vanunua sou asu muata, moni sou ma muada oto i.”

<sup>45</sup> A bibi tasa mina muadana binea ei vei ane Iesu maido, “Magiligilina, na inade o goli iodo oo salaitavole amiteu tamai.”

<sup>46</sup> Me Iesu i vei, “Amutou a vanua na muadana binea, mavaana buo ei ni palea le amutou. Amutou guale a golugolu sou mavaavaa sele mina tabulena, me amutou bilii e sou a vanunua. Moni amutou oto

amutou ma tau sapesape ete a uune amutou tasa a golu sou mavaavaa do.

<sup>47</sup> “Mavaana buo ei ni palea le amutou. Amutou malolome a muina minate mina peilaine sou a profet, lisa tubutubune amutou sou valipute sou.

<sup>48</sup> Maido me amutou mailongosi a inigogona tubutubune amutou oto sou valipute a profet, me amutou malolome a muina minate mine sou.

<sup>49</sup> “Maido me a bilesina damutatalana mine Salemo i vei maido, ‘Eau na peltase sou a profet me sou a aposel usino ne sou, me sou a vanunua ne sou toegegeli sanii mine sou, me ne sou valipute sanii ne sou.’

<sup>50</sup> Mapa pagu mina daladala ne sou profet vuso i singi na Ilala na magamaga i soke, ei ni palea na abuna vanunua ma tavivine dolo seidei.

<sup>51</sup> Daladala ne Abel me Sekaraia i mate balivua na posa na niabi ma luma mine Salemo. E, eau vei le amutou, mapa pagu ei ni palea na abuna vanunua ma tavivine dolo seidei.

<sup>52</sup> “Amutou a vanua na muadana binea, mavaana buo ei ni palea le amutou. Amutou taulelesi a ki mina tema ulilo na avena mina gualena muadana. Me amutou oto amutou ma gali ulilo oto, me amutou tabesobesobe a vea mine sou a vanunua ma tavivine sanii sou kale ne sou gali ulilo.”

<sup>53</sup> Ilala Iesu ei ilisitase sou, sou a vanua na muadana binea pilu e sou e Parisi sou lilogegelu ane ei me sou tagi e ei a matamatana tinagu.

<sup>54</sup> Sou kale ne sou auala ane ei ni malii a inade tasa i ma bilesi oto, i mapigogoi ne sou vavasa ane ei a inade do.

## 12

*Tilale a inigogona aualana mine sou e Parisi*

(Mat 10:26-27)

<sup>1</sup> Ilala do vanunua ma tavivine savuluvulu savulu makuba sou viepilu, i mapigogoi ne sou soetole maisabe a ubuubune sou sanii. Me Iesu ei ademuada pala ane sou a disaipele minei maido, “Tilale amutou a is mine sou e Parisi.

<sup>2</sup> Golugolu vuso sou avisobe muina, ei ni palea na avena muada. Ma inade vuso i ovo, a vanunua vuso ne sou muada i.

<sup>3</sup> Maido ma inade vuso amutou goli na tunuui, a vanunua ma tavivine vuso ne sou longe na oaso. Ma inade vuso amutou ade pakisikisi lilo na luma, ede ne sou magili oata na luma me sou ademuada.

*Bibi ni lae e Salemo moni*

(Mat 10:28-31)

<sup>4</sup> “Tamtamaigu, eau vei le amutou, ma laelae lou a vanunua sou valipute a vovo, me mulimuli ne sou ma mapigogoi ete ne sou goli a golu tasa lou.

<sup>5</sup> Moni eau na maite e amutou sei namutou lae i, ede Salemo moni. Ei valiputepute a bibi, mei isa a sagagalina mina nilangena bibi iedo usino na aubu mina davutina.\*

<sup>6</sup> “Vanunua sou masosove a manu banini lima a asarion† lua moni. Moni Salemo ei ma danivusevuse ete tasa mine sou a manu banini iodo.

<sup>7</sup> Me tamai, Salemo ei giosi a aivu vuso na letene amutou. Maidolo me amutou ma laelae lou. Amutou vululusi a manu banini papaina.

*Neitou ma maelaela lou ve eitou eili a abuna mine Iesu*

(Mat 10:19-20, 32-33, 12:32)

<sup>8</sup> “Eau vei le amutou, mane a bibi ei veimuade na matana vanunua ve ei ino na abuna minau, io Natuna Bibi ei tamai ni veipale ane sou a bineanea mine Salemo maido ei a abuna minau.

<sup>9</sup> Moni a bibi ei veipale ane sou a vanunua ve ei ma bibi oto na abuna minau, eau tamai na vei le sou a bineanea mine Salemo maido ei ma abuna minau oto.

<sup>10</sup> “Mane a bibi ei adegegelu ane Natuna Bibi, Salemo ni taulele a sinusu minei iodo. Moni mane a bibi ei adegegelu ana Maolona Nunuu, Salemo ni ma mapigogoi ete ni taulele a sinusu minei.

<sup>11</sup> “Ma ilala sou lapuale amutou usino na luma na kinaka mine sou e Iuda me na vanunua buo ma vanunua sou isa a sagagalina, io namutou ma laelae lou me namutou vei, ‘Namiteu malii a inade matina? Namiteu goli sei matana inade?’

<sup>12</sup> Na ilala bilesi iodo a Maolona Nunuu ni bilii e amutou a inade ne amutou ademuada i usino ne sou.”

*Adetinoivo mina bibi na vuvutina*

<sup>13</sup> A bibi tasa mina abuna vanunua ma tavivine dolo i vei lei maido, “Magiligilina, eau kale no vei ane tuagu ei ni soebule a golugolu vuso tamane amilu ei bilii e amilu ilala ei matesi.”

<sup>14</sup> Moni e Iesu ei tagi e ei, “Posa matina? Sei i matoale eau na palea a bibi mina vivilemulialena mine amulu, ue a bibi na soebulena golugolu mine amulu?”

<sup>15</sup> Me ei vei ane sou a vanunua ma tavivine maido, “Amutou tilale. Dae ne

\* **12:5** Na inade Grik ei e *Gehenna*, ieli a muina davutina, mulimuli sou a vanunua ma tavivine sou ma silimuli ete Iesu ne sou malu sinado. † **12:6** Asarion ieli a vatu banini moni tomane a toea lima.



amutou isu a gualena matamatana golugolu. Golu tasa boa mane oo oto o isa a golugolu papaina, moni oo ma guale ete a maulina a golugolu minio sou iede.”

<sup>16</sup> Me ei vei a adetinovona tasa ane sou maido, “Mauma mina bibi na vuvutina tasa i vuale a vuana papaina sele.

<sup>17</sup> De bibi iedo ei damutale lilo minei maido, ‘Eau na goli a sava? Eau ma isa oto a mui na taupilipili a gona inani minau.’

<sup>18</sup> “Me ei vei, ‘Eau na goli maido. Eau na lope vuse a luma mina tinauna gona inani minau, me eau na tige a luma sou buobuo. Me eau na taupili a vit vuso ma golu doadoana vuso minau na luma odo.

<sup>19</sup> Me eau na vei ane eau oto maido. Eau isa a golugolu makuba elii ni mapigogoi a avala makuba. De, manoa, aani, oinu me mongemonge moni.’”

<sup>20</sup> “Moni e Salemo i vei lei maido, ‘O vauta. Seidei na lodo ieli oo no mate. Ma golugolu vuso oo masusuliosii, iedele sei ni guale?’

<sup>21</sup> “Io, matana golu maido ei ni palea na vanunua sou taupilipili a golugolu papaina ane sou oto, moni sou kapelabe na matane Salemo.”

*Amutou ma lilobuubuu lou me mu ma damutala papaipai lou*  
(Mat 6:25-34)

<sup>22</sup> Io ei vei ane sou a disaipel minei, “Maido me eau vei le amutou, amutou ma damutala papaipai lou a maulina mine amutou, ‘Neitou ani a sava?’ Me amutou ma damutala papaipai lou a vovone amutou, ‘Neitou lavalava a sava?’

<sup>23</sup> Vuna, maulina ei vululusi sele a gona inani, ma vovo ei vululusi sele a malo.

<sup>24</sup> Amutou, damutale a koakoa. Sou ma danidani ete me sou ma taupilipili ete. Sou ma isa oto a luma mina tinauna gona inani ue a luma mina tinauna golugolu. Moni e Salemo ei biliilii e sou a gona inani. Me amutou vululusi sele a manumanu na matane Salemo.

<sup>25</sup> Me sei mine amutou ei lilobuu, me ei ni mapigogoi ni adesui a matailala sanii lou na maulina minei? I ma mapigogoi sape ete.

<sup>26</sup> Maido me mane amutou ma mapigogoi ete ne amutou goli a matana golu baini maido, io vuna matina amutou lilobuu papai a golugolu sanii?

<sup>27</sup> “Amutou gemuale kube sou a pupuna sou palea matina. Sou ma pipigopigo oto me sou ma sailiuliu oto ane sou. Moni eau vei le amutou, lisa Solomon i kai a kinainai malasa, moni a doadoana ma malasana mina pupuna sou ie, ei vululusi sele a malasana mine Solomon.

<sup>28</sup> Mane Salemo i malolomelome a gulugulu, iedo seidei ieli, moni savulo vanua ne sou lange usino na oavi, Salemo ei ni

malolome kube sele amutou. Amutou isa a silimulina i alabaini.

<sup>29</sup> Maido me amutou ma lilobuubuu lou me mu ma damutala papaipai lou ne amutou ani a sava, me namutou ini a sava.

<sup>30</sup> Vuna, abuna vanunua ma tavivine vuso mina magamaga sou tilotilo a golu ie, moni e Tamane amutou ei muadasi a golugolu amutou valagege i.

<sup>31</sup> Moni, ne amutou guale pale a niitealalena mine Salemo, io ei ni bilii e amutou a golugolu amutou valagege i tamai.

*Inigogona mina viepilina golugolu doadoana*

(Mat 6:19-21)

<sup>32</sup> “Amutou a abuna sipsip bainini, moni amutou ma laelae lou. Tamane amutou ei mongemonge ni bilii a niitealalena minei usino ne amutou.

<sup>33</sup> Masosove a golugolu amutou isa a i me mu oabi a vatu odo usino ne sou a vanunua sou boto a golugolu, inigogona ieli ei tomane a palakuluna vatu ane amutou i ma mamaunau oto, me mu tau a golugolu doana na langi, ei ni ma bualeale oto me sou a vanunua mina lilimana ne sou ma paaali ete, ma loto ma veveana ne sou ma toegegeli ete.

<sup>34</sup> Malasolosolo na golugolu amutou isa ino na avena do, lilone amutou tamai ei ino sinado.

*Vanua na pipigona doana ne sou masusulu taliuliu*

(Mat 24:45-51)

<sup>35</sup> “Amutou mu palaai a malo mine amutou me mu vaisoe a lada,

<sup>36</sup> tomane a vanua sou magitali a bibi buo mine sou i vetelii maino na aanina buo mina taulaina me ne sou pee asi a tema ane ei na ilala ei lalaba a tema.

<sup>37</sup> A vanua na pipigona do ne sou guale a maibalavana na ilala a bibi buo i vetelii mei ni poge sou so ma ngolo oto. Eau vei patotona le amutou, a bibi buo ne sou ei ni suibote a malo me ei ni pale a palaai, me ei ni soebule a gona inani usino ne sou.

<sup>38</sup> Me mane a bibi buo ei asu maino na lodo punosa sele, na matailala lua ue tolu, me ei ite a vanunua na pipigona sou ma ngolo oto, de vanunua na pipigona ne sou guale a maibalavana.

<sup>39</sup> “Amutou damutale. Mane a tamana luma ei muada pala i sei matailala a bibi mina lilimana ni asu, de ei ni ma mapigogoi ete ni itetase a bibi mina lilimana dolo ni utipee a luma minei me ei gali ulilo.

<sup>40</sup> Amutou tamai amutou masusulu, vuna amutou ma muada oto sei ilala Natuna Bibi ei ni asu usinani.”

*Adetinovo mina bibi na pipigona doana ma bibi na pipigona pagu*

<sup>41</sup> Pita i tagi e ei maido, “Bibi Taula, oo bilii a adetinovona ieli ne amiteu moni ue na vanunua vuso?”

<sup>42</sup> Me Bibi Taula i vei maido, “Sei bibi na itealena luma ei isa a damutatalana doana mei pipigo sagali? Bibi buo ei ni vileale ei a bibi na itealena a pipigona minei mina soebulena gona inani usino ne sou a vanua na pipigona minei na ilala bibi buo i tau.

<sup>43</sup> Mane na ilala bibi buo minei i vetelii me ei ite ei gologoli a pipigona minei maido, bibi na itealena luma ieli ei ni guale a maibalavana.

<sup>44</sup> Eau vei patotona sele, bibi buo ni ma-toale a bibi na pipigona iodo mina itealena golugolu vuso minei.

<sup>45</sup> Moni mane a bibi na pipigona do i damutale a lilone ei, ‘Bibi buo minau ni ma mapigogoi ete ni sibitala asi,’ me ei soke a valibilina vanunua ma tavivine na pipigona sanii, mei aaniani mei ininu mei matalilili,

<sup>46</sup> io a bibi buo ni vetelii na malada tasa bibi na pipigona iedo i ma masusulu oto mei ma muada oto i. Me a bibi buo ni toegegeli sele a bibi na pipigona do, mei ni mogegigini sele ei mei ni tau e ei pilu e sou a vanua sou ma silimuli ete na avena tasa.

<sup>47</sup> “Bibi na pipigona i muadasi a masagana mina bibi buo minei, moni ei ma masusulu ete a golu me ei ma goli ete a masagana mina bibi buo, iede bibi buo ni valibili vaute sele ei.

<sup>48</sup> Moni ei ma muada oto a masagana mina bibi buo me ei goli a inigogona mapigogoi ni guale a butu, iede bibi buo ni tibi sape ei. Mane a bibi buo ei bilii e sou a vanunua na pipigona a golu makuba, ei ni tagi e sou ne sou malii a golu papaina lou. Mane sou tau a golugolu makuba mina limana bibi tasa, io ne sou vei lei ni malii a golu makuba lou.

*Iesu asu usinani mina vileluena a vanunua ma tavivine*

*(Mat 10:34-36)*

<sup>49</sup> “Eau asu usinani mina nilangena oavi na magamaga, me eau kale mamai a oavi iodo ni luluasi.

<sup>50</sup> Eau isa a maavuvutuna tasa eau na guale. Me a lilogu i mavaa sele i mapigogoi a pipigona do ni pulu.

<sup>51</sup> Amutou damu ve eau asu usinani mina bilii a lilomeana na magamaga. Boa, eau vei ane amutou, eau asu usinani mina vileluena abuabuna vanunua ma tavivine.

<sup>52</sup> Ne seidei me mulimuli tamai tao lima na luma tasa, ne sou vilelu abuabuna lua. Tao tolu ne sou butuale tao lua, me tao lua do ne su butuale tao tolu.

<sup>53</sup> Tamana ni butuale natune ei bibi, me natune ei bibi iodo ni butuale tamane ei. Me tinana ni butuale natune ei a tavine, me natune ei a tavine ni butuale tinana. Me eaana ni maibutuale a mauluna.”

*Vanunua sou ma muada oto a vuna golugolu sou odo i palealea*

*(Mat 16:2-3)*

<sup>54</sup> Iesu ei vei lei le sou a abuna vanunua ma tavivine papaina maido, “Amutou iteite a ausa ei palea na avena oaso i solosolo i, me saga i amutou vei ve, ‘Adavu ni pu.’ Me a adavu ni pu.

<sup>55</sup> Me amutou iteite a avivili malilo, me amutou veivei ve, ‘Seidei ni tivula.’ Ei ni tivuvula.

<sup>56</sup> Amutou a vanua na aualana, amutou vivilemulialale kube a golugolu ei palealea na magamaga me na langi. Moni posa matina amutou ma mapigogoi ete namutou vilemuliale a golugolu ei palealea na ilala seidei ie?

*Oo no toebilelesi a inade pilu a bibi ei kale ni vavasa ane oo*

*(Mat 5:25-26)*

<sup>57</sup> “Posa matina amutou oto amutou ma vilemuliale ete sei golu i biliesi?

<sup>58</sup> Ilala oo asu pilu a bibi ei butuale oo, amulu saboa ino mu asuas na vea, o tove no toebilelesi a inade pilu e ei. Dae ei ni lapuale oo usino na bibi na avelulusena ni tau e oo na limane papai, me papai ni tau e oo na luma na tunuui.

<sup>59</sup> Eau vei le oo, o no ugu na luma na tunuui mapigogoi no lange a vatu vuso sou tau le oo. Mane oo ma lange ete, o no ma gali oto usala.”

## 13

*Bibi ei ma sauvule ete a lilona ei ni buale*

<sup>1</sup> Ilala do, vanua sanii sou mapamuli ane Iesu e Pailat ei valipute a vanunua sanii ne Galili me sou singi a dalane sou muata na golu vivi na niabi ne sou usino ne salemo mine sou oto.

<sup>2</sup> Me ei vei le sou maido, “Amutou damu i a vanunua mine Galili odo sou goli a sinusu makuba lou ane Galili sanii, me ieli a vuna golu pagu odo i sibitala le sou?

<sup>3</sup> Boa. Eau vei le amutou, mane amutou ma sauvule ete a lilone amutou, a matana golu tasa moni ni palea ne amutou vuso.

<sup>4</sup> Me a vanunua savulu tasa timana pantolu odo, lisa a luma lago mine Siloam ei pu muata ne sou me ei valipute sou, amutou damu a sinusu mine sou ei vululusi a sinusu mine sou a vanunua sanii sou malu ne Ierusalem?

<sup>5</sup> Boa. Eau vei le amutou, mane amutou ma sauvule ete a lilone amutou, a matana golu tasa moni ni palea ne amutou vuso.”

*Adetinovona mina obu ei ma vua oto*

<sup>6</sup> Me ei veipale a adetinovona tasa maido, "Bibi tasa ei dani a obu a fik tasa na mauma na vain minei, me ei asuale a obu odo ni gemu a vuana. Moni ei ma ite ete tasa ino.

<sup>7</sup> Maido me ei vei ana bibi na pipigona na mauma maido, 'Oite! Avala tolu pulosi eau asu usinani na gemu a vua na obu ieli, moni ei ma vua oto. Maido me o no tale a obu ie. Posa matina ei mapalipali sabubi a vi na magamaga ie?'

<sup>8</sup> "Me a bibi na pipigona ei maliu a inade minei maido, 'Bibi buo, muine ei mapigogoi a avala tasa lou. Eau na eli a magamaga sailli na vuna me eau na tau a gulugulu ue taitaina bulmakau.

<sup>9</sup> Nane ei ni mapigogoi ni vua na avala malau. Me mane boa, io oo no taletase.' "

*Na Maolona Malada Iesu ei toekube a tavine tasa*

<sup>10</sup> Na Maolona Malada Iesu ei matetengi a vanunua ma tavivine lilo na luma na kinaka mine sou e Iuda tasa.

<sup>11</sup> Ma tavine tasa ino, ei isa a nunu na sinobena i mapigogoi a avala savulu tasa timana pantolu. Ma lamana tavine do ei makoko, me ei ma mapigogoi ete ni magili bilesi.

<sup>12</sup> Iesu ei ite ei me ei toleale ei, me ei vei lei maido, "Tavine, eau taulelesi a sinobe minio."

<sup>13</sup> Me ei tau a limana muata na tavine do, me saga i a tavine ei magili bilesi me ei beilange a aisane Salemo.

<sup>14</sup> Moni a munuganuga mina luma na kinaka mine sou e Iuda i sinoa ane Iesu ei toekube a tavine do na Maolona Malada mine sou. Maido me ei vei le sou a vanunua ma tavivine maido, "Malada pantasa ei a malada na pipigona. Maido mu asu usinani me mu toekube amutou na malada sou odo. Moni umana na Maolona Malada."

<sup>15</sup> Io Bibi Taula ei maliu a inade usino ne ei maido, "Amutou a vanua na aualana. Na Maolona Malada amutou vuso amutou lubetase a bulmakau ma donki mine amutou mina luma na bulmakau, me amutou maasi e sou usino ne sou ini a nanu.

<sup>16</sup> Moni a tavine ie, ei e natune Abraham tasa. Satan ei palesobe ei mapigogoi a avala savulu tasa timana pantolu. Mane eau kale na lubetase a golu i palesobe ei, eau ma mapigogoi ete na goli na Maolona Malada, io?"

<sup>17</sup> Ilala ei vei maido, vanunua sou butuale ei sou maela sele. Ma vanunua ma tavivine vuso sou mongemonge a golu vuso doana dolo ei goli.

*Adetinovona mina vuana mastet*

(*Mat 13:31-32; Mak 4:30-32*)

<sup>18</sup> Me ei ade maido, "Niitealalena mine Salemo ei tomane a sava? Eau na goli sei matana adetinovona?"

<sup>19</sup> "Ei tomane a vua na obu tasa sou tole a mastet. Bibi tasa ei guale me ei dani na mauma minei. Me mulimuli ei uusi buo tomane a obu, ma manumanu na langi sou tau a noane ne sou na lalana."

*Adetinovona mina is*

(*Mat 13:33*)

<sup>20</sup> Me Iesu ei vei lou maido, "Eau na goli sei adetinovona a niitealalena mine Salemo?"

<sup>21</sup> Ei tomane a is, tavine tasa i guale mei sauvule pilu a plaua lilo na taogo tasa buo.\* Me mulimuli a plaua vuso i sosoge."

*Amutou namutou gali ulilo na tema gavivili*

(*Mat 7:13-14, 21-23*)

<sup>22</sup> Me ei asu usino na aububuna buobuo ma aububuna banini tamai me ei matetengi a vanunua ma tavivine, me ei asu na vea usino ne Ierusalem.

<sup>23</sup> Ma bibi tasa i vei lei maido, "Bibi Taula, nane Salemo ni gualielu a vanunua sanii moni?" Me Iesu ei vei le sou maido,

<sup>24</sup> "Amutou pipigo sagali mina ginali ulilo na tema gavivili. Eau vei le amutou, vanunua makuba sou kale ne sou gali ulilo, moni sou ma mapigogoi ete.

<sup>25</sup> Ilala tamana luma i ilisi mei kapi a tema, ne mu magili sala me mu lalaba a tema me mu tola maido, 'Bibi Taula, peeale amiteu.' Me ei ni maliu a inade usino ne amutou, 'Eau ma muada oto e amutou, amutou mine sei avena.'

<sup>26</sup> "Me namutou vei lei maido, 'Amiteu aani me inu pilu e oo, me oo matetengi e amiteu na vea.'

<sup>27</sup> "Moni ei ni vei le amutou maido, 'Eau ma muada oto e amutou, amutou a abuna mine sei avena. Amutou vuso a vanunua na inigogona pagu, amutou vuso mavulo.'

<sup>28</sup> "Ilala amutou ite Abraham, Aisak, Iekop me sou a profet vuso sou ino lilo na niitealalena mine Salemo, namutou tangi me mu gadokase sele a livone amutou, moni ne sou taulele amutou me namutou ugu sala.

<sup>29</sup> Ma vanunua ma tavivine ne sou asu usinani na avena muange, ma avena matano, ma avena lilo, ma avena masae, ne sou aani mina niitealalena mine Salemo.

<sup>30</sup> De longe. Vanunua sanii seidei sou mulisobo, ne sou palea a munugana. Ma vanunua sanii sou eili a munugana, ne sou mulisobo."

\* 13:21 Bunuona ieli a lita savulu lua timana lua ue tomane a pound savulu pantasa.

*Iesu ei lilomuli e Jerusalem**(Mat 23:37-39)*

<sup>31</sup> Na ilala billesi iodo e Parisi sanii sou asu, me sou vei le Iesu maido, "Oo no ilisitase a aubu ieli, vuna maido Herot ei kale ni valipute oo."

<sup>32</sup> Me ei vei le sou maido, "Amutou asu mu vei ana, buse aou odo maido, 'Seidei me savulo eau taulele a nunu pagu me eau toekube a vanunua sou sobe. Me na malada tolu eau na mapuli a pipigona minau.'

<sup>33</sup> Moni seidei, savulo me maisavulo eau na asu usino. Vuna maido, ne sou ma vali-pute ete a profet sala ne Jerusalem.

<sup>34</sup> "Jerusalem, Jerusalem, oo valiputem-atemate sou a profet, me oo ubi e sou a vatu, sou a vanunua Salemo ei peltase sou usinani. Ilala makuba lou eau kale na viepili e natatumu, tomane a kuleko tina i viepilipili e natatuna matano na velevelena. Moni amutou ma kale ete.

<sup>35</sup> Oite! Seidei aubu mine amutou ni mamau mei ni palea a mamau sele mei ni muina sabubu. Eau vei le amutou, namutou ma ite ete eau mapigogoi na ilala namutou vei maido, 'Maibalave a bibi ieli ei asu usinani na aisane Bibi Taula.' "

**14***Iesu ei toekube a bibi tasa vovona i vovonu*

<sup>1</sup> Na Maolona Malada tasa ne sou e Iuda Iesu ei asu aani na luma na munuganuga tasa ne sou e Parisi. Me sou ulago iiti sele e ei.

<sup>2</sup> Ma bibi tasa ino masae ne Iesu, vovone ei i vovonu mamau sele.

<sup>3</sup> Me ei tagi e sou a vanua na muadana binea me sou e Parisi maido, "Eitou mapigogoi neitou toekube a vanunua sou sobe na Maolona Malada ue boa?"

<sup>4</sup> Moni sou vale moni, me ei guale a bibi iedo me ei toekube ei me ei peltase ei asu.

<sup>5</sup> Me ei ade ane sou maido, "Mane tasa mine amutou, natuna ue a bulmakau minei i pu utano na aova na nanu na Maolona Malada, nane ei ni lapuale asi a bibaini ue a bulmakau odo uata ue boa?"

<sup>6</sup> Me sou ma mapigogoi ete ne sou maliu a inade do.

*Iesu ei vei, a bibi ei ni volipui e ei oto*

<sup>7</sup> Ilala Iesu ei ite sou a mosi, sou kale ne sou ugu na munugana niugugu moni. Maido me ei vei a adetinovona tasa maido,

<sup>8</sup> "Ilala a bibi tasa i toleale oo me o asu na inani buo na taulaina, oo no ma ugugu lou na munugana niugugu. Mane o no ma goli ete maido, ilala ei toleale a bibi tasa lou i isa a aisa buo lou ane oo,

<sup>9</sup> ei ni vei ane oo, 'Oo bilii a munugana niugugu iede usino na bibi iodo.' Me o no

maela mamau sele mo no asu ugu mamuli oto sele.

<sup>10</sup> Moni mane a bibi tasa ei toleale oo, o no asu ugu mamuli oto sele. De a bibi i toleale oo odo ei ni asu usinani minio mei ni vei le oo, 'Tamaigu, oo asu usinani mo ugu na munugana niugugu.' Maido me oo no guale a aisa buo na matane sou a vanunua sou aani pilu e oo.

<sup>11</sup> Bibi ei beilange a aisane ei oto, Salemo ni taupui e ei. Moni a bibi ei taupui e ei oto, Salemo ni beilange ei uata."

*Neitou toekube a vanua sou ma mapigogoi ete ne sou maliu*

<sup>12</sup> Iesu ei vei ana bibi iedo ei toleale ei, "Mane oo masusulu a inani buo, oo ma toleale lei e tamtamaimu me tatasimu me sou a abuna minio, me sou amutou a aubu tasa sou isa a vatu papai. Dae ne sou toleale oo me sou maliu a inani usino ne oo.

<sup>13</sup> Mane oo goli a inani buo, oo no toleale sou a kapelabe ma vanunua vovone sou mamau ma vanunua sou asu tagapeo me sou mata ego.

<sup>14</sup> Maido me oo no guale a maibalavana, vuna sou a matana vanunua do sou ma mapigogoi ete ne sou maliu a inani minio. Mulimuli na ilala sou a bilisina vanunua sou ilisiliu, Salemo ni maliu a inani iodo usino minio."

*Adetinovo mina inani buo**(Mat 22:1-10)*

<sup>15</sup> Tasa mine sou a vanunua do ei aani pilu e Iesu, ei longe a inade do me ei vei lei maido, "Balavana ne sou a vanunua ma tavivine ne sou aani lilo na niitealalena mine Salemo."

<sup>16</sup> Me ei vei lei maido, "Bibi tasa ei kale ni masusulu a inani buo, me ei toleale a vanunua makuba.

<sup>17</sup> Me ei peltase a bibi na pipigona minei ni vei le sou lisa ei tolealesi sou a inani iodo, 'Amutou asu usinani. Golugolu vuso i masusuluosi.'

<sup>18</sup> "Moni a vanunua vuso do sou vei ve sou ma mapigogoi ete ne sou asu. Bibi tasa ei vei maido, 'Eau oliosi a mauma tasa mea na asu na oite. Maula, eau na ma asu oto.'

<sup>19</sup> "Me tasa lou i vei maido, 'Eau oli a bulmakau savulu tasa mina pipigona mea kale na asu na tove sou. Maula, eau na ma asu oto.'

<sup>20</sup> "Me matolunai ei vei maido, 'Eau taulai alaba. Maido me eau ma mapigogoi ete na asu.'

<sup>21</sup> "Io a bibi na pipigona ei maasi liu a inade vuso do usino na bibi buo minei. Ilala a tamana luma ei longe a inadnade do, ei lilotivula mei vei ana bibi na pipigona minei maido, 'Oo asu asi usino na vea buobuo ma vea banini mina aubu buobuo

ie, me oo guale sou a kapelabena me a vanunua vovone sou mamau me sou a mata ego me sou asu tagapeo, me oo maasi sou usinani minau.'

<sup>22</sup> "Me a bibi na pipigona ei vei, 'Bibi buo, eau goliosi tomane o vei, moni a luma ei saboa vonu.'

<sup>23</sup> "Ma bibi buo ei vei ana bibi na pipigona maido, 'Eau kale a luma minau ni vonu. Maido o asu na vea buobuo ma aububu banini na loeloe, me o ade sagali ane sou ne sou asu usinani.

<sup>24</sup> Eau vei le amutou, sou vuso a vanunua lisa eau toleale sou odo, ne sou ma ani ete pilu e eau.'

*Bibi ni damutala iiti pala me ei ogomuli e Iesu*

<sup>25</sup> Abuna vanunua ma tavivine buo sou asu pilu e Iesu, me ei sauvule me ei vei ane sou maido,

<sup>26</sup> "Mane a bibi ei asuale eau, moni ei ma butuale ete tamana me tinana me susuna me natatuna me tatasina me latavivine ne ei, me maulina minei oto tamai, ei ma mapi-gogoi ete ni muina a disaipel minau.

<sup>27</sup> Me a bibi tasa ei ma tabule ete a tau-valeuti minei me ei ogomuli e eau, ei ma mapi-gogoi ete ni muina a disaipel minau tamai.

<sup>28</sup> "Mane tasa mine amutou ei kale ni tige a luma na ulagenata tasa minei, ei ni ugu pala me ei ni damutale kube a mapa mina tinigena luma do. Ei kale ni muada, mapa do ni mapi-gogoi a mapulina luma do ue boa.

<sup>29</sup> Mane ei tau moni a vuna mei ma mapi-gogoi ete ni mapalipali a luma do, io a vanunua vuso sou ite, ne sou soke a adepin-tolana ane ei.

<sup>30</sup> Ne sou vei, 'Bibi iedo ei soke a tinigena, moni ei ma mapi-gogoi ete ni mapuli.'

<sup>31</sup> "Ue mane a mapana tasa ei isa a vanunua na maubina i savuluvulu savulu tasa (10,000) ni asu ni maubi ana mapana tasa sea ei isa a vanunua na maubina i savuluvulu savulu lua (20,000), io mapana odo ei ni ugu pala me ei ni damutala iiti maido ei ni mapi-gogoi ni maubi ana mapana sea do ue boa?

<sup>32</sup> Mane ei damutale ei ma mapi-gogoi ete, na ilala butu minei saboa ino bulago, ei ni peltase a vanunua usino ne ei me ei tagi e ei a inade mina valimatena maubina.

<sup>33</sup> Maido me tomane moni mane tasa mine amutou i ma lametase ete a golugolu vuso minei, ei ma mapi-gogoi ete ni muina a disaipel minau.

*Iesu ei adetinovo a masi ei palea pagu (Mat 5:13; Mak 9:50)*

<sup>34</sup> "Maido me masi ei doana. Moni mane a mamisina masi odo i buale, ma masi iodo ni doana lou matina?

<sup>35</sup> Ei ma palea oto tomane a magamaga alaba i toe a mauma i doana, vanunua sou pitaselele usala. Bibi ei isa a tagilana ei ni longe a inade ie."

## 15

*Adetinovo mina sipsip i buale (Mat 18:12-14)*

<sup>1</sup> Sou a vanua na gualena takis me sou a vanua na sinusu sou asu agavuale Iesu mina nilongena inade minei.

<sup>2</sup> Me sou Parisi ma vanua na muadana binea sou poi e ei me sou vei maido, "Bibi ieli ei maitamaina pilu a vanua na sinusu me ei aani pilupilu e sou."

<sup>3</sup> Me Iesu i bilii e sou a adetinovona maido,

<sup>4</sup> "Mane tasa mine amutou ei isa a sipsip savulu sobo tasa, me mane a sipsip tasa i buale, ei ni veletase a sipsip savulu ialasue timana ialasue na avena tasa, me ei ni asu ni tilomuli a sipsip tasa i buale do mapi-gogoi ei ni poge.

<sup>5</sup> Ilala ei guale a sipsip, ei ni mamavute ei na baune ei mei ni mongemonge.

<sup>6</sup> Ma ilala ei veteliu usinani na luma, ei ni toleale tamtamaina me sou so malu agavuale ei, mei ni vei ane sou maido, 'Amutou mongemonge pilu e eau! Eau pogesi a sipsip minau tasa i buale do!'

<sup>7</sup> Eau vei le amutou, tomane moni a munongena ni palea buo sele lou na langi mane a bibi na sinusu tasa i sauvule a lilona. A munongena do ei vululusi sele a munongena ne sou a vanunua savulu ialasue timana ialasue sou bilesiosii me sou ma isa oto a pipigona mina sauvulena lilonen sou.

*Adetinovo mina vatu i buale*

<sup>8</sup> "Ue mane a tavine tasa ei isa a vatu drakma\* savulu tasa, me tasa i buale. Ei ni suli a lada mei kakalo a luma mei gemu iiti mapi-gogoi ei ni poge.

<sup>9</sup> Ilala ei pogesi, ei ni toleale tamtamaina me sou so malu na aubu tasa, me ei ni vei le sou, 'Amutou mongemonge pilu e eau! Eau pogesi a vatu i buale do!'

<sup>10</sup> Tomane moni, eau vei le amutou, a munongena ni palea balivua ne sou a bineanea mine Salemo ilala bibi na sinusu tasa ei sauvule a lilona."

*Adetinovo mina bibi ei isa a natuna lua*

<sup>11</sup> Ei ade lou maido, "Bibi tasa ei isa a natuna bibi lua.

<sup>12</sup> Me natuna bisiisii i vei le tamana maido, 'Ouma, eau kale oo no soebule le eau

\* 15:8 Drakma ei a vatu tomane a denarii. Ieli a mapa na pipigona mina malada tasa na ilala do.

pilu e tuagu a gologolu minio, minau oo no bilii e eau seidei.' Io tamana ei soebule a gologolu vuso minei usino ne sulu.

<sup>13</sup> "I ma tabaa oto, natuna bisiisii i viepili a gologolu vuso minei, me ei asu usino na avena tasa i bulago. Me ei mapalipali a vatu minei mina toe mongemongena vovone ei.

<sup>14</sup> Na ilala vatu minei vuso i pulu, a vitolona taula i palea na avena do. Me ei ma isa oto a golu tasa.

<sup>15</sup> Maido me ei asu mei malu pilu a bibi tasa na avena do. Ma bibi edo i peltase ei usino na gona minei ni iteale a bolobolo.

<sup>16</sup> Me ei kale ni guale a uliulina bin bolobolo sou ani mina mavonina tiane ei, moni a bibi tasa i ma bilii ete ei a golu tasa.

<sup>17</sup> "Seidolo a damutatalana bilesi i palea ne ei, me ei vei maido, 'Vanunua na pipigona mine euma sou isa a gona inani makuba sele. Moni eau eili eau mate sele a vitolona.

<sup>18</sup> Eau na ilisi me eau na veteliu usino ne euma. Me eau na vei lei maido, "Ouma, eau goli a sinusu usino ne Salemo me oo.

<sup>19</sup> Seidei eau ma mapigogoi ete no tole eau e natumu. O toe eau tomane a bibi na pipigona tasa minio."

<sup>20</sup> Io ei ilisi mei asu usino ne tamana.

"Ilala ei saboa ino bulago, tamana i ite ei mei lilomuli sele ei. Me tamana i vele usino mei bingtole e natuna mei gamumi e ei.

<sup>21</sup> "Me natuna i vei lei maido, 'Ouma, eau goli a sinusu usino ne Salemo me oo. Me eau ma mapigogoi ete no tole eau e natumu.'

<sup>22</sup> "Moni e tamana i vei ana vanunua na pipigona minei maido, 'Amutou guale asi a malasana kinainai me mu malavelave e ei. Me mu tau a maomao tasa na uuna. Me mu makai a ubupolo na ubune ei.

<sup>23</sup> Me mu guale a natuna bulmakau a aina tubu odo me mu valipute. Neitou aani me neitou mongemonge.

<sup>24</sup> Vuna maido, natugu ieli ei matesi, moni ei mauili lou. Ei bualesi, moni eitou poge lei e ei.' Io sou soke a inanina buo, me sou mongemonge.

<sup>25</sup> "Na ilala do natuna matalagu ei ino na mauma. Ilala ei veteliu, me ei sibitala agavuale a luma, me ei longe a tinangi na ude ma tilialiana.

<sup>26</sup> Io ei toleale a bibi na pipigona tasa, me ei tagi e ei maido, 'Ieli a sava?'

<sup>27</sup> Ma bibi na pipigona i vei lei maido, 'Tasimu i veteliuosi, me tamamu i valipute a natuna bulmakau a aina tubu, vuna maido tamamu ei ite natuna ei veteliu me ei puiale moni.'

<sup>28</sup> "Natuna matalagu i longe a inade do, ei sinoa mei ma kale ete ni gali ulilo na luma. Io tamana ei asu usala me ei bilii e ei a inade doana.

<sup>29</sup> Moni ei maliu a inade mine tamana maido, 'Oite. Avala papai sele eau vovo tivula sele a gunolina pipigona minio. Me eau ma saukikiki ete a inademu. Moni oo ma bilii ete eau a natuna meme tasa ve eau mongemonge pilu e tamtamaigu. Boa.

<sup>30</sup> Moni e natumu iede, ei mapalipalios i a gologolu vuso minio pilu e sou a sualolona tavivine. Na ilala ei veteliu, o valipute a natuna bulmakau a aina tubu ane ei.'

<sup>31</sup> "Me tamana i vei lei maido, 'Natugu, taliuliu o ugugu pilu e eau. Ma gologolu vuso minau ei minio.

<sup>32</sup> Moni eitou neitou maimonge, ma lilone eitou ni kubaana, vuna maido tasimu ie ei matesi, moni ei mauili lou. Ei bualesi, moni eitou poge lei e ei.'

## 16

### *Adetino vo mina bibi na itealena pagu*

<sup>1</sup> Iesu ei vei le sou a disaipel minei maido, "Bibi na vuvutina tasa ei isa a bibi na itealena luma minei. Ma vanua sanii sou ubi a inade ana bibi na itealena ve ei mapalipali sabubi a gologolu minei.

<sup>2</sup> Maido me a bibi buo ei vei le a bibi na itealena maido, 'A inade ieli eau longe a inigogomu iede i matina? Oo no ademuade a gologolu minau ino na limamu. Vuna o no ma mapigogoi ete no muimu lou a itealena.'

<sup>3</sup> "Io bibi na itealena do ei vei le ei oto maido, 'Eau na goli a sava? Bibi buo ei kale ni taulele eau na pipigona mina itealena. Eau ma sagali oto na pesi a magamaga. Mea maela na tagi e sou a vanua sanii ne sou bilii e eau a vatu ma gologolu.

<sup>4</sup> Moni eau muada a sava eau na goli, ilala bibi buo ei taulele eau a pipigona mina itealena, vanua ne sou guale eau usino na luma mine sou.'

<sup>5</sup> "Me ei toleale sou a vanunua tastasa sou isa a ginau na bibi buo minei, mei tagi a bibi tasa ei sibitala pala, 'Oo gau visa mina bibi buo minau?'

<sup>6</sup> "Me ei vei, 'Taogo na bulu na oliv savulu sobo tasa.' Ma bibi na itealena i vei lei, 'Oo guale a laulau ieli sou niage a ginau minio i, mo ugu asi mo niage savulu lima.'

<sup>7</sup> "Ma bibi na itealena ei vei ana bibi tasa sea, 'Ginau minio visa?' Me ei vei, 'Bie na vit savulu sobo tasa.' Ma bibi na niitealena i vei le ei, 'Oo guale a laulau sou niage a ginau minio ie, me oo niage savulu pantolu.'

<sup>8</sup> "Me mulimuli, ilala bibi buo ei poge-vuti a golu bibi na niitealena ei goli iodo, ei masalai a bibi na itealena pagu odo, vuna maido ei goli a inigogona tomane a bibi ei isa a damutatalana. Vanunua sou ogomulimuli a inigogona mina magamaga ieli sou muada sele a matamatana vea mina

gunolina pipigona mine sou, me sou vululusi a vanunua sou ogomuli a inigogona mina muada.

<sup>9</sup> Me eau vei le amutou, a vatu vanunua sou guale a inigogona pagu, namutou maitamaina a vatu iedo. Me mulimuli, ilala a vatu iedo ei pulu, ne sou guale amutou usino na lumaluma namutou muine amutou taliuli taliuli.

<sup>10</sup> “Mane a bibi tasa ei iteale kube a golugolu banini, ei ni iteale kube iiti a golugolu buobuo tamai. Me a bibi ei ma goli bilesi ete a golugolu banini, ei ni ma goli bilesi ete a golugolu buobuo.

<sup>11</sup> Maido me mane amutou ma iteale kube ete a vatu mina magamaga ie, sei ni bilii e amutou a pipigona niitealalena golugolu ivu?

<sup>12</sup> Me mane amutou ma iteale kube ete a golugolu mina vanunua sanii, sei ni bilii e amutou a golugolu mine amutou oto?

<sup>13</sup> “Bibi na pipigona tasa boa i mapigogoi ni buloi na bibi buo lua pilu. Ei ni kale tasa me ei ni liloegelue ane tasa. Ei ni longemuli e tasa me ei ni lametase tasa. Amutou ma mapigogoi ete namutou muina matano ne Salemo me na vatu tamai.”

*Iesu ei adepalea a binea ma niitealalena mine Salemo*

<sup>14</sup> Sou e Parisi sou kalekale sele a vatu, maido ma ilala sou longe a inadenade vuso iodo, sou adeptola ane ei.

<sup>15</sup> Me ei ade ane sou maido, “Amutou toebueue amutou oto masae na laguna vanunua. Moni e Salemo ei muada a lilone amutou. Golu a vanunua sou damu ve ei a golu doana ivu, iede a golu pagu ivu na matane Salemo.

<sup>16</sup> “A binea pilu e sou a profet sou muina mapigogoi a ilala mine Ioanes. Moni soke na ilala ieli, sou veipale a niitealalena mine Salemo, me a vanunua vuso sou sagali sele a ginalina ulilo na niitealalena mine Salemo.

<sup>17</sup> “Langi pilu a magamaga ne sulu buale, moni a malibuuna inade baini tasa mina binea ni ma buale oto.

<sup>18</sup> “Mane a bibi ei iavetase susuna me ei tavui a tavine tasa lou, ei goli a sualolona, me mane a bibi ei tavui a tavine tasa, lisa suana i iavetase ei, ei tamai goli a sualolona.

*Mapanulina mina bibi na vuvutina pilu e Lasarus*

<sup>19</sup> “Bibi na vuvutina tasa ino, me taliuliui ei kai a doanana kinainai kasososo, me na malada taliuliui ei aniani a gona inani i doadao.

<sup>20-21</sup> Me agavuale a tema na luma mina bibi na vuvutina do, a kapelabena bibi ei ngolo a muina. Aisana e Lasarus, vovona tuutuu me ei kale ni ani a gona inani i pu utano na poso na inani mina bibi na

vuvutina do, ma busebuse sou asu maino me sou damedame a tuutuu minei.

<sup>22</sup> “Io kapelabena bibi ei mate, me sou a bineanea sou maasi e ei usino na madalone Abraham. Ma bibi na vuvutina tamai ei mate, me sou peilai e ei.

<sup>23</sup> Ei ino muina na aubu na davutina taula. Ei gemu uata me ei ite Abraham muina bulago sele, me Lasarus ei ino ne madalone ei.

<sup>24</sup> Io bibi na vuvutina ei tola me ei vei maido, ‘Ouma Abraham, oo lilomuli e eau mo vei le Lasarus ni vui a uuna na nanu mei ni asu usinani ni tau a uuna na tabelegu ni maigi sapa. Eau eili na oavi ie me eau lai a davutina buo sele.’

<sup>25</sup> “Moni e Abraham i vei, ‘Natugu, oo no damutale. Ilala oo maui, oo guale a golugolu vuso doana minio. Me Lasarus ei guale a golugolu vuso pagu. Moni seidei na aubu ie lilone ei i doana. Me oo guale a davutina pagu buo.

<sup>26</sup> Ma golu tasa lou. Balivua mine amiteu me amutou a malulu taula tasa ino, maido ma vanunua eili sou kale ne sou seuti a malulu me sou asu usino ne amutou, sou ma mapigogoi ete. Me sou a vanunua maino, sou ma mapigogoi ete ne sou seuti me sou asu usinani ne amiteu.’

<sup>27</sup> “Me a bibi na vuvutina ei vei maido, ‘Mane maido, ouma, eau tagi e oo, mapigogoi no peltase ei ni asu usino na luma mine euma.

<sup>28</sup> Eau isa e tatasigu lima, me ei ni vei le sou. Dae ne sou tamai asu usinani na aubu ieli mina gualena davutina taula.’

<sup>29</sup> “Moni e Abraham ei vei, ‘Sou isa a inade mine Moses me sou a profet. Ne sou longe a inade ne sou.’

<sup>30</sup> “Me a bibi na vuvutina ei vei, ‘Boa, ouma Abraham, moni mane a bibi tasa ei matesi me ei ilisiliu, me ei asu usino ne sou, ne sou sauvule a lilone sou.’

<sup>31</sup> “Me Abraham ei vei lei maido, ‘Mane sou ma longemulimuli ete a inade mine Moses me sou a profet, ne sou tamai ma longemuli ete a inade na bibi tasa i ilisiliu na minate.’”

## 17

*Inigogona pagu i toegegeligeli a silimulina*

(Mat 18:6-7, 21:22; Mak 9:42)

<sup>1</sup> Iesu ei vei le sou a disaipel minei maido, “Matamatana tinovena pagupagu ei ni palea ni goli a vanunua ma tavivine sou bosa a sinusu. Moni mavaana buo ei ni palea le a bibi ei toe a golu sou odo ni palea.

<sup>2</sup> Mane ei toe tasa mine sou e selebanini iodo ni bosa a sinusu, io puiale a vanunua ne sou pale a vatu bubuli tasa buo na loone ei me ne sou lange ei utano na dasi.

<sup>3</sup>“Tilale kube amutou oto. Mane tamaimu ei goli a sinusu, oo no ade ane ei ni toebilelesi. Mane ei sauvule a lilona, oo no lilotase a sinusu minei.

<sup>4</sup> Me mane ei goli a sinusu usino minio mapigogoi padiluanai na malada tasa, ma padiluanai ei veteliu usino minio me ei vei, ‘Eau sauvulesi a lilogu,’ io oo no lilotase a sinusu minei.”

*Adetinovo mina vuana mastet*

<sup>5</sup> Sou a aposel sou vei le Bibi Taula maido, “Oo no toe a silimulina mine amiteu ni palea buo lou.”

<sup>6</sup> Me Bibi Taula ei vei le sou maido, “Mane amutou isa a silimulina tomane a vuana mastet alabaini sele, amutou mapigogoi namutou vei ana obu odo, ‘O ilisi pilu a aamu mo asu magili ino na dasi,’ ma obu ni longemuli a inade mine amutou.

*Inigogona mina bibi na pipigona*

<sup>7</sup> “Mane a bibi tasa mine amutou ei vei ana bibi na pipigona ni asu ni valipole a magamaga ue ni asu mei iteale a sipsip, io ilala bibi na pipigona do ei veteliu, nane a bibi buo minei ni vei lei, ‘O asu asi usinani mo ugu a aanina?’

<sup>8</sup> Boa. Moni a bibi buo ei ni vei ana bibi na pipigona maido, ‘Oo masusulu a gona inani minau, me oo pale a malo mo buloi e eau mapigogoi eau aani mea inu, mulimuli oo no aani mo oinu.’

<sup>9</sup> Me nane a bibi buo ei ni vate kubaana usino na bibi na pipigona na ilala bibi na pipigona ei ogomuli a inade minei? Boa.

<sup>10</sup> Maido me amutou tamai, ilala amutou goliosia a golugolu vuso tomane ei vei le amutou, amutou namutou vei, ‘Amiteu a vanunua na pipigona sabubu moni. Amiteu goli a pipigona mine amiteu moni.’ ”

*Iesu i toekube a vanunua savulu tasa sou isa a sinobe a kolokolo*

<sup>11</sup> Iesu i asu usino ne Ierusalem, me ei asu balivua na avena mine Samaria me Galili.

<sup>12</sup> Ei gali ulilo na aubu tasa, ma vanunua savulu tasa sou isa a sinobe a kolokolo sou asu me sou poge ei. Moni sou magili bulago

<sup>13</sup> me sou tola vauta maido, “Iesu, bibi buo, oo no lilomuli e amiteu.”

<sup>14</sup> Iesu i ite sou, me ei vei le sou maido, “Amutou asu me mu maite a vovone amutou usino ne sou a prist.” Sou asu usino, ma vovone sou i palea alaba lou.

<sup>15</sup> Ma bibi tasa mine sou ei ite a vovona ei palea doanasi, me ei veteliu. Ei tolatola mei beilange a aisane Salemo.

<sup>16</sup> Me ei totopatulu me ei tapute a laguna utano na magamaga agavuale a ubune Iesu, me ei toledangia e Iesu. Me a bibi iedo ei maino ne Samaria.

<sup>17</sup> Iesu i malii a inade maido, “A vanunua savulu tasa sou ma palea alaba oto, io? Moni a vanunua ialasue sou ive?”

<sup>18</sup> Nane a bibi tasa maino na abuna sea ieli moni i veteliu mei beilange a aisane Salemo, io?”

<sup>19</sup> Me ei vei ana bibi iodo maido, “Oo ilisi mo asu. Silimulina minio i toekube oo.”

*Natuna Bibi ei ni palea muada*

*(Mat 24:23-28, 37-41)*

<sup>20</sup> Sou e Parisi sou tagi e Iesu maido, “Sei ilala a niitealalena mine Salemo ni palea?” Me ei malii a inade mine sou maido, “A niitealalena mine Salemo ei ni ma palea oto ne sou ite a matane sou.

<sup>21</sup> Me sou ma mapigogoi ete ne sou vei, ‘Oite, ei eili ie,’ ue ‘Ei ino nado.’ Oite! Niitealalena mine Salemo ei eiliosi balivua ne amutou.”

<sup>22</sup> Me ei vei le sou a disaipel maido, “Mulimuli a ilala ni palea, me namutou kale sele a niitena malada tasa mine Natuna Bibi. Moni namutou ma ite ete.

<sup>23</sup> Me ne sou vei le amutou maido, ‘Oite, ei eili ie,’ ue ‘Oite, ei ino do.’ Moni namutou ma ogomulimuli lei e sou.

<sup>24</sup> Amutou muada, ilala Natuna Bibi ei sibitala ei ni goli moni maido, tomane a muada na sima, ei sima valautu na langi na avena mainani me usino na avena maino.

<sup>25</sup> Moni palapala ei ni tabule a davutina makuba, ma vanunua na ilala seidei ne sou lametase ei.

<sup>26</sup> “Matana inigogona sou goli na ilala mine Noa, ne sou goli a matana inigogona tasa do na ilala Natuna Bibi ei asu usinani.

<sup>27</sup> Sou aaniani me sou ininu, me sou taulailai, i asu mapigogoi a ilala Noa ei gali ulilo na kuta. A sali buo ei palea, me ei toegegeli a vanunua ma tavivine vuso.

<sup>28</sup> “Na ilala mine Lot tamai. Sou aaniani, me sou ininu, me sou olioli me sou masosove, me sou danidani me sou tigtige a luma.

<sup>29</sup> Moni a ilala Lot ei ilisitase Sodom, a oavi pilu a vatu loiloi i pu muata na langi tomane a adavu, me ei toegegeli e sou a vanunua ma tavivine vuso.

<sup>30</sup> “Io matana inigogona tasa moni ei ni palea na malada Natuna Bibi ei sibitala muada.

<sup>31</sup> Na malada do mane a bibi tasa ei ino oata na mapana luma, ma golugolu minei ei lilo na luma, ei ni ma sivosivo lou ni guale a golugolu minei. Tomane moni, a bibi ei ino na mauma, ei ni ma veteliulu lou usino na luma minei.

<sup>32</sup> Amutou damutale e susune Lot.

<sup>33</sup> Mane a bibi tasa i kale ni lapitole obi a maulina minei oto, io maulina minei ni buale. Moni mane a bibi tasa i iabitase



a maulina minei, maulina minei ni muina kuba.

<sup>34</sup> Eau vei le amutou, na lodo ie bibi lua ne sulu ngolo na poso tasa, Salemo ni guale tasa ne sulu me tasa ni muina.

<sup>35-36</sup> Ilala tavine lua ne su sauvuvule a vit, Salemo ni guale tasa ne sulu me tasa ni muina."

<sup>37</sup> Sou a disaipel sou tagi e ei maido, "Bibi Taula, golu sou ieli ni palea iva?" Me Iesu ei vei le sou maido, "Na avena a aitola i tabuli i, na avena iedo a loaaulu sou viepilupilu."

## 18

*Adetivono mina buasu i nai sagali a bibi na nilongena vavasana ni buloi e ei*

<sup>1</sup> Iesu ei bilii e sou a adetivovona tasa mina matetengine sou ne sou kaka taliuliu, me ne sou ma balebale lou.

<sup>2</sup> Ei vei maido, "Na aubu buobuo tasa, a bibi na nilongena vavasana tasa ino. Bibi iedo ei ma laelae oto e Salemo, me ei ma damutatale ete sou a vanunua.

<sup>3</sup> Ma buasu tasa, ei ino na aubu buobuo do. Ei asu usino na bibi na nilongena vavasana do me ei vei le ei, 'Oo no vilemuli iiti a inade a bibi i butuale e eau.'

<sup>4</sup> "A bibi odo ei longetase moni a inade na buasu, moni mulimuli ei oto damutale maido, 'Eau ma lae oto e Salemo me eau ma damutale vaute ete sou a vanunua.

<sup>5</sup> Moni buasu odo ei biliili a mavaana usinani ne eau, maido me eau na buloi e ei a vilemulialena vavasana minei, dae ei ni asu taliuliu usinani minau me eau na bale.'

<sup>6</sup> Ma Bibi Taula ei ade lou maido, "Amutou longe a inade mina bibi na nilongena vavasana ieli ei pagu.

<sup>7</sup> Sou a vanunua ma tavivine Salemo ei vilealesi minei oto, me sou tagitagi e ei na maladalada vuso me na lodo vuso, nane Salemo ni ma buloi ete sou, io? Nane ei magitalitali mei ni ma buloi asi ete sou, io? Boa vuso sele.

<sup>8</sup> Eau vei le amutou, ei ni buloi asi sele sou. Moni na ilala Natuna Bibi ei asu usinani, ei ni ite a silimulina ne sou a vanunua ma tavivine mina magamaga ue boa?"

*Adetivovona mina bibi lua sulu kake Salemo*

<sup>9</sup> Iesu ei bilii a adetivovona usino na vanua sanii sou damutale ve sou a bilisi na vanua, me sou ite sou a vanunua sanii tomane a vanunua sabubu.

<sup>10</sup> "Bibi lua sulu asu usino na luma mine Salemo ne su kaka. Tasa do ei e Parisi me tasa ei a bibi na gualena takis.

<sup>11</sup> Parisi odo ei magili me na lilone ei oto ei kaka maido, 'Salemo, eau toledangangi e oo. Eau ma tomane ete sou a vanunua mina

paaalina me sou a vanunua pagu me sou a vanunua mina sualolona, ue tomane a bibi mina gualena takis ie.

<sup>12</sup> Na wik tastasa eau vavaevae eau a gona inani malua. Ma golugolu vuso eau guale, eau soebule a maduna savulu tasa me eau bilii e oo a maduna tasa.'

<sup>13</sup> "Moni a bibi na gualena takis ei magili bulago, moni ei ma gemu oto uata na langi. Ei labe a madalona mei vei, 'Salemo, oo no dode eau, eau a bibi na sinusu.'

<sup>14</sup> Me Iesu i vei, "Eau vei le amutou, na ilala bibi na gualena takis iedo ei veteliu usino na luma minei, ei palea a bilisina bibi na matane Salemo. Moni e Parisi iedo ei boa. Vuna maido, vanunua vuso sou beilange a aisane sou oto, Salemo ei ni taupui e sou utano. Ma vanunua vuso sou taupui e sou utano oto, Salemo ei ni beilange a aisane sou."

*Iesu ei vei ne sou litase selebanini usino ne ei*

*(Mat 19:13-15; Mak 10:13-16)*

<sup>15</sup> Sou maasi sou e selebanini usinani ne Iesu. Sou kale ei ni tau a limane ei muata ne sou. Me sou a disaipel sou ite, sou sinoa ane sou.

<sup>16</sup> Io Iesu i toleale selebanini vuso, mei vei le sou, "Amutou litase selebanini ne sou asuale eau. Amutou ma madetasetase lei e sou, vuna niitealalena mine Salemo i mine sou tomane selebanini ie.

<sup>17</sup> Eau ade patotona sele ane amutou, mane a bibi tasa i ma guale ete a niitealalena mine Salemo tomane selebanini sou gualeale, ei ma mapigogoi ete ni gali ulilo. Boa vuso sele."

*Munuganuga ei isa a golugolu makubei ade pilu e Iesu*

*(Mat 19:16-30; Mak 10:17-31)*

<sup>18</sup> Munuganuga tasa ei tagi e Iesu maido, "Magiligilina doana, eau na goli a sava me ea mapigogoi na guale a maulina taliuliu taliuliu?"

<sup>19</sup> Me Iesu ei vei lei maido, "Vuna matina oo tole eau a doana bibi? Salemo tasa moni ei doana.

<sup>20</sup> Oo muadasi a inadenade mina binea, 'Amutou ma gologoli lei a sualolona, ma valiputepute lei a vanua, ma paaialii lou, ma vavasa sabububu lou, tade tamatamane amutou me tinatinane amutou.\*,"

<sup>21</sup> Ma munuganuga ei vei maido, "Ilala eau saboa bibaini i asu mapigogoi seidei, eau ogomulimuli a binea vuso de."

<sup>22</sup> Iesu ei longe a inade do me ei vei maido, "Oo saboa boto a golu tasa. A golugolu vuso o isa i, oo no masosove me oo no bilii e sou

\* 18:20 Gualeliuna 20:12-16; Binea 5:16-20

kapelabe. Oo goli maido, o no isa a golugolu doana sele na langi. Me o ogomuli e eau.”

<sup>23</sup> Moni a munuganuga ei longe a inade do, ma lilona i mavaa sele, vuna ei isa a golu makuba sele.

<sup>24</sup> Ei ite a munuganuga mei vei maido, “Ginali na vanunua sou isa a golu makuba ulilo na niitealalena mine Salemo ei sana sele.

<sup>25</sup> Kamel ei kale ni gali ulilo na salu na sinaina, ei ma sana oto tomane a bibi na vuvutina ei gali ulilo na niitealalena mine Salemo.”

<sup>26</sup> Vanunua sou longe a inade do me sou vei maido, “Mane i maido, sei mapigogoi ni guale a maulina taliuliu?”

<sup>27</sup> Me Iesu ei vei, “Golu a bibi ei ma mapi-gogoi ete ni goli, iede Salemo ei mapigogoi ni goli.”

<sup>28</sup> Me Pita ei vei maido, “Oite! Amiteu ilisitasesi a golugolu vuso mine amiteu, me amiteu ogomuli e oo.”

<sup>29</sup> Me ei vei le sou maido, “Eau ade pato-tona ane amutou, bibi ei ilisitase a luma, ue tamana me tinana, ue tatasina, ue susuna, ue natatuna ana niitealalena mine Salemo,

<sup>30</sup> ilala ei saboa eili na magamaga ie, Salemo ei ni bilii e ei a golugolu makuba sele, me na ilala ei ni palea mulimuli, Salemo ei ni bilii e ei a maulina i doana taliuliu taliuliu.”

*Matolunai Iesu ei vei ei ni mate me ei ilisiliu*

*(Mat 20:17-19; Mak 10:32-34)*

<sup>31</sup> Iesu i guale a disaipel savulu tasa timana lua me ei vei le sou maido, “Oite! Seidei neitou asu usino ne Ierusalem. Ma inadenade vuso lisa sou a profet sou niage e Natuna Bibi ni palea ivu.

<sup>32</sup> Maido ne sou bilii e ei usino na limane sou a vanua mina abuna sea. Me ne sou adeptintola ane ei me ne sou toegegeli ei me ne sou apisosoli e ei.

<sup>33</sup> Me ne sou tibi e ei me ne sou valipute ei. Moni na malada tolunai ei ni ilisiliu.”

<sup>34</sup> Moni a disaipel sou ma muada oto a vuna inade do. Vuna inade do i ovu sele ne sou, me sou ma muada oto a inade ei vei.

*Iesu ei toekube a bibi tasa matana ego*

*(Mat 20:29-34; Mak 10:46-52)*

<sup>35</sup> Iesu ei sibitala agavuale a aubu e Ieriko, ma bibi tasa matana ego ei ugu na vea me ei kakake a vatu.

<sup>36</sup> Ei longe a abuna vanunua ma tavivine buo sou asu asu maino, mei tagi e sou maido, “A sava de?”

<sup>37</sup> Me sou vei le ei, “Iesu mine Nasaret ei maino asuas.”

<sup>38</sup> Matana ego do ei tola maido, “Iesu, oo Natune Devit, oo lilomuli e eau.”

<sup>39</sup> Vanunua sou muga pala sou sinoa ane ei ni vale. Moni ei tola vauta sele lou maido, “Oo Natune Devit, oo lilomuli e eau.”

<sup>40</sup> Me ei magili mei ade ane sou ne sou maasi a bibi edo usinani ne ei. Mata ego do ei asu agaviosi usinani, me Iesu ei tagi e ei maido,

<sup>41</sup> “Oo kale eau na goli le oo a sava?” Me ei vei, “Bibi Taula, eau kale na gemu.”

<sup>42</sup> Me Iesu ei vei lei, “Matamu ei ni kuba. Silimulina minio ei toekube oo.”

<sup>43</sup> Ma tabaa oto ei gemugemu, mei ogomuli e Iesu mei beilange a aisane Salemo. Ma vanunua ma tavivine vuso sou ite a golu odo sou tamai sou beilange a aisane Salemo.

## 19

*Iesu ei asu usino na luma mine Sakius*

<sup>1</sup> De Iesu ei asu ulilo ne Ieriko, mei kale ni ogomuli a vea usino.

<sup>2</sup> Bibi tasa ino na aubu buo odo, aisana e Sakius. Ei a munuganuga mine sou a vanua na gualena takis, mei isa a vatu makuba.

<sup>3</sup> Ei kale ni ite Iesu ve ei e sei matana bibi. Moni a abuna vanunua ma tavivine taula ino, me ei ma mapigogoi ete ni ite Iesu, vuna ei boto.

<sup>4</sup> Io, ei vele pala usino mei sae uata na obu a fik tasa ni ite ei, vuna Iesu ni polo na vea do.

<sup>5</sup> Io Iesu ei sibitala na avena dolo mei gemu uata, ei vei ane ei maido, “Sakius, o sivo asi utano. Seidei eau na muigu ino na luma minio.”

<sup>6</sup> Maido me ei sivo asi utano mei monge-monge sele, me ei guale Iesu usino na luma minei.

<sup>7</sup> Ma vanunua vuso sou ite, me sou ade papai maido, “Ei asu ugu na luma mina bibi na sinus.”

<sup>8</sup> Me Sakius i magili mei vei le Bibi Taula maido, “Bibi Taula, oo longe. Seidei eau na soebule a golugolu vuso minau na avena ni lua mea bilii a avena tasa usino ne sou a kapelabena vanunua. Me mane eau auala ana bibi tasa mea paaali a golu tasa minei, de eau na maliu usino ne ei maiva vululu lou.”

<sup>9</sup> Me Iesu ei vei ane ei maido, “Seidei a gualeliuna mine Salemo ei paleasi na luma ie, bibi tamai ieli ei e natune Abraham.

<sup>10</sup> Natuna Bibi ei asu usinani mina tilo-mulina ma gualeliuna vanunua sou buale.”

*Adetinoivo mina vanunua na pipigona savulu tasa sou guale a vatu*

*(Mat 25:14-30)*

<sup>11</sup> Ilala vanunua ma tavivine sou longe-longe, ei bilii e sou a adetinovona tasa lou tamai, vuna maido ei sibitala agaviosi ne Ierusalem, me sou damu ve saga i a niitealalena mine Salemo ni palea muada.

<sup>12</sup> Maido me ei vei maido, “Bibi buo tasa doana ei asu usino na aubu tasa bulago ne sou tau e ei ni palea a mapana. Me mulimuli ei ni veteliu.

<sup>13</sup> Ei toleale a vanua na pipigona minei savulu tasa, me ei soebule a vatu silva tas-tasa\* usino ne sou. Me ei vei le sou maido, ‘Amutou pipigo a vuvutina i mapigogoi a ilala eau na veteliu.’

<sup>14</sup> “Moni e sou minei oto na aubu odo sou liloegelug ane ei. Maido ma ilala ei asuosi sou peltase a vanunua mina maasina inade. Ne sou vei maido, ‘Amiteu ma kale ete na bibi iede ni palea a mapana mine amiteu.’

<sup>15</sup> “Moni sou tau e ei i palea a mapana, me mulimuli ei veteliu. Ei veteliuosi, de ei vei maido, ‘Toleale a vanunua na pipigona lisa eau bilii e sou a vatu odo. Eau kale na muada, vatu visa lou sou vuso tastasa guale lei muata na vatu eau bilii e sou.’

<sup>16</sup> “Io bibi tasa i muga pala, me ei vei, ‘Bibi taula, a vatu minio do eau pipigo a vuvutina i me eau guale a vatu savulu tasa lou muata ne ei.’

<sup>17</sup> Me ei vei lei maido, ‘Oo a bibi na pipigona doana. Oo iteale kube a golu iedo ei alabaini sele, maidolo me oo no guale na sagalina mina niitealena aubu savulu tasa.’

<sup>18</sup> “De maluana bibi na pipigona ei asu maino, me ei vei, ‘A vatu minio iodo, bibi taula, eau guale a vatu lima lou.’

<sup>19</sup> Ei vei le ei, ‘Oo no iteale aubu lima.’

<sup>20</sup> Me a bibi na pipigona tasa lou i asu maino, me ei vei, ‘Bibi taula, oite! Vatu minio eili ie. Eau palesobe i a malo baini tasa.

<sup>21</sup> Vuna maido, eau lae oo, oo a lilotivulana bibi, o guale a golu o ma tau ete, me o guale a gona inani o ma dani ete.’

<sup>22</sup> “Ei vei ana bibi na pipigona dolo maido, ‘Oo a bibi na pipigona pagu sele! Na inade minio oto eau na vavasa ane oo. Oo muadasi i maido, eau a lilotivulana bibi, me eau gualeale a golugolu eau ma tau ete me eau guale a gona inani eau ma dani ete.

<sup>23</sup> De posa matina oo ma tau ete a vatu minau na luma na tinaunau na vatu, maido me na ilala eau veteliu eau mapigogoi na guale a vatu ieli pilu a gegena sanii lou?’

<sup>24</sup> Me ei vei ana vanunua sou magili agavi, ‘Mu guale a vatu minei iede, me mu bilii a bibi ei isa a vatu savulu tasa lou.’

<sup>25</sup> Me sou vei lei maido, ‘Bibi taula, ei isasi i a savulu tasa lou.’

<sup>26</sup> “Eau vei le amutou, vanunua vuso sou isa a golu sanii, eau na bilii i sanii lou. Moni mane a bibi tasa ei ma isa oto a golugolu, de golu banini ei isa i, ede eau na taulele ne ei.

<sup>27</sup> Moni a vanunua sou butuale eau odo, sou ma kale ete eau na ugu a mapana mine sou, amutou guale sou usinani na, me mu valiputemate sou na matane eau.’”

<sup>28</sup> Iesu ei veiosi, me ei soke a inasu uata usino ne Ierusalem.

*Iesu ei gali ulilo ne Ierusalem tomane a mapana*

(*Mat 21:1-11; Mak 11:1-11; Ioa 12:12-19*)

<sup>29</sup> Iesu i sibitala agavuale a aubu e Betpage me Betani, na loena sou vate e Oliv, me ei peltase a disaipel lua,

<sup>30</sup> me ei vei le sulu maido, “Amulu asu usino na aubu tasa maino, me namu ite a donki tasa sou paletole. Bibi tasa i saboa ugu ne ei. Lube a mota me mu maasi a donki usinani na.

<sup>31</sup> Mane a bibi tasa i tagi e amulu maido, ‘Vuna matina amu lubetase a donki iede?’ De ne amulu malii maido, ‘Bibi Taula ei isa a pipigona i.’”

<sup>32</sup> Iesu i peltase sulu usino, su ite a golugolu vuso ino tomane Iesu ei vei le sulu odo.

<sup>33</sup> Sulu lubelube a mota mina donki iodo, me a tamatamana donki sou tagi e sulu maido, “Vuna matina amulu lubetatase a donki iede?”

<sup>34</sup> Me sulu vei, “Bibi Taula ei isa a pipigona i.”

<sup>35</sup> Io sulu langetase a donki usinani ne Iesu. Me su tau a kinainai mine sulu muata na donki, me sou maugi e Iesu muata na donki.

<sup>36</sup> Ilala ei asu, vanunua ma tavivine sou kaitase a kinainai mine sou me sou oave na vea.

<sup>37</sup> Ma ilala ei asu agavualesi a vea i pantase a loena Oliv, a abuna disaipel taula sou soke a munongena. Me sou tola sagali, me sou beilange a aisane Salemo, vuna sou ite a gona sinaga vuso ei goliosio.

<sup>38</sup> Sou tola maido, “Maibalave a mapana ieli i asu usinani na aisane Bibi Taula. Lilomeana ei ni ino na langi ma aisa buo mine Salemo ni oata oto sele.”†

<sup>39</sup> Me Parisii sanii lilo na abuna vanunua do, sou vei le Iesu maido, “Magiligilina, oo madetase sou a disaipel minio a tinolana.”

<sup>40</sup> Me ei malii a inade maido, “Eau vei le amutou, mane sou ma tola oto, a vatuvatu ne sou tola.”

*Iesu ei tangisobe e Ierusalem*

<sup>41</sup> Ma ilala Iesu i sibitala agavi, me ei ite a aubu buobuo, me ei tangisobe.

<sup>42</sup> Ei vei maido, “Ierusalem, seidei na malada ieli oto eau kale oo no muada a golugolu i mapigogoi ni toe oo no kuba moni a

\* 19:13 Na inade Grik ieli a *minas* me *minas* tasa ei a mapa na pipigona mina bibi tasa na game tolu na ilala do. † 19:38

muimu. Moni a golugolu sou odo ino ovu, me oo ma mapigogoi ete no ite.

<sup>43</sup> Oo longe. Mulimuli a ilala tasa ni palea, me sou a butu minio ne sou taupilipili a magamaga i sailli a bigomu taula minio, me ne sou bigomusobe sele oo na avena vuso.

<sup>44</sup> Me ne sou valipopole oo utano na magamaga pilu e natatumu lilo na bigomu minio. Me ne sou ma litase ete a vatu tasa i tabuli muata na vatu tasa sea, vuna maido oo ma muada oto a ilala Salemo i asuosi usinani na buloi ne oo.”

*Iesu i peltaselele a vanunua sou pipigo vuvutina lilo na luma mine Salemo (Mat 21:12-17; Mak 11:15-19; Ioa 2:13-22)*

<sup>45</sup> Ilala Iesu ei gali ulilo na luma mine Salemo, ei soke a voteletasena vanunua sou goligoli a pipigo na masosovena.

<sup>46</sup> Ei vei le sou maido, “Laulau mine Salemo i vei maido, ‘Luma minau ei ni muina a luma mina kinaka.’<sup>‡</sup> Moni e amutou toe i a muina unovu mina vanunua na paaalina.”<sup>§</sup>

<sup>47</sup> Me na malada vuso ei matetengitengi a vanunua lilo na luma mine Salemo. Ma munugana prist, ma vanua na muadana binea, ma munuganuga na vanunua ma tavivine, sou tilo a vea mina valiputene ei.

<sup>48</sup> Moni sou ma poge ete a vea tasa mina valiputene ei, vuna vanunua ma tavivine vuso sou sagali mamau sele a nilongena inade minei.

## 20

*Sou tagi e Iesu sei bilii e ei a sagagalina (Mat 21:23-27; Mak 11:27-33)*

<sup>1</sup> Malada tasa Iesu i matetengi a vanunua ma tavivine lilo na luma mine Salemo, mei veipale a malongolongona kubaana. Ma munugana prist ma vanua na muadana binea pilu e sou a vanua buobuo sou asuale ei.

<sup>2</sup> Me sou vei lei maido, “Oo vei le amiteu, oo guale a sagagalina iva me oo goli a golugolu sou ie? Me sei bilii e oo a sagagalina iede?”

<sup>3</sup> Me ei malii a inade mine sou maido, “Eau tamai eau na tagi e amutou a golu tasa. Amutou vei le eau,

<sup>4</sup> a maavuvutuna mine Ioanes, ei a golu mina aubu na langi, ue ei a golu mina vanunua moni?”

<sup>5</sup> Io sou maiademuli i balivua ne sou oto maido, “Mane eitou vei, ‘Ei a golu mina langi,’ ei ni vei, ‘Posa matina amutou ma silimuli ete ei?’

<sup>6</sup> Me mane eitou vei, ‘Ei a golu mina vanunua moni,’ io vanunua vuso ne sou ubi e

eitou a vatu, vuna maido sou silimuli sagali maido Ioanes ei a profet.”

<sup>7</sup> De, sou vei lei maido, “Amiteu ma muada oto sei bilii e ei sagagalina ie.”

<sup>8</sup> Me Iesu ei vei le sou maido, “Eau tamai eau na ma vei ete le amutou sei sagagalina eau goli a pipigona ie.”

*Adetinovona mina vanunua pagupagu sou iteale a mauma na vain (Mat 21:33-46; Mak 12:1-12)*

<sup>9</sup> Iesu ei soke a adetinovona tasa lou usino ne sou a vanunua ma tavivine maido, “Bibi tasa i dani a mauma na vain. Me ei tau a mauma na vain iedo na vanunua sanii ne sou pipigo i. Me ei asu malu tabaa na aubu tasa i bulago.

<sup>10</sup> De na ilala obuobu a vain sou vua, ei peltase a bibi na pipigona tasa usino na vanunua sou pipigo na mauma na vain. Ei kale ne sou bilii e ei a vuana sanii. Moni a vanunua sou pipigo na mauma na vain iedo sou valibili ei, me sou peltase sabubi liu e ei usino.

<sup>11</sup> Me tamana mauma i peltase a bibi na pipigona tasa lou usino ne sou. Moni sou valibili tamai ei, me sou toemaele ei me sou peltase sabubi lei e ei.

<sup>12</sup> Io ei peltase a bibi na pipigona matolunai usino. Moni sou toegegeli sele ei tamai, me sou peltase sabubi lei ei usala.

<sup>13</sup> “Maido me tamana mauma i vei, ‘Eau na goli a sava? Eau na peltase natugu a bibi, ede eau kale mamai sele. Nane mapigogoi ne sou longemuli ei.’

<sup>14</sup> “Moni a vanunua sou pipigo na mauma sou ite natuna, me sou maiademuli i balivua ne sou oto maido, ‘Bibi ieli ei ni guale a golugolu vuso mine tamana. Eitou valipute ei, me eitou oto neitou lapitole a golugolu vuso minei.’

<sup>15</sup> Maidolo me sou lapualelele ei malilo na mauma usalasi, me sou valiputemate ei.

“De tamana mauma mina vain ni toemaitine a vanunua do?”

<sup>16</sup> Ei ni asu maino mei ni toegegeli a vanunua sou pipigo na mauma iedo. Me ei ni bilii a mauma na vain iedo na vanunua sanii sea.” Vanunua sou longe a inade do, sou vei, “Ei ni ma palea oto maido.”

<sup>17</sup> Moni e Iesu i gemuale sou, mei vei, “Io, vuna matina sou niage a inade tasa na Laulau mine Salemo maido,

‘Vatu iedolo a vanunua na tinigena luma sou pitaselele,

i palea a munugana vatu mina toesagalina inapu na luma’\*?”

<sup>18</sup> Vanunua vuso sou bosa muata na vatu odo, ne sou maloloto vuso. Mane a vatu odo

ei pu muata na bibi tasa, vatu ni toegegeli vuse ei.”

<sup>19</sup> Sou a vanua na muadana binea me sou a prist sou muada i Iesu ei ubi a adetinovo iedolo usino ne sou. Maido me sou kale ne sou saavi e ei. Moni sou lae a vanunua ma tavivine, maido me na ilala iedo sou ilisi bula moni.

*Ne sou bilii a takis usino ne Sisar, ue boa?*  
(Mat 22:15-22; Mak 12:13-17)

<sup>20</sup> Io sou a prist me sou a vanua na muadana binea sou ulage kukube Iesu. Me sou peltase a vanunua sanii ne sou usino mina itepaaaline ei. Sou a vanunua do sou ioto ve sou kale sele ne sou longe a inade minei. Sou kale ne sou masulitase ei ni goli a inade tasa i mapigogoi ne sou vavasa i ane ei, me ne sou tau e ei na limana munuganuga mina niitealena avena buo, me ei ni vavasa ane Iesu.

<sup>21</sup> Sou tagi e ei maido, “Magiligilina, amiteu muada, o matetengitengi a vanunua a inade ivu, me oo gologoli a matana inade tasa moni usino na vanunua vuso, ivu sou so isa a aisa ue sou so ma isa oto a aisa. Na inade i patotona moni oo matetengitengi e sou a vanunua ma tavivine a inigogona mine Salemo.

<sup>22</sup> De, o damutale matina? Neitou bilii a takis usino ne Sisar ue boa?”

<sup>23</sup> Moni Iesu i muadasi i a nioto sou goli iodo, maido me ei vei le sou,

<sup>24</sup> “Maite e eau a vatu tasa. Nunu ma aisa ieli na vatu, ei mine sei?” Me sou vei, “Mine Sisar.”

<sup>25</sup> Me ei vei le sou maido, “Maido me golu mine Sisar, mu bilii e Sisar, ma golu mine Salemo, mu bilii e Salemo.”

<sup>26</sup> Maidolo me sou ma mapigogoi ete ne sou masulitase ei na inade tasa ei goli na matane sou a vanunua. Sou saga mamau sele a inade ei malii le sou, me sou ma ade oto.

*Sou e Sadusi sou tagi e Iesu a ilisiliuna*  
(Mat 22:23-33; Mak 12:18-27)

<sup>27</sup> Vanunua sanii mine Sadusi, sou veveie a ilisiliuna i boa, sou asuale Iesu.

<sup>28</sup> Me sou tagi e ei maido, “Magiligilina, Moses ei niage a inade tasa ane eitou maido, mane a bibi tasa i taulai, me mulimuli ei mate me ei ma isa oto a natuna, de tasina ei ni gualo susuna bibi iedo me ei ni natua, me a abuna mine tuana ni ma pulu oto.

<sup>29</sup> De tametatasi padilua sou ino. Mata-lagu i tavui a tavine, me ei mate, me ei ma isa oto a natuna tasa.

<sup>30</sup> Io maluanai ei tavui a tavine do,

<sup>31</sup> me mulimuli tasina matolunai tavui ei. Tametatasi padilua vuso ieli, moni sou ma isa oto a bibaini tasa, me sou mate.

<sup>32</sup> Me mulimuli tavine dolo tamai ei mate.

<sup>33</sup> De mulimuli, ilala na ilisiliuna mina minate, tavine do ei ni e susune sei bilisi? Vuna tametatasi padilua sou tavui ei.”

<sup>34</sup> De Iesu ei vei le sou maido, “Vanunua ma tavivine mina ilala seidei ieli sou taulailai.

<sup>35</sup> Moni a vanunua ma tavivine Salemo i vei mapigogoi ne sou ilisiliu lou mina minate, sou ma mapigogoi etesi ne sou taulai,

<sup>36</sup> vuna maido sou ma mapigogoi etesi ne sou mate. Ne sou palea tomane a bineanea mine Salemo. Salemo i mailisiosi e sou na minate, maido me ne sou muine sou a natatune ei.

<sup>37</sup> Moni Moses tamai ei maite eitou maido sou a vanunua sou matesi, sou ilisiliu na minate. Na mapamulina na obu baini ei lulu aani odo, ei vei maido, Bibi Taula, e Salemo mine Abraham me Aisak me mine Iekop.†

<sup>38</sup> Salemo ei ma Salemo oto mina vanunua sou matesi. Boa. Ei e Salemo mina vanunua ino sou mau. Na matane ei vanunua ma tavivine vuso sou eili ie sou mau.

<sup>39</sup> Vanua na muadana binea sanii sou longe Iesu ei goli a inade iedo, me sou vei maido, “Magiligilina, inade minio ei patotona.”

<sup>40</sup> Me sou lae a tinagine Iesu a golu tasa lou.

*Iesu i tagi e sou a vanunua ma tavivine a bibi Salemo i matoale*

(Mat 22:41-46; Mak 12:35-37)

<sup>41</sup> Io Iesu i tagi e sou a vanunua ma tavivine maido, “Posa matina sou veveie e Krai, ei e natune Devit?”

<sup>42</sup> Na Laulau na Inala, Devit oto i vei maido,

“Bibi Taula i vei ane Bibi Taula minau maido,

“O ugu na limagu e gata

<sup>43</sup> mapigogoi eau tau e sou a butu minio matano ne oo.‡

<sup>44</sup> “Maido me, Devit oto i tole a bibi iedo Bibi Taula minei. De posa matina a bibi iedo ei e natune Devit?”

*Sou a vanua na muadana binea sou gologoli a inigogona pagu*

(Mat 23:1-36; Mak 12:38-40; Luk 11:37-54)

<sup>45</sup> Na ilala a vanunua ma tavivine vuso sou longelongo, Iesu ei vei le sou a disaipel minei maido,

† 20:37 Gualeliuna 3:6 ‡ 20:43 Laulau na Inala 110:1

46 “Amutou tilale amutou e sou a vanua na muadana binea. Sou kale mamaimai ne sou kai a kinainai lagolago, me sou asu maisabasaba, me sou kale mamaimai a vanunua ma tavivine ne sou vei oaso doana usino ne sou na muina viepiluna. Me sou kale mamaimai ne sou guale a munugana niugugu na luma mina viepiluna ne sou, me sou kale sele ne sou guale a munugana poso na niugu mina aanina buo.

47 Sou iotetatase sou a buasu mina paaalina golugolu mine sou, me sou aualala a gunolina kinaka i lago. Na ilala mina vavasana ne sou guale a mavaana buo mamau sele.”

## 21

*Buasu tasa ei bilii a niabi usino ne Salemo*

*(Mak 12:41-44)*

1 Iesu i gemugemu, mei ite a vanunua na vuvutina sou asu maino, sou lange a vatu mine sou na taogo na vatu.

2 Mei ite a buasu tasa i kapelabe sele, ei lange a vatu banini lua na taogo do.

3 Me ei vei, “Eau vei ivu sele le amutou, buasu ieli, ei oabi a vatu i buo mamau sele ane sou a vanunua vuso sou oabi ie.

4 A vanunua ma tavivine vuso ieli sou isa a vatu makuba, me sou lange a avena moni usino na taogo. Moni a buasu ieli ei boto sele, moni ei lange a vatu vuso mina unolina gona inani minei.”

*Iesu ei vei a luma mine Salemo ni mamau*  
*(Mat 24:1-2; Mak 13:1-2)*

5 Disaipel minei sanii sou masalai a luma mine Salemo, “Sou malolome iiti sele a luma ie a vatuvatu doadoana ma matamatana niabi doana.” Me Iesu i vei,

6 “A golugolu amutou ite ie, ilala ni palea, ma vatu tasa ei ni ma tabuli oto muata na vatu sea. Ne sou valipopole vuse me sou lange sou utano.”

*Iesu ei vei a mavaana papaina ni palea*  
*(Mat 24:3-14; Mak 13:3-13)*

7 Sou a disaipel sou tagi e Iesu maido, “Magiligilina, maido me sei ilala a golugolu sou odo ni palea? Sei matailala ni palea pala na ilala a golugolu sou odo i agavios i palea?”

8 Me ei vei, “Amutou tilale, dae ne sou auala ane amutou. Vuna maido, vanunua makuba ne sou asu usinani a aisagu me sou vei, ‘Eau moni eau a bibi iedo.’ ‘Ilala i agavigavios i palea.’ Amutou ma asuasou leu a ogomuline sou.

9 Ma ilala amutou longe a maubina taula, amutou ma laelae lou. Golugolu sou odo ei ni palea pala, moni a punuluna malada ni ma sibitala asi oto.”

10 Me ei vei lou ane sou maido, “Sou a vanunua mina abuna sanii ne sou mailisi a maubina ane sou a vanunua mina abuabuna sea. Me sou a abuna mina mapana sanii ne sou mailisi a maubina ana abuabuna mine sou a mapana sea.

11 Malugulugu buobuo me a vitolona taula ma sinobe buo ni palea na magamaga tastasa. Ma matamatana golu mina toeni-laena ma matailala talala ni palea na langi.

12 “Moni na ilala golugolu vuso iedo ei saboa palea, ne sou saavi e amutou me sou toegegeli e amutou. Mina aisagu ne sou tau e amutou lilo na luma na kinaka mine sou e Iuda me na luma na tunuui. Me ne sou maasi e amutou usino na lagune sou a mapapana me sou a vanua na niitealalena aveavena.

13 Me ieli a vea doana tasa ne amutou veipale a malongolongona kubaana usino ne sou.

14 Maidolo me amutou ma masusulu lou pala i ne sei matana inade ne amutou malii usino ne sou,

15 vuna maido eau oto na tau a inade na asene amutou, me eau na bilii e amutou a muadana doa. Ma abuna vuso sou kale ne sou vavasa ane amutou, moni ne sou ma mapigogoi ete ne sou saukiki ue sou taupui e amutou.

16 Sou tamatamane amutou me tinatinane amutou me sou tatasine amutou me sou a daladala tasa me sou tamtamaine amutou, ne sou bilii e amutou na limane sou a butu me ne sou valipute sanii mine amutou.

17 Ma vanunua vuso ne sou lilogegelu sele ane amutou, vuna moni a aisagu.

18 Moni a aivune amutou tasa na letene amutou i ma mapigogoi ete ni buale.

19 Namutou magili sagali, me ne amutou guale a maulina.

*Iesu ei vei ne Ierusalem ni mamau*  
*(Mat 24:15-21; Mak 13:14-19)*

20 “Ilala amutou ite a vanunua na maubina sou asu usinani me sou magili sailli e Ierusalem, ne amutou muada, ilala mina aubu buobuo ie ni mamau i agavios i.

21 Na ilala do vanunua ma tavivine ino na avena mine Iudia ne sou oava usino na loeloena. Ma vanunua ino lilo ne Ierusalem ne sou ilisitase a aubu ie. Ma vanunua ino sala na aubu buobuo ne sou ma asuasou lou ulilo na aubu buobuo do.

22 Ilala iedo ei a ilala mine Salemo ni malii a inigogona pagu, maido ma inade vuso ino na Laulau mine Salemo, ei ni palea ivu.

23 Maule sou a tavivine sou tiana ma tavivine sou masususi a mongomongo, vuna maido ilala do a mavaana buo sele

ni palea na magamaga ieli, ma lilotivulana mine Salemo ni tabuli muata na abuna vanunua ma tavivine sou odo.

<sup>24</sup> Sou a butu ne sou asu usinani me ne sou valipute sou. Me ne sou maasi e sou usino ne sou ugu na luma na tunuui na aubu buo vuso na magamaga. Ma vanunua mina abuna sea, ne sou soetotole Ierusalem i mapigogoi na ilala Salemo i matoale e sou a abuna vanua sea ne sou iteale Ierusalem ni pulu.

*Mulimuli e Natuna Bibi ni asu usinani*

<sup>25</sup> “Na ilala do matamatana matailala ni palea na oaso, me na game me ne sou a mataidoido. Me na magamaga a abuna vanua vuso ne sou damutala papai me ne sou mama sele, vuna ne sou longe a tagumuna buo i pusi na dasi.

<sup>26</sup> Na ilala a vanunua sou damutatale a golugolu ni palea na magamaga, ne sou bosa a nilaena, vuna a golugolu sagali mina langi ni vuvule.

<sup>27</sup> Me na ilala dolo vanunua ma tavivine ne sou ite e Natuna Bibi ino na ausa ni asu usinani pilu a sagagalina ma muada buo minei.

<sup>28</sup> Ilala golugolu sou odo i sokesi ni palea, de namutou magili me mu beilange a letene amutou, vuna maido ilala mine Salemo i gualeliu e amutou i agaviosi.”

*Ne amutou guale a muadana na obu a fik*  
(Mat 24:32-35; Mak 13:28-31)

<sup>29</sup> Ei vei le sou a adetinovona tasa. “Amutou gemuale a obu a fik ma obu sanii sea tamai.

<sup>30</sup> Ilala amutou ite a laulau sou aputa alaba, de amutou muada, ilala mina oaso doana ei ni palea sie.

<sup>31</sup> Tomane moni, ilala amutou ite a golugolu sou odo i palea, namutou muada a niitealalena mine Salemo i agaviosi.

<sup>32</sup> “Eau vei ivu sele le amutou, vanunua ma tavivine mina ilala ieli saboa sou mate, golugolu vuso do ne sou palea.

<sup>33</sup> Langi pilu a magamaga ni buale, moni a inade minau ei ni ma buale oto.

*Disaipel ne sou tilale kube sou*

<sup>34</sup> “Moni amutou tilale, dae ne amutou inu maisaba taliuliu me amutou matalilili me amutou damutatale mamai a golugolu mina vovo. Na malada mine Bibi Taula do ni palea asi sele ne amutou tomane sou oso na vuo.

<sup>35</sup> Vuna maido, malada iedo ni palea na vanunua ma tavivine vuso na avena vuso mina magamaga.

<sup>36</sup> Ne amutou ulago kube e amutou me namutou kaka taliuliu ne amutou mapigogoi

asuleletase a golu vuso do me ne amutou magili na matane Natuna Bibi.”

<sup>37</sup> Malada vuso Iesu i matetengitengi a vanunua ma tavivine na luma mine Salemo, me na lodo ei asu na loena dolo sou tole e Oliv mei manoa nado.

<sup>38</sup> Ma vanunua ma tavivine vuso sou ilisi na autupola sele, me sou asuasusino na luma mine Salemo mina nilongena inade minei.

## 22

*Iudas ei adegatuna ni bilii e Iesu na limane sou a vanua buobuo*

(Mat 26:1-5, 14-16; Mak 14:1-2, 10-11; Ioa 11:45-53)

<sup>1</sup> Malada Buo mina ulalu a is boa,\* iede sou tole a Malada na Asuleletasena,† ei agaviosi ni palea.

<sup>2</sup> Ma munugana prist ma vanua na muadana binea, sou tilotilo a vea tasa ne sou valipute Iesu, vuna maido sou lae a vanunua ma tavivine.

<sup>3</sup> Me Satan ei gali ulilo ne Iudas, sou tole ei e Iskariot, ei e tasa mine sou a disaipel savulu tasa timana lua.

<sup>4</sup> Me ei asu ade pilu a munugana prist ma munuganuga na ulagena luma mine Salemo. Ei kale ni tilo a vea tasa ni bilii e Iesu na limane sou.

<sup>5</sup> Sou a vanunua do sou mongemonge, me sou longo ane Iudas ne sou bilii e ei a vatu sanii.

<sup>6</sup> Me Iudas ei longo a inade ne sou, me ei tilotilo a vea tasa ni tau e Iesu na limane sou na ilala tasa sou a abuna vanunua ma tavivine buo sou ma ugu pilu oto e Iesu.

*Disaipel lua su masusulu a gona inani mina Malada na Asuleletasena*

(Mat 26:17-25; Mak 14:12-21; Ioa 13:21-30)

<sup>7</sup> Malada buo mina ulalu a is boa ei palea. Na malada do ne sou mapigogoi valipute a natuna sipsip na Malada na Asuleletasena.

<sup>8</sup> Maido me Iesu ei peltase Pita me Ioanes, me ei vei le sulu maido, “Amulu asu mu masusulu a gona inani mine eitou na malada buo.”

<sup>9</sup> Me su tagi e ei, “Oo kale ne amilu asu me nami masusulu iva?”

<sup>10</sup> Me ei vei le sulu maido, “Amulu asu ulilo na aubu buobuo, me amulu ni poge a bibi tasa ei tabulebule a taogo na nanu buo na vea. Amulu ogomuli e ei ulilo mina luma ei gali ulilo iodo.

<sup>11</sup> Me ne amulu vei le tamana luma do maido, ‘Bibi na matetengina ei tagi e oo, “Vilo ive ne eau pilu a disaipel minau namiteu ani a gona inani mina Malada na Asuleletasena?”’

\* 22:1 Gualeliuna 12:15-20 † 22:1 Gualeliuna 12:13, 21-28

<sup>12</sup> Me ei ni maite e amulu a vilo tasa buo oata i isa a poso, niugugu ue sei golu lou. Amulu masusulu na vilo do.”

<sup>13</sup> Io su asu, me su poge a golugolu vuso ino tomane ei i vei le sulu. Me su masusulu a gona inani.

*Iesu ei bilii e sou a disaipel a ulalu ma vain*

(Mat 26:26-30; Mak 14:22-26; 1Ko 11:23-25)

<sup>14</sup> Ilala mina inani ei paleasi, me Iesu ei ugu, me sou a aposel sou pilu e ei.

<sup>15</sup> Me ei vei le sou maido, “Eau kale sele na aani pilu e amutou na Malada na Asuleletasena, mulimuli eau na tabule a davutina.

<sup>16</sup> Maido me eau vei le amutou, eau na ma ani ete lei a inani ieli mapigogoi na ilala a golu ieli ei palea ivu mina niitealalena mine Salemo.”

<sup>17</sup> Me ei guale a taogo na vain tasa mei toledadangi e Salemo mei vei, “Amutou guale ielili me mu soebule balivua ne amutou.

<sup>18</sup> Eau vei le amutou, seidei me mulimuli tamai eau na ma ini ete a vain lou, mapigogoi na ilala a niitealalena mine Salemo ni palea.”

<sup>19</sup> Me ei guale a ulalu tasa me ei toledadangi me ei lee mei bilii e sou a disaipel. Me ei vei, “Ielili ei a mainigu, eau bilii e amutou. Amutou ne mu goli maido mina damutalene eau.”

<sup>20</sup> Ilala sou aani pulosi, ei guale a taogo na vain mei goli a inigogona tasa moni. Me ei vei maido, “Taogo na vain ielili ei a magilipiluna alaba eau goli a dalagu, iede eau singi ane amutou.

<sup>21</sup> Moni mu ite, limane a bibi ei kale ni tau eau mina limane sou a butu odo, ei eili pilu e eau na poso ie.

<sup>22</sup> Natuna Bibi ei ni ogomuli a vea ieli lisa e Salemo ei taوسي minei. Moni maule a bibi iedo ei usabutu ne eau.”

<sup>23</sup> Disaipel sou soke a tinagu lilo ne sou oto maido, “Sei ni goli a inigogona maido?”

*Disaipel sou maisaukiki a inade ve sei ni muga*

<sup>24</sup> A disaipel sou tamai sou maisaukiki a inade e sei ni muge sou.

<sup>25</sup> Me Iesu ei vei le sou maido, “Sou a mapana mina aveavena buo sou iteale sou a sagagalina mine sou, ma vanunua sou vate sou a bibi mina gunolina inigogona kubaana usino ne sou.

<sup>26</sup> Moni namutou ma gologoli lei maido. Bibi ei a munugana ne amutou, ei ni muina tomane a bibi ei mulisobo sele, me ei ni buloi e amutou tomane a bibi na pipigona.

<sup>27</sup> Me sei ei a munugana? A bibi ei ugu a inani ue a bibi ei soebule a inani? Munugana ei a bibi i ugu me ei aani iodo.

Moni eau eili balivua ne amutou tomane a bibi na pipigona mina buloine amutou.

<sup>28</sup> “Ilala golugolu vuso sou palea mina tinovene eau, amutou eili pilu e eau, me amutou ma veletase ete eau.

<sup>29</sup> Maido me eau bilii e amutou a niitealalena mine Salemo tomane euma ei biliiosi eau a niitealalena minei.

<sup>30</sup> Me na niitealalena mine Salemo namutou aani me mu oinu. Me namutou ugu na niugugu doana me namutou iteale sou a abuna savulu tasa timana lua mine Israel.

*Iesu ei vei e Pita ni lametase ei*

(Mat 26:31-35; Mak 14:27-31; Ioa 13:36-38)

<sup>31</sup> “Saimon, Saimon. Satan ei taguosi ve ei ni tove a silimulina minio, tomane a vanua sou kesilange a vit mina taulelena uliulina.

<sup>32</sup> Moni eau kakasi mina buloine oo, a silimulina minio ni ma bosa oto. Me na ilala oo sauvule mo veteliu, oo no masagali e tamtamaimu.”

<sup>33</sup> Me Pita ei vei lei maido, “Bibi Taula, eau masusuluosi na asu pilu e oo na luma na tunuui me na mate tamai.”

<sup>34</sup> Me Iesu ei vei, “Eau vei lio, Pita. Seidei, ilala kuleko ei saboa tangi, oo no vei matolu maido oo ma muada oto e eau.”

*Iesu ei vei le sou a disaipel ne sou polo a palakulu na vatu ma bie ma viso*

<sup>35</sup> Iesu ei vei le sou, “Ilala lisa eau peltase amutou, amutou ma polo oto a palakulu na vatu ma bie ma ubupolo pilu e amutou. Na ilala do amutou boto a golu tasa ue boa?” Me sou vei, “Boa.”

<sup>36</sup> Ei vei le sou maido, “Moni seidei bibi ei isa a palakulu na vatu, ei ni guale. Ma bie tamai. Me a bibi ei ma isa a oto a viso, ei ni masosove a kinainai lagolago minei me ei ni guale a vatu mei ni oli ane ei a viso tasa.

<sup>37</sup> Vuna maido, Laulau mine Salemo ei isa a inade maido, ‘Vanunua ma tavivine sou ite ei tomane a bibi tasa pagu.’ Eau vei le amutou, vanunua ma tavivine ne sou goli a inigogona li usinani minau. Vuna, a golugolu vuso Laulau mine Salemo ei vei ni palea le eau, ei ni palea.”

<sup>38</sup> Me sou vei, “Bibi Taula, oo oite. Amiteu isa a viso lua eili ie.” Me ei vei le sou maido, “Ei mapigogoi.”

*Iesu ei kaka na loena e Oliv*

(Mat 26:36-46; Mak 14:32-42)

<sup>39</sup> Iesu ei veletase a aubu buobuo me ei asu usino na loena e Oliv, tomane ei goli taliuliu. Ma disaipel sou ogomuli e ei.

<sup>40</sup> Ei sibitala na avena do mei vei le sou maido, “Namutou kaka ne amutou ma bosa oto a tinovo.”



41 Me ei ilisitase sou me ei asu bulago sapa, mapigogoi a nilovana a vatu sou lange. Me ei totopatulu me ei kaka maido,

42 "Ouma, mane oo kale, oo no taulele a taogo minau ie. Moni oo ma ogomulumuli lei a masagana minau. Oo no ogomuli moni a masagana minio."

43 Ma bineanea tasa mina langi i asu usinani minei me ei toesagali e ei.

44 Iesu ei somiale a mavaana i mamau sele, me ei kaka sagali lou. Ma maonona i palea tomane a daladala me ei kokolo utano na magamaga.

45 Ei kaka pulosi me ei magili me ei asu usino na disaipelel minei. Me ei ite sou so ngolongolo, vuna maido sou lilomavaa sele.

46 Me ei vei le sou, "Amutou ngolo ili? Amutou ilisi mu kaka, dae ne amutou bosa a tinovo."

*Iudas ei bilii e Iesu usino na limane sou a butu*

*(Mat 26:47-56; Mak 14:43-50; Ioa 18:3-11)*

47 Iesu ei saboa ino adeade, a abuna vanua taula sou asu maino. Bibi iedo sou tole e Iudas, ei e tasa mine sou a savulu tasa timana lua. Ei asu muga agavuale Iesu ni gamumi e ei.

48 Moni e Iesu ei vei lei maido, "Iudas, oo no bilii e Natuna Bibi na limane sou a butu a gamumina?"

49 Disaipelel sou magili sailli e Iesu sou ite a golu i palea, me sou vei, "Bibi Taula, oo kale namiteu uti e sou a viso?"

50 Me tasa mine sou ei valiuti a tulina ne gata mina bibi na pipigona mina mapana prist do, me a tulina ei pu utano.

51 Moni e Iesu ei ite me ei vei, "Litase a inigogona ie." Me ei tau a limana mina tulina bibi iedo, ma ei toekube ei.

52 Me Iesu ei vei usino na munugana prist ma munuganuga na ulagena luma mine Salemo me sou a vanua buobuo, sou asu usinani mina lapitole ei. "Amutou guale a viso ma obu, me amutou asu usinani tomene namutou saavi a bibina paaalina, io?"

53 Malada taliulu eau ino pilu e amutou lilo na luma mine Salemo, moni e amutou ma tau ete a limane amutou ne eau. Moni a ilala seidei ieli ei a ilala mine amutou, me a sagagalina mina tunuu ei muga."

*Pita i vei, ei ma muada oto e Iesu*

*(Mat 26:57-58; Mak 14:53-54, 66-72; Ioa 18:12-18, 25-27)*

54 Me sou saavi e Iesu me sou maasi e ei ulilo na luma mina mapana prist. Me Pita ei ogomuli e ei bulago sapa.

55 Vanunua sou tomi a oavi lilo na bigomu na luma do, me sou ugu pilu. Me Pita ei ugu balivua ne sou.

56 A tavine na pipigona tasa ei ite ei ugu agavuale a oavi, me ei gegemuale ei me ei vei, "Bibi tamai ieli ei muina pilu e Iesu."

57 Moni e Pita ei vei maido, "Boa. Tavine, eau ma muada oto e ei."

58 Mulimuli sapa lou bibi tasa ei ite ei me ei vei, "Oo tamai oo a bibi na abuna mine sou." Moni e Pita ei vei, "Bibi, eau boa."

59 Me tauluna a matailala tasa i pulosi, ma bibi tasa sea ei ade sagali maido, "Ivu sele, a bibi tamai ieli ei muina pilu e ei. Vuna ei a bibi mine Galili."

60 Moni e Pita ei vei, "Bibi, eau ma muada oto a inade oo vei." Ei saboa ino adeade, saga i a kuleko i tangi.

61 Me Bibi Taula ei sauvule ei me ei gemuale Pita. Me Pita i damutale a inade Bibi Taula ei vei le ei, "Seidei, ilala kuleko ei saboa tangi, oo no vei matolu maido oo ma muada oto e eau."

62 Me Pita ei gali usala me ei papaduale sele a tinangi.

*Sou polivai e Iesu me sou tibi e ei*

*(Mat 26:67-68; Mak 14:65)*

63 Vanunua sou lapitole e Iesu me sou adeptintola ane ei me sou tibi e ei.

64 Sou papalesobe a matane ei me sou tagi e ei maido, "Oo veipale seidei. Bibi ei tibi e oo, ei e sei?"

65 Me sou adeptintola papaina ane ei.

*Sou vavasa ane Iesu na matane sou a vanua na toebilelesina inade*

*(Mat 26:59-66; Mak 14:55-64; Ioa 18:19-24)*

66 Ilala oaso i tala, sou a vanua buobuo me sou a munugana prist ma vanua na muadana binea sou maiviepileu e sou. Me sou guale Iesu usino na vilo na vanunua na toebilelesina inade.

67 Sou vei, "Mane oo e Kraisi, vei le amiteu." Me ei vei le sou, "Mane eau vei le amutou, namutou ma silimuli ete."

68 Me mane eau tagi e amutou, ne amutou ma maluu ete.

69 Moni seidei ma ilala vuso mulimuli, Natuna Bibi ei ni ugu na lima gata mine Salemo i isa a sagalina buo."

70 Ma vanunua vuso sou tagi e ei, "Maidolo me oo e Natune Salemo, io?" Me ei vei le sou, "Tomane moni amutou veiosi maido."

71 Me sou vei, "Sei ademuadana tasa lou neitou kale? Vuna eitou oto longesi a inadena na asene ei oto."

## 23

*Sou vavasa ane Iesu na matane Pailat*

*(Mat 27:1-2, 11-14; Mak 15:1-5; Ioa 18:28-38)*

1 Me sou vuso mina vanua buobuo do sou ilisi me sou maasi e Iesu usino ne Pailat.

<sup>2</sup> Sou soke a vavasana ane ei, me sou vei maido, "Amiteu ite a bibi ieli ei toemaisabe a inigogona mina vanunua ma tavivine mine amiteu. Ei madetase amiteu a nilangena takis usino ne Sisar. Me ei vei ve ei oto ei e Kraiss, a mapana."

<sup>3</sup> Me Pailat ei tagi e Iesu maido, "Oo a mapana mine sou e Iuda, io?" Me Iesu ei sie maido, "Tomane moni oo veiosi iede."

<sup>4</sup> Me Pailat ei vei le sou a munugana prist me sou a abuna vanunua ma tavivine maido, "Eau ma poge ete a sinusu tasa mina bibi ie."

<sup>5</sup> Moni sou ade sagali lou maido, "Ei asu maisaba mina avena vuso ne Iuda, me ei matetengitengi a vanunua ma tavivine me ei mailisi maisabesabe a lilone sou soke na avena ne Galili asu usinani."

*Sou vavasa ane Iesu na matane Herot*

<sup>6</sup> Me Pailat ei longe a inade iedo, me ei tagi e sou maido, "Bibi ieli ei tau Galili, io?"

<sup>7</sup> Ilala Pailat ei muada i maido Iesu ei maino na avena magamaga Herot ei iteale, maido ei peltase Iesu usino ne Herot. Na ilala dolo Herot tamai ei ino ne Jerusalem.

<sup>8</sup> Herot ei ite Iesu, ei mongemonge sele. Vuna tabaa sele ei kale ni ite ei. Ei kale ni ite Iesu ni goli a gona sinaga tasa.

<sup>9</sup> Maido me Herot ei tagi e Iesu a inade makuba. Moni Iesu ei ma maliu ete a inade tasa usino ne ei.

<sup>10</sup> Ma munugana prist ma vanua na muadana binea sou asu maino me sou magili me sou vavasa sagali sele ane ei.

<sup>11</sup> Io Herot pilu a vanunua na maubina minei sou adegegeli e Iesu, me sou adepintola ane ei. Sou guale a kinainai tasa malasa, me sou makai e ei, me sou peltase ei usino lou ne Pailat.

<sup>12</sup> Na ilala do sulu maitamaina pilu, lisa su maibutualala.

*Pailat ei vei ne sou gati e Iesu na tauvaleuti*

*(Mat 27:15-26; Mak 15:6-15; Ioa 18:39-19:16)*

<sup>13</sup> Pailat ei tole sou a munugana prist me sou a munuganuga pilu a vanunua ma tavivine.

<sup>14</sup> Mei vei ane sou maido, "Amutou maasi a bibi ieli usinani minau, me amutou vei ve ei toemaisabe a inigogona mina vanunua ma tavivine. Mu ite! Na matane amutou eau tagi kube e ei a golugolu ie, eau ma poge ete a sinusu tasa amutou vavasa ana bibi ie.

<sup>15</sup> Me Herot tamai, ei isa damutatalana tasa moni, me ei peltase a bibi ieli usinani ne eitou. Oite! Bibi ieli ei ma goli ete a sinusu tasa mapigogoi eau na vei ei ni mate.

<sup>16-17</sup> Maido me eau na tibi e ei me na litase ei."

<sup>18</sup> Io sou tola vauta maido, "Valipute a bibi iede! Litase Barabas usinani ne amiteu!"

<sup>19</sup> Barabas ei a bibi tasa ei mailisi a maubina ana vanunua na itealena lilo na aubu buobuo, me ei valipute a bibi, me sou tau ei na luma na tunuui.

<sup>20</sup> Io Pailat ei vei lei a inade usino ne sou, vuna ei kale ni litase Iesu.

<sup>21</sup> Moni sou tola maido, "Gati ei na tauvaleuti! Gati ei na tauvaleuti!"

<sup>22</sup> Matolunai ei vei le sou, "Vuna matina? Ei goli sei matana sinusu? Eau ma poge ete a sinusu tasa minei mapigogoi na vei ei ni mate. Maido me eau na tibi e ei me na litase ei."

<sup>23</sup> Moni sou tola vauta lou ane ei ni gati e Iesu na tauvaleuti. Ma baligolune sou i vululusi sele.

<sup>24</sup> Maido me Pailat ei longemuli a inade mine sou, me ei longo e Iesu ni mate.

<sup>25</sup> Pailat ogomuli a inade ne sou, me Pailat litase a bibi ei mailisi a maubina ana vanunua na itealena aubu mei valipute a bibi me sou tau e ei na luma na tunuui. Me Pailat ei ogomuli a masagana mine sou mei bilii e Iesu usino na limane sou.

*Sou gati e Iesu na tauvaleuti*

*(Mat 27:32-44; Mak 15:21-32; Ioa 19:17-27)*

<sup>26</sup> Ma ilala sou maasi e Iesu, sou lapitole a bibi tasa aisana e Saimon i asuasu maino na avena mine Sairini. Me sou tau a tauvaleuti ne ei ni tabule me ei ogomuli e Iesu.

<sup>27</sup> Ma abuna vanunua ma tavivine sou ogomuli e ei, ma tavivine papaina sou tangi me sou ala dododo ane ei.

<sup>28</sup> Moni Iesu ei sauvule ei me ei vei le sou maido, "Tavivine mine Ierusalem, amutou ma tangisobesobe le eau. Amutou tangisobe e amutou oto ma natatune amutou.

<sup>29</sup> Longe! A ilala tasa ni palea me ne sou vei maido, "Tavivine sou ma mapigogoi ete ne sou tiana, me sou ma vasusu oto, ma sou ma masusi ete, ne sou mongemonge."

<sup>30</sup> Na ilala dolo ne sou vei ana loeloena maido,

'Amutou tapopo muata ne amiteu.'

Me sou vei ana lolo maido, 'Amutou avisobe e amiteu.\*'

<sup>31</sup> Mane sou goli a matana inigogona maido ilala a obu i esaesa, ne sou toe sei inigogona ilala a obu i magolu?"

<sup>32</sup> Me sou maasi tamai a bibi lua su goli a inigogona pagu. Ne sou valipute sulu pilu e Iesu.

<sup>33</sup> Sou divi na gona tasa, aisana e sigou. Me na aubu odo sou gati e Iesu na tauvaleuti. Me sou gati tamai a bibi lua pagu

odo. Tasa ino na lima gata ne Iesu, me tasa ino na lima meli ne Iesu.

<sup>34</sup> Me Iesu ei vei, “Ouma, oo no lilotase a sinusu mine sou. Sou ma muada oto a golu sou goli ie.” Me sou soebule a kinainai me sou mailaba e sei ni guale tastasa.

<sup>35</sup> Vanunua ma tavivine sou magili me sou gemugemu, moni sou a munuganuga sou adepintola ane Iesu maido, “Mane ei e Krai mine Salemo me Salemo i vileale ei, ei ni buloi liu ei oto tomane ei buloi a vanunua sanii.”

<sup>36</sup> Vanunua na maubina tamai sou adepintola ane ei. Sou asu agavuale ei me sou bilii e ei a nanu a viniga.

<sup>37</sup> Me sou vei maido, “Mane oo a mapana mine sou e Iuda, oo no gualeliu e oo oto.”

<sup>38</sup> Me sou niage a inade tasa muata ne Iesu. “BIBI IELI EI A MAPANA MINE SOU E IUDA.”

<sup>39</sup> Tasa mina bibi lua pagu sou gati e sulu pilu e Iesu odo, ei adepintola ane Iesu maido, “Mane oo a Krai, oo gualeliu e oo oto pilu e amilu tamai.”

<sup>40</sup> Moni e tamaina ei longe a inade do, me ei sinoa ane ei me ei vei maido, “Oo tamai oo guale a mavaana tasa moni tomane ei, moni oo ma lae oto e Salemo, io?”

<sup>41</sup> Ei bilesi neitau guale a mavaana na sinusu eitaugoli. Moni a bibi ieli, ei ma goli ete a sinusu tasa.”

<sup>42</sup> Me ei vei maido, “Iesu, oo damutale eau na ilala oo asu ulilo na niitealalena minio.”

<sup>43</sup> Me Iesu ei vei lei maido, “Eau vei ivu sele ane oo, seidei oo no muina pilu e eau na aubu na munonge.”

### *Iesu i mate*

(*Mat 27:45-56; Mak 15:33-41; Ioa 19:28-30*)

<sup>44</sup> Io ei tomanesi a matailala savulu tasa timana lua. Na ilala do oaso i lodoalo ma tunuu i avisobe a magamaga vuso, i asu mapigogoi a matailala tolu na lavilavi.

<sup>45</sup> Ma malo taula ino kulukulu lilo na luma mine Salemo, ei masinge vuso, me ei palea maduna lua.

<sup>46</sup> Me Iesu i tola vauta lou maido, “Ouma, eau tau a nunugu mina limamu.” Ei vei maido, me ei mate.

<sup>47</sup> Munuganuga mina vanua na maubina savulu sobo tasa ei ite a golu ie i palea, ei beilange a aisane Salemo. Me ei vei maido, “Patotona sele, ei a bilesina bibi.”

<sup>48</sup> Ma vanunua ma tavivine vuso sou maleleilei iodo, sou ite a golugolu i palea me sou labe a madalone sou, me sou asu liu usino na luma mine sou.

<sup>49</sup> Me tamtamaine Iesu vuso pilu a tavivine ne Galili sanii sou magili bulago sapa, me sou ite a golugolu vuso i palea.

*Sou tau a aitolane Iesu na aova na vatu*  
(*Mat 27:57-61; Mak 15:42-47; Ioa 19:38-42*)

<sup>50</sup> Me a bibi tasa ino aisana e Iosep. Ei tasa mine sou a vanunua na avelulusena inade. Ei a bilesina bibi.

<sup>51</sup> Ei ma ogomuli ete a damutatalana ma inigogona mine sou. Ei a bibi maino ne Arimatea mine e Iuda. Ei magitalitali a niitealalena mine Salemo.

<sup>52</sup> Bibi iedo ei asu usino ne Pailat mei tagi e ei ni bilii e ei a aitolane Iesu.

<sup>53</sup> Io ei guale a aitolane Iesu utano, mei avisobe ei a malo keakea, mei tau na muina minate, iede a aova tasa na vatu a vanunua sou goli me saboa sou tau a aitolana bibi tasa.

<sup>54</sup> Iedolo a malada mina masusuluna. Me bisii moni a Maolona Malada ni palea.

<sup>55</sup> Me tavivine sou veletase Galili me asu usinani pilu e Iesu, sou ogomuli e Iosep me sou ite a muina minate. Me sou ite e Iosep i tau a aitolane Iesu matina.

<sup>56</sup> Tavivine sou asu liu me sou masusulu a bunu sanii ma nanu i isa a manginana doana. Me na Maolona Malada sou manoa tomane a binea i vei.

## 24

### *Iesu ei ilisiliu*

(*Mat 28:1-10; Mak 16:1-8; Ioa 20:1-10*)

<sup>1</sup> Na munugana malada na wik, na atupola siisii, tavivine sou asu usino na muina minate. Sou guale a golu ei isa a manginana doana sou masusuliosii.

<sup>2</sup> Sou ite a vatu sou bulilele na muina minate.

<sup>3</sup> Me sou gali ulilo, moni sou ma ite ete a aitolane Bibi Taula Iesu.

<sup>4</sup> Me sou damutatala papai a golu ie. Na ilala do sou ite a bibi lua su magili agavi, kinainai mine sulu i lada mamau sele.

<sup>5</sup> Io sou lae sele me sou lagu motudu. Moni a bibi lua do su vei le sou maido, “Posa matina amutou tilomuli a bibi i isa a maulina na muina minate?”

<sup>6</sup> Ei ma eili otosi na. Ei ilisiosii. Namutou damutale a inade ei bilii e amutou odo na ilala ei saboa ino ne Galili.

<sup>7</sup> Ei vei le amutou maido, ne sou bilii e Natuna Bibi na limane sou a vanua na sinusu, me ne sou gati e ei na tauvaleuti, me na malada tolu ei ni ilisiliu lou.”

<sup>8</sup> Me sou damutale a inade mine Iesu

<sup>9</sup> me sou ilisitase a muina minate me sou veteliu. Me sou vei le sou a disaipel savulu tasa timana tasa ma vanunua ma tavivine sanii a golugolu vuso do.

<sup>10</sup> Tavivine sou bilii a inade do usino ne sou a aposel, ede Maria mina aubu Makedala me Ioana me Maria, ei e tinane Iemus, ma tavivine sanii sou ino pilu e sou.

<sup>11</sup> Moni e sou damu i a tavivine sou goli a inade sabubu moni. Me sou ma silimuli ete a inade mine sou.

<sup>12</sup> Moni e Pita ei ilisi mei vele usino na muina minate. Me ei motudu mei ielo ulilo, me ei ite a malomalo moni ino. Io ei veteliu mei damutala papai a golu i palea do.

*Iesu ei palea le a disaipel lua na vea usino ne Emeus*

*(Mak 16:12-13)*

<sup>13</sup> Na malada moni iodo, disaipel lua su asu usino na aubu tasa sou vate e Emeus. Aubu odo ino bulago ane Ierusalem mapigogoi a kilomita savulu tasa timana tasa.

<sup>14</sup> Me sulu maiadeade a golu vuso do i palea.

<sup>15</sup> Ilala sulu adeade a inade me su tagutagu, Iesu oto ei palea agavi me ei asu pilu e sulu.

<sup>16</sup> Moni a golu tasa ei taboboli a matane sulu, me sulu ma iteilale ete ei.

<sup>17</sup> Me ei tagi e sulu maido, "Amulu asuasu me mu maiveimulimuli a sava?" Me sulu magili me sulu lagu dododo sele.

<sup>18</sup> Me tasa mine sulu, aisana e Kliopas, ei adeliu maido, "Vanunua papaina mina aubu seasea seidei ieli sou ino ne Ierusalem. Nane oo moni o ma muada oto a golugolu i palea nado na ilala ie?"

<sup>19</sup> Me Iesu ei tagi e sulu, "Sei golu?"

Me sulu vei lei maido, "Amiteu adeade e Iesu maino ne Nasaret. Ei a profet, me ei goli a pipigona sagali ma inadnade sagali na matane Salemo me na matana vanunua vuso.

<sup>20</sup> Me sou a munugana prist ma munuganuga mine eitou sou tau e ei na limane sou a vanua na niitealena binea. Me sou maiademuli a valiputene ei, me sou gati ei na tauvaleuti.

<sup>21</sup> Palapala amiteu silimuli a bibi ieli Salemo i vileale ei mina gualeliune amiteu e Israel. Ma inade tasa tamai lou, seidei ei a malada matolunai na tauluna golugolu sou odo i palea.

<sup>22</sup> Ma tavivine sanii mina abuna mine amiteu, na autupola siisii sele, sou asu usino na muina minate me sou toe amiteu te saga sele.

<sup>23</sup> Sou ma ite ete a aitolane Iesu, me sou veteliu me sou vei maido, "Amiteu ite sou a bineanea mine Salemo me sou vei le amiteu maido, "Ei ino maui." "

<sup>24</sup> Me sanii mina abuna mine amiteu tamai sou asu usino na muina minate, me sou ite a golugolu muina tomana tavivine sou vei. Moni sou ma ite ete e Iesu."

<sup>25</sup> Me Iesu ei vei le sulu maido, "Amulu, vauta! Lilone amulu i ma ilisi asi oto a silimulina inade vuso sou a profet sou vei.

<sup>26</sup> Nane Kraisi ei ni guale pale a davutina me mulimuli ei ni guale a aisa buo sele maino ne Salemo, io?"

<sup>27</sup> Me ei soke a inade mine Moses me mina profet vuso, me ei matetengi e sulu a vuna avena inade vuso na Laulau mine Salemo ei ade e ei oto.

<sup>28</sup> Sou asu usino me sou sibilitala agavuale a aubu sulu kale ne su asuale. Me Iesu ei toe tomane ei kale ni asu sapa lou usino.

<sup>29</sup> Moni e sulu tale ei me su vei, "Oo muimu pilu e amilu. Oaso ei solosolosi, me bisii moni ei ni lodo." Maidolo me ei gali ulilo me ei ugu pilu e sulu.

<sup>30</sup> Ilala sou aani, Iesu ei pilu e sulu. Me ei guale a ulalu me ei toledadangi e Salemo, me ei lee, me ei bilii e sulu.

<sup>31</sup> Ma tabaa oto matane sulu i peo, me sulu iteilale ei. Moni ei bualetase sulu.

<sup>32</sup> Me sulu maiadeliu ane sulu oto maido, "Ilala eitau asu na vea, ei bilii e eitau a inade, me ei veipale a vuna damutatalana mina Laulau mine Salemo ane eitau, lilone eitau ei pansae sele."

<sup>33</sup> Ilala simoni iedo sulu ilisi me su veteliu usino ne Ierusalem. Me sulu poge a disaipel savulu tasa timana tasa pilu e tamtamaine sou sanii, sou viepilu.

<sup>34</sup> Me sou vei, "Patotona sele Bibi Taula ei ilisiliu! Saimon ei itesi ei!"

<sup>35</sup> Io sulu mapamuli ane sou a golugolu vuso ei palea le sulu na vea. Me sulu vei, "Ilala ei lee a ulalu, amilu iteilale ei."

*Disaipel sou ite Iesu*

*(Mat 28:16-20; Mak 16:14-18; Ioa 20:19-23; Apo 1:6-8)*

<sup>36</sup> Sou a disaipel saboa ino sou adeade, me Iesu oto ei magili balivua mine sou. Me ei vei le sou maido, "Lilone amutou ei ni muina mea."

<sup>37</sup> Moni sou saga sele me sou lae. Sou damu ve sou ite a kanunu tasa.

<sup>38</sup> Me ei vei le sou maido, "Posa matina amutou saga mamau? Posa matina amutou damutatala papai lilo na lilone amutou?"

<sup>39</sup> Mu ite a limagu ma ubugu. Eau oto eau eili. Pige a vovone eau me mu ite. Kanunu sou ma isa oto a mainine sou ma tuatwane sou. Moni amutou ite e eau, eau isa i."

<sup>40</sup> Ei vei maido, me ei maite sou a limana ma ubuna.

<sup>41</sup> Sou mongemonge sele, moni saboa sou silimuli. Me sou damutatala papai. Me ei vei le sou maido, "Amutou isa a gona inani sanii eili?"

<sup>42</sup> Me sou bilii e ei a maduna aia sou anonesi,

<sup>43</sup> me ei guale me ei ani masae ne sou.

<sup>44</sup> Me ei vei le sou maido, "Ilala eau saboa ino pilu e amutou, eau veiosi le amutou maido, golugolu vuso lisa sou niage e eau na

binea mine Moses me na laulau mine sou a profet me na Laulau na Inala, golugolu vuso ieli ei ni palea ivu.”

<sup>45</sup> Me ei pee a lilone sou ne sou damutale kube a vuna inade na Laulau mine Salemo.

<sup>46</sup> Mei vei le sou maido, “Laulau mine Salemo ei isa a inade maido, Kraisi ei ni tabule a davutina, me na malada tolu ei ni ilisiliu na minate.

<sup>47</sup> Me na aisane ei ne sou veipale a inade vuso usino ne Ierusalem i asu pea na aveavena vuso, ne sou sauvule a lilone sou me Salemo ei ni lilotase a sinusu mine sou,

<sup>48</sup> me namutou veipale a inade mina golugolu ieli ei paleasi.

<sup>49</sup> Mu ite! Eau na peltase a golu lisa euma ei adegatuna usino ne amutou. Namutou muine amutou na aubu buobuo ieli mapigogoi a ilala amutou guale a sagagalina maino na langi.”

*Salemo ei gualeliu e Iesu uata na langi*

*(Mak 16:19-20; Apo 1:9-11)*

<sup>50</sup> Io Iesu ei maasi sou a disaipel usino ne Betani. Me ei beilange a limane ei me ei maibalave sou.

<sup>51</sup> Na ilala ei maibalavelave sou, ei ilisitase sou, me Salemo ei guale ei uata na langi.

<sup>52</sup> Me sou totopatulu me sou kaka ane ei. Me sou mongemonge sele me sou veteliu usino ne Ierusalem.

<sup>53</sup> Me taliuliu sou muine sou na luma mine Salemo me sou beilangelange a aisane Salemo.

## Ioanes Malongolongona Kubaana mine Iesu Ioanes ei niage

*Inade ei isa a maulina ei palea a bibi*

<sup>1</sup> Lisa lisa otosi, Inade eiliosi. Inade ei ino pilu e Salemo ma Inade ei oto ei e Salemo.

<sup>2</sup> Lisa lisa otosi Inade ei pilu e Salemo.

<sup>3</sup> Na Inade moni ei mapale a golugolu vuso. Mane ei boa, golu tasa ei ni ma palea oto.

<sup>4</sup> Maulina ino minei, ma maulina iedo ei a muada mine sou a vanunua ma tavivine.

<sup>5</sup> Muada iedo ei silidavei a tunuui, moni a tunuui ei ma iteilale ete ei.

<sup>6</sup> Bibi tasa Salemo i peltase ei usinani, aisana e Ioanes.

<sup>7</sup> Ei asu usinani mina veipalena inade. Ei veipale a muada iedo, ne sou a vanunua ma tavivine vuso ne sou longe a inade minei ne ne sou silimuli i.

<sup>8</sup> Ei oto ei a muada iedo boa. Ei asu usinani mina veipalena inade moni mina muada.

<sup>9</sup> A muada ieli ei a muada ivu mei asu usinani na magamaga mei silidavei a vanunua ma tavivine vuso.

<sup>10</sup> Inade ie eili mina magamaga. A Inade ieli Salemo ei mapale a magamaga, moni sou a vanunua ma tavivine mina magamaga sou ma iteilale ete.

<sup>11</sup> Ei asu usinani na vuna aubu minei oto, moni sou a abuna minei sou ma guale ete ei.

<sup>12</sup> Moni sou a vanunua ma tavivine sou guale ei, ede a abuna sou silimuli a aisane ei. Me ei bilii e sou a nilongo ne sou palea e natatune Salemo.

<sup>13</sup> Sou ma palea oto e natatune Salemo mina dalane tamana me tinane sou, ue mina masagana vovo, ue mina masagana bibi. Boa. Salemo oto i toe e sou so palea e natatune ei.

<sup>14</sup> Inade ei palea a bibi, me ei asu usinani me ei eili balivua ne amiteu. Amiteu itesi a malasana buo minei, ei a malasana mine Natuna tasa moni, ei asu maino ne Tamana. Dinodo ma inigogona patotona ei vonu lilo ne ei.

<sup>15</sup> Ioanes ei veipale e ei, me ei tola maido, "Lisa eau veiosi le amutou e ei. Eau vei maido, 'Bibi ei ni mulimuli, ei muga lou ane eau, vuna ei eili palasi na ilala eau saboa palea.'" "

<sup>16</sup> Dinodo i vonu sele ne ei, me na dinodo minei, ei toekukube sele eitou vuso taliuliu.

<sup>17</sup> Salemo ei bilii e eitou a binea minei na limane Moses. Moni ne Iesu Kraisi eitou guale a dinodo pilu e inigogona patotona.

<sup>18</sup> Bibi tasa i saboa ite e Salemo. Natune Salemo tasa moni iedo, ei oto ei e Salemo mei ino valitole sele Tamana, ei tasa moni ei maitesi e eitou e Salemo.

*Ioanes a bibi na maavuvutuna i veipale a inade*

*(Mat 3:1-12; Mak 1:1-8; Luk 3:1-18)*

<sup>19</sup> Ne Ierusalem sou e Iuda sou peltase sou a prist me sou e Livai usino ne Ioanes, me sou asu sou tagi e Ioanes maido, "Oo sei?"

<sup>20</sup> Ioanes i veipale a inade me ei ma tau oovi ete. Ei veipale maido, "Eau ma Kraisi oto."

<sup>21</sup> Me sou tagi e ei, "Oo sei? Oo Elaiia, io?" Me ei vei, "Boa." Me sou vei, "Nane oo a profet amiteu magitalitali iodo, io?" Me ei adeliu maido, "Boa."

<sup>22</sup> Maido me sou tagi lei e ei, "Me oo sei? Amiteu kale namiteu adeliu a inade tasa usino ne sou a vanunua sou peltase amiteu usinani. Oo vei matina e oo oto?"

<sup>23</sup> Me Ioanes ei vei maido tomane lisa a profet e Aisaia i vei, "Eau a bibi tasa i tola na avena a vanua boa maido, 'Toebilelesi a vea ane Bibi Taula.'" "

<sup>24</sup> Sou e Parisi sou peltase sou a vanunua usinani.

<sup>25</sup> Me sou tagi e Ioanes maido, "Mane oo ma Kraisi oto, me oo ma Elaiia oto, me oo ma profet oto do, maido me posa matina oo maavuvuti e sou?"

<sup>26</sup> Ioanes ei vei liu ane sou maido, "Eau maavuvutivuti e sou a nanu. Moni a bibi tasa nana balivua ne amutou, iede amutou ma muada oto e ei.

<sup>27</sup> Bibi iedo ei ni asu mulimuli ne eau. Eau oto eau ma mapigogoi ete na lube a mota mina ubupolo minei."

<sup>28</sup> Ioanes ei veipale a inade do ne Betani, na lili na nanu e Iordan maino. Na aubu iedo Ioanes ei maavuvuti e sou a vanunua ma tavivine.

*Iesu ei e Natuna Sipsip mine Salemo*

<sup>29</sup> Na malada maisavulona, Ioanes ei ite Iesu i asuasu usinani minei. Me Ioanes ei vei maido, "Mu ite, ei e Natuna Sipsip mine Salemo. Ei asu usinani mina taulelena sinus mine sou a vanunua ma tavivine mina magamaga.

<sup>30</sup> Ei a bibi moni iodo lisa eau veiosi le amutou maido, 'Bibi ei ni mulimuli ne eau, ei muga lou ane eau, vuna ei eili palasi na ilala eau saboa palea.'

<sup>31</sup> Eau oto tamai lisa eau ma muada oto e ei. Moni eau asu usinani mina maavuvutina vanua a nanu ne sou a vanunua ma tavivine mine Israel ne sou muada e ei."

<sup>32</sup> Me Ioanes i ademuada lou maido, "Eau itesi a Maolona Nunu ei ilisitase a langi mei

sivo utano tomane a manu a kauu i lovo mei toa muata minei.

<sup>33</sup> Eau oto eau ma muada oto e ei. Moni e Salemo oto ei peltase eau mina maavuvutine sou a nanu, ei veiosi le eau maido, 'Mane oo ite a Maolona Nunu ei sivo utano mei toa na bibi tasa, ede a bibi moni ni asu usinani mina maavuvutine sou a Maolona Nunu.'

<sup>34</sup> Me eau oto eau ite me eau veimuadesi a inade maido, iede e Natune Salemo."

*Sou a munugana disaipel mine Iesu*

<sup>35</sup> Na malada maisavulona, Ioanes i magili pilu a disaipel minei lua lou.

<sup>36</sup> Me ei ite Iesu i asuasu usino. Me Ioanes vei, "Oite, ei e Natuna Sipsip mine Salemo."

<sup>37</sup> A disaipel lua sulu longe ei ade a inade iedo, me su ogomuli e Iesu.

<sup>38</sup> Iesu ei gemuliu mei ite su ogomulimuli ei usinani, me ei tagi e sulu maido, "Amulu kale a sava?" Me su tagi e ei, "Rabai, o malu iva?" A masovana mine Rabai ei maido, "Bibi na matetengina."

<sup>39</sup> De Iesu ei vei le sulu maido, "Amulu vele me mu ite." De sulu asu me su ite a luma ei ugu i. Me mina malada do su ugu pilu e ei. Ei a matailala savulu tasa mina autupola.

<sup>40</sup> Andru, ei e tasine Saimon Pita, ei e tasa mine sulu su longe a inade ne Ioanes me su ogomuli e Iesu.

<sup>41</sup> A munugana golu ei goli i na tilomuline tuana, e Saimon, me ei vei le Saimon maido, "Amiteu itesi e Mesaia." A masovana mine Mesaia i maido, "Krais, a bibi Salemo i vileale ni gualeliu a vanunua ma tavivine minei."

<sup>42</sup> Me Andru i maasi e Saimon usino ne Iesu. Me Iesu ei ite ei me ei vei maido, "Oo e Saimon, natune Ioanes. Mulimuli ne sou vate a aisamu e Kepas.†" Aisa e Kepas ie, ei tomane moni e Pita, a vatu.

*Iesu ei toleale Pilip me Nataniel*

<sup>43</sup> Maisavulonai, Iesu ei kale ni asu usino ne Galili. Me ei poge Pilip, me ei vei lei maido, "O vele ogomuli e eau."

<sup>44</sup> Pilip ei a bibi mina aubu buobuo e Bet-saida, aubu odo a vuna aubu mine Andru me Pita.

<sup>45</sup> Pilip ei asu poge Nataniel me ei vei lei maido, "Amiteu itesi a bibi iedo lisa Moses ei niage a inade minei mina laulau na binea, me sou a profet tamai sou niage a inade minei. Ei e Iesu mine Nasaret, ei e natune Iosep."

<sup>46</sup> Me Nataniel ei tagi e ei maido, "Nane a golu tasa i kubaana sele mapigogoi ni palea ne Nasaret, io?" Me Pilip ei vei le ei, "O vele oite."

<sup>47</sup> Iesu ei ite Nataniel i asuale ei, me ei vei maido, "Oite, a bibi maino li, ei a bibi ivu mine Israel. Inade na aualana tasa boa, ue a inigogona aualana boa ino ne ei."

<sup>48</sup> Me Nataniel ei tagi e Iesu maido, "O muada e eau matina?" Me Iesu ei adeliu maido, "Na matailala Pilip ei saboa toleale oo, eau itesi e oo matano na obu a fik."

<sup>49</sup> Nataniel ei longe a inade do me ei vei maido, "Magiligilina, oo Natune Salemo. Oo a Mapana mine sou e Israel."

<sup>50</sup> Me Iesu ei adeliu a inade maido, "Eau vei lio maido eau ite oo matano na obu a fik, me mina vuna moni ieli oo silimuli e eau. Mulimuli o no ite a golu buo i vululusi sele a golu ie."

<sup>51</sup> Me Iesu ei vei lou ana maido, "Patotona sele eau vei le amutou, mulimuli ne amutou ite a langi ni peo, me ne amutou ite sou a bineanea mine Salemo sou asuasu uata me sou sivosivo utano ne Natuna Bibi."

## 2

*Iesu savvule a nanu i palea a vain*

<sup>1</sup> Na malada tolunai a taulaina i palea lilo ne Kana mina avena e Galili. Me tinane Iesu i asu ite a taulaina do.

<sup>2</sup> Sou toleale tamai e Iesu pilu e sou a disaipel minei na taulaina do.

<sup>3</sup> Ilala nanu a vain i pulosi, tinane Iesu i vei le Iesu maido, "A vain i pulosi."

<sup>4</sup> Me Iesu ei vei lei maido, "Tavine, ede a golu minau boa. Ilala minau ei saboa."

<sup>5</sup> Me tinana i vei ane sou a vanunua na pipigona maido, "Mane ei vei le amutou a gunolina golu tasa, de ne amutou goli."

<sup>6</sup> Na luma do a taogo buobuo pantasa sou goli a magamaga ino, mine sou e Iuda so avutuvutu i na inigogona mine sou. Taogo tastasa i mapigogoi ni lapitole a nanu a lita savulu sobo tasa.

<sup>7</sup> De Iesu ei vei le sou a vanunua na pipigona maido, "Sao voni a nanu na taogo sou ede." Me so sao voni sele sou.

<sup>8</sup> Me ei vei le sou, "De, mu sao sanii me mu maasi usino na bibi ei iteale a gona inani." Io sou a vanunua do so sao sanii me sou maasi usino.

<sup>9</sup> Nanu ieli i palea a vain ma bibi na itealalena gona inani ei ini tove, moni ei ma muada oto, sou sao a vain ieli iva. Sou a vanunua na pipigona so sao a nanu iedo sou moni sou muada i. Io a bibi ei iteale a gona inani ei toleale a bibi ei taulai iedo,

<sup>10</sup> me ei vei lei maido, "Vanunua vuso sou soebule a vain doana pala. Mane sou inu mapapainasi, de sou soebulebule a vain i ma doana vauta oto. Moni e oo, o matilei a vain doana, me oo guale usinani simoni-moni ie."

† 1:42 Aisa e Kepas ei a inade ne Aram, me na inade Grik, sou vate e Pita.

<sup>11</sup> Ielili a munugana gona sinaga Iesu ei goli ne Kana na avena e Galili. Ei maite e sou a sagagalina buo minei na gona sinaga ieli, me sou a disaipel minei sou silimuli e ei.

<sup>12</sup> Io Iesu ei ilisitase Kana me ei asu utano ne Kapenaum pilu e tinana, tatasina me sou a disaipel minei. Me sou malu mina aubu do a malada sanii.

*Iesu i toعالabe a luma mine Salemo*  
(Mat 21:12-13; Mak 11:15-17; Luk 19:45-46)

<sup>13</sup> Malada tasa buo mina kinaka mine sou e Iuda bisii moni ni sibitala, ei a Malada na Asuleletasena ne sou e Israel. Maido me Iesu i asu usino ne Ierusalem.

<sup>14</sup> Lilo mina bigomu na luma mine Salemo ei ite a vanunua sou pipigo a vuvutina a bulmakau ma sipsip ma manumanu. Me ei ite tamai a vanunua na maiadevusena vatu sou ugu.

<sup>15</sup> Maido me Iesu i guale a mota sanii me ei goli a gona tinibinibina tasa. Me ei votelele a vanunua vuso pilu e sou a sipsip ma bulmakau mine sou. Mei tigitase a vatu mine sou a vanua na maiadevusena vatu, mei sautagaee tamai a posoposo mine sou.

<sup>16</sup> Ei vei le sou a vanunua sou masosove a manumanu, "Mu gualelele a manumanu mine amutou usino. Amutou ma gologoli lei a luma mine Euma ni palea tomane a luma na oolina."

<sup>17</sup> Sou a disaipel minei so ite a inigogona ei goli iodo, me sou damutale a malibu-una inade tasa lilo na Laulau na vinalu mine Salemo. Inade do ei maido, "Kinalena minau usino na luma minio i buo sele tomane a oavi i lulu velelele sele."\*

<sup>18</sup> Moni sou e Iuda so ite a inigogona tomane Iesu ei goli, me sou tagi e ei maido, "No goli sei gona sinaga tomana matailala mina maitene amiteu maido oo isa a aisa mina gunolina inigogona o goli ie?"

<sup>19</sup> Io Iesu i adeliu ane sou maido, "Mu lope a luma mine Salemo ie, me lilo mina malada tolu eau na mailisiliu lei."

<sup>20</sup> Me sou e Iuda so vei, "A avala savulu iva timana pantasa sou pipigo a mamagilina luma mine Salemo iede, me mina malada tolu moni o no mailisi lei, io?"

<sup>21</sup> Moni a luma mine Salemo Iesu i adeade ie, ede a vovone ei oto.

<sup>22</sup> Maido me tauluna Salemo i mailisi e ei na minate, sou a disaipel minei sou damutale lei a inade iedo ei goli lisa. Me sou silimuli a inade i lilo na Laulau na vinalu mine Salemo pilu a inade Iesu ei vei.

*Iesu ei muada a lilone sou a vanunua vuso*

<sup>23</sup> Iesu ei ugu ne Ierusalem na Malada na Asuleletasena ne sou e Israel, ma vanunua ma tavivine makuba sou ite a gona sinaga ei goli. Maido me sou silimuli a aisane ei.

<sup>24</sup> Moni Iesu ei ma silimuli ete sou, vuna ei muadasi a lilone sou a vanunua vuso.

<sup>25</sup> Me ei ma kale ete ni poge a bibi tasa i mapigogoi ni veipale ane ei a inigogona mine sou a vanunua. Ei oto ei muadasi a damutatalana mine sou a vanunua.

### 3

*Iesu ei ade pilu e Nikodemus*

<sup>1</sup> Bibi tasa, aisana e Nikodemus, ei e Parisi ma bibi buo tasa mine sou e Iuda.

<sup>2</sup> Ei asuale Iesu na lodo, mei vei lei maido, "Magiligilina, amiteu muada, Salemo ei peltase oo usinani tomane a bibi na matetengina. Mane Salemo ei ma pilu oto a bibi tasa, io ei ni ma mapigogoi ete ni goli a gona sinaga oo goli e sou ie."

<sup>3</sup> Iesu ei adeliu maido, "Patotona sele eau vei lio, mane a bibi ei ma alaposa alaba lou oto, ei ni ma mapigogoi ete ni ite a niitealalena mine Salemo."

<sup>4</sup> Me Nikodemus tagi e ei, "Posa matina bibi i buosi ei mapigogoi ni alaposa lou? Ei nane mapigogoi ni veteliu lou ulilo na tiane tinane ei, me tinane ei ni maalepose lei e ei?"

<sup>5</sup> Iesu ei adeliu maido, "Patotona sele eau vei lio, mane a bibi i ma alaposa alaba lou oto a nanu ma Maolona Nunu, ei ma mapigogoi ete ni asu ulilo na niitealalena mine Salemo."

<sup>6</sup> Golu a vovo ei mapale, ei a vovo. Ma golu a Maolona Nunu ei mapale, ei a nunu.

<sup>7</sup> Oo ma saga mamaumau lou a inade eau vei lio ie, 'Ne amutou alaposa alaba lou.'

<sup>8</sup> Avivili ei ogomulimuli a masagana minei oto, me ei vali usino na aveavena maisaba. O longelonge a tinangina avivili, moni o ma muada oto ei vali maiva me ei vali usiva. Vanunua vuso so alaposa alaba a Maolona Nunu, sou tomane moni simaido."

<sup>9</sup> Nikodemus tagi e ei maido, "Golu o vei oto, ei mapigogoi ni palea matina?"

<sup>10</sup> Me Iesu ei adeliu maido, "Oo a bibi na matetengina ne so Israel, posa matina o ma muada oto a golu ie?"

<sup>11</sup> Patotona sele eau vei lio, amiteu adeade a golu amiteu muada i. Me amiteu ade-muada a golu amiteu itesi. Moni e amutou lametatase moni a inade amiteu ademuada i.

<sup>12</sup> Eau vei le amutou a golugolu mina mag-amaga, me amutou ma silimuli ete. Maid-olo me mane eau vei le amutou a golugolu mina langi, namutou silimuli matina?"

\* 2:17 Laulau na Inala 69:9 \* 3:14 Savuluna 21:4-9



<sup>13</sup> Natuna Bibi ei asutase a langi mei sivo utano, ei tasa moni asu uata na langi.

<sup>14</sup> “Lisa Moses i beilange a aliusu na avena vanua boa,\* me mina inigogona tasa moni sou ne sou beilange e Natuna Bibi.

<sup>15</sup> Maido ma vanunua vuso sou silimuli e ei, ne sou guale a maulina i doana taliuliu taliuliu.

<sup>16</sup> Salemo ei isa e Natuna tasa moni. Moni ei bilii e Natuna tasa do usino ne sou a vanunua ma tavivine na magamaga tomane amiteu, vuna ei kale mamaimai sele sou. Ei goli maido ve sou a vanunua ma tavivine so silimuli e ei, ne sou ma buale oto, me ne sou guale a maulina i doana taliuliu taliuliu.

<sup>17</sup> Salemo ei ma peltase ete Natuna utano na magamaga ni gegemuliale a inigogona mina vanunua ma tavivine na magamaga tomane a bibi na vivilealena. Ei peltase ei usinani mina gualeliune sou.

<sup>18</sup> Sei ei silimuli e ei, ei ni ma guale ete a mavaana. Sei ei ma silimuli ete, ei isasi a vavasana na inigogona pagu, vuna maido ei ma silimuli ete a aisane Natune Salemo tasa moni iedo.

<sup>19</sup> Ma vuna vavasana mine sou i maido, muada i paleasi na magamaga, moni a vanunua sou kale mamai a tunuui. Sou ma kale ete a muada, vuna sou a vanunua mina gunolina inigogona i pagu.

<sup>20</sup> Sou a vanunua so gologoli a inigogona pagu, sou butuale a muada. Sou ma kale ete a inigogona mine sou ni palea muada. Maido me sou ma asuasus oto usinani na muada.

<sup>21</sup> Moni sei ei ogomuli a inigogona patotona, ei asuasus usinani na muada, me sou a vanunua ne so ite kube maido, ei goli a pipigona minei na sagagalina mine Salemo.”

*Ioanes a bibi na maavuvutuna ei ademuada e Iesu*

<sup>22</sup> Mulimuli Iesu pilu e sou a disaipel minei, sou asu usino na avena ne Iuda. Ei muina pilu e sou na avena do mei maavuvuti e sou a vanunua ma tavivine.

<sup>23</sup> Ioanes tamai ei maavuvuti e sou a vanunua ma tavivine na aubu e Aionon agavuale a aubu e Salim, vuna, nanu makuba ino na aubu odo, me a vanunua ma tavivine sou asu usino ne ei me sou guale a maavuvutuna.

<sup>24</sup> Na ilala do, sou saboa tau e Ioanes lilo na luma na tunuui.

<sup>25</sup> Maisaukikina inade tasa i ilisi balivua ne sou a disaipel sanii mine Ioanes me tau Iuda tasa. Sou adeade e sei matana inigogona na avutuna ne sou ogomuli.

<sup>26</sup> Me sou asu usino ne Ioanes, me sou vei lei maido, “Magiligilina, bibi edo lisa ei ugu pilu e oo na lili na nanu maino ne Iordan, me oo veimuade a inade minei, bibi edo

seidei ei maavuvuti e sou a vanunua ma tavivine, me sou vuso so asu usino ne ei.”

<sup>27</sup> Me Ioanes ei adeliu maido, “Mane Salemo mina langi ei ma bilii ete a golu tasa usino na bibi tasa, io bibi iedo ei ma mapigogoi ete ni guale.

<sup>28</sup> Amutou oto, amutou longesi a inade eau goli lisa, ‘Eau Krais boa, moni e Salemo ei peltase pale eau ane ei.’

<sup>29</sup> Na malada tasa a bibi tasa ei tavui a tavine, de a tavine do ei minei. Me tamaina bibi iodo ei magiligili mei beli a tagilana, ei mongemonge sele na ilala ei longe a baligoluna mina bibi ei taulai iodo. Tomane moni seidei a munonge i vonu na lilone eau.

<sup>30</sup> Aisana ni palea buo, ma aisagu ni matano moni.

<sup>31</sup> “Bibi ei muina oata mei asu usinani, ei vululusi a golugolu vuso. Bibi mina magamaga, ei gologoli a inigogona mina magamaga ieli mei gologoli a inade na golugolu mina magamaga. Moni a bibi ei asu maino na langi, ei oata ana golugolu vuso.

<sup>32</sup> Ei ademuadada a inade na golugolu ei itesi mei longesi. Moni a bibi tasa boa i longemuli mei somitole a inade ei ademuada i iodo.

<sup>33</sup> Sei ei longemuli mei somitole a inade minei, ei maite maido, “Salemo ei moliana sele.”

<sup>34</sup> Bibi e Salemo i peltase usinani iodo, ei ademuade a inade mine Salemo, vuna Salemo i iabi vuse a Maolona Nunu utano minei.

<sup>35</sup> Tamana ei kale sele e Natuna, mei tau a golugolu vuso na limane ei.

<sup>36</sup> Sei ei silimuli e Natuna, ei isa a maulina i doana taliuliu taliuliu. Moni sei ei ma ogomuli ete a inade mine Natuna, ei ni ma mapigogoi ete ni guale a maulina. Lilotivulana mine Salemo ino ne ei.”

## 4

*Iesu ei ade pilu a tavine tasa mine Samaria*

<sup>1</sup> Sou e Parisi sou longe a inade ve Iesu ei maavuvuti a vanunua makuba me sou a vanunua do sou palea a disaipel minei, ma savulu ne sou i vululusi a savulu ne sou a disaipel mine Ioanes.

<sup>2</sup> Moni Iesu ei ma maavuvuti ete e sou. Sou a disaipel minei sou maavuvuti e sou.

<sup>3</sup> Me Iesu ei asutase a avena e Iudia me ei vetelii usino ne Galili.

<sup>4</sup> Ma vea ei ni ogomuli iodo i balivua bilesi na avena ne Samaria.

<sup>5</sup> Maido me ei sibitala na aubu buobuo tasa ne Samaria, sou tole e Sikar. Sikar ei agavuale a magamaga Iekop ei bilii e natuna, e Iosep.

<sup>6</sup> Lulu na nanu tasa lisa, Iekop ei pesi, ei ino na aubu odo. Iesu ei asuasus maino ma

vovona i bale. Maido me ei ugu agavuale a lulu na nanu iedo. Ei tomane a matailala i pantasa mina lavilavi.

<sup>7</sup> Tavine tasa mine Samaria ei asu maino ni sao a nanu, me Iesu ei vei lei maido, "Sao agu a nanu. Eau kale na inu."

<sup>8</sup> Sou a disaipel minei sou asuosi usino na aubu buobuo mina unolina gona inani.

<sup>9</sup> Tavine mine Samaria do ei vei le ei, "Oo Iuda, me eau a tavine mine Samaria. Posa matina o vei, 'Sao agu a nanu. Eau kale na inu?'" Tavine ei goli a inade do, vuna maido sou e Iuda so ma maitamaina oto pilu e sou e Samaria.

<sup>10</sup> To Iesu ei vei le tavine do maido, "Mane o muada a niabi mine Salemo, me mane o muada e sei bibi vei lio, 'Sao agu a nanu, eau kale na inu,' io o no kake ei me ei ni bilii o a nanu na maulina."

<sup>11</sup> Ma tavine ei vei lei, "Bibi buo, oo ma isa oto a taogo, ma lulu na nanu ieli ei tano oto sele. Maido ma nanu na maulina, no guale iva?"

<sup>12</sup> Tubune amiteu Iekop ei bilii e amiteu a lulu na nanu ie. Me ei oto pilu e sou a natatuna me sou a bulmakau ma sipsip minei, sou vuso sou inu na lulu na nanu ie. Nane o vululusi e Iekop, io?"

<sup>13</sup> Iesu ei adeliu ane ei maido, "Sou vuso vanunua so inu na nanu ieli, ne sou malou lou.

<sup>14</sup> Moni mane a bibi tasa ei ini a nanu eau na bilii e ei ie, ei ni ma mapigogoi ete ni malou lou. A nanu eau kale na bilii e ei ieli ei ni palea tomane a lulu na nanu lilo minei. Me a nanu iedo ni iopp taliuluu mei ni bilii e ei a maulina i kubaana taliuluu taliuluu."

<sup>15</sup> Ma tavine do i vei le Iesu maido, "Bibi buo, bilii e eau a nanu iede, maido me eau na ma malou lou oto me eau na ma asu taliuluu oto mina sinao a nanu."

<sup>16</sup> Iesu ei vei lei maido, "Oo asu toleale suamu usinani."

<sup>17</sup> Tavine ei adeliu maido, "Eau ma isa oto a suagu." Me Iesu ei vei le ei, "O vei ve oo ma isa oto a suamu, ede oo vei patotona sele,

<sup>18</sup> vuna lisa suamu lima, ma bibi seidei oo malu pilu e ei ie, ei tamai e suamu boa. Inademu ieli ei patotona sele."

<sup>19</sup> Ma tavine ei vei lei, "Bibi buo, seidei eau muada i, oo a profet tasa.

<sup>20</sup> Sou e tubutubune amiteu sou viepilupilu na loena ieli, me sou kakaka. Moni amutou Iuda amutou vei, a muine sou a vanunua na kinakana, ei ino ne Ierusalem moni."

<sup>21</sup> Iesu i vei maido, "Tavine, oo no silimuli a inadegu. Ilala tasa ei ni palea me ne amutou ma kaka oto ane Euma na loena ieli, me namutou ma kaka oto ne Ierusalem tamai.

<sup>22</sup> Amutou Samaria amutou kaka ana golu amutou ma muada oto i. Moni amiteu e Iuda amiteu kaka ana golu amiteu muada i, vuna, pipigona mina gualeliuna vanunua ma tavivine ei maino ne sou e Iuda.

<sup>23</sup> Moni a ilala tasa ni palea, seidei ei paleasi. Me sou a vanunua vuso sou kale a kinaka ivu, ne sou kaka ane Tamane eitou a Maolona Nunu ma inade patotona. Me Euma ei kale mamai sele sou a matana vanunua ma tavivine sou goli maido.

<sup>24</sup> Salemo ei a Nunu. Me sou a vanunua ma tavivine sou kaka ane Salemo, ne sou kaka a Maolona Nunu ma inade patotona."

<sup>25</sup> Tavine ei vei ane Iesu maido, "Eau muada i, e Mesaia ni asu usinani, ei e Krai. Na malada ei ni asu usinani, ei ni vei le eitou a golugolu vuso."

<sup>26</sup> Me Iesu ei vei lei maido, "Ede eau moni, seidei eau ade pilu e oo ie."

<sup>27</sup> Na ilala do sou a disaipel minei sou veteliu, me sou ite ei adeade pilu a tavine tasa, me sou saga me so damutatala papai. Moni a bibi tasa i ma tagi ete Iesu maido, "O kale a sava?" Ue "Posa matina o ade pilu a tavine do?"

<sup>28</sup> To tavine do i asutase a taogo na nanu minei, me ei veteliu usino na aubu buobuo. Me ei vei ane sou a vanunua ma tavivine maido,

<sup>29</sup> "Amutou vele mu ite a bibi tasa. Ei vei le eau a golugolu vuso eau goli lisa. Nane ei e Krai?"

<sup>30</sup> Io sou ilisitase a aubu buobuo me so asuale Iesu.

<sup>31</sup> Na ilala do sou a disaipel so vei lei maido, "Magiligilina, o aani."

<sup>32</sup> Me ei vei le sou maido, "Eau isa a gona inani amutou ma muada oto i."

<sup>33</sup> Maido me sou a disaipel sou ade balivua ane sou oto maido, "Nane tasa maasi ana a gona inani?"

<sup>34</sup> Me Iesu ei vei ane sou maido, "Gona inani minau, iede a ogomulina masagana minei ei peltase eau me a mapalpalina pipigona ei bilii e eau.

<sup>35</sup> Amutou vei maido, 'A game iva ni pulu, io mauma ni matua.' Moni eau vei le amutou, namutou gemu itti a mauma vuso. A gona inani ei matuasi.

<sup>36</sup> Bibi ei guale a gona inani, ei guale a mapana, me ei guale a gona inani na maulina ei kubaana taliuluu taliuluu. Maido ma bibina dinanina ma bibina gualena, sulu ne su mongemonge pilu.

<sup>37</sup> Maido ma inade li, 'Bibi tasa ei dani a vuavua ma bibi tasa sea ei guale a gona inani minei,' ieli i patotona.

<sup>38</sup> Eau peltase amutou usino na gualena gona inani na mauma lisa amutou ma pipigo oto i iodo. Vanunua sea sou totoe a

mauma, me amutou asu ulilo mina gualena gona inani ei palea a sagaline sou.”

<sup>39</sup> Sou e Samaria papaina na aubu buobuo do sou longe a inade mine tavine do, me sou silimuli e Iesu. Vuna maido, tavine do ei vei, “Ei veiosi ane eau a golugolu vuso eau goli lisa.”

<sup>40</sup> Me sou Samaria so asu usino ne ei, me sou tagi e ei ni ugu pilu e sou. Maido me ei ugu a malada lua nado.

<sup>41</sup> Papaina sele sou longe a inade mine Iesu oto me sou silimuli.

<sup>42</sup> Me sou vei ana tavine do maido, “Amiteu ma silimuli ete a bibi iodo a inademu moni, boa. Amiteu oto te longe a inadema, me amiteu muada i, bibi moni iedo ei a bibi na gualeliuna vanunua ma tavivine mina magamaga.”

*Iesu ei toekube a natuna bibi ei pipigopigo ana mapana tasa*

<sup>43</sup> Iesu ei ugu a malada lua pulu me ei asu usino na avena ne Galili.

<sup>44</sup> Iesu oto ei ademuada maido, “A profet ei ma isa oto a aisa na vuna aubu minei oto.”

<sup>45</sup> Ei asu sibitala ne Galili, me sou e Galili so mongemonge e ei divi, vuna maido sou tamai so asu a kinaka buo ino ne Ierusalem, me sou ite a golugolu vuso ei goli na malada do.

<sup>46</sup> Iesu ei sibitala lou ne Gana na avena e Galili. Na aubu odo ei sauvulesi a nanu i palea a vain. Na malada do a munuganuga tasa mina mapana ei ino na aubu buobuo e Kapenaum, me natuna bibi ei isa a sinobe.

<sup>47</sup> Ma bibi iedo i longe a inade maido, Iesu ei sibitalasi ne Galili. Me ei asuale Iesu me ei tagi e ei ni asu usino ne Kapenaum ni toekube natuna. Bibaini iodo bisii moni ni mate.

<sup>48</sup> Me Iesu ei vei lei maido, “Mane amutou ma ite ete a matamatana matailala ma gona sinaga, ne amutou ma silimuli ete.”

<sup>49</sup> Munuganuga ieli i vei maido, “Bibi Taula, oo asu asi usinani, dae natugu ei ni mate.”

<sup>50</sup> Me Iesu ei vei lei, “Oo asu. Natumu ei ni mauili.” Io munuganuga do ei silimuli a inade ne Iesu mei asu.

<sup>51</sup> Munuganuga do ei saboa divi ne Kapenaum, me sou a vanunua na pipigona minei so poge ei na vea, me sou vei lei maido, “Natumu ei mauiliosi.”

<sup>52</sup> Me ei tagi e sou, sei matailala ei kuba. Me sou vei, “Lavi na matailala padilua mina lodo, vovona tuntunu odo i bualetase ei.”

<sup>53</sup> Me tamana ei muada, lavi na matailala moni odo Iesu ei vei lei, “Natumu ni mauili.” Me ei pilu e sou vuso na luma so silimuli.

<sup>54</sup> Ieli a maluana gona sinaga Iesu ei goli ne Galili maino ne Iuda.

## 5

*Iesu ei toekube a bibi tasa na lulu na nanu e Betesda*

<sup>1</sup> Mulimuli, a malada buo na kinaka mine sou e Iuda i palea, me Iesu i asu usino ne Ierusalem.

<sup>2</sup> Ne Ierusalem, agavuale a Tema na Sipsip, a lulu buo tasa na nanu ino, na inade mine Hibru sou tole e Betesda. Me a luma na malolovina lima ino.

<sup>3-4</sup> Na luma na malolovina sou odo a vanunua na sinobe makuba ino pilu e sou a mata ego, me sou a ubune sou i mamau, ma vanunua vovone sou i mamate.

<sup>5</sup> Bibi tasa ino na luma na malolovina do, ei isa a sinobe mapigogoi a avala savulu tolu timana pantolu.

<sup>6</sup> Iesu ite a bibi iodo i mavutavuta muina, me ei muada a sinobe minei i tabaasi. Me Iesu i tagi e ei, “O kale a vovomu ni palea kuba, io?”

<sup>7</sup> Bibi sobe do i adeliu ane Iesu maido, “Bibi Buo, ilala a nanu i vuvule, eau ma isa oto a bibi tasa i mapigogoi ni guale eau usino mei ni tau eau ulilo mina lulu na nanu. Eau oto eau kale na asu, moni sou a vanua sanii so muga me sou vululusi e eau.”

<sup>8</sup> Me Iesu ei vei lei maido, “O magili mo guale a mavutavutana minio mo asu.”

<sup>9</sup> Ma tabaa oto vovona bibi iedo ei palea kuba. Me ei guale a mavutavutana minei mei asu. Malada do ei a malada na kinaka mine sou e Iuda,

<sup>10</sup> maido me sou e Iuda so ite a bibi iedo, me sou vei lei maido, “Seidei a Maolona Malada. A binea mine eitou ei vei i ma puiale ete no guale a mavutavutana minio me no asu na Malada na Maolona.”

<sup>11</sup> Me ei sie a inade maido, “Bibi ei toekube eau ei vei le eau maido, ‘Guale a mavutavutana minio mo asu.’”

<sup>12</sup> Me sou tagi e ei, “Sei bibi ei vei lio, ‘No guale a mavutavutana minio mo asu?’”

<sup>13</sup> Moni a bibi ei kuba lou iodo ei ma muada oto e sei bibi i vei le ei, vuna a vanunua ma tavivine sou makuba sele ino do, me Iesu ei asuosi.

<sup>14</sup> Mulimuli Iesu i gali ulilo na luma mine Salemo me ei ite a bibi iedo ino. Me Iesu ei vei lei maido, “Oite, seidei o kubasi, maido mo ma gologoli ase a sinusu, dae a mavaana tasa buo lou ni palea minio.”

<sup>15</sup> Io a bibi iedo ei asu mei vei le sou e Iuda maido, “Bibi ei toekube eau odo, ei e Iesu moni.”

<sup>16</sup> Io sou e Iuda so soke a toegegeline Iesu, vuna ei gologoli a matana golu maido mina Maolona Malada.

<sup>17</sup> Moni e Iesu i adeliu ane sou maido, “Euma ei pipigo taliuliu pea seidei, me eau tamai ea pipigo.”

<sup>18</sup> Sou e Iuda so longe a inade do me sou kale sele ne sou valiputemate e Iesu, vuna ei ma seuti ete a binea mina Maolona Malada moni, boa. Ei vei tamai maido Salemo ei e Tamane ei bilesi. Na inade ieli ei toe ei oto tomane e Salemo.

*A aisa buo mine Natune Salemo*

<sup>19</sup> Maido me Iesu i adeliu ane sou maido, "Patotona sele eau vei ane amutou, Natuna ei ma mapigogoi ete ni goli a golu tasa a damutatalana minei oto. Boa. Ei goli moni a golugolu mane ei ite Tamana i goli. Golugolu vuso Euma ei goli, ede Natuna tamai ei ni goli.

<sup>20</sup> Euma i kale mamai sele Natuna, mei maite e ei a golugolu vuso ei oto ei goli. Euma ei ni maite e Natuna a golu sanii i buo, ei ni buo lou ana pipigona vuso ei goliosi. Me ne amutou saga sele i.

<sup>21</sup> Euma ei mailisiliu a vanunua sou matesi mei bilii e sou a maulina, tomane moni Natuna tamai ei bilii a maulina usino ne sou a vanunua na masagana minei oto.

<sup>22</sup> Euma i ma vileale ete a bibi tasa na vavasana. Pipigona vuso mina nilonge na vavasana, ei biliosos e Natuna,

<sup>23</sup> mina vanunua vuso sou mapigogoi ne sou beilange a aisane Natuna tomane moni sou beilange a aisane Tamana. Bibi ei ma beilangelange ete a aisane Natuna ei ma beilange ete a aisane Tamana ei peltase ei usinani.

<sup>24</sup> "Patotona sele eau vei ane amutou, bibi ei longe a inadegu mei silimuli e Euma, ei peltase eau usinani, ei isa a maulina i doana taliuliu. Ei ni ma magili oto na vavasana. Boa. Ei padiosos maino na minate usino na maulina.

<sup>25</sup> Patotona sele eau vei ane amutou, ilala ei kale ni palea, seidei ei paleasi, me sou a vanunua ma tavivine sou matesi ne sou longe a baligolune Natune Salemo, me sou so longe, ne sou guale a maulina.

<sup>26</sup> Tamana ei isa a maulina lilo ne ei oto, me ei bilii a maulina usino ne Natuna, me ei tamai ei isa a maulina lilo ne ei oto.

<sup>27</sup> Ei e Natuna Bibi, maido me Tamana i bilii e ei a aisa buo mina vavasana ane sou a vanunua ma tavivine me mina vivilealena inigogona mine sou.

<sup>28</sup> "Amutou ma damutala papai lou a inadegu. Ilala ei agaviosos ni palea ma vanunua ma tavivine vuso sou ino na aova na minate ne so longe a baligolune Natuna.

<sup>29</sup> Me sou a vanunua ma tavivine sou goli a inigogona i doana, ne so ilisiliu me ne sou maui, me sou a vanunua ma tavivine sou goli a inigogona pagu, ne sou ilisiliu me ne sou magili na vavasana."

*Veipalena sanii e Iesu ei e sei*

<sup>30</sup> Iesu ei vei lou maido, "Eau ma mapigogoi ete na goli a golu tasa na damutatalana minau oto. Eau ogomulimuli a inade eau guale maino ne Euma me eau vilemulumiale a inigogona mine sou a vanunua ma tavivine. Ma vavasana minau ei bilesi, vuna eau ma ogomulimuli ete a masagana minau oto. Boa. Eau ogomuli a masagana mine Euma, ei peltase eau usinani.

<sup>31</sup> "Mane eau vululu eau veipale e eau oto, de inadegu ni ma mavaa oto.

<sup>32</sup> Moni a bibi sea ei ni veipalele e eau, me eau muada sei matana inade ei ni ade i, ei patotona sele.

<sup>33</sup> Eau muada lisa amutou peltase sou a vanunua sanii usino ne Ioanes mina gualena inadene ei, me Ioanes ei veimuade a inade i patotona.

<sup>34</sup> Moni eau ma guale ete a inade na bibi tasa i mapigogoi ni masagali a inadegu. Moni eau kale ne Salemo ni gualeliu e amutou, maido me eau kale ne amutou damutale a inade Ioanes i veipale e eau.

<sup>35</sup> Ioanes ei muina moni tomane a lada ei lulu mei bilii a muada usino na vanunua. Me amutou mongemonge a muada minei na ilala i boto moni.

<sup>36</sup> Moni a golu i vululusi e Ioanes, ei veimuadesi e eau. Iedele a pipigona vuso Euma i bilii e eau na pipigo me na mapuli. Pipigona sou eau goli ieli ei veipale iiti ane sou a vanunua ma tavivine maido, Euma ei peltase eau usinani.

<sup>37</sup> Me Euma ei peltase eau usinani, ei oto ei veimuade e eau. Moni amutou ma longemuli sape ete a baligoluna. Boa vuso sele. Me amutou ma ite ete a laguna.

<sup>38</sup> Ma inadene ei tamai ma muina oto na lilone amutou, vuna maido amutou ma silimuli ete a bibi e Tamana i peltase ei usinani iedo.

<sup>39</sup> Amutou damutale a Laulau mine Salemo ei bilii e amutou a maulina i muina doana taliuliu taliuliu, maido me amutou gi taliuliu a inade vuso ino na Laulau mine Salemo. Moni a Laulau mine Salemo tamai i veimuade e eau,

<sup>40</sup> moni amutou ma kale ete ne amutou asuale eau mina gualena maulina.

<sup>41</sup> "Eau ma guale ete a aisa buo maino ne sou a vanunua.

<sup>42</sup> Moni eau muada e amutou, na lilone amutou, amutou ma isa oto a masagana usino ne Salemo.

<sup>43</sup> Eau asu usinani na aisane Euma, me amutou ma guale ete eau. Moni mane a bibi tasa i asu usinani na aisane ei oto, namutou guale e ei.

<sup>44</sup> Amutou gualeale a aisa buo maino na abuna mine amutou oto. Moni a aisa buo ne Salemo tasa moni ei iabi ieli usino ne amutou, ede amutou ma kale ete a gualena.

Mane amutou goli a matana inigogona sou ie, io ne amutou silimuli eau matina?

<sup>45</sup> “Amutou ma damudamu lou ve eau na vavasa ane amutou na matane Euma. Boa. Bibi ei ni vavasa ane amutou, ede Moses oto, ei a bibi amutou damu ve ni buloi e amutou odo.

<sup>46</sup> Mane amutou silimuli a inade mine Moses, io ne amutou silimuli a inade ne eau tamai, vuna maido a inadenade ei niage, ei veimuade e eau.

<sup>47</sup> Moni mane amutou ma silimuli ete a inade ei niage, io ne amutou silimuli a inade minau matina?”

## 6

*Iesu ei bilii a gona inani usino ne sou a vanunua savuluvulu lima*

(*Mat 14:13-21; Mak 6:30-44; Luk 9:10-17*)

<sup>1</sup> Mulimuli, Iesu ei asu usino na lili maino mina pou na nanu e Galili, aisana pou na nanu e Taiberias.

<sup>2</sup> Ma abuna vanunua ma tavivine taula sou ogomuli e ei, vuna sou ite a gona sinaganaga ei goli mina toekubena vanua na sinobe.

<sup>3</sup> Me Iesu ei asu uata na loena, me ei ugu pilu e sou a disaipel minei.

<sup>4</sup> Na ilala iedo a malada buo ne sou e Iuda bisii moni ni palea, ei a Malada na Asuleletasena.

<sup>5</sup> Iesu ei gemu maisaba mei ite a abuna vanunua ma tavivine sou asuale ei. Me ei tagi e Pilip maido, “Neitou oli a ulalu iva ne sou a vanunua ma tavivine ieli ne sou ani?”

<sup>6</sup> Ei goli a inade li mina tinovene Pilip, vuna ei oto muadasi a sava ei ni goli.

<sup>7</sup> Pilip ei adeliu maido, “Mane eitou oli a ulalu mapigogoi a vatu savulu lua denarii, ei ma mapigogoi ete sou a vanunua ma tavivine ie tastasane ne sou guale a gona inani bisii ieli sele.”

<sup>8</sup> Disaipel tasa minei, aisana Andru, tachine Saimon Pita, ei vei le Iesu maido,

<sup>9</sup> “Bibaini tasa eili ie ei isa a ulalu lima sou goli a bali, pilu a aia banini lua. Moni a abuna vanunua ma tavivine taula sele eili. Ulalu sou ieli ma aia ei ni buloi e sou matina?”

<sup>10</sup> Iesu ei vei maido, “Vei le sou a vanunua ma tavivine ne sou ugu.” Gulugulu i makuba na avena do. Savulu ne sou a vanunua moni i mapigogoi savuluvulu lima (5,000).

<sup>11</sup> Iesu ei guale a ulalu mei toledadangi e Salemo mei soebule e sou so ugugu tano. Ei goli tamai maido mina aia lua do. Me sou guale mapigogoi a masagana mine sou.

<sup>12</sup> Sou ani me sou masu sele, me Iesu ei vei le sou a disaipel minei maido, “Amutou

taupili a matevua vuso saboa nana, dae sanii ni buale sabubu.”

<sup>13</sup> Maido me sou taupili a matevuavua na ulalu lima sou ani iedo me sou totongi voni a tanga savulu tasa timana lua.

<sup>14</sup> Sou a vanunua ma tavivine so ite a matailala iedo Iesu goli, me sou vei maido, “Ivu, ei a profet Salemo ei vei a peltasene ei usinani na magamaga.”

<sup>15</sup> Iesu ei longe a inade do mei muada maido, sou kale ne sou lapitole ei me ne sou tau e ei ni palea a mapana mine sou. Maido me ei ilisitase a avena do me ei vululu moni ei veteliu lou usino na loena.

*Iesu ei asu muata na pou na nanu*

(*Mat 14:22-27; Mak 6:45-52*)

<sup>16</sup> Na lavilavi sele sou a disaipel mine Iesu sou asu utano na pou na nanu.

<sup>17</sup> Sou sae na bot tasa me sou voleutu na pou na nanu usino ne Kapenaum. Ei tunuuiosi, me Iesu ei saboa sibitala ale sou.

<sup>18</sup> Avivili sagali i palea mei mailisi a dasi.

<sup>19</sup> Sou vole a bot i asu mapigogoi a bulagona kilomita lima ve pantasa, me sou ite Iesu ei asu muata mina pou na nanu me ei sibitala agavuale a bot. Sou lae,

<sup>20</sup> moni e Iesu ei vei le sou, “Ieli e eau moni, amutou ma laelae lou.”

<sup>21</sup> Io sou mongemonge a masaene Iesu uata na bot, me ma tabaa oto a bot i ontola na abu sou asuale do.

*Iesu ei a ulalu na maulina*

<sup>22</sup> Na malada maisavulona, vanunua ma tavivine sou saboa ino na lili na pou na nanu maino. Sou muada i, lavi a bot tasa sea boa. Bot tasa moni ino, me Iesu ei ma sae oto na bot iedo pilu a disaipel minei. Sou a disaipel moni so sae na bot do me sou asu.

<sup>23</sup> Moni a bot sanii ne Taiberias sou divosii agavuale a abu iedo Bibi Taula ei maibalave a ulalu me sou ani,

<sup>24</sup> me sou a vanunua ma tavivine sou ma ite ete e Iesu pilu e sou a disaipel nado, maido me sou sae na bot sanii, me sou vole usino ne Kapenaum mina tilomuline Iesu.

<sup>25</sup> Vanunua ma tavivine sou asu sibitalasi ne Iesu mina lili na pou na nanu maino, me sou tagi e ei maido, “Magliligilina, oo asu usinani aisa?”

<sup>26</sup> Me Iesu ei adeliu maido, “Ivu sele eau vei ane amutou, amutou asu usinani mu tilomuli e eau, moni amutou ma damutalete ete a matailala eau maite e amutou. Boa. Amutou aniosi a ulalu eau bilii e amutou me amutou masu. Vuna moni ieli amutou tilomuli e eau.

<sup>27</sup> Amutou ma pipigopigo lou a gona inani ni mamau. Boa. Namutou pipigo a gualena gona inani i muina taliuliu taliuliu. Matana gona inani ieli, Natuna Bibi ei ni bilii e

amutou. Salemo Tamana ei biliiosi ei a sagagalina mina pipigona do.”

<sup>28</sup> Io sou vei lei maido, “Namiteu goli a sava mapigogoi a pipigona mine Salemo?”

<sup>29</sup> Me Iesu ei adeliu ane sou maido, “Pipigona mine Salemo ei maido, namutou silimuli a bibi iedo, Salemo i peltase ei usinani.”

<sup>30</sup> Sou tagi e ei maido, “Oo no goli e sei gona sinaga tomana matailala ne amiteu ite me ne amiteu silimuli e oo?”

<sup>31</sup> Sou selebuobuo ne eitou lisa sou ani a manna mina avena a vanua boa tomane a inade ino na Laulau mine Salemo, ‘Ei bilii a ulalu na langi usino ne sou a vanunua ma tavivine.\* Maidolo me sou ani, moni oo no goli a sava?”

<sup>32</sup> Io Iesu ei vei ane sou maido, “Patotona sele eau vei ane amutou, Moses ei ma bilii ete amutou a ulalu maino na langi, moni Euma i bililii e amutou a ulalu ivu maino na langi.

<sup>33</sup> Ulalu e Salemo i iabi iedo, ei sivo muata mina langi me ei asu utano me ei bilii a maulina usino na vanunua ma tavivine mina magamaga.”

<sup>34</sup> Me sou vei lei maido, “Bibi Buo, oo no bilii e amiteu a ulalu iede taliulu.”

<sup>35</sup> Me Iesu ei vei le sou maido, “Eau oto eau a ulalu mina maulina. Bibi ei asuale eau ei ni ma vitolo oto. Ma bibi ei silimuli e eau ei ni ma malou oto.

<sup>36</sup> Tomane eau veiosi ane amutou, amutou itesi e eau, moni amutou ma silimuli ete.

<sup>37</sup> Vanunua ma tavivine vuso Euma ei bilii e eau ne so asuale eau. Me sei ei asuale eau, eau ma mapigogoi ete na peltaselele ei.

<sup>38</sup> Eau ma ilisitase ete a langi me eau sivo utano mina ogomulina masagana minau oto. Boa. Eau sivo utano mina ogomulina masagana mine Euma, ei peltase eau usinani.

<sup>39</sup> Ma masagana mine Euma ei maido. Eau na ma litase ete tasa mine sou a vanunua ma tavivine ei biliiosi e eau. Boa. Eau na mailisi e sou na punuluna malada.

<sup>40</sup> Masagana mine Euma ei maido, vanunua vuso sou ite Natuna me sou silimuli e ei, ne so guale a maulina i muina kubaana taliulu taliulu. Me eau na mailisi e sou na punuluna malada.”

<sup>41</sup> Sou e Iuda so longe e Iesu ei vei, “Eau oto, eau a ulalu i sivo muata mina langi,” me sou sinoa me sou ade papai ane ei.

<sup>42</sup> Sou vei maido, “Bibi ieli e Iesu, natune Iosep. Eitou muada e tamana pilu e tinana. Me posa matina ei ade seidei maido, ‘Eau sivo muata na langi?’”

<sup>43</sup> Iesu ei adeliu a inade usino ne sou maido, “Amutou ma ade papaipai lou balivua ne amutou oto.

<sup>44</sup> Euma ei peltase eau. Ma bibi tasa i ma mapigogoi ete ni asuale eau na masagana minei oto. Boa. Euma ei ni mailisi a damutatalana minei me ei ni maasi ei usinani minau. Me mina punuluna malada eau na mailisi ei na minate.

<sup>45</sup> Inade ino na laulau mine sou a profet i maido, “Salemo ei ni matetengi e sou a vanunua ma tavivine vuso.”† De vanunua ma tavivine vuso sou longe a inade mine Euma me sou guale a matetengina maino ne ei, ne so asuale eau.

<sup>46</sup> Bibi tasa saboa ite Euma. Bibi moni iedo ei malu pilu e Euma mei asu usinani, ei moni ei itesi e Euma.

<sup>47</sup> Patotona sele eau vei le amutou, bibi ei silimuli e eau ei isa a maulina i kubaana taliulu taliulu.

<sup>48</sup> Eau oto, eau a ulalu mina maulina.

<sup>49</sup> Sou selebuobuo ne amutou sou ani a manna na avena a vanua boa do, sou matesi.

<sup>50</sup> Moni a ulalu iedo ei sivo muata na langi, ei ane sou a vanunua ma tavivine ne sou ani me ne sou ma mate oto.

<sup>51</sup> Eau a ulalu na maulina maino muata na langi. Mane a bibi tasa ei ani a ulalu ieli, ei ni isa a maulina i muina taliulu. Ma ulalu eau na bilii iedo ei a mainigu. Eau oabi, ne sou a vanunua ma tavivine mina magamaga ne sou guale a maulina.”

<sup>52</sup> Sou e Iuda so longe a inade do, me sou maubi a inade balivua ne sou oto. Sou vei, “Posa matina bibi ieli ei ni bilii e eitou a mainina oto me ne eitou ani?”

<sup>53</sup> De Iesu ei vei le sou maido, “Patotona sele eau vei le amutou, mane amutou ma ani ete a mainine Natuna Bibi, me mane amutou ma ini ete a dalane ei, ne amutou ma isa oto a maulina ni muina ne amutou.

<sup>54</sup> Bibi ei aniani a mainigu mei inini a dalagu, ei isa a maulina i muina kubaana taliulu, me eau na mailisi ei na punuluna malada.

<sup>55</sup> Vuna maido mainigu ei a inani ivu ma dalagu ei a niinu ivu.

<sup>56</sup> Bibi ei ani a mainigu mei ini a dalagu ei lilo minau, me eau lilo minei.

<sup>57</sup> Euma ei mauli ei peltase eau usinani, me Euma moni eau mauli, tomane moni a bibi ei ani eau, eau moni ei ni mauli.

<sup>58</sup> Ieli moni ei a ulalu sivo muata mina langi. Ei ma tomane ete a ulalu lisa sou e selebuobuo ne eitou sou ani me mulimuli sou mate. Bibi ei ani a ulalu ieli ei ni mauli taliulu taliulu.”

\* 6:31 Gualeliuna 16:4-5; Laulau na Inala 78:24 † 6:45 Aisaia 54:13

<sup>59</sup> Iesu ei matetengi e sou a inade ieli na malada ei ino lilo na luma na kinaka mine sou e Iuda ne Kapenaum.

*Iesu ei bilii a inade ivu mina maolina*

<sup>60</sup> Papaina mine Sou a disaipel sou longe a inade ne Iesu iedo, me sou ade maido, "Inade ielili ei mavaa sele. Sei mapigogoi ni longemuli?"

<sup>61</sup> Moni na lilo ne Iesu ei muada i maido, sou a disaipel minei sou ade papai a inade ei goli iodo. Maido me ei tagi e sou, "Inade ieli ei toemavae a lilone amutou, io?"

<sup>62</sup> Mane amutou ite e Natuna Bibi ei asu uata usino na avena ei malu i lisa do, de amutou ne mu goli a sava?

<sup>63</sup> Maolona Nunu oto ei bilii a maolina usino ne sou a vanunua ma tavivine. Vovone eitou ei ma mapigogoi ete ni buloi sape eitou. Inade eau bilii e amutou ieli ei a nunu mei isa a maolina.

<sup>64</sup> Moni a vanunua sanii balivua ne amutou sou ma silimuli ete." Lisa otosi Iesu ei muadasi e sou a vanunua ma tavivine sou ma silimuli ete, me ei muada e sei bibi ni bilii e ei usino na limane sou a butu.

<sup>65</sup> Maido me ei vei, "A vuna moni ieli eau vei le amutou, 'Mane Euma ei ma longo oto, io a bibi tasa ei ma mapigogoi ete ni asuale eau.'"

<sup>66</sup> Soke na ilala do sou a disaipel minei makuba sou veletase ei, me sou ma asu pilu otosi e ei.

<sup>67</sup> Maido me Iesu ei tagi e sou a disaipel savulu tasa timana lua maido, "Amutou tamai mu kale namutou ilisitase eau, io?"

<sup>68</sup> Saimon Pita ei adeliu maido, "Bibi Taula, ne amiteu asu usino ne sei? Inade minio moni ei bilii a maolina i muina kubaana taliuluu taliuluu.

<sup>69</sup> Me amiteu silimuli, me amiteu muada iiti i maido, oo moni oo a maolona bibi Salemo ei vilealesi minei oto."

<sup>70</sup> Iesu ei adeliu ane sou maido, "Eau oto eau vileale amutou a disaipel savulu tasa timana lua. Moni tasa balivua ne amutou ei a bibi pagu tomane e Satan."

<sup>71</sup> Ei ade e Iudas, natune Saimon Iskar-iot. Ei tasa mine sou a disaipel savulu tasa timana lua, moni mulimuli ei bilii e Iesu usino na limane sou a vanunua sou kale ne so valipute ei.

## 7

*Iesu ei asu ite a Malada Buo mina Luma na Malolovina*

<sup>1</sup> Na malada sanii mulimuli, Iesu ei gaga lilo na avena ne Galili. Ei ma kale ete ni asu ni gaga lou lilo na avena ne Iudia, vuna sou e Iuda so kale ne sou valipute ei.

<sup>2</sup> Me a malada buobuo mina kinaka mine sou e Iuda, a Malada Buo mina Luma na Malolovina ei agaviosos ni palea.

<sup>3</sup> Maidolo me sou e tatasine ei sou vei lei maido, "O no ilisitase a aubu ieli mo no asu usino ne Iudia, vuna sou a disaipel minio sou mapigogoi ne sou ite a matana pipigona sanii oo gologoli.

<sup>4</sup> Mane a bibi tasa ei kale a vanunua ne so muada e ei, ei ni ma pipigo oovu oto. Mane o kale no goli a matana golugolu sou ie, oo no magili na matana vanunua ma tavivine vuso."

<sup>5</sup> Vuna sou e tatasina tamai so ma silimuli ete ei.

<sup>6</sup> Iesu i adeliu ane sou maido, "Ilala minau ei saboa palea. Moni a ilala vuso ei mine amutou.

<sup>7</sup> Sou a vanunua ma tavivine mina mag-amaga so ma mapigogoi ete ne sou butuale e amutou. Moni sou butuale eau, vuna eau ademuadada a inigogona pagu-pagu sou gologoli.

<sup>8</sup> Amutou mu asu usino na malada buobuo do. Eau na ma asu oto, vuna maido ilala minau ei saboa palea."

<sup>9</sup> Ei vei le sou maido, ei muina sapa ne Galili.

<sup>10</sup> Moni na malada sou e tatasine ei so asuosi, de mulimuli ei tamai asu, moni ei asu oovu moni.

<sup>11</sup> Na ilala na malada buo do, sou e Iuda so tilotilo e ei, me sou tagu, "Bibi ieli ino iva?"

<sup>12</sup> Me sou a vanunua ma tavivine so ade papai ane ei balivua ne sou oto. Sanii sou vei, "Ei a doana bibi." Moni sanii sou vei, "Boa, ei aualala ane sou a vanunua ma tavivine."

<sup>13</sup> Moni sou lae e sou e Iuda, maidolo me tasa ne sou i ma adepalea oto a inigogona minei.

<sup>14</sup> Io balivua sele na malada buo do, Iesu ei gali ulilo na luma mine Salemo me ei matetengi e sou a vanunua ma tavivine.

<sup>15</sup> Sou e Iuda sou saga me sou vei, "Posa matina bibi ieli ei isa a muadana maido? Ei ma guale ete a matetengina tasa."

<sup>16</sup> Iesu ei adeliu ane sou maido, "A inade eau bilii e amutou ieli ei minau oto boa. Ei mine Salemo, ei peltase eau usinani.

<sup>17</sup> Mane a bibi tasa ei kale ni ogomuli a masagana mine Salemo, ei ni muada a inade ieli maino ne Salemo, ue ei palea moni na damutatalana minau oto.

<sup>18</sup> Bibi ei goli a inade na damutatalana minei oto ei kale ni beilange a aisane ei oto. Moni a bibi ei kale ni beilange a aisana Bibi ei peltase ei usinani, bibi iedolo ei a bilisana bibi. Ei a bibi na aualana boa.

<sup>19</sup> Moses i bilii a binea usino ne amutou. Moni a bibi tasa boa balivua ne amutou ei

ogomuli a binea do. Posa matina amutou kale namutou valipute eau?"

<sup>20</sup> Vanunua ma tavivine sou adeliu maido, "Nunu pagu tasa ei ino minio. Sei kale ni valipute oo?"

<sup>21</sup> Iesu adeliu ane sou, "Eau goli a gona sinaga tasa, me amutou vuso saga a golu ie.

<sup>22</sup> Moses ei bilii e amutou a inigogona mina munogena, me amutou mogemoge selebenani na Maolona Malada mine amutou. Moni Moses oto ei ma mapale ete a inigogona ie. Ei palea ne selebuobuo lisa.

<sup>23</sup> Amutou kale namutou ogomuli iiti a binea ne Moses, maido me amutou mogemoge selebenani na Maolona Malada. De mane eau toekube a vovona bibi mina Maolona Malada, posa matina amutou lilitivula agu i?"

<sup>24</sup> Amutou ma vivilemuliale lei a golugolu vuso mina matane amutou. Namutou vivilemuliale a golugolu vuso mina inigogona i bilisi."

#### *Iesu ei e Kraiis?*

<sup>25</sup> Vanunua ma tavivine sanii ne Ierusalem sou tagu, "Nane ei a bibi moni a vanunua buobuo ne Iuda so kale ne so valipute ei?"

<sup>26</sup> Mu ite. Ei goli a inade na matana vanunua ma tavine vuso, moni sou ma goli ete a inade tasa usino ne ei. Nane vanunua buobuo sou muada ei e Kraiis, io?"

<sup>27</sup> Moni eitou muada a vuna aubu mina bibi ie. Me na malada Kraiis asu usinani, a bibi tasa boa i muada a vuna aubu minei."

<sup>28</sup> Iesu ei matetengitengi e sou a vanunua ma tavivine na luma mine Salemo, me ei tola maido, "Amutou muada e eau, me amutou muada a vuna aubu minau tamai. Moni eau ma asu oto usinani a masagana minau oto. Euma i peltase eau usinani. Ei patotona, moni amutou ma muada oto e ei.

<sup>29</sup> Moni eau, eau muada e ei, vuna eau asu maino ne ei me ei peltase eau."

<sup>30</sup> Sou longe a inade iedo me sou kale ne so sautole ei. Moni a ilala minei saboa, maido me tasa ne sou i ma sautole ete ei.

<sup>31</sup> Ma vanunua ma tavivine papaina sou silimuli ei, me sou vei, "Ilala e Kraiis asu usinani, nane ei ni ma mapigogoi ete ni goli a gona sinaga papaina i vululusi a gona sinaganaga bibi ieli ei goli?"

<sup>32</sup> Sou e Parisi so longe a vanunua so goli a matamatana inade na golugolu e Iesu ei goli. Maido me sou a munugana prist me sou e Parisi sou peltase sou a papai usino ne sou lapitole ei.

<sup>33</sup> Me Iesu ei vei, "Eau na pilu e amutou bisii moni, me eau na veteliu usino ne Euma, ei peltase eau usinani.

<sup>34</sup> Me namutou tilomuli e eau, moni namutou ma ite ete eau. Me amutou ma mapigogoi ete namutou asu usino na avena eau ino i."

<sup>35</sup> Io sou e Iuda so maiadepilu balivua mine sou oto maido, "Ei ni asu usiva me eitou ma mapigogoi ete neitou poge ei? Nane ei ni asu usino na abuna mine eitou ino na avena vuso ne Grik, me ei ni pipigo a matetengine sou e Grik, io?"

<sup>36</sup> Ei vei, "Ne amutou tilomuli e eau, moni namutou ma ite ete eau, me amutou ma mapigogoi ete namutou asu usino na avena eau ino i." A malibuuna inade li ei matina?"

#### *Nanu ei isa a maulina*

<sup>37</sup> Punuluna malada mine sou a malada buobuo, ei a malada buo sele. Me na malada do Iesu ei magili me ei tola maido, "Mane sei ei malou, ei ni asuale eau me ei ni oinu.

<sup>38</sup> Ei tomane a inade ino na Laulau mine Salemo, mane a bibi ei silimuli e eau, de a nanu papaina ei isa a maulina ni sali maino na lilo ne ei, me ei ni sali usino."

<sup>39</sup> Iesu ei ade a Maolona Nunu a vanunua so silimuli e ei ne sou guale mulimuli. Mina malada do Iesu ei saboa guale a aisa buo, maido me a Maolona Nunu i saboa palea usinani.

#### *Sou a vanunua ma tavivine so vilelue a abuna lua*

<sup>40</sup> Vanunua ma tavivine sanii sou longe a inadenade Iesu ei vei me sou vei, "Ivu sele, a bibi ieli ei a profet Salemo ei vei ni peltase ei usinani."

<sup>41</sup> Me sanii so vei, "Ei e Kraiis." Moni sanii sou vei, "Boa. Kraiis ma mapigogoi ete ni sibatila ne Galili.

<sup>42</sup> Laulau mine Salemo ei vei maido, Kraiis iedo ei ni palea na abuna mine Mapana e Devit, me ei ni palea ne Betlehem, a aubu iedo lisa Devit ei malu i."\*

<sup>43</sup> Maido ma vanunua ma tavivine sou isa a damutatalana seasea ane Iesu, me sou vilelue sou a abuna lua.

<sup>44</sup> Sanii sou kale ne so papale bubuli ei, moni a bibi tasa ei ma sautole ete ei.

#### *Sou a munuganuga so ma silimuli ete Iesu*

<sup>45</sup> Seidolo sou a papai so veteliu lou usino ne sou buobuo mina prist me sou e Parisi. Me sou tagi e sou a papai maido, "Posa matina amutou ma maasi ete ei usinani?"

<sup>46</sup> Me sou a papai so adeliu maido, "Lisa bibi tasa ei ma goli ete a inade tomane a bibi ieli ei goli."

<sup>47</sup> Me sou e Parisi so adeliu maido, "Ei iububi a tabune amutou tamai, io?"

\* 7:42 2 Samuel 7:12; Maika 5:2



48 Nane na abuna mine amiteu, sou a vanua buobuo me sou e Parisi, bibi tasa ne amiteu i silimuli ei, io? Boa vuso sele.

49 Sou a abuna vanunua ma tavivine so ma muada oto a binea, ne sou tabule a mavaana buo muata ne sou.”

50 Nikodemus, ei a bibi lisa ei asu usino ne Iesu, ei mina abuna ne sou. Io ei vei le sou maido,

51 “Nane a binea mine eitou, ei vei le eitou mapigogoi neitou vavasa sabubu ana bibi tasa, io? Boa. Neitou longe pale a inadene ei, me neitou muada kuba iiti a golugolu ei goli.”

52 Moni sou adeliu ane ei maido, “Nane oo tamai o a bibi na avena e Galili, io? Gi iiti a inade vuso lilo na Laulau mine Salemo, me oo tamai o no muada i maido, a profet tasa ni ma palea oto ne Galili.”

### *Tavine tasa ei goli a sinusu*

53 Vanunua tastasane so sou veteliu usino na luma mine sou.

## 8

1 Moni e Iesu ei asu usino na loena Oliv.

2 Na autupola siisi sele ei asu lou ulilo na luma mine Salemo. Me sou a vanunua ma tavivine so asuale ei. Me ei ugu me ei matetengi e sou.

3 Sou a vanua na muadana binea me sou e Parisi, so maasi a tavine tasa ei goli a inigogona sualolona, me sou mamagili ei na matane sou a vanunua ma tavivine.

4 Me sou vei ane Iesu maido, “Magiligilina, tavine ieli ei gologoli a inigogona sualolona me amiteu saavi ei.

5 Na binea, Moses ei vei maido, neitou ubi a matana tavine maidolo a vatu. Mo no vei matina?”\*

6 Sou goli a inade ieli mina tinovene ei, vuna sou kale ei ni goli a inade tasa, ne sou vavasa ane ei. Moni e Iesu ei motudu mei niage na magamaga a uune ei.

7 Sou tagu me sou tagu lou, maido me Iesu ei magili me ei vei le sou maido, “Sei bibi balivua mine amutou ei ma goli ete a sinusu ei ni lange a munugana vatu usino na tavine ie.”

8 Me ei motudu lou mei niage na magamaga.

9 Sou longe a inade do, me tastasane sou vuso sou ilisitase a avena iedo me sou asu. Sou a vanunua a avalane sou buo sou asu pala, me sou a vanua sanii so mulitole sou. Me Iesu moni pilu e tavine do su muine sulu.

10 De Iesu ei magili me ei vei ana tavine do maido, “Tavine, a vanunua li sou ive? Tasa nani boa ni vavasa amu?”

11 Ma tavine ei vei, “Bibi buo, tasa eili boa.” Me Iesu ei vei, “Eau tamai ea ma

vavasa oto amu. O asu, me mulimuli o no ma gologoli ase a sinusu.”

### *Iesu ei a muada mina magamaga vuso*

12 Iesu ei vei ane sou a vanunua ma tavivine lou maido, “Eau oto eau a muada na vanunua ma tavivine na magamaga vuso. Bibi ei ogomuli e eau, ei ma mapigogoi ete ni asu na tunuui. Ei ni isa a muada mina maulina.”

13 Sou e Parisi so longe a inade do me sou vei le Iesu maido, “Oo veipalele a pipigona vuso ma inigogona minio oto. Maidolo ma inade minio ei ma mavaa oto.”

14 Me Iesu ei vei liu ane sou maido, “Ei patotona, eau oto veipale a inigogona minau oto. Moni inadegu ei mavaa, vuna maido eau muada a aubu eau ilisi i me eau asu usinani, mea muada a aubu eau na asuale. Moni amutou ma muada oto a vuna aubu minau. Me eau na asu usiva, ede tamai amutou ma muada oto i.

15 Amutou vilealale a vanunua na inigogona mina magamaga. Eau ma vilealale ete a inigogona mina bibi tasa.

16 Moni mane eau vilemumuliale a inigogona mina bibi tasa, vilemumulialena minau ei bilesi moni, vuna eau vululu moni eau ma vilemumuliale ete ei. Boa. Euma, ei peltase eau usinani, ei pipigo pilu e eau.

17 Na binea mine amutou, a inade eili maido, mane a bibi lua su veimuade a inade tasa moni, de a inade mine sulu ei ni patotona.†

18 Eau oto eau veimuade a pipigona vuso ma inigogona minau oto, me Euma, ei peltase eau usinani, ei tamai ei veimuade a pipigona ma inigogona minau.”

19 Io sou e Parisi so tagi e ei maido, “Tamamu ei ino iva?” Me Iesu ei adeliu maido, “Amutou ma muada oto e eau, me amutou ma muada oto e Euma tamai. Mane amutou muada e eau, io ne amutou muada tamai e Euma.”

20 Iesu ei matetengi e sou a vanunua ma tavivine agavuale a taogo na niabi mina luma mine Salemo, me ei goli a inade sou ie. Ma bibi tasa ei ma lapitole ete ei, vuna maido ilala ne ei i sabao.

### *Amutou ma mapigogoi ete namutou asu usino na aubu minau*

21 Iesu ei vei le sou a vanunua ma tavivine lou maido, “Eau na asutase amutou, me ne amutou tilo e eau, moni ne amutou mate a sinusu mine amutou. Amutou ma mapigogoi ete ne amutou asu usino na aubu eau na asuale.”

22 Sou e Iuda so longe a inade ielili me sou tagu, “Nane ei ni valipute liu e ei oto? Posa

\* 8:5 Pipigona mina Prist 20:10; Binea 22:22-24 † 8:17 Binea 17:6, 19:15

matina ei vei, 'Amutou ma mapigogoi ete ne mu asu usino na aubu eau na asuale?' "

<sup>23</sup> Me Iesu ei vei le sou maido, "Amutou a abuna matano na magamaga moni. Moni eau, eau muata na langi. Amutou a vanunua ma tavivine na magamaga. Moni eau a bibi na magamaga boa.

<sup>24</sup> Maidolo me eau veiosi ane amutou, ne amutou mate a sinusu mine amutou, me mane amutou ma silimuli ete eau tomane eau veiosi maido, seido a sinusu vuso mine amutou ei ni muina moni, me namutou mate."

<sup>25</sup> Sou tagi e ei, "Oo sei?" Me Iesu ei vei le sou, "Eau e sei, ede eau veiosi ane amutou lisa palasi.

<sup>26</sup> Eau isa a inade makuba eau na goli mina vilemumuliale na inigogona vuso mine amutou. Moni a Bibi ei peltase eau, inigogona minei i patotona vuso. Ma inade vuso eau longe maino minei, ede eau veimudadade usino ne sou a vanunua ma tavivine mina magamaga."

<sup>27</sup> Sou ma muada oto ve Iesu ei adeade ane sou e Tamana,

<sup>28</sup> maido me ei vei le sou maido, "Ilala amutou beilange e Natuna Bibi, io namutou muada i maido, eau oto eau ino simaido. Me namutou muada, eau ma goli ete a golu tasa a damutatalana minau oto. Eau veimudadade a inade vuso tomane Euma ei maite e eau.

<sup>29</sup> Euma, ei peltase eau usinani, ei eili pilu e eau. Me ei ma itetase ete eau na ugu vululu moni. Boa. Vuna maido taliuliu eau goli a golugolu vuso ei kale."

<sup>30</sup> Sou a vanunua ma tavivine so longe Iesu ei goli a inade ieli, me makuba mine sou so silimuli e ei.

*Inade moliana ei ni goli a vanunua ma tavivine vuso ne sou palea malamala*

<sup>31</sup> De Iesu ei vei le sou e Iuda so silimuliosi e ei maido, "Mane amutou lapitole sagali a inade minau, de amutou vuso namutou muina a disaipel ivu minau.

<sup>32</sup> Me ne amutou muada a inade ivu, ma inade ivu ieli ni toe e amutou namutou palea malamala."

<sup>33</sup> Me sou vei liu ana maido, "Amiteu a abuna mine Abraham. Na malada tasa amiteu ma vanua na pipigo sabubu otosi. Moni, posa matina o vei, 'Namutou palea malamala?' "

<sup>34</sup> Iesu i adeliu ane sou maido, "Ivu uata eau vei le amutou, a vanunua vuso so goligoli a sinusu sou ino a vanunua na pipigona sabubu mina sinusu.

<sup>35</sup> A bibi na pipigona sabubu ei ma ugu pilupilu oto e tamenatatuna taliuliu. Natuna moni ei ino taliuliu.

<sup>36</sup> Maidolo me mane Natuna ei goli e amutou mu palea malamala, io namutou ugu malamala sele.

<sup>37</sup> Eau muada, amutou a abuna mine Abraham. Moni a inadegu ei ma ino oto lilo mine amutou. Maidolo me amutou kale namutou valiputemate eau.

<sup>38</sup> Eau veimudadade a golugolu vuso Euma ei maitei eau. Me amutou goli a inigogona amutou guale maino ne tamane amutou."

<sup>39</sup> Sou e Iuda so longe a inade ne Iesu, me sou adeliu maido, "Tubune tamane amiteu e Abraham." Me Iesu ei vei le sou, "Mane ei moliana amutou e tubutubune natatune Abraham, io ne amutou goli a inigogona tasa moni tomane Abraham ei goli.

<sup>40</sup> Eau veimudadade le amutou a inade moliana eau longe maino ne Salemo. Moni seidei amutou kale ne mu valipute eau. A inigogona li ei a inigogona mine Abraham boa.

<sup>41</sup> Amutou goligoli moni a inigogona mine tamane amutou." Me sou vei le ei, "Sou e tinatinane amiteu so ma goli maisabe ete a inigogona سوالolona me sou maalepose amiteu. Boa. Amiteu isa moni e Tamane amiteu tasa, ei e Salemo."

<sup>42</sup> Me Iesu ei vei le sou maido, "Mane ei moliana Salemo ei e Tamane amutou, io ne amutou kale eau, vuna eau asu maino ne Salemo. Eau ma asu oto usinani na damutatalana minau oto. Boa. Salemo ei peltase eau usinani.

<sup>43</sup> Moni posa matina amutou ma muada kuba oto a inadegu? A vuna golu ieli ei maido, amutou ma mapigogoi ete ne amutou longemuli a inadegu.

<sup>44</sup> Amutou e natatune tamane amutou, ei e Satan. Me amutou sagali a ogomulina masagana vuso mine tamane amutou. Lisa otosi ei muina a bibi mina valiputene sou a vanunua. Me ei ma ogomuli ete a inigogona i patotona, vuna maido inigogona i patotona ei ma ino oto minei. Aualana, iede a inade minei ivu. Vuna ei a bibi na aualana, me ei a tamana aualana.

<sup>45</sup> Moni eau, eau ademudadada a inade i moliana, moni amutou ma silimuli ete a inadegu.

<sup>46</sup> Amutou damu i eau goli a sinusu, io? Mane amutou damutale maido, io ne amutou veipale a inigogona pagu minau. Mane eau veipale a inade moliana, io posa matina amutou ma silimuli ete a inadegu?

<sup>47</sup> Abuna mine Salemo sou longemulimuli a inade vuso mine Salemo. Amutou a abuna mine Salemo boa, maidolo me amutou ma longemuli ete a inade mine ei."

*Ilala Abraham ei saboa alaposa, Iesu ei elliosi*

48 Sou e Iuda so adeliu ane Iesu maido, "Amiteu vei ve o a bibi mine Samaria me a nunu pagu tasa ino minio, ei moliana, io?"

49 Me Iesu ei adeliu maido, "Eau ma isa oto a nunu pagu. Eau beilange a aisane Euma moni, me amutou taipui a aisagu.

50 Eau ma pipigo oto a beilangena aisane eau oto. A bibi tasa eili ei kale ni beilange a aisagu, ei a bibi na vivilealena.

51 Patotona sele eau vei le amutou, mane a bibi tasa ei ogomuli a inade minau, ei ni ma mapigogoi ete ni mate. Boa vuso sele."

52 Io sou e Iuda so vei le Iesu maido, "Seidei amiteu muadasi i, a nunu pagu nana na lilomu. Abraham ei matesi, me sou a profet tamai so matesi. Me oo vei, 'Mane a bibi tasa ei ogomuli kube a inadegu, ei ni ma mapigogoi ete ni mate.'

53 Nane oo vululusi e tubune eitou, Abraham, io? Ei matesi, me sou a profet tamai so matesi. Oo damu i oo sei ivu?"

54 Iesu ei adeliu maido, "Mane eau beilange a aisane eau oto, io aisagu ei a golu sabubu. Moni e Euma, ei beilange a aisagu. Me amutou vei ve ei e Salemo mine amutou.

55 Moni e amutou ma muada oto e ei, moni eau muada e ei. Mane eau vei, 'Eau ma muada oto e ei,' io eau na palea a bibi na aulana tomane amutou. Moni eau muada e ei, me eau ogomuli kube a inade mine ei.

56 Ilala tubune amutou e Abraham ei damutale a niitena malada minau ei mongemonge. Ma ilala ei itesi, lilona i kubaana sele."

57 Sou e Iuda so longe a inade ielili me sou vei le Iesu maido, "Oo a avalamu saboa savulu lima, me oo ite Abraham, io?"

58 Me Iesu ei vei le sou, "Patotona sele eau vei ane amutou, ilala Abraham ei saboa alaposa, eau oto eau eiliosi."

59 Io sou guale a vatu ve ne sou ubi e ei, moni Iesu ei ovu me ei ilisitase a luma mine Salemo me ei asu usala.

## 9

### *Iesu ei toekube a mata ego tasa*

1 Iesu ei asuasi mei ite a bibi tasa matana i ego. Malada tinana i maalepose ei, ei mataegosi.

2 Me sou a disaipel mine Iesu sou tagi e ei, "Magiligilina, sei goli a sinusu me ei alaposa mata ego? Bibi ieli oto ei goli a sinusu, ue tamana me tinana sulu goli a sinusu?"

3 Me Iesu ei adeliu maido, "Bibi ieli ei ma goli ete a sinusu, me tamana me tinana tamai sulu ma goli ete a sinusu. Ei palea mata ego ne sou a vanunua ma tavivine ne so ite a pipigona mine Salemo na maulina minei.

4 Seidei ei saboa eili malada, me neitou goli a pipigona mine Salemo, ei peltase eau.

Tunuui ni palea, ma vanunua ne sou ma mapigogoi ete ne sou goli a pipigona tasa.

5 Ilala eau saboa eili mina magamaga ie, eau oto eau a muada mina magamaga vuso ie."

6 Iesu ei vei maido, mei apiso na magamaga. Me ei sauvuvule a apisona pilu a magamaga, me ei savei a magamaga dolo na matana bibi ei mata ego do.

7 Me Iesu ei vei lei maido, "Oo asu no loloi a matamu na lulu na nanu Siloam." Malibuuna inade e Siloam i maido, "Sou peltase ei usino." Io a mata ego do ei asu mei loloi a matana. Tauluna moni, matana i peo mei ite kube a gologulu vuso mei vetelii.

8 De sou minei oto pilu a vanunua sou ite ei lisa tagutagu a vatu ue sei golu, sou vei maido, "Matina? Nane ei moni a bibi ei ugugu me ei tagutagu a vatu maino ne sou a vanunua?"

9 Sanii sou vei, "E, ede ei moni." Me sanii sou vei, "Boa, ei tomane moni a bibi iedo, moni ei sea." Moni bibi oto do ei vei, "Teli eau moni."

10 Me sou tagi e ei, "Matamu i gemu lou matina?"

11 Me ei adeliu ane sou maido, "Bibi iedo sou tole e Iesu ei sauvule a magamaga pilu a apisona me ei savei na matagu. Me ei vei le eau, 'O asu usino na lulu na nanu Siloam mo loloi a matamu.' Maido me eau asu loloi me eau gemu."

12 Me sou tagi e ei, "Bibi iedo ino iva?" Me ei vei, "Eau ma muada oto i."

13 De sou maasi a bibi a matana i kubasi iodo usino ne so e Parisi.

14 Malada Iesu ei pee a matana bibi odo a magamaga pilu a apisona, ei a Maolona Malada mine sou e Iuda.

15 Io me sou e Parisi so tagi lei e ei, "Matamu i palea kuba matina?" Me ei vei le sou maido, "Ei savei a magamaga pilu a apisona na matagu, me eau loloi, me eau mapigogoi na gemu kuba."

16 Me Parisi sanii sou vei maido, "Eitou muada, Salemo ei ma peltase ete a bibi ede usinani, vuna maido ei ma ogomuli ete a binea mina Maolona Malada." Moni sanii sou vei ve, "Posa matina a bibi ei isa a sinusu ei mapigogoi ni goli a gona sinaga maido?" Me sou vilelue sou.

17 De sou e Parisi sou tagi lei a bibi iedo maido, "Bibi ei toekube a matamu odo, oo damu i ei sei bibi?" Ma bibi edo ei vei maido, "Ei a profet tasa."

18 Sou e Iuda sou ma kale ete ne sou silimuli ve ei a mata ego me seidei ei gemu. Maido me sou toleale tamana me tinana bibi a matana i peosi odo.

19 Sou tagi e sulu maido, "Teli nane natune amulu, io? Amulu vei ve ei alaposa a

mata ego, io? De ei gemugemu lou seidei i matina?”

<sup>20</sup> Me tamana me tinana sulu adeliu maido, “Amilu muada, ieli ei e natune amilu. Me na malada tinana i maalepose ei, ei ma gemugemu oto.

<sup>21</sup> Moni seidei matana i peo matina, ieli amilu ma muada oto i. Me sei pee a matana, ede tamai amilu ma muada oto i. Amutou oto tagi e ei. Ei buosi. Ei mapigogoi ni veimuade a inadene ei oto.”

<sup>22</sup> Tamana me tinana sulu lae e sou e Iuda, maido me sulu goli a inade maido. Sou e Iuda so maiademuliosu maido, mane a bibi tasa i veipale e Iesu ei e Kraisi, de ne sou taulele ei maino na luma na kinaka mine sou e Iuda.

<sup>23</sup> A vuna moni ieli tamana me tinana sulu vei maido, “Ei buosi. Amutou oto mu tagi e ei.”

<sup>24</sup> Io maluanai sou toleale a bibi lisa ei ma gemugemu oto do, me sou vei lei, “O no beilange a aisane Salemo, me o no goli a inade ivu moni. Amiteu muada, bibi o adeade i iede ei a bibi na sinusu.”

<sup>25</sup> Me ei adeliu maido, “Ei a bibi na sinusu, ue boa, iede eau ma muada oto i. Golu tasa moni eau muada i, lisa eau ma gemugemu oto, moni seidei eau gemuosi.”

<sup>26</sup> Me sou tagi lei e ei maido, “Ei goli lio a sava? Ei pee a matamu matina?”

<sup>27</sup> Me ei adeliu ane sou maido, “Eau veiosi le amutou, moni amutou ma kale ete namutou longe. Gona sava amutou kale namutou longe mapapaina? Nane amutou tamai mu kale ne amutou palea a disaipel minei, io?”

<sup>28</sup> Me sou e Parisi so adeptintola ana bibi iedo maido, “Oo a disaipel minei. Moni amiteu a disaipel mine Moses.

<sup>29</sup> Amiteu muadasi i, Salemo ei bilii e Moses a inade. Moni a bibi ede ei palea maiva, ede amiteu ma muada oto i.”

<sup>30</sup> Io a bibi lisa ei ma gemugemu oto do ei adeliu ane sou maido, “Amutou goli a inade sea sele. Bibi iedo ei pee a matagu, me amutou vei, amutou ma muada oto e ei i sibitala maiva.

<sup>31</sup> Eitou muada, Salemo ei ma longemuli ete a inade ne sou a vanunua na sinusu. Salemo ei longemuli a inade ne sou so a vanunua na kinaka me sou ogomuli a masagana minei.

<sup>32</sup> Lisa oto sele asu pea seidei a mapamulina i boa na bibi tasa tinana i maalepose ei me ei ma gemugemu oto, me mulimuli a bibi tasa i pee a matana.

<sup>33</sup> Mane Salemo i ma peltase ete a bibi iodo usinani, de ei ma mapigogoi ete ni goli a golu tasa.”

<sup>34</sup> Sou e Parisi so longe a inade do me sou adeliu a inade maido, “Posa matina? Inigogona sinusu i valitole sele oo soke mina malada tinamu i maalepose oo i asu pea seidei. Me oo kale no matetengi e amiteu, io?” Me sou peltaselele ei usino.

*Vanunua sou ma silimuli ete, sou tomane a bibi ei ma gemugemu oto*

<sup>35</sup> Iesu ei longe a inade ve sou peltaselele a bibi iedo. Ma ilala Iesu ei ite lei ei, Iesu ei vei lei maido, “Oo silimuli e Natuna Bibi?”

<sup>36</sup> Me ei adeliu maido, “Bibi buo, Natuna Bibi iodo ei e sei? Eau na silimuli e ei.”

<sup>37</sup> Me Iesu ei vei lei, “O itesi e ei. Ei a bibi seidei ei ade pilu e oo ie.”

<sup>38</sup> Ma bibi edo i vei, “Bibi Taula, eau silimuli.” Me ei totopatulu me ei kaka ane Iesu.

<sup>39</sup> Me Iesu ei vei maido, “Eau asu usinani na magamaga ieli mina vivilealene sou a vanunua ma tavivine. Maido me sou a vanunua so ma gemugemu oto, ne so gemu. Me sou a vanunua so gemugemu, ne sou ma gemu oto.”

<sup>40</sup> Sou e Parisi sanii ino so agavuale Iesu, sou longe a inade ie. Maido me sou tagi e ei, “O vei maido, amiteu tamai amiteu mata ego, io?”

<sup>41</sup> Me Iesu ei vei le sou maido, “Mane a matane amutou i ego, io namutou ma isa oto a mavaana mina sinusu. Moni amutou vei ve, ‘Matane amiteu i gemugemu,’ maido ma sinusu ne amutou i saboga nana ana.”

## 10

*Iesu ei a bibi doana mina niitealena sipsip*

<sup>1</sup> Iesu ei ade lou maido, “Ivu sele eau vei le amutou, bibi ei ma gali oto ulilo na tema mina bigomu mina sipsip, mei seuti a bigomu na avena tasa maino mei gali ulilo, matana bibi maido ei a bibi na paaalina mei a bibi na lapuale sabubina golugolu mine sou sanii.

<sup>2</sup> Moni a bibi ei gali ulilo na tema, ei a bibi na itealalena sipsip.

<sup>3</sup> Bibi na ulagena tema ei pee a tema ane a bibi. Ma sipsip vuso sou longemuli a tinola minei. Ei tole a aisana sipsip tastasa minei oto, me ei maasi e sou usala.

<sup>4</sup> Ei maasi a sipsip vuso minei usala pulu, io ei muge sou. Ma sipsip vuso sou muada a tinola minei, maido me sou ogomuli e ei usino.

<sup>5</sup> Ne sou ma ogomuli sabubi ete a vanunua seasea. Mane a bibi seasea i tole sou, ne so oavetase ei, vuna sou ma muada oto a baligolu na vanunua sea.”

<sup>6</sup> Iesu ei bilii e sou a adetinovona ie, moni sou ma muada oto a vuna inade ei goli le sou.

7 Maido me Iesu ei vei ane sou lou maido, "Eau vei ivu sele le amutou, eau oto eau a tema mina sipsip.

8 A vanunua vuso sou asu pala ane eau, sou a vanua na lilimana ma vanua na lapualena golugolu. Moni a sipsip sou ma longemuli ete a tinola ne sou.

9 Eau oto eau a tema. Sei ei asuale eau me ei gali ulilo mina bigomu, io Salemo ni gualeliu e ei. Me ei ni gali ulilo mei gali usala, mei guale a gona inani.

10 Bibi na paaalina ei ma asu oto usinani ni goli a golu tasa sea. Ei asu moni usinani ni paaali a sipsip mei ni toegegeli e sou mei valiputemate sou. Moni eau, eau asu usinani ane sou ne so guale a maulina, ma maulina doana ni vonu sele lilo ne sou.

11 "Eau oto eau a doana bibi mina niitealena sipsip. Bibi doana mina niitealena sipsip ei iabitase a maulina minei mina buloine sou a sipsip.

12 Mane a bibi ei pipigo moni mina gualena vatu, ei a bibi na itealena sipsip ivu boa mei ma tamana sipsip oto. Mane ei ite a buse aou sou asu maino, ei ni ilisitase a sipsip vuso me ei ni iava. Me a buse aou ni aleale sou a sipsip me ei ni vote maisabe sou.

13 Bibi iodo ei ni goli simaido, vuna ei pipigo moni a gualena mapa. Ei ma damutale ivu ete sou a sipsip.

14 Eau oto eau a doana bibi mina niitealene sou a sipsip. Eau muada a sipsip vuso minau, ma sipsip vuso minau sou muada e eau tamai,

15 tomane Euma ei muada eau, me eau muada e Euma. Me eau na iabitase a maulina minau mina buloine sou a sipsip.

16 Eau isa a sipsip sanii lou sou ma ino oto lilo na bigomu ieli. Eau na maasi liu tamai e sou usinani. Me ne sou longemuli a inadegu. Abuna sipsip ni tasa moni ma bibi na niitealena sipsip ni tasa moni.

17 "Euma ei kale ivu sele eau, vuna eau na iabitase a maulina minau me mulimuli eau na gualeliu lei.

18 A bibi tasa i ma mapigogoi ete ni taulele a maulina minau. Na masagana minau oto eau na iabitase a maulina minau. Eau isa a sagagalina i mapigogoi na iabitase a maulina minau, me eau isa a sagagalina i mapigogoi na gualeliu lei. Euma ei vei le eau na goli simaido."

19 Sou e Iuda sou longe a inade do, me sou vileleu sou a abuna lua lou.

20 Papaina mina vanunua sou vei ve, "Nunu pagu ino minei, me ei vautauta. Posa matina amutou longemuli e ei?"

21 Me sanii sou vei, "A bibi ei isa a nunu pagu ei ma mapigogoi ete ni vei simaido.

Nane a nunu pagu ei mapigogoi ni pee a matane sou ego, io?"

### *Sou e Iuda so butuale e Iesu*

22 Mina ilala do, a malada tasa buo na kinaka i palea ne Ierusalem. Ei a malada mina damutaleliuna ilala lisa sou tige kube a luma mine Salemo me sou bilii liu e Salemo. Ei palea na ilala na maigina.

23 De Iesu i asuasu na luma na malolovina mine Solomon i ino lilo na luma mine Salemo.

24 Me sou e Iuda so asu maino me sou magili sailli e ei, me sou tagi e ei maido, "Oo no ma ademuada oto ane amiteu pea ne sei malada? Mane oo e Kraiss, de oo no adepalea muada ane amiteu."

25 Me Iesu ei adeliu ane sou maido, "Eau veiosi le amutou, moni amutou ma silimuli ete. Pipigona vuso eau goli na aisane Euma, ielili i maite e amutou e eau e sei ivu.

26 Moni amutou a sipsip minau boa. Maido me amutou ma silimulimuli ete.

27 Sou a sipsip minau sou longemulimuli a tinola minau, me eau muada e sou, me sou ogomuli e eau.

28 Eau bilii e sou a maulina i muina kubaana taliuliu taliuliu, me ne sou ma buale oto. Ma bibi tasa ni ma mapigogoi ete ni taulele sou maino na limagu.

29 Euma, ei bilii e eau e sou, ei buo sele ana golugolu vuso. Maido ma bibi tasa i ma mapigogoi ete ni taulele sou maino na limana.

30 Me eau pilu e Euma amilu tasa moni."

31 Sou e Iuda sou longe a inade maido me sou pa lou a vatu ne sou ubi e ei.

32 Me Iesu ei vei le sou maido, "Eau maite e amutou a pipigona doana makuba mine Euma. Moni, vuna matina amutou kale namutou ubi eau a vatu?"

33 Sou e Iuda sou adeliu usino ne ei maido, "Amiteu ma ubi ete oo a vatu a vuna ieli. O puisobe a muine Salemo, na vuna moni ieli amiteu kale namiteu ubi e oo. Oo a bibi sabubu, moni o vei maido oo oto oo e Salemo."

34 De Iesu adeliu ane sou maido, "Na bine mine amutou a inade tasa i vei maido, 'Eau vei maido, 'Amutou tomane e salemo.'"

35 Salemo i veipale a inade do usino ne sou a vanunua, me ei tole e sou e salemo. Ma inade ino na Laulau mine Salemo ei ma sauvuvule ete.

36 Moni e eau, Euma oto ei tau e eau, me ei peltase eau usinani na magamaga. Maido na ilala eau vei, 'Eau e Natune Salemo,' posa matina amutou vei, 'O kale no puisobe a muine Salemo?'

\* 10:34 Laulau na Inala 82:6

<sup>37</sup> Mane eau ma goli ete a pipigona mine Euma, io ne amutou ma silimuli ete a inadegu.

<sup>38</sup> Moni eau goli a pipigona minei. Me mane amutou ma kale ete namutou silimuli a inadegu, io ne amutou silimuli a pipigona eau goli. Maido me namutou iteilale me namutou muada i maido, Euma eili minau, me eau ino ne Euma.”

<sup>39</sup> Sou kale ne sou saavi lei ei, moni ei pololeletase sou mei asu.

<sup>40</sup> Iesu ei veteliu lou mei tuluuti a nanu e Jordan. Me ei asu sibitala mina aubu lisa Ioanes ei maavuvuti a vanunua, me ei muina na aubu odo.

<sup>41</sup> Ma vanunua makuba sou asuale ei. Me sou vei maido, “Ivu, Ioanes ei ma goli ete a gona sinaga tasa, moni a inadenade vuso Ioanes ei goli ane a bibi ie, ei patotona moni.”

<sup>42</sup> Me na malada Iesu ei ugu na avena do, vanunua makuba sou silimuli e ei.

## 11

### *Lasarus ei matesi*

<sup>1</sup> Bibi tasa aisana e Lasarus ei isa a sinobe, ei mina aubu e Betani. Betani ei a aubu mine Maria pilu e tasina e Marta.

<sup>2</sup> Ei e Maria moni ei singi a nanu manginangina na ubune Bibi Taula, mei savei a aivune ei oto. Lasarus ei e latamane ne Maria me Marta.

<sup>3</sup> De tametatasi lua do su sosove a inade usino ne Iesu maido, “Bibi Taula, bibi oo kale mamaimai sele do, ei sobe.”

<sup>4</sup> Iesu ei longe do me ei vei maido, “Sinobe ieli ei ni ma goli ete a bibi ie ni mate. Moni sinobe ieli ni goli a vanunua ma tavivine ne sou ite a aisa buo mine Salemo. Na vea moni ieli Natune Salemo tamai ei ni gual e aisa buo.”

<sup>5</sup> Iesu ei kale mamai sele Marta pilu e tasine ei me Lasarus.

<sup>6</sup> Na ilala ei longe Lasarus ei sobe, ei muina a malada lua lou na avena ei ino i odo.

<sup>7</sup> Me mulimuli ei vei le sou a disaipel, “Neitou veteliu usino na avena ne Iudia.”

<sup>8</sup> Me sou a disaipel so vei le ei, “Magiligilina, simonimoni sou e Iuda so kale ne sou ubi mate e oo a vatu, moni o kale no asu lou usino ne sou, io?”

<sup>9</sup> Moni e Iesu ei adeliu ane sou maido, “A oaso i isa a matailala savulu tasa timana lua, io? Mane a bibi ei asu na oaso, ei ma bosabosa oto, vuna maido ei ite a muada mina magamaga.

<sup>10</sup> Moni mane ei asu na lodo, ei bosabosa, vuna maido ei ma isa oto a muada.”

<sup>11</sup> Me mulimuli lou ei vei le sou, “Tamaine eitou Lasarus ei ngolo. Moni eau na asu na toleluti ei.”

<sup>12</sup> Sou a disaipel so longe a inade iedo me sou vei maido, “Bibi Taula, mane ei ngolo, sinobe minei ni pulu, mei ni kuba liu lou.”

<sup>13</sup> Sou a disaipel so ma muada oto e Iesu ei vei ve Lasarus ei matesi. Sou damu i e Iesu ei vei ve Lasarus ei ngolo moni.

<sup>14</sup> Maido me Iesu ei veimuade e sou maido, “Lasarus ei matesi.

<sup>15</sup> Moni eau damutale amutou me eau mongemonge e eau, ea ma ino pilu oto e ei na malada do. Vuna seido ieli ni goli e amutou namutou silimuli. Moni seidei neitou asu usino ne ei.”

<sup>16</sup> Iesu ei adesi, de Tomas, aisana tasa e Didimus, ei vei le sou a disaipel maido, “De, eitou vuso neitou asu to mate pilu e ei.”

*Iesu ei vei, “Eau a ilisiliuna me eau a maulina oto.”*

<sup>17</sup> Ilala Iesu asu mei ite Lasarus i tabulios i a malada iva lilo na muina minate.

<sup>18</sup> Betani ei agavuale Ierusalem, i mapi-gogoi a bulagona kilomita tolu moni,

<sup>19</sup> maido ma vanunua ma tavivine makuba mine Iuda sou sibitala le Marta me Maria mina toemeana lilo ne sulu a minate mine latamane ne sulu.

<sup>20</sup> Marta ei longe a inade ve Iesu ei asuasu maino, me ei ilisitase a luma mei asu ni poge Iesu na vea.

<sup>21</sup> Me Marta ei vei le Iesu maido, “Bibi Taula, mane oo eili nani, ne latamanegu ni ma mate oto.

<sup>22</sup> Moni seidei eau muada tamai, mane o kake Salemo a golu tasa, Salemo ei ni bilii o.”

<sup>23</sup> Iesu ei vei le ei, “Latamanemu ei ni ilisiliu.”

<sup>24</sup> Me Marta vei le ei, “Eau muada, ei ni ilisiliu na punuluna malada, na malada do sou vuso vanunua ma tavivine ne sou ilisiliu.”

<sup>25</sup> Me Iesu ei vei lei, “Eau a ilisiliuna, me eau a maulina oto. Ma bibi ei silimuli eau, mane ei mate, ei ni mauli lou.

<sup>26</sup> Ma vanunua vuso sou ino mauli me so silimuli e eau, ne sou ma mate oto. Ne sou mauli taliuliu taliuliu. Oo silimuli ieli ue boa?”

<sup>27</sup> Me Marta i vei le Iesu maido, “E, Bibi Taula. Eau silimuli oo e Krai me oo e Natune Salemo ni asu usinani mina magamaga.”

### *Iesu ei lilomuli e Lasarus me ei tangi*

<sup>28</sup> Marta i vei maido, me ei veteliu me ei tole tasina e Maria. Me ei ade pakisikisi na tagilane Maria maido, “Bibi na matetengina ei divi me ei eili, me ei kale ni ite oo.”

<sup>29</sup> Maria ei longe maido, ma tabaa oto ei ilisi ni asu ite e Iesu.

<sup>30</sup> Iesu saboa divi na aubu. Ei saboa ino na avena palapala Marta i poge ei iodo.

<sup>31</sup> Sou e Iuda so ino pilu e Maria na luma na tinangi, sou ite ei ilisi asi me ei asu usala. Me sou ogomuli e ei, vuna maido sou damu ve ei ni asu ni tangi na muina minate.

<sup>32</sup> Ilala Maria ei asu sibitala na avena Iesu ino i odo, me ei ite ei. Me ei totpatulu agavuale a ubune Iesu, me ei vei lei maido, "Bibi Taula, mane o eili, latamanegu i ma mapigogoi ete ni mate."

<sup>33</sup> Iesu i ite Maria i tangitangi, me ei ite sou e Iuda so asu usinani pilu e Maria, sou tamai so tangi. Ma liloni i momolu sele mei tamai bisii moni ni tangi.

<sup>34</sup> Me ei vei, "Amutou tau e ei iva?" Me sou vei lei ei, "Bibi Taula, o asu usinani mo oite."

<sup>35</sup> Me Iesu ei tangi.

<sup>36</sup> Sou e Iuda so ite me sou vei maido, "Mu ite, ei kale mamai sele a bibi ie."

<sup>37</sup> Moni sou sanii so vei, "Ei pee a matane bibi tasa ei ma gemugemu oto me ei toekube ei me ei gemu. Moni vuna matina ei ma kale ete ni buloi a bibi ieli ni ma mate oto?"

### *Iesu ei mailisiliu e Lasarus*

<sup>38</sup> Io Iesu ei lilomomolu sele lou, me ei asu usino na muina minate. A muina minate do ei a lulu na vatu sou pesi na loena. Me a vatu taula tasa ei tabesobe a asena lulu odo.

<sup>39</sup> Io Iesu ei vei, "Amutou, taulele a vatu iede." Marta, ei e latavine na bibi matesi iodo, ei vei le Iesu maido, "Bibi Taula, seidei a malada ivanai ei ino na muina minate. Maido me ei mavuluosi."

<sup>40</sup> Me Iesu ei vei lei ei, "Palapala eau veiosio, mane o silimuli, de o no ite a aisa buo mine Salemo."

<sup>41</sup> De sou taulele a vatu. Me Iesu i gemu uata me ei vei maido, "Ouma, eau toledadangi sele e oo, vuna o longesi a kinaka minau.

<sup>42</sup> Eau muadasi i taliulu o longe a kinaka minau. Moni eau damutale a vanunua ma tavivine sou magli ieli, me eau vei a inade ie ne sou silimuli e oo o peltase eau usinani."

<sup>43</sup> Iesu ei ade pulosi, mei tola vauta, "Lasarus, o gali usala!"

<sup>44</sup> De Lasarus ei ilisiliu mei gali usala. Ubuna ma limana sou avisobe a malomalo ma lagune ei sou avisobe a malo tamai. Me Iesu ei vei le sou maido, "Lulitase a malo me nosi ana ei ni asu."

*Sou a vanua buobuo so maiademuli a valiputene Iesu*

*(Mat 26:1-5; Mak 14:1-2; Luk 22:1-2)*

<sup>45</sup> Papaina mine sou e Iuda so asuosi usinani me sou lilomomoluosi pilu e Maria, sou ite a golu e Iesu ei goli, me sou silimuli e ei.

<sup>46</sup> Moni sanii mine sou so veteliu usino ne sou e Parisi me sou vei le so a golu Iesu ei goli iodo.

<sup>47</sup> Maido me sou a munugana prist pilu e sou e Parisi sou toleale sou a vanua na toebilelesina inade ne sou viepili, me sou vei le sou maido, "Neitou goli a sava? Bibi ieli ei goli a gona sinaga papainasi.

<sup>48</sup> Mane eitou itetase ei ni goli a matana inigogona maido, a vanunua ma tavivine vuso do ne sou silimuli ei. Me sou e Rom ne so asu usinani ne sou toegegeli a luma na kinaka mine eitou pilu a abuna vanunua ma tavivine mine eitou."

<sup>49</sup> Moni a bibi tasa balivua ne sou, aisanu e Kaiapas, ei a mapana prist na avala do, ei vei le sou maido, "Ivu amutou ma isa oto a damutatalana.

<sup>50</sup> Nane amutou ma muada oto a inigogona tasa mine eitou e Iuda. Ei kubaana mane a bibi tasa moni ni puisobe a muine sou a vanunua ma tavivine me ei ni mate, dae a abuna vuso mine eitou ne sou buale."

<sup>51</sup> Kaiapas ei ma goli ete a inade do na damutatalana minei oto. Ei ugu a mapana prist mina avala do, maido me ei adetinau-nau e Iesu ni mate mina buloine sou e Iuda.

<sup>52</sup> Me Iesu ei ma mate oto mina buloine sou e Iuda moni boa. Ei ni mate mina viepiline sou e natatune Salemo so ugu maisaba, me ei ni toe sou ne so palea a abuna tasa moni.

<sup>53</sup> De, na malada moni odo, sou a vanua buobuo so soke a maiademulina punogena vea mina valiputene Iesu.

<sup>54</sup> Maido me Iesu ei ma asu palea oto louosi balivua ne sou e Iuda. Ei asutase a avena do mei asu ugu na avena tasa i agavuale a avena a vanua boa, na aubu buobuo tasa e Epraim. Me ei muina mina aubu do pilu e sou a disaipel minei.

<sup>55</sup> Malada na Asuleletasena bisii moni ni sibitala. Maidolo me sou a vanunua ma tavivine makuba mina aububuna maisaba sou asu usino ne Ierusalem mina gunoline sou oto ne so palea alaba mina matane Salemo.

<sup>56</sup> Me sou tilomuli e Iesu. Sou magli lilo na luma mine Salemo, me sou maiade balivua ne sou oto maido, "Amutou damutale matina? Ei ni asu usinani ni ite a malada buobuo mina kinaka ue boa?"

<sup>57</sup> Sou a munugana prist pilu e sou e Parisi sou veiosiane sou a vanunua ma tavivine maido, mane sei bibi ei muada e Iesu ei ino iva, ei ni veimuada ane sou ne sou papale ei.

## 12

*Maria ei singi a nanu manginangina na ubune Iesu*

*(Mat 26:6-13; Mak 14:3-9)*

<sup>1</sup> Malada na Asuleletasena ni palea na tauluna malada pantasa. Na malada iedo Iesu ei asu usino ne Betani. Betani ei a aubu

mine Lasarus, ei a bibi Iesu i mailisiliuosi na minate.

<sup>2</sup> Sou goli a inani mina toemunongene Iesu na aubu iedo. Me Marta i oseose a gona inani, me Lasarus i ugu pilu a vanunua sou aani pilu e Iesu.

<sup>3</sup> De Maria i guale a getana nanu manginangina i mapana buo mamau, mei singi na ubune Iesu, mei saveitagase a aivu ne ei oto. Ma mangina na nanu mangina do i avisobe a lilon luma vuso.

<sup>4</sup> Moni a disaipel minei tasa, aisana e Iudas Iskariot, ei a bibi iodo mulimuli ei ni tau e Iesu na limane sou a butu, ei vei maido,

<sup>5</sup> “Vuna matina eitou ma masosove ete a nanu manginangina do me neitou guale a vatu savulu sobo tolu denarii,\* me neitou bilii e sou a kapelabena vanunua?”

<sup>6</sup> Moni Iudas i ma lilomuli ete sou a kapelabena vanunua, vuna ei a bibi na paaalina. Ei isa a pipigona mina itealena maloputu na vatu mine sou a abuna mine Iesu, me ei paaialia a vatu sou tautau lilo na maloputu do.

<sup>7</sup> Iesu ei vei maido, “Tavine de ni si ana. Ei singi a nanu manginangina de na malada eau mate me sou peilai e eau.

<sup>8</sup> Sou a kapelabena vanunua ne sou muina pilu e amutou taliuliu, moni e eau, eau na ma mapigogoi ete na muigu pilu e amutou taliuliu.”

<sup>9</sup> Sou a abuna buo ne Iuda sou muada, Iesu ei ino na aubu e Betani, me sou asu usino ne ei. Sou ma asu oto usinani mina niitene Iesu moni. Sou muada, lisa Iesu ei mailisiliu e Lasarus mina minate, me sou kale ne sou ite Lasarus tamai.

<sup>10</sup> Maido me sou a munugana prist sou maiademuli a inade mina valiputene Lasarus tamai.

<sup>11</sup> Vuna, papaina ne Iuda sou silimuli e Iesu a golu Iesu ei goli le Lasarus.

*Iesu ei gali ulilo ne Ierusalem tomane a mapana*

(*Mat 21:1-11; Mak 11:1-11; Luk 19:28-40*)

<sup>12</sup> Maisavulo, abuna vanunua ma tavivine taula sou asu so ugu ne Ierusalem mina niitena malada buo mina kinaka. Vanunua ma tavivine sou longe a inade maido, bisii moni Iesu ni sibitala ne Ierusalem.

<sup>13</sup> Maido me sou guale a lalana pam me sou pautiale ei na vea. Me sou tola maido, “Hosanna!† Salemo ei ni toekube a bibi ieli ei asu usinani mina aisane Bibi Taula. Ei a mapana mine Israel.”

<sup>14</sup> Me Iesu ei ite a donki tasa me ei ugu muata ne ei. Ei tomene a inade ino na Laulau mine Salemo,

<sup>15</sup> “Amutou a tavivine mine Saion, amutou ma laelae lou.

Mu ite, mapana mine amutou ei ugu na donki alaba me ei asuasusinani.”

<sup>16</sup> Palapala sou a disaipel mine sou so ma muada oto a masovana mina inade do. Moni na tauluna Salemo i bilii a aisa buosi ne Iesu, sou damutale a inade do ino na Laulau mine Salemo. Me sou muada, ei ade e Iesu bilesi, me sou damutale lei a golu sou a vanua sou goli le ei iedo.

<sup>17</sup> Ilala Lasarus ei matesi me ei ino na muina minate, a vanunua ma tavivine papaina sou ite Iesu ei tole Lasarus me ei mailisiliu e ei na minate. Seido sou a vanunua ma tavivine iedo, sou veimuade a inade mina golugolu Iesu ei goli iedo.

<sup>18</sup> Sou a vanunua ma tavivine sou longe a inade ve ei goli a gona sinaga do, me sou asu so poqe ei na vea.

<sup>19</sup> Sou e Parisi sou ite me sou maiademuli i balivua mine sou oto maido, “Oite. A golu eitou kale neitou goli iedo, ei ma mapigogoi ete ni palea. Sou a vanunua ma tavivine vuso so ogomuli e ei.”

*Grik sanii sou kale ne so ite Iesu*

<sup>20</sup> Balivua ne sou a abuna vanunua ma tavivine sou asu usinani ne Ierusalem mina kinakana ane Salemo na malada buo do, sou e Grik sanii tamai ino.

<sup>21</sup> De sou e Grik iedo sou asuale Pilip, ei a bibi maino ne Betsaida ne Galili. Me sou vei lei maido, “Bibi buo, amiteu kale namiteu ite Iesu.”

<sup>22</sup> Io Pilip asu me ei vei le Andru. Me Andru pilu e Pilip sulu asu me su vei le Iesu.

<sup>23</sup> Me Iesu ei adeliu a inade usino ne sou maido, “Ilala mine Natuna Bibi ei ni guale a aisa buo, seidei ei paleasi.

<sup>24</sup> Ivu sele eau vei le amutou, mane a vuana vit i ma pu utano oto na magamaga me ei ma mate oto, de ei tasa moni ei ni muina. Moni mane ei mate, ei ni vuale a vuana papaina.

<sup>25</sup> Mane a bibi tasa ei kale mamai a maulina minei oto, maulina minei ni buale. Moni mane a bibi tasa ei lametase a maulina minei na magamaga Ieli, de ei ni guale a maulina taliuliu taliuliu.

<sup>26</sup> Mane a bibi tasa ei goli a pipigona minau, ei ni ogomuli e eau. Me na aubu eau ugu i, bibi na pipigona minau tamai ei ni ugu pilu e eau. Mane a bibi ei goli a pipigona minau, Euma ni bilii e ei a aisa buo.”

*Ne sou beilange e Natuna Bibi*

\* **12:5** A vatu savulu sobo tolu denarii ieli a mapana pipigona mina bibi tasa na avala tasa. † **12:13** Malibuuna mina inade Hosanna i maido, Salemo, oo buloi e amiteu.



<sup>27</sup> Iesu ei vei lou maido, “Seidei a lilogu i mavaa me eau damutatata papai. Eau na vei a sava? ‘Ouma, no buloi e eau me no taulele a mavaana ieli ni palea le eau na ilala ieli?’ Moni vuna moni ieli eau asu usinani.

<sup>28</sup> Ouma, oo no beilange a aisamu.” De a baligolu tasa i vele muata na langi maido, “Eau goliosi a aisagu i palea buo, me eau na goli lei simaido.”

<sup>29</sup> Vanunua ma tavivine sou magili agavi, sou longe a inade iedo me sou vei maido, “Ausa i tupaulu.” Me sanii sou vei, “A bineanea tasa mine Salemo i adesi ane ei.”

<sup>30</sup> Iesu ei adeliu maido, “Tinola seidei amutou longe ie, ei ni ma buloi ete eau, ei mina buloine amutou.

<sup>31</sup> Seidei ei a ilala na vivilealena inigogona mine sou a vanunua ma tavivine mina magamaga. Salemo ei ni taulele a mapana mine sou a vanunua ma tavivine mina magamaga.

<sup>32</sup> Ilala sou beilange eau na magamaga, eau na lapuale sou a vanunua ma tavivine vuso usinani minau.”

<sup>33</sup> Iesu ei goli a inade iedo mina veipalena vea na minate minei.

<sup>34</sup> Io sou a vanunua ma tavivine sou adeliu ana maido, “Amiteu longe a inade na binea ne Salemo maido, ilala Krai ei ni palea, ei ni muina taliulu taliulu. De posa matina oo vei, ‘Ne sou beilange e Natuna Bibi?’ Natuna Bibi iedo ei e sei?”

<sup>35</sup> Me Iesu ei vei le sou maido, “Ilala bisii moni a muada ni muina sapa pilu e amutou. Seidei muada saboa nana, maido me namutou asu na muada, dae a tunuui ni avisobe amutou. Bibi ei asu na tunuui, ei ma muada oto i ei asuasusiva.

<sup>36</sup> Seidei a muada i saboa nana pilu e amutou, maido me namutou silimuli a muada me namutou palea natatuna muada.” Iesu ei pulosi a inade pilu e sou a vanunua ma tavivine, io ei ilisi me ei asu ovutase sou.

#### *Iuda papaina saboa sou silimuli e Iesu*

<sup>37</sup> Sou ite ei goli a matailala papaina, moni sou ma silimuli ete ei.

<sup>38</sup> Maido ma inade na profet e Aisaia ei palea patotona. Aisaia i vei maido, “Bibi Taula, sei silimuli a inade ne amiteu? Me a limane Bibi Taula palea usino ne sei?”<sup>‡</sup>

<sup>39</sup> Sou ma mapigogoi ete ne sou silimuli e Iesu, vuna Aisaia i niage a inade tasa lou. Ei vei maido,

<sup>40</sup> “Salemo ei goli a matane sou i mata ego, me ei goli a damutatatalana mine sou i sobo, dae a matane sou ni ite a golu tasa ma lilone sou ni muada a vuna inade,

me ne sou sauvule a lilone sou me ne sou veteliuale eau me eau na toekube lei e sou.”<sup>§</sup>

<sup>41</sup> Aisaia ei ite a aisa buo mine Iesu me ei goli a inade do ne Iesu moni.

<sup>42</sup> Ivu, munuganuga papaina tamai sou silimuli e Iesu, moni sou lae e sou e Parisi me sou ma adepalea oto a silimulina mine sou, vuna sou e Parisi sou magilisobe sou a kinakana sea pilu e sou a kinaka mine sou e Iuda.

<sup>43</sup> Sou kale mamai a inadena masalaina maino ne sou a vanunua ana inade masalaina maino ne Salemo.

#### *Inade mine Iesu ei ni vivilemuliale a inigogona mine sou a vanunua ma tavivine*

<sup>44</sup> Iesu ei tola maido, “Sei ei silimuli e eau, ei ma silimuli moni ete eau. Ei silimuli tamai e Euma i peltase eau usinani.

<sup>45</sup> Me sei ei ite eau, ei ite Euma ei peltase eau usinani.

<sup>46</sup> Eau asu usinani na magamaga ieli tomane a muada, mina vanunua vuso sou silimuli e eau ne sou ma ugu oto na tunuui.

<sup>47</sup> “Mane a bibi tasa ei longe a inadegu me ei ma ogomuli ete, moni eau na ma vivilemuliale ete ei. Eau ma asu oto usinani na vivilealena mavaana mina inigogona mina vanunua ma tavivine mina magamaga. Eau asu usinani mina gualeliune sou.

<sup>48</sup> Moni sei bibi i lametase eau me ei ma guale ete a inade minau, bibi na vilemulialena ei ni vilemuliale ei. Inade eau vei ie ni vavasa ane ei na punuluna malada.

<sup>49</sup> Eau ma goli ete a inade a damutatatalana minau oto. Euma ei peltase eau usinani, ei oto ei vei ane eau a inade vuso eau na ademuade i.

<sup>50</sup> Eau muada, inade mine Euma ei mapalele a maulina i kubaana taliulu taliulu. Maido me a inade vuso eau vei, ede Euma i vei ane eau na vei.”

## 13

#### *Iesu ei loloi a ubune sou a disaipel*

<sup>1</sup> Malada na Asuleletasena ei saboa palea, me Iesu ei muada a ilala i paleasi mine ei ni ilisitase a magamaga mei ni asu usino ne Tamana. Ei kale mamai sou a vanunua ma tavivine minei eili na magamaga, pea na punuluna maulina minei ei kale mamai lei simaido.

<sup>2</sup> Na lavilavi sele sou aaniani a muine sou. Satan ei tauosi a damutatatalana na lilone Iudas, ei e natune Saimon Iskarriot, ni tau e Iesu mina limane sou a butu.

<sup>3</sup> Iesu ei muada i maido, Tamana ei bilii e ei a golugolu vuso na limane ei. Ei muada

tamai maido, Salemo i peltase ei usinani, me ei ni veteliu lou usino ne Salemo.

<sup>4</sup> Maido me Iesu ei ilisi mei asutase a muina inani, mei kaitase a kinainai minei lagolago mei guale a malo tasa mina avutuna mei papale na aina.

<sup>5</sup> Me ei singi a nanu na taogo tasa, mei soke a loloina ubune sou a disaipel mei saveitagasa a malo ei papale na aine ei do.

<sup>6</sup> De ei asuale Saimon Pita. Me Pita i tagi e ei, "Bibi Taula, o kale no loloi a ubugu, io?"

<sup>7</sup> Me Iesu ei adeliu ane ei maido, "Golu eau goli, seidei o ma muada oto i. Moni mulimuli o no muada."

<sup>8</sup> Me Pita ei vei le ei, "O ma loloiloi lei a ubugu. Umana sele." Me Iesu ei adeliu maido, "Mane eau ma loloi ete oo, de o no ma ugu pilu oto e eau."

<sup>9</sup> Me Saimon Pita i vei lei, "Bibi Taula, mane maido, de o no ma loloiloi lei a ubugu moni, no loloi a limagu ma letegu tamai."

<sup>10</sup> Me Iesu ei vei lei, "Bibi ei avutuosi, ei ni ma avutuvutu asa. Ei ni loloi moni a ubuna, moni ei ni alaba vuso. Me amutou alabasi. Moni eau ma vei ete amutou vuso."

<sup>11</sup> Iesu ei muadasi i a bibi ei kale ni bilii e ei usino na limane sou a butu. Maidolo me ei vei, "Amutou vuso mu ma alaba oto."

<sup>12</sup> Tauluna loloina ubune sou, Iesu ei kai a kinainai lagolago minei mei ugu lou. Me ei tagi e sou maido, "Amutou muada a vuna golu eau goli le amutou ieli?"

<sup>13</sup> Amutou tole eau a bibi na matetengina ma Bibi Taula. Ei patotona simaido. Eau oto a bibi na matetengina me eau Bibi Taula mine amutou.

<sup>14</sup> Eau e Bibi Taula ma bibi na matetengina, eau loloi a ubune amutou. Io amutou tamai ne mu loloi a ubune sou sanii.

<sup>15</sup> Eau maite e amutou a inigogona simaido, me amutou tamai ne mu goli a inigogona tasa moni tomane eau maite e amutou.

<sup>16</sup> Ivu sele eau vei le amutou, bibi na pipigona ei ma vululusi ete a bibi buo minei. Ma bibi ei asu usino na pipigona tasa, ei ino ma muada oto ana bibi ei peltase ei usino.

<sup>17</sup> Seidei amutou muadasi a damutatalana ivu mina inigogona eau goli, me mane amutou ogomuli kube, namutou monge-monge.

<sup>18</sup> "Eau ma veivei ete amutou vuso. Eau muada e amutou a vanunua eau vilealesi minau. Moni eau muada a inade ino na Laulau mine Salemo ei ni palea bilesi. Inade do ei maido, 'Bibi ei ani a ulalu pilu e eau, ei beilange a ubuna me ei soetole e eau.\*"

<sup>19</sup> "Golu ieli saboa palea, moni seidei eau veiosi le amutou. Maidolo me mulimuli

malada ei palea, io ne amutou silimuli maido eau oto eau a bibi maido.

<sup>20</sup> Ivu sele eau vei ane amutou, sei bibi guale a bibi na pipigona eau peltase mei toekube ei, a bibi iedo ei guale eau mei toekube eau oto. Ma bibi ei guale eau, ei guale Salemo i peltase eau."

*Iudas ei ni bilii e Iesu usino na limane sou a butu*

(Mat 26:20-25; Mak 14:17-21; Luk 22:21-23)

<sup>21</sup> Iesu ei pulosi a inade ma lilona i mavaa mamau. Me ei veipale a inade maido, "Ivu sele eau vei ane amutou, tasa ne amutou ei ni bilii e eau usino na limane sou a vanunua so butuale eau."

<sup>22</sup> Me sou a disaipel tastasa sou gegemuliale sou. Sou ma muada oto, ei ade e sei.

<sup>23</sup> Me a disaipel tasa Iesu ei kale mamai sele do, ei vaitole Iesu.

<sup>24</sup> Maido me Saimon Pita ei une a letena mei vei lei, "O tagi e ei, ei vei e sei."

<sup>25</sup> Maido ma disaipel do ei tau a letena agavuale Iesu me ei tagi e ei maido, "Bibi Taula, o ade e sei?"

<sup>26</sup> Me Iesu ei adeliu maido, "Eau na guale a ulalu ieli mea na tau na bulu na gona inani mea na bilii a bibi tasa. Ei a bibi moni iodo eau ade e ei." Io ei tau a ulalu na bulu na gona inani mei bilii e Iudas, natune Saimon Iskariot.

<sup>27</sup> Iudas ei gualesi a ulalu, me Satan ei gali ulilo na lilone ei. Me Iesu ei vei ana maido, "Sava o kale no goli, o no goli asi."

<sup>28</sup> Vanunua vuso so ugu na poso na inani sou longe a inade Iesu ei bilii e Iudas iedo, moni sou ma muada oto a vuna inade do.

<sup>29</sup> Iudas ei itealale a maloputu na vatu, maido me sanii sou damu ve Iesu ei vei le ei ni asu oli a golugolu mina malada buo na kinaka, ue ei ni asu ni bilii a golugolu usino ne sou a kapelabe.

<sup>30</sup> Io Iudas ei gualesi a ulalu, ma tabaa oto ei gali usala. Ma aubu ei tunuuiosi.

*Iesu ei bilii e sou a disaipel a binea alaba*

<sup>31</sup> Iudas ei galiosi usala, io Iesu ei vei, "Seidei Natuna Bibi ei guale a aisa buo. Me Salemo ei guale a aisa buo lilo ne Natuna Bibi.

<sup>32</sup> Me na ilala Salemo ei guale a aisa buo e Natuna Bibi, Salemo oto ei ni bilii a aisa buo usino ne Natuna Bibi, ma tabaa oto ei ni bilii e ei a aisa buo.

<sup>33</sup> "Natatugu, eau na pilu e amutou na ilala boto moni. Me namutou tilomuli e eau. Eau veiosi le sou e Iuda, seidei eau goli a matana inade tasa moni usino ne amutou tamai, amutou ma mapigogoi ete namutou asu usino na aubu eau na asuale.

\* 13:18 Laulau na Inala 4:19

<sup>34</sup> “Seidei eau bilii e amutou a binea alaba maido, amutou tastasa namutou kale sele e sou usino. Eau kale mamai sele amutou, maido moni amutou tastasa namutou maikalo baoli tamai.

<sup>35</sup> Mane amutou tastasa mu kale sele sou ne amutou, io ieli ei ni maite e sou a vanunua maido, amutou a disaipel minau.”

*Iesu ei vei maido Pita ni lametase ei*  
(*Mat 26:31-35; Mak 14:27-31; Luk 22:31-34*)

<sup>36</sup> Io Saimon Pita ei tagi e Iesu maido, “Bibi Taula, o no asu usiva?” Me Iesu ei adeliu maido, “Aubu eau na asuale, ieli seidei o ma mapigogoi ete no ogomuli e eau. Moni mulimuli o no ogomuli e eau usinani.”

<sup>37</sup> Me Pita ei tagi e ei, “Bibi Taula, vuna matina eau na ma mapigogoi ete na ogomuli e oo seidei? Eau na mapigogoi na litase a maulina minau mina buloine oo.”

<sup>38</sup> Me Iesu ei adeliu maido, “O damu i o mapigogoi no litase a maulina minio mina buloine eau? Ivu sele eau vei lio, ilala kuleko i saboa tangi, o no vei matolu maido, o ma muada oto e eau.”

## 14

*Iesu ei a vea mine sou a vanunua ma tavivine usino ne Tamana*

<sup>1</sup> Iesu ei ade ane sou maido, “Amutou ma lilo mavaavaa lou. Amutou silimuli e Salemo me namutou silimuli tamai e eau.

<sup>2</sup> Na luma mine Euma a vilu i makuba ino, me eau na asu mina masusuluna muine amutou. Mane boa, eau na vei le amutou.

<sup>3</sup> Me mane eau asu me eau masusulu a muine amutou, eau na veteliu me eau na guale amutou ne amutou pilu e eau. Ma aubu eau ugu i, amutou tamai namutou ugu i pilu e eau.

<sup>4</sup> Me amutou muada a vea usino na aubu eau kale na asuale do.”

<sup>5</sup> Tomas i vei le ei, “Bibi Taula, amiteu ma muada oto i a avena oo no asuale, me namiteu muada a vea matina?”

<sup>6</sup> Me Iesu ei vei lei maido, “Eau oto eau a vea, me eau a vuna inadi e patotona, me eau a vuna maulina. Bibi tasa ei ni ma asu oto usino ne Euma na vea tasa sea. Boa. Ne eau moni.

<sup>7</sup> Mane amutou muadasi eau, ne amutou muada tamai e Euma. Seidei amutou sokesi i a muadana e ei. Me amutou itesi e ei.”

<sup>8</sup> Pilip ei vei le Iesu maido, “Bibi Taula, o maite amiteu e Tamamu, me ieli ni mapalipali a masagana ma damutatalana mine amiteu.”

<sup>9</sup> Me Iesu ei vei le ei, “Pilip, tabaa selesi eau ugu pilu e amutou, me oo saboa muada e eau? Bibi ei ite eau, ei ite Euma. Posa

matina o vei, ‘Maite amiteu e Tamane amiteu?’

<sup>10</sup> O ma silimuli ete eau eau ino lilo ne Euma, me Euma ei eili minau? Inade eau bilii e amutou, ede eau ma goli ete a damutatalana minau oto. Euma ei eili minau, ei gologoli a pipigona vuso minei.

<sup>11</sup> Amutou namutou silimuli a inadi e. Eau ino lilone Euma, me Euma eili minau. Mane boa, de namutou silimuli a pipigona vuso eau goli.

<sup>12</sup> Patotona sele eau vei ane amutou, sei bibi ei silimuli e eau, ei tamai ni goli a matamatana pipigona eau goli. Me ei ni goli a pipigona buo vuso i seleuli a pipigona eau goli, vuna maido eau na asu usino ne Euma.

<sup>13</sup> Golugolu vuso amutou kaka a aisagu, ede eau na goli. Maido me Euma ni guale a aisa buo lilo ne Natune ei.

<sup>14</sup> Golugolu vuso amutou kaka i na aisagu, ede eau na goli.”

*Iesu ei vei ei ni peltase a Maolona Nunu usinani*

<sup>15</sup> “Mane amutou kale sele e eau, io ne amutou ogomuli iiti a binea vuso minau.

<sup>16</sup> Me eau na kake Euma, me ei ni bilii e amutou a Buloina tasa sea mina toesagaline amutou. Me ei ni pilu e amutou taliulu taliulu.

<sup>17</sup> Ma Buloina do ei a Nunu patotona. Sou a vanunua ma tavivine mina magamaga sou ma mapigogoi ete ne sou guale ei, vuna sou ma ite ete ei me sou ma muada oto e ei. Moni e amutou muada e ei, vuna ei nana pilu e amutou mei ni muina ne amutou.

<sup>18</sup> Eau na ma asutase ete amutou, tomane a niutu. Eau na asu usinani mine amutou.

<sup>19</sup> Bisii moni a vanunua ma tavivine na magamaga ne sou ma ite lei ete eau. Moni amutou ne mu ite eau, vuna eau na mauli, me amutou tamai namutou mauli.

<sup>20</sup> Na malada dolo namutou muada i, eau ino ne Euma, me amutou eili minau, me eau ino ne amutou.

<sup>21</sup> Sei bibi ei guale a binea minau mei ogomuli iiti ei kale sele eau. Ma sei bibi ei kale eau, Euma tamai ni kale ei. Me eau tamai ea na kale ei, me eau na maite e ei e eau oto.”

<sup>22</sup> Iudas tasa sea, ei e Iskariot boa, ei tagi e Iesu maido, “Bibi Taula, posa matina o no maite amiteu e oo oto, moni o no ma maite ete e oo oto usino ne sou a vanunua ma tavivine mina magamaga?”

<sup>23</sup> Me Iesu ei adeliu ane ei maido, “Mane a bibi tasa ei kale sele eau, ei ni ogomuli iiti a inadi minau. Me Euma ei ni kale a bibi iedo. Me ne amilu asu usino ne ei me nami ugu pilu e ei taliulu taliulu.

<sup>24</sup> Bibi ei ma kale ete eau, ei ni ma ogomulimuli kube ete a inadi minau. A inadi

amutou longe do, iede a inade minau oto boa. Iede a inade mine Euma i peltase eau usinani.

<sup>25</sup> “Malada eau saboa ino pilu e amutou, eau vei ane amutou a golugolu vuso ie.

<sup>26</sup> Moni a Buloina ei a Maolona Nunu, Euma ei ni peltase usinani na aisagu, ei ni matetengi e amutou a golugolu vuso mei ni mailisi a damutatalana mine amutou, me ne amutou damutaleliu a inade vuso eau biliili e amutou.

<sup>27</sup> Eau na bilii e amutou a lilomeana ei ni pilu e amutou. Lilomeana eau bilii e amutou, iede minau. Ma lilomeana eau bilii e amutou, ei ma tomane ete sou a vanunua ma tavivine mina magamaga so biliili e amutou. Maido me amutou ma lilo mavaavaa lou ma damutatala papaipai lou, me amutou ma laelae lou.

<sup>28</sup> “Amutou longesi a inade eau bilii e amutou maido, ‘Eau na ilisitase amutou me asu. Me eau na veteliu usinani ne amutou.’ Mane amutou kale sele eau, io amutou ni mongemonge a inade maido eau na asu usino ne Euma, vuna Euma ei buo lou ane eau.

<sup>29</sup> Seidei eau vei le amutou a golu ei saboa palea, maidolo mulimuli, mane a malada ei palea, ne amutou silimuli.

<sup>30</sup> “Eau na ma goli ete a inadenade papaina pilu e amutou, vuna a mapana ei itealale a magamaga ieli, ei ni asu usinani. Ei ma isa oto a sagagalina mina gunolina golu tasa usinani minau,

<sup>31</sup> moni eau kale a vanunua ma tavivine mina magamaga ne sou muada, eau kale sele Euma, me eau goli a golugolu vuso e Euma ei vei le eau na goli. De amutou ilisi, neitou asu.”

## 15

*Iesu ei a obu a vain ivu*

<sup>1</sup> “Eau a obu a vain ivu. Me Euma ei a tamana mauma na vain.

<sup>2</sup> Euma i taulele a lalalana vain vuso i ma vuavua oto. Ma lalalana i vua, ede Euma i lotetatase sou ne sou vua makuba.

<sup>3</sup> Amutou palea alabasi a inade eau vei ane amutou ie.

<sup>4</sup> Amutou ne mu muina lilo ne eau, me eau na muina lilo ne amutou. Mane a lalana obu a vain i ma valitole ete a obuna, io ei ni mapigogoi ete ni vua. Tomane moni, mane amutou ma muina lilo oto ne eau, amutou tamai ma mapigogoi ete namutou vua.

<sup>5</sup> “Eau a obu a vain, me amutou a lalana obu a vain. Sei bibi ei muina lilo ne eau me eau muina lilo ne ei, ei ni mapale a vuavuaana makuba. Mane amutou iavetase eau, amutou ma mapigogoi ete namutou goli a golu tasa.

<sup>6</sup> Mane a bibi tasa i ma muina lilo oto ne eau, io ne sou pitaselele ei tomana obu ei magolu. Matana lalana obu odo so taupilipili mina pitasena usino na oavi.

<sup>7</sup> Mane amutou muina lilo ne eau, ma inadegu ei muina lilo ne amutou, io ne amutou tagu a sei golu, me ei ni bilii e amutou tomane amutou tagu i.

<sup>8</sup> Mane amutou mapale a vuavuaana makuba, Euma ni guale a aisa buo, me ne amutou palea a disaipel minau.

<sup>9</sup> “Tomane Euma ei kale mamaimai eau, me eau kale mamai e amutou tamai. Maido me taliiliu ne amutou muina lilo na masagana minau odo.

<sup>10</sup> Mane amutou ogomuli kube a binea minau, ne amutou muina na masagana minau, tomane eau ogomuli kube a binea mine Euma, me eau muigu na masagana minei.

<sup>11</sup> Eau veiosi ane amutou maido, munongena minau ni muina ne amutou, me na munongena ieli ei ni vonu sele na lilone amutou.

<sup>12</sup> Binea minau ei maido, mu kale tamaimu tomane eau kale amutou.

<sup>13</sup> Mane a bibi tasa ei kale sele e tamaina mei iabitase sele a maulina minei ane ei, io a kinale ieli vululusi sele sou a inigogona mina kinale sanii.

<sup>14</sup> Mane amutou ogomuli a inade eau vei, io ne amutou palea tamtamaigu.

<sup>15</sup> Eau na ma tole ete amutou a bibi na pipigona lou. Vuna bibi na pipigona ei ma muada oto a golugolu bibi buo minei i goli. Moni eau tole amutou e tamtamaigu. Vuna inadenade vuso eau longe maino ne Euma eau veiosi ane amutou.

<sup>16</sup> Amutou ma vileale ete eau. Eau vileale amutou. Me eau bilii e amutou a pipigona, ne amutou asu me mu mapale a vuavuaana makuba me a vuavuaana ieli ni muina tabaa. Maido me mane amutou kake Euma a sei golu amutou kale na aisagu, ei ni bilii e amutou.

<sup>17</sup> Teli a binea minau, amutou namutou maikalo baoli.

*Vanunua mina magamaga ne sou butuale a disaipel*

<sup>18</sup> “Mane a vanunua ma tavivine mina magamaga sou butuale amutou, de namutou muada i maido palapala sou butuale eau.

<sup>19</sup> Mane amutou maino ne sou a vanunua mina magamaga, de sou a vanunua ma tavivine mina magamaga ne sou kale amutou tomane a abuna mine sou oto. Moni amutou a vanunua mainani mina magamaga ieli boa. Eau vilealesi amutou maino na magamaga ieli. Maido me sou a

vanunua ma tavivine mina magamaga sou butualale amutou.

<sup>20</sup> Namutou damutaleliu kube a inade eau vei ane amutou. Bibi na pipigona ei ma vululusi ete a bibi buo minei. Mane sou toegegei eau, ne sou toegegei amutou tamai. Mane sou ogomuli a inadegu, ne sou ogomuli tamai a inadene amutou.

<sup>21</sup> Me ne sou goli a inigogona mamau odo usino ne amutou, vuna sou muada i maido amutou a abuna minau me sou ma muada oto e Euma i peltase eau usinani.

<sup>22</sup> Mane eau ma asu oto usinani me eau ma bilii ete sou a inade, ne sou ma isa oto a sinusu mine sou. Moni seidei sou ma isa oto a vea mina tauoovina sinusu mine sou.

<sup>23</sup> Bibi ei butuale eau, ei butuale Euma tamai.

<sup>24</sup> Mane eau ma goli ete a pipigona buo iedo a bibi tasa sea i saboa goli lisa balivua ne sou, lo ne sou ma isa oto a sinusu. Moni sou itesi a pipigona minau odo, me sou butuale eau pilu e Euma.

<sup>25</sup> Inigogona sou goli ieli, ei palea mina mapalipalina inade tasa ino na binea mine sou. Inade iedo ei maido, 'Vanunua sou butuale sabubi e eau.'

<sup>26</sup> "Nununa Buloina, ei maino ne Euma, me eau na peltase ei usino ne amutou. Ei a Nunu patotona, me na ilala ei asu usinani, ei ni veipale a pipigona ma inigogona minau.

<sup>27</sup> Me amutou tamai namutou veipale a inade, vuna amutou ino pilu e eau na ilala eau soke a pipigona mapigogoi seidei.

## 16

<sup>1</sup> "Eau veiosi le amutou a inade li, vuna eau ma kale ete a silimulina mine amutou ni buale.

<sup>2</sup> Ne sou taulele amutou na viepiluna kinaka mine sou e Iuda. A matailala ei agaviosi ne sou valiputemate amutou me ne sou damu ve sou goli a inigogona doana usino ne Salemo.

<sup>3</sup> Sou ne sou goli a inigogona ieli, vuna sou ma muada oto e Euma me eau.

<sup>4</sup> Moni seidei eau veiosi ane amutou, mane a matailala ei ni palea ne amutou damutaleliu a inade eau veipale ane amutou. Lisa eau oto eau pilu e amutou, maido me eau ma vei ete ane amutou a golugolu sou ie.

*Iesu ei ade a pipigona mina Maolona Nunu*

<sup>5</sup> "Moni seidei eau na asu usino ne Euma, ei peltase eau usinani. Ma bibi tasa ne amutou i ma tagi ete e eau, 'Oo asu usiva?'

<sup>6</sup> Eau vei le amutou a inade li, maido ma lilone amutou i mavaa sele.

<sup>7</sup> Moni eau vei ivu ane amutou ieli mina buloine amutou, eau na ilisitase amutou me eau na asu. Mane eau ma asutase ete e amutou, Nununa Buloina ei ni ma mapigogoi ete ni sibitala le amutou. Moni mane eau asu, de eau na peltase ei usinani ne amutou.

<sup>8</sup> Ei ni asu usinani me ei ni toe a vanunua ma tavivine mina magamaga ne sou iteilale sele a sinusu, ma inigogona bilesi, ma vavasana mine Salemo.

<sup>9</sup> Sou ma silimuli ete eau, iede a sinusu mine sou.

<sup>10</sup> Inigogona i bilesi ei palea muada, vuna eau na asu usino ne Euma, ne amutou ma ite lei ete eau.

<sup>11</sup> Vavasana mine Salemo ei ni palea, vuna Salemo ei vavasasi a mapana ei itealale a magamaga li.

<sup>12</sup> "Eau isa a inade makuba lou eau kale na vei ane amutou, moni amutou ma mapigogoi ete ne amutou guale seidei.

<sup>13</sup> Moni ilala Nunu mina inade ivu ei sibitala usinani, ei ni maasi e amutou usino na inade vuso ivu. Ei ni ma goli ete a inade na damutatalana minei oto. Inade ei longe, ede moni ei ni veimuade i. Me ei ni vei ane amutou a golugolu ni sibitala mulimuli.

<sup>14</sup> Ei ni bilii e eau a aisa buo, vuna ei ni guale a inadegu mei ni veimuade le amutou.

<sup>15</sup> Golugolu vuso mine Euma ei minau. Maido me eau vei, ei ni guale a inadegu mei ni veimuade le amutou.

*Munonge ei ni puisobe a muina lilo-mavaana*

<sup>16</sup> "Bisii moni namutou ma ite ete e eau. Ma tabaa oto lou namutou ite eau."

<sup>17</sup> Sanii mine sou a disaipel sou maitagu liu balivua mine sou oto maido, "Inade ei lange le eitou ieli, a vuna i matina? Ei vei ve, 'Bisii moni ne amutou ma ite ete eau. Ei ni ma tabaa oto lou namutou ite eau.' Me ei vei tamai, 'Vuna, eau na asu usino ne Euma.' "

<sup>18</sup> Me sou vei, " 'Ma tabaa oto' a vuna inade ieli i matina? Eitou ma muada oto a vuna inade ei vei ie."

<sup>19</sup> Iesu ei muada i maido sou kale ne sou tagi e ei, maido me ei vei ane sou, "Nane amutou tagu maisabasaba a vuna inade eau vei iedo? 'Bisii moni ne amutou ma ite ete eau. Me mulimuli sapa lou namutou ite lei e eau.'

<sup>20</sup> Ivu sele eau vei ane amutou, namutou tangi mamau me mu tangi dododo sele. Moni sou a vanunua ma tavivine mina magamaga ne sou mongemonge. A lilone amutou ni mavaa. Moni a lilo-mavaana mine amutou ni palea munongena.

<sup>21</sup> Tavine ei kale ni vasusu, ei muada a ilala mina vasusuna i paleasi. Maido me ei lilibuu. Moni mane ei vasusu, ei ni

ma damutale etesi a davutina do, vuna ei mongemonge sele e natuna ei paleasi na magamaga.

<sup>22</sup> Tomane moni, seidei amutou lilobuu. Moni eau na ite lei e amutou, ma lilone amutou ni mongemonge. Ma bibi tasa i ma mapigogoi ete ni taulele a munonge mine amutou odo.

<sup>23</sup> Me mina malada iedo namutou ma tagi ete eau a golu tasa. Eau vei ivu ane amutou, mane amutou tagi e Euma a golu tasa na aisagu, io ei ni bilii e amutou.

<sup>24</sup> Lisa amutou ma tagu oto a golu tasa na aisagu. Ne amutou tagu, me namutou guale, ma munonge ni vonu sele na lilone amutou.

*Iesu ei vululusiosi a sagagalina mina magamaga*

<sup>25</sup> "Eau veiosi le amutou a inade sou ieli a adetinovona. Mulimuli eau na ma goli ete a adetinovona lou usino ne amutou. Eau na veimuada ane amutou e Euma.

<sup>26</sup> Na ilala iedo namutou kaka na aisagu. Me eau ma vei ete ve eau oto na kaka ane Euma ni buloi e amutou.

<sup>27</sup> Euma ei oto ei kale amutou, vuna amutou kale eau, me amutou silimuliosi e eau eau asu usinani maino ne Salemo.

<sup>28</sup> Lisa eau asu usinani na magamaga maino ne Salemo. Seidei eau kale na ilisitate a magamaga me eau na asu usino ne Euma."

<sup>29</sup> A disaipel minei sou vei maido, "Oite, seidei oo ademuada, me oo ma goli ete a adetinovona.

<sup>30</sup> Seidei amiteu muada oo muadasi a golugolu vuso me oo ma isa oto a tinagu tasa maino na vanunua. Maido me amiteu silimuli oo asu usinani maino ne Salemo."

<sup>31</sup> Iesu ei adeliu usino ne sou maido, "Seidei amutou silimuli, io?"

<sup>32</sup> Ilala ei agaviosi mei sibitalasi ne amutou vuso mu oava maisaba usino na aubu mine amutou. Me eau na miugu vululu moni. Moni eau na ma miugu vululu oto moni, vuna Euma eili pilu e eau.

<sup>33</sup> "Eau kale ne amutou lilomea moni lilo ne eau, maido me eau vei ane amutou a inade ieli. Na malada amutou eili na magamaga li, a mavaana vuso ni palea le amutou, moni amutou sagali. Eau vululusiosi a sagagalina mina magamaga ie."

## 17

*Iesu ei kaka mina buloine sou a disaipel*

<sup>1</sup> Iesu ei ademuadasi i ane sou a disaipel, mei gemu uata na langi, mei vei maido,

"Ouma, ilala i paleasi. Seidei o no bilii e Natumu a aisa buo, maido me Natumu ni bilii e oo a aisa buo.

<sup>2</sup> Oo biliiosi ei a sagagalina ne ei ni palea a bibi buo mine sou a vanunua ma tavivine vuso, me ei ni iabi a maulina kubaana taliuliu taliuliu usino na vanunua o bilii e ei.

<sup>3</sup> Ma maulina kubaana taliuliu taliuliu ei maido, sou muada e oo, oo moni e Salemo ivu, me sou muada e Iesu Krai oo peltase usinani.

<sup>4</sup> Eau maitesi a aisa buo minio usino ne sou a vanunua ma tavivine mina magamaga. Eau mapalipali vusesi a pipigona o bilii e eau na goli iedo.

<sup>5</sup> Ouma, ilala a magamaga i saboa palea, eau ino pilu e oo me eau isa a aisa buo. Me seidei eau kale no bilii e eau lou a aisa buo do.

<sup>6</sup> Eau ademuadasi a aisamu usino ne sou a vanunua oo bilii e eau nani na magamaga. Sou a vanunua minio, me oo biliiosi e sou usinani minau. Me sou ogomuli iiti a inade ne oo.

<sup>7</sup> Seidei sou muada i, a golugolu vuso o biliiosi eau, iede maino minio.

<sup>8</sup> Inade vuso oo bilii e eau, eau biliiosi e sou. Me sou guale, me sou muada iiti sele i maido, lisa eau pilu e oo me eau asu usinani. Me sou silimuli maido, oo peltase eau usinani.

<sup>9</sup> Eau kaka mina buloine sou. Eau ma kaka oto mina buloine sou a vanunua ma tavivine mina magamaga. Eau kaka mina buloine sou a vanunua o bilii e eau odo, vuna sou minio.

<sup>10</sup> Sou a vanunua ma tavivine minau, iodo sou minio tamai. Me sou a vanunua ma tavivine minio, iodo sou minau tamai. Sou beilange a aisagu i buo.

<sup>11</sup> Eau ma mapigogoi ete na ugu lou nani na magamaga, moni e sou ne so ugu na magamaga. Seidei eau asu usino minio. Me Ouma, oo maolo, oo no iteale sou na sagagalina mina aisamu, ei a aisa o bilii e eau. Maido me ne sou tasa moni, tomane eitu tasa moni.

<sup>12</sup> Ilala eau pilu e sou, eau iteale sou na sagagalina mina aisamu, a aisa do oo bilii e eau. Eau iteale kube sou, me tasa mine sou i ma buale oto. Bibi na bualena, ei vululu moni ei buale, maidolo me a inade lilo na laulau minio ei palea selesi.

<sup>13</sup> Seidei eau asu usino minio. Me eau vei a inade vuso li na malada eau saboa ino na magamaga ie, mina munonge minau ni vonu sele na lilone sou.

<sup>14</sup> Inade minio, eau biliiosi e sou. Me sou a vanunua ma tavivine mina magamaga ieli sou butuale sou, vuna sou a vanunua ma tavivine minau sou mina magamaga ieli boa, tomane eau tamai ea mina magamaga li boa.

<sup>15</sup> Eau ma kake ete oo no gualelele sou maino na magamaga ie. Eau kake oo no

iteale sou, dae a bibi pagu ni toegegeli e sou.

<sup>16</sup> Sou mina magamaga ieli boa, tomane eau oto eau mina magamaga ieli boa.

<sup>17</sup> Toemaole sou minio a inade patotona, a inade minio ei patotona.

<sup>18</sup> Eau peltase sou usino na magamaga tomane lisa oo peltase eau usinani mina magamaga.

<sup>19</sup> Eau toemaole eau oto ane sou, me ne sou palea maolo ivu tamai.

<sup>20</sup> Eau ma kaka oto mina buloine sou a vanunua iede moni. Boa. Eau kaka tamai mina buloine sou a vanunua ma tavivine ne sou longe a inade ne sou me sou silimuli e eau.

<sup>21</sup> Eau kale ve a lilone sou ni tasa moni, tomane oo Euma, oo eili minau me eau lilo ne oo. Tomane moni eau kale ne sou eili lilo ne eita, ma vanunua ma tavivine mina magamaga ne sou silimuli maido, oo peltase eau usinani.

<sup>22</sup> Oo bilii e eau a aisa buo ma sagagalina, me iede eau bilii e sou ve ne sou lilo tasa moni, tomane moni a lilo ne eita i tasa moni.

<sup>23</sup> Eau ino lilo ne sou, me oo eili minau, me mina inigogona ieli eau kale a lilone sou ni palea tasa moni. Maido ma vanunua ma tavivine mina magamaga ne sou muada i, oo peltase eau usinani, me oo no kale sou tomane oo kale eau.

<sup>24</sup> Ouma, eau kale sou a vanunua ma tavivine oo bilii e eau iedo ne sou ugu pilu e eau mina aubu eau ugu i. Eau kale ne sou ite a muada buo ma aisa buo minau. Ilala magamaga i saboa palea, oo kale eau mo bilii e eau a aisa buo ieli.

<sup>25</sup> Ouma, oo bilesi, sou a vanunua ma tavivine mina magamaga ieli sou ma muada oto e oo. Moni eau muada e oo. Me sou a abuna minau ieli, sou tamai muada, oo peltase eau usinani.

<sup>26</sup> Eau mapale a aisamu usino ne sou, me eau na mapalesui lei, ne sou goli a inigogona kinale usino ne sou a vanunua, tomane oo kalekale eau me eau tamai ea na muigu pilu e sou."

## 18

*Iudas ei bilii e Iesu usino na limane sou a butu*

(*Mat 26:47-56; Mak 14:43-50; Luk 22:47-53*)

<sup>1</sup> Iesu ei kaka pulu, me ei pilu e sou a disaipel minei so asu sou tuluuti a nanu e Kidron. Mina lili na nanu a mauma tasa ino, me sou asu ulilo na mauma.

<sup>2</sup> Iudas, a bibi ei ni bilii e Iesu usino na limane sou a butu, ei tamai muada a mauma iedo, vuna malada papaina Iesu ei viepili pilu e sou a disaipel na mauma iedo.

<sup>3</sup> Maido me Iudas ei asu usino na mauma pilu a abuna vanunua na maubina me sou a papai mine sou a munugana prist me mine sou e Parisi. Me sou lapitole a sulu ma laulau na pam magolu ma golugolu mina maubina.

<sup>4</sup> Iesu ei muada a golugolu vuso ni palea le ei. Maido me ei asu agavuale e sou a abuna do mei tagi e sou maido, "Amutou tilomulimuli e sei?"

<sup>5</sup> Sou adeliu ane ei maido, "Iesu maino ne Nasaret." Me Iesu ei vei ane sou, "Eau moni sie." Me Iudas, ei a bibi ei ni bilii e Iesu usino ne sou, ei magili pilu e sou.

<sup>6</sup> Sou longe Iesu ei vei, "Eau moni sie," me sou a vanunua do sou suduliliu umuli me sou bosa utano na magamaga.

<sup>7</sup> Me Iesu ei tagi lei e sou, "Amutou tilomulimuli e sei?" Me sou vei, "Iesu maino ne Nasaret."

<sup>8</sup> Me Iesu ei adeliu ane sou maido, "Eau veiosi le amutou, eau moni sie. Mane amutou tilotilo e eau, mu itetase sou a vanunua ieli ne sou asu."

<sup>9</sup> Na inigogona iedo ei toesele a inade ei goli lisa do, "Tasa mine sou a vanunua o bilii e eau odo ni ma buale oto."

<sup>10</sup> Saimon Pita i polo a viso, me ei lapuale mei uti a bibi na pipigona mina mapana prist, ma viso do ei valiuti a tulina ne gata, ma tulina ei pu utano. Bibi na pipigona do aisana e Malkus.

<sup>11</sup> Me Iesu ei vei ane Pita, "Tau liu a viso na muina. Vuna matina oo damu ve eau na ma ini ete a taogo Euma ei bilii e eau odo?"

*Sou maasi e Iesu usino ne Anas*

<sup>12</sup> De sou a abuna vanunua na maubina me a bibi ei muge sou, me sou a papai mine sou e Iuda, sou lapitole e Iesu me sou papale ei.

<sup>13</sup> Me sou maasi pale ei usino ne Anas. Anas ei e nenoane Kaiapas, me Kaiapas ei a mapana prist mina avala do

<sup>14</sup> Me ei a bibi iedo ei vei ane sou e Iuda maido, "Ei kubaana mane a bibi tasa ni puisobe a muine sou a vanunua ma tavivine me ei ni mate."

*Pita ei vei, ei ma muada oto e Iesu*

(*Mat 26:69-70; Mak 14:66-68; Luk 22:55-57*)

<sup>15</sup> Saimon Pita pilu a disaipel tasa, su ogomulimuli e Iesu. A mapana prist ei muada a disaipel do, maido me ei ogomuli e Iesu ulilo na avena bigomu na luma mina mapana prist.

<sup>16</sup> Moni e Pita ei magili a muina sala agavuale a tema. Maido me a disaipel tasa do a mapana prist i muada i, ei asu vei ana tavine ei itealale a tema, me ei maasi e Pita ulilo.

<sup>17</sup> Tavine ei iteale a tema do ei tagi e Pita maido, "Oo tamai o a disaipel tasa mina bibi ie?" Me Pita vei, "Boa. Eau ma disaipel minei oto."

<sup>18</sup> Sou a vanua na pipigona me sou a papai sou tomi a oavi. Paga i maigi, me sou magili sailli a oavi me sou amimilu. Me Pita tamai ei magili pilu e sou me ei amimilumilu.

*A mapana prist ei vavasa ane Iesu*  
(Mat 26:59-66; Mak 14:55-64; Luk 22:66-71)

<sup>19</sup> Na ilala do a mapana prist ei tagi e Iesu e sou a disaipel minei, me mina matetengina ei bilii e sou.

<sup>20</sup> Me Iesu ei adeliu ane ei maido, "Eau veimuade a inade usino na vanunua ma tavivine na avena vuso sou e Iuda sou viepilupulu i. Taliulu eau matetengitengi e sou a vanunua ma tavivine lilo mina luma na kinaka mine sou e Iuda ue lilo na luma mine Salemo. Eau ma goli ete a inade tasa na avena i ovu.

<sup>21</sup> Me matina, oo tagi e eau ili? O no tagi e sou a vanunua sou longe a inade iede. Sou muada a inade eau vei."

<sup>22</sup> Iesu ei ade maido, ma papai tasa ino i magiligili, ei sapegalegale e Iesu me ei vei, "Vuna matina oo sie a inade mina mapana prist na matana inigogona iede?"

<sup>23</sup> Me Iesu ei sie a inadena maido, "Mane eau goli a inade pagu, de o no ademuada a inade eau goli edo. Moni mane eau goli a inade patotona, io vuna matina o ubi e eau?"

<sup>24</sup> De Anas ei peltase Iesu usino ne Kaiapas ei a mapana prist. Me sou ma lubelele ete a mota sou papale ei iedo.

*Pita ei ade lou, ei ma muada oto e Iesu*  
(Mat 26:71-75; Mak 14:69-72; Luk 22:58-62)

<sup>25</sup> Saimon Pita ei magili a muina me ei mavovoe a vovona. Me sou tagi e ei maido, "Oo tamai o a disaipel minei, io?" Mei vei, "Boa. Eau ma disaipel minei oto."

<sup>26</sup> Moni a bibi na pipigona mina mapana prist, ei a mautune bibi Pita ei uti a tuline ei iodo, ei vei, "Eau ite o pilu e ei ino na mauma, io?"

<sup>27</sup> Me Pita ei ade lou, "Boa." Me na matailala bilesi iodo, a kuleko i tangi.

*Sou maasi e Iesu usino ne Pailat*  
(Mat 27:1-2, 11-14; Mak 15:1-5; Luk 23:1-5)

<sup>28</sup> De sou e Iuda sou guale Iesu me sou ilisitase a luma mine Kaiapas me sou maasi ei usino na luma mina bibi na itealalena avena do. Ei autupola siisii sele. Me sou oto so ma gali ulilo oto na luma mina bibi na itealalena, vuna sou kale ne sou ma palea mumugu oto na matane Salemo na ilala sou

ani a gona inani mina Malada na Asuleletasena, maido me sou oto so ma gali oto ulilo na luma na bibi ei iteale a avena.

<sup>29</sup> Me Pailat ei asuale sou usala mei tagi e sou maido, "Vuna matina amutou vavasa ane bibi ieli?"

<sup>30</sup> Me sou sie a inadena maido, "Mane ei ma bibi na gunolina inigogona pagu oto, amiteu ma mapigogoi ete namiteu maasi ei usinani minio."

<sup>31</sup> Me Pailat i vei ane sou maido, "Amutou guale ei usino me amutou vavasa ane ei na binea mine amutou oto." Me sou e Iuda so adeliu ana maido, "Amiteu ma mapigogoi ete namiteu valipute a bibi tasa."

<sup>32</sup> Lisa Iesu ei ade a inigogona ei ni mate i, ma golu iedo i palea mina toeseselena inade minei.

<sup>33</sup> Seido Pailat ei gali lou ulilo na luma mina bibi na itealalena avena. Me ei tole Iesu usinani minei, me ei tagi e ei maido, "Oo a mapana mine sou e Iuda, io?"

<sup>34</sup> Me Iesu adeliu maido, "Oo oto o damutale mo goli a inade iede, ue sou sanii so vei le oo e eau?"

<sup>35</sup> Me Pailat ei adeliu maido, "Eau a bibi tasa ne Iuda, io? Sou a abuna minio oto pilu e sou a munugana prist sou maasi e oo usinani minau. Oo goli a sava?"

<sup>36</sup> Iesu ei adeliu maido, "Niitealalena minau ei mina magamaga ieli boa. Mane a avena minau ei mina magamaga ieli, io a vanunua na pipigona minau ne sou maubi, ma bibi tasa boa i mapigogoi ni tau eau na limane sou e Iuda. Moni a avena minau ei mina magamaga ieli boa."

<sup>37</sup> Me Pailat i tagi e ei, "Maido me patotona oo a mapana tasa, io?" Me Iesu ei adeliu maido, "O vei ve eau a mapana. Eau alaposa me eau asu usinani na magamaga mina gunolina pipigona tasa moni, ei mina veimuadena inade i patotona. Me sei sou so ogomuli a inade patotona, ne sou longemuli a inadegu."

<sup>38</sup> Me Pailat tagi e ei, "Inade i patotona a sava?" Pailat ei adesi me ei gali lou usala ne sou e Iuda. Me ei vei le sou maido, "Eau ma poge ete a sinusu tasa na bibi ie."

*Pailat i vei, ne sou gati e Iesu na tauvaleuti*

(Mat 27:15-31; Mak 15:6-20; Luk 23:13-25)

<sup>39</sup> Pailat ei vei lou maido, "Moni a inigogona tasa ino, i mapigogoi eau na litase le amutou a bibi tasa na luma na tunuui na Malada na Asuleletasena. Maido me amutou kale eau na litaselele a mapana mine sou e Iuda ieli usino ne amutou?"

<sup>40</sup> Me sou tola lou maido, "Umana. Ei umana. Bilii e amiteu e Barabas." Barabas ei a bibi tasa mina maubina ma lilimana.



## 19

<sup>1</sup> De Pailat ei guale Iesu me sou tibi e ei.

<sup>2</sup> Me sou a vanunua na maubina sou guale a tuaga me sou goli tomane a kele mina mapana, me sou tau na letena. Me sou makai e ei a gona kinainai kasososo.

<sup>3</sup> Me sou asu agavuale ei me sou vei, "Oaso, mapana mine sou e Iuda!" Me sou sapegalegale ei.

<sup>4</sup> Me Pailat i gali lou usala me ei vei le sou a vanunua ma tavivine maido, "Amutou mu ite, eau na maasi e ei usala ne amutou, ne amutou muada, eau ma poqe ete a sinusu tasa ino ne ei."

<sup>5</sup> Io Iesu ei asu usala. A kele sou goli a tuaga, ei ino na letena. Me ei kai a kinainai kasososo tamai. Me Pailat ei vei le sou, "Mu ite. Bibi na ie."

<sup>6</sup> Maido me sou a munugana prist me sou a papai sou ite ei me sou tola maido, "Gatitole ei! Gati ei na tauvaleuti!" Me Pailat ei vei ane sou maido, "Amutou oto mu guale ei me mu gati ei na tauvaleuti. Eau ma poqe ete a sinusu tasa ino ne ei."

<sup>7</sup> Moni sou e Iuda sou adeliu ane ei maido, "Amiteu isa a binea tasa, ma binea do ei vei maido, bibi ieli ei ni mate. Vuna ei vei ve, 'Eau e Natune Salemo.' "

<sup>8</sup> Pailat ei longe a inade do mei lae ma-mau.

<sup>9</sup> Ei gali lou ulilo na luma mina bibi na itealena avena, mei tagi e Iesu maido, "O ma iva?" Moni Iesu ei ma sie ete a inade tasa.

<sup>10</sup> Io Pailat ei vei le ei, "Posa matina oo ma kale ete no sie a inadegu? Eau isa a sagagalina mapigogoi na taulele oo usala ue na gati e oo na tauvaleuti. Nane o ma muada oto ieli?"

<sup>11</sup> Me Iesu ei adeliu maido, "Mane Salemo ino oata ei ma bilii ete oo a sagagalina, oo no ma isa oto a sagagalina mapigogoi no tau eau utano. Maido me a bibi ei tau eau na limamu, sinusu mina bibi iedo ei vululusi a sinusu minio mei buo mamau lou."

<sup>12</sup> Pailat ei longe a inade do me ei tove a vea mina taulelene ei ni asu. Moni sou e Iuda sou tola maido, "Mane oo taulele a bibi ede ni asu, oo no ma tamaine Sisar otosi. Bibi ie ei vei ve ei oto ei a mapana, maido me ei a butu ne Sisar."

<sup>13</sup> Pailat ei longe a inade do, mei maasi e Iesu usala. Me ei ugu na niuguguna mina bibi na vivilealena vavasana na avena tasa sou tole a Inaubu a Vatu. Na inade Hibiru sou tole e Gabata.

<sup>14</sup> Malada iedo ei a malada na masusuluna mina Malada na Asuleletasena. Ma matailala ei pantasa mina autupola. Me Pailat ei vei le sou e Iuda, "Mu ite a mapana mine amutou."

<sup>15</sup> Me sou tola maido, "Valipute ei! Valipute ei! Gati ei na tauvaleuti!" Me ei tagi e sou, "Amutou kale eau na gatitole a mapana mine amutou na tauvaleuti?" Me sou a munugana prist sou sie a inadene ei maido, "Amiteu ma isa oto a mapana tasa lou. Sisar vululu moni!"

<sup>16</sup> Maido me Pailat ei iabi e Iesu usino na limane sou ne sou gati ei na tauvaleuti.

*Sou gati e Iesu na tauvaleuti*

(*Mat 27:32-44; Mak 15:21-32; Luk 23:26-43*)

De sou guale Iesu usino. Ei oto ei tabule a tauvaleuti minei,

<sup>17</sup> me ei asutase a aubu buobuo mei asu usino na avena magamaga tasa sou tole a Sigou Na Lete. Na inade Hibiru sou vate e Golgota.

<sup>18</sup> Na avena do sou gati e ei na tauvaleuti. Me sou gati a bibi lua sea pilu e ei, tasa maino ne gata me tasa maino ne meli. Me Iesu ei ino balivua.

<sup>19</sup> Me tamai, Pailat ei vei le sou ne sou niage a malibuuna inade tasa me sou tau na tauvaleuti. Niagona do ei vei maido, "IESU MAINO NASARET, MAPANA MINE SOU E IUDA."

<sup>20</sup> Sou e Iuda makuba sou asu usinani me so gi a inade do, vuna avena sou gatitole e Iesu na tauvaleuti ei agavuale a aubu buobuo, me sou niage a inade do na inade Hibiru me na inade Rom me na inade Grik.

<sup>21</sup> Maido me sou a munugana prist sou vei ane Pailat maido, "Oo ma niagege lei maido, 'Mapana mine sou e Iuda.' Oo no niage a inade maido, 'Bibi ieli ei oto i vei, 'Eau a mapana mine sou e Iuda.' "

<sup>22</sup> Me Pailat ei adeliu, "Inade eau niagesi ei ni muina."

<sup>23</sup> Tauluna sou a vanunua na maubina so gati e Iesu na tauvaleuti, sou guale a kinainai usalasala minei, me sou soebule a maduna iva. Me sou a vanunua na maubina sou tastasa guale a avena tastasa. Me sou guale tamai a kinainai ulilolilo, iedo sou ma sai ete.

<sup>24</sup> Maido me sou a vanunua na maubina so vei maido, "Eitou ma singsinge lei a kinainai ie. Neitou mailaba i, mina vilealena bibi tasa ni guale." Seido sou goli maido, ma inigogona do i toesesele a inade ino na Laulau mine Salemo. Inade do ei maido, "Sou soebule a kinainai minau, me sou mailaba i ne sei ni guale."\* A inigogona moni iodo sou a vanunua na maubina sou goli.

<sup>25</sup> Tinane Iesu pilu e tasine ei, me Maria, ei e susune Klopas, me Maria mine Makdala, sou a tavivine do sou magili ino agavuale a tauvaleuti ne Iesu.

\* 19:24 Laulau na Inala 22:18

<sup>26</sup> Iesu ei ite tinana pilu a disaipel ei kale mamai sele do, sulu magili agavi. Me Iesu ei vei le tinana maido, “Tavine, ite bibi iede ei e natumu.”

<sup>27</sup> Me ei vei ana a disaipel dolo maido, “Oite, tavine de ei e tinamu.” Me soke mina malada dolo, disaipel do ei guale Maria usino na luma minei, me ei iteale ei.

*Iesu ei mate*

(*Mat 27:45-56; Mak 15:33-41; Luk 23:44-49*)

<sup>28</sup> De Iesu ei muada a pipigona vuso minei i pulosi seidei. Me ei vei maido, “Loogu i tagasa.”<sup>†</sup> Ei goli a inade iedo ve ei ni toesele a inade tasa ino na Laulau mine Salemo.

<sup>29</sup> Taogo na vain viniga tasa ino agavi. Maido me sou vui a musamusa utano na vain viniga, me sou papale na lalana obu a hisop me sou tau usino na asene Iesu.

<sup>30</sup> Iesu ei dame a vain viniga me ei vei maido, “Ei pulosi,” me ei letekulu utano ma nununa i asutase ei.

*Bibi na maubina tasa ei ubi a alisune Iesu*

<sup>31</sup> Ei a malada na masusuluna golugolu vuso mina Maolona Malada ne sou e Iuda. Ma Maolona Malada do ei a malada buo sele, maido me sou e Iuda sou ma kale ete a matea ni muina na tauvaleuti na malada do. Maido me sou vei ane Pailat ne sou sagilote a ubune sou so kulu na tauvaleuti, ne sou mate asi me ne sou taulele a aitolane sou.

<sup>32</sup> Io sou a vanua na maubina so asu me sou sagilote a ubuna bibi lua sou gati pilu e Iesu iedo.

<sup>33</sup> Moni na ilala sou sibitala ne Iesu, sou ite ei matesi. Maido me sou ma sagilote ete a ubune ei.

<sup>34</sup> Moni a bibi na maubina tasa ei ubi a alisune Iesu a lumusu. Ma tabaa oto dalana pilu a nanu i singi.

<sup>35</sup> Bibi ei ite a golu ie, ei ademuadasi a golu ei ite. Ma inade ei veimuade do, ei patotona, me ei oto ei muada, ei vei patotona. Maido me ei ademuada ne amutou silimuli.

<sup>36</sup> Golu sou odo, ei palea mina toeseselena inade na Laulau mine Salemo. A inadena maido, “Tasa mina tuatuana vuso do ne sou ma sagilote ete.”<sup>‡</sup>

<sup>37</sup> Ma inade tasa lou na Laulau mine Salemo, ei maido, “Ne sou ite a bibi sou ubi odo.”<sup>§</sup>

*Sou tau a aitolane Iesu na muina minate tasa alaba*

(*Mat 27:57-61; Mak 15:42-47; Luk 23:50-56*)

<sup>38</sup> Mulimuli Iosep ne Arimatea ei asu tagi e Pailat ni longo ane ei ni guale a aitolane Iesu. Iosep ei a disaipel tasa mine Iesu, moni ei lae e sou e Iuda mei tau oovi a silimulina minei. Pailat ei longo ane ei, maido me Iosep ei asu mei guale a aitolane Iesu.

<sup>39</sup> Me Nikodemus, ei a bibi iedo lisa ei asu ite Iesu na lodo, ei tamai asu usino. Ei maasi a golu sanii i isa a manginana doana sou sauvule a mira pilu a aloe. Mavaana mina golu iedo ei a savulu tolu kilogram timana.

<sup>40</sup> Iosep me Nikodemus sulu guale a aitolane Iesu, me sulu tau a nanu manginangina do ne ei, me su langesobe ei a malo doana, tomane sou e Iuda sou goligoli na aitolana.

<sup>41</sup> Agavuale a avena sou a vanunua na maubina so gati e Iesu na tauvaleuti iedo, a mauma tasa ino. Me na mauma do a muina minate tasa alaba ino i, saboa so tau a aitolana bibi tasa i.

<sup>42</sup> Ei a malada mine sou e Iuda ne sou masusulu a golugolu mina Maolona Malada me a muina minate do tamai ino agavi, maido me sulu tau a aitolane Iesu na muina minate do.

## 20

*Iesu ei ilisiliu*

(*Mat 28:1-10; Mak 16:1-8; Luk 24:1-12*)

<sup>1</sup> Na munugana malada na wik, Maria ne Makdala ei asu usino na muina minate mina autupola siisii sele, ei saboa tunuui sapa. Mei ite a vatu sou bulilelesi na tema na muina minate.

<sup>2</sup> Maido me ei vele vauta usino ne Saimon Pita me a disaipel tasa Iesu ei kale mamai sele do, mei vei le sulu maido, “Sou taulelesi e Bibi Taula na muina minate, amiteu ma muada oto i, sei avena sou tau e ei.”

<sup>3</sup> Maido me Pita pilu a disaipel do, sulu ilisitase a aubu me su asu usino na muina minate.

<sup>4</sup> Sulu vele pilu usino, moni a disaipel do ei vululusi e Pita, mei divi pala na muina minate.

<sup>5</sup> Ei motudu me ei gemu ulilo na muina minate, me ei ite moni a malo sou valisobe a aitolane Iesu iodo. Moni ei ma gali oto ulilo.

<sup>6</sup> Saimon Pita ei vele mulimuli ne ei, mei gali ulilo mina muina minate. Ei ite a malo ino,

<sup>7</sup> mei ite tamai a malo tasa sea, ei a malo sou papale a letene Iesu. Malo do ei ma ino oto pilu a malomalo sanii. Ei lagu tomane a bibi tasa ei pili mei tau na gona sea.

<sup>†</sup> 19:28 Laulau na Inala 22:15, 69:21    <sup>‡</sup> 19:36 Gualeliuna 12:46; Savuluna 9:12; Laulau na Inala 34:20    <sup>§</sup> 19:37 Sekaraia 12:10

<sup>8</sup> Io a disaipel ei divi pala na muina minate do, ei tamai ei gali ulilo mei ite a gologu vuso do, me ei silimuli.

<sup>9</sup> Na malada do sou saboa so muada kuba a inade ei ino na Laulau mine Salemo, ve ne Iesu ni ilisiliu lou maino na minate.

<sup>10</sup> Io a disaipel lua do su veteliu usino na aubu.

*Maria mine Makdala ei ite Iesu  
(Mat 28:9-10; Mak 16:9-11)*

<sup>11</sup> Maria ei magili ino sala agavuale a muina minate, me ei tangitangi. Me ei motudu me ei gemu ulilo mina muina minate.

<sup>12</sup> Me ei ite a bineanea ne Salemo lua, malo ne sulu i kea sele. Sulu ugu mina avena lisa a aitolane Iesu ei tabuli i. Tasa ei ugu mina muina letene Iesu, me tasa ei ugu mina muina ubuna.

<sup>13</sup> Sulu tagi e Maria maido, "Tavine, oo tangitangi a sava?" Me ei vei le sulu maido, "Sou taulelesi e Bibi Taula minau, me eau ma muada oto sei avena sou tau e ei."

<sup>14</sup> Ei ade maido, me ei sauvule me ei ite Iesu i magiligili nado. Moni e Maria ei ma muada oto ve ei e Iesu.

<sup>15</sup> De Iesu ei tagi e ei maido, "Tavine, o tangitangi a sava? O kale no poge e sei?" Maria i damu ve ei a bibi na itealena mauma, mei vei lei maido, "Bibi buo, mane o guale ei usino, o no veimuade le eau a avena o tau e ei, me eau na asu na guale ei."

<sup>16</sup> Me Iesu ei vei, "Maria." Me Maria ei sauvule ei mei vei lei maido na inade Hibru, "Rabonai." Malibuuna inade "Rabonai" ei maido, "Bibi na matetengina."

<sup>17</sup> Me Iesu ei vei lei maido, "Oo ma lapi-toletole lei eau, vuna maido eau saboa asu uata ne Euma. Moni o no asu usino ne sou e tamtamaigu me no vei ane sou maido, eau na asu uata ne Euma, Tamane amutou. Me eau na veteliu usino ne Salemo minau me Salemo mine amutou."

<sup>18</sup> De Maria mine Makdala ei asu, me ei vei ane sou a disaipel maido, "Eau itesi e Bibi Taula." Me ei vei ane sou a inade Iesu i vei le ei iodo.

*Sou a disaipel sou ite Iesu  
(Mat 28:16-20; Mak 16:14-18; Luk 24:36-49)*

<sup>19</sup> Na mataviliolio na munugana malada na wik iedo, sou a disaipel sou kapisobe sagali sele a tema na luma sou ino i odo, vuna sou lae sele e sou e Iuda. Me Iesu ei sibitala mei magili balivua ne sou. Me ei vei ane sou maido, "Lilone amutou ni mea moni."

<sup>20</sup> Ei vei maido me ei maitte e sou a limana ma alisune ei. Sou a disaipel sou ite e Bibi Taula, me a lilone sou i mongemonge sele.

<sup>21</sup> Me Iesu ei vei lou ane sou, "Lilone amutou ni mea moni. Euma ei peltase eau

usinani, tomane moni eau peltase amutou usino."

<sup>22</sup> Ei adesi maido, me ei pusi a ngalane ei usino ne sou, me ei vei le sou maido, "Amutou guale a Maolona Nunu."

<sup>23</sup> Mane amutou lilotase a sinusu mine sou a vanunua, io a sinusu ne sou ei ni buale. Me mane amutou ma lilotase ete a sinusu mine sou a vanunua, io a sinusu mine sou ei ni muina moni."

*Iesu ei palea le Tomas*

<sup>24</sup> Ilala Iesu ei palea le sou a disaipel, tasa mine sou a disaipel savulu tasa timana lua ei ma ino pilu oto e sou. Ei e Tomas, aisana tasa e Didimus.

<sup>25</sup> De sou a disaipel sanii sou vei lei maido, "Amiteu itesi e Bibi Taula." Moni e Tomas ei vei le sou maido, "Mane eau ma ite ete a poposina lumusu sou gati na limane ei me ma tau ete a uugu ulilo mina limana me ma tau ete a limagu ulilo mina alisune ei, eau na ma silimuli ete."

<sup>26</sup> Na malada pantolu mulimuli, sou a disaipel mine Iesu sou ugu lou lilo na vilo, me Tomas ei ino pilu e sou. Sou kapisobe a tematema vuso, moni e Iesu ei asu me ei magili balivua ne sou. Me ei vei le sou, "Lilone amutou ni mea."

<sup>27</sup> Io ei vei le Tomas maido, "O vele tau a uumu nani na, mo ite a limagu. Me o tau a limamu ulilo bilesi mina alisugu. Umana a damutatala papaina. Oo no silimuli moni."

<sup>28</sup> Me Tomas ei sie liu a inadene ei maido, "Oo Bibi Taula minau, oo e Salemo minau."

<sup>29</sup> Me Iesu ei vei lei maido, "O silimuli, vuna o itesi eau, io? Sou a vanunua so ma ite ete eau, moni sou silimuli, ne sou guale a maibalavana."

*Vuna ivu mina niagena laulau ie*

<sup>30</sup> Iesu ei goli a matailala papaina na matane sou a disaipel, moni eau ma niage vuse ete na laulau ie.

<sup>31</sup> Eau niage a inade ieli ve ne amutou silimuli e Iesu, ei e Kraiss, e Natune Salemo. Me mane amutou silimuli, ne amutou guale a maulina na aisane ei.

## 21

*A disaipel padilua so ite Iesu*

<sup>1</sup> Mulimuli Iesu ei palea lou ne sou a disaipel agavuale a pou na nanu e Galili, aisana pou na nanu tasa lou e Taiberias. Ei palea le sou maido,

<sup>2</sup> Saimon Pita me Tomas, aisana tasa e Didimus, me Nataniel mina aubu buobuo e Kana ne Galili, me natune Sebedi lua, ma disaipel lua mine Iesu, sou ino pilu.

<sup>3</sup> Me Saimon Pita ei vei le sou maido, "Eau na asu na vuo muga." Me sou vei le ei, "Amiteu tamai namiteu ogomuli oo." Io sou

sae a bot tasa me sou asu. Moni mina lodo vuso do sou ma vuoale ete a aia tasa.

<sup>4</sup> Na autupola siisii sou ite Iesu ei mag-iligili na mado. Moni sou a disaipel sou ma muada oto ve ei e Iesu.

<sup>5</sup> De Iesu ei tagi e sou maido, “Tamta-maigu, nane amutou isa a aia sanii?” Me sou sie a inadene ei maido, “Boa.”

<sup>6</sup> Me ei vei ane sou, “Mu lange a vuo lou na lima gata mina bot, me ne amutou vuoale sanii.” Maidolo me sou lange a vuo utano, me sou ma mapigogoi ete ne sou lapuale a vuo uata, vuna aia i makuba sele.

<sup>7</sup> Io a disaipel Iesu ei kale mamaimai sele do ei vei ane Pita maido, “Ei e Bibi Taula!” Ma ilala ei longe a inado do, “Ei e Bibi Taula,” ei papale a kinainai minei, vuna ei ma kakai oto. Mei seu utano mina dasi.

<sup>8</sup> Me sou a disaipel sanii sou asu usino na bot, me sou lapuale a vuo pilu a aia vuso uata na bot. Sou ma bulago oto ana mado, bulagona tomane a mita savulu sobo tasa moni.

<sup>9</sup> Ilala sou ontolasi, me sou ite a iatula na oavi ino, ma aia sanii ino pilu a ulalu.

<sup>10</sup> Iesu ei vei ane sou maido, “Aia vuso amutou guale de, mu pa sanii usinari.”

<sup>11</sup> Maidolo me Saimon Pita ei sae na bot mei lapuale a vuo uata na mado. Aia buobuo i papaina sele mina vuo, mapigogoi savulu sobo tasa savulu lima timana tolu (153). Aia ei makuba mamau sele, moni a vuo ei ma mautu oto.

<sup>12</sup> De Iesu ei vei le sou maido, “Mu vele mu vilitola.” Me tasa mine sou ma tagi ete ei, “Oo e sei?” Vuna sou muadasi i, ei e Bibi Taula moni.

<sup>13</sup> Me Iesu ei asu agavuale a iatula na oavi mei guale a ulalu mei bilii e sou. Me ei guale tamai a aia mei bilii e sou.

<sup>14</sup> Ielili ei matolunai Iesu ei palea le sou a disaipel, na tauluna ei ilisilili na minate.

#### *Oo iteale sou a sipsip minau*

<sup>15</sup> Iesu pilu e sou a disaipel so aani pulosi, de Iesu ei tagi e Saimon Pita maido, “Saimon, natune Ioanes, o kale mamai sele eau ane sou ie, io?” Me Pita i vei, “E, Bibi Taula, oo muada, eau kale o.” Seido Iesu ei vei le ei, “Oo iteale a natatuna sipsip minau a gona inani.”

<sup>16</sup> Me Iesu ei tagi lei e ei, “Saimon, natune Ioanes, o kale mamai sele eau?” Me Pita ei vei, “E, Bibi Taula, oo muada, eau kale o.” Me Iesu ei vei le ei, “Oo ulage sou a sipsip minau.”

<sup>17</sup> De matolunai Iesu ei tagi e ei, “Saimon, natune Ioanes, o kale eau?” Pita ei lilo mavaa, vuna Iesu ei tagi e ei matolu maido, “O kale eau?” Me ei vei ane Iesu maido, “Bibi Taula, oo muada a golugolu vuso. Oo

muada, eau kale o.” Me Iesu ei vei lei maido, “Oo oiteale sou a sipsip minau a inani.

<sup>18</sup> “Ivu sele eau vei lio, ilala oo bibi alaba, o papale a palaai minio oto mo asu na avena a masagana minio. Moni na ilala oo palea bibi buo, o no beilange a limamu, ma bibi tasa sea ni papale a palaai minio me ei maasi oo usino na avena o ma kale ete no asuale.”

<sup>19</sup> Iesu ei goli a inade do ni matailale a inigogona Pita ni mate, me ieli ni bilii e Salemo a aisa buo. Me mulimuli ei vei le Pita maido, “O ogomuli e eau.”

#### *Inade mina disaipel Iesu ei kale mamai iedo*

<sup>20</sup> Pita ei sauvule me ei ite a disaipel Iesu ei kale mamai sele do, ei ogomuli e sulu. A bibi iedo lisa na malada sou aaniani, ei tau a letena agavuale a madalone Iesu me ei tagi e ei maido, “Bibi Taula, sei ni tau e oo na limane sou a butu?”

<sup>21</sup> Pita ei ite ei me ei tagi e Iesu maido, “Bibi Taula, a bibi ielili ei ni matina?”

<sup>22</sup> Me Iesu ei adeliu a inade maido, “Mane eau kale ei ni muina mapigogoi na malada eau na veteliu, iede matina ane oo? Oo ogomuli e eau moni.”

<sup>23</sup> Maido me a inade ieli ei vele maisaba lilo ne sou e tamtamaina maido, “A disaipel do ei ni ma mate oto.” Moni Iesu ei ma vei ete ve ei ni ma mate oto. Ei vei ve, “Mane eau kale ei ni muina mapigogoi a malada eau na veteliu, iedo matina ane oo?”

<sup>24</sup> Ede a disaipel iedo moni, ei ademuada a golugolu iedo mei niage a inade iedo. Me eitou muada, a inade ei veimuade i iodo ei patotona.

<sup>25</sup> Iesu ei goli tamai a golugolu sanii papaina sele. Mane sou niage a pipigona vuso ei goli na laulau, a magamaga ieli ni ma isa oto a mui neitou tau a laulau vuso do.

## Aposel Pipigona mine sou a Aposel

*Iesu ei vei patotona Salemo ei ni peltase a Maolona Nunu*

<sup>1</sup> Tiopilus, na laulau lisa eau niage do, eau niagetole a golugolu vuso Iesu ei goli me a matetengina vuso ei bilii e sou a vanunua ma tavivine sokena munugana malada

<sup>2</sup> i pea mina malada Salemo i guale ei uata. Ei palea le sou a aposel ei vileale, me na sagalina Maolona Nunu ei vei sagali ane sou a matamatana pipigona ne sou goli. Me mulimuli Salemo ei guale ei uata.

<sup>3</sup> Palapala ei tabule a davutina mei mate, me mulimuli ei ilisiliu mina minate mei palea le sou a aposel. Ei goli a golu papaina ve ne sou muada sele ei ino mauili. Mapi-gogoi a malada savulu iva sou ite ei, me ei vei le sou a niitealalena mine Salemo.

<sup>4</sup> Ilala ei saboa ino pilu e sou, ei vei le sou maido, "Amutou ma asutasetase lei e Ierusalem. Amutou magitali a golu Euma ni bilii e amutou, lisa eau vei le amutou iodo.

<sup>5</sup> Ioanes ei maavuvuti e sou a vanunua ma tavivine a nanu, moni malada ma papaina otosi, ne mu guale a maavuvutuna a Maolona Nunu."

<sup>6</sup> Na ilala sou viepili, me sou tagi e ei, "Bibi Taula, nane na ilala li no toe e Israel ni palea sagali lou me ni isa a mapana ni iteale sou?"

<sup>7</sup> Me ei adeliu a inade usino ne sou maido, "Ne amutou ma muada oto e sou a ilala ma malada Euma ei tau, Iede a golu mine amutou boa. Euma ei oto ei muada a golugolu ie.

<sup>8</sup> Moni mulimuli Maolona Nunu ni asu usinani me ei ni ugu ne amutou, me namutou guale a sagalina. Me namutou malongo a inadegu ne Ierusalem, me mina avena vuso mine Iudia, me mina avena ne Samaria, me pea na sinuana magamaga."

*Iesu ei asu uata na langi  
(Mak 16:19-20; Luk 24:50-53)*

<sup>9</sup> Iesu ei pulu a inade do, ei ilisi uata na matane sou. Ma ausa i tau oovi ei, me sou ma itesi e ei.

<sup>10</sup> Na ilala ei asuasua uata, me sou gemugemu iiti uata na langi, saga i a bibi lua su palea me su magili pilu e sou, a kinainai ne sulu i keakea vuso.

<sup>11</sup> Sulu vei maido, "Amutou a vanunua mine Galili, posa matina amutou magili sabubu me amutou gemugemu uata na langi? Iesu ie, seidei e Salemo i gualeliu e ei me ei asutase amutou mei asu uata na langi, ei ni veteliu lou na inigogona tasa

moni tomane seidei amutou ite ei asu uata na langi."

*Sou vileale a bibi tasa ni puisobe a pipigona mine Iudas*

<sup>12</sup> Sou a disaipel sou veletase a loena sou vate e Oliv, me sou asu liu usino ne Ierusalem. A loena e Oliv do ei agavuale moni e Ierusalem, ei mapigogoi a bulagona kilomita tasa.

<sup>13</sup> Sou asu ulilo na aubu buobuo do, me sou gali ulilo na vilu oata sou uguu i. Aisa ne sou ie, Pita, Ioanes, Iemus, Andru, Pilip, Tomas, Batolomu, Matiu, Iemus natune Alpius, me Saimon ei a bibi mina abuna mine Selot, me Iudas ei e natune Iemus.

<sup>14</sup> Sou vuso do sou ugu a lilone sou i tasa moni me sou viepili me sou kaka. Me sou a tavivine, me Maria ei e tinane Iesu, me sou e tatasine Iesu, sou tamai kaka pilu e sou.

<sup>15</sup> Savulu ne sou ei mapigogoi savulu sobo tasa timana savulu lua. Na ilala iedo Pita ei magili balivua ne sou me ei malongo a inade maido,

<sup>16</sup> "Amutou tamtamaigu, lisa Maolona Nunu ei goli e Devit i veipale a inade tasa, ma inade do ino na Laulau mine Salemo. Ei ade e Iudas, a bibi ei maite a vea usino ne sou a vanunua sou sautole e Iesu. Me seidei ei paleasi tomane Devit ei ade i.

<sup>17</sup> Lisa Iudas ei eili na tetena mine amiteu, me ei guale a pipigona tasa moni tomane amiteu."

<sup>18</sup> A bibi iedo Iudas ei guale a vatu tomane a mapana inigogona pagu ei goli, me ei oli a avena magamaga tasa. Me mulimuli ei bosa na magamaga do, ma tiana mapola ma magalina vuso i liliu utano na magamaga.

<sup>19</sup> A vanunua vuso ino ne Ierusalem sou muada i. Me na inade mine sou, sou vate a magamaga do e Akeldama. A malibuuna "Akeldama" do ei maido, "A magamaga ei isa a daladala."

<sup>20</sup> Pita ei ade lou maido, "A inade sou niage na Laulau na Inala do ei maido, 'A avena ei uguu i edo, ei ni a avena sabubu, me no ma itetase lei ete a bibi tasa ni ugu i.\*"

Me na laulau ieli a inade tasa lou ei maido, 'Bibi sea ei ni guale a pipigona minei.†"

<sup>21</sup> Maidolo me seidei neitou vileale a bibi tasa balivua mine eitou i asuasua usino usinani pilu e eitou,

<sup>22</sup> soke na ilala Ioanes ei maavuvuti a vanunua ma tavivine i asu pea na malada Salemo ei guale Iesu me ei asutase eitou mei ilisi uata. Me a bibi iedo ni guale a

\* 1:20 Laulau na Inala 69:25 † 1:20 Laulau na Inala 109:8

pipigona mina malongona mina ilisiliuna ne Iesu pilu e eitou.”

<sup>23</sup> Io sou vileale a bibi lua. Tasa e Iosep, sou vate ei e Basabas, me ei isa a aisana tasa lou, e Iastus. Ma bibi tasa lou e Matias.

<sup>24</sup> Sou kaka maido, “Bibi Taula, oo muada a lilona vanunua vuso. O no maite e amiteu e sei o vilealesi mine bibi lua li,

<sup>25</sup> ei ni palea a aposel me ei ni puisobe a muine Iudas. Iudas ei veletasesi a pipigona do me ei asu usino na avena ei ni muina i.”

<sup>26</sup> Io me sou lange a vatu mina vilealena, ma vatu mine Matias i palea. Maidolo me sou guale ei ni pilu e sou a aposel savulu tasa timana tasa.

## 2

### *Maolona Nunu ei sivo utano*

<sup>1</sup> Malada mina Pentikos i paleasi, me sou viepilu na luma tasa.

<sup>2</sup> Saga i a tinangi na golu tasa ei vele muata na langi, ei tomane a tinangi na sagalina avivili, me ei vonu sele na luma sou ugu iodo.

<sup>3</sup> Me sou ite a golu tasa tomane a oavi i sibitala, i lagu tomane a tabelena oavi papaina. Me ei muata ne sou vuso tastasa.

<sup>4</sup> Me a Maolona Nunu ei vonu ne sou vuso a vanunua ma tavivine, me sou soke a inade na matamatana inade. Maolona Nunu ei toe sou me sou mapigogoi ne sou ade a matamatana inade sou odo.

<sup>5</sup> Sou e Iuda sanii sou asu usinani me sou ugu ne Ierusalem, sou a vanunua sou tade sele e Salemo, me sou asu maino na aveavena vuso mina magamaga.

<sup>6</sup> Ilala a tinangi na golu odo i palea, a vanunua ma tavivine papaina sou longe me sou asu usinani me sou viepili. Me sou longotagigi a inadnade sou ade me sou saga, vuna maido vanunua ma tavivine tastasa sou longe e sou a disaipel adeade a matamatana inade seasea mine sou oto bilesi.

<sup>7</sup> Sou saga me sou vei maido, “Nane e sou a vanunua ma tavivine ieli sou a abuna mine Galili moni, io?”

<sup>8</sup> Posa matina eitou tastasa eitou longe sou adeade a inade mine eitou bilesi?

<sup>9</sup> Eitou a abuna avena vuso ne Patia me Midia me Elam, me eitou a vanunua eitou ino na avena ne Mesopotemia, me na avena ne Iudia me na avena ne Kapadosia, me na avena ne Pontus me Esia,

<sup>10</sup> me na avena ne Prigia me Pampilia, me a avena vuso ne Isip me na aveavena mina avena ne Libia ino i agavi na aubu buobuo Sairini, me eitou a vanunua mina avena vuso ne Rom eitou viepili.

<sup>11</sup> Eitou e Iuda pilu e sou a vanunua sanii sou ogomuli a kinaka mine eitou, me eitou a abuna vuso mina lolopati e Krit me a avena ne Arabia, me eitou vuso longe sou malongo a inade a pipigona sagali mine Salemo na inadnade mine eitou.”

<sup>12</sup> Me sou vuso sou saga sele, me sou damutala papai. Me sou adeade lilo ne sou oto maido, “Posa matina sou ieli sou adeade a inade neitou?”

<sup>13</sup> Moni sanii sou adeptintola maido, “Sou inu a vain papaina i alaba me sou matalilili.”

### *Pita ei veimuade a inade*

<sup>14</sup> Pita ei magili pilu e sou a aposel savulu tasa timana tasa, me ei ade sagali, me ei veipale le sou a vanunua ma tavivine maido, “Amutou Iuda me amutou vuso vanunua mu asu usinani mu ugu ne Ierusalem, amutou beli a tagilane amutou usinani mina inadegu, me ne amutou muada i a vuna golu amutou itesi seidei ie.

<sup>15</sup> Amutou damu a vanunua ieli sou inu, io? Boa vuso sele. Simoni moni a matailala i ilalaseu mina autupola.

<sup>16</sup> A golu seidei i sibitala ie, ei a golu lisa profet Ioel ei ade i. Ei vei maido,

<sup>17</sup> ‘Salemo ei vei, “Agavuale a punuluna mal-

ada,

eau na singi a Nunu minau ne sou a vanunua ma tavivine vuso.

Me selebanini mine amutou ne sou malongo a inade minau tomane sou a profet.

Me sou a vanunua alalaba mine amutou ne sou ite a golugolu tomane a tinada, me a vanunua buobuo ne sou tada.

<sup>18</sup> Me na ilala iedo eau na singi a Nunu minau usino ne sou a vanunua na pipigona ma tavivine na pipigona minau,

me ne sou malongo a inadegu tomane sou a profet.

<sup>19</sup> Eau na goli a golugolu sea ei ni palea muata na langi,

me eau na goli a gona sinaganaga na magamaga tomane a matailala mina malada do. Daladala ma oavi ma muo taula ne sou palea.

<sup>20</sup> Ma oaso ei ni sauvule ni tunuui,

ma game ei ni palea kasoso tomane a daladala. Me mulimuli a malada ne Bibi Taula ni palea, ei a malada Bibi Taula ei ni maite a sagalina ma muada minei.

<sup>21</sup> Na ilala do vanunua ma tavivine sou ngala ane Bibi Taula ve ni buloi e sou, me ei ni gualeliu e sou.”\*

\* 2:21 Ioel 2:28-32

22 “Amutou vanunua mine Israel, amutou longe iiti a inadegu. Eau kale na vei le amutou e Iesu maino ne Nasaret. Amutou oto mu muada a pipigona sagali ma mata-matana gona sinaga Salemo ei goli balivua ne amutou na limane a bibi ie. Salemo ei goli maido ne amutou muada i, ei oto i peltase a bibi iede usinani.

23 Me Salemo ei tau a bibi iede na limane amutou, tomane lisa ei damutalesi me ei vei patotonasi ni goli. Me na limane sou a vanunua pagupagu amutou gatitole ei na tauvaleuti me mu valiputemate ei.

24 Moni e Salemo ei mailisiliu a bibi iedo me ei ma itetase ete ei ino na davutina mina minate, vuna maido minate ei ma mapi-gogoi ete ni lapitole a bibi iedo.

25 Devit tamai ei ade ane ei maido,  
 ‘Eau ite e Bibi Taula taliulu masae ne eau.  
 Ei ugu agavuale eau mei bilii e eau a sagalina, maidolo me a golu tasa ni ma toe ete eau lae me eau palili.

26 Maidolo ma lilogu ei kubaane sele, me eau ade a inade na munonge.  
 Eau magitali a golugolu kubaana e Salemo ei kale ni goli le eau.

27 O no ma itetase ete eau na aubu a vanunua sou matesi i.  
 Mo no ma itetase lei ete a bibi oo vilealesi ni minio ei ni mavulu mina muina minate.

28 Oo maitesi eau a vea mina gualena maolina.  
 Mo no longo ane eau na ugu pilu e oo, mo no toe eau na mongemonge sele.”†

29 “Amutou tamtamaigu, eau kale na vei bilesi le amutou e tubune eitou, e Devit. Ei matesi, me sou peilai ei. Ma muina sou peilai e ei ino balivua ne eitou pea seidei.

30 Moni e Devit ei a profet, me ei muada, Salemo ei vei patotona uata maido, ‘Mulimuli eau na tau e tasa na abuna mine natatumu ni palea a mapana tomane oo.’

31 Maidolo ma ilala Devit ei veimuade a inadenade mine Salemo ne ei ni ma itetase ete ei ni muina na aubu mine sou a vanunua sou matesi, me Salemo ei ni ma itetase ete ei ni mavulu mina muina minate, ei ma vei ete ve ei oto. Boa. Ei muadasi i a golu e Salemo ei kale ni goli, me ei vei a bibi iede Salemo ei vilealesi ni gualeliu a vanunua ma tavivine minei me ei ni ilisiliu lou na muina minate.

32 Io a bibi e Iesu, Salemo ei mailisiliuosi ei na muina minate. Amiteu vuso amiteu itesi.

33 Me Iesu ei asuosi uata me ei ugu mina limane Salemo e gata. Ei gualesi a Maolona Nunu na limane Tamana, tomane lisa Tamana ei ade i ni bilii e ei. Me seidei ei singiosi, tomane amutou ite me mu longe.

34 Devit ei ma asu oto usino na langi tomane Iesu ei ilisi uata. Moni e Devit i vei maido,

‘Bibi Taula ei vei le Bibi Taula minau maido,  
 “Oo ugu na limagu e gata

35 i mapigogoi eau na tau e sou a butu minio matano ne oo.”‡

36 “Maidolo me amutou vuso a tetena mine Israel namutou muada kuba i maido, e Iesu amutou gatitole ei na tauvaleuti iodo, Salemo ei tau ei ni muina e Bibi Taula, me Kraiis.”

*Vanunua ma tavivine makuba sou sauvuvule a lilone sou me sou guale a maavuvutuna*

37 Vanunua ma tavivine sou longe a inade ne Pita, ma inade do ei ubi sele a lilone sou. Me sou tagi e Pita pilu e sou a aposel sanii maido, “Amutou tamtamaigu, ne amiteu toematinei e amiteu seidei?”

38 Me Pita i vei le sou maido, “Amutou vuso tastasa ne mu sauvule a lilone amutou me ne mu guale a maavuvutuna na aisane Iesu Kraiis, me Salemo ni lilotase a sinusu vuso mine amutou. Mane amutou goli maido, Salemo ni bilii e amutou a Maolona Nunu.

39 Lisa Salemo ei vei patotona ni bilii a Maolona Nunu usino ne amutou me natatune amutou me sou a vanunua ma tavivine sou ugu bulago. Salemo e Bibi Taula mine eitou, ei adegatunasi ni bilii a Maolona Nunu usino ne sou a vanunua ma tavivine vuso ei toleale.”

40 Me Pita ei veimuade tamai a mata-matana inade sanii usino ne sou, me ei ade sagali ane sou maido, “Mu gualeliu e amutou oto, dae ne amutou vilua pilu e sou a tetena vanunua sou goli a matamatana inigogona pagu.”

41 Inade mine Pita i ubi a lilone sou a vanunua ma tavivine papaina, me sou guale a maavuvutuna. Mina malada do sou a vanunua ma tavivine savuluvulu tolu (3,000) sou gali ulilo ne sou a tetena vanunua ma tavivine sou silimuli e Iesu.

*Vanunua ma tavivine sou ugu lilo tasa moni*

42 Sou a vanunua ma tavivine sou sagali a nilonge na inade mine sou a aposel, me na viepiluna ma aanipiluna me na kinaka.

43 Me Salemo ei goli a gona sinaga makuba na limane sou a aposel, me a vanunua ma tavivine sou ite do, sou saga me sou lae.

44 Vanunua vuso sou silimuli e Iesu, a lilone sou tasa moni. Me sou maiiabi baoli a golugolu sou isa i balivua ne sou oto.

<sup>45</sup> Sou masosove a mauma me a golugolu mine sou, me sou guale a vatu, me sou soebule a vatu odo usino ne sou a vanunua sou boto a gona inani me a golugolu sanii.

<sup>46</sup> Na malada vuso sou viepili na luma mine Salemo. Me sou lee a ulalu me sou aani pilu na luma tastasa mine sou, a lilone sou i kubaana me sou mongemonge.

<sup>47</sup> Taliuliu sou beilangelange a aisane Salemo, me sou a vanunua ma tavivine vuso sou lilokuba moni ane sou. Na maladalada vuso Bibi Taula i pipigo a gualeli-una vanunua ma tavivine sanii, me na inigogona li ei adesui lei a savulu ne sou a vanunua ma tavivine sou silimuli e Iesu i palea papaina lou.

### 3

#### *Bibi tasa ubuna pagu ei kuba lou*

<sup>1</sup> Na malada tasa Pita pilu e Ioanes su asu usino na luma mine Salemo na matailala tou na lavilavi, ei a matailala na kinaka.

<sup>2</sup> Me sulu ite a vanunua sanii sou maasi a bibi tasa ubuna i pagu usinani. Malada taliuliu sou goegoe ei usinani me sou tau ei agavuale a tema mina luma mine Salemo, sou vate a Malasana Tema. Me ei kakaka a vatu ma golugolu sanii ne sou a vanunua ma tavivine sou galigali ulilo mina luma mine Salemo. A ubuubuna bibi edolo i palea paguosi na ilala ei ino na tiane tinana.

<sup>3</sup> A bibi odolo ei ite Pita pilu e Ioanes su kale ne su gali ulilo mina luma mine Salemo, me ei kake sulu ve ne sulu pa ane ei a golu sanii.

<sup>4</sup> Pita me Ioanes sulu amusoepute ei, me Pita ei vei, "Oo gemuale amilu."

<sup>5</sup> Ma bibi odolo ei amusoepute sulu, vuna maido ei damu ve ne sou bilii e ei a golu sanii.

<sup>6</sup> Moni e Pita ei vei maido, "Eau a vatu boa. Moni a golu eau isa i, ieli eau kale na bilii e oo. Na aisane Iesu Krai na Nasaret eau vei lio, o ilisi mo asu."

<sup>7</sup> Me Pita ei lapitole a limana e gata mei buloi e ei ni magili. Ma tabaa oto a ubuna ma buulolona i palea sagali.

<sup>8</sup> Me ei magili mei seu mei asu. Me ei gali ulilo na luma mine Salemo pilu e sulu, ei asu mei seuseu mei beilange a aisane Salemo.

<sup>9</sup> Vanunua ma tavivine vuso sou ite ei asuasui mei beilange a aisane Salemo,

<sup>10</sup> sou vei maido, ede a bibi moni taliuliu ei ugugu na tema mina luma mine Salemo sou vate a Malasana Tema, me ei kakaka vatu ma golugolu sanii. Sou ite ei palea kubasi, me sou saga mamau sele.

#### *Pita i malongo a inade lilo na luma mine Salemo*

<sup>11</sup> Sou a vanunua ma tavivine sou longe a inade na golu ieli ei palea, me sou saga

mamau sele me sou vele maino mina niite na bibi iedo. Me sou ite ei sautole Pita pilu e Ioanes me sou magili a muine sou na muina malolovina na bigomu na luma mine Salemo, sou vate a muina malolovina mine Solomon.

<sup>12</sup> Pita ei ite maido, me ei vei le sou a vanunua ma tavivine maido, "Amutou a vanunua mine Israel, posa matina amutou saga gegelu a golu ei palea ie? Posa matina amutou amusoepute amilu? Nane amutou damu i, amilu oto ami isa a sagagalina ue amilu ugu kuba sele na matane Salemo, me amilu toekube a bibi ieli i asuasui, io? Boa vuso sele.

<sup>13</sup> Salemo mine Abraham me Aisak me Iekop, ei e Salemo mine tubutubune eitou, ei bilii a aisa buo sele usino na bibi na pipigona minei, e Iesu. Ei a bibi tasa moni iedo amutou tau e ei na limane sou a butu. Me na ilala Pailat ei kale ni litase ei ni asu, amutou lametase ei me mu vei maido, Pailat ni ma litase ete ei ni asu malamala.

<sup>14</sup> Bibi ede ei maolo me ei goligoli a inigogona i bilesi sele, moni amutou lametase ei me amutou tola ane Pailat ni lube a bibi tasa sea do usino ne amutou, ei a bibi na valiputematena vanunua.

<sup>15</sup> A munugana bibi mina maasine eitou usino na vea na maolina, iedele amutou valiputemate ei. Moni Salemo i mailisiliu e ei na minate, me amilu oto mi ite a golu odo me amilu veipale e ei.

<sup>16</sup> Amilu silimuli e Iesu, me na aisane Iesu moni bibi amutou muada ie ei palea kuba lou. Iesu oto ei mailisi a silimulina mine amilu, ma silimulina moni odo ei toekube a bibi ie ni palea kubaana sele, tomane seidei amutou ite.

<sup>17</sup> "Patotona, tamtamaigu, eau muada amutou pilu e sou a mapamapana mine amutou amutou ma muada kuba oto i me amutou goli a inigogona ieli usino ne Iesu.

<sup>18</sup> Moni lisa Salemo ei veimuade a inade mina asene sou vuso a profet maido a bibi iedo ei vileale mina gualeliuna vanunua ma tavivine minei, ei ni tabule a davutina. Me seidei na inigogona amutou goli ie, Salemo ei toeselesi a inade minei iedo.

<sup>19</sup> Maidolo me namutou sauvule a damutatalana pagu mine amutou, me mu sauvule a lilone amutou, me Salemo ni taulele a sinusu vuso mine amutou.

<sup>20</sup> Mane amutou goli maido, io Bibi Taula ei ni peltase e Iesu Krai ei vileale mina buloine amutou me ei ni bilii a sagalina alaba usino ne amutou.

<sup>21</sup> Seidei Iesu ei ni muina na langi mei ni magitali a ilala Salemo ei vileale ni goli a golugolu vuso ni palea alaba lou tomane lisa ei ade i na asene sou a maolona profet minei.



<sup>22</sup> Lisa Moses ei vei maido, ‘Salemo, Bibi Taula mine amutou, ei ni vileale e tamaine amutou tasa, me ei toe e ei palea a profet tomane eau oto. Me ne amutou ogomuli a inadenade vuso ei ni goli usino ne amutou.\*

<sup>23</sup> Me sei bibi ei ma kale ete ni longemuli a inade na profet do, Salemo ei ni valiputemate ei. Ne sou ma ugu otosi lilo mina tetena vanunua ma tavivine ne Israel.’

<sup>24</sup> ‘Sou a profet vuso sou veimuade a inade mine Salemo, soke na profet e Samuel pilu e sou a profet sou sibitala mamuli minei, sou vuso sou ade i a ilala iedo, seidei i paleasi.

<sup>25</sup> Amutou a abune natatune sou a profet, me amutou a vanunua na gualena golugolu e Salemo ei vei patotona ni bilii i na ilala ei goli a magilipiluna e Salemo pilu e tubu-tubune amutou. Ei vei le Abraham maido, ‘Ne natune tubune oo, eau na toekube sou vuso a vanunua ma tavivine mina magamaga.†

<sup>26</sup> De Salemo i mailisi a bibi na pipigona minei, me ei peltase ei usinani ne amutou pala, ei ni maibalave amutou mei ni buloi e amutou vuso tastasa ni veletase a inigogona pagu mine amutou.”

## 4

*Sou tau e Pita pilu e Ioanes na luma na tunuu*

<sup>1</sup> Pita pilu e Ioanes saboa ino su adeade ana vanunua ma tavivine, me sou a prist me sou e Sadusi pilu a munuganuga mina vanunua sou itealale a luma mine Salemo sou divi.

<sup>2</sup> Sou muada, sulu malongo a inade usino ne sou a vanunua ma tavivine maido Iesu ei ilisiosi na minate me a vanunua vuso sou matesi sou tamai ne sou ilisiliu. Maidolo me sou sinoa sele ane sulu.

<sup>3</sup> Me sou lapitole sulu me sou kale ne sou vavasa ane sulu. Moni oaso bisii moni ni solo, maidolo me sou tau e sulu na luma na tunuu pea maisavulo.

<sup>4</sup> Moni a vanunua ma tavivine makuba sou longesi a inade do me sou silimuli e Iesu. Ma savulu ne sou a vanunua ma tavivine sou silimuli e ei i mapigogoi savuluvulu lima (5,000).

*Sou vavasa ane Pita me Ioanes na matana vanunua na avelulusena inade*

<sup>5</sup> Malada mulimuli sou a munuganuga mine Iuda pilu a vanua buobuo me sou a vanua na muadana binea, sou viepili ne Ierusalem.

<sup>6</sup> Anas, ei a mapana prist, me Kaiapas, Ioanes, Aleksander ma vanunua vuso mina tetena mapana prist, sou viepili pilu e sou.

<sup>7</sup> Sou mamagili e Pita me Ioanes na matane sou, me sou tagi e sulu maido, “Amulu guale sei matana sagalina me amulu goli a golu ie? Amulu goli a golu ie na aisane sei?”

<sup>8</sup> Io Maolona Nunu i vonu ne Pita, me ei vei le sou maido, “Amutou a vanunua munuganuga mine Israel me amutou buobuo,

<sup>9</sup> nane seidei amutou kale ne mu tagi e amilu a bibi tasa ubune ei pagu. Me nane amutou kale ne mu muada i, a bibi odo i palea doana lou matina.

<sup>10</sup> Amutou vuso ne mu muada i, me sou a abuna mine Israel tamai ne sou muada i, na aisane Iesu Kraisi mine Nasaret, a bibi a ubuna i pagu odo ei palea kuba louosi, me seidei ei magili na matane amutou. Amutou gati e Iesu mina tauvaleuti, moni e Salemo ei mailisiliu ei na minate.

<sup>11</sup> Iesu ei a

‘Vatu edo amutou a vanunua na gagatuna amutou damu i pagu me amutou pitase.

Moni seidei ei palea a munugana vatu mina masagalina luma.’\*

<sup>12</sup> A bibi tasa boa ei mapigogoi ni gualeliu e eitou. Na aisane Iesu ei tasa moni eitou vuso a vanunua ma tavivine na magamaga i mapigogoi neitou guale a maulina. Ei vululu moni e Salemo i vileale ni gualeliu e eitou.”

<sup>13</sup> Sou a vanua buobuo sou muada, Pita me Ioanes sulu ma ugu oto na matetengina, me sulu a bibi sabubu moni. Moni sou ite sulu malongo sagali me sulu ma lae oto, maidolo me sou saga. Me sou muada, lisa e sulu ugu pilu e Iesu.

<sup>14</sup> Me sou ite a bibi iedo, a vovona i kubaana louosi, ei magili pilu e sulu. Maidolo ma inade tasa boa ne sou ade usino ne sulu.

<sup>15</sup> De sou a vanua buobuo sou vei le sulu ne su asutase a luma na avelulusena me sulu asu usala. Sulu asuosi, ma vanunua sou maiademuli e sulu,

<sup>16</sup> “Neitou goli a savu usino na bibi lua de? Sulu goli a gona sinaga tasa, me sou a vanunua ma tavivine mine Ierusalem sou muadasi i. Eitou ma mapigogoi etesi neitou tau oovi.

<sup>17</sup> Moni dae a inade ieli ni vele maisaba lou usino ne sou a vanunua ma tavivine, neitou ade sagali ane sulu, ne sulu ma ademuadada asa a aisa ieli usino na vanunua sanii.”

<sup>18</sup> Io sou toleale sulu me sou madeuti e sulu ne su ma goligoli ase a inade tasa lou na aisane Iesu, me ne sulu ma matetengitengi lei e sou a vanunua ma tavivine a aisa ie.

\* 3:22 Binea 18:15, 18-19 † 3:25 Sinokona 22:18 \* 4:11 Laulau na Inala 118:22

<sup>19</sup> Moni e Pita pilu e Ioanes sulu maliu a inade maido, “Amutou damutale, sei inigogona ei bilesi na matane Salemo? Ne amilu ogomuli a inade mine amutou, ue ne amilu ogomuli a inade mine Salemo? Amutou oto namutou vivileale.

<sup>20</sup> Moni amilu ma mapigogoi ete nami asebuu. Ne amilu malongo a inade na gologolu vuso amilu ite me amilu longe.”

<sup>21</sup> De sou a vanunua na avelulusena inade sou bilii a inade sagali sanii lou usino ne sulu, me sou litase sulu usino, vuna sou lae a vanunua ma tavivine. Sou a vanunua ma tavivine sou damutale a golu e Salemo ei goli iedo, me sou beilange a aisane ei. Maidolo ma vanunua buobuo sou ma isa oto a vea mina madeputene sulu.

<sup>22</sup> Bibi sulu toekube iodo a gona sinaga, a avalana i savulu iva.

*Sou kaka ve ne sou guale a sagalina mina malongona inade mine Iesu*

<sup>23</sup> Sou a vanunua na avelulusena inade sou lubesi e Pita me Ioanes odo, me sulu veteliu usino ne sou a tetena mine sulu, me sulu vei le sou a inade vuso mine sou a prist me sou a vanua buobuo.

<sup>24</sup> Sou longesi, ma lilone sou tasa moni, me sou kaka pilu ane Salemo maido, “Bibi Taula, oo mapale a langi, magamaga, dasi ma gologolu vuso ino mine sou.

<sup>25</sup> Lisa a Maolona Nunu minio ei bilii a inade tasa usino ne tubune amiteu, ei a bibi na pipigona minio, e Devit. Devit ei vei maido,

‘Posa matina a avena vuso na magamaga sou sinoa mamau?

Me vuna matina sou a vanunua ma tavivine sou maiveimuli a inade sabubu mina taupuina Bibi Taula?

<sup>26</sup> Sou a mapamapana mina avena vuso na magamaga sou masusulu a maubina.

Me sou a mapana sou viepili ve ne sou taupui e Bibi Taula me Kraisi minei.”†

<sup>27</sup> Patotona sele, Herot me Pontius Pailat su pilu e sou a vanunua ma tavivine mina abuna sea me sou e Israel, sou viepilu ve ne sou tau e Iesu utano, a maolona bibi na pipigona minio oto, lisa oo vileale ei ve ni goli a pipigona minio.

<sup>28</sup> Ilala sou goli a golu odo, sou ogomuli a damutatalana ma masagana minio moni. Na sagalina minio, lisa otosi oo masagalios i a inade na gologolu vuso ei ni sibitala.

<sup>29</sup> Io Bibi Taula, seidei oo no damutatale a inade vuso sou goli mina toenilaene amiteu, me oo no buloi e amiteu a vanunua na pipigona minio. Maidolo me ne amiteu mapigogoi sele a malongona inade minio, me namiteu ma lae oto.

<sup>30</sup> Me oo no tau a limamu ne sou a vanunua na sinobe mo toekube e sou ne sou kuba lou, me no goli a matamatana gona sinaga na aisane Iesu, ei a bibi na pipigona minio oto.”

<sup>31</sup> Sou kaka pulosi, ma luma sou viepilu odo ei maune. Ma Maolona Nunu i vonu ne sou, me sou veimuade sagali a inade mine Salemo me sou ma lae oto.

*Sou maiiabi a gologolu vuso sou isa i*

<sup>32</sup> Vanunua ma tavivine vuso sou silimuli e Iesu, a lilone sou ma damutatalana mine sou i tasa moni. Bibi tasa i ma matilei ete a golu tasa me ei vei maido, “A golu ieli minau bilesi.” Boa. Sou maiiabi a gologolu vuso sou isa i.

<sup>33</sup> Sou a aposel sou malongo a inade mina ilisiliuna mine Bibi Taula e Iesu, ma inade ne sou ei isa a sagagalina buo. Me Salemo ei bilii a dinodo buo usino ne sou a vanunua ma tavivine do me ei toekukube sele sou.

<sup>34</sup> Bibi tasa boa balivua ne sou ei boto a gona inani ma sei golu lou. Vanunua vuso sou isa a magamaga ue a luma, sou masosove me sou guale a vatu, me sou maasiasi a vatu odo usinani,

<sup>35</sup> me sou bilii e sou a aposel. Me sou a aposel sou soebule e sou a vanunua ma tavivine sou boto a gologolu sanii.

<sup>36</sup> Ma bibi tasa nana, aisana Iosep, sou a aposel sou bilii lei e ei a isa tasa e Banabas. Aisa e Banabas ei tasa moni tomene a inade, “A bibi na masagalina lilone sou.” Banabas ei e Livai tasa, me ei a bibi tasa maino na lolopatipati e Saiprus.

<sup>37</sup> Ei masosove a avena magamaga tasa minei. Ma vatu ei guale do, ei maasi usinani mei tau na ubune sou a aposel.

## 5

*Ananiais me Sapaira sulu kale ne su iotetase e Salemo*

<sup>1</sup> Bibi tasa ino, aisana Ananiais, me susuna e Sapaira. Ananiais masosove a avena magamaga tasa minei.

<sup>2</sup> Me a avena vatu tasa ei guale, Ananiais ei tau oovi muina minei oto. Susuna tamai ei muada i. Me Ananiais ei auala maido ve ei guale vuse a vatu usino mei tau na ubune sou a aposel.

<sup>3</sup> Me Pita ei vei maido, “Ananiais, posa matina oo itetase Satan ei vonu na lilone oo, me oo kale no auala ana Maolona Nunu, me oo tau oovi a avena vatu oo guale?

<sup>4</sup> Oo masosove a magamaga na masagana minio moni. Ma vatu oo guale iedele, ei a golu minio tamai, me oo mapigogoi no goli a sei golu o kale no goli le ei. Posa matina oo guale a damutatalana pagu iede? Oo ma damudamu lou ve oo auala ane sou a vanunua. Boa. Oo aualasi ane Salemo oto.”

† 4:26 Laulau na Inala 2:1-2

<sup>5</sup> Ananaias ei longe a inade do me ei bosa me ei mate. Me sou a vanunua sou longe a inade na golu odo ei palea le Ananaias, sou lae mamau sele.

<sup>6</sup> Me sou a vanunua alalaba sou asu maino me sou avisobe a aitolana me sou tabule usala me sou peilai.

<sup>7</sup> Maduna matailala tolu ei pulosi, me susune Ananaias ei gali ulilo. Ei ma muada oto a golu ieli i palea le suana.

<sup>8</sup> Me Pita i vei lei maido, “O vei le eau, nane ieli moni a vatu amulu guale na magamaga mine amulu, io?” Ma tavine i vei, “Ei bilesi. Seido moni.”

<sup>9</sup> Me Pita i vei lei maido, “Posa matina amulu maiademuli i ve namu tove a Nunu mine Bibi Taula? Oite. A vanunua sou peilai e suamu, sou eili na tema. Me ne sou tabule tamai e oo usino.”

<sup>10</sup> Ma tabaa oto a tavine do i bosa agavuale a ubune Pita me ei mate. Me sou a vanunua alalaba sou gali ulilo, me sou ite a tavine do i matesi. Me sou tabule ei usala, me sou peilai ei agavuale e suana.

<sup>11</sup> Me sou a vanunua ma tavivine mina viepiluna kinaka vuso me a vanunua ma tavivine sanii tamai sou longe a inade na golu ieli ei palea, me sou lae sele.

*Matamatana gona sinaga i palea*

<sup>12</sup> Sou a aposel sou goli a matamatana gona sinaga balivua na vanunua ma tavivine. Ma vanunua ma tavivine sou silimuli e Bibi Taula, lilone sou i tasa moni, me sou asu ulilo mina bigomu na luma mine Salemo, me sou viepili na muina malolovina mine Solomon.

<sup>13</sup> Sou a vanunua ma tavivine sou ma ino oto lilo mina abuna mine sou sou tamai beilangelange a aisane sou, moni sou ma gali oto ulilo ne sou viepili pilu e sou.

<sup>14</sup> Ma vanunua ma tavivine papaina lou sou silimuli e Bibi Taula, me sou gali ulilo na tetena minei.

<sup>15</sup> A vanunua ma tavivine sou muada a gona sinaganaga sou a aposel sou goli. Maidolo me sou maasiasi a vanunua na sinobe usala, me mamavute sou na moe me na poso na aana vea Pita ei asuasu i, vuna sou kale a miaune Pita ni taboboli e sou a vanua na sinobe do.

<sup>16</sup> Vanunua ma tavivine mina aububu agavuale Ierusalem, sou tamai maasi e sou a vanua na sinobe usinani pilu e sou a vanua sou isa a nunu pagu i toegegeli e sou tamai. Me sou a vanunua ma tavivine iedo sou palea kuba lou.

*Bineanea mine Salemo i buloi e sou a aposel ne sou ilisitase a luma na tunuui*

<sup>17</sup> A mapana prist pilu e sou e tamtamaina, iede sou a vanunua na tetena mine

Sadusi, sou ite a golugolu a aposel sou goli odo, me sou lilogegele sele.

<sup>18</sup> Sou ilisi me sou saavi sou a aposel me sou tau e sou mina luma na tunuui.

<sup>19</sup> Moni na lodo a bineanea tasa mine Salemo ei pee a tema mina luma na tunuui me ei maasi e sou usala, me ei vei le sou maido,

<sup>20</sup> “Amutou asu mu magili lilo na bigomu mina luma mine Salemo, me mu malongo a inade mina inigogona vuso mina maulina alaba do usino ne sou a vanunua ma tavivine.”

<sup>21</sup> Sou a aposel sou longe a inade do, me sou asu usino na luma mine Salemo na autupola siisii sele, me sou malongo a inade usino ne sou a vanunua ma tavivine.

Me a mapana prist pilu e sou tamtamaina sou toleale a vanua na avelulusena inade me sou buobuo mine Israel, me sou asu usinani me sou viepilu. Me sou masosove a inade usino na luma na tunuui, ne sou maasi e sou a aposel usinani.

<sup>22</sup> Io sou a papai sou asu usino na luma na tunuui, moni sou ma ite ete sou a aposel ino. Me sou veteliu sou vei le sou maido,

<sup>23</sup> “Amiteu ite a tema vuso mina luma na tunuui, sou kapisobe sagali sele me sou a vanua na ulagena sou ulage a muine sou na tema vuso. Moni na ilala amiteu pee a tema, amiteu ma ite ete a bibi tasa ino lilo.”

<sup>24</sup> Munuganuga mina vanua sou ulagelage a luma mine Salemo pilu e sou a prist sou longe a inade do, me sou damutala papai, me sou vei, “Mulimuli a golu ieli ni palea i matina?”

<sup>25</sup> Ma bibi tasa i sibitala me ei vei le sou maido, “Longe. Sou a vanunua amutou tau e sou mina luma na tunuui odo, seidei sou magiligili lilo na bigomu mina luma mine Salemo, me sou malongolongo ana vanunua ma tavivine.”

<sup>26</sup> Maidolo me munuganuga pilu e sou a papai sou asu me sou maasi e sou a aposel usinani. Moni sou ma goli ete a golu tasa usino ne sou. Boa. Sou lae, dae a vanunua ma tavivine ne sou ubi e sou a vatu.

*Sou a aposel sou ma lae oto a veipalena inade usino na vanua na avelulusena inade*

<sup>27</sup> Sou a papai sou maasi e sou a aposel usinani me sou mamagili e sou na matane sou a vanua na avelulusena inade. Me a mapana prist ei vei ane sou maido,

<sup>28</sup> “Amiteu magilisobe sele amutou ne amutou ma ademuadada lou a inade ana vanunua ma tavivine mina aisana bibi iede. Moni amutou saboa eili mu malongolongo a inade, ma vanunua ma tavivine na avena vuso mine Ierusalem sou longesi a inade ne amutou. Me amutou kale ne mu ubi e

amiteu a inade ve amiteu valiputemate a bibi edo.”

<sup>29</sup> Moni e Pita pilu e sou a aposel sanii sou adeliu maido, “Namiteu ogomuli moni a inade mine Salemo. Namiteu ma ogomuli ete a inade mina vanunua.

<sup>30</sup> Amutou gati e Iesu mina obu tasa me amutou valiputemate ei, moni e Salemo mine tubutubune eitou ei mailisiliu e ei.

<sup>31</sup> Salemo i guale ei uata mei tau ei na limane ei e gata. Me ei muina a bibi mina maitena vea usinani ne eitou, me ei gualeliu e eitou, me ei ni buloi eitou e Israel mina sauvulena lilone eitou, me ei ni taulele a sinusu mine eitou.

<sup>32</sup> Amiteu ite a golugolu ieli Salemo ei goli, me amiteu malongo a inade minei. Ma Maolona Nunu tamai ei malongo a inade na golugolu sou ie. Salemo ei bilii a Maolona Nunu usino ne sou a vanunua ma tavivine sou ogomuli a inade minei.”

*Gamaliel ei vei ana vanunua na avelulusera inade ne so toekekeke moni ane sou a aposel*

<sup>33</sup> Sou a vanunua mina avelulusera inade sou longe a inade mine Pita, me sou sinoa mamau sele, me sou kale ne sou valipute sou a aposel ne sou mate.

<sup>34</sup> Moni a bibi tasa ei ino, ei e Parisi, aisana e Gamaliel. Ei a bibi na matetengina mina binea me sou a vanunua ma tavivine sou beilangelange a aisana. Ei magili balivua ne sou a vanunua na avelulusera inade mei vei le sou ne sou guale sou a aposel usala me ne sou magili tabaa sapa bisii.

<sup>35</sup> Sou galiosi usala, io Gamaliel ei vei le sou a vanunua mina avelulusera inade sanii maido, “Amutou a vanunua mine Israel, mane amutou kale namutou goli a golu tasa usino ne sou a vanunua ie, kubaana ne amutou damutala iiti pala.

<sup>36</sup> Amutou muada, ei saboa tabaa e Teudas ei ilisi mei vei ve ei a bibi buo mei isa a aisa buo. Ma tabaa oto a vanunua mapigogoi savulu sobo iva sou ogomuli e ei. Moni a vanua na itealalena avena sou valipute ei, me sou a vanunua sou silimuli e ei sou oava maisaba, ma pipigona mine sou ei buale sabubu.

<sup>37</sup> Mulimuli na ilala a vanua na itealalena avena sou niagetole a aisane sou a vanunua ma tavivine, Iudas mine Galili ei ilisi mei lapuale a damutatalana mina vanunua ma tavivine sanii. Me sou ogomuli e ei me sou mailisi a maubina mina taulelena vanunua mina itealalena avena buo. Moni sou valiputemate ei, me sou a vanunua sou silimuli e ei sou oava maisaba.

<sup>38</sup> Maido me seidei eau vei le amutou, namutou ma goligoli lei a golu tasa usino ne sou a vanunua do. Umana. Mu itetase

moni e sou a muine sou. Mane a pipigona sou goli ie ei palea maino na damutatalana mina vanunua moni, iede ei ni mamau.

<sup>39</sup> Moni mane Salemo oto ei mailisi a pipigona ie, io amutou ma mapigogoi ete namutou magilisobe sou. Dae ne amutou maubi ane Salemo.”

Io sou a vanunua na avelulusera inade sou ogomuli a inade mine Gamaliel.

<sup>40</sup> Sou toleale sou a aposel usinani, me sou vei le sou a vanua ne sou tibi e sou. Me sou magilisobe sou ne sou ma malongolongo lou a inade na aisane Iesu. Me sou litase sou ne sou asu usino.

<sup>41</sup> Maido me sou a aposel sou ilisitase a vanunua mina avelulusera inade me sou gali usala. Na ilala sou asu, sou mongemonge sele, vuna sou damu ve Salemo ei longo ane sou ne sou guale a maelana na aisane Iesu.

<sup>42</sup> Na malada vuso, sou asuasusino na luma mine Salemo ue na luma mine sou, me sou matetengi e sou a vanunua ma tavivine maido Iesu ei e Krai. Sou ma veletase ete a pipigona mina veimuadena malongolongona kubaana odo.

## 6

*Sou vileale a bibi padilua mina buloine sou a aposel*

<sup>1</sup> Na ilala do a savulu ne sou a disaipel i palea papaina sele. Me sou a disaipel mine Grik, sou ade papai ane sou a disaipel mine Hibru. Sou vei maido, “Na malada vuso amutou buloiloi e sou a vanunua ma tavivine sou boto a gona inani ma golu sanii, moni amutou ma buloiloi ete a buasasu mine amiteu.”

<sup>2</sup> Maido ma aposel savulu tasa timana lua sou toleale a disaipel vuso usinani, me sou vei le sou maido, “Mane amiteu itetase a pipigona na malongona inade mine Salemo me amiteu pipigo a soebulena gona inani, ede ei ma puiale ete.

<sup>3</sup> Maido me tamtamaigu, ne amutou poge a vanunua padilua balivua ne amutou, sou isa a aisa i kubaana ma Maolona Nunu i vonu ne sou me sou isa a muadana ei kubaana. Me neitou tau e sou a vanunua do mina itealalena pipigona ie.

<sup>4</sup> Moni amiteu oto namiteu pipigo taliuliu a kinaka ma matetengina a inade mine Salemo.”

<sup>5</sup> Vanunua ma tavivine vuso sou kale a inade mine sou a aposel. Me sou vileale Stiven, ei a bibi ei isa a silimulina i sagali ma Maolona Nunu i vonu ne ei. Me sou vileale e Pilip, Prokorus, Nikano, Timon, Pamenas me Nikolas. Nikolas ei a bibi maino ne Antiok, moni ei ogomuli a kinaka mine sou e Iuda.

<sup>6</sup> Sou mamagili e sou a vanunua do na matane sou a aposel, me sou a aposel sou

kaka me sou tau a limane sou muata ne sou, mina vilealene sou ne sou goli a pipigona iedo.

<sup>7</sup> Ma inade mine Salemo i veleububula na aveavena vuso. Vanunua ma tavivine papaina lou ne Jerusalem sou palea a disaipel. Me papaina mine sou a prist tamai sou ogomuli a inade mine Salemo me sou silimuli.

*Sou e Iuda sou vavasa ane Stiven*

<sup>8</sup> Salemo i buloi sele Stiven me ei bilii e ei a sagalina, maido me Stiven ei goli a matamatana gona sinaga buobuo balivua ne sou a vanunua ma tavivine.

<sup>9</sup> Moni a vanunua sanii mina luma na kinaka mine sou e Iuda, sou ilisi me sou maubi a inade pilu e Stiven. Sou a abuna kinaka mine sou e Iuda, sou vate a viepiluna kinaka mine sou so malamala. Sou a vanunua maino ne Sairini me Aleksandria me na avena buo lua ne Silisia me Asia.

<sup>10</sup> Ma Maolona Nunu ei bilii a muadana kubaana sele usino ne Stiven, maido me sou a vanunua do sou ma mapigogoi ete ne sou seleuli a inade minei.

<sup>11</sup> Maido me sou ovu me sou toegolali a vanunua sanii na inade mina nioto maido, "Amiteu longe e Stiven ei goli a inade pagu usino ne Moses me Salemo."

<sup>12</sup> Me na inigogona iedo sou mailisi a lilone sou a vanunua ma tavivine me sou a vanua buobuo me sou a vanua na muadana binea. Me sou asu usino ne Stiven me sou saavi e ei, me sou maasi ei usino na vanunua na avelulusena inade.

<sup>13</sup> Me sou mamagili a vanua na aualana sanii ne sou ubi a adeaualana sanii usino ne ei. A vanunua do sou vei maido, "Taliuliu taliuliu a bibi iede ei adegegelugelu ana luma mine Salemo me mina binea minei.

<sup>14</sup> Amiteu longe ei vei maido, a bibi iede Iesu mine Nasaret ei ni toegegeli a luma de mei ni adevuse a inigogona vuso lisa Moses ei bilii e eitou."

<sup>15</sup> Me a vanunua vuso na avelulusena inade, sou amusoepute Stiven, me sou ite a lagune ei i muada tomane a laguna bineanea tasa mine Salemo.

## 7

*Stiven i ademuada ana vanua na avelulusena inade*

<sup>1</sup> Io a mapana prist tasa i tagi e Stiven maido, "A inade sou a vanua sou ubi e oo do, ei patotona ue boa?"

<sup>2</sup> Me Stiven ei ade maido, "Amutou tamta-maigu me tamatamagu, amutou longe. Ilala e tubune eitou e Abraham ino na magamaga Mesopotemia me ei saboa asu usino ne Haran, Salemo mina langi ei e Salemo ei isa a sagagalina taula, ei palea le Abraham.

<sup>3</sup> Me Salemo ei vei lei maido, 'Oo ilisitase a aubu minio me maututumumu, mo asu usino na avena magamaga eau na maite oo.'

<sup>4</sup> "Maido me Abraham ei ilisitase a magamaga mine sou e Kaldia me ei asu usino me ei ugu ne Haran. Na ilala tamane ei matesi, Salemo ei peltase ei usinani ni ugu na magamaga ie, seidei amutou malu iedo.

<sup>5</sup> Moni Salemo ei ma bilii ete a avena magamaga tasa bisii i mapigogoi a lovana tasa usino ne Abraham. Moni Salemo ei adegatunasi maido, mulimuli ei ni bilii a magamaga iedo usino ne ei, a magamaga iedolo Abraham pilu e tubutubune ei ne sou malu i. Na ilala e Salemo ei goli a inade do, Abraham ei saboa isa e natuna tasa.

<sup>6</sup> Salemo ei vei le Abraham maido, 'Sou a abune tubutubumu ne sou asu usino na avena vuso mine sou a abuna sea. Me ne sou palea tomane a vanunua mina pipigona sabubu moni, me sou a abuna sea ne sou toegegeli e sou i mapigogoi a avala savulu sobo iva.

<sup>7</sup> Moni mulimuli eau na vavasa ane sou a vanunua sou goli a inigogona do usino ne sou. Me mulimuli a abune tubutubune natatune amutou ne sou asutase a aubu iedo, me ne sou kaka agu na avena ie.\*

<sup>8</sup> Me Salemo i vei le Abraham ni moge ei tomane a matailala na magilipiluna e Salemo ei bilii e ei. Me mulimuli Abraham ei maalepose e Aisak, mei moge Aisak na malada pantolu. Me Aisak ei maalepose e Iekop, me Iekop ei e tamane tubune eitou savulu tasa timana lua.

<sup>9</sup> "Tubutubune eitou odo sou lilogegelu ane Iosep, tasine sou, me sou masosove ei tomane a bibi na pipigona sabubu usino ne sou e Isip. Moni Salemo ei ino pilu e ei.

<sup>10</sup> Salemo ei buloi e ei me ei mapalipali a mavaana vuso minei. Na ilala Iosep ei ade pilu a mapana mine Isip, Salemo ei bilii e ei a muadana kubaana me ei goli a mapana i kale ei. Maido ma mapana i tau ei muina a munugana bibi mina itealalena avena e Isip, me ei iteale a golugolu vuso mina luma mine mapana.

<sup>11</sup> "Mulimuli ilala na vitolona taula i palea na avena vuso ne Isip me mina avena vuso na magamaga Kenan, maido me sou a vanunua ma tavivine sou isa a mavaana taula. Me sou e tubutubune eitou sou a gona inani boa.

<sup>12</sup> Moni Iekop ei longe a inade maido vit ino ne Isip, me ei peltase e tubutubune eitou usino ne Isip na munugana inasu.

<sup>13</sup> Na ilala sou asu lou na maluana inasu, Iosep vei le tuatuaana maido, 'Eau e Iosep.' Me mulimuli mapana tamai ei muada e sou mine Iosep.

\* 7:7 Sinokona 15:13-14

<sup>14</sup> Me Iosep ei masosove a inade mei toleale tamana e Iekop ni asu usinani ne ei, pilu e sou vuso a abuna minei, a vanunua ma tavivine sou savulu padilua timana lima.

<sup>15</sup> Io Iekop i asu utano ne Isip. Me mulimuli ei mate, me sou e tubutubune eitou sou tamai sou mate.

<sup>16</sup> Me sou tabule liu a aitolane sou usino ne Sekem me sou peilai e sou na muina minate do, lisa Abraham ei oli a vatu silva maino ne natatune Hamor ne Sekem.

<sup>17</sup> “Io ilala Salemo i valisobesi a patotonana inade minei lisa ei goli le Abraham, a ilala do bisii moni ni palea. Me sou a abuna mine Israel ino ne Isip sou palea a abuna buo sele.

<sup>18</sup> Mulimuli a mapana tasa i ma muada oto e Iosep ei palea ne Isip.

<sup>19</sup> A mapana do ei goletase sou a abuna mine eitou mei goli a inigogona pagu usino ne sou. Me ei ade sagali ane sou ne sou pitase a mongomongo banini mine sou ne sou mate.

<sup>20</sup> “Na ilala do tinane Moses i vasusu e ei. Ei a doana bibaini na matane Salemo. Me sou iteale oovi ei lilo na luma mine tamana mapigogoi a game tolu.

<sup>21</sup> Mulimuli sou tau ei usala, me natuna tavine mine mapana, Pero, ei guale ei me ei iteale ei tomane natune ei oto.

<sup>22</sup> Me Moses ei guale a muadana vuso ne Isip, me ei palea a bibina inade me a pipigona minei i sagali.

<sup>23</sup> “Ilala e Moses a avalana savulu ivasi, ei damutatala ve ni asu ni ite sou e tamtamaine ei, sou e Israel.

<sup>24</sup> Na malada tasa ei ite Isip tasa ei toegegeli e Israel tasa. De ei buloi e Israel do me ei maliu a inigogona pagu usino ne tau Isip edo. Ei ubi e Isip odo me ei valiputemate ei.

<sup>25</sup> Moses ei damu ve tamtamaine ei ne sou muada i maido, Salemo i kale ni gualeliu e sou na limane ei. Moni sou ma muada oto i.

<sup>26</sup> Maisavulo, Moses ei ite tau e Israel lua su maubi lou. Ei kale ni valimate a maubina mine sulu, me ei asuale sulu mei vei, ‘Ae, amulu tametasi moni, posa matina amu toegegeli e amulu oto?’

<sup>27</sup> “Moni a bibi ei a vuna sinoana do, ei subulai liu e Moses. Me ei vei, ‘Sei tau e oo mo palea a munugana ma bibi mina vivilealena inade mine amiteu?’

<sup>28</sup> O kale no valiputemate eau, tomane lavi o valiputemate tau Isip iedo, io?’

<sup>29</sup> Moses ei longe a inade do, mei iava. Ei asu usino mei ugu na magamaga mine sou e Midian. Mulimuli ei taulai mei isa a natuna bibi lua.

<sup>30</sup> “Io a avala savulu iva pulosi, ma bineanea tasa mine Salemo i sibitala le Moses na magamaga a vanua boa, i agavuale a loena Sainai. Bineanea mine Salemo muina lilo na oavi ei palea lilo balivua na obu baini tasa.

<sup>31</sup> Moses ei ite me ei damutatala papai a golu i palea do. Ei kale ni ite kube me ei asu agavuale, me Bibi Taula i vei lei maido,

<sup>32</sup> ‘Eau e Salemo mine Abraham, mine Aisak me mine Iekop.’<sup>†</sup> Me a vovone Moses i palili, me ei lae a gemualena.

<sup>33</sup> “Me Bibi Taula ei vei lei, ‘O kaitase a ubupolo minio, vuna magamaga oo magiligili ieli ei minau oto mei maolo.

<sup>34</sup> Eau itesi a inigogona pagu vuso sou goli le sou a abuna vanunua ma tavivine minau ne Isip. Eau longesi a tinangi mine sou, me seidei eau na asu utano me eau na gualeliu e sou na limane sou Isip. Maido me oo ilisi. Eau kale na peltase oo usino ne Isip.’<sup>‡</sup>

<sup>35</sup> “Palapala sou e Israel sou saukiki e Moses, me sou vei lei maido, ‘Sei vileale oo no palea a mapana ma bibi mina vivilealena inade mine amiteu?’ Io Moses a bibi moni iodo Salemo i peltase usino tomane a mapana ma bibi na gualeliune sou. Salemo ei masagali ei na limana bineanea i palea le ei na obu baini.

<sup>36</sup> Moses ei gualelele sou maino ne Isip, me ei goli a matamatana gona sinaga ino ne Isip me mina dasi Kasoso me mina avena a vanua boa na avala savulu iva.

<sup>37</sup> “Moses iodo ei vei le sou e Israel maido, ‘Salemo ni vileale e tamaine amutou tasa a profet tomane eau oto.’

<sup>38</sup> Ilala tubutubune eitou sou ino na viepiluna kinaka mina avena a vanua boa, Moses ino pilu e sou. Me ei asu uata na loena Sainai ma bineanea mine Salemo i bilii e ei a inade. Ei guale a inade mine Salemo, inade do ei isa a maulina, me ei bilii a inade do usinani ne eitou.

<sup>39</sup> “Moni e tubutubune eitou sou ma kale ete ne sou longe a inade mine Moses. Sou saukiki a inadene ei me na lilone sou so kale sele ne sou veteliu usino ne Isip.

<sup>40</sup> Sou vei le Aron maido, ‘Amiteu ma muada oto i sei golu palea le Moses, bibi iede ei guale eitou ne Isip me ei maasi eitou usinani. Maido me oo no pui ane amiteu a salemo sanii, me ne sou muge amiteu me ne sou maasi e amiteu na vea.’<sup>§</sup>

<sup>41</sup> Na ilala do sou pui a natuna bulmakau tasa, me sou goli a niabi usino ne salemo na aualana do. Me sou mongemonge a golu odo sou pui a limane sou oto.

<sup>42</sup> Maido me Salemo i lametase sou, ne sou kaka ana oaso ma game ma mataidoido

ma golu sanii maido, tomane a inade ino na laulau mine sou a profet,

'Amutou Israel, na ilala amutou ino na avena a vanua boa a avala savulu iva, me amutou valipute a bulmakau ma sipsip me mu goli a niabi, nane amutou goli a niabi iede usinani minau, io? Boa vuso sele.

<sup>43</sup> A luma bale taula amutou tabulebule iede, ei a luma bale minau boa. Ei mine salemo na aualana Molek.

Me amutou tabulebule a nunu na mataidoido mina salemo auala e Repan. Amutou pui e sou a salemo auala, ve ne amutou kaka ane sou.

Maido me eau na peltaselele amutou maino na avena mine amutou, me eau na peltase amutou usino na magamaga mina avena ne Babilon.\*

<sup>44</sup> "Ilala tubutubune eitou ino na avena a vanua boa, sou isa a luma bale mine Salemo. Na bale do Salemo ei mapalele a inade patotona minei. Na ilala sou goli a bale do, sou goli a golugolu vuso tomane Salemo i vei le Moses, me sou ogomuli bilesi a nunu Moses ei ite.

<sup>45</sup> Mulimuli tubutubune eitou, sou guale a bale do, me sou asu pilu e Iosua ne sou guale a magamaga mine sou a vanunua mina abuna vanunua seasea. Me Salemo i taulele sou a abuna do na lagune sou e tubutubune eitou. Me sou mamagili a bale, me ei muina na magamaga do i mapigogoi a ilala mina mapana e Devit,

<sup>46</sup> ei a bibi iodo Salemo ei toekubekube sele ei. Devit ei kake Salemo ni longo ane ei ni tige a luma mine Salemo, ve ne sou a abuna tubutubune Iekop sou mapigogoi ne sou asuale me ne sou kake Salemo.

<sup>47</sup> Moni mulimuli, Solomon ei tige a luma do.

<sup>48</sup> "Moni e Salemo oata oto sele ei ma malumalu oto na luma vanua sou tige. Ei tomane a profet ei vei,

<sup>49</sup> 'Salemo ei vei maido, "Langi ei a niugugu mapana minau, ma magamaga ei a muina eau tau a ubugu muata i.

Maido me namutou tige sei matana luma minau?

Me sei avena ni muina a aubu na manoana minau?

<sup>50</sup> Eau oto eau mapale a golugolu vuso iede.<sup>†</sup>"

<sup>51</sup> Me Stiven ei vei le sou a vanunua na avelulusena inade lou maido, "Amutou a vanunua na toevautautana. Lilone amutou ma damutatalana mine amutou ei sobo tomane a vanunua mina longetasena binea. Ma tagilane amutou i sobo me amutou

ma muada oto a longemulina inade mine Salemo. Taliuliu amutou saukiki a inade mina Maolona Nunu, tomane tubutubune amutou sou goli lisa.

<sup>52</sup> Lisa tubutubune amutou sou goli a inigogona pagu usino ne sou a profet paimana. Sou valiputemate a vanunua lisa sou veipale maido a bibi na gunolina inigogona bilesi ei ni asu usinani. Me seidei a bibi iodo ei asuosi usinani, me amutou tau ei na limane sou a butu me mu valipute ei.

<sup>53</sup> Amutou gualesi a binea mine Salemo na limane sou a bineanea, moni amutou ma ogomuli ete."

*Sou ubi e Stiven a vatu me sou valipute ei*

<sup>54</sup> Sou a vanunua na avelulusena inade sou longe a inade mine Stiven, ma lilone sou i tivula gegelu sele ane ei me sou gado kasesele a livone lou.

<sup>55</sup> Moni a Maolona Nunu ei vonu ne Stiven, me ei gemu uata na langi mei ite a malasana buo mine Salemo na langi me Iesu magiligili na limane Salemo e gata.

<sup>56</sup> Me Stiven ei vei maido, "Longe, eau ite a langi i peo, me Natuna Bibi ei magili a muina na limane Salemo e gata."

<sup>57</sup> Sou longe a inade iedo me sou ngala mamau sele, me sou tabesobe a tagilane sou. Me sou ilisi pilu me sou vele usino me sou saavi e Stiven.

<sup>58</sup> Me sou peltaselele ei usala na aubu, me sou ubi ei a vatu mina valiputene ei. Sou a vanunua palapala sou ubi e ei a inade, sou kaitase a kinainai lagolago mine sou, me sou tau agavuale a ubune a bibi alaba tasa, aisana e Sol.

<sup>59</sup> Ilala sou langelange a vatu usino ne Stiven, Stiven ei kaka maido, "Bibi Taula Iesu, oo guale a nunugu."

<sup>60</sup> Me ei totopatulu me ei tola sagali sele, "Bibi Taula, oo no ma adovedove lei a sinusu ieli usino ne sou." Stiven ei ade maido, me ei mate.

## 8

<sup>1</sup> Me Sol damu i, a inigogona sou goli le Stiven iedo ei bilesi.

*Sol ei toegegeligeli a viepiluna kinaka*

Na malada sou valipute Stiven, sou soke a toegegeline viepiluna kinaka ne Ierusalem. Maido me sou oava na aveavena vuso mine Iudia me Samaria. Moni sou a aposel sou ugu a muine sou ne Ierusalem.

<sup>2</sup> Vanunua sanii sou ogomuli iiti a inigogona Salemo ei kale, sou pelilai e Stiven, me sou tangi mamau sele e ei.

<sup>3</sup> Me Sol ei toegegeligeli a vanunua ma tavivine na kinaka. Ei gali ulilo na luma mine sou mei lapuale a vanunua ma tavivine mei tau e sou na luma na tunuui.

\* 7:43 Amos 5:25-27 † 7:50 Aisaia 66:1-2

*Sou malongo a malongolongona kubaana ino ne Samaria*

<sup>4</sup> Sou a vanunua ma tavivine sou oava usino na aveavena vuso do, sou malongo a malongolongona kubaana na aubu vuso sou malu i.

<sup>5</sup> Pilip ei asu usino na aubu buobuo tasa ne Samaria, mei malongo ane sou a malongolongona kubaana mine Krai.

<sup>6</sup> Vanunua ma tavivine papaina sele sou longe a inade ne Pilip, me sou ite a gona sinaga ei goli, me sou longe kube a inade minei.

<sup>7</sup> Sou ite Pilip ei votetase a nunu pagu na vanunua ma tavivine makuba, ma nunu sou odo sou ngala gegelu sele, me sou veletase sou. Ma vanunua papaina a tuatwane sou i matesi ma ubune sou i pagu, sou kuba lou.

<sup>8</sup> Maido ma munonge buo ei sibitala ne sou a vanunua ma tavivine na aubu do.

<sup>9</sup> Bibi tasa ino na aubu iedo, aisane ei Saimon. Lisa ei goligoli a milolo ma matamatana mialo, ma vanunua ma tavivine ne Samaria sou ite me sou saga mamau. Ei vevei maido, "Eau a bibi buo."

<sup>10</sup> Me sou a vanua buobuo ma vanunua ma tavivine sabubu, sou vuso sou sagali a nilongena inade mine Saimon. Sou vei ve, "Sagalalina mine Salemo iedo, sou vate a sagagalina buo, ei ino ne bibi iede."

<sup>11</sup> Sou sagali a nilongena inade minei, vuna ilala papaina sou ite ei goli a milolo ma mialo sele, me sou saga sele.

<sup>12</sup> Moni na ilala Pilip ei veipale a malongolongona kubaana mina niitealalena mine Salemo me mina aisane Iesu Krai, sou a vanunua ma tavivine sou silimuli me sou guale a maavuvutuna.

<sup>13</sup> Me Saimon tamai ei silimuli mei guale a maavuvutuna. Me ei ogomuli e Pilip mei ite a matamatana gona sinaga buo Pilip ei goli, me ei saga.

<sup>14</sup> Sou a aposel ino ne Ierusalem sou longe sou e Samaria sou galesi a inade mine Salemo. Maido me sou peltase Pita pilu e Ioanes usino ne sou.

<sup>15</sup> Sulu asu sibitala, de su kaka ve ne Salemo ni bilii i a Maolona Nunu usino ne sou e Samaria do,

<sup>16</sup> vuna maido a Maolona Nunu ei saboa sibitala usino ne sou. Sou guale moni a maavuvutuna na aisane Iesu.

<sup>17</sup> Sulu kaka pulosi, me su tau a limane sulu muata ne sou, me sou guale a Maolona Nunu.

<sup>18</sup> Saimon ei ite a aposel lua su tau a limane sulu muata ne sou, me sou guale a Maolona Nunu. Maido me ei guale a vatu usinani ne sulu, me ei vei maido,

<sup>19</sup> "Amulu bilii i a sagalina iede usinani minau tamai. Maido me mane eau tau a

limagu muata na bibi tasa, ei ni guale a Maolona Nunu."

<sup>20</sup> Moni e Pita ei vei le Saimon maido, "Oo no buale pilu a vatu minio! Golu e Salemo ei bilii i tomane a niabi, iede o damu ve no oli a vatu, io? Boa vuso sele.

<sup>21</sup> Lilomu ei ma biliesi oto na matane Salemo. Maido me oo ma puiale ete o no muimu lilo mina pipigona mine Salemo amiteu goli ie. Boa vuso sele.

<sup>22</sup> Oo sauvule a lilomu mo lametase a inigogona pagu minio, me oo kaka ane Bibi Taula ni lilotase a vuna damutatalana pagu iede na lilomu.

<sup>23</sup> Eau vei maido, vuna eau ite oo isuale sele e amiteu, ma isualena do ei sibitala tomane a golu pagu ei toegegeli a damutatalana minio, me ei goli oo muimu na luma na tunuui mina sinusu."

<sup>24</sup> Me Saimon ei sie a inade maido, "Amulu kaka ane Bibi Taula, ma golugolu amu veiosi iede ni ma palea le ete eau."

<sup>25</sup> Io a aposel lua do sulu malongo a inade mine Bibi Taula me sulu vei le sou a vanunua ma tavivine a golugolu sanii e Bibi Taula ei goli le sulu. Me mulimuli ilala sulu veteliu usino ne Ierusalem, sulu malongo a malongolongona kubaana mina aububuna makuba ne Samaria.

*Pilip ei malongo a malongolongona kubaana usino na bibi mine Itiopia*

<sup>26</sup> A bineanea tasa mine Bibi Taula ei vei le Pilip maido, "Oo ilisi mo asu usino na avena malilo, me oo ogomuli a vea pantase Ierusalem iedo me oo asu utano na aubu buo e Gasa." A vea do ei ino na avena vanua boa.

<sup>27</sup> De Pilip ei ilisi me ei asu. Me na vea do ei ite a bibi tasa mine Itiopia. Ei a bibi buo tasa i pipigo ane mapana tavine mine Itiopia, Kandasi, me ei itealale a vatu vuso ma golu sanii mina mapana tavine. Bibi iedo ei asu usinani ne Ierusalem mina kinaka,

<sup>28</sup> na veteliuna minei seidei ei ugugu na karis minei, me ei gigi a laulau mine profet e Aisaia.

<sup>29</sup> Me a Maolona Nunu ei vei le Pilip maido, "O asu usino agavuale a karis iede."

<sup>30</sup> De Pilip ei vele agavi usino, me ei longe a bibi iodo ei gigi a laulau mine profet e Aisaia. Me Pilip ei vei maido, "Oo muada a vuna inade oo gigi iede ue boa?"

<sup>31</sup> Ma bibi iedo ei sie a inade maido, "Bibi tasa boa ni veimuade a vuna inade ie le eau, eau na muada i matina?" Me ei vei le Pilip, "Oo sae uata na karis minau mo ugu pilu e eau."

<sup>32</sup> A maduna laulau ei gigi iedo, ei isa a inade maido,



"Ei asebuu moni tomane a sipsip sou guale usino ne sou valipute, me tomane a natatuna sipsip sou kale ne sou oove a aivune sou.

<sup>33</sup> Sou tau sele ei utano, me sou ma goli ete a balesina vavasana minei.

Maido me ei ma isa oto a abuna natatuna, ne sou mapamuli e sou. Boa.

Vuna sou mapuli a maulina minei, me ei eili mina magamaga boasi."\*

<sup>34</sup> Ei tagi e Pilip maido, "Vei le eau. A profet ei ade e sei? Ei vei e ei oto, ue a bibi tasa sea?"

<sup>35</sup> De Pilip ei malongo ana bibi iedo. Pala-pala ei malongo a vuna inade a bibi iede ei gi, me mulimuli ei malongo a inade sanii na malongolongona kubaana mine Iesu.

<sup>36-37</sup> Sulu asuasu na vea me sulu sibitala na nanu tasa. Ma bibi iedo ei vei, "Oite, a nanu ie. Me eau mapigogoi na guale a maavvutuna?"

<sup>38</sup> Io a bibi iedo ei vei le inaunau na karis ni magili. Me Pilip pilu a bibi iedo sulu asu utano na nanu. Me Pilip ei maavvuti e ei.

<sup>39</sup> Me sulu tululanga uata, ma tabaa oto a Nunu mine Bibi Taula i guale Pilip usino, ma bibi iedolo ei ma ite ete lei e ei. Moni a bibi iedo ei mongemonge mei ogomuli a veane ei mei asu.

<sup>40</sup> Pilip ei asu sibitala ne Asdot, mei asu usino na aubu buobuo vuso do mei malongo a malongolongona kubaana mine Iesu. Me mulimuli ei asu sibitala na aubu buobuo e Sisaria.

## 9

### *Sol ei sawvule a lilona*

*(Apo 22:6-16, 26:12-18)*

<sup>1</sup> Na ilala do Sol i ade sagali sele a toegege-line sou a disaipel mine Bibi Taula me mina valiputemate ne sou. Maido me ei asu usino na mapana prist

<sup>2</sup> mei tagi e ei ni niage a laulau usino ne sou a munuganuga mina luma na kinaka mine sou e Iuda ne Damaskus. Laulau sou odo ei isa a inade maido, "Mane Sol ei ite a vanunua ma tavivine sanii sou ogomuli a vea mine Iesu, de ei puiale ni lapitole sou mei maasi e sou usino ne Ierusalem."

<sup>3</sup> Io Sol ei ilisitase Ierusalem mei asu usino ne Damaskus. Ilala ei sibitala agavuale Damaskus, saga i a muada tasa muata na langi ei vele utano minei. Muada dolo i sagali sele

<sup>4</sup> me Sol ei bosa utano na magamaga. Me ei longe a baligoluna bibi tasa ei vei maido, "Sol, Sol, posa matina oo toegegeligeli e eau?"

<sup>5</sup> Me Sol ei vei, "Bibi Taula, oo e sei?" Me ei vei, "Eau e Iesu, oo toegegeligeli eau.

<sup>6</sup> Moni oo ilisi mo asu ulilo na aubu buobuo. Mulimuli a bibi tasa ni vei lio a golugolu vuso oo no goli."

<sup>7</sup> Vanunua sou ogomuli e Sol sou saga mamau, me sou ma ade oto. Sou longe a baligoluna, moni sou ma ite ete a bibi tasa.

<sup>8</sup> Io Sol ei ilisi mei matapulala, moni a matana i tunuui. Maido me sou lapitole a limana me sou tate ei ulilo ne Damaskus.

<sup>9</sup> Ei muina malada tolu, ma matana i tunuui moni. Me ei ma aani oto mei ma inu oto.

<sup>10</sup> A disaipel tasa mine Iesu ino ne Damaskus, aisana e Ananiaias. Me na tinada, Bibi Taula ei tole a aisane ei, "Ananiaias." Me ei vei, "Bibi Taula, eau eili."

<sup>11</sup> Me Bibi Taula ei vei lei maido, "Oo ilisi mo asu usino na vea de, aisana a Bilesina vea. Na luma mine Iudas no poge a bibi tasa na aubu e Tarsus, aisana e Sol. Seidei ei ino kakaka.

<sup>12</sup> Matane ei i tunuui, moni na tinada ei ite a bibi tasa, aisana e Ananiaias, ei gali ulilo mei tau a limana muata ne ei ni gemu lou."

<sup>13</sup> Me Ananiaias ei adeliu maido, "Bibi Taula, eau longe a vanunua papaina sou adeade a bibi iede ei goli a matamatana inigogona pagu usino ne sou a vanunua ma tavivine minio ne Ierusalem.

<sup>14</sup> Ei guale a nilongo maino ne sou a munugana prist ni papale sou a vanunua ma tavivine mina aubu ie sou viepilu me sou kaka na aisane oo."

<sup>15</sup> Moni Bibi Taula ei vei lei maido, "Oo asu. Seidei a bibi iedo ei palea a bibi na pipigona minau. Eau vilealesi ei ni asu usino ne sou a abuna sea me sou a mapana, me ne sou e Israel tamai, me ei ni veipale a aisagu usino ne sou.

<sup>16</sup> Eau na maite ei a matamatana davutina ma mavaana ei ni tabule na ilala ei veipale a aisagu."

<sup>17</sup> Io Ananiaias ei asu. Ei gali ulilo na luma do mei tau a limana muata ne Sol, me ei vei lei maido, "Tamaigu Sol, Bibi Taula e Iesu, ei sibitala le oo na vea, seidei ei peltase eau usinani minio, me oo no gemu lou ma Maolona Nunu ni vonu ne oo."

<sup>18</sup> Ananiaias ei ade pulosi, de ma tabaa oto a golu tasa tomane a gasigasi ino na matane Sol ei pu maino na matana, me ei gemu lou. Me ei ilisi mei guale a maavvutuna.

<sup>19</sup> Mulimuli Sol i aani mei palea sagali lou.

*Sol i malongo a malongolongona kubaana ne Damaskus*

Sol muina a malada sanii pilu e sou a disaipel ne Damaskus.

\* 8:33 Aisaia 53:7-8

<sup>20</sup> Ma tabaa oto ei asu bilesi usino ne sou a luma na kinaka mine sou e Iuda, mei malongo a inade maido, "Iesu ei e Natune Salemo."

<sup>21</sup> Vanunua vuso sou longe a inade mine Sol sou saga mamau sele. Me sou vei maido, "Ieli a bibi moni iedo ei toegegeli a vanunua ma tavivine sou kakaka na aisane Iesu. Sei-dei ei asu usinani ni papale sou mei ni maasi e sou usino ne sou a munuganugana prist."

<sup>22</sup> Moni a sagaline Sol i palea buo sele, mei ademuada iiti sele ane sou e Iuda ino ne Damaskus maido, "Iesu ei e Krai." Sou e Iuda sou longe a inade ne Sol, me sou saga me sou ma mapigogoi ete ne sou ade a inade tasa mina taupuine ei.

*Sou e Iuda sou butuale Sol, me ei iava*

<sup>23</sup> Malada papai pulosi, me sou e Iuda sou viepilu me sou maiademuli a valiputene Sol.

<sup>24</sup> Me Sol ei longe a inade na golu sou kale ne sou goli. De sou e Iuda sou ulago na tema vuso na aubu buobuo na oaso me na lodo tamai mina valiputene ei.

<sup>25</sup> Moni sou a disaipel mine Sol sou guale ei na lodo me sou tau ei na tanga taula tasa me sou volipui kekeke a tanga do utano masala na bigomu na aubu buobuo.

*Sol ei asu usino ne Ierusalem*

<sup>26</sup> Mulimuli Sol ei asu usino ne Ierusalem me ei kale ni ugu pilu e sou a disaipel. Moni sou vuso sou lae e ei, me sou ma silimuli ete ei tomene ei a disaipel tasa.

<sup>27</sup> Moni e Banabas ei guale Sol me ei maasi ei usino ne sou a aposel. Ei mapamuli ane sou e Sol ei ite e Bibi Taula na vea, me Bibi Taula i bilii e ei a inade. Me Banabas i mapamuli tamai e Sol ei ade sagali a aisane Iesu ne Damaskus.

<sup>28</sup> Maido me Sol i ugu pilu e sou ne Ierusalem mei gaga pilu e sou. Ei ma lae oto, me ei pipigo sagali a veipalena aisane Bibi Taula.

<sup>29</sup> Ei ade pilupilu e sou e Iuda sou ade a inade Grik, me ei maubi a inade pilu e sou. Moni sou tilotilo a vea ne sou valipute ei.

<sup>30</sup> Ilala sou e tamtamaina sou muada i maido, sou maasi e Sol utano ne Sisaria, me sou peltase ei usino ne Tarsus.

<sup>31</sup> Maido na avena vuso mine Iuda me Galili me Samaria sou a vanunua ma tavivine mina viepiluna kinaka, sou ugu iiti moni. Sou a vanunua seasea sou ma toegegeli ete sou, ma viepilupiluna kinaka ei palea sagali. Sou ogomuli a inigogona matano moni ane Bibi Taula ma Maolona Nunu i masagali a lilone sou. Ma savuluna vanunua ma tavivine sou silimuli sou salasuu uata.

*Pita ei toekube Ainias*

<sup>32</sup> Pita ei asu usino na avena vuso, me ei asu utano ne Lida tamai, me ei ugu pilu e sou a vanunua ma tavivine mine Salemo ne Lida.

<sup>33</sup> Na aubu iodo ei ite a bibi tasa, aisana e Ainias. Tuatuana vuso mamate, me ei mavuta moni na poso i mapigogoi a avala pantolu.

<sup>34</sup> Me Pita i vei lei maido, "Ainias, sei-dei Iesu Krai ei ni toekube oo mo palea kubaana lou. Oo ilisi mo toebilesi a poso minio." De ei ilisi asi.

<sup>35</sup> Ma vanunua vuso ne Lida me Saron sou ite Ainias ei kuba lou, me sou savuule a lilone sou usino ne Bibi Taula.

*Pita ei mailisiliu e Tabita*

<sup>36</sup> Ne Iopa a tavine disaipel tasa ino, aisana e Tabita. Na inade Grik sou vate e Dokas. Taliuluu ei goli a inigogona kubaana, me ei buloiloi a vanunua ma tavivine sou boto a golugolu.

<sup>37</sup> Na ilala do sinobe tasa guale ei me ei mate. Me sou maavuvuti a aitolane ei me sou tau ei na vilo tasa oata.

<sup>38</sup> Aubu Lida i agavi ne Iopa, ma disaipel sou longe a inade maido Pita ino ne Lida. Maido me sou peltase a bibi lua sou maasi a inade usino ne ei maido, "Oo asu asi usinani ne amiteu. Oo no ma tabaabaa lou."

<sup>39</sup> Io Pita ei ilisi mei asu pilu e sulu. Ei asu divi, me sou langetase ei na vilo uatata. Buasasu vuso sou asu usinani me sou magili saaili Pita me sou tangitangi. Sou maite ei a kinainai lagolago ma kinainai butolu Tabita ei sai, na ilala ei saboa ino pilu e sou.

<sup>40</sup> Me Pita ei peltaselele a vanunua ma tavivine usala, me ei totopatulu me ei kaka. Me ei gemu usino na aitolana tavine mei vei, "Tabita, oo ilisi." Io a tavine ei matapula mei ite Pita mei ilisi ugu.

<sup>41</sup> Io Pita ei sautole a limana mei tateilisi ei, me ei magili. Me Pita ei tole sou a vanunua ma tavivine mine Salemo pilu e sou a buasasu, me ei maite e sou maido Tabita i maulliuosi.

<sup>42</sup> Inade na golu e Pita ei goli iodo ei vele bubula na aveavena vuso na aubu e Iopa, me sou a vanunua ma tavivine sou longe. Me makuba sou silimuli e Bibi Taula.

<sup>43</sup> Me Pita ei muina malada papaina ne Iopa. Ei ugu pilu a bibi tasa aisana e Saimon. Bibi iedo ei a bibi na sinaina golugolu a uliulina bulmakau.

## 10

*Bineanea mine Salemo ei palea le Konilius*

<sup>1</sup> Bibi tasa ino ne Sisaria, aisana e Konilius. Ei a munuganuga mina vanunua na maubina savulu sobo tasa mine sou e Rom.

2 Ei pilu e sou minei sou matano moni ane Salemo. Ei buloiloi e sou a kapelabe mine Iuda papaina me taliuluu ei kake Salemo.

3 Na malada tasa, na matailala tolu na lavilavi, ei ite a golu tasa tomane a tinada ei muada sele. Ei ite a bineanea tasa mine Salemo ei gali ulilo na luma me ei vei lei maido, "Konilius."

4 Me Konilius ei gemuale ei me ei lae mamau. Ei vei maido, "Bibi Taula, matina?"

Ma bineanea ei vei le Konilius maido, "Salemo i longesi a kinaka minio me ei damutale a inigogomu o goli mina buloina vanunua sou boto a gologolu. Me Salemo ei kale a inigogona minio de.

5 Seidei no peltase a vanunua usino ne Iopa ne sou tilomuli a bibi tasa, aisana e Saimon, aisana tasa e Pita, me ne sou vei le ei ni asu usinani.

6 Bibi edo ino na luma mine Saimon tasa sea, ei a bibi na sinaina golugolu a uliulina bulmakau. Luma minei ino agavuale a mado."

7 Bineanea i bilii a inade usino ne Konilius pulu mei asu. Me Konilius tole a bibi na pipigona lua minei pilu a bibi na maubina tasa i ogomuli a inigogona mine Salemo.

8 Me Konilius ei ade ane sou a gologolu vuso i palea le ei, me ei peltase sou usino ne Iopa.

*Pita ei ite a golu tasa tomane a tinada*

9 Maisavulo sou asu sibitala agavuale Iopa na matailala savulu tasa timana lua na oaso. Na ilala do Pita ei sae uata na mapa na luma ni kaka.

10 Pita ei vitolo mei kale ni aani. Na ilala saboa ino sou masusulu a gona inani, ei ite a golu tasa tomane a tinada.\*

11 Ei ite a langi i peo, ma golu tasa i sivo muata, ei tomane a malo tasa i buo sele. A golu tasa i sautole a aisuna iva me a golu iodo i masasale utano na magamaga.

12 Lilo na malo do a matamatana golu vivi me a tavanaude ma matamatana manu ino.

13 Me Pita i longe a tinola tasa i ade maido, "Pita, o ilisi mo valipute sou mo ani."

14 Moni Pita ei vei, "Bibi Taula, umana sele! Na ilala tasa eau saboa ani a golu tasa i mumugu na matamu, me sou magilisobe namiteu ani."

15 Na maluana tinola ei vei le ei lou maido, "A golu Salemo ei mapale ei alaba, iedo o ma veivei lei mumugu."

16 Golu odo i palea matolu, ma tabaa oto a malo do i veteliu uata na langi.

17 Seidolo Pita i damutatala papai me ei vei, "Vuna tinada eau ite do, ei matina?" Ei saboa ino damutatala, vanunua Konilius ei peltase sou poge a luma mine Saimon me sou magili na tema.

18 Me sou tola maido, "Saimon, aisana tasa e Pita, ei eili nani ue boa?"

19 Pita ei saboa ino damutaletale a tinada do, ma Maolona Nunu ei vei maido, "Longe, bibi tolu sou asu usinani sou tilomulimuli e oo.

20 Maido mo ilisi sivo utano ogomuli e sou. O ma damutala papaipai lou. Eau oto eau peltase sou usinani."

21 Me Pita sivo utano ne sou a vanunua do, me ei vei le sou maido, "Bibi amutou tilomulimuli iodo, ede eau moni. Amutou asu usinani a sava?"

22 Me sou vei maido, "Konilius, ei a munuganuga mina vanunua na maubina savulu sobo tasa, ei peltase amiteu usinani. Ei a bilesina bibi me ei laelae e Salemo. Sou vuso a abuna ne Iuda sou vei, ei a doana bibi. A bineanea tasa mine Salemo i vei le ei ni toleale oo usino na luma minei ni longe a inade minio."

23 Maido me Pita i guale sou ulilo na luma mei iteale sou na lodo iedo. Maisavulo ei ilisi mei asu pilu e sou. Me sanii mina disaipel mine Iesu sou ino ne Iopa, sou asu pilu e ei.

*Pita i asu usino na luma mine Konilius*

24 Maisavulo sou asu sibitala ne Sisaria. Me Konilius ei magitali e sou. Ei tolealesi e sou a abuna minei pilu e sou e tamtamaina.

25 Pita i gali ulilo, me Konilius i asu agavuale ei me ei totopatulu agavi na ubune Pita me ei kaka ane ei.

26 Moni e Pita ei tateilisi ei mei vei maido, "O ilisi. Eau tamai eau a bibi moni."

27 Me Pita adeade pilu e ei mei gali ulilo, mei ite a vanunua ma tavivine makuba sou viepilu.

28 Me Pita i vei le sou maido, "Amutou oto mu muata, sou magili sagali sobe amiteu Iuda namiteu asu agavuale me ugu pilu e sou a vanunua na abuna sea. Moni e Salemo i maite eau maido, eau na ma damu oto i a bibi tasa ei ma maolo oto ue mumugu na matane Salemo.

29 Maido me eau ma saukiki ete a tinola ne amutou me eau asu usinani. Io seidei eau tagi e amutou, posa matina amutou toleale eau?"

30 Me Konilius i vei maido, "Golu tasa i palea le eau, ma malada tolu i pulosi. Ei maido. Eau ino na luma minau, me eau kaka na matailala tolu, ei tomane a matailala tasa moni seidei ie. Eau kakaka, saga i eau ite a bibi tasa i magili mina lagugu, ma kinainai minei i malasolosolo sele.

31 Me ei vei, 'Konilius, Salemo ei longesi a kinaka minio, me ei damutaletale a inigogona oo buloi e sou.

\* 10:10 Binea 14:4-20

<sup>32</sup> Maido me oo no peltase a vanunua usino ne Iopa me ne sou toleale Saimon, aisane ei tasa e Pita. Bibi iodo ino na luma ne Saimon tasa sea ei a bibi na sinaina golugolu a uliulina bulmakau, ma luma minei ei lau na mado.'

<sup>33</sup> Maido ma tabaa oto eau peltase a vanunua sanii usino minio. Me ei puiale sele o asu usinani. Io seidei amiteu vuso amiteu eiliosi na matane Salemo mina nilongena inade vuso Bibi Taula ei bilii e oo no vei le amiteu."

#### *Pita ei malongo*

<sup>34</sup> Io Pita vei maido, "Patotona sele, seidei eau muada, Salemo ei goli a inigogona tasa moni usino ne sou a vanunua ma tavivine na abuna vuso.

<sup>35</sup> Na abuna vuso, ei kale sou a vanunua ma tavivine ne sou matano ne ei, me ne sou goli a inigogona bilesi.

<sup>36</sup> Amutou muada a inade Salemo i bilii e amiteu a abuna mine Israel. Ei veipale a malongolongona kubaana maido, Iesu Kraisi e e Bibi Taula mina vanunua vuso, me ei toe eitou neitou lilo pilu e Salemo.

<sup>37</sup> Amutou oto mu muada i, tauluna ilala Ioanes ei veipale a inade na vanunua ne sou guale a maavuvutuna, malongolongona kubaana odo ei soke na avena ne Galili, me mulimuli ei palea na aububuna vuso mina avena vuso ne Israel.

<sup>38</sup> Amutou muada, Salemo ei vileale Iesu mine Nasaret, me ei bilii e ei a Maolona Nunu ma sagagalina buo. Me Iesu i asu usino na aub vuso mei buloi a vanunua ma tavivine mei toekube sou a vanua nunu pagu ei toegegeli e sou, vuna Salemo ei ino pilu e ei.

<sup>39</sup> "Me amiteu a vanunua na veipalena golugolu vuso ei goli na aububuna vuso mine amiteu e Iuda me ne Ierusalem. Sou otikulikuli a bibi iedo na obu tasa me sou valipute ei.

<sup>40</sup> Moni na malada tolu Salemo ei mailisiliu ei, me ei maite ei usino ne sou a vanunua ma tavivine.

<sup>41</sup> Moni ei ma palea oto ne Iuda vuso. Boa. Ei palea ne amiteu a vanunua lisa Salemo vileale mina veipalena inade minei. Ma ilala ei ilisiliuosi na muina minate, amiteu aani me amiteu inu pilu e ei.

<sup>42</sup> Me ei vei sagali ane amiteu namiteu veipale a inade usino na vanunua ma tavivine maido, 'Salemo ei vilealesi a bibi moni iedo ni longe a vavasana mina vanunua sou mauili me sou so matesi.'

<sup>43</sup> Sou vuso a profet sou veipale a inade mina golugolu ei goli, me sou vei maido, na aisana bibi moni iedo, Salemo ei ni taulele a sinusu mina vanunua vuso sou silimuli e ei."

#### *Sou a vanunua na abuna sea sou guale a Maolona Nunu*

<sup>44</sup> Pita i saboa veipalele a inade, ma Maolona Nunu i sivo utano na vanunua ma tavivine sou longelongo a inade mine Salemo.

<sup>45-46</sup> Maido me sou a disaipel mina abuna ne Iuda sou asu usinani pilu e Pita, sou saga mamau me sou vei maido, "Oite. Salemo ei bilii a Maolona Nunu tomane a niabi usino na vanunua ma tavivine mina abuna sea tamai." Me Pita ei vei maido,

<sup>47</sup> "Sou a abuna do sou gualesi a Maolona Nunu tomane moni amiteu, maido me sei ni magilisobe amiteu a maavuvutine sou a nanu?"

<sup>48</sup> Me Pita i vei le sou a vanunua ma tavivine do maido, "Kubaana namutou guale a maavuvutuna mina aisane Iesu Kraisi." Sou gualesi a maavuvutuna, io sou vei le ei ni muina pilu e sou a malada sanii lou.

## 11

#### *Pita i asu usino ne Ierusalem me ei ade a golugolu sou palea*

<sup>1</sup> Sou a aposel me sou tamtamaina ino na avena vuso ne Iudia sou longe a inade mina vanunua ma tavivine mina abuna sea tamai sou gualesi a inade mine Salemo.

<sup>2</sup> Na ilala Pita i asu usino ne Ierusalem, a abuna disaipel sou sagali a ogomulina inigogona munogena, sou sinoa ane ei.

<sup>3</sup> Sou vei maido, "Posa matina oo gali ulilo na luma mina vanunua sou ma mogemoge ete sou, me oo aani pilu e sou?"

<sup>4</sup> Pita i mapamuli a golugolu vuso i palea le ei. Ei vei maido,

<sup>5</sup> "Eau ugu ne Iopa, me eau kaka, me eau ite a golu tasa tomane a tinada. Eau ite a golu tasa i sivo muata na langi, ei tomane a malo taula. Golu tasa i sautole a aisuna iva me a golu iedo i masasale utano minau.

<sup>6</sup> Me eau gegemu kuba lilo mina malo, me eau ite a matamatana vanoluma, me sou a viuvitu masivo, me sou a tavanaude ma manumanu.

<sup>7</sup> Me eau longe a tinola na bibi tasa i vei le eau maido, 'Pita, o ilisi, valipute sou mo ani.'

<sup>8</sup> "Moni eau vei, 'Bibi Taula, eau ma mapi-gogoi sape ete! Na ilala tasa eau saboa ani a golu tasa ei ma maolo oto me ei mumugu na matamu.'

<sup>9</sup> "Moni a tinola maino na langi odolo ei vei maluana lou maido, 'Golu e Salemo i mapale alaba, iedele o ma veivei lei mumugu.'

<sup>10</sup> Golu odo ei palea matolu, ma golugolu vuso do ei vele uata lou na langi.

<sup>11</sup> "Na ilala bilesi iedo, bibi tolu sou asu usinani sou sibitala mina luma amiteu ugu i edo. Bibi tasa ino ne Sisaria ei peltase sou usinani minau.

<sup>12</sup> Ma Maolona Nunu i vei le eau maido, 'O ogomuli e sou. O ma damutalana papaipai lou.' Me sou e tametatasi pantasa ieli sou tamai sou asu pilu e eau, me amiteu gali ulilo na luma mina bibi iedo.

<sup>13</sup> Me ei vei le amiteu ei ite a bineanea mine Salemo i asu usinani magili lilo na luma minei, ma bineanea i vei, 'O peltase sou a vanunua usino ne Iopa ne sou tilomuli e Saimon, ei isa a aisana tasa e Pita. Ne sou vei le ei ni asu usinani.

<sup>14</sup> Ei ni bilii o a inade sanii, me na inade dolo Salemo ni gualeliu e oo pilu e sou vuso a abuna ino na luma minio.'

<sup>15</sup> "Ei adesi, io eau soke a inade, ma Maolona Nunu ei sivo utano ne sou, tomane ei sivo utano ne eitou lisa.

<sup>16</sup> Me eau damutale lei a inade lisa Bibi Taula ei goli. Ei vei maido, 'Ioanes ei maavuvuti e sou a vanunua ma tavivine a nanu, moni amutou namutou guale a maavuvutuna mina Maolona Nunu.'

<sup>17</sup> Lisa eitou silimuli e Bibi Taula Iesu Krai, me Salemo i bilii e eitou a Maolona Nunu tomane a niabi. Me seidei Salemo i bilii a niabi tasa moni ieli usino ne sou. Maido me eau e sei eau mapigogoi na magilisobe a pipigona Salemo oto ei goli ane sou?"

<sup>18</sup> Vanunua sou longesi a inade mine Pita ieli, ma damutatalana sinoana mine sou i pulu. Sou beilange a aisane Salemo me sou vei maido, "Seidei eitou muada, Salemo ei longo sou a abuna sea tamai sou sauvule a lilone sou me sou guale a maulina."

*Sou a vanunua ma tavivine mine Antiok sou palea kristen*

<sup>19</sup> Na ilala sou valipute Stiven, sou toegegeli e sou a vanunua ma tavivine sou silimuli e Iesu. Maido me papaina mine sou so oava maisaba, me sanii sou asu usino na avena ne Ponisia ma lolopatipati e Saiprus me Antiok, me sou pipigo a veipalena malongolongona kubaana mine Iesu. Moni sou ma veipale ete usino ne sou a vanunua ma tavivine mine sou a abuna sea. Boa. Sou veipale ane sou e Iuda moni.

<sup>20</sup> Moni a vanunua sanii balivua ne sou, a vanunua ne Saiprus me mina aubu e Sairini, sou asu usino ne Antiok me sou veipale a malongolongona kubaana mine Bibi Taula Iesu ane sou e Grik tamai.

<sup>21</sup> Ma sagagaline Bibi Taula ei ino pilu e sou, maido ma vanunua ma tavivine papaina sou silimuli me sou sauvule a lilone sou me sou palea a disaipel mine Bibi Taula.

<sup>22</sup> Sou a vanunua ma tavivine mina kinaka ne Ierusalem sou longe a inade ieli, me sou peltase Banabas usino ne Antiok.

<sup>23</sup> Ei asu sibitala me ei ite maido Salemo ei buloi e sou me ei toekube sele sou, me

ei mongemonge. Ei mailisi a damutatalana mina vanunua ma tavivine ne sou ogomuli e Bibi Taula taliuliu.

<sup>24</sup> Banabas ei a bibi kuba, ma Maolona Nunu ei vonu ne ei, me ei isa a silimulina sagali. Ma abuna vanunua ma tavivine buo sou gali ulilo mina abuna mine Bibi Taula.

<sup>25</sup> Io Banabas i asu usino ne Tarsus ni tilomuli e Sol.

<sup>26</sup> Ei itesi e Sol, me ei maasi ei usinani ne Antiok. Me na avala tasa vuso, sulu ugu pilu e sou a vanunua ma tavivine mina kinaka ne Antiok, me sulu matetengi a abuna vanunua ma tavivine buo na inade mine Salemo. Ne Antiok sou a disaipel sou guale a aisa ne sou a kristen munugana sele.

<sup>27</sup> Na ilala dolo sou a profet sanii sou ilisitate Ierusalem me sou asu utano ne Antiok.

<sup>28</sup> A profet tasa sou tole e Agabus, ei magili me na sagalina Maolona Nunu ei veipale a vitolona buo ni palea mina avena vuso na magamaga. Me mulimuli, ilala Sisar Klodius i ugu a mapana, vitolona dolo i palea.

<sup>29</sup> Sou a disaipel sou longe a inade ne Agabus iedolo, me sou maiademuli a masosovena vatu usino ne sou e tamtamaine sou ne Iudia mina buloine sou. Me sou oabi a vatu mapigogoi a masagana mine sou.

<sup>30</sup> Me sou peltase e Banabas me Sol, me sulu maasi a vatu iedo usino me su bilii e sou a munuganuga na viepiluna kinaka.

## 12

*Herot i valipute e Iemus mei tau e Pita na luma na tunuu*

<sup>1</sup> Na ilala do Mapana Herot ei toegegeli a vanunua sanii mina viepiluna kinaka.

<sup>2</sup> Ei vei le sou ne sou valipute e Iemus a viso, ei e tuane Ioanes.

<sup>3</sup> Herot ei ite sou e Iuda sou kale a golu ei goli iedo, maido me ei kale ni tau e Pita na luma na tunuu tamai. Ei goli a golu odo mina ilala ne sou a Malada Buo mina ulalu a is boa.

<sup>4</sup> Ei lapitole Pita mei tau ei na luma na tunuu. Ei tau e Pita na limane sou a abuna iva, a abuna tastasa isa a bibi na maubina iva, me sou maiadevusevuse a ulagene ei. Herot ei magitali a Malada na Asuleletasena ni pulu, mane ei pulu, ei kale ni maasi e Pita usala mei ni vavasa ana na matane sou a vanunua ma tavivine.

<sup>5</sup> Maido me Pita ei ugu na luma na tunuu, ma vanunua na maubina sou ulage ei. Moni a vanunua ma tavivine vuso na abuna mina kinaka sou kaka sagali usino ne Salemo ni buloi ei.

*Bineanea mine Salemo ei buloi e Pita ilisitate a luma na tunuu*

<sup>6</sup> Herot i tau a malada tasa mina maasine Pita ni magili a vavasana. Io na lodo, ilala malada do i saboa palea, Pita i ngolo balivua na bibi na maubina lua. Sou papale ei a sen lua. Ma vanunua na maubina sanii ino sou ulago na tema na luma na tunuui.

<sup>7</sup> Saga i a bineanea mine Bibi Taula i sibitala, ma muada i palea lilo na luma na tunuui. Ma bineanea ei vali na alisune Pita mei toletuti ei, mei vei lei, "Oo ilisi asi." Me a sen lua i tavuso na limane Pita me ei pu utano.

<sup>8</sup> Ma bineanea ei vei, "Papale a palaa minio mo kai a ubupolo minio," me Pita i goli simaido. Ma bineanea ei vei, "Kai a kinainai lagolago minio mo no ogomuli e eau."

<sup>9</sup> Me Pita ei ilisitase a vilo do me ei ogomuli a bineanea. Moni ei ma muada oto, a golu bineanea i goli ei patotona ue boa. Pita ei damu i ei tada moni.

<sup>10</sup> Sulu asu usino me su asutase a bibi na maubina lua su ulago a muine sulu tastasa, me a bineanea pilu e Pita sulu sibitala na tema ain mina asutasena luma na tunuui, me su asu usino na aubu buobuo. Me a tema oto do i peo, me su gali usala, me su asu usino na vea tasa. Ma tabaa oto bineanea mine Salemo ei bualetase Pita.

<sup>11</sup> Seido a damutatalane Pita i palea muada, me ei vei maido, "Seidei eau muadasi, Bibi Taula ei peltase a bineanea minei usinani, me ei gualeliu e eau maino na limane Herot ma golugolu vuso a abuna ne Iuda sou damutale ne sou goli."

<sup>12</sup> Me ei asu usino na luma mine Maria, ei e tinane Ioanes. Ioanes ei isa a aisa tasa Mak. A vanunua ma tavivine papaina sou viepili na luma do me sou kakaka.

<sup>13</sup> Pita ei lalaba na tema masala na luma, ma tavine na pipigona tasa, aisana Roda, ei asu ni pee a tema.

<sup>14</sup> Na ilala ei longe a baligolune Pita, lilona ei mongemonge sele, moni ei ma pee ete a tema mei vele ulilo, mei vei le sou a vanunua ma tavivine maido, "Pita ino na tema!"

<sup>15</sup> Me sou vei lei maido, "Oo vauta, io?" Moni ei vei sagali, "Boa. Ivu ei ino." Me sou vei, "Nane oo ite moni a bineanea minei."

<sup>16</sup> Moni e Pita ei saboa ino lalabalaba na tema. Io sou asu me sou pee a tema, me sou ite ei, me sou saga sele.

<sup>17</sup> Me Pita ei tavasusua ane sou ne sou ma adeade lou. Me ei mapamuli a golu Bibi Taula ei goli a maasine ei usala maino na luma na tunuui. Me ei vei maido, "Namutou vei le Iemus me sou tamtamaigu a golugolu vuso do." Me Pita ei asutase sou me ei asu usino na avena tasa.

<sup>18</sup> Na autupola a vanua na maubina sou ma ite ete Pita me sou saga sele, me sou maitagu liu maido, "Pita i asu usiva?"

<sup>19</sup> Herot ei pogeputi maido Pita ino boa, me ei vei le sou a vanua ne sou tilomuli e Pita, moni sou ma ite ete ei. Maido me ei vavasa ana vanua na maubina sou ulage e Pita, me ei vei le sou ne sou valipute a vanunua na ulagena do. Me mulimuli Herot ei asutase Iudia mei asu utano ne Sisaria mei ugu iodo.

### *Herot ei mate*

<sup>20</sup> Mapana Herot ei isa a sinoana buo sele usino na vanunua ma tavivine ne Tair me Saidon. Maido me sou viepili me sou asu usino me sou ite ei, vuna maido sou gualeale a gona inani ne sou na avena vuso Herot ei iteale. Sou maiade pilu pala e Blastus, ei a munugana bibi ei itealale a vilo na ngunolo mine mapana, me ei lilo tasa pilu e sou. Me mulimuli sou asu ite Herot me sou tagi e ei ni lilomea usino ne sou me ei ni valimate a sinoana do.

<sup>21</sup> De Herot ei tau a malada tasa, me na malada do ei kai a malasana kinainai mina mapana, me ei ugu na niugugu minei, me ei ade a inade buo sele usino ne sou.

<sup>22</sup> Me sou a vanunua ma tavivine sou tolatola maido, "Ieli a baligolune salemo tasa. Ieli a baligoluna bibi boa."

<sup>23</sup> Herot ei longe a inade mine sou odo, me ei ma kale ete ni beilange a aisane Salemo, maido ma tabaa oto a bineanea mine Bibi Taula ei valibili e ei. Ma pasepase banini sou ani e ei, me ei mate.

<sup>24</sup> Moni a inade mine Bibi Taula ei palea sagali me ei veleububula na aububuna.

<sup>25</sup> Me Banabas pilu e Sol su mapuli a pipigona ne sulu ne Ierusalem, me sulu veteliu usino ne Antiok. Ilala do sulu guale e Ioanes, sou tole ei e Mak.

## 13

### *Sou vileale Banabas pilu e Sol mina malongona inade mine Salemo*

<sup>1</sup> Viepiluna kinaka mine Antiok ei isa a vanunua sanii sou malongo a inade mine Salemo me sou a vanua sanii na matetengina. Aisane sou i maido, Banabas, Simeon, ei isa a aisa tasa Niger, e Lusius mine Sairini, Sol, me Manain, ei e tasine Herot ei a mapana mina itealena avena sanii.

<sup>2</sup> Na ilala vanunua ma tavivine mina viepiluna kinaka sou kaka ane Bibi Taula me sou vavae sou a inani, Maolona Nunu ei vei le sou maido, "Amutou vileale Banabas pilu e Sol ne sulu goli a pipigona eau toleale sulu ne su goli."

<sup>3</sup> Maidolo me sou vavae sou a inani me sou kaka, me sou tau a limane sou muata ne sulu, me sou peltase sulu usino.

*Banabas pilu e Sol su veipale a malongolongona kubaana ne Saiprus*

<sup>4</sup>Maolona Nunu ei peltase sulu usino, me su asu utano ne Selusia. Ne Selusia sulu sae na kuta, ma kuta guale sulu usino na lolopatipati e Saiprus.

<sup>5</sup>Sulu sibitala ne Salamis, me sulu asu usino na lumaluma na kinaka mine sou e Iuda, me su veipale a inade mine Salemo. Ioanes Mak ei asu pilu e sulu, me ei buloi e sulu.

<sup>6</sup>Sulu asu usino na aveavena vuso mina lolopatipati Saiprus, me sulu sibitala ne Papos. Ne Papos sulu ite a bibi tasa, aisana e Bariesu, ei a bibi na gunolina milolo ma matamatana mialo. Me ei a aulana bibi tasa na malongolongona balivua mine sou e Iuda.

<sup>7</sup>A bibi iedo ei muina pilu a munuganuga na niitealalena avena, aisana e Segius Paulus. Ei a bibi ei isa a damu talatalana kubaana ma muadana. Ei toleale Banabas me Sol usinani, vuna ei kale ni longe a inade mine Salemo.

<sup>8</sup>Bibi mina gunolina milolo ma mialo do, na inade Grik sou vate ei a aisa Elimas, ei kale ni toebose a pipigona mine Banabas me Sol, vuna ei ma kale ete a munuganuga na niitealena avena ni silimuli e Iesu.

<sup>9</sup>Moni a Maolona Nunu i vonu ne Sol, aisana tasa e Pol, ei gemu sagali usino ne Elimas me ei vei maido,

<sup>10</sup>“Oo natune Satan. Oo a butu mina inigogona vuso i bilesi. Sou a inigogona niito ma inigogona pagu i vonu sele minio. Oo toegegeli e veavea vuso i bilesi mine Bibi Taula. Nane oo ma kale ete no litase a inigogona de?”

<sup>11</sup>De, longe. Seidei a limane Bibi Taula ei ubi oo, ma matamu ei ni matabuu. Seidei oo no ma mapigogoi ete no ite a oaso, mo no muimu muga simaido tabaa sapa.” Pol i vei maido, ma tabaa oto a aulabunu ma tunuui ei taboboli a matane Elimas. Me ei asu maisaba me ei tilotilo a bibi ni lapitole a limana mei ni maite ei a vea.

<sup>12</sup>Munuganuga na itealalena avena ei ite a golu ieli, me ei silimuli. Damutalatalana minei i ilisi sele a inade ne Bibi Taula.

*Banabas me Pol su malongo a inade ne Antiok mina avena ne Pisidia*

<sup>13</sup>Pol ma vanunua sou asu pilu e ei, sou ilisitase a aubu Papos, me a kuta i guale sou usino ne Perga na avena buo ne Pampilia. Moni Ioanes Mak i asutase sou, me ei vetelieu usino ne Ierusalem.

<sup>14</sup>Sou ilisitase Perga, me sou asu sou sibitala ne Antiok na avena ne Pisidia. Na Maolona Malada ne sou e Iuda sou gali ulilo

na luma na kinaka mine sou e Iuda, me sou ugu.

<sup>15</sup>Sou a munuganuga mina luma na kinaka mine sou e Iuda sou giosi a inade mina binea ma inade mine sou a profet, io sou vei le a bibi tasa ni asu ni vei le Pol pilu e sou a pipigona tasa maido, “Tamtamaigu, mane amutou isa a inade tasa mina masagalina lilonavanunua ma tavivine, de amutou veipale.”

<sup>16</sup>Me Pol i magili mei tavesusue sou a limana ne sou vale, me ei vei maido, “Amutou a vanunua mine Israel, me amutou a vanunua na tinadene Salemo, amutou longe.

<sup>17</sup>Salemo mine sou a abuna mine Israel ei vileale sou tubutubune eitou tomane a vanunua ma tavivine minei oto. Na ilala sou ilisitase a magamaga mine sou me sou asu ugu ne Isip, ei goli e sou so palea a abuna taula. Mulimuli na sagalina minei oto, ei guale sou maino ne Isip me ei langetase sou usinani.

<sup>18</sup>Me na ilala sou ugu na avena a vanua boa, ei tabule a mavaana mina inigogone sou, mapigogoi a avala savulu iva.

<sup>19</sup>Na magamaga Kenan Salemo i toegegeli a abuna padilua, me ei bilii a magamaga edo usino ne sou e Israel ni muina a magamaga ne sou.

<sup>20</sup>Golugolu vuso do i palea lilo na avala a savulu sobo iva savulu lima. Na taulune sou e Israel sou gualesi a magamaga, Salemo i vileale sou a munuganuga mina itealene sou e Israel, i asu mapigogoi na ilala mine Samuel a profet.

<sup>21</sup>Io, na ilala do sou tola a gualena mapana tasa, me Salemo i vileale Sol mina itealene sou, me ei muina a mapana mapigogoi a avala savulu iva. Sol ei e natune Kis, ei a bibi mina abuna ne Beniamin.

<sup>22</sup>Moni Salemo i taulele ei me ei vileale Devit a mapana mine sou. Ei vei le sou a vanunua e Devit maido, ‘Eau itesi e Devit, natune Iesi, ma lilogu i kale a bibi iede. Ei ni ogomuli a masagana vuso minau.\*

<sup>23</sup>“Me Salemo i goli tomane ei adepatotona lisa, na abuna mina bibi Devit ieli, Salemo ei vileale a bibi tasa ni gualeliu e eitou, mei peltase ei usinani ne Israel. Bibi edo e Iesu.

<sup>24</sup>Ilala Iesu saboa ei soke a pipigona minei, Ioanes ei malongo ane sou e Israel ne sou savvule a lilone sou me sou guale a maavuvutuna.

<sup>25</sup>Bisii moni Ioanes ni mapuli a pipigona minei, ei vei maido, ‘Amutou damu i e eau e sei? Eau a bibi amutou magitalitali iodo boa. Moni mu longe. Mulimuli a bibi tasa ni asu usinani, me eau ma doana bibi

\* 13:22 1 Samuel 13:14

oto i mapigogoi ni lube a mota na ubupolo minei.’

<sup>26</sup> “Tamtamaigu, amutou a vanunua na abuna mine Abraham, me amutou a vanunua sanii mu matano ne Salemo, mu longe. A inade mine Salemo mina gualeliune eitou, ede Salemo ei peltase usinani ne eitou moni.

<sup>27</sup> Sou a vanunua ino ne Jerusalem pilu e sou a munuganuga mine sou sou gi taliuliu a inade ne sou a profet na Maolona Malada vuso, moni sou ma muada kuba oto e Iesu ma inade iede. Maido me sou vavasa ana bibi iedo ni mate, me na inigogona li sou toeselese a inade sou a profet sou veipale lisa.

<sup>28</sup> Sou ma poge ete a sinusu minei tasa mapigogoi ne sou vavasa ana me sou valipute ei ni mate, moni sou ade sagali ane Pailat a munugana bibi na niitealena avena ni valipute ei.

<sup>29</sup> Sou goliosi a golugolu vuso lisa sou a profet sou vei, ne sou a vanunua ne sou goli lei, io sou guale ei muata na tauvaleuti, me sou peilal ei na muina minate tasa.

<sup>30</sup> Moni Salemo ei mailisiliu ei na muina minate,

<sup>31</sup> me sou a vanunua sou ilisitase Galili me sou asu usino ne Jerusalem pilu e ei, sou ite ei na malada papaina. Seidei sou a vanunua do sou malongolongo a inade minei usino ne sou a abuna ne Iuda.

<sup>32</sup> “Me amiteu malongo ane amutou a malongolongona kubaana maido, Salemo ei ade patotona ane sou a tubutubune amiteu ni peltase a bibi usinani ni gualeliu e amiteu,

<sup>33</sup> me seidei ei mailisiliu e Iesu mina minate mine ei ni toeselese a inade patotona do usinani ne amiteu a abune natatune sou. Inade mina golugolu ieli ino na maluana inala mina Laulau na Inala. Ma inade do i maido,

‘Oo e natugu.

Seidei eau palea tamane oo.’<sup>†</sup>

<sup>34</sup> Me Salemo i mailisi ei na minate, maido me ei ni ma veteliu oto usino na muina minate mei ni mavulu. Ei tomane moni e Salemo ei ade,

‘Eau na toekube amutou me eau bilii e amutou a golugolu i maolo me kubaana, tomane lisa eau adepatotona ane Mapana e Devit. Ma golu ieli ni palea sesele tomane eau vei.’<sup>‡</sup>

<sup>35</sup> Ma inade tasa sea tamai ino na Laulau mine Salemo. Ei maido,

‘Oo no ma itetasetase lei a bibi maolo oo vileale ni goli a pipigona minio ni mavulu na muina minate.’<sup>§</sup>

<sup>36</sup> “Eitou muada, na ilala Devit i muina na magamaga, ei ogomuli a masagana mine Salemo. Me mulimuli ei mate me sou peilal ei na muina minate mine tubutubune ei, ma aitolane ei i mavulu.

<sup>37</sup> Moni a bibi Salemo ei mailisi na muina minate do, aitolane ei ma mavulu oto.

<sup>38</sup> “Maido me, amutou tamtamaigu, amiteu malongo ane amutou maido. Namutou muada kuba i, bibi ieli ei asu usinani mina taulelena sinusu vuso mine amutou.

<sup>39</sup> Binea mine Moses i ma mapigogoi ete ni taulele a sinusu mine amutou me ei ni vate e amutou a bilesina vanunua. Moni a bibi ieli ei taulelele a sinusu vuso mina vanunua vuso sou silimuli e ei, me ei vate sou a bilesina vanunua.

<sup>40</sup> Maido me amutou tilale, dae a golu lisa a profet sou ade i iodo ni sibitala ne amutou. Sou vei maido,

<sup>41</sup> ‘Amutou a vanunua mina adeptinolana, mu ite, ne amutou saga gegelu me ne amutou mamau.

Eau na goli a golu tasa sea ni sibitala balivua ne amutou.

Me mane a bibi tasa i vei le amutou a golu eau kale na goli ie, ne amutou ma silimuli ete.’<sup>\*†</sup>

<sup>42</sup> Pol i ademuada pulosi, io ei pilu e Banabas su kale ne su gali usala, me sou a vanunua ma tavivine sou vei le sulu maido, “Na Maolona Malada mulimuli ne amulu veteliu lou me ne mu malongo lou ane amiteu a golugolu sou ie.”

<sup>43</sup> Me sou ilisitase a luma na kinaka mine sou e Iuda, moni Iuda papaina pilu a vanunua ma tavivine mine sou a abuna sea sou ogomuli a inigogona kinaka mine sou e Iuda sou ogomuli e Pol pilu e Banabas. Me su bilii a inade usino ne sou me su mailisi a damutatalana mine sou ne sou ogomuli a masagana mine Salemo me ne sou magili sagali na dinodo minei.

<sup>44</sup> Na Maolona Malada mulimuli, sou a vanunua ma tavivine vuso na aubu buobuo do sou asu me sou viepilu ne sou longe Pol me Banabas su malongo a inade mine Salemo.

<sup>45</sup> Moni a ilala sou e Iuda sou ite a abuna vanunua ma tavivine taula do, lilone sou i pagu sele. Me sou soke a taupuina inade mine Pol, me sou adeptintola ane ei.

<sup>46</sup> Maido me Pol pilu e Banabas su adepalea sagali ane sou maido, “Ivu, ne amilu bilii a inade mine Salemo ane amutou e Iuda pala. Moni amutou lametase sele a inade ie i tomane amutou oto mu vei, ‘Amiteu ma mapigogoi ete namiteu guale a mauilina i muina kuba taliuliu.’ Maido me amutou

<sup>†</sup> 13:33 Laulau na Inala 2:7

<sup>‡</sup> 13:34 Aisaia 55:3

<sup>§</sup> 13:35 Laulau na Inala 16:10

<sup>\*</sup> 13:41 Habakuk 1:5



longe. Seidei namilu ma malongo oto lou ane amutou. Amilu nami malongo ane sou a abuna sea,

<sup>47</sup> vuna Bibi Taula i vei le amiteu maido, 'Eau goli e oo no palea tomane a muada mina abuna sea na magamaga vuso, mo no buloi e sou a vanunua ma tavivine sou malu na sinuana magamaga ne sou guale a maulina.'<sup>†</sup>

<sup>48</sup> Vanunua ma tavivine mine sou a abuna sea sou longe a inade do, ma lilone sou i puiale sele. Sou beilange a inade mine Bibi Taula. Ma vanunua ma tavivine Salemo i vilealesi e sou ne sou guale a maulina i muina doana taliuliu sou silimuli a inadene ei.

<sup>49</sup> Me sou guale a inade mine Bibi Taula me sou maasi maisaba na gona vuso na avena do.

<sup>50</sup> Moni sou e Iuda sou mailisi a lilone sou a tavivine sou isa a aisa buo me sou ogomulimuli a inigogona mina kinaka ne sou, me sou mailisi a lilone sou a munuganuga na aubu buobuo do, me sou soke a toegegele Pol me Banabas. Me sou peltaselele sulu na avena do.

<sup>51</sup> Maidolo me sulu labeveitase a kavou na ubune sulu, ne sou a vanunua ma tavivine sou muada i sou isa a sinusu na inigogona mine sou odo. Me sulu ilisitase Antiok me su asu usino ne Aikoniam.

<sup>52</sup> Moni a Maolona Nunu ei vonu ne sou a vanunua ma tavivine mine Antiok sou silimuli e Iesu, me sou mongemonge sele.

## 14

*Banabas pilu e Pol sulu malongo a inade ne Aikoniam*

<sup>1</sup> Ne Aikoniam Pol me Banabas sulu gali ulilo na luma na kinaka mine sou e Iuda, me sulu malongo a inade, me abuna taula ne Iuda me Grik sou silimuli.

<sup>2</sup> Moni sou e Iuda sanii sou ma silimuli ete, sou mailisi a lilone sou a vanunua ma tavivine mine sou a abuna sea, me sou goli e sou lilo mamau ana vanunua ma tavivine sou silimuli.

<sup>3</sup> Sulu ugu tabaa ne Aikoniam, me sulu ma lae oto a malongona inade mina dinodo mine Bibi Taula. Me Bibi Taula i bilii a sagagalina usino ne sulu, me sulu goli a matamatana gona sinaga. Na inigogona do Bibi Taula ei maite sou a vanunua ma tavivine maido a inade sulu malongo i ie ei patotona moni.

<sup>4</sup> Moni a vanunua ma tavivine mina aubu buobuo do sou vilelue sou abuna lua. Sanii sou lilo tasa pilu e sou e Iuda, me sanii sou lilo tasa pilu a aposel lua.

<sup>5</sup> Mulimuli sou e Iuda pilu e sou a vanunua mina abuna sea sou magili pilu e sou a munuganuga mine sou, me sou kale ne sou toegegeli e Pol me Banabas. Me sou kale ne sou ubi e sulu a vatu.

*Banabas pilu e Pol sulu malongo ne Likonia*

<sup>6</sup> Banabas me Pol sulu longe a inade mina golu odo a vanunua ne sou goli, maido me su oava usino na aubu buobuo lua mina avena ne Likonia, ei e Listra me Debe, me na aububuna i agavuale a aubu buobuo lua do.

<sup>7</sup> Me sulu pipigo a veipalena malongolongona kubaana na aububuna iedo.

<sup>8</sup> Ne Listra a bibi tasa ino, a ubune ei mamate. Na ilala tinana i maalepose ei, a ubuna paguosi me ei ma asuasu oto. Ei ugugu moni a muina.

<sup>9</sup> Bibi iedo ei longe Pol i malongo a inade. Me Pol gemualepute ei, me ei ite maido a bibi iedo ei silimuli me ei mapigogoi ni palea kubaana lou.

<sup>10</sup> Maido me Pol i vei sagali sele maido, "Oo ilisi mo magili." Io a bibi odo ei seu me ei magili me ei asu.

<sup>11</sup> Vanunua ma tavivine makuba sou ite a golu Pol i goli iedo, me sou tola a inade mine sou e Likonia maido, "Sou e salemo sou paleasi tomane a bibi, me sulu sivo utano ne eitou."

<sup>12</sup> Me sou tole Banabas e salemo Sus, me Pol, ei a bibi mina gunolina inade, maidolo me sou tole ei e salemo Hermes.

<sup>13</sup> Luma na kinaka mine salemo Sus i ino agavi na tema bigomu. Ma prist mina luma na kinaka do ei guale a bulmakau sanii togo ma sese na obu sou siu, me ei asu usino na tema na bigomu na aubu buobuo. Ei pilu e sou a vanunua ma tavivine sou kale ne sou iabi a niabi mine sou usino ne Banabas me Pol.

<sup>14</sup> Moni a aposel lua su longe a inade na golu sou kale ne sou goli, me sulu saga mamau sele me sulu sisinge a kinainai mine sulu. Me sulu vele usino balivua ne sou a vanunua ma tavivine me su tola maido,

<sup>15</sup> "Tamtamaigu, amutou goli a inigogona maido ili? Amilu a bibi moni tomane moni e amutou. Amilu malongo a malongolongona kubaana usino ne amutou i maido, namutou litase a golugolu sabubu amutou topatulialale e sou odo, me namutou sauvule usino ne Salemo ei isa a maulina. Ei e Salemo i mapale a langi ma magamaga ma dasi pilu a golugolu vuso ino ne sou.

<sup>†</sup> 13:47 Aisaia 49:6

<sup>16</sup> Patotona, na ilala lisa mine sou e tubu-tubuna Salemo ei itetase sou a abuna vanunua ma tavivine sou asu na inigogona mine sou oto.

<sup>17</sup> Moni ei ma ovu sele oto na vanunua ne sou ma muada oto e ei. Boa. Taliuliu ei gologoli a inigogona i kubaana usino ne amutou. Ei toe a adavu i veletase a langi me ei pu utano ne amutou, me ei goli a gona inani makuba sou palea mai bilii e amutou me ei goli a lilone amutou i mongemonge.”

<sup>18</sup> Sulu goli a inade ie, me sulu pipigo sagali sele a madetasene sou a vanunua ma tavivine, ne sou ma gologoli lei a niabi ane sulu.

<sup>19</sup> Moni mulimuli sou e Iuda sanii mine Antiok me Aikoniam sou asu usinani ne Listra, me sou lapuale a demutatalana mine sou a vanunua ma tavivine me sou toe sou so butuale Pol. Maidolo me sou ubi e Pol a vatu. Ma ilala sou damu i ei matesi, sou lave a aitolana usino me sou tautase ei masala na aubu buobuo.

<sup>20</sup> Moni a vanunua ma tavivine sou silimuli e Iesu, sou asu usinani me sou magili saili e ei, me Pol ei ilisi lou me ei gali ulilo na aubu buobuo. Me maisavulo ei asu pilu e Banabas usino ne Debe.

*Banabas pilu e Pol su masagali a lilone sou a vanunua ma tavivine sou silimuli e Iesu*

<sup>21</sup> Sulu malongo a malongolongona kubaana ne Debe, me sulu goli a vanunua ma tavivine makuba sou palea a disaipel. Me mulimuli sulu veteliu usino ne Listra me Aikoniam me Antiok,

<sup>22</sup> me sulu masagali a lilone sou a disaipel. Su ade sagali ane sou maido, “Amutou magili sagali a silimulina. Eitou kale neitou gali ulilo na niitealalena mine Salemo, moni neitou asu na vea a mavaana makuba ino i.”

<sup>23</sup> Me sulu vileale sou buobuo mina viepiluna matamatana kinaka. Me sulu vavae e sulu a inani me sulu kaka, me na inigogona do sulu tau e sou buobuo na limane Bibi Taula sulu silimuli i.

*Banabas pilu e Pol su veteliu usino ne Antiok mina avena ne Siria*

<sup>24</sup> Mulimuli Banabas me Pol su asu usino balivua na avena ne Pisidia, me sulu asu divi mina avena buo ne Pampilia.

<sup>25</sup> Sulu malongo a inade mine Salemo ne Perga, me mulimuli sulu asu utano ne Atalia.

<sup>26</sup> Ne Atalia sulu sae na kuta, ma kuta i guale sulu usino ne Antiok, ei a aubu buobuo lisa sou a kristen sou tau e sulu na limane Salemo ni lilomuli e sulu me ne sulu pipigo, seidei sulu goliosi, me sulu veteliu usino ne Antiok.

<sup>27</sup> Sulu diviosi, me sulu toleale a vanunua ma tavivine mina viepiluna kinaka ne sou

viepilu. Me sulu vei le sou a gologolu vuso Salemo ei goli na limane sulu. Su vei maido, “Salemo ei pee a vea ane sou a vanunua ma tavivine mina abuna sea, me sou silimuli.”

<sup>28</sup> Me sulu ugu a malada papaina pilu e sou a disaipel ne Antiok.

## 15

*Viepiluna buo mina kinaka i palea ne Ierusalem*

<sup>1</sup> Vanunua sanii mine Iudia sou asu utano ne Antiok me sou matetengi e sou a kristen maido, “Mane amutou ma ogomuli ete a inigogona mine Moses, me sou ma moge ete amutou, io Salemo ei ni ma mapigogoi ete ni gualeliu e amutou.”

<sup>2</sup> Pol me Banabas su longe a inade vanunua do sou vei, me sulu mailisi a maubina inade taula pilu e sou, me sou maiade sagali mamau sele a golu edo. Maidolo me sou a kristen sou tau e Pol me Banabas pilu a vanunua sanii ne sou asu usino ne Ierusalem me sou toebilelesi a inade pilu e sou a aposel me sou buobuo mina viepiluna kinaka.

<sup>3</sup> Sou a kristen sou peltase sou usino, me sou asu usino balivua na avena ne Ponisia me Samaria. Sou ademuada ane sou a kristen mina avena lua do e Salemo ei sauvuvule a lilone sou a vanunua ma tavivine mina abuna sea. Sou a kristen sou longe a inade do, ma lilone sou ei puiale sele.

<sup>4</sup> Sou asu sou sibitala ne Ierusalem, ma vanunua ma tavivine vuso mina viepiluna kinaka pilu e sou a aposel me sou buobuo sou vei oaso doana ane sulu. Me Pol pilu e Banabas sulu vei le sou a gologolu vuso Salemo ei goli na limane sulu.

<sup>5</sup> Moni sou a kristen sanii mina abuna mine sou e Parisi sou ilisi me sou vei maido, “Mane a vanunua mina abuna sea sou kale ne sou gali ulilo na abuna mine eitou, de ne amutou moge sou, me ne amutou vei le sou ne sou ogomuli a binea mine Moses.”

<sup>6</sup> De sou a aposel me sou buobuo sou viepilu mina toebilelesina inade do.

<sup>7</sup> Sou goli a inade papaina pulosi, me Pita i magili me ei vei le sou maido, “Tamta-maigu, amutou muada, lisa Salemo i soebule a pipigona ne eitou, me ei vileale e eau mina veimuadana malongolongona kubaana usino ne sou a abuna sea, ne sou longe me sou silimuli.

<sup>8</sup> Salemo i muada a lilon a vanunua ma tavivine vuso, ei bilii e sou a Maolona Nunu tomane moni ei bilii e eitou. Na inigogona do ei maite e eitou maido, lilone ei i mongemonge a gualeliune sou a abuna sea tamai.

<sup>9</sup> Ei goli a inigogona tasa moni usinani ne eitou me sou tamai. Ei goli e sou palea alaba

na matane ei a vea mina silimulina moni iodo.

<sup>10</sup> Maido me posa matina amutou kale namutou tove Salemo seidei? Amutou ma tautau lei a golu mavaa do na baune sou a kristen, iedo lisa sou tubune eitou me eitou tamai ma mapigogoi ete neitou tabule i.

<sup>11</sup> Moni eitou silimuli maido, na dinodo mine Bibi Taula Iesu, Salemo ei ni gualeliu e sou a abuna sea tamai tomane ei gualeliu e eitou e Iuda.”

<sup>12</sup> Me sou ma vei ete a inade tasa. Sou longe a inade mine Banabas pilu e Pol. Me sulu ademuade a inade na matamatana gona sinaga Salemo ei goli na limane sulu balivua ne sou a vanunua ma tavivine mine sou a abuna sea.

<sup>13</sup> Sulu ade pulosi, de Iemus i vei maido, “Tamtamaigu, amutou longe a inade minau.

<sup>14</sup> Saimon ei veiosi le amutou a munugana ilala pala Salemo ei asu usinani ne sou a abuna sea mina gualeliune sou me ei goli e sou palea a abuna minei oto.

<sup>15</sup> Ma inade mine sou a profet tamai i tasa moni. Sou niage a inade maido,

<sup>16</sup> ‘Bibi Taula ei vei, “Abuna mine Devit ei tomane a bale ei tavuvuosi utano.

Moni mulimuli eau na veteliu, me eau na mamagili lei.

Gologolu na luma do ei mamau, ede eau na toe ni alaba lou, me eau na mamagili lei a luma do.

<sup>17-18</sup> Maidolo me sou a abuna vanunua ma tavivine sanii ne sou tilomuli e eau Bibi Taula.

Ede a vanunua ma tavivine vuso mine sou a abuna sea, eau vilealesi e sou ni minau oto.”

Ieli ei a inade mine Bibi Taula. Lisa oto sele ei ade a gologolu sou ieli ni palea.\*

<sup>19</sup> “Maido ma damutatalana minau ei maido. Neitou ma bililili lei a mavaana ne sou a abuna vanunua sea do sou sauvule a lilone sou usino ne Salemo. Boa.

<sup>20</sup> Puiale neitou niage a laulau usino ne sou me neitou vei le sou maido, ne sou ma gualeale lei a gona inani a vanunua sou iabi usino ne sou a salemo auala, me ne sou ma gologoli lei a matamatana inigogona sualolona, me ne sou ma aniani lei a golu vivi a vanunua sou papale a loone ei me sou valipute ei, me ne sou ma aniani lei a golu vivi a dalana saboa ino.

<sup>21</sup> Eitou muada, lisa otosi pea seidei, na aubu buobuo vuso mina sou a abuna sea a vanunua sou ademuadada a inade mine Moses, me sou e Iuda sou gigi a inade do lilo na luma na kinaka mine sou na Maolona Malada vuso.”

*Sou masosove a laulau usino ne sou a viepiluna kinaka mina abuabuna sea*

<sup>22</sup> De sou a aposel me sou buobuo pilu e sou a vanunua ma tavivine vuso mina kinaka sou maiademuli a vilealena bibi lua mine sou. Tasa e Iudas, aisana tasa lou e Basabas, me tasa e Sailas. Sulu a munuganuga balivua ne sou a viepiluna kinaka. Me sou peltase sulu pilu e Pol me Banabas usino ne Antiok.

<sup>23</sup> Na limane sulu sou sosove a laulau tasa ei isa a inade maido,

Amiteu a aposel me amiteu buobuo, amiteu tamtamaine amutou, amiteu niage a laulau ieli usino ne amutou tamtamaine amiteu mine sou a abuna sea ino ne Antiok me ne Siria me ne Silisia. Oaso doana, tamtamaigu.

<sup>24</sup> Amiteu longesi maido, vanunua sanii mine amiteu sou asu usino ne amutou me sou goli e amutou mu damutala papai a inadnade mine sou, me sou toemais- abesabe a damutatalana mine amutou. Moni amiteu ma vei ete le sou ne sou goli maido.

<sup>25</sup> Maido me amiteu lilo tasa moni me amiteu maiademuli i a vilealene tasine amiteu lua me peltase sulu usino ne amutou pilu e tamaine amiteu lua amiteu kale mamaimai e sulu, e Banabas me Pol.

<sup>26</sup> Golu tasa boa mane sulu mapigogoi ne su iabitate a maolina mine sulu ane Iesu Kraiss, me sulu ma lae oto a malongona a aisane Iesu Kraiss, Bibi Taula mine eitou.

<sup>27</sup> Maidolo me amiteu peltase Iudas pilu e Sailas usino ne amutou, me ne sulu bilii e amutou a inade ieli na asene sulu oto.

<sup>28</sup> Maolona Nunu eili pilu e amiteu, amiteu maiademuli i maido, amiteu ma kale ete namiteu tau a mavaana papaina usino ne amutou. Maido me namutou ogomuli moni a inigogona sou ie.

<sup>29</sup> Namutou ma aniani lei a golu vivi sou valipute mina gunolina niabi ane sou a salemo auala. Me namutou ma aniani lei a golu vivi i isa a daladala, me amutou ma aniani lei a golu vivi a vanunua sou papale a loona me sou mate. Me namutou asuleletase a matamatana inigogona mina sualolona. Mane amutou iteale kube amutou me mu asuleletase a inigogona sou iede, ei ni kubaana. Inade mine amiteu ei simaido moni. Amutou ugu kuba.

<sup>30</sup> De sou a vanunua ma tavivine na viepiluna kinaka sou peltase a vanunua do utano ne Antiok. Me ne Antiok sou viepili e sou a vanunua ma tavivine na viepiluna kinaka, me sou oabi a laulau iedo usino ne sou.

\* 15:17-18 Amos 9:11-12

<sup>31</sup> Vanunua ma tavivine sou gi pulosi, me sou mongemonge a gualena inade doana iedo mina toesagaline sou.

<sup>32</sup> Iudas pilu e Sailas sulu a profet. Maidolo me sulu bilii a inade doana papaina usino ne sou a kristen, me na inigogona iedo sulu masagali a lilone sou.

<sup>33-34</sup> Sulu malu tabaa sapa ne Antiok, me mulimuli sou a kristen sou ade munonge ane sulu, me sou peltase liu e sulu usino na vanunua sou peltase sulu usinani iodo.

<sup>35</sup> Moni Pol pilu e Banabas su ino ne Antiok. Sulu pipigo pilu a vanunua sea makuba mina matetengine sou a vanunua ma tavivine na inade mine Salemo, me na malongolongona kubaana mine Bibi Taula.

#### *Pol me Banabas sulu vilelue sulu*

<sup>36</sup> Malada sanii asu pulosi, Pol i vei le Banabas maido, "Neitau veteliu ta ite tatasine eitou na aubu buobuo vuso lisa eitau malongo a inade mine Bibi Taula ane sou. Maidolo me neitau muada, sou ino kuba ue boa."

<sup>37</sup> Io Banabas ei kale ni guale Ioanes, aisana tasa lou e Mak, ni asu pilu e sulu.

<sup>38</sup> Moni e Pol vei maido, "Bibi iede lisa ei iavetase eitau ne Pampilia mei ma kale ete ni asu pilu e eitau mina pipigona, maido ei ma puiale ete neitau guale ei ni asu pilu e eitau."

<sup>39</sup> Sulu maisinoamuli a golu odo, me su vilelue sulu me sulu ma pipigo pilu otosi. Me Banabas ei guale Mak ni asu pilu e ei, me sulu sae na kuta tasa me sulu asu usino na lolopati e Saiprus.

<sup>40</sup> Me Pol ei guale Sailas. Na ilala sulu ilisitate, sou a kristen sou vei ane sulu maido, "Dinodo mine Bibi Taula ni muina pilu e amulu."

<sup>41</sup> Io sulu asu maisaba usino na avena buo ne Siria me Silisia, me Pol ei masagali e sou a vanunua ma tavivine mine sou a viepiluna kinaka na avena do.

## 16

#### *Timoti ei asu pilu e Pol*

<sup>1</sup> Pol ei asu sibatala ne Debe me Listra tamai. Na aubu odo a disaipel tasa ino, aisana e Timoti. Ei e natuna tavine Iuda tasa, ei kristen. Moni tamana ei mine Grik.

<sup>2</sup> Sou a kristen mine Listra me Aikoniam sou ade a inigogone ei maido, Timoti ei a doana bibi.

<sup>3</sup> Pol ei kale Timoti ni asu pilu e ei. Maido me ei guale ei mei moge ei, vuna sou vuso e Iuda na avena do sou muada i tamane Timoti ei e Grik.

<sup>4</sup> Na ilala sou asu usino ne sou a aubu buobuo sanii, sou bilii e sou a kristen a inade lisa sou a aposel me sou buobuo sou

maiademuli i ne Ierusalem. Me sou vei, "Namutou ogomuli ie."

<sup>5</sup> Maido ma silimulina mina vanunua ma tavivine na viepiluna kinaka i palea sagali sele, ma savulu ne sou i buo lou na malada taliulu.

#### *Pol ei ite a bibi mine Masedonia*

<sup>6</sup> Sou asu usino na avena ne Prigia me Galesia, vuna Maolona Nunu ei madesobe sou a malongona inade ne Esia.

<sup>7</sup> Me sou asu pea na avena ne Misia, me sou kale ne sou asu ulilo na avena ne Bitinia, moni a Nunune Iesu i magilisobe sou.

<sup>8</sup> Maidolo me sou pololeletase Misia me sou asu utano ne Troas.

<sup>9</sup> Me na lodo do Pol ei ite a golu tasa tomene a tinada. Ei ite a bibi tasa ne sou a avena ne Masedonia ei magili mei toleale Pol mei vei maido, "Oo no veleutu na dasi mo no asu usinani ne Masedonia no buloi e amiteu."

<sup>10</sup> Pol ei itesi a golu iedo, io ma tabaa oto amiteu tilo a vea mina inasu usino ne Masedonia. Amiteu muada i, Salemo ei toleale amiteu mina malongona inade kubaana usino ne sou.

#### *Lidia ei palea a Kristen*

<sup>11</sup> Maido me amiteu sae na kuta ne Troas, ma kuta i vele usino bilesi ne Samotres. Me na malada maisavulo ei vele usino ne Neapolis.

<sup>12</sup> Me amiteu veletase a avena odo me amiteu asu sibatala ne Pilipai. Ei a aubu buobuo tasa lisa sou e Rom sou malu i, me ei a munugana aubu buobuo na avena ne Masedonia. Amiteu ugu na aubu do na malada sanii.

<sup>13</sup> Me na Maolona Malada mine sou e Iuda amiteu asu usala na tema na bigomu na aubu odo, me amiteu asu usino na nanu tasa. Amiteu damu i, agavuale a nanu odo a mui tasa ino mina kinaka. Me na nanu odo amiteu ite a tavivine sanii sou ugupilu, me amiteu asu ade pilu e sou.

<sup>14</sup> Tavine tasa, aisana Lidia, ei longe a inade do. Ei topatuliale Salemo taliuliu. Ei a tavine mine Taiataira, me ei guale a vatu na masosovena malo kasososo. Bibi Taula i sauvule a lilone ei, me ei longemuli a inade Pol ei vei.

<sup>15</sup> Ei guale a maavuvutuna pilu e sou so malu pilu na luma do. Ei guale a maavuvutuna pulu, me ei vei le amiteu, "Mane amutou damu i eau silimuli sele Bibi Taula, de amutou asu usinani mu ugu na luma minau." Me ei sagaluale sele amiteu me amiteu ogomuli a inadena.

*Pol pilu e Sailas su ugu na luma na tunuui ne Pilipai*

<sup>16</sup> Na malada tasa amiteu asu usino na muina kinaka, ma tavine na pipigona sabubu tasa ei poge amiteu na vea. Tavine do ei isa a nunu tasa ino ne ei, me ei ademudadada a gologolu ni palea mulimuli. Maido me sou a vanunua na niitealena pipigona mina tavine do, sou guale a vatu papaina na pipigona tavine do ei gologoli.

<sup>17</sup> Io tavine do ei ogomuli e Pol me amiteu, me ei tolatola maido, "Sou a vanunua ieli sou a vanunua na pipigona mine Salemo oata oto sele. Sou adeade ane amutou a vea mine Salemo ni gualeliu e amutou."

<sup>18</sup> Malada papaina tavine do ei goli simaido. Me mulimuli Pol ei bale sele a nilongena tinolana minei, maido me ei sauvue ei me ei ade ana nunu iedo maido, "Na aisane Iesu Krai, eau vei lio, oo ilisitase a tavine de mo asu." Ma tabaa oto nunu iedo ei ilisitase a tavine do me ei asu.

<sup>19</sup> Sou a vanunua mina itealalena tavine do sou ite maido a vea ne sou mina gualena vatu i boasi. Maido me sou saavi e Pol pilu e Sailas, me sou lapuale sulu usino ne sou a munuganuga na muina masosovena.

<sup>20</sup> Sou maasi e sulu usino ne sou a vanua na vivilealena inade, me sou vei le sou a vanunua do maido, "Bibi lua li sulu mina abuna ne Iuda. Sulu mailisilisi a sinoana na aubu buobuo mine eitou.

<sup>21</sup> Me sulu kale ne su lapuale a vanunua ma tavivine ne sou ogomuli a inigogona sanii sou magilisobe ne eitou vuso vanua mine Rom neitou goli."

<sup>22</sup> Vanunua ma tavivine sou viepilu sou tamai sou ubi a inade usino ne sulu. De sou a vanua na vivilealena inade sou kaitase a kinainai ne sulu, me sou vei le sou a vanunua sanii ne sou tibi e sulu a butu.

<sup>23</sup> Sou tibigegele sele sulu, ma vanua na vivilealena inade sou tau e sulu na luma na tunuui. Me sou ade sagali ane a bibi na ulagena luma na tunuui ni ulage kube e sulu.

<sup>24</sup> Bibi mina ulagena ei longe a inade mine sou a vanua na vivilealena, io ei tau e sulu na vilo lilo oto sele na luma na tunuui. Me ei papalesobe sagali a ubune sulu na obu.

<sup>25</sup> Na lodo punosa Pol pilu e Sailas su kaka me su ala ane Salemo. Ma vanunua sanii sou ugu tamai na luma na tunuui sou longe sulu alaala.

<sup>26</sup> Ma tabaa oto a malugulugu tasa buo i vuli, me ei une a baobao vuso na luma na tunuui. Ma tema vuso mina luma na tunuui i peo, ma mota sagaligali vuso mine sou a vanunua sou ugu mina luma na tunuui ei tavuvuso.

<sup>27</sup> Ma bibi na ulagena ei ilisi me ei ite a tema vuso i peo, me ei damu i a vanunua vuso mina luma na tunuui sou oavasi.

Maido me ei lapuale a viso minei me ei kale ni valipute ei oto.

<sup>28</sup> Moni Pol i tola vauta maido, "Oo no ma toegegeligeli liu lei e oo oto. Amiteu vuso eili."

<sup>29</sup> Ma bibi na ulagena ei tola ne sou maasi maino a sulu, me ei vele ulilo na vilo Pol pilu e Sailas ino i. Ei lae sele ma vovona palili, me ei bosa agavuale a ubune Pol me Sailas.

<sup>30</sup> Me mulimuli bibi na ulagena ei guale sulu usala, me ei tagi e sulu maido, "Bibi buo lua, eau na goli a sava me ne Salemo ni gualeliu e eau?"

<sup>31</sup> Me sulu vei maido, "Oo no silimuli e Bibi Taula e Iesu, me Salemo ni gualeliu e oo pilu e sou a abuna minio."

<sup>32</sup> Me su malongo a inade mine Bibi Taula usino ne ei me ne sou a abuna minei.

<sup>33</sup> Me na lodo do, bibi na ulagena do ei guale sulu me ei loloivei a tuutuu ne sulu. Me ei pilu e sou a abuna minei vuso sou guale a maavuvutuna.

<sup>34</sup> Ma bibi na ulagena ei guale sulu usino na luma minei, me ei bilii e sulu a gona inani. Me ei pilu e sou a abuna minei sou mongemonge sele, vuna sou silimuliosi e Salemo.

<sup>35</sup> Na autupola sou a vanua na vivilealena inade sou peltase sou a papai usino, me sou vei le a bibi na ulagena do maido, "Sou a vanua na vivilealena sou vei, o no lube a bibi lua de ne su asu."

<sup>36</sup> Me a bibi na ulagena ei asu vei le Pol maido, "Sou a vanua na vivilealena sou sosove a inade na lubetasene amulu ne mu asu. Maido me ne amulu ilisitase a luma na tunuui me ne mu asu, ma lilone amulu ni mea."

<sup>37</sup> Moni Pol i vei le sou a papai maido, "Amilu maino ne Rom. Posa matina sou a vanua na vivilealena inade sou ma longe kube ete a vavasana mine amilu ne sou poge iiti amilu goli a inigogona pagu tasa ue boa? Moni sou ubi sabubi e amilu na matane sou a vanunua ma tavivine, me sou tau e amilu na luma na tunuui. Me seidei nane sou kale ne sou toe oovi moni me sou peltaselele amilu usino, io? Umana sele. Sou oto ne sou asu usinani ne sou langetase amilu usala."

<sup>38</sup> De sou a papai sou maasi a inade ne Pol usino ne sou a vanua na vivilealena inade. Me ilala sou a vanua do sou longe maido Pol me Sailas su maino ne Rom, sou lae.

<sup>39</sup> Maido me sou a vanua na vivilealena inade sou asu usino na luma na tunuui, me sou adedinodo ane sulu, me sou langetase e sulu usala. Me sou tagi e sulu ne su ilisitase a aubu buobuo do me su asu.

<sup>40</sup> Tauluna sulu ilisitase a luma na tunuui, sulu asu usino na luma mine Lidia. Sulu ite sou a kristen me su bilii a inade sanii

usino ne sou mina masagalina lilone sou. Me mulimuli sulu ilisitase a aubu buobuo do.

## 17

*Pol me Sailas sulu malongo ne Tesalon-aika*

<sup>1</sup> Pol pilu e tamtamaine ei sou asu usino ne Ampipolis me ne Apolonia. Me sou ilisitase a aubu lua do me sou divi ne Tesalon-aika. Luma na kinaka tasa ne sou e Iuda ino na aubu do.

<sup>2</sup> Me Pol ei goli a matana inigogona tasa moni tomane taliulu ei gologoli. Ei gali ulilo na luma na kinaka iedo pilu e sou e Iuda, me na Maolona Malada tolu ne sou e Iuda ei ade pilu e sou na inade ino na Laulau mine Salemo.

<sup>3</sup> Ei veimuae a vuna Kraiss ei ni tabule a davutina mei ni mate me mulimuli ei ni ilisiliu. Ei vei maido, "Iesu eau malongo a inade usino ne amutou odo, ei moni ei e Kraiss."

<sup>4</sup> De vanunua ma tavivine sanii balivua ne sou e Iuda, sou silimuli, me sou ogomuli e Pol me Sailas. Abuna taula mine sou e Grik sou kakake Salemo sou ogomuli e sulu. Me papaina mine sou a tavivine sou isa a aisa buo sou tamai sou ogomuli e sulu.

<sup>5</sup> Moni sou e Iuda sou ite a abuna iedo sou ogomuli e sulu, me sou lilogegel. Maido me sou guale sanii mine sou a vanunua pagupagu sou ino maisaba na muina viepiluna, me sou viepili a vanunua ma tavivine i papaina sele lou, me sou mailisi a lilone sou a vanunua ma tavivine mina aubu buobuo do, me sou utipee a tema na luma mine Ieson. Me sou tilomuli e Pol me Sailas mina gualene sulu usala me sou tau e sulu na limane sou a vanunua ma tavivine.

<sup>6</sup> Moni sou ma ite ete sulu, maido me sou lapuale Ieson pilu e sou a kristen sanii usino ne sou a munuganuga mina aubu do. Me sou tola maido, "Sou a vanunua sou gaga maisaba me sou gologoli a inigogona pagu i palea mina avena vuso na magamaga, me seidei sou eiliosi ie."

<sup>7</sup> Me Ieson i guale sou usino na luma minei. A vanunua do sou saukiki a binea mine Sisar. Sou veivei maido, 'A mapana tasa sea ino, aisana Iesu.'

<sup>8</sup> Sou a vanunua ma tavivine pilu e sou a munuganuga mina aubu buobuo sou longe a inade do, me sou saga mamau me sou ngala maisaba.

<sup>9</sup> Io sou a munuganuga sou vei le Ieson pilu a vanunua sanii ne sou oli pale a vavasana, me sou litase sou usino.

*Pol me Sailas sulu asu usino ne Beria*

<sup>10</sup> Ei tunuuiosi, io sou a kristen sou peltase Pol me Sailas usino ne Beria. Sulu sibitala

ne Beria, me sulu gali ulilo na luma na kinaka mine sou e Iuda.

<sup>11</sup> Sou a vanunua ma tavivine ino ne Beria sou kubaana lou, ma inigogona mine sou ei muga sele ane sou e Iuda mine Tesalonika. Sou kale sele ne so longe a inade mine Pol. Me na malada vuso sou gigi me sou gege-muale a inade ino na Laulau na vinalu mine Salemo, ve ne sou muada i a inade mine Pol ei patotona ue boa.

<sup>12</sup> Maido ma vanunua ma tavivine papaina mine sou e Iuda sou silimuli. Me sou vanunua ma tavivine Grik papaina sou isa a aisa sou tamai sou silimuli.

<sup>13</sup> Moni ilala sou e Iuda mine Tesalonika sou longe a inade ve Pol ei malongo a inade mine Salemo ne Beria, sou asu usino na aubu iedo me sou toemaisabe a damutatalana mine sou a vanunua ma tavivine me sou goli e sou so saga gegelu.

<sup>14</sup> De simoni iodo sou a kristen sou peltase Pol ulau na mado. Moni Sailas pilu e Timoti su ugu ne Beria.

<sup>15</sup> Ma vanunua sou langetase Pol na vea sou maasi ei usino pea ne Athens. Me mulimuli ilala sou kale ne sou veteliu, Pol ei ade sagali ane sou ne sou vei le Sailas pilu e Timoti maido, "Amulu mu asu asi usinani minau."

*Pol ei malongo a inade ne Athens*

<sup>16</sup> Pol ei magitalitali e Sailas me Timoti ne Athens, me ei ite a aubu buobuo iedo ei isa a salemo auala papaina. Me ieli ei goli a lilone ei mamau sele.

<sup>17</sup> Maidolo me ei asu usino na luma mina kinaka ne sou e Iuda me ei ade pilu e sou e Iuda me sou a vanunua mine sou a abuna sea sou kakake Salemo. Na malada vuso ei asu usino na muina viepiluna me ei ade pilupilu e sou a vanunua ma tavivine sou asu usinani na avena ie.

<sup>18</sup> Ma vanua na muadana sanii ne sou a abuna ne Epikurian me Stoik, sou maubi a inade pilu e ei. Sanii sou vei, "Bibi na ade maisabana iedo ei kale ni vei a sava?" Me sanii sou vei, "Nane ei malongo a inade mine sou e salemo mina aubu sea." Vuna Pol ei kale ni malongo a malongolongona kubaana mine Iesu mei vei le sou e Iesu ei ilisiliu na muina minate.

<sup>19</sup> De sou guale Pol me sou maasi e ei usino mina Areopagus, ieli a loena tasa sou a vanua na toebilelesina inade sou viepilupilu nado. Me sou vei lei maido, "Amiteu kale namiteu muada a inade alaba oo bilii e sou a vanunua ma tavivine iedo."

<sup>20</sup> Amiteu longe a inademu, me amiteu somiale ei sea sele. Maido me amiteu kale ne amiteu muada a vuna inade o vei iede."

<sup>21</sup> Sou vuso Athens pilu e sou a vanua mine sou a avena sea eili ne Athens, sou ma gologoli

ete a golu tasa sea, moni taliului sou kale mamaimai sele ne sou longe a inade mina damutatalana alaba, me sou maiadeade balivua ne sou oto.

<sup>22</sup> De Pol ei magili balivua ne sou a vanunua na toebilesina inade na loena Areopagus, me ei vei maido, “Amutou a vanunua ne Atens, eau ite amutou sagali sele a gunolina matamatana inigogona vuso mina kinaka.

<sup>23</sup> Eau asu usino, me eau ite sou a golugolu amutou kaka ana. Me eau ite a poso na niabi tasa, sou niage a inade maido, ‘Poso na niabi ieli mine salemo tasa amiteu ma muada oto e ei.’ Io salemo iedo amutou ma muada oto i me amutou kaka sabubu ana, seidei eau kale na malongo a inade mine ei usino ne amutou.

<sup>24</sup> “Salemo ei mapale a magamaga pilu a golugolu vuso eili na magamaga, Salemo ieli ei e Bibi Taula na langi me mina magamaga. Maido me ei ma ugu oto lilo na lumaluma na kinaka vanunua sou tige.

<sup>25</sup> Ei ma boto oto a golu tasa me eitou a vanunua neitou goli a golu tasa a limane eitou mina buloine ei. Boa. Ei oto ei bilii a maulina ma avivili ma golugolu vuso usino ne sou a vanunua ma tavivine.

<sup>26</sup> Na bibi tasa moni ei goli a abuna vanunua ma tavivine vuso sou palea, me ei tau e sou na avena vuso na magamaga. Ei oto ei tau a ilala ne sou malu i, me ei oto ei oali a viavo na magamaga mine sou.

<sup>27</sup> Salemo ei kale a vanunua ma tavivine ne sou tilomuli ei me ne sou muada sele ei, Salemo ei ma bulagotase ete eitou vuso tastasa.

<sup>28</sup> Eitou gualeale a maulina maino ne ei, me ei tasa moni ei iabi a sagalina usinani ne eitou me eitou asu i. Ei tomane a vanua mina muadana sanii mine amutou sou vei, ‘Eitou tamai eitou e natatune ei.’

<sup>29</sup> “De eitou eili e natatune Salemo, maido me neitou ma damu lou e Salemo ei tomane a gol ma silva ma vatu. Me neitou ma damu lou e ei tomane a golu eitou a vanunua eitou pui a limane eitou me na damutatalana mine eitou oto.

<sup>30</sup> Ilala a vanunua sou ma isa oto a muadana, Salemo ei ma adepapai oto e sou a golugolu sou goli na ilala do. Moni seidei ei ade sagali ana vanunua na aveavena vuso ne sou sauvule a lilone sou.

<sup>31</sup> Ei vilealesi a malada tasa mine ei ni vavasa ane sou a vanunua ma tavivine. Me na inigogona bilesi minei, ei ni vivileale a inigogona mina vanunua ma tavivine na magamaga. Me ei vileale a bibi tasa ni iteale a vavasana iedo. Bibi iedo ei mate me Salemo ei mailisiliu e ei na muina minate. Maido me neitou silimuli sele Salemo ei bilii a pipigona do usino ne ei.”

<sup>32</sup> Sou longe a inade mina bibi ei ilisiliu na muina minate do, me sanii sou adepintola ane Pol. Me sanii sou vei, “Amiteu kale namiteu longe lei e oo no ade lou a golu ie.”

<sup>33</sup> De Pol ei ilisitase sou me ei asu.

<sup>34</sup> Moni a vanunua sanii sou ogomuli e ei me sou silimuli. Tasa ei e Dionisius, ei tasa mine sou a vanua na toebilelesina inade sou viepilu na loena Areopagus. Ma tavine tasa, aisana e Damaris, ei silimuli, ma vanunua ma tavivine sanii tamai sou silimuli.

## 18

### *Pol ei malongo a inade ne Korin*

<sup>1</sup> Mulimuli Pol ei ilisitase Atens mei asu usino ne Korin,

<sup>2</sup> me ei poge Iuda tasa, aisana e Akila. Vuna aubu mine Akila ei mina avena ne Pontus. Lisa sapa ei pilu e susuna, Prisila, su ilisi ne Rom me su asu usinani, vuna maido Sisar Klodius ei vei le sou e Iuda ne sou ilisitase e Rom. Io Pol ei asu ite sulu.

<sup>3</sup> Ei goligoli a pipigona tasa moni tomane sulu, ei a pipigona mina sinainaina malona bale. Maido me Pol i ugu pilu e sulu, me sou pipigo a muine sou.

<sup>4</sup> Na Maolona Malada vuso ne sou e Iuda, Pol ei asu asu usino na luma na kinaka mine sou e Iuda, me ei ade pilupilu e sou. Ei kale ni mailisi a damutatalana mine sou e Iuda me sou e Grik ne sou silimuli e Iesu.

<sup>5</sup> Na ilala Sailas me Timoti su ilisitase Masedonia me su sibitala utano, Pol ei pipigo a malongona inade mine Salemo na malada vuso. Ei ade sagali ane sou e Iuda maido, “Iesu ei e Kraiss.”

<sup>6</sup> Moni e sou e Iuda sou ma kale ete ne sou longe a inade minei, me sou salaitavole ei. Maido me ei lalabeveitase a molomolo na kinainai minei, me ei vei le sou maido, “Mane amutou buale, ede a sinusu mine amutou oto. Eau ma isa oto a sinusu mina golu ie. Seidei eau na asu na malongo a inade ane sou a vanunua mina abuna sea.”

<sup>7</sup> Maido me Pol ei ilisitase a luma na kinaka mine sou e Iuda iedo, me ei asu usino na luma na bibi tasa, aisana e Titius lastus. Bibi iedo ei a bibi na kinaka ane Salemo, ma luma minei i agavi sele a luma na kinaka mine sou e Iuda.

<sup>8</sup> Munuganuga na luma na kinaka mine sou e Iuda, ei a bibi tasa aisana e Krispus. Ei pilu e sou minei vuso, sou silimuli e Bibi Taula. Ma vanunua ma tavivine papaina ne Korin sou longe a inade ne Pol, me sou tamai sou silimuli me sou guale a maavuvutuna.

<sup>9</sup> Na lodo tasa Bibi Taula i sibitala le Pol na tinada, me ei vei lei maido, “Oo no ma laelae lou. Umana. O no veipale. O no ma ase vanunuu lou.

<sup>10</sup> Eau ino pilu e oo, ma bibi tasa ei ma mapigogoi ete ni ilisi me ei ni toegegeli e oo, vuna maido vanunua ma tavivine minau makuba sou ino mina aubu iedo.”

<sup>11</sup> Pol ei muina ne Korin mapigogoi a avala tasa ma game pantasa, me ei matetengi e sou a inade mine Salemo.

<sup>12</sup> Moni na ilala Galio ei palea a munugana bibi ne Akaia, sou e Iuda sou ilisi pilu me sou butuale Pol. Sou maasi e ei usino na luma na vavasana, me sou vei maido,

<sup>13</sup> “Bibi ieli ei matetengitengi e sou a vanunua ma tavivine a saukikina binea mine amiteu ma gunolina kinaka usino ne Salemo na inigogona sea.”

<sup>14</sup> Bisii moni Pol ei ni sie a inade mine sou, Galio ei ade ane sou e Iuda maido, “Amutou Iuda, mane a bibi ieli ei pope a binea ue ei goli a inigogona tasa pagu, de eau mapigogoi na longe a inade ne amutou.

<sup>15</sup> Moni mane amutou lilobuu a inigogona mina inade me na aisaisana me na binea mine amutou oto me amutou asuale eau, muina, amutou oto namutou toebilelesi a inade iede. Eau ma mapigogoi ete na longe a vavasana mina matana golu maido.”

<sup>16</sup> Me ei peltaselele sou maino na muina vavasana.

<sup>17</sup> Me sou e Korin sou saavi e Sostenes, ei a munugana mina luma na kinaka mine sou e Iuda, me sou valibili e ei agavuale a muina vavasana. Moni e Galio ei ma lilobuu oto a golu sou goli lei.

#### *Pol ei veteliu usino ne Antiok*

<sup>18</sup> Pol ei ugu ne Korin malada papaina, me mulimuli ei ade munonge ane sou a kristen. Me ei asu usino ne Senkria me ei sae na kuta i kale ni vele usino na avena ne Siria. Prisila pilu e Akila sulu asu pilu e ei. Na ilala ei ugu ne Senkria ei oove a aivuna, vuna lisa ei goliosi a adegatuna tasa ane Salemo.

<sup>19</sup> Sou asu divi ne Epesus, me Pol ei asutase sulu na avena do, ei vululu ei gali ulilo na luma na kinaka mine sou e Iuda me ei ade pilu e sou.

<sup>20</sup> Sou vei lei maido, “Oo no ugu tabaa sapa pilu e amiteu.” Moni ei vei, “Eau ma mapigogoi ete.”

<sup>21</sup> Me mulimuli ei ade munonge ane sou, me ei vei maido, “Mane Salemo ei kale, de eau na veteliu lou usinani ne amutou.” Me ei sae na kuta me ei ilisitase Epesus.

<sup>22</sup> Kuta i vele ontola ne Sisaria, me Pol i asu uata ne Ierusalem, me ei vate oaso doa ana vanunua ma tavivine mina viepiluna kinaka. Me mulimuli ei ilisitase sou me ei asu utano ne Antiok.

<sup>23</sup> Pol ei ugu tabaa sapa ne Antiok me mulimuli ei asu usino na aububuna sou ino mina avena ne Galesia me Prigia, me ei

masagali a silimulina mine sou a vanunua ma tavivine sou silimuli e Iesu.

#### *Apolos ei malongo ne Epesus*

<sup>24</sup> Iuda tasa, aisana e Apolos, ei a bibi maino ne Aleksandria, ei asu ugu ne Epesus. Ei a bibi mina gunolina inade i doa, me ei muada sele a Laulau mine Salemo.

<sup>25</sup> Sou matetengi sagaliosi ei a vea mine Bibi Taula, ma lilone ei i sagali sele usino na matetengina vanunua ma tavivine, me ei vei bilesi le sou a golu Iesu i goli. Moni ei muada ma avuvutuna mine Ioanes moni.

<sup>26</sup> Ei asu usino na luma na inade, me sou e Iuda mei malongo a inade, ei ma lae oto a vanunua ma tavivine. Me Prisila me Akila su longe a inadene ei, me sulu guale ei usino me su vei le ei a vea mine Salemo, ne ei ni muada kuba iiti i.

<sup>27</sup> Mulimuli Apolos ei kale ni asu usino na avena buo e Akaia, me sou a kristen mine Epesus sou masagali a damutatalana minei ni asu. Sou niage a laulau usino ne sou a kristen mine Akaia me ei vei le sou ne sou guale ei. Ma ilala Apolos ei sibitala ne Akaia, de ei buloi sele sou a kristen, ede sou a vanunua ma tavivine Salemo ei dode sou me ei bilii e sou a silimulina.

<sup>28</sup> Ei vululusi a adeliuna ma taipui selena inade pagu mine sou e Iuda na matane sou a vanunua ma tavivine. Ei veimuade a Laulau mine Salemo mina maitene sou ne sou muada i maido, Iesu ei e Krais.

## 19

#### *Pol ei malongo ne Epesus*

<sup>1</sup> Na ilala Apolos ei ino ne Korin, Pol ei gaga na aububuna sou ino na avena na loena, mulimuli ei sibitala ne Epesus. Ne Epesus ei poge a disaipel sanii

<sup>2</sup> me ei tagi e sou maido, “Ilala amutou silimuli, amutou guale a Maolona Nunu ue boa?” Me sou vei, “Boa. Amiteu ma longe ete a inade mina Maolona Nunu ino.”

<sup>3</sup> Me Pol ei vei le sou maido, “Maido me amutou guale sei matana maavuvutuna?” Me sou vei, “Amiteu guale a maavuvutuna mine Ioanes.”

<sup>4</sup> Me Pol ei vei maido, “Lisa Ioanes i maavuvuti a vanunua ma tavivine mei vei, ‘Namutou sauvuvule a lilone amutou me mu guale a maavuvutuna. Me namutou silimuli a bibi iodo ei ni asu usinani na taulugu.’ Bibi Ioanes ei ade i iodo, ede e Iesu.”

<sup>5</sup> Sou longe a inade do, me sou guale a maavuvutuna na aisane Bibi Taula e Iesu.

<sup>6</sup> Me Pol ei tau a limana muata ne sou, ma Maolona Nunu i sivo ne sou, me sou ade a matamatana inade, me sou malongo a inade tomane sou a profet.



7 Savulu ne sou i mapigogoi savulu tasa timana lua.

8 Io Pol ei gali ulilo na luma na kinaka mine sou e Iuda mei malongo sagali sele a malongolongona kubaana mei mailisi a damutatalana mine sou na niitealalena mine Salemo mapigogoi a game tolu.

9 Moni lilone mine sou sanii i ma puiale ete, maido me sou ma silimuli sape ete. Me na matane sou a vanunua ma tavivine sou adegelua a vea mine Bibi Taula. Maido me Pol ei asutase sou mei guala a vanunua sou silimuli e Iesu mei matetengitengi sou na luma na matetengina mine Tiranus na maladalada vuso.

10 Ei goli maido mapigogoi a avala lua. Maido ma vanunua ma tavivine lilo ne Esia sou vuso sou longe a inade mine Bibi Taula, ede sou e Iuda me sou e Grik pilu.

*Natatune Skeva sou kale ne sou taulele a nunu pagu*

11 Na limane Pol, Salemo ei goli a mata-matana gona sinaga sagali.

12 Maido ma vanunua ma tavivine sou tautau a hankisip ue a maduna malomalo na vovone Pol, me mulimuli sou guala a golugolu vuso do me sou tau ne sou so sobe. Maidolo ma sinobe mine sou i pulu, me sou a nunu pagupagu sou bualetase sou.

13 Iuda sanii sou asu maisabasaba me sou gualeale a vatu na taulelena nunu pagu. Sanii sou tove a vinate na aisane Bibi Taula Iesu, me na inigogona do sou kale ne sou taulele a nunu pagu ne sou a vanunua ma tavivine. Sou veivei maido, "Na aisane Iesu ieli, Pol i malongo i, eau vei sagali sele ane amoutou namutou asu."

14 A natatuna bibi padilua mine Skeva, ei a prist mine sou e Iuda, sou tamai goligoli a inigogona simaido.

15 Moni a nunu pagu i adeliu ane sou maido, "Eau muada e Iesu me eau muada e Pol tamai, moni amoutou e sei?"

16 Ma bibi a nunu pagu ei ino minei iodo, ei seu uata ne sou, mei ubi e sou mei vululusi sele sou. Ei toegegeli sele a vovone sou, mei sisinge a kinainai mine sou. Maido me sou asutase a luma do, me sou oava a aine sou moni.

17 Sou vuso Iuda me so Grik ino ne Epesus sou longe a inade na golu ei palea do, ma nilae buo i palea le sou. Me sou beilange a aisane Bibi Taula Iesu.

18 Vanunua ma tavivine makuba sou silimuliosi, sou asu usinani me na matane sou a vanunua ma tavivine sanii, sou veipale a inigogona vuso i pagu lisa sou goliosi.

19 Vanunua ma tavivine papaina sou goligoli a milolo ma mialo sou taupili a laulau mine sou odo, me sou tuni e sou na matane sou a vanunua ma tavivine. Sou

gi pili a mapana laulau vuso do, ei mapigogoi a vatu silva savuluvulu savulu lima (50,000).

20 Na vea maido a inade mine Bibi Taula ei pipigo sagali ne sou a vanunua ma tavivine, mei palea sagali na Maulina mine sou mei vele bubula usino na aveavena makuba.

*Epesus sou tola gegelu ane Pol*

21 Pipigona i palea sagaliosi ne Epesus, Pol ei kale ni asu usino ne Masedonia me Akaia, me mulimuli usino ne Ierusalem tamai. Ei vei maido, "Eau na asu na avena do, mulimuli eau na asu ite Rom tamai."

22 Me ei peltase a bibi lua su buloi ei, Timoti pilu e Erastus, me su asu muga pala ane ei usino ne Masedonia. Moni Pol oto ei muina tabaa sapa ne Esia.

23 Na ilala do vanunua sanii sou butuale a vea mine Bibi Taula, me sou mailisi a mangelengelena buo.

24 Bibi tasa ino, aisana e Demitrius, ei a bibi mina gunolina golugolu a silva. Ei pui a puigolo banini na luma na kinaka mine salemo tavine Artemis a silva. Ei bilii a pipigona papaina usino ne sou a vanunua sou goli a golugolu, me sou guala a vatu buo.

25 Io Demitrius ei tolepili a vanunua do pilu a vanunua sou goli a pipigona i maigavuala, me ei vei le sou, "Amoutou muada i, eitou a pipigona tasa, mapa doana mine eitou i palea mina vuvutina ne eitou.

26 Ma bibi e Pol ei lapualale a abuna vanunua ma tavivine taula me ei toemaisabe a damutatalana mine sou, tomane amutou ite me mu longesi. Me ei ma goli ete a inigogona do ne Epesus moni. Boa. Bisii moni ei ni avipope a avena vuso mine Esia. Ei vei maido, 'Sou e salemo eitou pui a limane eitou, sou e salemo ivu boa.'

27 Inade mine Pol iodo ei mapigogoi ni toegegeli a vuvutina mine eitou. Ei tamai mapigogoi ni goli a luma na kinaka mine salemo tavine buo Artemis ni palea tomane a golu sabubu moni na damutatalana mina vanunua ma tavivine. Palapala sou a vanunua ma tavivine mine Esia me na avena vuso na magamaga, sou kakaka ane salemo tavine do, moni na inade mine Pol ei kale ni toegegeli a aisa buo minei."

28 Sou a vanunua sou longe a inade do, sou sinoa sele. Me sou tola sagali maido, "Artemis mine eitou e Epesus ei muga sele!"

29 Maido ma mangelengelena buo i palea na aubu buobuo do. Sou ilisi pilu me sou lapuale Gaius pilu e Aristakus, sulu a bibi maino ne Masedonia me su gaga pilu e Pol. Me sou maasi sulu usino na muina viepiluna.

30 Pol oto i kale ni asu balivua ne sou a vanunua ma tavivine, moni sou a disaipel sou madetase e ei.

<sup>31</sup> Me tamai, vanunua sanii na niitealena mina avena e Esia sou tamtamaine Pol, sou sosove a inade usino ne ei. Sou ade sagali ane ei ni ma asuasou lou ulilo mina muina viepiluna.

<sup>32</sup> Abuna vanunua ma tavivine do, damutatalana mine sou i maisaba sele. Sou ngala maisaba me sou goli a matamatana inade. Ma vanunua ma tavivine papaina sou ma muada oto a vuna golu ivu sou viepili i iedo.

<sup>33</sup> Sou e Iuda sou sultase Aleksander usino ni magili na matana vanunua ma tavivine, ma vanunua sanii sou damu i ei a vuna sinoana. Me Aleksander ei kale ni adeliu ana vanunua ma tavivine, me ei tavasusua ane sou ma adeade lou.

<sup>34</sup> Moni sou iteilale ei, me sou muada, ei a bibi mine Iuda. Maido ma vanunua ma tavivine sou ngala pilu me sou tola sagali sele maido, "Artemis mine eitou e Epesus ei muga sele!" Sou ngalangala moni maido mapigogoi a matailala lua.

<sup>35</sup> Mulimuli a bibi na niagona ne Epesus ei vei le sou ne sou vale, mei vei le sou maido, "Amutou a vanunua mine Epesus, mu longe. Sei bibi ei ma muada oto e Epesus ei a abu buobuo mina itealalena luma na kinaka mine salemo tavine buo Artemis, me mina itealalena melalobo vatu odo ei pu muata na langi?"

<sup>36</sup> Bibi tasa i ma mapigogoi ete ni saukiki a inade do. Maido me amutou vuso mu vale. Amutou ma toeiasiasi lou a gunolina golu tasa.

<sup>37</sup> Amutou maasi usinani a bibi lua de. Moni su ma paaali ete a golu tasa na luma na kinaka mine eitou. Me su ma adegegeli ete e salemo tavine mine eitou.

<sup>38</sup> Mane Demitrius pilu e sou a vanunua na pipigona minei sou isa a inade usino na bibi tasa, de na malada tasa ino mina nilongena vavasana. Me sou a munugana vanua na itealalena avena tamai ino. Ne sou toebilelesi lei a inadena vavasana mine sou.

<sup>39</sup> Me mane amutou isa a inade sanii lou, de namutou toebilelesi na muina toebilelesina inade na ilala bilesi na viepiluna.

<sup>40</sup> Maido me amutou longe. Mane a vanua buobuo na itealalena aubu ie sou longe a inade na golugolu eitou goli seidei, de sou mapigogoi sele ne sou vavasa ane eitou, ma inade mine eitou ni mailisi a mavaana buo. A inigogona eitou goligoli ie a vuna boa. Me mane sou tagi e eitou, vuna matina eitou viepilu me eitou ngengea me eitou ngala maisabasaba, eitou ma mapigogoi ete neitou adeliu a inade tasa."

<sup>41</sup> Bibi na niagona ei adesi i maido, mei peltase sou a vanunua ma tavivine usino.

## 20

### *Pol i asu usino ne Masedonia me Grik*

<sup>1</sup> Ilala a mangelengeleni a pulu, Pol i toleale sou a disaipel usinani me ei masagali a lilone sou, me ei ade munonge ane sou, me ei asu usino na avena mine Masedonia.

<sup>2</sup> Ei gaga maisaba usino na avena do me ei masagali a lilone sou a disaipel a inade makuba. Mulimuli ei sibitala na avena ne Grik.

<sup>3</sup> Ei muina na avena do a game tolu, mulimuli ei kale ni guale a kuta usino ne Siria. Moni ei longe a inade sou e Iuda sou maiademuli i maido ne sou valiputemate ei, maido me ei sauvule a damutatalana minei me ei asu liu usino ne Masedonia.

<sup>4</sup> Bibi tasa ne Beria, ei e Sopate, natune Pirus, ei asu pilu e Pol. Ma bibi lua mine Tesalonaika, e Aristakus pilu e Sekundus, me Gaius mine Derbe, me Timoti, me tao lua ne Esia, e Tikikus me Tropimus, sou tamai sou asu pilu e Pol.

<sup>5</sup> Sou a vanunua iedo sou muga pala me sou magitali e amiteu ne Troas.

<sup>6</sup> Amiteu ugu ne Pilipai mapigogoi ne sou a Malada buo mina Ulalu a Is boa i pulu, de amiteu sae na kuta me amiteu ilisitase Pilipai. Na malada limanai amiteu asu sibitala na vanunua sou magitalitali amiteu ne Troas, me amiteu ugu a malada padilua ne Troas.

### *Ne Troas Pol ei tateilisi liu e Iutikus*

<sup>7</sup> Na munugana malada na wik amiteu viepilu pili e sou a kristen mina aanipiluna. Me Pol i malongo ane sou pea na lodo punosa, vuna maisavulo ei kale ni asu.

<sup>8</sup> Vilo oata amiteu viepilu iedo, ei isa a lada papaina i lulu.

<sup>9</sup> Ma bibi alaba tasa, aisane ei Iutikus, ei ugugu na tema na avivili tasa mina matoluna bala. Pol ei ade sosou mamau, ma matane Iutikus i mavaa me mulimuli ei ngolo, me ei bosa utano na magamaga. Me sou beilange ei, moni ei matesi.

<sup>10</sup> Pol ei sivo utano mei langedeute ei muata na bibi alaba do mei sautole ei. Ei vei le sou maido, "Amutou ma saga sabubu lou, maulina minei saboa eili."

<sup>11</sup> Me Pol i asu lou uata, me ei lee a ulalu, me ei aani pilu e sou. Mulimuli ei ade tabaa sele pilu e sou mapigogoi autupola siisii, de Pol i asu.

<sup>12</sup> Me sou guale a bibi alaba ei mau iodo usino na luma minei, ma lilone sou i mongemonge sele.

### *Pol i ilisitase Troas me ei asu usino ne Miletus*

<sup>13</sup> Amiteu pantase Pol me sae na kuta me amiteu asu divi ne Asos. Me amiteu

magitali e Pol sinado. Pol oto ei vei le amiteu ne amiteu muga, vuna ei kale ni vasale.

<sup>14</sup> Ilala Pol ei poge amiteu ne Asos, amiteu guale ei usino na kuta, me amiteu asu usino ne Mitilini.

<sup>15</sup> Amiteu ilisitase Mitilini, me maisavulo amiteu sibitala agavuale a lolopatipati e Kios. Me maisavulo lou amiteu ontola ne Samos, na malada mulimuli lou amiteu asu sibitala ne Miletus.

<sup>16</sup> Pol i tauosi a damutatalana ei kale ni asutase e Epesus, maido me ei ma kale ete ni ugu sabubu a ilala papaina ne Esia. Vuna ei kale ni toeasi, mane mapigogoi ei kale ni sibitala pala ne Ierusalem lilo na malada mina Pentikos.

*Pol i ade munonge ane sou buobuo mina viepiluna kinaka ne Epesus*

<sup>17</sup> Amiteu divi ne Miletus me Pol i sosove a inade usino ne sou buobuo mina viepiluna kinaka ne Epesus. Ei toleale sou usinani ne sou ite ei.

<sup>18</sup> Sou diviosi, de ei vei le sou maido, "Amutou oto amutou muada a inigogona eau goli osi soke na munugana ilala eau sibitala ne Esia, me na ilala vuso eau ino pilu e amutou.

<sup>19</sup> Amutou muada, ilala papaina sou e Iuda sou maiademuli a toebosene eau, iedo ei bilii e eau lilomavaana makuba ma tinovo, me eau tangi mapapai. Moni eau taupui sele a aisagu, me eau goli a pipigona mine Bibi Taula.

<sup>20</sup> Me eau ma lae oto a malongona a matamatana inade kubaana i puiale ni buloi e amutou na matane sou a vanunua ma tavivine me na luma tastasa vuso mine amutou tamai.

<sup>21</sup> Me taliuliu eau malongo sagali a inade usino ne sou e Iuda me Grik, ne sou sauvule a lilone sou usino ne Salemo, me ne sou silimuli e Bibi Taula mine eitou e Iesu.

<sup>22</sup> "De longe. Seidei Maolona Nunu moni ei goli, me eau na asu usino ne Ierusalem. Sei golu ni sibitala le eau ne Ierusalem, iede eau ma muada oto.

<sup>23</sup> Maolona Nunu moni ei ademuada ane eau maido, na abu vuso eau na asuale, a niuguna na luma na tunuui ma mavaana makuba ei magitali e eau.

<sup>24</sup> Moni eau ma damuale ete a maulina minau e a golu tasa i buo. Eau ma sagali mamau oto a lapitolena maulina minau. Boa. Eau kale na ogomuli a vea eau na asu i me eau na mapuli a pipigona do eau guale maino ne Bibi Taula Iesu. A pipigona do ei mina veimuadana malongolongona kubaana mina dinodo mine Salemo.

<sup>25</sup> "De tantamaigu, mu longe. Lisa eau ino balivua ne amutou, me eau malongo a inade na niitealalena mine Salemo. Moni

seidei eau muada, mulimuli amutou vuso namutou ma ite ete a lagugu lou.

<sup>26</sup> Maido me eau kale na ademuada palea ane amutou seidei. Mane tasa balivua ne amutou ni buale, iede a mavaana minau boa,

<sup>27</sup> vuna maido eau ma lae oto a veipalena damutatalana vuso mine Salemo usino ne amutou.

<sup>28</sup> Namutou ulage kube amutou oto me sou a sipsip, iedolo a vanunua ma tavivine vuso mina viepiluna kinaka mine Salemo ei oli a dalane Natune ei oto, ma Maolona Nunu ei vileale amutou ne mu itealale sou a sipsip iedo.

<sup>29</sup> Eau muada, ilala eau ilisitase amutou me eau asuosi, sou a busebuse aou ne sou vele usinani balivua ne amutou, me ne sou toegegeli e sou a sipsip.

<sup>30</sup> Ma vanunua sanii mine amutou oto ne sou ilisi me ne sou auale maisabana mina lapualena vanunua ma tavivine mine Salemo ne sou ogomuli e sou.

<sup>31</sup> Maido me namutou ulago kuba taliuliu. Amutou ma danivusevuse lei a inigogona eau vei. Na avala tolu, na lodo me na oaso, eau ma bale oto a matetengine amutou vuso tastasa. Ma ilala eau matetengi e amutou, matananugu i kokolo pilu i.

<sup>32</sup> "Seidei eau tau e amutou na limane Salemo, me eau kale ne amutou damutale a inade mina dinodo mine ei. Inade iedo ei mapigogoi ni toesagali e amutou, me ei mapigogoi ni bilii e amutou a golugolu vuso i kubaana Salemo i bilii a vanunua ma tavivine maolo vuso ei vileale minei oto.

<sup>33</sup> Eau ma isu oto ana silva ma gol malo ue golu mina bibi tasa.

<sup>34</sup> Amutou oto mu muada, na limane eau oto eau goli a pipigona mina itealene eau oto, me mina buloina vanunua ino pilu e eau tamai.

<sup>35</sup> Na pipigona vuso eau goli, eau maitesi e amutou maido, neitou ogomuli sagali a inigogona ieli. Maido eitou mapigogoi neitou buloi a vanunua sou ma mapigogoi ete ne sou buloi e sou oto. Me neitou damutale a inade Bibi Taula Iesu oto ei vei iedo. Ei vei maido, 'Munonge mina bibi ei bilii a golu usino na vanunua sea, ieli ei vululusi a munonge mina bibi ei guale a golu maino na vanunua sea.' "

<sup>36</sup> Pol ei ade a inade do pulosi, io ei totpatulu me ei kaka pilu e sou buobuo vuso do.

<sup>37</sup> Mulimuli sou vuso sou tangitangi, me sou bingtole e Pol me sou gamumi ei.

<sup>38</sup> Sou lilomuli gegeli sele ei, vuna maido Pol ei vei ane sou ve ne sou ma ite ete lei a lagune ei. Me sou langetase ei ulau na kuta.

## 21

### *Pol ei asu usino ne Ierusalem*

<sup>1</sup> Amiteu ilisitate sou buobuo, me amiteu vele bilési usino na lolopatipati e Kos. Maisavulo amiteu divi ne Rodes. Me amiteu pantase Rodes me amiteu sibitala ne Patara.

<sup>2</sup> Ne Patara amiteu ite a kuta tasa ei kale ni vele usino na avena ne Ponisia, io amiteu sae na kuta iedo.

<sup>3</sup> Mulimuli amiteu ite a lolopatipati e Saiprus me kuta ei veleuli na vaina ne meli. Me amiteu vele sibitala na avena buo ne Siria, me amiteu ontola na aubu buobuo e Tair, vuna maido kuta ei kale ni masive a golugolu na aubu do.

<sup>4</sup> Me amiteu asu me amiteu poge sou a disaipel, me amiteu ugu na aubu do a malada padilua. Maolona Nunu i bilíi a inade usino ne sou a disaipel, me sou vei le Pol ni ma asuasou lou usino ne Ierusalem.

<sup>5</sup> Na ilala kuta i kale ni ilisitate Tair, sou a disaipel pilu e natatuna me susune sou, sou langetase amiteu usala na aubu do. Lau na mado amiteu totopatulu me amiteu kaka.

<sup>6</sup> Me amiteu mailangtaso, io amiteu sae na kuta, me sou veteliu usino na luma mine sou.

### *Ne Sisaria profet Agabus ei malongo a inade e Pol*

<sup>7</sup> De amiteu ilisi ne Tair, me amiteu asu sibitala ne Tolemes. Amiteu vate oaso kubaana ane sou a kristen, me amiteu ugu pilu e sou a malada tasa.

<sup>8</sup> Na maisavulo amiteu ilisitate Tolemes me amiteu asu sibitala ne Sisaria. Me amiteu asu usino na luma ne Pilip, ei a bibi tasa ei veimuade a malongolongona kubaana usino ne sou a vanunua ma tavivine, me amiteu ugu pilu e ei. Ei tasa mina vanunua padilua sou buloilo i e sou a aposel.

<sup>9</sup> Ei isa natuna tavine iva sou ma taulai oto. Sou veipalele a inade mine Salemo tomane sou a profet.

<sup>10</sup> Amiteu ugu ne Sisaria a malada sanii lou, me a profet tasa, aisana Agabus, ei ilisitate a avena ne Iudia mei asu ulau ne Sisaria.

<sup>11</sup> Ei asu usinani ne amiteu mei guale a palaai mine Pol mei palesobe a ubuna ma limane ei oto. Me ei vei “Maolona Nunu i vei maido, ‘Na inigogona ieli sou e Iuda mine Ierusalem ne sou papale a tamana palaai maido, me ne sou bilíi e ei usino na limane sou a vanunua mina abuna sea.’”

<sup>12</sup> Amiteu longesi maido, me amiteu pilu e sou a vanunua ma tavivine mina aubu ieli amiteu ade sagali ane Pol ni ma asuasou lou usino ne Ierusalem.

<sup>13</sup> Moni Pol ei adeliu maido, “Posa matina amutou tangitangi me amutou toegegeli a lilogu? Eau masusulu moni ne sou tau eau

mina luma na tunuui. Me eau masusulu tamai na mate ne Ierusalem mina beilangena aisane Bibi Taula Iesu.”

<sup>14</sup> Amiteu ite maido Pol ei sagali sele a inasu usino, maido me amiteu ma tove lei ete a sauvulena damutatalana minei. Amiteu vei, “Golu Bibi Taula ei kale ni palea, ei ni palea.”

### *Pol ei asu sibitala ne Ierusalem*

<sup>15</sup> Malada sanii pulosi, amiteu masusulu a golugolu me amiteu asu usino ne Ierusalem.

<sup>16</sup> Me sanii mine sou a disaipel ino ne Sisaria sou asu pilu e amiteu. Sou langetase amiteu usino na luma mine Nason, ei a bibi mine Saiprus, ma lisa otosi ei paleasi a disaipel. Me amiteu ugu na luma minei.

<sup>17</sup> Amiteu asu sibitala ne Ierusalem, me sou a kristen sou mongemonge a gualene amiteu.

<sup>18</sup> Maisavulonai Pol ei asu pilu e amiteu ni ite e Iemus. Me sou buobuo mina viepiluna kinaka tamai sou asu usinani sou viepilu na ilala do.

<sup>19</sup> Pol ei vate oaso kubaana ane sou, me ei mapamuli iiti le sou a golugolu vuso Salemo ei goli na limane ei balivua ne sou a vanunua ma tavivine mine sou a abuna sea.

### *Sou a vanua buobuo sou vei le Pol ni asu usino na luma mine Salemo*

<sup>20</sup> Sou buobuo sou longesi a inade ne Pol, me sou beilange a aisane Salemo. Me sou vei lei maido, “Tamaigu, o muada, savuluvulu papaina ne Iuda sou silimuliosí e Iesu. Ma vanunua ma tavivine ieli sou sagali sele a ogomulina binea mine Moses.

<sup>21</sup> Moni a vanunua sanii sou vei le sou e oo maido, ‘Pol ei vei le sou e Iuda sou ino balivua ne sou a abuna sea, ne sou veletase a binea mine Moses. Ei tamai veivei maido, ‘Amutou ma moglemoge lei natatune amutou. Me namutou ma ogomulimuli lei a inigogona lisa.’”

<sup>22</sup> Eitou muada, sou longe maido oo diviosí. Maido me neitou goli a sava?

<sup>23</sup> De oo no goli a inigogona tasa amiteu vei lío. Amiteu isa a bibi iva, sou goli a adepatotonana tasa ane Salemo.

<sup>24</sup> Oo no gualé a vanunua sou do, me no toe sou ne ogomuli a inigogona mina paleana alaba na matane Salemo. Me tamai, o no oli a niabi vuso ne sou goli a alelena aivuna letene sou. Mane o goli maido, vanunua vuso ne sou muada, a inade sou goli le oo, ei a inade na aualana moni. Ne sou muada i, oo tamai o ogomulimuli a binea.

<sup>25</sup> Usino na vanunua ma tavivine mina abuna sea sou silimuli e Iesu, eitou masosovesi a laulau, me eitou vei le sou a inade eitou maiademuliosí i lisa maido, ne sou ma

aniani lei a golu vivi vanunua sou goli a niabi usino ne sou a salemo auala, me ne sou ma aniani lei a daladalana golu vivi ma golu vivi sou papale a loone sou, me ne sou ma gologoli lei a inigogona sualolona.”

<sup>26</sup> Maido me Pol ei guale sou a vanunua do sou goli a adepatotonana ane Salemo, me maisavulonai ei ogomuli a inigogona vuso mina gunoline ei ni palea alaba pilu e sou. Me ei gali ulilo mina bigomu na luma mine Salemo mei vei le sou a prist ne sei malada sou palea alabasi me sou maasi a niabi mine sou tastasa.

*Sou Iuda sou lapitole Pol na luma mine Salemo*

<sup>27</sup> Malada padilua i agaviosi ni pulu, sou e Iuda sou asu maino na avena buo ne Esia sou ite Pol ino lilo na luma mine Salemo, me sou mailisi a lilonu vanunua ma tavivine vuso me sou sinoa ane Pol. Maido me sou lapitole Pol,

<sup>28</sup> me sou tola vauta maido, “Amutou vanunua mine Israel, buloi e amiteu. Bibi ieli ei vei ana vanunua ma tavivine na aububuna vuso mina taupuina abuna mine eitou pilu a binea mine Moses ma luma mine Salemo ieli tamai. Me ei ma goli moni ete a inigogona ieli. Boa. Ei magali e sou e Grik ulilo na bigomu mina luma mine Salemo, me ei goli a mui iedo Salemo ei vileale minei oto ni palea mumugu mina matane Salemo.” Sou vei a inade simaido,

<sup>29</sup> vuna maido lisa sou ite Tropimus mina Epesus ino lilo mina aubu buobuo do pilu e Pol, me sou damu i e Pol ei magali ei ulilo mina luma mine Salemo.

<sup>30</sup> Vanunua ma tavivine sou longe a inade do, me sou vuso mine Ierusalem sou sinoa sele, me sou vele usinani me sou viepili. Sou sautole Pol me sou lapuale ei usala mina bigomu na luma mine Salemo. Ma tabaa oto sou kapi a tema vuso mina bigomu na luma mine Salemo.

*Sou a vanunua na maubina mine Rom sou guale Pol*

<sup>31</sup> Ilala sou kale ne sou valipute Pol, moni a munugana bibi mina vanua na maubina savuluvulu tasa mine Rom ei longe a inade maido, “Sou vuso mine Ierusalem sou sinoa me sou maububi maisaba.”

<sup>32</sup> Maido ma tabaa oto ei guale sou a munuganuga ma vanua na maubina, me sou vele utano na gona sou a vanunua ma tavivine sou ino i iodo. Sou e Iuda sou ite a munugana bibi ei asu pilu e sou a vanua na maubina, me sou litase Pol me sou ma ubi etesi e ei.

<sup>33</sup> Seido a munugana bibi ei vei le sou a vanunua na maubina ne sou sautole e Pol me ne sou papale ei a sen lua. Me ei tagi e

sou e Iuda maido, “Bibi ieli e sei? Ei goli a sava?”

<sup>34</sup> Me sou ngala maisaba me sou ade maisaba. Sou goli a mangelengena buo, io munugana bibi ei ma mapigogoi ete ni longe a vuna inade. Maido me ei vei le sou a vanunua na maubina ne sou maasi e Pol ulilo na luma ne sou.

<sup>35</sup> Moni a ilala Pol ei sibatila na sinaenae mina luma do, vanunua na maubina sou ite a vanunua ma tavivine sou sagali sele a valiputene ei, maido ma vanua na maubina sou gualelele ei usino.

<sup>36</sup> Abuna vanunua ma tavivine buo sou ogomuli e sou me sou tola vauta maido, “Valiputemate ei!”

*Pol i ade ane sou e Iuda a vuna silimulina mine ei*

<sup>37</sup> Ilala sou a vanunua na maubina sou kale ne sou magali e Pol ulilo na luma ne sou, Pol ei vei ana munugana bibi na inade Grik maido, “Mapigogoi eau na vei a inade tasa usino minio?” Ma munugana bibi ei vei, “O muada a inade Grik, io?”

<sup>38</sup> Lisa bisii moni a bibi tasa ne Isip ei mailisi a maubina ana vanua na itealalena aubu, me ei guale a vanunua savuluvulu iva (4,000) sou maubi a viso, mei maasi e sou usino na avena a vanua boa. Eau damu e oo a tau Isip iedo.”

<sup>39</sup> Me Pol ei vei maido, “Eau e Iuda. Eau maino ne Tarsus mina avena e Silisia. Aubu buobuo do ei isa a aisa buo. Eau kale na billi a inade usino na vanunua ma tavivine.”

<sup>40</sup> Munugana bibi ei longo a tinagu odo, me Pol ei magali mina sinaenae iedo me ei tavasusua ana vanunua ma tavivine ne sou vale. Maido me sou vuso sou ma ade oto, me Pol ei ade ane sou na inade HIBRU. Ei ade maido.

## 22

<sup>1</sup> “Amutou tatasigu me tamatamagu, amutou longe. Seidei eau kale na veipale muade le amutou ve eau ma goli ete a sinusu tasa.”

<sup>2</sup> Sou longe Pol i adeade a inade HIBRU, me sou vavale me sou ugu keke moni. Me Pol ei ade lou maido,

<sup>3</sup> “Eau e Iuda tasa. Eina ei maalepose eau ne Tarsus na avena e Silisia, moni eau palea buo nani na aubu ie e Ierusalem. Eau guale a matetengina mine Gamaliel, me ei matetengi sagali sele eau a binea vuso mine tubutubune eitou. Me eau pipigo sagali sele a masagaline sou a inigogona Salemo ei kale tomane moni seidei amutou gologoli ie.

<sup>4</sup> Eau toegegeli sou a abuna mina vanunua ma tavivine sou silimuli me sou ogomuli a vea do me eau kale na valipute sou. Eau papale sou a mota sagaligali me eau langetase sou usino na luma na tunuu.

<sup>5</sup> Mapana prist pilu e sou a vanunua na aveluluseña inade sou muada a inigogona eau goli iedo, me sou mapigogoi ne sou vei le amutou i. Sou bilii e eau a laulau vuso sou niage usino ne sou a abuna mine eitou sou ino ne Damaskus. Me eau asu usino ne Damaskus mina papalene sou a vanunua ma tavivine mina aubu iedo sou silimuli me sou ogomuli a vea iedo. Eau kale na maasi e sou usino ne Ierusalem, vuna sou a vanua buobuo ne sou malaitabe sou.”

*Pol mapamuli e ei i paleasi a kristen  
(Apo 9:3-19, 26:12-18)*

<sup>6</sup> Pol ei ade lou maido, “Na oaso matailala tomána savulu tasa timána lua eau asuasú usino me eau sibitala agavi ne Damaskus. Me saga a muada tasa buo muata na langi i lada mamau sele minau.

<sup>7</sup> Me eau bosa na magamaga, me eau longe a baligoluna bibi tasa i tole e eau maido, ‘Sol, Sol, vuna matina oo toegegeligeli eau?’

<sup>8</sup> “Mea tagu, ‘Bibi Taula, oo sei?’ Me ei vei, ‘Eau e Iesu mine Nasaret, oo toegegeligeli moni e eau.’

<sup>9</sup> A vanunua ino pilu e eau sou ite a muada, moni sou ma muada oto a baligoluna bibi iedo ei bilii e eau a inade.

<sup>10</sup> “Me eau vei, ‘Bibi Taula, eau na goli a sava?’ Me Bibi Taula i vei le eau maido, ‘O ilisi mo asu ulilo ne Damaskus. Mina avena iedo bibi tasa ni vei lio a pipigona vuso o no goli.’

<sup>11</sup> Muada iedo ei lada mamau sele, me eau ma mapigogoi ete na ite a golu tasa. Maido me a vanunua pilu e eau sou tate a limagu, me sou maasi eau usino ne Damaskus.

<sup>12</sup> “Bibi tasa ino ne Damaskus, aisana e Ananaías. Ei a bibi matano moni ne Salemo, me ei ogomuli kube sele a binea. Sou vuso e Iuda sou malu ne Damaskus sou vei, ei a doana bibi.

<sup>13</sup> Ei asu magili agavuale eau me ei vei le eau maido, ‘Tamaigu Sol, matane oo ei ni gemu lou.’ Mina ilala bilesi iedo matagu ei kubaana lou, me eau ite ei.

<sup>14</sup> “Me ei vei, ‘Salemo mine sou e tubutubune eitou ei vileale e oo, no muada a masagana minei, mo no ite a Bibi iedo ni goli a inigogona bilesi mo no longe a inade ei goli na asene ei oto.

<sup>15</sup> Oo no vei le sou a vanunua ma tavivine a golugolu o ite mo longe.

<sup>16</sup> De o magitalitali lei a sava? O ilisi mo guale a maavuvutuna. Oo vate a aisane ei, me ei ni taulele a sinusu vuso minio.’ ”

*Salemo ei peltase Pol ni malongo ane sou a abuna sea*

<sup>17</sup> Pol ei vei le sou a vanunua ma tavivine lou maido, “Mulimuli eau veteliu usinani

ne Ierusalem, me eau kakaka lilo na luma mine Salemo, me na golu tománe a tinada

<sup>18</sup> eau ite Bibi Taula. Ei vei le eau, ‘Iisitase Ierusalem simonimonina, vuna ne sou ma longemuli ete a inade minio oo no veipale e eau.’

<sup>19</sup> “Me eau vei, ‘Bibi Taula, sou oto sou muada i, lisa eau asu usino na luma na kinaka vuso mine sou e Iuda, me eau tau e sou a vanunua ma tavivine sou silimuli e oo na luma na tunuui, me eau tibi e sou.

<sup>20</sup> Me na ilala sou valipute Stiven, a bibi mina veipalena inade minio do, eau magili agavi, me na matagu a inigogona sou goli ei kubaana. Me eau iteale a kinainai lagolago mine sou a vanunua sou valipute ei iedo.’

<sup>21</sup> “Moni Bibi Taula i vei le eau maido, ‘O asu, eau na peltase oo, no asu usino ne sou a vanunua ma tavivine na abuna sea sou ino na avena bulago.’ ”

*Pol vei ve ei a bibi mine Rom*

<sup>22</sup> Ilala sou e Iuda sou longe Pol ei ade a vanunua ma tavivine mina abuna sea, sou ma kale etesi ne sou longemuli a inade minei lou. Maido me sou tola vauta maido, “Valiputemate ei! Matana bibi maido umana ni muina na magamaga. Ei ma mapigogoi ete ni mauili!”

<sup>23</sup> Sou ngala maisaba, me sou kaitase a kinainai ne sou me sou pitase maisabe, me sou lange a kavou uata, ni maite i maido sou ma kale sape ete a inade Pol ei goli iedo.

<sup>24</sup> Maido ma bibi muge a vanunua na maubina savuluvulu tasa (1,000) ei vei le sou a vanua na maubina ne sou maasi e Pol ulilo na luma mine sou. Ma bibi muge do ei vei le sou a vanunua na maubina ne sou tibi e ei me ne sou tagi e ei a vuna lilone sou i tivula me sou ngala sasage Pol.

<sup>25</sup> De sou papale a limana ma ubune Pol. Pol ite a bibi muge a vanua na maubina savulu sobo tasa ei magili agavi, me Pol ei tagi e ei maido, “Nane a binea i vei, amutou mapigogoi namutou goli a inigogona ieli usino na bibi mina avena ne Rom? Amutou tibi eau na ilala amutou saboa mu vavasa agu, nane a inigogona ieli i kubaana ue boa?”

<sup>26</sup> Munuganuga do ei longe a inade li, mei asu vei ana bibi muge a vanua na maubina savuluvulu tasa maido, “No goli a sava sei-dei? Bibi ieli ei mine Rom.”

<sup>27</sup> De bibi ei muge ei asuale Pol mei vei lei, “O vei le eau, oo a bibi mine Rom, io?” Me Pol ei longo, “E.”

<sup>28</sup> Ma bibi muge a vanua na maubina savuluvulu tasa ei vei maido, “Eau iabi a vatu buo minau na palea a bibi mine Rom.” Me Pol ei vei, “Eau boa. Eina i maalepose eau me eau muigu a bibi mina avena vuso ne Rom.”

<sup>29</sup> Sou a vanunua na maubina sou kale ne sou vavasa ane ei, sou longe a inade do, ma tabaa oto sou litase ei. Na ilala a bibi muge vanua na maubina savuluvulu tasa ei muada i maido, Pol ei a bibi mine Rom, de ei tamai i lae, vuna maido ei veiosi ane sou a vanunua na maubina ne sou papale ei a sen.

*Pol ei veipale a inade usino na vanunua na avelulusena inade mine sou e Iuda*

<sup>30</sup> Bibi muge a vanua na maubina savuluvulu tasa ei kale ni muada kuba a vuna golu ivu sou e Iuda sou vavasa ane Pol. Maido maisavulo ei lube a sen sou papale e Pol, me ei masosove a inade usino ne sou a munugana prist me sou a vanunua na avelulusena inade mine sou e Iuda, ne sou sibitala me sou viepilu. Me ei maasi e Pol utano me ei mamagili ei na matane sou.

## 23

<sup>1</sup> Io Pol ei gemu bilesi usino ne sou a vanua na avelulusena inade, mei vei maido, "Amutou tamtamaigu, eau ogomuli a vea mine Salemo, ma lilogu i kubaana na inigogona vuso eau goli i asu pea seidei. Eau ma somiale ete tomane eau goli a inigogona tasa i pagu."

<sup>2</sup> Ei veiosi maido, me mapana prist Ananaias ei vei le sou a vanunua ino agavuale e Pol ne sou vali na asene ei.

<sup>3</sup> Me Pol ei vei lei maido, "Salemo ni valibili e oo, vuna oo tomane a bigomu pagu sou malolome i a malolomena keakea, ne sou a vanunua ne sou ma ite ete a golu pagu ino matano. Oo damu i no ogomuli a binea me no vavasa agu, maidolo me oo asu usinani mo ugu a muimu. Moni oo oto saukiki a binea, me oo vei ane sou ve ne sou ubi eau."

<sup>4</sup> Vanunua sou magili agavi, sou longe a inade ieli me sou tagi e Pol maido, "I matina? Oo kale no lobe a mapana prist mine Salemo, io?"

<sup>5</sup> Me Pol ei vei, "Amutou tamtamaigu, eau ma muada oto i a bibi ie ei mapana prist. Laulau mine Salemo ei isa a inade maido, 'Amutou ma lobelobe lei a bibi buo mine amutou.'\*"

<sup>6</sup> Pol ei muada i maido, vanunua sanii mina avelulusena inade sou a abuna mine Sadusi me sanii mina abuna mine Parisi. Maidolo me ei tola usino ne sou a vanunua na avelulusena inade maido, "Tamtamaigu, eau a bibi mina abuna mine Parisi, me eau e natune sou e Parisi. Eau silimuli i maido, sou a vanunua sou matesi ne sou ilisiliu, me mina vuna moni ieli seidei sou vavasa agu."

<sup>7</sup> Pol ei vei a inade do, ma maisinoana i palea balivua ne sou e Parisi me sou e Sadusi, ma viepiluna i valibule.

<sup>8</sup> Sou e Sadusi sou vei maido sou a vanua ne sou ma mapigogoi ete ni ilisiliu na minate, me sou a bineanea pilu a nunu tamai ino boa. Moni sou e Parisi sou silimuli a golugolu ie.

<sup>9</sup> Maidolo me sou ngala vauta sele. Ma vanua sanii na muadana binea, sou a abuna mine Parisi, sou magili me sou ade sagali maido, "Amiteu itesi a bibi ie ei a sinusu boa. Nane a nunu tasa ue a bineanea tasa ei bilii a inade usino ne ei."

<sup>10</sup> Ma bibi muge a vanua na maubina savuluvulu tasa ei ite a maisinoana i palea buo sele mei lae, dae a abuna lua do ne sou mailapu maisaba e Pol me ne sou bebelote a vovona me ei ni mate. Maidolo me ei vei le sou a vanunua na maubina ne sou asu utano me ne sou gualeliu e Pol maino ne sou e Iuda, me ne sou langetase ei ulilo na luma mine sou a vanunua na maubina.

<sup>11</sup> Me na lodo Bibi Taula i magili agavuale Pol me ei vei lei maido, "Oo magili sagali, me oo no ma laelae lou. Oo malongo sagali a inade minau ne Ierusalem, me na inigogona tomane tasa moni oo no malongo a inade minau ne Rom."

*Sou Iuda sou maiveimuli i ne sou valipute Pol*

<sup>12</sup> Io na autupola sou e Iuda sou viepilu me sou maiveimuli i ve maido, "Ivu uata, neitou valipute Pol. Mane eitou ma valiputemate ete ei, neitou ma aaniani lou ma ininu lou."

<sup>13</sup> Savulu na vanunua sou goli a inade patotona do, ei seleuli savulu iva.

<sup>14</sup> Sou a vanunua do sou asu usino ne sou a prist me sou a vanua buobuo, me sou vei, "Amiteu goli a inade sagali patotona maido, namiteu ma aaniani lei a gona inani bisii asu mapigogoi namiteu valiputemate Pol.

<sup>15</sup> Maidolo me amutou pilu e sou a vanua na avelulusena inade, namutou sosove a inade usino na bibi muge a vanua na maubina savuluvulu tasa ni maasi e Pol utano ne amutou. Namutou ubi a tabuna me mu vei maido, amutou kale namutou poge iiti a vuna inade sanii mine Pol. Me namiteu masusulu me muine amiteu, me na ilala ei saboa sibitala ne amutou, namiteu valiputemate ei."

<sup>16</sup> Moni a loane Pol bibi, ei longe a inade ne sou, maidolo me ei asu usino na luma mine sou a vanunua na maubina me ei vei le Pol.

<sup>17</sup> Me Pol ei tole a bibi muge a vanua na maubina savulu sobo tasa usinani mei vei lei maido, "Maasi a bibi alaba li usino na bibi muge a vanua na maubina savuluvulu tasa. Ei isa a inade tasa ei kale ni bilii e ei."

\* 23:5 Gualeliuna 22:28

<sup>18</sup> Maidolo ma bibi muge a vanua na maubina savulu sobo tasa ei maasi ei usino na bibi muge a vanua na maubina savuluvulu tasa, me ei vei, “Bibi i ugu na luma na tunuui, e Pol, ei tole eau mei vei le eau na langetase a bibi alaba li usinani minio. Ei isa a inade tasa ei kale ni bilii o.”

<sup>19</sup> Maidolo ma bibi muge a vanua na maubina savuluvulu tasa ei lapitole a limana me ei maasi ei usino na sapa sinua. Me sulu moni muine sulu, me ei tagi a bibi alaba do maido, “Oo kale no bilii e eau a sei inade?”

<sup>20</sup> Ma bibi alaba do ei vei maido, “Sou e Iuda sou maiadepiluosi ve ne sou tagi e oo no langetase Pol utano na vanunua na avelulusena inade savulo. Ne sou goletase oo me sou vei maido, sou kale ne sou poge iiti a vuna inade minei.

<sup>21</sup> Moni oo ma longemulimuli lei a inade ne sou. Sanii mine sou, a savulu ne sou i mapigogoi savulu iva, sou goli a inade sagali patotona maido, ne sou ma aaniani lou me ne sou ma ininu lou i pea ne sou valiputemate Pol. Me seidei sou ugatalitali a muine sou ne oo longo ane sou.”

<sup>22</sup> Io a bibi muge a vanua na maubina savuluvulu tasa ei peltase a bibi alaba usino, me ei vei sagali lei maido, “Oo ma veivei lei ana bibi tasa ve o veipale a inade ieli usinani minau.”

*Sou peltase Pol usino ne Peliks ei a munugana bibi ei iteale a avena vuso*

<sup>23</sup> Io bibi muge a vanua na maubina savuluvulu tasa i toleale a munugana lua, sulu muge a vanua na maubina savulu sobo tasa, mei vei le sulu maido, “Amulu guale a vanunua na maubina i savulu sobo lua, pilu a vanunua na maubina savulu padilua sou ugu na hos ma vanunua na maubina savulu sobo lua sou lapitole a lumusu. Me namutou masusulu ne mu asu usino ne Sisaria na matailala ialasue na lodo.

<sup>24</sup> Namutou masusulu a hos mine Pol tamai, me namutou langetase ei usino ni sibitala kuba ne Peliks a munugana bibi ei iteale a avena vuso.”

<sup>25</sup> Ma bibi muge a vanua na maubina savuluvulu tasa ei niage a laulau tasa maido,

<sup>26</sup> Eau e Klodius Lisias, eau niage a laulau ieli usino na bibi buo, oo a munugana bibi ei iteale a avena vuso, oo Peliks. Oaso kubaana sele.

<sup>27</sup> Sou e Iuda sou saavi a bibi ieli me sou kale ne sou valiputemate ei. Moni eau longe maido ei a bibi mine Rom, maidolo me eau pilu e sou a vanua na maubina amiteu gualeliu e ei maino na limane sou.

<sup>28</sup> Eau kale na muada i a vuna inade sou ubi a bibi ie, me eau langetase ei utano mine

sou a vanunua na avelulusena inade mine sou.

<sup>29</sup> Eau tagi e sou, me sou vei le eau a inade sanii mina binea mine sou, me sou ubi e ei a inade do. Moni sou ma vavasa oto ane ei a golu tasa i mapigogoi neitou valiputemate ei, ue neitou tau ei na luma na tunuui.

<sup>30</sup> Me seidei eau longesi maido, sou maiveimuliosi i ne sou valipute a bibi ieli. Maidolo me eau peltase asi ei usino minio. Me eau vei le sou a vanunua sou ubi ei a inade do ne sou veipale a inade na matamu bilesi, me oo no muada i a golu sou kale ne sou vavasa ane ei iodo.

<sup>31</sup> Io sou a vanunua na maubina sou ogomuli a inade na bibi muge a vanua na maubina savuluvulu tasa, me na lodo iedo sou guale Pol me sou maasi ei usino na aubu buobuo e Antipatris.

<sup>32</sup> Maisavulo a vanua na maubina sou sae na hos sou maasi e Pol usino ne Sisaria. Ma vanunua na maubina sanii sou veteliu usino na luma mine sou ino ne Ierusalem.

<sup>33</sup> Vanunua na maubina sou sae na hos sou asu me sou divi ne Sisaria, me sou bilii a laulau usino na munugana bibi ei iteale a avena vuso, me sou langetase tamai e Pol usino me ei magili na lagune ei.

<sup>34</sup> A munugana bibi ei iteale a avena ei gi a laulau, me ei tagi e Pol maido, “Oo mine sei avena buo?” Me Pol i vei, “Eau mine Silisia.”

<sup>35</sup> Io a munugana bibi ei iteale a avena vuso ei vei maido, “Na ilala vanua sou ubi e oo a inade sou divi, io eau na longe a inademu.” Me ei vei le sou ne sou tau e Pol na luma na tunuui mine Herot.

## 24

*Sou a munugana ne sou e Iuda sou vavasa ane Pol*

<sup>1</sup> Ilala malada lima pulosi, Ananaias a mapana prist ei asu utano ne Sisaria pilu e sou a vanua buobuo sanii ma bibi na muadana binea tasa, aisana e Tetulus. Me sou vavasa ane Pol na matana munugana bibi ei iteale a avena vuso.

<sup>2</sup> Io a munugana bibi ei iteale a avena vuso ei toleale Pol, me na ilala ei asuosi usinani, Tetulus ei soke a niubi na inadene ei. Ei vei maido, “Bibi buo e Peliks, oo buloi iiti sele amiteu na niuguna doana, ma maubina ue a golu pagu ei ma sibitala oto. Na damutatatalana doana minio, o buloi e sou a abuna mine amiteu mina toebilelesina golugolu vuso lisa sou ma ino kuba oto.

<sup>3</sup> Amiteu ite a golugolu vuso do, ma lilone amiteu puiale sele, me amiteu vate kubaana sele ane oo.

<sup>4</sup> Moni dae ne eau lapitole tabae oo, eau kale na tagi e oo no dode amiteu, me no longe a inade baini tasa ne amiteu.



<sup>5</sup> “Amiteu ite a bibi ieli ei mapalele a mavanaa makuba. Ei mailisilisi a sinoana ma maubina balivua ne sou e Iuda na aveavena vuso na magamaga. Me ei a munuganuga ne sou a vanunua sou asutase a abuna ne amiteu me sou mapale a abuna sea, ede sou vate a abuna mine Nasaret.

<sup>6-8</sup> Ei tove tamai ni goli a luma mine Salemo ni palea mumugu na matane Salemo, moni amiteu lapitole ei. Maido me oo oto no tagi a bibi iede, me oo no muada maino ne ei oto a golugolu vuso amiteu vavasa ane ei.”

<sup>9</sup> Sou e Iuda tamai sou buloi a inade mine Tetulus maido, “A inade vuso de i patotona.”

### *Pol i ademuada ane Peliks*

<sup>10</sup> To a munugana bibi ei iteale a avena vuso ei matasulanga ane Pol ni ade, maido me Pol i adeliu a inade maido, “Eau muada, avala papaina oo muimu a bibi na vivilealena golugolu mine sou a abuna vanunua ma tavivine de. Maido ma lilogu ei kubaana na adeliuna inade usino minio.

<sup>11</sup> Mane oo tagi e sou, io o no pogeputi maido, malada savulu tasa timana lua moni ei pulu, me eau asu usino ne Ierusalem mina kinaka.

<sup>12</sup> Me sou e Iuda sou ma ite ete eau maisi- noa pilu a bibi tasa lilo na bigomu mina luma mine Salemo. Me sou ma ite ete eau mailisi a mangelengelena mine sou a vanunua ma tavivine lilo na luma na kinaka mine sou e Iuda, ue lilo na aubu buobuo. Boa.

<sup>13</sup> Ma inade seidei sou vavasa agu ieli, ei ma patotona oto. Sou ma isa oto a vea ni maite i maido a inade ne sou i patotona.

<sup>14</sup> Patotonana inade, ei maido. Eau ogomulimuli a vea de sou vate a abuna tasa sea. Eau ogomuli a vea do me eau kaka ane Salemo mine sou e tubutubune amiteu. Eau silimuli a inade vuso ino na binea me sou a inade mina profet sou niage.

<sup>15</sup> Me eau magitali e Salemo ni mailisiliu e sou a vanua sou matesi, ede sou a bilesina vanua ma vanua pagupagu. Sou e Iuda tamai sou silimuli e Salemo ni goli simaido.

<sup>16</sup> Maido ma ilala vuso eau sagali a lilone eau ni muina bilesi me eau ma isa oto a inigogona pagu na matane Salemo me na matane sou a vanunua ma tavivine tamai.

<sup>17</sup> “Avala sanii eau malu na abuna sea, me mulimuli eau veteliu lou usino na abuna minau. Eau maasi a vatu ma golu sanii usinani mina buloine sou a vanunua ma tavivine sou boto a golugolu sanii, me eau maasi a niabi sanii tamai.

<sup>18</sup> Eau kale na asu usino na luma mine Salemo, maido me palapala eau ogomuli a inigogona na paleaalabana na matane Salemo. Na ilala sou ite eau ugu mina luma

mine Salemo, eau alabasi. Vanunua i ma makuba oto sou ugu pilu e eau, ma vanunua ino boa sou goli a mangelengelena maisaba.

<sup>19</sup> Moni sou e Iuda sanii maino na avena buo ne Esia sou asu usinani me sou lapitole eau. Mane sou a vanunua do sou isa a inade tasa usinani minau, kubaana sou oto sou asu usinani na lagune oo me sou vavasa ane eau.

<sup>20</sup> Mane boa, sou a vanunua ieli ne sou vei lio sei sinusu sou poge minau na ilala eau veipale a inade usino ne sou a vanua na avelulusena inade.

<sup>21</sup> Nane eau goli a inade tasa moni sou ma mongemonge oto i. Na ilala eau magili balivua ne sou, eau tola maido, ‘Eau silimuli maido, sou a vanunua sou matesi, ne sou ilisiliu, me mina vuna moni ieli seidei sou maasi eau usinani na luma na vavasana mine amutou.’”

<sup>22</sup> Peliks ei muada iitiosi a silimulina ma inigogona mina vanunua ma tavivine sou ogomuli a vea ne Bibi Taula, maido na ilala Pol i veimuadesi a inade, Peliks ei vei le sou e Iuda ne sou magitali. Ei vei maido, “Na ilala Lisias, a bibi ei muge a vanua na maubina savuluvulu tasa, ei asu usinani, de eau na toebilelesi a inade ne amutou odo.”

<sup>23</sup> Me ei vei le ei a bibi i muge a vanua maubina savulu sobo ni tau e Pol na luma na tunuui, moni ne sou ma papale maimaimai lei e ei. Ne sou ma magilisobesobe lei e tamtamaine Pol ne sou buloi e ei a golu sanii.

### *Peliks ei tau Pol na luma na tunuui na avala lua*

<sup>24</sup> Malada sanii pulosi, Peliks ei asu usinani pilu e susuna e Drusila. Drusila ei a tavine na abuna mine Iuda. Me Peliks ei toleale Pol me ei longe a inade sanii minei. Pol ei vei le ei a inigogona mina silimuline Krai Iesu.

<sup>25</sup> Me Pol i malongo a inade mina inigogona i bilesi, me mina inigogona itealekubena maolina minei me mina vavasana i ni palea mulimuli. Peliks ei longe a inade do, mei lae. Me ei vei, “Seidei o asu. Mane mulimuli eau malamala sapa, io eau na toleale lei o.”

<sup>26</sup> Me Peliks ei magitali a golu sanii lou. Ei damu i Pol ei ni bilii e ei a vatu sanii ni toegolali ei ni litase Pol ni asu malamala. Maido ma ilala papaina Peliks ei toleale Pol usino ne ei mei ade pilupilu e ei.

<sup>27</sup> Avala lua i pulosi, me Porsius Pestus ei adevuse Peliks. Moni Peliks ei kale ni toemongemonge sou e Iuda, maido me ei litase Pol muina na luma na tunuui.

## 25

*Pol ei vei e Sisar ni longe a vavasana minei*

<sup>1</sup> Pestus ei palea a munugana mina itealalena avena mine Iudia me ei diviosu ne Sisaria. Ei muina malada tolu pala nado mei asu uata ne Ierusalem.

<sup>2</sup> Me sou a munugana prist me sou a vanua buobuo mine sou e Iuda sou asu usino ne ei me sou ubi e Pol a inade. Sou ade sagali ane ei maido,

<sup>3</sup> “O no buloi e amiteu, mo no peltase a bibi iede usinani ne Ierusalem.” Vuna, sou veiosu ane sou a vanunua ne sou ovu na vea me ne sou valipute Pol.

<sup>4</sup> Me Pestus i adeliu maido, “Pol ino na luma na tunuui ne Sisaria. Bisii moni eau oto na asu usino ne Sisaria.

<sup>5</sup> Maido me sou a munuganuga mine amutou ne sou asu utano pilu e eau. Me mane a bibi edo ei goli a sinusu, kubaana ne amutou vavasa ane ei.”

<sup>6</sup> Pestus i muina pilu e sou a malada pantolu ue a malada savulu tasa, me ei asu utano ne Sisaria. Maisavulo ei ugu na luma na vavasana, mei vei ane sou ne sou maasi e Pol usinani.

<sup>7</sup> Ei diviosu, de sou e Iuda sou ilisitase Ierusalem me sou asu utano, sou magili saili ei, me sou ubi ei a inade makuba. Sou vei ve ei goli a inigogona makuba i pagu sele, moni sou ma mapigogoi ete ne sou maite e Pestus maido a inade mine sou odo ei patotona.

<sup>8</sup> Sou adesi, io Pol ei adeliu maido, “Eau ma goli ete a sinusu tasa. Eau ma pope ete a binea mine sou e Iuda, me eau ma goli ete a golu tasa pagu usino na luma mine Salemo, me eau ma goli ete a sinusu usino ne Sisar.”

<sup>9</sup> Moni Pestus ei kale ni toemongemonge sou e Iuda, maido me ei tagi e Pol maido, “Nane o kale no asu no magili a vavasana ne Ierusalem, io? Mane maido, eau na longe a vavasana minio ne Ierusalem.”

<sup>10</sup> Moni Pol ei vei maido, “Luma seidei eau magili ie, ede a luma na vavasana mine Sisar. Luma moni ieli ei a muina nilonge na vavasana minau. Oo muadasi i, eau ma goli ete a sinusu tasa usino ne sou e Iuda.

<sup>11</sup> Mane eau goli a sinusu tasa mapigogoi eau na mate i, de eau na mate. Moni mane a inade sou vavasa agu i, ei ma patotona oto, io bibi tasa ei ma mapigogoi ete ni tau eau na limane sou. Eau kale e Sisar oto ni longe a vavasana minau.”

<sup>12</sup> De Pestus ei ade pilu e sou a vanunua sou biliili e ei a damutatalana, me mulimuli ei vei ane Pol maido, “Oo vei ve o kale e Sisar ni longe a vavasana minio. De o asu usino ne Sisar.”

*Pestus ei tagi e mapana Agripa e Pol*

<sup>13</sup> Malada sanii i pulosi, mapana Agripa pilu e latavinena, Bernaisi, su asu usinani ne Sisaria mina biliina oaso doana usino ne Pestus.

<sup>14</sup> Su muine sulu ne Sisaria malada papai, maido me Pestus i ademuada ane a mapana e Agripa a inade ne Pol. Ei vei maido, “Bibi tasa ino, lisa Peliks i tau ei na luma na tunuui, me ei saboa lilo mina luma na tunuui.

<sup>15</sup> Ilala eau ino ne Ierusalem, sou a munugana prist me sou a vanua buobuo mine sou e Iuda sou ubi e ei a inade, me sou kale eau na vei maido ei isa a sinusu.

<sup>16</sup> “Moni eau adeliu ane sou maido, ‘Bibi ei isa a vavasana, ei ni magili pala na lagune sou a vanunua sou vavasa ane ei, me neitou bilii e ei a matailala mina adeliuna inade mine sou a golugolu sou vavasa ane ei. Amiteu e Rom amiteu ma isa oto a inigogona mina toegegeli sabubina bibi tasa maido.’

<sup>17</sup> “Maido ma ilala eau veteliu usinani ne Sisaria, sou a vanunua do sou asu pilu e eau. Me eau ma goli ete sou ne sou magitali a vavasana. Maisavulo moni odo eau ugu mina luma na vavasana me eau vei maido ne sou maasi a bibi ede usinani.

<sup>18</sup> Ma vanunua sou vavasa ane ei sou magili, eau damu i ne sou vei ei goligoli a inigogona pagu, moni boa.

<sup>19</sup> Sou maubi a inade pilu e ei a inigogona mina kinaka mine sou, me a bibi tasa ei matesi, aisana e Iesu. Moni Pol i vei, a bibi ede ei ino mauili.

<sup>20</sup> Eau kale na poge iiti a vuna inade iede, moni eau ma mapigogoi ete na muada ie. Maido me eau tagi e ei, ‘Nane o kale no asu usino ne Ierusalem, me eau na longe a vavasana minio ne Ierusalem, io?’

<sup>21</sup> Moni Pol ei vei maido, ei ni muina na luma na tunuui, me mulimuli e Sisar oto ni longe a vavasana minei. Maido me eau vei lei ei ni muina mina luma na tunuui, mapigogoi eau na poge a vea mina peltasene ei usino ne Sisar.”

<sup>22</sup> Agripa ei longe a inade do me ei vei le Pestus maido, “Eau oto eau kale na longe a inade na bibi iede.” Me Pestus ei vei, “Savulo o no longe.”

<sup>23</sup> Maido me maisavulo Agripa pilu e Bernaisi su kai a kinainai doadoana mine sulu me su asu sibitala. Sulu gali ulilo na luma na viepiluna pilu e sou a bibi i muge a vanua na maubina savuluvulu tasa me sou a vanua buobuo mina aubu buobuo do. Me Pestus ei vei le sou ne sou langetase Pol usinani.

<sup>24</sup> Me Pestus ei vei maido, “Mapana Agripa me amutou a vanunua vuso mu ugu pilu e amiteu, amutou ite a bibi ie. Abuna vanunua ma tavivine vuso mine Iuda, sou ubi a bibi ieli a inade ino ne Ierusalem me

nani tamai. Sou tola sagali usinani ne eau maido, 'Oo valiputemate ei, dae ei ni muina mei ni mauli lou.'

<sup>25</sup> Moni eau ite ei ma goli ete a golu tasa mapigogoi ei ni mate i. Me ei kale e Sisar oto ni longe a vavasana minei. Maido me eau tauosi a inade mina peltasene ei usino ne Sisar.

<sup>26</sup> Moni eau ma muada oto e sei inade ivu eau na niage me eau na sosove usino na bibi buo mine eitou. Maido ma Mapana Agripa, eau maasi a bibi ieli usinani ne oo me ne amutou vuso a vanunua sanii tamai. Neitou longe kube a inade mine ei, me eau na muada a inadene eau na niage na laulau.

<sup>27</sup> Mane eau peltase a bibi tasa i ugu na luma na tunuui ni asu usino, me eau ma masosove ete a inade na golu sou vavasa ane ei, de eau somiale maido a inigogona ieli ei ma puiale ete."

## 26

### *Pol ei ademuada ane Agripa*

<sup>1</sup> Io Agripa i vei ane Pol maido, "O no veimuade a inade minio oto." Maido me Pol ei beilauge a limana, me ei vei maido,

<sup>2</sup> "Mapana Agripa, ei kubaana sele eau na ademuada a inade sou ubi e eau ieli usino ne oo.

<sup>3</sup> Oo muada sele i a inigogona vuso mine amiteu Iuda, ma golugolu vuso amiteu maubi a inadena i. Maidolo me eau kale no ugu vale moni mo no longe kube a inade vuso minau.

<sup>4</sup> "Sou Iuda vuso sou muada kuba e eau. Na ilala eau saboa alabaini eau muigu balivua ne sou a abuna minau, me mulimuli eau asu a muigu ne Ierusalem.

<sup>5</sup> Sou muadasi e eau, me mane sou kale, sou oto i mapigogoi ne sou vei le oo a inigogona minau. Sou muada i maido, soke na ilala eau a bibi alaba eau tasa mine sou a abuna vanua e Parisi, me eau ogomuli a inigogona mine sou. Sou e Parisi sou isa a binea papaina ei sana sele a ogomulina. Sou a abuna sanii mine amiteu e Iuda sou ma isa oto a matana binea sagali tomene mine sou e Parisi.

<sup>6</sup> Me seidei eau magili ie, me sou vavasa agu. Ma vuna vavasana i maido, eau silimuli me eau magitali a golu tasa lisa Salemo ei vei ane tubutubune amiteu.

<sup>7</sup> A golu ieli sou a abuna mine amiteu savulu tasa timana lua sou kakake Salemo na oaso me na lodo, me sou silimuli sele me sou magitali moni a golu ieli ni palea. Me a mapana Agripa, eau tamai ea silimuli me eau magitali a golu ie. Me ieli moni ei a vuna inade sou e Iuda sou ubi e eau.

<sup>8</sup> Posa matina amutou a vanunua sanii amutou damu i, neitou ma silimuli ete Salemo ei ni mamauli liu a vanua sou matesi?

<sup>9</sup> "Lisa eau oto eau damu i eau na goli a golu makuba mina taupuina aisane Iesu mine Nasaret.

<sup>10</sup> Me eau goli a golugolu sou odo ino ne Ierusalem. Eau guale a aisa buo maino ne sou a munugana prist, me eau tau a vanunua ma tavivine papaina mine Salemo na luma na tunuui. Ma ilala sou a munuganuga sou maiademuli i a valiputene sou, eau tamai ea vei ne sou mate.

<sup>11</sup> Me taliuliu eau gali ulilo na luma na kinaka mine sou e Iuda mina sautolene sou me mina toegegeline sou. Eau sagali mamau a gunolina vanunua ne sou lametase e Bibi Taula me ne sou adegegeli e ei. Eau sinoa mamau ane sou, me eau asu tilomuli e sou na aubu buobuo vuso ino bulago tamai."

### *Pol ei mapalamuli e ei i palea Kristen (Apo 9:1-19, 22:6-16)*

<sup>12</sup> Pol ei vei lou maido, "Maidolo me eau guale a aisa buo maino ne sou a munugana prist, me sou peltase eau usino ne Damaskus.

<sup>13</sup> De mapana, na oaso posa eau asuasu na vea, eau ite a muada taula tasa muata na langi. Ma muada dolo ei lada sagali sele mei vululusi a sagagalina oaso. Ei ladevei sele eau pilu e sou a vanunua sou asu pilupilu e eau.

<sup>14</sup> Amiteu vuso amiteu bobosa utano na magamaga, me eau longe a baligoluna bibi tasa i ade a inade Hibru me ei tole eau maido, 'Sol, Sol, posa matina oo toegegeligeli eau? Oo vali a golu i binaso, me oo no malaitabe e oo oto.'

<sup>15</sup> "Me eau vei, 'Bibi Taula, oo e sei?' Me Bibi Taula i vei maido, 'Eau e Iesu, oo toegegeligeli.

<sup>16</sup> Oo ilisi, mo magili. Eau asu usinani minio seidei mina vilealene oo mina lapi-tolena pipigona minau. Me no veimuade a inade na golugolu seidei oo itesi ma gologu mulimuli eau na maite e oo.

<sup>17</sup> Eau na ma itetase ete sou a vanua na abuna minio oto me sou a abuna vanunua sea ne sou toegegeli e oo. Boa. Eau na peltase oo usino ne sou a abuna sea

<sup>18</sup> me no pee a matane sou, ne sou lametase a tunuui me ne sou savvule a lilone sou me ne sou asu usinani mina muada. Me ne sou litase a sagalina mine Satan me ne sou asu usinani ne Salemo. Maidolo me eau na taulele a sinusu mine sou, me ne sou guale a mui pilu e sou a vanunua ma tavivine sou silimuli e eau, me

ne sou muine sou lilo na abuna vanunua ma tavivine eau vilealesi e sou minau oto.' ”

*Pol ei vei le Agripa a pipigona viepiluna mina kinaka ei goli*

<sup>19</sup> Pol ei vei lou maido, “Mapana Agripa, eau ite a golu ieli mina langi, me eau ma saukiki ete a inadene ei. Boa.

<sup>20</sup> Io eau malongo ane sou a vanunua mine Damaskus pala, me mulimuli eau asu usinani me eau malongo ane sou a vanunua ma tavivine mine Ierusalem, me mina avena vuso mine Iudia me abuna sea tamai. Eau veimuade a inade maido, ‘Namutou sauvule a lilone amutou, me namutou silimuli e Salemo, ma inigogona mine amutou ni maite i maido amutou sauvulesi a lilone amutou.’

<sup>21</sup> Eau veipale a matana inade ie, me na vuna moni ieli sou e Iuda sou saavi eau na luma mine Salemo, me sou kale ne sou valipute eau.

<sup>22</sup> Salemo ei buloi e eau me eau ugu kuba moni i asu mapigogoi seidei. Maidolo me seidei eau magili ieli, me eau malongo a inade usino ne sou a vanunua sabubu me usino na vanunua buobuo tamai. Eau ma malongo oto a inade sea. Eau malongo a inade ieli moni lisa sou a profet me Moses tamai sou ade i ni palea.

<sup>23</sup> Sou vei ve maido, ‘Krais iodo, ei ni tabule a davutina, me mulimuli ei ni sibitala a munugana bibi ei ilisiliu na minate. Me ei ni ademuada a muada mine Salemo usino ne Israel me usino ne sou a abuna sea tamai.’ ”

*Pol ei vei le Agripa ei ni silimuli*

<sup>24</sup> Pol ei veimuade a inade maido, me Pestus i tola vauta mamau sele maido, “Pol, oo vauta. Oo guale a matetengina mapapaina selesi, ma muadana minio buo, de ei toe oo palea vauta!”

<sup>25</sup> Me Pol vei maido, “Bibi buo, Pestus, eau ma vauta oto, eau isa a damutatalana. Eau vei patotona.

<sup>26</sup> Mapana e Agripa, oo muadasi a golugolu vuso eau ade i iodo. Maidolo me eau veipale bilesi le oo, me eau ma lae oto. Eau muada a golugolu vuso do ei ma pololeletase ete a matana ma tagilane oo. Oo muadasi e sou, vuna golugolu sou odo ei ma palea oto na avena i ovu.

<sup>27</sup> Mapana Agripa, oo silimuli a inade mine sou a profet ue boa? Eau muadasi i, oo silimuli.”

<sup>28</sup> Me Agripa i tagi e Pol maido, “Ai, oo damu i o no toe eau na palea a kristen na ilala simonimoni nali?”

<sup>29</sup> Me Pol i adeliu maido, “Golu tasa boa mane a ilala i boto ue a ilala i lago, eau kake Salemo maido, oo pilu e sou a abuna seidei amutou longe a inade minau, amutou vuso namutou palea tomene eau. Moni eau ma

kale ete ne sou tau a sen ne amutou, me ne amutou tomene a vanunua na niugu na luma na tunuui.”

<sup>30</sup> Io mapana pilu a munugana bibi ei iteale a avena vuso me Bernaisi me sou a vanunua ino pilu e sou, sou magili

<sup>31</sup> me sou veletase a avena do. Me sou maiade balivua mine sou oto maido, “A bibi ieli ei ma goli ete a inigogona pagu tasa i mapigogoi ei ni mate ue ei ni ugu na luma na tunuui.”

<sup>32</sup> Me Agripa ei vei le Pestus maido, “Oo mapigogoi no litose a bibi iede ni asu malamala, moni ei oto ei vei ve Sisar ei ni longe a vavasana minei.”

## 27

*Sou tau e Pol na kuta ni asu usino ne Rom*

<sup>1</sup> Sou maiademuliosii e amiteu namiteu guale a kuta me namiteu asu usino ne Rom. Me sou tau e Pol pilu e sou sanii na luma na tunuui na limane a bibi i muge a vanua na maubina savulu sobo tasa. Aisana munugana iedo e Iulius, ei mina abuna mina vanua na maubina mine Sisar.

<sup>2</sup> Amiteu sae na kuta tasa mina aubu buobuo Adramitium. Kuta iedo i kale ni vele usino na matamata lilo mina avena mine Esia. De amiteu lube a mota me amiteu vele usino. Aristakus mine Tesalonaika mina avena buo Masedonia ei asu pilu e amiteu.

<sup>3</sup> Maisavulo amiteu lange a augugu ne Saidon, me Iulius ei goli a inigogona kubaana usino ne Pol. Ei longo ane Pol ni asu ite tamtamaina mei ni guale a gona inani ue a golu sanii ei kale.

<sup>4</sup> De mulimuli amiteu ilisitase Saidon, moni a avivili i lange laulau e amiteu, maido ma kuta ei vele na lamana lolopatipati e Saiprus.

<sup>5</sup> Amiteu veleutu na dasi agavuale a avena buo mine Silisia me Pampilia, mulimuli amiteu sibitala na aubu buo e Maira mina avena mine Lisia.

<sup>6</sup> Na aubu iedo a bibi i muge a vanua na maubina savulu sobo tasa ei ite a kuta tasa mine Aleksandria ino, i kale ni vele usino ne Itali. Me ei langetase amiteu usino na kuta iedo.

<sup>7</sup> De amiteu lubetase a mota, ma kuta ei vele kekeke moni mapigogoi a malada sanii, vuna avivili e lange laulau e amiteu. Sou a vanunua na pipigona mina kuta sou pipigo sagali sele, me amiteu divi agavi ne Nidus, moni a avivili i buo me sagali mamau, me amiteu ma mapigogoi ete ne amiteu vele lou. Maido me amiteu sauvule me amiteu vele usino na lolopatipati e Krit, agavi na tubisu e Salmone, me amiteu vele sele na lolopatipati maino.

<sup>8</sup> Sou a vanua na pipigona mina kuta, sou pipigo tivula sele me amiteu vele ogomuli moni a mado usino ne Krit. Me mulimuli amiteu sibitala na aubu tasa, sou tole e Mata Kuba Ana, ei ino agavi na aubu buo e Lasea.

<sup>9</sup> Malada papai pulosi, ma malada buo mine sou e Iuda sou valisobe a aanina ei pulosi. Ma dasi pagu sele, maidolo me Pol ei vei le sou maido,

<sup>10</sup> “Amutou vanunua, mu longe. Eau muada, mane eitou asu seidei, neitou poge a ilala pagu sele, ma golugolu papaina ni buale. A golugolu ma kuta ni ma buale moni oto, maulina mine eitou tamai ni buale.”

<sup>11</sup> Moni a bibi i muge a vanua na maubina savulu sobo tasa ei ma longemuli ete a inade mine Pol ie. Boa. Ei ogomuli a damu-tatalana mina inaunau mina kuta me mina tamana kuta.

<sup>12</sup> Mata do ei ma doana oto na kuta ni muina i mei ovutase a avivili buo. Maido ma vanunua makuba na kuta sou ma-iademuli e sou ne sou ilisitase a avena do me sou asu usino ne Piniks. Mane sou mapigogoi, sou kale ne sou divi na aubu odo me sou ugu nado na ilala mina avivili taula. Piniks ei a mata tasa ino na avena malilo na lolopatipati e Krit, mei lagu usino na avena oaso ei solo i.

*Avivili ma dasi buo ei ilisi*

<sup>13</sup> De avivili mina avena malilo ei ilisi, mei ma sagali mamau oto. Maidolo me sou damu i sou mapigogoi ne sou vele kuba usino na mata sou adeade i iodo. Maido me sou lapuale a augugu me sou vele usino agavi sele na mado mine Krit.

<sup>14</sup> Moni ma tabaa oto a avivili tasa sagali ei ilisi, ei a avivili sou vate a avetale na avena masae. Ma avivili iedolo ei vali maino na lolopati e Krit

<sup>15</sup> mei lange laulau a kuta. Sou a vanunua na pipigona mina kuta sou kale ne sou savuule a kuta ne sou veteliu, moni sou ma mapigogoi ete. Maido me sou itetase moni a avivili ei valitase a kuta usino.

<sup>16-17</sup> Amiteu vele usino na avena malilo na lolopati baini tasa, sou tole e Kauda. Ma ilala lolopati ei matabe sape a avivili, amiteu papamu sele a lapualena bot usinani agavuale a kuta. Io sou a vanunua na pipigona mina kuta sou lapuale a bot uata na kuta me sou papaletole sagali. Me mulimuli sou lange a mota usino matano na luuvana kuta me sou lapuale matate sagali mina masagalina kuta. Sou lae sele, dae ne sou vele usino, me ne sou oso na nasiisii ino balivua na dasi i agavuale Afrika, maido me sou volipui a malo mina vinele me sou itetase moni a avivili ei valitase a kuta usino.

<sup>18</sup> Avivili ma dasi buo sele ei lange laulau sele amiteu, maido me na malada mulimuli

sou a vanunua na kuta sou soke a pitasena golugolu utano na dasi.

<sup>19</sup> Me na malada tolu sou a vanunua na pipigona mina kuta sou soke a pitasena kaleko ma mas ma golugolu sanii mina kuta.

<sup>20</sup> Na malada papai amiteu ma ite ete a oaso ma mataidoido, ma avivili taula sele ei lange laulau sele amiteu taliuliu. Maido me amiteu ma damu oto i ve ne amiteu kuba. Boa. Amiteu damu ve ne amiteu vuso ne amiteu buale.

<sup>21</sup> Malada papaina sou a vanunua sou ma ani ete a gona inani, me Pol i magili balivua ne sou mei vei maido, “Amutou a vanunua, mane amutou ogomuli a inadegu me amutou ma veletase ete a lolopati Krit, io eitou ma mapigogoi ete neitou poge a ilala pagu ie, ma golugolu vuso ni ma buale oto.

<sup>22</sup> Moni seidei eau vei le amutou maido, amutou ma lilibuubuu lou, vuna maido tasa mine eitou ei ni ma buale oto. Kuta moni ni buale.

<sup>23</sup> Eau a bibi mine Salemo, me eau topat-ulialale ei. Na lodo ie a bineanea tasa mine Salemo ei asu usinani mei magili agavuale eau

<sup>24</sup> mei vei maido, ‘Pol, o ma laelae lou. O no asu mo no magili na matane Sisar. Mo longe. Salemo ei longe a kinaka minio, ma vanunua vuso ino pilu e oo na kuta ie ne sou ma buale oto.’

<sup>25</sup> Bineanea mine Salemo ei veiosi maido, amutou ma laelae lou. Eau silimuli e Salemo ni goli a golugolu vuso ni palea tomame ei vei le eau.

<sup>26</sup> Moni a avivili ni valitase a kuta usino ni oso na lolopati tasa.”

<sup>27</sup> Io na lodo savulu tasa timana ivanai, amiteu pati usino na tiana dasi Mediterenian. Me agavuale na lodo punosa sou a vanunua na pipigona mina kuta sou somiale tomame a kuta ei sibitala agavi na mado tasa.

<sup>28</sup> Maido me sou lipui tove a lovana mota utano na dasi ve ne sou poge a dasi ei mutu sele ue boa, me sou ite a bulagona i mapigogoi a lovana savulu iva. Ma kuta ei vele sapa lou usino, me sou lipui lei a mota, me a lovana ei savulu tolu.

<sup>29</sup> Me sou lae, dae a kuta ni vele usino ni oso na vatuvatu mei ni mapola vuso. Maido me sou lange a augugu iva na pona kuta. Me sou kaka na oaso ni tala asi.

<sup>30</sup> Sou a vanunua na pipigona mina kuta sou kale ne sou poge a vea ne sou iavetase a kuta. Maido me sou lipui a bot utano, me sou auala maido sou kale ne sou lange a augugu na muga na kuta.

<sup>31</sup> Moni Pol ei vei ane a bibi muge a vanua na maubina savulu sobo tasa pilu e sou a

vanunua na maubina maido, “Mane sou a vanunua ieli sou ma eili oto na kuta, de ne amutou buale.”

<sup>32</sup> Maido me sou a vanunua na maubina sou valiuti a mota ei sautoletole a bot ma bot ei pu utano na dasi mei pati usinosi.

<sup>33</sup> Bisiu moni na oaso ni tala, me Pol ei vei ane sou ne sou ani a gona inani sanii, “Tabaa mamausoi a lilone amutou i ma kuba oto, mapigogoi a malada savulu tasa timana iva amutou saboa mu aani.

<sup>34</sup> Maido me eau ade sagali ane amutou, namutou ani a gona inani sanii. Ei ni masagali e amutou. Longe, namutou ma mamau oto. Boa. Amutou vuso namutou puiale moni.”

<sup>35</sup> Me ei guale a ulalu, me na matane sou ei toledadangi e Salemo. Mei lee a ulalu mei soke a inani.

<sup>36</sup> Maido ma lilona vanunua vuso ei puiale, me sou tamai sou ani a gona inani sanii.

<sup>37</sup> Amiteu a vanunua eili na kuta, savulu ne amiteu vuso mapigogoi savulu sobo lua savulu padilua timana pantasa.

<sup>38</sup> Sou aani me sou masuosoi, de sou lange a tangatanga na vit utano na dasi ve a kuta ni malamala sapa.

#### *Kuta ei mamau*

<sup>39</sup> Oaso tala, me sou ite a mado amiteu sibitala ie, moni sou ma muada oto i, ei a mado mine sei avena magamaga. Sou ite a mata tasa ei vele ulilo oto mei tau a madona i doana sele. Me sou damutale, mane sou mapigogoi, sou kale ne sou goli a kuta ni vele usino mei ontola na mado iedo.

<sup>40</sup> Maido me sou valiuti a mota mina agugugu vuso me sou litase muina ana na dasi. Me sou lubetase a mota sou papale a vole taula lua sou auau a kuta. Me sou lapuale a kaleko vuso uata na avivili ni tubu ne sou, maido ma kuta ni vele usino ni ontola na mado.

<sup>41</sup> Moni a kuta ei vele uata na nasiisii tasa ino balivua na dasi, mei oso i. Muga na kuta ei oso sagali mamau sele na mado mei muina. Ma dasi ei valivali na pona kuta mei valipole.

<sup>42</sup> De sou a vanunua na maubina sou damutale ne sou valiputemate sou a vanunua na luma na tunuui, dae ne sou apa ulilo na mado me sou oava.

<sup>43</sup> Moni a bibi i muge a vanua na maubina savulu sobo tasa i kale ni buloi e Pol, maido me ei magilisobe sou a vanunua na maubina ne sou ma valiputepute lei a vanunua na luma na tunuui. Ei vei le sou a vanunua sou muada a inapa, ne sou seu utano na dasi me sou apa ulilo na mado,

<sup>44</sup> me sou a vanunua sanii ne sou lapitole a madumaduna kuta ei mapola, ne sou apa

i ulilo. De sou goli tomane a bibi i muge a vanua na maubina savulu sobo tasa i veiosi, me amiteu vuso amiteu livutola na mado. Tasa mine amiteu i ma buale oto.

## 28

### *Pol ino mina lolopatipati Malta*

<sup>1</sup> Amiteu ontola iiti, me amiteu poge maido amiteu ino na lolopatipati tasa sou vate e Malta.

<sup>2</sup> Sou a vanunua na aubu odo sou goli a inigogona doana sele usinani ne amiteu. Adavu i pu me a aubu ei maigi, maido me sou tomi a oavi me sou maasi e amiteu vuso agavuale a oavi ve namiteu amimilu.

<sup>3</sup> Pol ei taupili a lalana obu sanii me ei tau usino na oavi. Ma aliusu tasa ino lilo na obuobu, ei somiale a tivulana oavi, mei gali usala mei aletole a limane Pol mei kulukulu a muina.

<sup>4</sup> A vanunua ma tavivine mina aubu odo sou ite a aliusu ei aletole e Pol mei kulukulu a muina. Me sou vei le sou oto maido, “Oite, nana bibi ieli ei a bibi na valiputematena bibi. Ei ma mate oto na dasi, moni seidei salemo na adovena inigogona pagu vuso ei ma kale ete ei ni mauli lou.”

<sup>5</sup> Moni e Pol ei vilitase a aliusu odo i pu utano na oavi, ma golu tasa ei ma palea le ete Pol.

<sup>6</sup> Sou a vanunua ma tavivine sou magitali a muina, vuna sou damu ve a vovone Pol ni vovonu, ue ei ni bosa asi me ei ni mate. Moni sou magitali tabaa, sou ma ite ete a golu tasa ei palea le ei. Maido me sou sauvule a damutatalana me sou vei, “Ei e salemo tasa.”

<sup>7</sup> Magamaga ino agavuale a aubu odo, ei a magamaga mina munugana mina lolopatipati iedo, aisana e Publius. Bibi iede ei guale amiteu usino na luma minei, me ei iteale iiti sele amiteu, mapigogoi a malada tolu.

<sup>8</sup> Tamane Publius ei sobe a muina. Ei isa a vovotuntunu pilu a tiadavuti. Seido Pol ei asu usino ne ei me ei kaka. Me ei tau a limana ne ei, me ei toekube ei.

<sup>9</sup> Ei goli maido, me sou a vanunua na sinobe ino na lolopatipati iedo sou asuale Pol, me ei toekube tamai e sou.

<sup>10</sup> Sou goli a inigogona doana sele usinani ne amiteu. Me na ilala amiteu kale namiteu ilisitase sou, sou bilii e amiteu a golugolu vuso amiteu boto i, me sou tau na kuta.

### *Pol ei asu divi ne Rom*

<sup>11</sup> Amiteu ugu mapigogoi a game tolu na lolopati e Malta. Me mulimuli amiteu sae na kuta tasa ei ino na lolopati iedo na ilala mina avivili buo. Ei a kuta mine Aleksandria. Na muga na kuta a nunu mina bibaini lua mine salemo Sus ino i. Io amiteu lube a mota me amiteu vele.

<sup>12</sup> Amiteu vele ontola ne Sirakius, me amiteu ugu a malada tolu.

<sup>13</sup> Me amiteu veletase Sirakius mulimuli amiteu vele ontola ne Regium. Me maisavulo, avivili mina avena malilo i ilisi, maido me amiteu veletase Regium. Me na malada tolunai amiteu ontola ne Puteoli.

<sup>14</sup> Mina aubu buobuo do amiteu poge a kristen sanii. Me sou tagi e amiteu ve namiteu ugu pilu e sou, me amiteu ugu mapigogoi a malada padilua. Me amiteu ilisitase sou, me amiteu asu usino na aubu taula e Rom.

<sup>15</sup> Na ilala sou a kristen mine Rom sou longe a inade ve amiteu asu usinani, me sou asu ve ne sou paute amiteu na vea. Me amiteu poge sou na muina viepiluna mine Apius me mina aubu sou vate a Luma Tolu na Mosi. Pol ite sou, me ei toledadangi e Salemo, ma lilona i guale a sagagalina.

<sup>16</sup> Amiteu asu ulilo ne Rom, ma vanunua na itealena aubu ei longo e Pol ni ugu na luma tasa minei oto, pilu a bibi na maubina tasa ni ulage ei.

*Pol ei veipale a malongolongona kubaana ne Rom*

<sup>17</sup> Na malada tolunai ne Rom, Pol ei toleale sou a munuganuga ne sou e Iuda. Sou viepipiliosi, ei vei le sou maido, "Tamtamaigu, eau ma goli ete a golu tasa mina taupuine sou a abuna mine eitou, ue mina saukikina inigogona mine selebuobuo mine eitou. Moni e sou tau eau mina luma na tunuui ne Ierusalem, me sou tau eau na limane sou e Rom.

<sup>18</sup> Io sou e Rom sou longe a vavasana minau, me sou ite maido eau ma isa oto a mamauna mapigogoi ne sou valiputemate eau, maido me sou kale ne sou lubetase eau.

<sup>19</sup> Moni sou e Iuda sou saukiki a inade do, maido me eau ma isa oto a vea tasa, me eau vei e Sisar ni longe a vavasana minau. Moni ei ma tomane ete eau kale na vavasa ane sou a abuna minau a golu tasa.

<sup>20</sup> Eau kale na ite amutou me eau bilii e amutou a inade. Maido me eau toleale amutou usinani. Eau silimuli me eau magitali a golu ieli eitou vuso Israel eitou magitali. Ieli moni ei a vuna mina sen ieli i papale eau seidei."

<sup>21</sup> Me sou vei lei maido, "A vanunua ne Iuda sou ma oabi ete a laulau usinani ne amiteu mina veimuadane amiteu e oo. Me Iuda tasa ei ma divi oto ni mapamuli ane amiteu a inade pagu sanii usino minio.

<sup>22</sup> Moni amiteu kale namiteu longe oo oto no veipale a damutatalana minio, vuna amiteu muada, na aububuna vuso a vanunua ma tavivine sou saukiki a inade

usino na abuna alaba iede ei palea balivua mine eitou e Iuda."

<sup>23</sup> De sou tau a malada tasa, ma vanunua papaina sou sibitala le Pol na luma ei malu i. Me na autupola asu mapigogoi na lavilavi sele ei veipale a inade mina niitealalena mine Salemo usino ne sou. Ei veipale a inade sanii ino na binea mine Moses me na laulau mine sou a profet, me na inadenade iede ei pipigo sagali ve ni mailisi a damutatalana mine sou ve ne sou silimuli e Iesu.

<sup>24</sup> Io a vanunua sanii sou damutale a inade Pol ei goli, ei patotona. Moni sanii sou ma silimuli ete a inade minei.

<sup>25</sup> Sou maububi a inade balivua mine sou oto. Me Pol ei goli a inade tasa usino ne sou maido, "Maolona Nunu ei ade patotona sele usino ne selebuobuo ne eitou a asena profet e Aisaia. Ei vei maido,

<sup>26</sup> 'Oo asu usino na abuna vanunua ma tavivine iedo mo vei le sou maido, "Ne amutou longe a inade mapapaina, moni ne amutou ma muada oto a vuna.

Ne amutou gegemu mapapaina, moni ne amutou ma itelale ete a golu tasa.

<sup>27</sup> Damutatalana mina abuna vanunua ma tavivine do ei sobosi,

ma tagilane sou i bale a nilongena inade, me sou matabuuosi, dae ne sou ite a golu tasa me ne sou longe a inade, me ne sou muada a vuna inade, me ne sou sauvule a lilone sou me ne sou veteliuale eau, me eau na toekube lei e sou." \* \* \*

<sup>28-29</sup> Me Pol ei ade lou maido, "Maidolo me ne amutou muada i, a inade na pipigona doana Salemo ei ni gualeliu e eitou, ede Salemo ei iabiosi usino ne sou a vanunua ma tavivine mine sou a abuna sea. Ne sou longe."

<sup>30</sup> Avala lua vululu Pol i malu na luma tasa. Ei iabi a vatu usino ne tamana luma, ne ei malu i. Me ei mongemonge a niite na vanunua sou sibitala na luma minei.

<sup>31</sup> Ei veimuadade a inade mina niitealalena mine Salemo mei matetengi e sou a vanunua ma tavivine a inade mine Bibi Taula Iesu Krai. Ei ma lae oto a veipalena inade, me a bibi tasa i ma magilisobe ete ei.

## **Rom** **Laulau Pol ei niage usino ne sou e Rom**

*Pol ei ademuada a pipigona aposel minei*

<sup>1</sup> Eau e Pol, eau a bibi na pipigona mine Krai Iesu. Ei toleale eau na palea a aposel, mei vileale eau mina veipalena malongolongona kubaana mine Salemo.

<sup>2</sup> Lisasi Salemo i vei le sou a profet minei ne sou niage a malongolongona kubaana ieli na Laulau na vinalu mine Salemo.

<sup>3</sup> Iede a malongolongona kubaana mine Natune ei. Natuna do ei palea a bibi mina abuna mina Mapana e Devit.

<sup>4</sup> Salemo i mailisi e ei na minate na sagagalina mina Maolona Nunu mine Salemo, Salemo i maite e eitou maido, ei e Natune Salemo. Ei e Iesu Krai, Bibi Taula mine eitou.

<sup>5</sup> Na limane Iesu Krai moni Salemo ei dode amiteu, me mina aisane ei, Salemo i bilii e amiteu a pipigona aposel. Ei goli maido mina abuna vanunua ma tavivine vuso ne sou silimuli e Iesu me sou ogomuli a inade minei.

<sup>6</sup> Amutou tamai mu longesi a tinola mine Iesu Krai me seidei amutou ino lilo na abuna mine Iesu.

<sup>7</sup> Amutou a vanunua ino ne Rom, Salemo ei kale amutou mei toleale amutou a abuna vanunua ma tavivine minei, eau niage a inade ieli usino ne amutou. Salemo Tamane eitou pilu e Bibi Taula Iesu Krai, ne sulu dode amutou me ne su toemea a lilone amutou.

*Pol ei kale sele ni asu usino ne Rom*

<sup>8</sup> Palapala, na aisane Iesu Krai eau toledadangi e Salemo ane amutou vuso, vuna na avena magamaga vuso vanunua sou mapamulimuli a silimulina sagali mine amutou.

<sup>9</sup> Eau pipigo sagali sele a malongolongona kubaana mine Natuna. Me Salemo oto ei muada i, taliulu eau damutaletale amutou na ilala eau kaka.

<sup>10</sup> Me taliulu eau kaka sagali ane Salemo maido, mane ei kale, eau na poge a vea minau me eau na asu usino ne amutou.

<sup>11</sup> Eau kale mamai na ite amutou, vuna maido eau na bilii e amutou a niabi sanii na Maolona Nunu mina toesagaline amutou.

<sup>12</sup> Damutalatalana minau ei maido. Silimulina mine amutou ni buloi e eau ma silimulina minau ni buloi e amutou tamai, me ieli ei ni masagali a lilone eitou vuso.

<sup>13</sup> Tamtamaigu, eau kale namutou muada kuba, ilala papaina eau isa a damutatalana

mina asualene amutou. Pipigona minau ei ni buloi a vanunua ma tavivine mine sou a abuna sea ne sou palea a kristen, eau kale na buloi tamai e amutou. Moni pea seidei a golugolu sanii sou magilisobe eau.

<sup>14</sup> Eau somiale Salemo ei bilii e eau a pipigona mina buloine sou e Grik me sou sanii tamai, me sou a muadana vanunua me sou a vanunua ma isa oto a muadana tamai.

<sup>15</sup> Maidolo me eau kale sele na veipale a malongolongona kubaana ane amutou a vanunua ma tavivine ino ne Rom tamai.

*Malongolongona kubaana ei a sagagalina mine Salemo*

<sup>16</sup> Eau ma maelaela oto a malongolongona kubaana, vuna maido sagagalina mine Salemo ei ino na malongolongona kubaana, ede a sagagalina mina gueleliuna vanunua vuso sou silimuli, sou e Iuda pala, ma vanunua ma tavivine mine sou a abuna sea tamai.

<sup>17</sup> Na malongolongona kubaana Salemo ei maite e eitou a bilesina inigogona minei. Eitou neitou silimuli me ei ni vate e eitou a bilesina vanunua ma tavivine, vuna maido na vea mina silimulina moni eitou mapi-gogoi neitou palea a bilesina vanunua ma tavivine na matane Salemo. Ei tomane a inade ino na Laulau mine Salemo, "A bilesina vanunua ma tavivine ne sou maui a silimulina mine sou."<sup>\*</sup>

*Sinoana mine Salemo ei palea na vanunua ma tavivine vuso sou lametase Salemo*

<sup>18</sup> Eitou muada, a sinoana mine Salemo ei palea maino na langi. Ei maliu a mapa pagu usino ne sou so lametase a inade patotona me sou goli a inigogona pagu. Na inigogona pagu mine sou odo, sou pipigo a taupuina inade i patotona.

<sup>19</sup> Vanunua dolo sou muadasi e Salemo, vuna maido Salemo oto ei maitesi e ei oto usino ne sou.

<sup>20</sup> Soke na ilala Salemo ei mapale a golugolu vuso asu mapi-gogoi seidei, vanunua sou ite a golugolu ei mapale. Na vea ieli a vanunua mapi-gogoi ne sou muada a inigogona sanii mine Salemo sou ino ovu. Sou mapi-gogoi ne sou muada a sagagalina buo ma vuna inigogona minei ino taliulu taliulu. Maido ma bibi tasa ma mapi-gogoi ete ni vei ve ei ma muada oto e Salemo.

<sup>21</sup> Sou muada e Salemo, moni sou ma beilange ete a aisane ei me sou ma toledadangi ete ei. Boa. Moni damutatalana mine sou i palea tomane sou a vautana vanunua. Ei tomane sou ma isa oto a damutatalana ma muadana, me sou ino na tunuu.

\* 1:17 Habakuk 2:4



<sup>22</sup> Sou damu ve sou muada, moni sou palea a vautana vanunua.

<sup>23</sup> Sou taipui a aisa buo mine Salemo ei muina taliuliu, moni sou pui a puigolo mina vanua sou mate me sou a manumanu ma viuviu ue a aliusu maido, me sou totopatulialale a golu sou odo.

<sup>24</sup> Maidolo me Salemo ei itetase sou, me a masagana pagu mine sou oto i lapuale sou me sou goli a matamatana inigogona pagu na vovone sou oto.

<sup>25</sup> Matana vanunua ma tavivine maido sou longetase a inade ivu mine Salemo, me sou sauvule me sou guale a inade na aualana. Me sou lametase Salemo ei mapale a golugolu vuso, me sou totopatuliale a golugolu Salemo ei mapale, me sou matano na golugolu sou odo. Moni e Salemo ei a vuna golugolu vuso, maido me eitou a vanunua ne eitou beilange a aisane Salemo taliuliu taliuliu. Moliana.

<sup>26</sup> Sou lametase Salemo, maidolo me Salemo ei itetase sou ne sou muine sou na inigogona mumugu mine sou oto. Tavivine sou so veletase a inigogona bilesi mina taulaina, me sou goli a inigogona pagu pilu e sou oto.

<sup>27</sup> Ma vanunua tamai sou veletase a inigogona bilesi mina taulaina, ma lilone sou ei ilisi tomene a oavi, me sou goli a inigogona pagu pilu e sou a vanunua oto. Vanunua sou goli a inigogona maelana do, maidolo me sou oto sou guale a mapa pagu mapigogoi a maliuna inigogona pagu sou goli iodo.

<sup>28</sup> Sou ma damutaletale etesi e Salemo, maido me Salemo ei itetase sou so ogomuli a damutatalana pagu mine sou oto. Me sou goli a matamatana inigogona i ma bilesi oto.

<sup>29</sup> Sou goli a matamatana inigogona pagu maido, sou a inigogona pagu, ma inigogona mina isualena, ma inigogona butualena. Sou lilogegele ana vanunua sou isa a golu papaina, ma valiputena vanunua, ma sinoa maisabana, ma aualana, ma lapualena golu mine sou usino, ma toegegeline vanunua seasea. Inigogona pagu vuso do ei vonu ivu ne sou. Sou poipoi,

<sup>30</sup> ma adeaualana mina toegegeline sou usino. Sou butualale Salemo, me sou ade vauta maisabasaba, me sou toevautauta, me sou masalailai e sou oto. Sou mapalele a matamatana inigogona pagu alaba. Sou saukiki a inade mine tamane sou me tinane sou.

<sup>31</sup> Sou ma isa oto a damutatalana doana. Sou ma ogomulimuli ete a inade mine sou oto. Sou ma kalekale ete a mautu ne sou oto. Sou ma lilomulimuli ete a vanunua usino.

<sup>32</sup> Bilesina bine mine Salemo i vei maido, "Vanunua sou goli a matana inigogona maido ne sou mate." Vanunua dolo sou

muada kuba a binea iedo, moni sou saukiki me sou goligoli a matamatana inigogona pagu. Me sou tamai masalailai aisana vanunua sou goligoli a matamatana inigogona pagu do.

## 2

### *Bilesina vavasana mine Salemo*

<sup>1</sup> Maido me amutou a vanunua vuso mu ububi a inade usino na vanunua seasea, eau vei le amutou vuso, oo no ma adeade lou ve oo ma isa oto a sinusu. Longe, ilala oo ubi a vanua sanii a inade, o ubi a inade tamai ne oo oto, vuna maido, oo oto oo goligoli a matana inigogona tasa moni tomene sou goli.

<sup>2</sup> Eitou muada, Salemo ei maliuliu a mapa pagu ane sou a vanunua sou goli a matamatana inigogona pagu odo, ma inigogona Salemo ei goli iodo, ei patotona vuso.

<sup>3</sup> O ububi a inade usino na vanunua sou goli a matana inigogona pagu maido, moni oo oto oo goligoli a matana inigogona tasa moni tomene sou. Oo damu e Salemo ei ma mapigogoi ete ni vavasa ane oo tamai, io?

<sup>4</sup> Ue, oo ma muada oto e Salemo ei goli a inigogona doana ne oo, mei magitali oo tabaa selesi mei ma maliu asiase ete a inigogona pagu oo goli. Maido me nane oo ite ei tomene a golu sabubu, io? Salemo ei kale no sauvule a lilomu, maidolo me ei goli a inigogona doana ane oo.

<sup>5</sup> Oo tabesobe sele a lilomu me oo ma sauvulevule ete a lilomu. Me na inigogona iede ei tomene o taipili a mapa pagu i buo minio oto. Me na malada Salemo ei goli a bilesina vavasana minei, lilotivulana minei ni palea muada sele me oo no guale a mapa pagu odo.

<sup>6</sup> Salemo ni bilii a mapa ne sou a vanunua ma tavivine vuso mapigogoi a inigogona sou goli.

<sup>7</sup> Sanii sou ogomulimuli sagali a inigogona doadoana taliuliu me sou tilotilo a vea mina minaluna doana pilu e Salemo ma aisa buo pilu a maulina ei ma pulupulu oto. Salemo ei ni bilii a maulina i kubaana taliuliu taliuliu usino ne sou a vanunua ma tavivine do.

<sup>8</sup> Me sanii sou damutale sou oto moni, me sou lametase a inade ivu me sou ogomuli a inigogona ei ma bilesi oto. Salemo ei ni sinoa ana vanunua ma tavivine sou odo, me ei ni maliu a mapa pagu sele usino ne sou.

<sup>9</sup> Mavaana buo ma davutina ni palea na vanunua vuso sou goligoli a inigogona pagu, ne sou e Iuda pala, me ne sou a abuna sea tamai.

<sup>10</sup> Moni Salemo ni bilii a minaluna doana ma aisa buo ma lilomeana usino ne sou vuso a vanunua sou goligoli a inigogona

doana, ne sou e Iuda pala, me ne sou a abuna sea tamai.

<sup>11</sup> Vuna maido Salemo ei vivileale a vanunua ma tavivine vuso na matana inigogona tasa moni.

<sup>12</sup> Ei maido. Vanunua vuso sou ma isa oto a binea me sou goli a sinusu, sou ne sou buale, muina sou ma isa oto a binea. Ma vanunua vuso sou isa a binea me sou goli a sinusu, Salemo ni ogomuli a inade ino na binea me ei ni vivileale a inigogona mine sou.

<sup>13</sup> Vanunua sou longetase sabubi a binea, sou ma palea oto a bilesina vanunua na matane Salemo. Boa. Vanunua sou ogomuli a binea, vanunua moni iodo Salemo ni tole sou a bilesina vanunua.

<sup>14</sup> Mane sou a abuna sea sou ma isa oto a binea sou ogomulimuli a inigogona mina binea na damutatalana mine sou oto, io a damutatalana mine sou oto ei muina tomane a binea mine sou oto.

<sup>15</sup> Na inigogona mine sou ie, inade na binea Salemo i tau na lilone sou ei palea muada. Ma damutatalana ivu ino na lilone sou, ieli tamai ei maite i maido, binea ei ino na lilone sou.

<sup>16</sup> Maidolo me na malada Salemo ei tau mina vivilealena inigogona vuso i ovu ma adeovuna mina vanunua vuso, damutatalana mina vanunua sou odo ei ni vavasa ane sou na inigogona sou goli. Malongolongona kubaana eau veipale ei maido, Salemo ei ni vivileale a inigogona mina vanunua vuso ne Iesu Krai.

*Sou Iuda sou damu i a binea ei mapigogoi ni buloi e sou*

<sup>17</sup> Amutou e Iuda, amutou veivei maido, “A binea ei ni buloi e amiteu na vavasana. Amiteu a abuna mine Salemo.”

<sup>18</sup> Amutou gualesi a matetengina mina binea me amutou muada a masagana mine Salemo, maido me amutou veivei ve, sou a inigogona i bilesi sou kubaana.

<sup>19-20</sup> Amutou damudamu i maido, “Na binea amiteu gualesi a vuna muadana i doana ma inade patotona, maidolo me amiteu mapigogoi namiteu maite a vea ane sou so mata ego. Amiteu eili tomane a muada mina vanunua ino na tunuui. Amiteu a vanunua mina matetengina sou a vanunua sou ma isa oto a muadana. Amiteu a vanunua na matetengina mine selebanini.”

<sup>21</sup> E, amutou matetengitengi e sou a vanunua ma tavivine seasea, moni posa matina amutou ma matetengitengi ete amutou oto? Amutou veivei ve a vanunua ne sou ma paaaliali lou, moni amutou paaaliali?

<sup>22</sup> Amutou veivei ve, “A vanunua ma tavivine ne sou ma gologoli lei a inigogona sualolona,” moni nane amutou oto mu gologoli maido? Amutou ma kale ete sou a salemo auala, moni nane amutou paaaliali a gologolu mina luma na kinaka mine sou masala?

<sup>23</sup> Amutou beilangelange a binea mine Salemo, moni amutou seutiuti a binea, me na inigogona ieli amutou toegegeli a aisane Salemo.

<sup>24</sup> Laulau mine Salemo i isa a inade na inigogona doo maido, “Sinusu mine amutou moni, me sou a abuna seasea sou adepintola me sou taupui a aisane Salemo.”\*

### *Inigogona ivu mina munogena*

<sup>25</sup> Mane eitou ogomuli a binea, io a inigogona munoge mine eitou e Iuda, ieli ei ni a inigogona doana. Moni mane oo seuti a binea, io muina sou moge a uliuline oo, oo muimu moni tomane a bibi sou ma moge ete ei.

<sup>26</sup> Me mane a bibi sou ma moge ete ei, ei ogomuli kube a inigogona bilesi vuso mina binea, de bibi iedo ei ni muina tomane a bibi sou moge a uliuline ei.

<sup>27</sup> Amutou Iuda amutou isa a laulau mina binea, me sou moge a uliuline amutou. Moni mane amutou seuti a binea, io bibi ei ogomulimuli ivu a inade mina binea ei ni ubi a inade usino ne amutou.

<sup>28</sup> Mane a bibi ei Iuda na aisa moni, ei ma Iuda ivu oto. Ma inigogona na munogena, ei a golu mina vovo moni.

<sup>29</sup> Moni a bibi ei e Iuda ivu, lilona ma damutatalana minei i maolo. Ma inigogona ivu mina munoge na uliuli, ieli tamai ei ni palea lilo mina lilona ma damutatalana mina bibi. Ei ma palealea oto na inigogona mina ogomulina inadene sou niage na binea. Boa. Ei a golu a Nunu mine Salemo ei mapale. Matana bibi maido ei ma gualeale ete a aisa buo na matane sou a vanunua. Boa. Moni ei guale a aisa buo mina matane Salemo.

## 3

### *Salemo ei patotona taliuliu*

<sup>1</sup> Mane oo e Iuda, sei golu i doana? Ue sava i doana na inigogona munoge?

<sup>2</sup> Ai! Salemo ei bilii a matamatana golu doana ne sou e Iuda. Munugana ei maido, Salemo i bilii a inade minei ne sou e Iuda mina itealena.

<sup>3</sup> Ivu, sanii sou ma ogomuli ete a inade ie. Moni posa matina? Mane sou ma silimuli ete, nane ieli ei ni toe e Salemo ni ma ogomuli ete a inade minei?

<sup>4</sup> Boa vuso sele. Vanunua vuso sou aualala, moni Salemo tasa moni ei veivei a

\* 2:24 Aisaia 52:5

inade patotona taliuliu. Tomane a Laulau mine Salemo ei vei,

“Salemo, oo maite e sou oo patotona na inade minio.

Me mane sou damu ve ne sou vavasa ane oo, oo no vululusi sele a vavasana.”\*

<sup>5-6</sup> De posa matina? Mane a inigogona pagu mine eitou ei mapale muade a inigogona bilesi mine Salemo, ne eitou vei matina? Ilala Salemo ei adoliu a mapa pagu mina sinusu mine eitou, nane ei goli a inigogona i ma bilesi oto, io? Boa vuso sele. Mane Salemo ei ma ogomuli ete a inigogona bilesi taliuliu, posa matina ei mapigogoi ni vivilemuliale a inigogona mina vanunua ma tavivine vuso?

<sup>7</sup> Ei a matana damutatalana tasa moni mina bibi ei ade maido, “Mane a adeualana minau i goli a adepatotonana mine Salemo ei palea muada, me ieli ei goli a aisa buo minei i sibitala buo sele, io posa matina ei tole eau a bibi na sinusu, me ei ni malii a mapa pagu usinani minau?”

<sup>8</sup> Me ei tomane moni a inade mamau ie, “De, neitou goli a inigogona mamau, me na vea ieli a inigogona doana ei ni palea.” Vanunua sanii sou ububi eau a inade me sou vei maido, a inade eau oto eau adeade i, ei tomane moni a inade mamau ie. Salemo ni vavasa ane sou a vanunua iedo, me ei ni malii a mapa pagu usino ne sou mapigogoi a inigogona sou goli.

*Bibi tasa boa i goligoli a inigogona bilesi*

<sup>9</sup> De posa matina? Nane eitou Iuda eitou vululusi a vanunua sea? Boa vuso sele. Eitou veiosi, sinusu ei taboboli e eitou vuso, eitou Iuda me Grik pilu.

<sup>10</sup> Laulau mine Salemo ei isa a inade maido,

“Bibi tasa boa ei goligoli a inigogona i bilesi.

Boa vuso sele.

<sup>11</sup> Bibi tasa boa ei isa a muadana doana. Tasa eili boa ei tilotilo e Salemo.

<sup>12</sup> Sou vuso sou iavetasesi a vea doana.

Sou vuso sou tasa moni, sou a vanunua pagupagu sele.

Tasa mine sou ei ma goli ete a inigogona doana.

Boa vuso sele.”†

<sup>13</sup> “Tokaune sou i tomane a muina minate i peo moni.

Sou goligoli a adeualana papaina.”

“Ma asene sou ei vonu a inade mina toegegelina vanunua tomane a paselena aliusu mamau.”‡

<sup>14</sup> “Taliuliu sou adegegelugelu mina toegegelina vanunua usino, me mina biliine sou a mavaana.”§

<sup>15</sup> “Taliuliu sou velevele usino na vali-putena vanunua seasea.

<sup>16</sup> Sou asu maisabasaba me sou goli a golugolu mina toegegelina maulina mine sou a vanunua ma tavivine seasea me mina biliine sou a mavaana.

<sup>17</sup> Sou ma muada oto a inigogona mina lilomeana pilu e sou a vanunua seasea.”\*

<sup>18</sup> “Sou ma lae sapasapa oto e Salemo.”†

<sup>19</sup> Eitou muada, inadnade vuso binea ei vei, ei vei ane sou a vanunua ino matano na binea. Maidolo ma bibi tasa boa ei mapigogoi ni vei maido, “Eau a bilesina bibi.” Boa. Eitou a vanunua vuso mina aveavena vuso eitou isa a sinusu na matane Salemo.

<sup>20</sup> Maidolo me na inigogona mina ogomulina binea “bibi tasa boa ei ma isa oto a sinusu mei muina bilesi na matane Salemo.” Binea i maiteite e eitou a sinusunusu mine eitou, seido moni.

*Bibi ei silimuli e Iesu Krai ei a bilesina bibi*

<sup>21</sup> Moni seidei a vea tasa Salemo ei vate eitou a bilesina vanunua ma tavivine ei palea muadasi. Ei ma palea oto na vea mina ogomulina binea. Boa. Ei palea na vea sea. Ma inade ino na binea mine Moses me na laulau mine sou a profet, ei veipale a inade mina inigogona Salemo ei goli iodo.

<sup>22</sup> Inigogona do ei maido, vanunua ma tavivine vuso sou silimuli e Iesu Krai, Salemo ei vatevate e sou a bilesina vanunua ma tavivine. Eitou ma isa oto a vea tasa lou. Boa.

<sup>23</sup> Eitou a vanunua vuso eitou goli a sinusu, maido me eitou ma mapigogoi ete ne eitou sibitala na malasana mine Salemo.

<sup>24</sup> Moni Salemo ei dode eitou, me na pipigona Krai Iesu ei oliliuale eitou, me Salemo ei vate e eitou a bilesina vanunua ma tavivine. Eitou ma palea oto a bilesina vanunua ma tavivine na pipigona eitou oto eitou goli. Boa. Salemo ei bilii sabubi e eitou na limane Krai Iesu.

<sup>25</sup> Salemo ei vileale Iesu ni mate ma dalane ei ni singi mina taulelena sinusu mina vanunua ma tavivine vuso sou silimuli e ei. Na inigogona ieli Salemo ei maite e eitou a vea tasa ei vate e eitou a bilesina vanunua ma tavivine. Lisa Salemo ei ma sinoa asi oto ane sou a vanunua ma tavivine me ei ma malii asi ete a mapa pagu mina sinusu sou goli.

\* 3:4 Laulau na Inala 51:4 † 3:12 Laulau na Inala 14:1-3, 53:1-3 ‡ 3:13 Laulau na Inala 5:9, 140:3 § 3:14 Laulau na Inala 10:7 \* 3:17 Aisaia 59:7-8 † 3:18 Laulau na Inala 36:1

<sup>26</sup> Moni seidei na ilala ieli Salemo ei maite e eitou maido ei oto ei bilesi sele. Ma vanunua ma tavivine vuso sou silimuli e Iesu, Salemo ei vate e sou a bilesina vanunua ma tavivine.

<sup>27</sup> Maido me sei mapigogoi ni beilange a aisane ei oto? Bibi tasa boa. Vea mina ogomulina binea ue a vea mina inigogona doana tamai boa. Vea mina silimulina moni i mapigogoi ni beilange a aisane ei oto.

<sup>28</sup> Maidolo me seidei eitou muada i maido, eitou palea bilesi na matane Salemo na vea mina silimulina moni, me na vea mina ogomulina binea boa.

<sup>29</sup> Posa matina? Nane Salemo ei e Salemo mine sou e Iuda moni? Boa. Ei e Salemo mine sou a abuna sea tamai.

<sup>30</sup> Salemo ei tasa moni. Ei iteite a silimulina mine sou a vanunua sou moge sou, me ei iteite a silimulina mine sou a vanunua sou ma moge ete sou. Me ei vate e sou a bilesina vanunua.

<sup>31</sup> Mane eitou vei ve a silimulina ei a munugana golu, nane eitou vei ve binea ei a golu sabubu, io? Boa vuso sele! Eitou goli a binea i muina sagali.

#### 4

##### *Salemo ei vate e Abraham a bilesina bibi*

<sup>1</sup> Abraham ei a bibi tomane eitou, me ei e eisune eitou. Maido me neitou vei matina e ei?

<sup>2</sup> Mane patotona Abraham ei goli a inigogona doadoana me na inigogona dolo ei palea a bilesina bibi, de ei mapigogoi ni beilange a aisane ei oto. Moni na matane Salemo ei ma palea oto a bilesina bibi na inigogona do.

<sup>3</sup> Inade ino na Laulau mine Salemo i vei maido, "Abraham ei silimuli a inade mine Salemo, maidolo me Salemo i vate e ei a bilesina bibi."\*

<sup>4</sup> Bibi ei goli a pipigona me ei guale a mapa, mapa iedo eitou ma vatevate ete a niabi. Boa. Ei a golu mina maliuna pipigona moni.

<sup>5</sup> Moni mane a bibi tasa ei kale ni palea a bilesina bibi na matane Salemo, de ei ni goli a sava? Ei ni ma pipigo sagali oto a inigogona doadoana, moni ei ni silimuli maido, Salemo mapigogoi ni vate e sou a vanunua mina gunolina sinusu a bilesina vanunua. Me ne Salemo tole e ei a bilesina bibi.

<sup>6</sup> Devit tamai ei vei a matana inade ie. Ei ade a munonge mina bibi ei ma goli ete a inigogona doana, moni Salemo ei vate ei a bilesina bibi.

<sup>7</sup> Devit i vei maido,

"Mane Salemo i lilotasesi a inigogona pagu mine vanua mei taulele a sinusu mine sou,

sou a vanua do ne sou mongemonge.

<sup>8</sup> Mane Bibi Taula i ma damutale etesi a sinusu mina bibi tasa, bibi iodo ei ni mongemonge."†

<sup>9</sup> Nane a vanua mina munoge moni, ne sou mongemonge, io? Ue nane a vanua sou ma moge ete sou tamai ne sou mongemonge? Eitou damutale kube. Eitou veivei maido, Salemo i damutale a silimulina mine Abraham mei vate e ei a bilesina bibi.

<sup>10</sup> Io Abraham ei muina matina me Salemo i vate e ei a bilesina bibi? Nane ei mogesi ei, ue ei saboa moge ei? Ei saboa moge ei me Salemo i vate e ei a bilesina bibi.

<sup>11</sup> Ilala ei saboa moge ei, ei silimuli e Salemo, me Salemo i vate e ei a bilesina bibi. Me Salemo i bilii e ei a inigogona mina munogena odo tomane a matailala mine ei muina a bilesina bibi. Maidolo me Abraham ei a munugane tubuna mina vanunua vuso sou ma moge ete, moni sou silimuli e Salemo me Salemo i vate e sou a bilesina vanunua.

<sup>12</sup> Me ei e tubuna tamai mina vanua sou moge, iede a vanua sou ma moge sabubi ete. Boa. Sou moge, me sou ogomuli tamai a inigogona mine tubune eitou Abraham me sou silimuli e Salemo, tomane Abraham ei goli na ilala ei saboa moge.

##### *Adegatuna mine Salemo usino na vanunua ma tavivine vuso sou silimuli*

<sup>13</sup> Lisa Salemo ei gatunasobe e Abraham me sou a tubutubune ei maido, ei ni bilii a magamaga vuso usino ne sou. Moni e Abraham ei ma ogomuli ete a binea na ilala Salemo i goli a adegatuna dolo ane ei. Boa. Abraham i silimuli a inade mine Salemo moni me Salemo i vate e ei a bilesina bibi.

<sup>14</sup> Mane patotona, vanunua sou ogomulimuli a binea, sou moni ne sou guale a golugolu vuso Salemo ei adegatunasobe ni iabi, io a inigogona mina silimulina ei tomana golu sabubu. Ma adegatuna mine Salemo tamai iodo ni buale sabubu.

<sup>15</sup> Eitou muada, ilala binea ei ino, vanunua sou popope a binea, me ieli ei toe e Salemo ei sinoa ane sou. Moni mane a binea boa, de neitou ma veivei lou ve a bibi ei pope a binea.

<sup>16</sup> Salemo i dode e Abraham me eisusuna ne sou, sou palea mulimuli, me ei goli le ei a adegatuna do. Maido ma vanunua sou kale ne sou guale a golugolu Salemo ei vileale le sou, ne sou silimuli a inade mine Salemo me ne sou guale. Golugolu sou odo ei mina vanunua sou ogomuli a binea moni, boa. Vanunua vuso sou isa a matana silimulina

\* 4:3 Sinokona 15:6 † 4:8 Laulau na Inala 32:1-2

tomane Abraham, sou tamai ne sou guale a golugolu sou odo. Maido me Abraham ei e tamane eitou vuso,

<sup>17</sup> tomane a Laulau mine Salemo i vei, “Eau tau e oo palea eisuna mina abuna vanunua ma tavivine makuba.”<sup>‡</sup> Adegatuna ieli ei ino sagali na matane Salemo. Abraham ei silimuli e Salemo, ei e Salemo ei biliili e maulina ana vanunua sou matesi, me ei ade moni, a golugolu vuso palea.

<sup>18</sup> Abraham ei ma muada oto, posa matina Salemo ei ni goli a golugolu odo ei adegatuna ni goli, moni ei silimuli sele tomane a bibi ei muadasi i ne sou a golu ei ni palea. Maidolo me ei palea eisuna abuna vanunua ma tavivine makuba,<sup>§</sup> tomane Salemo ei adesi i, “Tubune natatumu ni palea papaina sele.”

<sup>19</sup> Abraham ei a avalana savulu sobo tasa, ma vovona ei malailai mei matesi. Me ei muada i e Sara ei ma mapigogoi ete ni natua. Moni a silimulina minei i muina sagali, me ei ma bale oto.

<sup>20</sup> Salemo ei adegatuna ni goli a golu sou odo, me Abraham ei damutale a adegatuna do me ei ma lilolua oto me ei ma litase ete a silimulina. Boa. Silimulina minei i masagali e ei. Ei beilange a aisane Salemo

<sup>21</sup> me ei muadasi i maido, Salemo ei mapigogoi ni goli tomane ei adegatuna ni goli.

<sup>22</sup> Maidolo me Salemo ei damutale a silimulina mine eitou me ei vate ei a bilesina bibi.

<sup>23</sup> Inade ieli ei ino na Laulau mine Salemo, “Salemo i tole e ei a bilesina bibi,” ei ma ade moni oto e Abraham. Boa.

<sup>24</sup> Ei ade e eitou tamai. Eitou tamai eitou silimuli e Salemo, me Salemo ei mailisiliu e Iesu, Bibi Taula mine eitou, ei ni damutale a silimulina mine eitou me ei vate e eitou a bilesina vanunua ma tavivine.

<sup>25</sup> Salemo ei itetase a vanunua sou vali-pute Iesu, ne ei ni taulele a sinusu mine eitou. Me Salemo ei mailisi e ei na minate, ne ei ni tole e eitou vuso a bilesina vanunua ma tavivine.

## 5

### *Lilomeana ma munongena*

<sup>1</sup> Io eitou silimuliosi me Salemo ei vate e eitou a bilesina vanunua ma tavivine. Maido me eitou palea lilo tasa pilu e Salemo lilo ne Bibi Taula mine eitou e Iesu Kraisi.

<sup>2</sup> Iesu ei pee a vea ne eitou gali ulilo na dinodo mine Salemo, seidei eitou eiliosio na dinodo minei. Me eitou magitali e Salemo ni soebule a malasana minei usinani ne eitou, ieli ei toemongemonge e eitou.

<sup>3</sup> Me eitou ma mongemonge oto i ieli moni. Boa. Ne eitou monge e sou a mavaana i palea ne eitou tamai, vuna maido eitou muada, sou a mavaana ieli ei toesagali a lilone eitou.

<sup>4</sup> Mane a lilone eitou i muina sagali, de eitou mapigogoi neitou soetole a mavaana. Mane eitou soetole a mavaana, de eitou silimulimuli e Salemo me eitou magitali e ei ni buloi e eitou.

<sup>5</sup> Mane eitou magitali e Salemo ni buloi e eitou, de eitou ma magitali sabubi ete. Boa. Salemo ei biliiosio e eitou a Maolona Nunu, mina Maolona Nunu ieli ei kale mamai sele eitou.

<sup>6</sup> Ilala eitou bale, Kraisi ei mate mina gualeliune eitou a vanunua mina gunolina inigogona pagu.

<sup>7</sup> Patotona sele, eitou a bibi tasa boa i mapigogoi ni mate ana bilesina bibi. Moni mane eitou ite a doana bibi, io nane mapigogoi neitou mate ane ei.

<sup>8</sup> Moni eitou saboa ieli a vanunua ma tavivine mina gunolina sinusu, Kraisi ei mate ane eitou. Na inigogona ieli Salemo i maite e eitou maido, ei kale mamai sele eitou.

<sup>9</sup> Kraisi ei mate ma dalane ei singi me ei toealabe eitou, me seidei Salemo ei vate e eitou a bilesina vanunua ma tavivine. Maido me eitou muada sele i, ei ni buloi mamai sele eitou, me neitou ugu kuba na ilala Salemo ni maite a sinoana minei usino na sou a vanunua mina gunolina sinusu.

<sup>10</sup> Ilala eitou saboa ino a butu mine Salemo, Natune Salemo ei mate mina mapulina inigogona butualena me neitou palea lilo tasa pilu e Salemo. Me mane eitou muina lilo tasa moni pilu e Salemo, neitou muada ivu, na maulina mine Natuna do Salemo ei ni gualeliu e eitou.

<sup>11</sup> Ma golu tasa lou. Bibi Taula mine eitou, Iesu Kraisi, ei toe eitou palea lilo tasa pilu e Salemo, maidolo me seidei eitou mongemonge sele e Salemo.

### *Adam me Iesu Kraisi*

<sup>12</sup> Eitou muada, a bibi tasa ei goli a sinusu, me na inigogona do sinusu ei palea na magamaga. Ma sinusu i mapale a minate usinani. Ma minate i guale a vanunua vuso, vuna maido vanunua vuso sou goli a sinusu.

<sup>13</sup> Binea i saboa palea, moni na ilala iedo sinusu i eiliosio na magamaga. Moni mane a binea boa, de Salemo ei ma damutale ete a sinusu vanunua tastasa sou goli.

<sup>14</sup> Moni soke na ilala mine Adam i asu mapigogoi na ilala mine Moses, minate i toebose a vanunua vuso. A vanua sanii sou ma goli ete a matana sinusu tasa moni

tomane Adam ei goli, moni a minate i toebose a vanua iedo tamai. Adam ei a nunu mina Bibi ni palea mulimuli odo.

<sup>15</sup> Moni a sinusu mine Adam ma dinodo mine Salemo i ma tasa moni oto. Boa vuso sele. A sinusu mine a bibi tasa i goli a vanunua ma tavivine vuso sou matemate. Moni a sagagalina dinodo mine Salemo ei vululusi sele a sagagalina minate me ei vonu mamau sele ne sou a vanunua ma tavivine. Na dinodo mina Bibi tasa ieli e Iesu Krai, Salemo i toe eitou palea a bilesina vanunua ma tavivine, me ieli ei a niabi doana ei bilii e eitou.

<sup>16</sup> Me tamai, niabi mine Salemo ei ma tomane ete a sinusu mina bibi tasa. Me a sinusu tasa mina bibi iedo i toe Salemo i vavasa ane sou a vanunua ma tavivine maido, "Ne sou mamau vuso." Moni a niabi mine Salemo i maido, ilala vanunua ma tavivine sou goli a sinusu makuba, Salemo i dode sou me ei vate e sou a bilesina vanunua ma tavivine.

<sup>17</sup> Adam ei saukiki a inade me na sinusu moni iedo minate ei palea tomane a mapana me ei taupui a vanunua vuso. Moni a dinodo mine Salemo ma niabi minei, ieli i vululusi a sagagalina minate mei buo lou. Maidolo me eitou muada sele, na pipigona mine Bibi tasa Iesu Krai vanunua vuso sou guale a dinodo mine Salemo me Salemo vate e sou a bilesina vanunua, ne sou muina mauli me muina a mapana.

<sup>18</sup> Maidolo me neitou damutatala iiti a inade ie. Bibi tasa i pope a binea, me na sinusu odo Salemo i vavasa ane eitou vuso a vanunua ma tavivine. Tomane moni, a bibi tasa i goli a inigogona bilesi, me Salemo i damutale ielili me ei vate e eitou vuso a bilesina vanunua, me eitou mauli.

<sup>19</sup> Adam i saukiki a inade, me na inigogona minei ieli a vanunua ma tavivine makuba sou palea a vanunua ma tavivine mina gunolina sinusu. Moni Iesu ei ogomuli a inade, me na inigogona minei ieli a vanunua ma tavivine makuba ne sou palea a bilesina vanunua ma tavivine.

<sup>20</sup> Ilala sou goligoli a sinusu, Salemo ei bilii e sou a binea. Vuna maido, Salemo ei kale ni maite e sou a sinusu mine sou. A vanunua sou goli a sinusu makuba lou, moni a dinodo mine Salemo i buo mamau sele lou.

<sup>21</sup> Inigogona mina sinusu ei mapale a minate, me na inigogona ieli sinusu ei palea tomane a mapana. Moni seidei dinodo mine Salemo i elii tomane a mapana. Na pipigona mine Bibi Taula mine eitou, Iesu Krai, Salemo i dode eitou me ei vate e eitou a bilesina vanunua ma tavivine me eitou guale a maulina i muina taliulu taliulu.

## 6

### *Eitou mate pilu e Krai*

<sup>1</sup> De seidei neitou vei sei inade? "Neitou goli a sinusu papaina ne Salemo ni dode mamai sele lei e eitou," nane neitou vei simaido, io?

<sup>2</sup> Boa vuso sele. Eitou tomane a vanunua sou matesi, me eitou litasesi a gunolina sinusu. Me posa matina neitou ogomuli lei a inigogona ie?

<sup>3</sup> Eitou valitole Krai Iesu me eitou guale a maavuvutuna, me na inigogona ieli eitou vuso to valitole a minate minei. Nane amutou ma muada oto i ieli, io?

<sup>4</sup> Na maavuvutuna eitou valitole a minate mine Krai, me Salemo i peilai e eitou pilu e Krai na muina minate. Me na sagalina buo minei oto, Tamane eitou i mailisi e Krai na minate. Maido me eitou tamai neitou asu na maulina alaba.

### *Neitou mauli tamai pilu e Krai*

<sup>5</sup> Eitou valitole Krai me eitou mate tomane ei mate. Mane eitou valitolesi ei, neitou ilisiliu tomane ei ilisiliu.

<sup>6</sup> Eitou muada, lilomumuguna mine eitou i matesi na tauvaleuti pilu e Krai, mina mapulina sagagalina sinusu i pipigo na vovone eitou. Maido me neitou ma muine ete eitou lou tomane a bibi na pipigona mina sinusu,

<sup>7</sup> vuna bibi ei matesi, ei ma valitole etesi a sinusu.

<sup>8</sup> E, eitou mate pilu e Krai, maido me eitou silimuli sele, ne eitou malu tamai pilu e ei.

<sup>9</sup> Eitou muada, Krai ei ilisiliuosi na minate, maido me ei ni ma mate lou oto. Minate i ma isa oto a sagalina lou mina toe-bosene ei.

<sup>10</sup> Ei mate matasa moni ane eitou vuso, me na inigogona ieli ei toegegeli a sagagalina sinusu. Moni seidei ei mauli me ei malu pilu e Salemo.

<sup>11</sup> Tomane moni amutou tamai namutou damutale ve amutou tamai amutou mate me amutou ma ino lou oto matano na sagagalina sinusu. Boa. Amutou valitole Krai Iesu me amutou mauli pilu e Salemo.

<sup>12</sup> Namutou ma itetasetase lei a sinusu ni iteale a vovone amutou, vovo ieli ei mate-mate. Dae a sinusu ni lapuale amutou me namutou ogomuli a masagana pagu mina vovo.

<sup>13</sup> Me namutou ma itetasetase lei a sinusu i iteale a aveavena vovone amutou vuso, dae ne amutou goli a inigogona mamau. Amutou tomane a vanunua ma tavivine sou ilisiliu na minate me sou mauli a muine sou, maido me namutou bilii e amutou oto usino ne Salemo. Me namutou litase Salemo ni iteale a avena vovone amutou vuso, ne amutou goli a inigogona i bilesi.

## 7

<sup>14</sup> Sinusu ni ma mapigogoi ete ni iteale amutou lou, vuna maido seidei amutou ma ino oto matano na binea. Amutou ino matano na dinodo mine Salemo.

*Eitou a vanua na pipigona bilesi*

<sup>15</sup> Eitou ma eili otosi matano na binea, maido me neitou goli a sava? Seidei eitou ino matano na dinodo mine Salemo, maido me nane ei puiale neitou goli a sinusu? Boa vuso sele.

<sup>16</sup> Nane amutou ma muada oto i? Mane amutou bilii e amutou oto na bibi tasa me mu ogomuli a inade minei, ne amutou muina a vanunua na pipigona minei. Tomane moni, mane amutou muina a vanua na pipigona mina sinusu, me ieli ni toe amutou namutou mate. Ue mane amutou ogomulimuli a inade mine Salemo, namutou palea a bilesina vanunua ma tavivine.

<sup>17</sup> Lisa amutou muina a vanunua na pipigona mina sinusu, moni mulimuli Salemo i tau e amutou matano na inade minei, me amutou ogomulimuli kube sele a inade do. Ne ieli neitou toledadangi e Salemo!

<sup>18</sup> Amutou eili tomana sinusu ei papalesi e amutou, moni e Salemo i gualeliu e amutou me ei toe e amutou muina a vanunua na pipigona mina inigogona bilesi.

<sup>19</sup> Eau vei a adetinovona ieli na vea eitou muada iiti i, vuna maido damutatalana mine amutou i ma muada kuba oto a golu eau adeade i. Palapala amutou itetase a avena vovone amutou ei muina bibi na pipigona mine sou a inigogona mumugu ma inigogona i pagu, me amutou goli e sou a inigogona pagu sele. Moni seidei namutou itetase sou a avena vovone amutou ni muina a bibi na pipigona mina inigogona i bilesi, ne amutou palea a vanunua ma tavivine mine Salemo oto me ne amutou muina maolo.

<sup>20</sup> Ilala amutou ino a bibi na pipigona mina sinusu, amutou ma ino oto a bibi na pipigona bilesi.

<sup>21</sup> Moni amutou guale sei golu doana na inigogona amutou goli na ilala do, ei e sou a inigogona seidei amutou maela i? Matana inigogona ieli ei toe a bibi ei mate moni.

<sup>22</sup> Moni Salemo i gualeliuosi e amutou maino na mavovedavutina mina sinusu, me ei toe e amutou palea a bibi na pipigona minei oto. Ne amutou guale a gologolu doana sou odo ne ei. Ei ni toe e amutou palea maolo me ne amutou goli a inigogona ei kale. Me namutou guale a maulina i muina taliuliu taliuliu.

<sup>23</sup> Mapana sinusu ei a minate moni, moni a niabi mine Salemo ei a maulina taliuliu taliuliu maino ne Iesu Krai, Bibi Taula mine eitou.

*Seidei neitou pipigo a inigogona mina liloalabana*

<sup>1</sup> Tamtamaigu, eau bilii a inade ieli ne amutou a vanunua mu muada kuba a binea. Nane amutou muada, ilala bibi ei ino mauili, ei muina matano na binea. Ma ilala ei mate, ei matano na binea boa.

<sup>2</sup> Mane a tavine i taulai me suana ei saboa ino mauili, io binea i palesobe ei pilu e suane ei. Moni mane suane ei mate, io a binea ei ma palesobe etesi e ei.

<sup>3</sup> Mane a bibi ino mauili me susune ei ngolo pilu a bibi tasa sea, ne sou tole e ei a tavine na سوالolona. Moni mane suane ei matesi, io binea do ei ma palesobe etesi e ei. Maido me mane ei tavui lei a bibi tasa sea lou, ei ma goli ete a inigogona سوالolona.

<sup>4</sup> Maido me tamtamaigu, amutou vali-tole a vovone Krai, me na inigogona ieli amutou matesi, me amutou ma ino otosi matano na binea. Seidei amutou ino a abuna mina bibi tasa sea, ei a Bibi iedo i ilisiliu na minate, mine eitou mapale sou a inigogona doana Salemo ei kale.

<sup>5</sup> Ilala eitou saboa ino ogomulimuli a inigogona mina lilomumuguna, binea ei mailisi a masagana pagu na avena vuso mina vovone eitou me eitou goli a sinusu. Me na inigogona ieli eitou mapale a inigogona mina minate.

<sup>6</sup> Moni seidei eitou matesi me eitou litase a gologolu i lapitolesobe eitou odo. Maido ma binea i ma lapitole etesi e eitou. Me seidei binea eitou ogomuli, iedo sou ma niage ete na laulau. Boa. Moni eitou ogomuli a vea alaba mina Maolona Nunu.

*Sinusu i toegegeli e eitou*

<sup>7</sup> Io neitou vei matina? Binea ei a sinusu oto, io? Boa vuso sele. Moni mane a binea i ma maite ete eau maido sei golu ei a sinusu, eau ma muada oto i. Binea i vei maido, "Oo ma isualale lei a gologolu mina vanunua usino."\* Mane a binea i ma vei oto maido, io i ma mapigogoi ete eau na muada a inigogona mina isualena do, ei a inigogona pagu.

<sup>8</sup> Moni a sinusu i poge a vea na inade mina binea do, me ei mailisi a matamatana isualena na lilogu. Mane a binea boa, sinusu ni muina tomane a bibi ei matesi.

<sup>9</sup> Ilala eau saboa muada a binea mine Salemo, eau muigu a mauili. Moni mulimuli a binea mine Salemo i sibatala usinani ne eau, sinusu i ilisi me eau matesi.

<sup>10</sup> Pipigona mina binea ei mina biliina maulina mina bibi. Moni eau ma guale ete a maulina na binea. Boa. Binea ei goli e eau eau mate moni,

\* 7:7 Gualeliuna 20:17

<sup>11</sup> vuna sinusu i poge a vea na binea me ei auala agu, me na inigogona ieli sinusu i valipute eau.

<sup>12</sup> De neitou ade matina a binea? Binea mine Salemo, ei maolo. Ma inade vuso ino na binea, ei tamai ei a golu mine Salemo oto, me ei bilesi me ei doana.

<sup>13</sup> Moni matina? Nane a golu doana do i valipute eau? Boa vuso sele. Sinusu i pipigo na golu doana do me i valiputemate eau. Salemo ei itetase a sinusu i goli a matana inigogona do, vuna ei kale a sinusu ni palea muada, me neitou muada sinusu ei a golu pagu sele. Na inigogona do, binea mine Salemo i mapalemuate a inigogona ivu mina sinusu, ei mavulu me ei pagu sele.

*Sinusu ei iteale a maulina mine eitou*

<sup>14</sup> Eitou muada, binea mine Salemo, ei a golu maino ne Salemo oto. Moni eau a bibi na sinusu, me a sinusu ei papale e eau me eau muigu a bibi na pipigona sabubu minei.

<sup>15</sup> Eau ma muada oto a vuna ivu mina inigogona eau gologoli. Sou a inigogona eau kale mamai na goli, ede eau ma goli ete. Moni sou a inigogona eau ma kale sape ete, ede taliulu eau gologoli.

<sup>16</sup> Moni mane eau goli a inigogona sou iedo eau oto eau ma kale ete, de ieli ei maite i maido a binea mine Salemo ei a golu doana.

<sup>17</sup> Maido me eau oto eau ma goli ete a inigogona mamau sou odo. Boa. Sinusu ei eili lilo minau, ei moni ei goli.

<sup>18</sup> Eau muada, golu tasa doana eili boa na lilogu. Eau ade a masagana pagu minau moni. Ivu, eau kale na goli a inigogona kubaana, moni eau ma mapigogoi ete na goli.

<sup>19</sup> Inigogona doana eau kale na goli, iedolo eau ma gologoli ete. Ma inigogona pagu eau ma kale ete na goli, ede eau gologoli.

<sup>20</sup> Io mane inigogona eau ma kale ete, iede eau goli, iede eau oto eau ma goli ete. Boa. Sinusu eili lilo minau, ei moni ei goli.

<sup>21</sup> Maido me eau ite a matana inigogona ieli ei iteale a maulina minau. Ilala eau kale na goli a inigogona doana, inigogona pagu tamai ei tabesobesobe a veagu.

<sup>22</sup> Ivu, na damutatalana minau, eau kale mamai a binea mine Salemo.

<sup>23</sup> Moni eau ite a binea sea i eili lilo na aveavena vovogu. Ma binea sea do ei maububi ana binea mine Salemo eili na damutatalana minau. Binea sea do, ei a binea mina sinusu, me ei papale eau me ei iteale a aveavena vovogu.

<sup>24</sup> Ai, maule eau! Mavaana ieli ei toegegeli sele a damutatalana minau! Sei ni buloi e eau me eau na veletase a vovo mina minate ie?

<sup>25</sup> Eau toledadangi e Salemo! Na limane Iesu Krai, Bibi Taula mine eitou, ei ni buloi e eau. Maidolo me eau oto ma damutatalana minau vuso i eili matano na binea mine Salemo, moni a lilomumuguna i ino matano na binea mina sinusu.

## 8

*Neitou malu pilu a sagalina mina Maolona Nunu*

<sup>1</sup> Maido me eitou a vanunua ma tavivine eitou valitole Krai Iesu, binea i ma mapigogoi etesi ni vavasa ane eitou lou,

<sup>2</sup> vuna amutou tastasa seidei amutou mine Krai Iesu, ma binea mina Maolona Nunu ei biliili e eitou a maulina, ei taulelesi e amutou na binea mina sinusu ma minate, ma binea do ei ma iteale etesi e eitou lou.

<sup>3</sup> Binea i ma mapigogoi ete ni taulele a sinusu mine eitou, vuna maido lilomumuguna mine eitou i ma isa oto a sagalina mina ogomulina binea. Moni a golu ieli binea i ma mapigogoi ete ni goli, Salemo oto ei toe simaido. Salemo i peltase Natuna oto usinani me ei palea tomane eitou a vanunua mina gunolina sinusu. Ei asu usinani mina taulelena sinusu mine eitou, me na vovone ei oto, Salemo ei vavasa ana sinusu me ei mapuli a sagalina sinusu.

<sup>4</sup> Salemo i toe maido a bilesina inigogona mina binea ni palea na maulina mine eitou, vuna seidei eitou ma asuasu oto na inigogona mina lilomumuguna lisa. Boa. Eitou asuasu na inigogona mina Maolona Nunu.

<sup>5</sup> Vanunua sou asuasu na inigogona mina lilomumuguna lisa, damutatalana mine sou i ogomulimuli a masagana mina lilomumuguna moni. Moni a vanunua sou asuasu na inigogona mina Maolona Nunu, damutatalana mine sou i ogomulimuli a masagana mina Maolona Nunu.

<sup>6</sup> Mane a damutatalana mina bibi i ogomuli a masagana mina lilomumuguna moni, de bibi iedo ei ni mate. Moni mane a damutatalana mina bibi i ogomuli a masagana mina Maolona Nunu, io bibi edo ei ni guale a maulina ma lilomeana.

<sup>7</sup> Masagana mina lilomumuguna ei butuale Salemo, vuna masagana mina lilomumuguna ei ma muina matano oto na binea mine Salemo. Ei ma mapigogoi sele ete ni ogomuli a binea mine Salemo.

<sup>8</sup> Vanunua sou ogomuli a inigogona mina lilomumuguna lisa, vanunua do sou ma mapigogoi ete ne sou goli a inigogona Salemo ei kale.

<sup>9</sup> Moni amutou ma asu otosi na inigogona mina lilomumuguna lisa. Boa. Mane a Nunu mine Salemo ino ne amutou, de seidei amutou asuasu na inigogona mina Maolona Nunu. Moni mane a bibi ei ma isa



oto a Nunu mine Kraiss, ei a bibi mine Kraiss boa.

<sup>10</sup> Sinusu i valiputematesi a vovone amutou. Moni mane Kraiss ei ino lilo ne amutou, de amutou paleasi a billesina vanunua, ma nunune amutou ei mauili a muina.

<sup>11</sup> Salemo i mailisiliu e Jesu Kraiss na minate. Mane a Nunu mine Salemo ei ino lilo ne amutou, de na pipigona mina Nunu mine Salemo ei ni mailisiliu a vovone amutou tamai, vovo iedo ei mina minate.

*Maolona Nunu ei toe eitou palea natatune Salemo*

<sup>12</sup> Maido me tamtamaigu, eitou isa a pipigona neitou maliu usino ne Salemo, maido me neitou ma ogomuli ete a inigogona lilo-mumuguna lisa. Boa vuso sele.

<sup>13</sup> Mane amutou ogomuli a inigogona mina lilomumuguna lisa, ne amutou mate. Moni mane na sagalina mina Maolona Nunu amutou valiputemate sou a inigogona mamau mina vovo, de ne amutou mauili.

<sup>14</sup> Vanunua ma tavivine sou longo a Nunu mine Salemo i maasi kube sou, vanunua ma tavivine do sou e natatune Salemo.

<sup>15</sup> Nunu Salemo ei bilii e amutou odo ei ma toe ete amutou palea tomane sou a vanunua na pipigona sabubu, ne amutou lae lou. Boa vuso sele. Nunu mine Salemo i toe e amutou palea natatune Salemo. Me na sagalina mina Maolona Nunu eitou toletole e Salemo maido, "Aba, Ouma."

<sup>16</sup> Maolona Nunu oto ei buloilo i a nunune eitou me eitou adepalea muada maido eitou eili e natatune Salemo.

<sup>17</sup> De eitou eili e natatune Salemo, me mulimuli neitou guale a golugolu doana Salemo Tamane eitou i gatunasobe a biline eitou, ei a golugolu mine Kraiss, tuane eitou, ei gualesi. Mane seidei eitou tabule a davutina tomane ei tabule, de mulimuli neitou guale a aisa buo ma niugu doana sele pilu e ei.

*Mulimuli neitou guale a mauilina doana sele*

<sup>18</sup> Niugu doana ma aisa buo do ei ni palea muada ane eitou mulimuli, nane ei ni vululusi sele a davutina eitou tabulebule seidei na ilala ie.

<sup>19</sup> Golugolu vuso Salemo i mapale, sou magitalitali a ilala natatune Salemo ne sou palea.

<sup>20</sup> Seidei golugolu vuso ei tabuli maisaba me sou mamaumau, ieli ei ma palea oto na masagana mine sou oto. Boa. Salemo oto ei toe sou muina simaido, ne sou magitali a golu doana Salemo ei kale ni goli le sou.

<sup>21</sup> Na ilala Salemo i vileale, Salemo ei ni mapuli a mavovedavutina do mina mauna seidei ieli, ma golugolu vuso ni doana sele pilu e eitou e natatune Salemo.

<sup>22</sup> Eitou muada, golugolu vuso Salemo ei mapale, sou vuso sou lai a davutina tomane a tavine i kale ni vasusu, i asu mapigogoi seidei.

<sup>23</sup> Eitou tamai eitou tangitangi na lilone eitou. Eitou gualesi a Maolona Nunu, ei tomane a munugana niabi Salemo i bilii e eitou. Moni eitou tamai magitali a ilala Salemo ei ni ademuada maido eitou ino natatune ei, ei a ilala Salemo ei goli a vovone eitou ni palea sea sele.

<sup>24</sup> Salemo i gualeliu e eitou, me seidei eitou silimuli me eitou magitali e ei ni toesesele ivu a golu doadoana ei kale ni bilii le eitou. Mane eitou vei neitou magitali a golu tasa, io eitou muada eitou saboa to guale. Mane a bibi ei gualesi a golu tasa, io posa matina ei magitali lei?

<sup>25</sup> Moni eitou muada, neitou guale ivu a golugolu saboa eitou guale do, maido me neitou toesagaligali a lilone eitou me neitou magitali.

<sup>26</sup> Maolona Nunu tamai ei buloilo i e eitou, eitou ma isa oto a sagalina. Eitou ma muada oto neitou kaka ane sei golu. Eitou tangitangi na lilone eitou moni, me eitou ma mapigogoi ete neitou adepalea i. Na vuna moni ieli Maolona Nunu oto i kakaka mina buloine eitou.

<sup>27</sup> Me Salemo ei iteite a lilone eitou, ei muada a damutatalana mina Maolona Nunu odo, vuna, Maolona Nunu ei ogomuli a damutatalana mine Salemo oto mei kaka mina buloine eitou a vanunua ma tavivine mine Salemo.

<sup>28</sup> Eitou muada, Salemo ei goli a golugolu vuso i pipigo pilu mina toekubena vanunua sou kale Salemo. Ede a vanunua Salemo ei adesi i ni gualeliu e sou mei toleale sou na masagana minei oto.

<sup>29</sup> Vanunua lisa otosi Salemo i adesi i ni gualeliu e sou mei vileale tamai e sou, ne sou palea matana tasa moni tomane Natune ei. Maidolo me Kraiss ei ni muina a matalagu mine sou.

<sup>30</sup> Ma vanunua lisa Salemo ei vileale sou odo, ede ei toleale sou tamai. Ma vanunua ei toleale sou odo, ede ei tole e sou a billesina vanunua. Vanunua ei vate e sou a mauilina doana ma aisa buo minei oto.

*Golu tasa i ma mapigogoi ete ni magilisobe a masagana mine Salemo*

<sup>31</sup> Maidolo me neitou ade matina a golugolu e Salemo i goli iedo? Mane Salemo ei mine eitou, io sei ni butuale eitou?

<sup>32</sup> Salemo ei ma matilei ete Natune ei oto. Boa. Ei peltase ei usinani mina buloine eitou vuso. Mane ei bilii e eitou e Natuna oto, de ei ni bilii e eitou a gologolu vuso i sea tamai.

<sup>33</sup> Salemo i vileale eitou mine ei oto, maido me sei ni vavasa ane eitou? Salemo oto i vate e eitou a bilesina vanunua.

<sup>34</sup> Sei ni vei ne eitou guale a mapa pagu mina sinusu? Krai Iesu ei mate, me ei ilisiliu tamai. Me seidei ei ino na limane Salemo e gata, me ei kakake Salemo ni buloi e eitou.

<sup>35</sup> Krai e kale sele eitou, ma golu tasa boa i mapigogoi ni magilisobe a masagana minei odo usinani ne eitou tastasa. A mavaana ue a davutina ue a toegegeline ue a vitolona ue a kapelabena ue a golu pagu ue a viso na maubina, golu sou ieli ei ma mapigogoi ete ni magilisobe a masagana mine Krai. Boa vuso sele.

<sup>36</sup> Patotona, matana gologolu sou ieli ei palealea le eitou, tomane a Laulau mine Salemo ei vei,

“Amiteu eili a vanunua ma tavivine minio, maido me na ilala taliuliu sou vali-  
putepute amiteu.

Sou ite amiteu tomane a sipsip mina  
valiputena moni.”\*

<sup>37</sup> Moni Krai i kale sele eitou, me sei matana golu ivu ei vululusi sele eitou?

<sup>38</sup> E, Salemo ei kale mamai sele eitou, me eau silimuli ivu maido, golu tasa boa i mapigogoi ni magilisobe a masagana mine Salemo usinani ne eitou. Minate ue a maolina, ue sou a bineanea ue sou a nunu pagu sou sagali, ue a golu seidei ei eili ue a golu ei ni palea mulimuli, ue a matamatana golu i isa a sagalina,

<sup>39</sup> ue a golu muata ue a golu matano, ue a gologolu sea nana maisaba, sou vuso do sou ma mapigogoi ete ne sou magilisobe a masagana mine Salemo usinani ne eitou, a masagana edo ei bilii e eitou maino ne Krai Iesu, Bibi Taula mine eitou.

## 9

### *Pol i lilomuli sele sou e Israel*

<sup>1</sup> Eau a bibi mine Krai, maidolo me eau vei patotona moni, eau ma auala oto. Maolona Nunu ei toe a damutatalana minau i muada, me na lilogu, eau muada i maido inade minau odo ei patotona.

<sup>2</sup> Dinodo buo sele eili minau taliuliu, me eau lilobuu sele me eau damutatala papai.

<sup>3</sup> Eau kale mamai sele Salemo, ni gualeliu e sou tamtamaigu, sou a abune tubutubune Iekop. Maido mane Krai mapigogoi ni ogomuli a masagana minau, eau na kaka me

na tagi e ei ni taulele eau maino na abuna minei, ne tamtamaigu ne sou puisobe a muigu me ne sou guale a maolina.

<sup>4</sup> Vuna maido, sou a abuna mine Israel, Salemo ei tole e sou natatune ei oto. Sou ite tamai a malasana ma sagalina mine Salemo. Salemo ei toe a magilipiluna pilu e sou, me ei bilii e sou a binea. Me ei maite e sou a inigogona mina kinaka, me ei goli e sou a adegatuna usino ne sou.

<sup>5</sup> Salemo ei vileale a tubutubune sou, sou isa a aisa buo ivu. Me na abuna mine sou moni Krai i palea a bibi. Krai ei e Salemo, me ei iteale a gologolu vuso. Me taliuliu taliuliu neitou beilange a aisane ei.

### *Pol i ade a inigogona Salemo ei goli le sou e Israel*

<sup>6</sup> Moni ei ma tomane ete eau damu ve a inade mine Salemo ei buale sabubu. Boa. Eau muada, papaina mina vanunua sou palea na abuna mine Israel, sou ma abuna ivu oto mine Israel.

<sup>7</sup> Neitou ma vei ete maido, “Sou palea na daladalane Abraham, maido me sou vuso ino natatune ei ivu.” Boa. Lisa Salemo ei vei le Abraham maido, “Ne Aisak moni ne eiskusumu ne sou palea.”

<sup>8</sup> Vuna inade do ei maido, sou e selebanini sou palea na daladala moni, sou odo sou e natatune Salemo boa. Selebanini sou palea mina adegatuna mine Salemo, sou isa a aisa tomane abuna mine Abraham odo.

<sup>9</sup> Adegatuna do i vei maido, “Na ilala eau vilealesi, eau na veteliu, me na ilala iedo Sara ei ni isa a natuna bibi.”\*

<sup>10</sup> Me damutale tamai maido natune Rebeka lua sou isa e tamane sulu tasa moni, e Aisak, tubune eitou.

<sup>11-12</sup> Na ilala Rebeka i saboa maalepose a bibaini lua, me sulu ma goli ete a inigogona kubaana ue a inigogona pagu, moni Salemo ei vei le Rebeka maido, “Bibaini ei alaposa pala, ei ni muina a bibi na pipigona mina bibaini ei alaposa mulimuli.”† Maidolo me Salemo ei maite e eitou ve ei vileale a bibi na masagana minei oto.

<sup>13</sup> Ei tomane a Laulau mine Salemo ei ade i, “Eau kale Iekop, moni eau ma kale ete Iso.”‡

<sup>14</sup> Maido me neitou vei a sava? Nane neitou vei Salemo ei goli a inigogona i ma bilesi oto, io? Boa vuso sele.

<sup>15</sup> Salemo i vei le Moses maido, “Mane eau kale na dode a bibi tasa, io eau na dode ei. Mane eau kale na lilomuli a bibi tasa, io eau na lilomuli e ei.”§

<sup>16</sup> Maidolo ma ilala Salemo ei vileale a bibi, ielili ei ma palea oto na masagana

\* 8:36 Laulau na Inala 44:22    \* 9:9 Sinokona 18:10    † 9:11-12 Sinokona 25:23    ‡ 9:13 Malakai 1:2-3    § 9:15 Gualeliuna 33:19

mina bibi me na pipigo tivulana minei. Boa. Ei palea na dinodo mine Salemo moni.

<sup>17</sup> Ma Laulau mine Salemo ei ade e Salemo i vei ana mapana mine Isip maido, "Eau toe e oo palea a mapana, ne eau na maite oo a sagalina buo minau, me sou a vanunua ma tavivine ne sou ademuada a aisa buo minau na avena vuso mina magamaga."\*

<sup>18</sup> Maido me eitou muada, mane Salemo i kale ni dode a bibi tasa, io ei ni dode ei. Mane ei kale ni toe a damutatalana mina bibi tasa i sobo, io ei ni goli maido taliuliu na masagana minei oto.

<sup>19</sup> Moni nane amutou sanii namutou vei le eau maido, "Mane Salemo ei goli maido, io posa matina ei vavasa ane eitou na inigogona pagu eitou goli? Sei mapigogoi ni saukiki a masagana mine Salemo?"

<sup>20</sup> Oo sei bibi no lilotivula ane Salemo na inigogona ei goli? Nana taogo na magamaga i ma mapigogoi ete ni vei maido ana bibi i vivie ei, "Posa matina oo vivie eau maido?"†

<sup>21</sup> Bibi na viviena taogo ei guale a avena magamaga tasa me na masagana minei oto, ei vivie a taogo tasa i malasa mina pipigona doana, ma taogo tasa i sabubu mine sou a matana pipigona sea. Nane a inigogona ieli ei ma bilesi oto, io?

<sup>22</sup> Salemo tamai ei goligoli maido. Ei kale ni mapale muade a lilotivulana minei, ne sou a vanua vuso muada a sagalina buo minei. Taogona vuso mina gualena mapa pagu sou masusuluosi mina toegegeline, moni ei itetase sou mei magitali tabaa a valipolene sou.

<sup>23</sup> Vuna ei kale a vanunua vuso ne sou muada a aisa buo ma sagalina minei, a vanua do sou a vanua Salemo ei kale ni bilii e sou a dinodo minei. Lisa ei masusuliosi a taogo a magamaga sou odo ne ei ni bilii e sou a niugu doana ma aisa buo.

<sup>24</sup> Ede eitou a vanunua ma tavivine Salemo ei toleale. Me eitou a abuna mine Iuda moni boa, sou a abuna sea tamai.

<sup>25</sup> Na laulau mine profet Hosea, Salemo ei vei maido,

"Vanunua ma tavivine do lisa sou a abuna minau boa, eau na tole e sou a abuna minau.

Ma abuna eau ma kale ete sou odo, eau na kale sele sou.‡

<sup>26</sup> Me na aubu eau vei ane sou,

'Amutou abuna vanunua ma tavivine minau boa,' na abuna odo moni eau na vei,

'Amutou e natatune Salemo ei muina taliuliu.'§

<sup>27</sup> Me Aisaia ei adepalea ane sou e Israel maido,

"Mane sou a vanunua ma tavivine mine Israel sou papaina sele tomane a magamaga mina mado,

Bibi Taula ni gualeliu a abuna baini moni.

<sup>28</sup> Bibi Taula i veiosi ane sou a vanunua ma tavivine na magamaga maido

saga i ei ni malaitabe sele sou."\*

<sup>29</sup> Lisa Aisaia tamai ei vei maido,

"Mane Bibi Taula ei isa a Sagalina Vuso i ma litase ete a abuna baini mine eitou i muina,

ne eitou mamau tomane Sodom me Gomora i mamau."†

*Sou e Israel sou ma isa oto a silimulina*

<sup>30</sup> De ne eitou vei matina? Sou a abuna sea sou ma pipigo tivula oto ne sou palea a bilesina vanunua ma tavivine, moni sou paleasi a bilesina vanunua ma tavivine mina silimulina.

<sup>31</sup> Me sou e Israel sou pipigo tivula a ogomulina binea mine Moses ne sou palea a bilesina vanunua ma tavivine, moni sou e Israel sou ma palea oto a bilesina vanunua ma tavivine,

<sup>32</sup> vuna sou ma ogomuli ete a inigogona mina silimulina, me sou damutale maido na pipigotivulana mine sou oto, ne sou palea a bilesina vanunua ma tavivine. Vatu mina niubina ubune eitou, ei ubi a ubune sou me sou bosa.

<sup>33</sup> Laulau mine Salemo ei ade a golu ie maido,

"Longe, eau na tau a vatu tasa mina niubina ubuna vanunua me sou bosa na loena Saion.

Vanunua sou silimuli e ei, sou ma mapigogoi ete ne sou guale a maelana."‡

## 10

*Sou e Israel sou ma muada oto a inigogona mine Salemo i gualeliu a vanunua ma tavivine*

<sup>1</sup> Tamtamaigu, lilogu i kale sele ne Salemo ni gualeliu e sou e Israel, me taliuliu eau kake Salemo a golu ie.

<sup>2</sup> Eau muada sele sou me eau veipale maido, sou sagali sele a ogomulina inigogona Salemo i kale, moni sou ma muada kuba oto a masagana ivu mine Salemo.

<sup>3</sup> Sou ma ogomuli ete a inigogona Salemo i vileale mina vinatene eitou a bilesina vanunua, me sou kale ne sou palea a bilesina vanunua na sagalina mine sou oto.

<sup>4</sup> Eitou muada, Kraisi ei mapuliosi a binea mine Moses, ne sou a vanunua ma tavivine

\* 9:17 Gualeliuna 9:16 † 9:20 Aisaia 29:16, 45:9 ‡ 9:25 Hosea 2:23 § 9:26 Hosea 1:10 \* 9:28 Aisaia 10:22-23

† 9:29 Aisaia 1:9 ‡ 9:33 Aisaia 8:14, 28:16

vuso sou silimuli e Kraiss me ne sou palea a bilesina vanunua ma tavivine na matane Salemo.

<sup>5</sup> Moses ei niage a inade ana vanunua ma tavivine sou damu maido mane sou ogomuli a binea, Salemo ni vate sou a bilesina vanunua ma tavivine. Ei vei maido, "Bibi ei ogomuli a binea vuso, ei ni mauli pilu i taliuliu."\*

<sup>6</sup> Moni a bibi ei ogomuli a inigogona mina silimulina me Salemo i vate ei a bilesina bibi, ei ogomuli a inade ieli, "Dae ne amutou vei le amutou oto maido, 'Sei ni asu uata mina avena mine Salemo?' "† Ede tomane amutou kale namutou lapualeliu lei e Kraiss utano.

<sup>7</sup> "Ue dae ne amutou ade maido, 'Sei ni asu utano na aubu mine sou so matesi?' "‡ Ede tomane amutou kale namutou beilange liu e Kraiss na muina minate.

<sup>8</sup> Moni a vuna mina inade ieli ei maido, "Inade ei agavi sele ne amutou, lilo na lilone amutou me na asene amutou."§ Iede a inade mina silimulina amiteu adepalea i.

<sup>9</sup> Mane oo veipale mina asemu ve Iesu ei e Bibi Taula, me na lilomu oo silimuli ve Salemo ei mailisiliu ei na minate, de Salemo ni gualeliu e oo.

<sup>10</sup> Mina lilone eitou eitou silimulimuli me Salemo ei vate eitou a bilesina vanunua ma tavivine. Me na asene eitou eitou veipalele a silimulina mine eitou me Salemo ei gualeliu e eitou.

<sup>11</sup> Laulau mine Salemo ei vei maido, "Vanunua sou silimuli e ei, ne sou ma guale ete a maelana."\*

<sup>12</sup> Ei ma sea oto ne Iuda me Grik. Bibi Taula tasa moni ei e Bibi Taula mine eitou vuso. Me ei maibalave sele a vanunua ma tavivine vuso sou toleale ei mina buloine sou.

<sup>13</sup> Maido me, "A vanunua ma tavivine vuso sou toleale Bibi Taula, ei ni gualeliu e sou."†

<sup>14</sup> Moni mane sou ma silimuli ete ei, posa matina ne sou tagi e ei a buloine sou? Me mane sou ma longe ete a inadene ei, posa matina ne sou silimuli e ei? Me mane tasa mine sou boa ei veipale a inade usino ne sou, posa matina ne sou longe?

<sup>15</sup> Me mane sou ma peltase ete a vanunua usino na veipalena inade, posa matina ne sou veipale? Laulau mine Salemo i vei maido, "Doana sele na ububune sou so maasi a malongolongona kubaana usino na vanunua ma tavivine."‡

*Sou e Israel sou ma guale ete a malongolongona kubaana*

<sup>16</sup> Moni papaina ne sou a vanunua ma tavivine sou ma ogomuli ete a malongolongona kubaana. Aisaia ei vei maido, "Bibi Taula, sei silimuli a inade ieli amiteu veipalele sou?"§

<sup>17</sup> De eitou muada, eitou longe a inade mine Salemo me ieli ei mailisi a silimulina. Ma inade eitou longe do, ei palea na inade mine Kraiss.

<sup>18</sup> Moni eau tagu maido, nane sou ma longe ete a malongolongona kubaana ieli? Boa. Sou longesi. Eitou muada,

"Vanunua ma tavivine mina aveavena vuso na magamaga sou longesi a baligolune sou.

Ma inade ne sou i vele pea mina sinuana magamaga."\*

<sup>19</sup> Me eau isa a tinagu tasa tamai. Nane sou e Israel sou ma muada oto a vuna inade ieli? Boa. Sou muadasi i. Palapala ne amutou damutale a inade Moses ei veipale, "Eau na guale a abuna sea sou a vanunua ma tavivine minau boa,

me na inigogona ieli eau na goli e amutou liloegelu me mu sinoa."†

<sup>20</sup> Me Aisaia tamai ei vei sagali maido, "Vanunua sou ma tilotilo oto eau, sou pogesi e eau.

Eau palea le sou a vanunua sou ma tagutagu oto e eau."‡

<sup>21</sup> Moni Aisaia ei damutale sou e Israel me ei ade maido,

"Na malada vuso eau pee a limagu mea magitali a gualeliuna vanunua ma tavivine sou toevautauta me sou saukiki a inadegu."§

## 11

*Salemo ei dode a abuna baina tasa mine Israel*

<sup>1</sup> Io eau tagu maido, nane Salemo ei lametasesi e sou a vanunua ma tavivine minei? Boa vuso sele. Eau tamai eau a bibi mine Israel. Eau tamai tasa mina abuna tubutubuna mine Abraham. Eau a bibi na abuna mine Benjamin.

<sup>2</sup> Abuna ieli lisa oto Salemo i veiosi ne sou muina a abuna vanunua ma tavivine minei, ei ma lametase ete sou. Nane amutou ma muada oto i a mapamulina mine Elaiia ino na Laulau mine Salemo? Elaiia ei kaka usino ne Salemo me ei vavasa ane sou e Israel. Ei vei maido,

\* 10:5 Pipigona mina Prist 18:5 † 10:6 Binea 30:13 ‡ 10:7 Binea 30:13 § 10:8 Binea 30:14 \* 10:11 Aisaia

28:16 † 10:13 Ioele 2:32 ‡ 10:15 Aisaia 52:7 § 10:16 Aisaia 53:1 \* 10:18 Laulau na Inala 19:4 † 10:19

Binea 32:21 ‡ 10:20 Aisaia 65:1 § 10:21 Aisaia 65:2

\* 11:3 1 Mapana 19:10,14

<sup>3</sup> “Bibi Taula, sou valiputematemate sou a profet minio. Sou lope a poso na niabi minio. Me eau vululu moni eili, me seidei sou kale ve ne sou valipute eau tamai.”\*

<sup>4</sup> Moni e Salemo ei adeliu e sei inade usino ne ei? Ei vei maido, “Vanunua savuluvulu padilua (7,000) minau saboa ino, iede a vanunua sou ma totopatuliale ete salemo auala e Bal me sou ma kaka oto ane ei.”†

<sup>5</sup> Simaido moni seidei na ilala ieli tamai a avena abuna ino, Salemo i dode sou me ei vileale sou minei oto.

<sup>6</sup> Ei dode sou mei vileale sou. Ei ma damutale ete a pipigona sou goli mei vileale sou. Mane sou goli a pipigona me Salemo i vileale sou, io a golu iedo eitou ma tole ete a dinodo, ei a dinodo ivu boa.

<sup>7</sup> Maido me neitou vei matina? Golu ieli sou e Israel sou pipigo sagali a gualena, iede sou ma guale ete. Salemo ei vileale a vanunua ma tavivine sanii moni mina abuna mine sou, me sou guale. Me sou sea sanii, a lilone sou sobosi,

<sup>8</sup> tomana Laulau mine Salemo i vei, “Salemo ei toe a damutatalana mine sou i maisaba.

Ei goli a matane sou i tunuui, ma tagilane sou ma mapigogoi ete ne sou longe a inade.

Me sou muina maido asu mapigogoi seidei.”‡

<sup>9</sup> Me Devit tamai ei ade maido,

“Ilala sou viepilu mina inani taula, eau kale a ilala li ni palea a golu mina toegege-line sou, tomana mai i sautole a kalia me tomana lulu sou bosa i, me tomana vatu mina niubina ubune sou, me tomana adovena mapa pagu usino ne sou.

<sup>10</sup> Toe a matane sou ni tunuui, me ne sou ma mapigogoi ete ne sou gegemu lou.

Me toe a lamane sou ni makoko, ne sou muine sou simaido taliuliu.”§

#### *Salemo i gualeliu e sou a abuna sea*

<sup>11</sup> Eau tagu maido. Ilala sou e Israel sou bosa, nane sou mamau me sou buale sele? Boa vuso sele. Sou lametase Salemo, me na vea li Salemo ei gualeliu e sou abuna sea. Salemo ei kale sou e Israel ne sou ite a inigogona kubaana li ei goli usino ne sou a abuna sea me ne sou isu ane sou.

<sup>12</sup> Ilala sou e Israel sou lametase Salemo, Salemo ei buloi mamai sele a vanunua ma tavivine vuso na magamaga. Ma ilala sou e Israel sou itetase a inigogona mine Salemo, Salemo ei goli a inigogona kubaana sele usino ne sou a abuna sea. Maido me mane Israel vuso sou veteliu lou usino ne Salemo, eitou muada Salemo ei ni goli a inigogona

kubaana mamau sele usino ne sou a abuna vanunua ma tavivine vuso.

<sup>13</sup> Io seidei eau vei ane amutou a abuna sea. Salemo ei vileale eau a aposel balivua ne amutou, me eau mongemonge sele a pipigona ieli eau goli,

<sup>14</sup> vuna eau kale na mailisi a damutatalana mine sou a abuna tasa minau ne sou isu ana inigogona kubaana vuso Salemo ei goli le amutou. Me na inigogona li eau kale na gualeliu e sanii mine sou.

<sup>15</sup> Ilala Salemo ei taulele sou e Israel, ei toe a vanunua ma tavivine mina magamaga sou palea lilo tasa pilu e ei. Maido me mane Salemo i gualeliu e sou e Israel, eitou muada ei ni mailisiliu a vanunua ma tavivine sou matesi na minate.

<sup>16</sup> Mane a munugana ulalu mina vit sou bilii e Salemo tomane a niabi ei maolo, io a ulalu vuso do sou tamai maolo. Me mane a aana obu ei maolo, io a lalalana tamai maolo.

<sup>17</sup> Sou e Israel sou tomane a obu a oliv tasa doana, me Salemo ei sagilotetase a lalana sanii. Me amutou a abuna sea amutou tomane a lalalana obu a oliv sabubu mina tibulu, me Salemo i guale amutou me ei madamsosoe amutou mina obu a oliv doana mina gualena muina lalana ei sagilote do. Seidei amutou gualeale a buluna aana obu oliv doana moni.

<sup>18</sup> Maido me ei ma mapigogoi ete amutou damu ve amutou doana sele me amutou vululusi e sou a lalana ivu mina obu odo. Ne amutou damutatale kube. A lalane amutou ma biliilii ete a buluna usino na aana obu. Boa. Aana do ei biliilii a buluna usino ne amutou.

<sup>19</sup> Moni nane namutou ade maido, “Salemo ei sagilote a lalalane sou ieli, vuna ei ni madamsosoe amiteu na muine sou.”

<sup>20</sup> Ivu, sou ma silimuli ete, maido me Salemo ei sagilote sou. Me amutou silimuli, maido me amutou ino doana. Maido me amutou tilale, dae ne amutou toebuebue amutou oto. Kubaana ne amutou lae.

<sup>21</sup> Damutale. Lisa, Salemo ei ma itetase ete sou a lalana ivu ne sou muina. Tomane moni, mane amutou toevautauta, ei ni ma itetase ete amutou tamai.

<sup>22</sup> Ne amutou damutale kube, Salemo ei goli a inigogona doana ma inigogona mavovedavutina tamai, maido me mane vanunua sou veletase a vea minei, ei ni toegegeligeli e sou. Moni mane amutou magili sagali na inigogona doana minei, ei ni goli a inigogona doana usino ne amutou. Mane boa, ei ni valiutitase e amutou tamai.

<sup>23</sup> Lalalana sea lisa ei valiuti iodo, moni mane sou silimuli, io Salemo ei

† 11:4 1 Mapana 19:18    ‡ 11:8 Binea 29:4; Aisaia 29:10

§ 11:10 Laulau na Inala 69:22-23

madamsosoe liu e sou tamai na obu. E, Salemo i mapigogoi ni madamsosoe liu lei e sou.

<sup>24</sup> Amutou muada, lisa amutou eili a lalana obu a oliv mina tibulu, me Salemo ei valiuti e amutou me ei madamsosoe amutou na obu a oliv doana, ede ei ma obu oto mine amutou bilesi. Maido me ivu sele, ei mapigogoi ni guale a lalalana obu oto ieli me ei ni madamsosoe liu e sou mina obu palapala sou ino i.

*Dinodo mine Salemo usino na vanunua ma tavivine vuso*

<sup>25</sup> Tamtamaigu, dae ne amutou damu e amutou isa a muadana buo sele. Eau kale ne amutou muada a inade tasa i ovu, ei maido. Lilone sou ma damutatalana mina abuna sanii mine sou e Israel i sobosi, me ne sou muina simaido i asu mapigogoi na ilala vanunua ma tavivine mina abuna sea sou mavoni sele a savuluna do Salemo ei vilealesi.

<sup>26</sup> Me na vea do Salemo ei ni gualeliu e sou e Israel, tomana Laulau mine Salemo ei vei, "Bibi mina buloine sou e Israel, ei ni ilisi ne Ierusalem mei ni asu usinani, mei ni toe a vanunua ma tavivine vuso mina abuna mine Iekop ne sou litase a inigogona mina saukikina inade mine Salemo.

<sup>27</sup> Me na ilala eau mapuli sele a sinusu vuso mine sou, eau na goli a magilipiluna pilu e sou.\*

<sup>28</sup> Sou e Israel sou lametase a malongolongona kubaana mine Iesu, maido me sou ino tomane a butu mine Salemo, jede ei buloi e amutou a vanunua ma tavivine mina abuna sea. Moni lisa otosi Salemo ei vileale sou a vanunua ma tavivine minei, me ei kale sou oto. Ei damutale sou e tubutubune sou mei goli simaido.

<sup>29</sup> Mane Salemo i toleale a vanunua ne sou asu usinani minei, me ei bilii a golugolu doana usino ne sou, io mulimuli ei ni ma sauvule ete a damutatalana minei.

<sup>30</sup> Lisa amutou a abuna sea, amutou saukikiki a inade mine Salemo, moni seidei sou e Israel sou saukiki a inade, me na vea li amutou guale a dinodo mine Salemo.

<sup>31</sup> Tomane moni, seidei sou e Israel sou saukiki a inade mine Salemo, moni na dinodo amutou guale do, seidei sou tamai mapigogoi ne sou guale a dinodo mine Salemo.

<sup>32</sup> Salemo i itetase a inigogona saukikina inade ni muina ne sou, vuna ei kale ni maite e sou a dinodo minei. Neitou beilange a aisane Salemo,

<sup>33</sup> Ai, sou a inigogona doana mine Salemo ma damutatalana ma muadana minei i vonu sele, me ei mutu sele tomane a tiana autu!

Eitou a vanunua ma mapigogoi sele ete neitou poge a vuna damutatalana vuso minei.

Eitou ma mapigogoi sele ete neitou ogo-muli vuse a vea minei.

<sup>34</sup> Tomane a inade ino na Laulau mine Salemo, "Sei muadasi a damutatalana mine Bibi Taula?

Sei bilii a damutatalana usino ne ei?"†

<sup>35</sup> Me "Sei bilii pale a golu usino ne Salemo me ne Salemo ni bilii liu a golu usino ne ei?"‡ Boa vuso sele.

<sup>36</sup> Salemo oto ei mapale a golugolu vuso, me ei a vuna golugolu vuso.

Ma golugolu vuso ei minei tasa moni. Eitou neitou beilange a aisane ei taliliu taliulu. Moliana.

## 12

*Neitou bilii a vovone eitou usino ne Salemo tomane a niabi*

<sup>1</sup> Tamtamaigu, eau damutale a dinodo taula mine Salemo me eau veipale sagali usino ne amutou maido, ne amutou oabi a vovone amutou usino ne Salemo tomane a niabi i mauli me maolo Salemo ei kale. Ieli a vea mina totpatulialena pilu a nunu mine amutou.

<sup>2</sup> Me amutou ma asuasu lou na matana tasa moni tomane sou a vanunua ma tavivine na magamaga ieli. Boa. Nosi ana Salemo ni toe a damutatalana mine amutou ni palea alaba ma inigogona mine amutou ni palea muada sele tamai. Maidolo me ei mapigogoi ne amutou muada iiti a masagana minei. Me ne amutou muada a inigogona doana ma inigogona Salemo ei kale sele ma inigogona i patotona mei bilesi vuso.

*Ne eitou pipigo na niabi Salemo ei bilii e eitou*

<sup>3</sup> Na dinodo minei, Salemo i vileale eau mina gunolina pipigona minei, maido me eau bilii e amutou vuso tastasa a inade. Amutou ma damutaletale lei a muadana ma inigogona mine amutou i vululusi e sou sanii. Boa. Ne amutou vilemuliale iiti a inigogona mine amutou oto me mu damutatala bilesi na matamatana silimulina Salemo ei bilii e amutou.

<sup>4</sup> Eitou muada, a vovo tasa ei isa a madumaduna makuba, me sou a maduna do sou ma goli ete a pipigona tasa moni.

<sup>5</sup> Tomane moni maido eitou tamai eitou a vanunua ma tavivine makuba, moni lilo ne

\* 11:27 Aisaia 59:20-21, 27:9 † 11:34 Aisaia 40:13 ‡ 11:35 Iop 41:11

Krais eitou ino a vovo tasa moni. Me eitou vuso tastasa eitou ino e tamaine sou seasea.

<sup>6</sup> Na dinodo minei, Salemo ei bilii e eitou a niabi seasea. Mane a bibi tasa ei isa a muadana mina veipalena inade tomane a bibi na malonglongana, io ei ni veipale a inade mapigogoi a matailala na silimulina minei.

<sup>7</sup> Mane a bibi tasa ei isa a muadana mina buloina vanunua ma tavivine usino, io ei ni goli iiti a pipigona mina buloine sou. Mane a bibi ei isa a muadana mina pipigona matetengina, io ei ni goli iiti a pipigona matetengina.

<sup>8</sup> Mane a bibi ei isa a muadana mina masagalina lilo ma damutatalana mina vanunua, io ei ni goli iiti a pipigona mina masagalina lilone sou ma damutatalana mine sou. Mane a bibi ei iabi a golugolu mina buloina vanunua ma tavivine sou boto, io ei ni bilii e sou makuba. Mane a pipigona minei ei a niitealena a vanunua ma tavivine, ei ni sagali a pipigona itealalena minei. Mane a bibi ei lilomuli e sou usino me ei buloi e sou, ei ni mongemonge me ei ni buloi e sou.

*Ne eitou kale sele tamtaine eitou*

<sup>9</sup> Inigogona kinale ei ni patotona moni. Ne amutou lametase sele a inigogona pagu, me ne amutou valitole sele a inigogona doana.

<sup>10</sup> Ne amutou bilii a lilone amutou usino na vanunua ma tavivine mine Salemo, me mu kale sele sou tomane tamtaine amutou sele. Ne amutou tade pale sou tomane amutou tade amutou oto.

<sup>11</sup> Ne amutou ma balebale lou a pipigona me mu longo a Maolona Nunu ni mailisi e amutou ne mu goli a pipigona mine Bibi Taula.

<sup>12</sup> Amutou silimulimuli me mu magitalitali e Bibi Taula ei ni toekube amutou, maido me namutou mongemonge. Mane a mavaana i palea le amutou, io ne amutou magili sagali. Me ne amutou kaka na ilala taliuliu.

<sup>13</sup> Mane a vanunua ma tavivine sanii mine Salemo sou boto a golugolu, io ne amutou buloi e sou. Mane a mosi sou sibitala le amutou, io ne amutou iteale kube sou.

<sup>14</sup> Mane a vanunua sou toegegeli e amutou, io ne amutou kake Salemo ni maibalave sou. E, ne amutou kake ei ni toekube sou. Amutou ma kakaka lou ne ei ni toegegeli e sou.

<sup>15</sup> Ne amutou monge pilu a vanunua sou mongemonge. Me namutou tangi pilu a vanunua sou tangitangi.

<sup>16</sup> Ne amutou lilo tasa pilu a vanunua ma tavivine tastasa. Amutou ma damutaletale lei ve namutou ino a bibi buo. Boa. Ne amutou mongemonge moni pilu a vanunua sabubu tamai. Amutou ma beilangelange lei a aisane amutou oto me amutou vei, "Eau moni eau isa a muadana."

<sup>17</sup> Mane sou goli a inigogona pagu usino ne amutou, io amutou ma maliuliu lei a inigogona pagu usino ne sou. Boa. Taliuliu ne amutou damutale a gunolina inigogona i doana na matane sou a vanunua.

<sup>18</sup> Amutou oto amutou ma damutaletale lei a maisinoana ma maubina. Taliuliu ne amutou tilo a vea mina muina lilo tasa pilu a vanunua vuso.

<sup>19</sup> Tamtamaigu ivu, amutou oto amutou ma adovedove lei a inigogona pagu sou goli le amutou. Nosi ana Salemo ni lilotivula ane sou. Amutou muada, a Laulau mine Salemo ei isa a inade maido, "Adovena inigogona pagu, iede a pipigona minau. Eau oto eau na maliu a inigogona pagu mine sou mea na toegegeli e sou."\*

<sup>20</sup> Moni, "Mane a butu minio ei vitolo, io o no bilii e ei a gona inani.

Mane ei mate a malouna, io o no bilii e ei a nanu.

Mane oo goli maido, o no toe e ei ni maela sele a inigogona pagu minei."†

<sup>21</sup> O no ma itetatase lei a inigogona pagu ni vululusi e oo. Boa. O no goli a inigogona doana me oo no taupui a inigogona pagu.

## 13

*Neitou matano moni ana vanua na itealena*

<sup>1</sup> Vanunua vuso ne sou matano moni ana vanua na itealena. Eitou muada, a bibi na itealena ei ma palea sabubu oto. Boa. Pipigona vuso na vanua na itealena ei palea na limane Salemo moni. Salemo oto ei tau e sou me sou muina simaido.

<sup>2</sup> Maido ma vanunua sou saukiki a inade na vanua na itealena, sou longetase a inade na vanua Salemo oto ei tau mina pipigona mine sou. Ma vanunua sou goli maido, sou ne sou guale a mapa pagu na inigogona sou goli.

<sup>3</sup> Vanua na itealena sou ma ino oto mina toenilaena vanunua sou goli a inigogona doana. Sou ino mina toenilaene sou a vanunua sou goli a inigogona pagu. Maido me mane o ma kale ete no lae a vanua na itealena, io oo no goli moni a inigogona doana, me ei ni beilange a aisamu.

<sup>4</sup> Bibi na itealena ei a bibi na pipigona mine Salemo, mina itealene oo me mina gunoline oo no ugu kuba. Moni mane o goli

\* 12:19 Binea 32:35 † 12:20 Niugugu Doana 25:21-22

a inigogona pagu, io o no lae. O muada, bibi na itealena ei ma lapitole sabubi ete a viso. Ei a bibi na pipigona mine Salemo, mina adovena mapa pagu ana bibi ei goli a inigogona pagu.

<sup>5</sup> Maido me eitou neitou matano na vanua na itealena. Me neitou ma laelae moni lou a mapa pagu me ne eitou ogomuli a inadena. Boa. Neitou muade a lilone eitou oto tomene a inigogona ie i bilesi, maido me eitou ogomuli.

<sup>6</sup> Vuna moni ieli amutou lange a takis tamai, vuna sou a vanunua na itealena binea sou ino a vanunua na pipigona mine Salemo, me taliuliu sou sagali a itealena pipigona Salemo ei bilii e sou.

<sup>7</sup> Sei golu namutou oabi ana vanunua usino, io namutou oabi ane sou. Ne amutou oabi a matamatana takis usino na bibi mina gualena takis. Me mane amutou matano na bibi tasa, io namutou matano moni minei. Me mane a bibi ei a bibi buo, io namutou tade ei.

*Ne eitou kale sele sou a vanunua ma tavivine seasea*

<sup>8</sup> Amutou ma itetatase lei a ginau ne amutou tasa ni muina. A ginau tasa moni ieli ei ino taliuliu, ei a ginau mina nibina lilone eitou usino ne sou seasea, vuna maido bibi ei bilii a lilone ei usino na bibi sea ei ogomuli ivu a binea.

<sup>9</sup> Eitou muada, binea ei vei maido, "Amutou ma valiputematemate lei a vanunua ma tavivine. Amutou ma paaaliali lou. Amutou ma isualale lei a golugolu mina vanunua seasea. Amutou taulalaina, amutou ma goligoli lei a inigogona sualolona."\* Sou a binea li, ma binea vuso sou ino tamai, sou vuso ino lilo na inade tasa ie, "Oo no kale sele sou seasea tomene oo kale oo oto."†

<sup>10</sup> Bibi ei bilii a lilone ei usino na vanunua seasea, ei ma goligoli ete a inigogona pagu ane sou. Maido ma bibi ei bilii a lilone ei usino ne sou seasea, ei ogomuli iiti a binea vuso.

*Neitou labetole a galiau mina muada*

<sup>11</sup> Amutou muadasi i seidei eitou ino i ei a ilala ne amutou lutu na ngunolo me mu ilisi. Amutou muada, na ilala eitou palea a vanunua ma tavivine mina silimuline Krai, io a ilala mine Salemo ei kale ni gualeliu e eitou, ei ino saboa bulago, moni seidei a ilala li ei agaviosi.

<sup>12</sup> Lodo i bisii moni ni pulu, me ei agaviosi ni malada. Maido me kubaana ne eitou veletase a inigogona tunuui, me neitou kai a galiau mina muada.

<sup>13</sup> Neitou asu bilesi tomene a bibi ei asu na oaso. Neitou ma toebibibi lei e eitou me neitou ma matalilili lou. Neitou ma goligoli lei a inigogona sualolona me neitou ma gele maisabasaba lou na inigogona i mumugu. Neitou ma maisinoa maisabasaba lou me neitou ma lilogegelugelu lou ana vanunua seasea.

<sup>14</sup> Namutou valitole Bibi Taula Iesu Krai tomene amutou kai a kinainai mine amutou. Me amutou ma ogomulimuli lei a masagana mamau na vovo.

## 14

*Neitou ma vilemulialale lei e tamta-mainie eitou*

<sup>1</sup> Bibi ei silimuli, moni a silimulina minei i ma sagali oto, bibi ieli ne amutou guale ei usinani. Moni namutou ma maububi lou a inade pilu e ei a matamatana golugolu eitou ma muada kuba oto i.

<sup>2</sup> Bibi tasa ei sagali a silimulina, ei aaniani a golugolu vuso. Moni a silimulina mina bibi sea ei ma sagali oto, maido me ei ma aniani ete a golu vivi.

<sup>3</sup> Ma bibi ei aniani a golugolu vuso, ei ni ma damutale gegelugelu lou ana bibi ei ma aniani ete a golu vivi. Ma bibi ei ma aniani ete a golu vivi, ei ni ma damutaletale lei a bibi ei aniani a golugolu vuso ei goli a sinusu. Boa. Salemo ei guale tamai a bibi iedo.

<sup>4</sup> Oo e sei me o no vilemuliale a inigogona mina bibi na pipigona mina bibi sea? Mane ei magili sagali a pipigona minei ue ei bosa, iede a golu mine Bibi Buo minei oto. Moni ei ni magili sagali, vuna maido Bibi Taula oto i mapigogoi ni masagali e ei mei ni mamagili sagali e ei.

<sup>5</sup> Bibi tasa ei damutale ve a malada tasa ei buo lou mei vululusi e sou a malada sanii. Ma bibi sea i damutale ve a malada vuso ei a matana tasa moni. Moni a vanunua vuso tastasa ne sou muada kuba e sei damutatalana ei bilesi mina lilone sou.

<sup>6</sup> Bibi ei tau a malada tasa tomene a malada buo mina kinaka, bibi iedo ei damutaletale Bibi Taula me ei goli simaido. Ma bibi ei aniani a golugolu vuso, a bibi iedo ei damutaletale Bibi Taula me ei aani, vuna maido ei toledadangi e Salemo me ei aani. Ma bibi ei ma aniani ete a golugolu vuso, ei damutaletale Bibi Taula mei vavae e ei a gona inani. Me ei tamai ei vate kubaana ane Salemo.

<sup>7</sup> Eitou muada, balivua ne eitou bibi tasa ei ma damutaletale ete a maulina minei ei a golu minei oto. Ma bibi tasa ei ma damutaletale ete a minate minei ei a golu minei oto. Boa.

\* 13:9 Gualeliuna 20:13-15,17 † 13:9 Pipigona mina Prist 19:18



<sup>8</sup> Mane eitou mauili, ei a golu mine Bibi Taula. Me mane eitou mate, ede tamai ei a golu mine Bibi Taula. Maido me mane eitou mauili, ue eitou mate, eitou mine Bibi Taula moni.

<sup>9</sup> Me Krai tamai ei mate mei gualeliu a maulina lou ne ei ni Bibi Taula mine sou so matesi me mine sou so mauili.

<sup>10</sup> Oo, posa matina o vilemuliale a inigogona mine tamaimu mo adegegelu ane ei? Me oo, posa matina o adeptola ane tamaimu? Amutou muada, eitou vuso neitou magili na vavasana mine Salemo.

<sup>11</sup> Ei tomane a Laulau mine Salemo i vei, "Eau e Bibi Taula, eau muigu taliuli, eau vei ivu sele, vanunua ma tavivine vuso na magamaga ne sou asuale eau me sou totopatulu ane eau.

Me sou vuso ne sou veipale maido, oo e Salemo ivu."\*

<sup>12</sup> Maido me eitou muada, eitou vuso tastasa neitou vei billesi le Salemo a golugolu vuso eitou goli.

*Neitou ma gologoli lei e sou e tamaine eitou ne sou bosa me sou goli a sinusu*

<sup>13</sup> Maido me neitou veletase a inigogona vilemulialena. Moni neitou ma gologoli lei a golu tasa ni toe e sou e tamaine eitou ne sou bosa me sou goli a sinusu.

<sup>14</sup> Bibi Taula Iesu ei toemuadesi a damutatalana minau i muada, me eau muada iiti maido, a gona inani tasa i ma mumugu oto na matane Salemo. Moni mane a bibi ei damutale a golu tasa i mumugu, io na maulina mina bibi iedo a golu iedo ei ino mumugu sele.

<sup>15</sup> Maido me mane o ani a golu tasa tamaimu ei damutale ve ei mumugu na matane Salemo, me na inigogona li o toegegele a damutatalana mine tamaimu, io o no muada, na inigogona li oo ma bilii ete tamaimu a lilomu. Krai ei matesi mina gualeliune tamaimu odo, me o no ma litasetase lei a gona inani minio ni toegegele e ei.

<sup>16</sup> Mane amutou damutale a golu tasa ei kubaana, io amutou tilale, dae a inigogona mine amutou oto ni goli me sou a vanunua seasea ne sou vei a golu iede ei pagu.

<sup>17</sup> Niitealena mine Salemo ei ma valitole ete a gona inani ma niinu. Boa. Ei a billesina ma lilomeana ma munongena ino na Maolona Nunu.

<sup>18</sup> Bibi ei ogomuli a inigogona ieli mei goli a pipigona mine Krai, Salemo ni kale a inigogona minei, ma vanunua vuso ne sou ademunonge ane ei.

<sup>19</sup> Maido me neitou ogomuli a inigogona vuso sou goli e eitou neitou ugu a lilone

eitou tasa, ma inigogona vuso sou masagali a silimulina mine sou seasea.

<sup>20</sup> Oo ma toegegele lei a pipigona mine Salemo na damutatalana mina inani moni. Ivu, a golugolu vuso ei kubaana mina inani. Moni mane o ani a golu tasa me iede ei goli a bibi sea ei bosa, io o goli a inigogona pagu.

<sup>21</sup> Mane o ani a golu vivi ue o ini a vain ue o goli a golu sea, me iede ei goli e tamaimu ei bosa, io kubaana o ma gologoli lei a inigogona ie.

<sup>22</sup> Sei golugolu oo silimuli sou ie, ei a golu minio oto pilu e Salemo. Bibi ei damutale a golu tasa ei doana, ma lilone ei ma vavasa oto ana golu ie, ei ni mongemonge.

<sup>23</sup> Moni a bibi ei ani a golu vivi mina damutatalana lua, ei isa a sinusu, vuna ei ma ogomuli ete a silimulina minei. Mane eitou goli a inigogona sanii silimulina mine eitou ei ma longo oto i, io eitou goli a sinusu.

## 15

*Neitou ogomuli a damutatalana mine Krai ma inigogona minei*

<sup>1</sup> Eitou a vanunua eitou isa a silimulina sagali, neitou buloi a vanunua sou ma isa oto a silimulina buo me neitou tabule a mavaana mine sou. Neitou ma damutale tale lei a buloine eitou oto moni.

<sup>2</sup> Eitou vuso tastasa neitou buloi e tamtamaine eitou ne sou guale a inigogona doana ma silimulina mine sou ni palea sagali.

<sup>3</sup> Eitou muada, Krai tamai ei ma buloi ete ei oto. A inigogona i palea minei tomane a Laulau mine Salemo ei vei, "Sou a vanunua sou adegegelu ane oo, ma mailobena mine sou ieli ei pu muata minau tamai."\*

<sup>4</sup> Inade vuso lisa sou niage na Laulau mine Salemo, iede sou niage mina matetengine eitou. A inade li ei mina masagalina lilone eitou me na buloine eitou to magili sagali me magitali e Salemo ni guale eitou.

<sup>5</sup> Salemo tasa moni ei toe e eitou magili sagali a silimulina. Salemo ei ni buloi e amutou namutou ogomuli sele a inigogona mine Krai Iesu me sautole a damutatalana tasa moni ie. Maido ma lilone amutou ni tasa moni,

<sup>6</sup> me amutou vuso pilu namutou beilange a aisane Salemo, ei e Salemo, Tamane Bibi Taula mine eitou e Iesu Krai.

*Krai ei buloi e sou e Iuda pilu e sou a abuna sea*

<sup>7</sup> Maido me amutou vuso namutou mongemonge a gualene sou a Kristen sanii usinani ne sou ugu pilu e amutou, tomane

\* 14:11 Aisaia 45:23

\* 15:3 Laulau na Inala 69:9

Krais tamai ei mongemonge e amutou namutou ugu pilu e ei. Me na inigogona li namutou masalalai a aisa buo mine Salemo.

<sup>8</sup> Eau vei maido, Krais ei palea a bibi na pipigona mina buloine sou a abuna mine Iuda. Ei goli maido ni maite a inade mine Salemo ei patotona, me na inigogona li ei toeselese a adegatunana vuso Salemo ei bilii e tubutubune sou.

<sup>9</sup> Me tamai, ei kale ve sou a abuna sanii ne sou ite a dinodo mine Salemo me ne sou beilange a aisane ei, tomane a Laulau mine Salemo ei vei,

“Maido me eau na beilange a aisane oo balivua ne sou a abuna vanunua ma tavivine sanii.

Me eau na ale a inala mina beilangena aisamu.”†

<sup>10</sup> Ma inade tasa lou mina Laulau mine Salemo ei maido,

“Amutou a vanunua ma tavivine mine sou a abuna sea, namutou mongemonge pilu a vanunua ma tavivine mine Salemo.”‡

<sup>11</sup> Me Laulau na vinalu sanii mine Salemo ei vei maido,

“Amutou a abuabuna vanunua sea, mu beilange a aisane Bibi Taula.

Amutou a vanunua ma tavivine mina aububuna vuso, mu beilange a aisane ei.”§

<sup>12</sup> Me Aisaia tamai ei vei maido,

“A mapana alaba na abuna mine Iesi ei ni palea,

me ei ni iteale a abuna vanunua ma tavivine vuso. A vanunua ma tavivine mine sou a abuna sea sou magitali a ilala ei ni palea ni toekube sou.”\*

<sup>13</sup> Salemo ei adegatuna ni bilii e eitou a golugolu kubaana ieli eitou magitalitali a gualena. Amutou silimuli e ei, me ei ni goli a munonge buo ma lilomeana ni palea me ei ni vonu ne amutou. Me na sagagalina mina Maolona Nunu, a inigogona magitalina ilala Salemo ei ni bilii e eitou a golugolu doana ieli, ei ni vonu sele ne amutou.

*Pipigona malongona mine Pol usino na abuna sea*

<sup>14</sup> Tamtamaigu, na lilogu eau silimuli sele e amutou goli a inigogona kubaana taliuliu. Me amutou isa a matamatana muadana, maido me amutou tastasa mapiigoi namutou matetengi e sou a vanunua ma tavivine mine Salemo.

<sup>15</sup> Moni a inade sanii eau niage le amutou, ei a inade sagali sapa. Eau kale na mailisi

a damutatalana mine amutou, vuna maido Salemo ei dode eau me ei vileale eau

<sup>16</sup> ne eau na muigu a bibi na pipigona mine Krais Iesu, mina gunolina pipigona balivua mine sou a abuna vanunua ma tavivine sea. Na pipigona eau goli mina veipalena malongolongona kubaana mine Salemo do, eau pipigo tomane a prist, me eau kale na maasi e sou a abuna sea usino ne Salemo tomane a niabi ei kale mamai sele. Ma Maolona Nunu ei ni toe e sou ne sou palea a abuna vanunua ma tavivine sele mine Salemo.

<sup>17</sup> Maido me eau pipigo pilu e Krais Iesu me eau masalai e Salemo na pipigona eau goli le Salemo.

<sup>18-19</sup> Eau na ma veipale ete a golugolu sanii. Boa. Eau kale na veipale moni a pipigona Krais ei goli na limagu mina mailisina vanunua ma tavivine mine sou a abuna sea ne sou ogomuli a inade mine Salemo. Me ei bilii e eau a sagagalina mina gunolina matamatana gona sinaga. Ma Nunu mine Salemo tamai ei pipigo sagali na lilogu. Maido me eau soke ne Ierusalem me eau veipale a inade vuso mina malongolongona kubaana mine Krais, me eau gaga usino na aveavena vuso pea na avena ne Ilirikum.

<sup>20</sup> Na pipigona li eau kale sele na veipale a malongolongona kubaana mina aveavena a vanunua ma tavivine saboa sou muada a aisane Krais. Eau ma kale ete na tige a luma muata na baobao a bibi tasa ei mamagiliosi.

<sup>21</sup> Boa. Eau kale na goli tomane a Laulau mine Salemo ei vei,

“Sou a vanua sou ma longe ete a mapamulina minei lisa, ne sou ite ei.

Ma vanunua sou ma longe ete a inade minei, ne sou muada kuba.”†

*Polei kale ni ite sou e Rom me ei asu usino ne Spein*

<sup>22</sup> Pipigona li ei sautole eau mapapaina, me eau ma mapiigogoi ete na asu usino me na ite amutou.

<sup>23</sup> Moni seidei eau a pipigona boasi na avena ie. Na avala makuba eau kale sele na ite e amutou.

<sup>24</sup> Maido na ilala eau asu usino na avena buo Spein, eau damu ve eau na asu muga usino na ite amutou, me mulimuli eau na asu usino ne Spein. Eau na mongemonge a niitene amutou ma niugu sapa pilu e amutou. Me mulimuli eau kale ne amutou buloi e eau a inasu usino ne Spein.

<sup>25</sup> Moni seidei eau kale na asu usino ne Ierusalem mina buloine sou a vanunua ma tavivine mine Salemo ino na avena do.

<sup>26</sup> Sou a vanunua ma tavivine mine Salemo ino na avena ne Masedonia me

† 15:9 2 Samuel 22:50; Laulau na Inala 18:49 ‡ 15:10 Binea 32:43 § 15:11 Laulau na Inala 117:1 \* 15:12 Aisaia

11:10 † 15:21 Aisaia 52:15

Akaia, sou maiademuli i me sou taipiluosi a vatu sanii sou kale ne sou maasi usino ne Ierusalem mina buloine sou a vanunua ma tavivine mine Salemo sou kapelabe.

<sup>27</sup> Sou oabi a vatu odolo na masagana mine sou oto, ma inigogona dolo ei doana, vuna sou isa a golu tomane a ginau ne sou maliu usino ne sou e Iuda. Sou e Iuda sou maasi a golugolu kubaana sanii mine Salemo usino ne sou a abuna sanii sea. Maido me sou a abuna seasea sou isa a pipigona mina buloine sou e Iuda na golugolu sanii na vovo.

<sup>28</sup> Io eau kale na mapuli muge a pipigona li. Eau kale na maasi a vatu ieli usino ne sou e Ierusalem, me mulimuli, na ilala eau asu usino ne Spein, eau na asu usino na ite pale amutou.

<sup>29</sup> Me eau muadasi i, mane eau asu usino ne amutou, a maibalavana mine Krai ei ni vonu na lilogu, me ei ni toekukube sele amutou.

<sup>30</sup> Tamtamaigu, eau kale namutou damutaletale Bibi Taula mine eitou e Iesu Krai, me na inigogona li mina biliina lilone eitou usino ne sou sanii, iede a Maolona Nunu ei mapale le eitou. Me eau kale a damutatalana li ei ni mailisi e amutou a kinaka pilu e eau. Namutou kake Salemo ei ni buloi e eau

<sup>31</sup> me ei gualeliu e eau na limane sou a vanunua mine Iuda sou saukikiki a inade mine Salemo. Me ne amutou kake Salemo ei ni toe a vanunua ma tavivine minei ino ne Ierusalem ne sou guale a pipigona li eau goli mina buloine sou.

<sup>32</sup> Maido me mane Salemo ei kale, eau na mongemonge sele na ilala eau asu usino me eau ite amutou, me eau na manoa sapa pilu e amutou me eau guale lei a sagalina.

<sup>33</sup> Salemo ei iabi a lilomeana minei usinani ne eitou, ei ni ugu pilu e amutou vuso. Moliana.

## 16

*Pol ei vei oaso ane sou a vanunua ma tavivine papaina*

<sup>1</sup> Eau kale namutou toekube e Pibi, iedele e latavinene eitou. Ei isa a pipigona mina buloina viepiluna kinaka mina aubu buo e Senkria.

<sup>2</sup> Eau kale namutou damutale Bibi Taula me mu guale Pibi ni pilu e amutou. Ieli a inigogona kubaana eitou a vanunua ma tavivine mine Salemo neitou goli. Mane ei isa a mavaana mina golu tasa, io eau kale namutou buloi e ei, vuna maido ei buloi a vanunua ma tavivine makuba, me ei buloi sele eau tamai.

<sup>3</sup> Namutou vate oaso minau usino ne Prisila me Akila, sulu pipigo pilu e eau a pipigona mine Krai Iesu.

<sup>4</sup> Sulu masusuluosi ne su mate mina buloine eau. Maido me eau moni boa na vate kubaana usino ne sulu. Viepiluna kinaka vuso ne sou a vanunua ma tavivine sea, sou tamai sou vate kubaana usino ne sulu.

<sup>5</sup> Me amutou vate oaso minau usino ne sou a viepiluna kinaka sou viepilupilu na luma mine sulu.

Amutou bilii a oaso minau usino ne Epainetus, ei e tamaigu sele. Ei palea a kristen pala ane sou a vanunua mina avena buo ne Esia.

<sup>6</sup> Amutou vate oaso minau usino ne Maria. Ei goli a pipigona makuba sagali mina buloine amutou.

<sup>7</sup> Amutou vate oaso minau usino ne Andronikus pilu e Iunias. Sulu e tamaigu me amiteu ugu pilu mina luma na tunuu. Su isa a aisa balivua mine sou a aposel, me sulu palea kristen pala ane eau.

<sup>8</sup> Amutou vate oaso minau usino ne Ampliatu. Ei e tamaigu sele na aisane Bibi Taula.

<sup>9</sup> Amutou vate oaso minau usino ne Urbanus, amilu a pipigona tasa mine Krai. Ma oaso usino ne Stakis tamai, ei e tamaigu sele.

<sup>10</sup> Amutou vate oaso minau usino ne Apelles, ei a bibi na pipigona ivu mine Krai. Amutou vate oaso minau usino ne sou a abuna mine Aristobulus.

<sup>11</sup> Amutou vate oaso minau usino ne Herodion, amilu a abuna tasa.

Amutou vate oaso minau usino ne sou a vanunua ma tavivine mine sou a abuna mine Nasisus sou ino mina abuna mine Bibi Taula.

<sup>12</sup> Amutou vate oaso minau usino ne Trifina pilu e Trifosa. Su mangava a pipigona mine Bibi Taula.

Amutou vate oaso minau usino ne Pesis, ei e latavinegu sele. Ei mangava a pipigona mine Bibi Taula.

<sup>13</sup> Amutou vate oaso minau usino ne Rufus, Salemo ei vileale ei lilone Bibi Taula, me usino ne tinana tamai. Ei e eina tamai.

<sup>14</sup> Amutou vate oaso minau usino ne Asinkritus, me Plegon, me Hemes, me Patrobas, me Hemas, me sou tamtamaigu sanii ino pilu e sou.

<sup>15</sup> Amutou vate oaso minau usino ne Pilologus pilu e Iulia, me Nereus pilu e latavinene ei, me Olimpás, me sou vuso a vanunua ma tavivine mine Salemo sou ino pilu e sou.

<sup>16</sup> Na inigogona mine eitou a vanunua ma tavivine mine Salemo, amutou vuso tastasa namutou gamumi e tamtamaine amutou. Sou a viepiluna

kinaka mine Krai sou vate oaso usino ne amutou.

*Vanunua sanii sou vilelue a viepiluna kinaka*

<sup>17</sup>Tamtamaigu, eau kale na ade sagali ane amutou namutou tilale kube sou a vanunua sou saukikiki a inade amutou guale li me sou vilelue a viepiluna kinaka. Na inigogona do sou toe a viepiluna kinaka ne sou bosa. Namutou bulago ane sou a matana vanunua de.

<sup>18</sup>Sou ma pipigopigo oto ane Krai, Bibi Taula mine eitou. Boa. Sou ogomulimuli moni a masagana mina vovone sou oto. Me na mamisina inade ma inade na toegolaline sou, sou aualala ane sou a vanunua ma tavivine sou ma muada oto e sei inigogona ei doana me sei inigogona ei pagu.

<sup>19</sup>Amutou ogomulimuli a inade mine Salemo, ma vanunua vuso sou longesi a inade mina inigogona mine amutou. Maido me eau mongemonge sele e amutou. Moni eau kale ne amutou muada sele a inigogona kubaana, me namutou ma muada oto a inigogona pagu.

<sup>20</sup>Me ma tabaa oto, Salemo mina lilomeana, ei ni toe amutou namutou soemolemole Satan na ubune amutou. Dinodo mine Iesu, Bibi Taula mine eitou, ei ni ugu pilu e amutou.

*Vanunua sanii sou vate oaso usino ne sou Rom*

<sup>21</sup>Tamaigu Timoti, amilu pipigopilu, ei vate oaso minei usino ne amutou. Me Lusius me Ieson me Sosipater, sou a abuna tasa minau, sou tamai sou vate oaso usino ne amutou.

<sup>22</sup>Eau Tetius, eau guale a inade na asene Pol me eau niage a laulau ie. Na aisane Bibi Taula eau vate oaso minau usino ne amutou.

<sup>23-24</sup>Gaius ei vate oaso usino ne amutou. Ei iteale kube eau na luma minei, me ei iteale a vanunua ma tavivine vuso mina kinaka tamai.

Erastus, ei a bibi na itealalena vatu mina vanunua na itealena binea mina aubu buobuo ie, me tamaine eitou Kuatus, sulu vate oaso usino ne amutou.

*Neitou beilange a aisane Salemo*

<sup>25</sup>Neitou beilange a aisane Salemo, Salemo ei toe e amutou namutou magili sagali na malongolongona kubaana eau veipalele, ei a malongolongona kubaana mine Iesu Krai. A malongolongona kubaana li ei ino ovu taliuliu lisa,

<sup>26</sup>moni seidei Salemo ei taupagale muade. Salemo ei muina taliuliu ei vei, amiteu veipale usino ne sou a abuna vanunua ma tavivine a inade li lisa sou a

profet sou niage. Maido me sou a abuna vanunua ma tavivine sou muada a inade ovu ieli. Salemo ei goli maido na vanunua ma tavivine mine sou a abuna dolo ne sou silimuli e ei me ne sou goli a inigogona ei kale.

<sup>27</sup>Salemo ieli, ei tasa moni ei muada sele. Neitou damutale a golugolu vuso ei goli na limane Iesu, me neitou beilange a aisane ei taliuliu taliuliu. Moliana.

## 1 Korin Munugana Laulau Pol ei niage usino ne sou e Korin

*Oaso doana mine Pol usino ne sou e Korin*

<sup>1</sup> Na masagana mine Salemo oto, eau e Pol, eau palea a aposel mine Kraiss Iesu. Eau pilu e tamaigu e Sostenes

<sup>2</sup> amiluniage a laulau ieli usino ne amutou a vanunua ma tavivine mina viepiluna kinaka mine Salemo ino ne Korin. Kraiss Iesu ei toe e amutou palea maolo, me ei vileale amutou minei oto. Ei vileale amutou pilu a vanunua ma tavivine mina aveavena vuso sou toleale a aisane Iesu Kraiss, e Bibi Taula mine eitou. Ei e Bibi Taula mine sou me mine eitou tamai.

<sup>3</sup> Salemo Tamane eitou pilu e Bibi Taula Iesu Kraiss, ne sulu dode amutou me ne sou toemea a lilone amutou.

*Pol ei toledadangi e Salemo*

<sup>4</sup> Na limane Kraiss Iesu, Salemo ei dode amutou, maido me taliuliu eau damutale-tale e amutou mea toledadangi e Salemo minau.

<sup>5-6</sup> Inade mine Kraiss amiteu veipale le amutou, iede ei sagaliosi na lilone amutou. Ne Kraiss, Salemo ei mapigogoi vuse a golugolu usino ne amutou, ede sou a matamatana inigogona mina veipalena inade ma matamatana muadana.

<sup>7</sup> Maido me seidei amutou ma boto oto a niabi mina Maolona Nunu me amutou magitali e Bibi Taula mine eitou Iesu Kraiss ei ni palea.

<sup>8</sup> Iesu Kraiss ei ni masagali e amutou pea na punuluna malada, ne amutou ma isa oto a mamauna na malada mine Bibi Taula mine eitou Iesu Kraiss.

<sup>9</sup> Salemo ei toleale amutou ne amutou lilo tasa pilu e Natuna e Iesu Kraiss, ei e Bibi Taula mine eitou, ei ni toesesele ivu a golugolu vuso ei vei ni goli.

*Viepiluna kinaka ei mapola maisaba*

<sup>10</sup> Tamtamaigu, na aisane Bibi Taula mine eitou Iesu Kraiss eau ade sagali ane amutou maido, amutou vuso a lilone amutou ni tasa moni na inadene amutou goli. Amutou ma mapola maisabasaba lou. Namutou viepiluniage sele tomane a mautu tasa na damutatalana tasa ma masagana tasa.

<sup>11</sup> Tamtamaigu, sou a abuna mine Kloe sou vei le eau maido, amutou isa a maisinoana ino balivua ne amutou.

<sup>12</sup> Sanii sou vei, "Eau mine Pol." Me sanii sou vei, "Eau mine Apolos." Me sanii sou

vei, "Eau mine Pita." Me sanii sou vei, "Eau mine Kraiss."

<sup>13</sup> I matina? Nane Kraiss ei mapola ginigini, io? Nane eau e Pol eau mate na tauvaleuti mina buloine amutou, io? Nane amutou guale a maavuvutuna na aisane eau e Pol, io? Boa.

<sup>14</sup> Balivua ne amutou, eau maavuvuti e Krispus pilu e Gaius moni, ma bibi tasa lou boa. Na golu ieli eau toledadangi e Salemo.

<sup>15</sup> Maido ma bibi tasa i ma mapigogoi ete ni ade maido, "Amiteu guale a maavuvutuna na aisane Pol."

<sup>16</sup> Ivu, eau tamai ea maavuvuti e sou a abuna mine Stepanas. Usae lou eau ma damutalemuli ete eau maavuvuti e sou sanii lou ue boa, ede eau ma muada oto i.

<sup>17</sup> Kraiss ei ma peltase ete eau mina maavuvutina sou a vanua. Boa. Ei peltase eau mina veipalena malongolonga kubaana. Moni eau ma veipale ete a inadene doana tomane sou a vanua na muadana sou goligoli, dae eau na toe a tauvaleuti mine Kraiss ni palea tomane a golu sabubu.

*Kraiss ei a sagagalina ma muadana mine Salemo*

<sup>18</sup> Ivu, a vanunua sou kale ne sou buale, sou damudamu i, a vea mina tauvaleuti ei a golu pagu. Moni eitou a vanunua ma tavivine Salemo ei gualeliu e eitou, eitou muada, vea mina tauvaleuti ei a sagagalina mine Salemo.

<sup>19</sup> Laulau mine Salemo ei isa a inadene maido,

"Eau na taulele a muadana mina vanunua sou isa a damutatalana doana me eau na mapuli a muadana mina vanua na muadana."\*

<sup>20</sup> Io seidei neitou vei matina? A vanua na muadana ma damutatalana doana ino iva? A vanua sou muada sele e binea mine Moses ino iva? Me a vanua sou muada sele a maubina a inadene sou ino iva? Salemo ei goli a muadana vuso mine sou a vanunua na magamaga li i palea tomane a inadene pagupagu moni.

<sup>21</sup> Salemo ei muada i maido a vanunua ma tavivine mina magamaga sou ma mapigogoi ete ne sou muada e Salemo na muadana mine sou oto. Maido me Salemo ei tau a vea tasa minei ni gualeliu e sou so silimuli e Salemo, iede a "vautautana inadene" amiteu veipalele.

<sup>22</sup> Sou e Iuda sou sagali sele a niitena gona sinaganaga, me sou e Grik sou kale mamai ne sou guale a damutatalana ma muadana doana.

<sup>23</sup> Moni e amiteu veipalele a inadene mine Kraiss ei matesi na tauvaleuti, moni sou e Iuda sou damu ve a inadene li ei a inadene

\* 1:19 Aisaia 29:14

pagu mina damutatalana, me sou e Grik sou damu ve iede a vautautana inade.

<sup>24</sup> Moni eitou a vanunua ma tavivine eitou longe a tinola mine Salemo, eitou Iuda me Grik pilu, eitou muada, Kraisi ei a sagagalina mine Salemo, me ei a muadana mine Salemo.

<sup>25</sup> Sou damudamu i maido, damutatalana sanii mine Salemo ei ma puiale ete. Moni a damutatalana ieli ei seleuli sele a muadana mina vanunua. Me sou damudamu i maido, Salemo ei ma isa oto a sagagalina. Moni a sagagalina mine Salemo ei seleuli sele a sagagalina mina vanunua.

<sup>26</sup> Tamtamaigu, namutou damutale a ilala Salemo ei toleale amutou. Papaina mine amutou sou ma tomene ete a vanua na muadana na matane sou a vanua mina magamaga ie. Me papaina mine amutou sou ma isa oto a sagalina. Me papaina mine amutou sou ma asu oto maino ne tamenatutuna sou isa a aisa buo.

<sup>27</sup> Moni a vanua Salemo i vileale, iede sou a vanua sou ma isa oto a muadana na matane sou sea, me na inigogona ieli Salemo i toemaele sele a vanua na muadana mina magamaga ie. Ma vanua masala sou ite tomene a vanua sou ma isa oto a sagalina, iede Salemo i guale mina toemaele sou so isa a sagalina.

<sup>28</sup> Me ei guale sou a vanunua sou ma isa oto a aisa mina magamaga ie, iede sou a vanunua masala sou ite tomene a kapelabe ue a golu sabubu. Me na inigogona ieli Salemo ei toe e sou a vanunua sou isa a aisa buo ma sagagalina i palea tomene a golu sabubu.

<sup>29</sup> Maido ma bibi tasa ma mapigogoi ete ni beilange a aisane ei oto na matane Salemo. Boa.

<sup>30</sup> Salemo oto i tau e amutou namutou pilu e Kraisi Iesu. Me ei tau e Kraisi i muina a vuna damutatalana doana ma muadana mine eitou. Me ne Kraisi moni Salemo i toe eitou to palea a bilesina vanunua ma tavivine me ei toe eitou to asu na inigogona minei oto. Me na pipigona mine Kraisi moni Salemo i oliliuale eitou, ma sinusu i ma iteale etesi e eitou.

<sup>31</sup> Maido me Salemo i kale ne eitou goli a inigogona tomene a Laulau mine Salemo i vei, "Sei kale ni masalalai, ei ni masalalai lilone Bibi Taula."<sup>†</sup>

## 2

*Pol ei ade a silimulina mine sou e Korin*

<sup>1</sup> Tamtamaigu, ilala eau asuale amutou mina adepalea a inade ovu mine Salemo, eau ma goli ete a inade malasa pilu a inade mina toebuebuena.

<sup>2</sup> Eau damutale maido, ilala eau ino balivua ne amutou, eau ma damutaletale ete a golu tasa lou. Boa. Eau damutale moni e Iesu Kraisi ei mate na tauvaleuti.

<sup>3</sup> Ilala eau ino pilu e amutou, eau ma isa oto a sagalina. Eau laelae, ma vovogu i palili.

<sup>4</sup> Ma inade eau goli me a malongolongona kubaana eau adepalea i, iede eau ma goli ete na inigogona mina muadana buo minau ni sauvule a damutatalana mine amutou. Boa. Eau adepalea ane amutou na sagalina mina Maolona Nunu.

<sup>5</sup> Vuna maido silimulina mine amutou ni ma asu oto maino na muadana vanunua, moni na sagagalina mine Salemo.

*Maolona Nunu i bilii e eitou a damutatalana ma muadana kubaana*

<sup>6</sup> Ivu, a vanunua sou palea sagaliosi na inigogona mine Salemo, sou gualeale a muadana mina inade amiteu veipale i. Moni a muadana sou guale iedo, ei a muadana mina vanua na magamaga ieli boa. Me ei a muadana mine sou a munuganuga mina magamaga ieli tamai boa, vanunua ieli sou ne sou buale.

<sup>7</sup> Amiteu veipale a damutatalana ma muadana kubaana mine Salemo. Ilala Salemo ei saboa mapale a magamaga, me na muadana minei, ei vileale a vea ni goli a niuguguna mine eitou ni doana. Moni a inade mina vea ieli ei ino ovu,

<sup>8</sup> a mapana tasa mina magamaga ieli ei ma muada oto i. Boa. Mane sou muada i, ne sou ma gatitole ete a malasana Bibi Taula na tauvaleuti.

<sup>9</sup> Moni na Laulau mine Salemo ei isa a inade maido,

"Golugolu lisa a bibi tasa ei ma ite ete ue ei ma longe ete,

me ei ma palea oto na damutatalana mina bibi tamai,

a golugolu iede Salemo i masusuliosi ana vanunua sou kale mamaimai sele ei."<sup>\*</sup>

<sup>10</sup> Moni Salemo ei taupagale a golugolu sou ovu usinani ne amiteu na pipigona mina Nunune ei oto. Maolona Nunu ei gemuale iiti a golugolu vuso, me ei ite tamai a damutatalana ovu mine Salemo.

<sup>11</sup> Nunu mina bibi oto do, ei ino lilo minei, ei moni ei muada a damutatalana minei. Tomene moni maido, Nunu mine Salemo oto, ei moni ei muada a damutatalana mine Salemo.

<sup>12</sup> Me amiteu ma guale ete a nunu mina magamaga ie. Boa. Amiteu guale a Nunu maino mine Salemo, ve namiteu muada a niabi vuso Salemo i bilii e amiteu.

<sup>†</sup> 1:31 Ieremaia 9:24

<sup>\*</sup> 2:9 Aisaia 64:4

<sup>13</sup> Amiteu veipalele sou a niabi iede. Moni a inade mine amiteu ei ma maino oto na muadana mina vanunua. Boa. Maolona Nunu oto ei matetengi e amiteu, me amiteu goli a inade ie. Amiteu veipalele a inade mina Maolona Nunu usino ne sou a vanunua a Maolona Nunu ino ne sou.

<sup>14</sup> Moni a bibi ei ma isa oto a Maolona Nunu, ei ma mapigogoi ete ni guale a mata-matana niabi mina Nunu mine Salemo, vuna ei damudamu ve sou a niabi ie ei a golu sabubu moni. Eitou gualeale sou a niabi na Maolona Nunu moni, maido ma vanunua sou isa a Maolona Nunu, sou moni sou mapigogoi ne sou vivilemuliale me ne sou muada ivu a matamatana niabi ie.

<sup>15</sup> Bibi ei isa a Maolona Nunu, ei vilemulialale a golugolu vuso. Moni a bibi tasa ei ma mapigogoi ete ni vilemuliale a inigogona mina bibi ei isa a Maolona Nunu.

<sup>16</sup> Laulau mine Salemo ei isa a inade maido, “Sei muada a damutatalana mine Bibi Taula, sei mapigogoi ni matetengi e Bibi Taula?”†

Moni damutatalana mine Krai eili ne eitou.

### 3

#### *Bibi na pipigona mine Salemo*

<sup>1</sup> Tamtamaigu, lisa eau ma mapigogoi ete na ade ane amutou tomane eau ade ane sou a vanua sou ogomuli a Maolona Nunu. Eau ade ane amutou tomane sou a vanua sou ogomuli a lilomumuguna me sou e selebanini mine Krai.

<sup>2</sup> Eau masusi e amutou. Eau ma bilii ete amutou a gona inani i sagali, vuna maido amutou saboa masusulu a gualena gona inani i sagali. Me seidei tamai amutou saboa masusulu,

<sup>3</sup> amutou saboa nana ogomulimuli a lilomumuguna. E, lilogegeluna ane tamta-maimu ma maisinoana, ei saboa nana ne amutou. Ma inigogona amutou goligoli ie, ede a inigogona mina lilomumuguna. Sou a inigogona mina magamaga moni.

<sup>4</sup> Bibi tasa ei veivei, “Eau mine Pol.” Me tasa lou ei vei, “Eau mine Apolos.” Na inigogona maido amutou maite e amutou tomane a vanua mina magamaga.

<sup>5</sup> Amutou damutale kube. Apolos ei e sei? Eau e Pol, eau e sei? Amilu a bibi na pipigona moni. Bibi Taula ei bilii e amilu a pipigona tastasa, me na pipigona mine amilu ieli amutou silimuli e Krai.

<sup>6</sup> Eau dani a vuavua na gona inani. Apolos ei bilii e sou a nanu. Moni e Salemo ei mapale a gona inani.

<sup>7</sup> Maido ma bibi ei dani a vuavua ma bibi ei bilii a nanu, sulu a bibi sabubu. Salemo ei

mapalele a gona inani, ei tasa moni ei isa a aisa buo.

<sup>8</sup> Bibi ei dani a vuavua ma bibi ei bilii e sou a nanu, pipigona mine sulu i tasa moni, tastasa mine sulu ni guale a mapa mapigogoi a pipigona sulu goli.

<sup>9</sup> Amilu maitama a pipigona mine Salemo, me amutou tomane a mauma ma luma minei.

#### *Bibi na pipigona mina viepiluna kinaka ei tomane a bibi na tinigena luma*

<sup>10</sup> Na dinodo mine Salemo eau palea tomane a bibi na tinigena luma ei isa a muadana doana sele, me eau tau iiti a vatu vuso mina tinigena luma muata ne ei. Ma bibi tasa sea ei tige a luma muata na vatu-vatu eau tau odo, moni eitou tastasa neitou tilale kube a inigogona mina tinigena luma.

<sup>11</sup> Amutou muada, Salemo ei taوسي e Iesu Krai tomane a munugana vatu mina luma, ma bibi tasa boa i mapigogoi ni tau a vatu tasa sea mina tinigena luma muata ne ei.

<sup>12</sup> Ma ilala vanunua sou tige a luma muata na vatu odo, sanii ne sou tige a gol, me sanii ne sou tige a silva, me sanii ne sou tige a vatu malasolosolo mapane sou i sae sele, me sanii ne sou tige a obu, me sanii ne sou tige a unei, me sanii ne sou tige a amo na vit.

<sup>13</sup> Io mulimuli a pipigona mina vanua vuso ei ni palea muada na malada e Salemo ei tau mina vavasana ane sou a vanunua ma tavivine. Malada do ei ni palea tomane a oavi, ma oavi iodo ei ni tove a pipigona mina vanunua vuso tastasa, mina poge-vutina pipigona mine sou ei doana ue boa.

<sup>14</sup> Mane a luma minei ei ma lulu oto, io a bibi na pipigona do ei ni guale a mapa.

<sup>15</sup> Moni mane a luma mina bibi na pipigona tasa ei lulu vuso, io a pipigona vuso mina bibi iodo ei ni buale. Moni a bibi na pipigona oto ei ni ma buale oto, ei ni muina tomane a bibi eitou gualeliu na oavi.

#### *Amutou oto amutou a luma mine Salemo*

<sup>16</sup> Amutou oto amutou a luma mine Salemo, ma Nunu mine Salemo ino lilo ne amutou. Nane amutou ma muada oto a golu ie?

<sup>17</sup> Mane a bibi tasa ei toegegeli a luma mine Salemo, io Salemo ei ni toegegeli a bibi iedo. A luma mine Salemo ei maolo, ma luma do, ede amutou moni.

#### *Neitou ma masalailai lei a vanunua*

<sup>18</sup> Amutou ma aualala lou ane amutou oto. Mane a bibi tasa balivua ne amutou ei damutale maido, “Eau isa a muadana doana sele,” io puiale ei ni palea a vautana bibi pala, maido me ei ni palea a bibi i muada sele.

† 2:16 Aisaia 40:13

<sup>19</sup> Vuna maido, a muadana doana mina magamaga ie ei tomane moni a vautana inigogona na matane Salemo. Laulau mine Salemo ei ade a golu ieli maido, "Vanunua sanii sou damutaletale a matamatana inigogona mina toegegeline vanua sanii, moni e Salemo ei toe a inigogona mine sou i toegegeli e sou oto."\*

<sup>20</sup> Ma Laulau mine Salemo ei ade tamai maido, "Bibi Taula ei damu i a damutatalana mine sou a vanua na muadana ei golu sabubu moni."<sup>†</sup>

<sup>21</sup> Maido me namutou litase a inigogona mina masalaina bibi. A golugolu vuso ei mine amutou.

<sup>22</sup> Pol, ue Apolos, ue Pita ma magamaga ie, ma maulina, ma minate, ma golugolu eili seidei ma golugolu ni palea mulimuli, sou vuso mine amutou.

<sup>23</sup> Me amutou mine Kraiss. Me Kraiss ei mine Salemo.

## 4

### *Inigogona mina vanunua na pipigona mine Bibi Taula*

<sup>1</sup> Amutou namutou damutale maido amiteu a vanua na pipigona mine Kraiss ma vanua na itaelena a inadnade Salemo ei ovu.

<sup>2</sup> Me a bibi ei pipigo ana bibi buo tasa, ei ni ogomuli iiti a inade mina bibi buo minei.

<sup>3</sup> Maido me mane amutou vilemuliale a inigogona minau, ue a vanua sou vilemuliale a inigogona minau mina vavasana, eau na ma lilobuu sapa oto. Eau tamai eau ma vilemuliale ete a inigogona minau oto.

<sup>4</sup> Ivu, eau ma muada oto a sinusu minau tasa, moni eau ma mapigogoi ete na vei maido, "Eau a bilesina bibi." Pipigona mina vilemulialene eau, iede a pipigona mine Bibi Taula moni.

<sup>5</sup> Maidolo me namutou ma vilemulialale lei a inigogona mina vanunua sanii mapigogoi a ilala Bibi Taula ei ni veteliu. Namutou magitali e Bibi Taula ni divi. Ei ni guale a golugolu vuso i ovu na tunuui mei ni tau na muada. Me ei ni mapale muade a damutatalana mina vanunua vuso. Me na ilala do Salemo ei ni vei le eitou vuso tastasa a pipigona mine eitou ei kubaana, ue boa.

<sup>6</sup> Tamtamaigu, eau kale na buloi a damutatalana mine amutou, maido me eau ade a inade minau pilu e Apolos. Namutou damutale amilu me mu ogomuli a inigogona i bilesi tomane a Laulau mine Salemo ei ade i, me namutou ma seutiuti lei a inade ie. Maido me namutou ma toevautauta lou me mu masalailai tasa me mu taipui a aisane tasa.

<sup>7</sup> Tamaigu, sei tau e oo no buo ane sou sanii? Oo isa a golu tasa doana oo ma guale ete ne Salemo, io? Me mane patotona oo guale a golugolu vuso na limane Salemo, io vuna matina oo masalai e oo oto, tomane oo oto oo mapale a golugolu sou ie?

<sup>8</sup> E, amutou vonuosi a golugolu doana amutou kale me amutou isa a golugolu vuso na vuvutina me amutou vululusiosi e amiteu me amutou palea tomane sou a mapana. Eau kale mamai sele namutou palea a mapana ivu, ne amiteu tamai namiteu palea a mapana pilu e amutou.

<sup>9</sup> Eau damu i maido, Salemo ei tau e amiteu a punuluna aposel sele. Amiteu ino tomane sou a vanua, a vanua na vavasana sou veiosi amiteu namiteu mate, me sou kale ne sou mameale amiteu me sou vali-putemate amiteu na matane sou a vanunua ma tavivine vuso pilu e sou a bineanea mine Salemo.

<sup>10</sup> Mina beilangena aisane Kraiss, amiteu eili tomane a vautana vanunua, moni amutou tomane a vanua na muadana mine Kraiss. Amiteu ma isa oto a sagalina, moni amutou palea sagaliosi. Amiteu ma isa oto a aisa, moni amutou isa a aisa buo.

<sup>11</sup> Lisa otosi asuasu mapigogoi seidei, amiteu ugu a vitolona, ma loone amiteu i tagasa sele, me amiteu kai a kinainai ei mashinge sele. Sou tibi maisabesabe amiteu. Me amiteu ma isa oto a luma namiteu ugu kuba i.

<sup>12</sup> Amiteu mangava sele a pipigona na limane amiteu oto. Sou adepintolatola ane amiteu, moni amiteu kakake taliulu Salemo ni maibalave sou. Sou toegegeligeli e amiteu, me amiteu ase buubuu moni me amiteu tabulebule a mavaana sou ie.

<sup>13</sup> Sou adegegeligeli sele amiteu, moni amiteu maliulu le sou a inade i doana. Maidolo me na matane sou a vanua, amiteu paleasi tomane a noa ue a molomolo ue a golu ei mumugu sele. Amiteu muine amiteu maidolo moni asu mapigogoi seidei.

### *Pol ei kale sou e Korin ne sou ogomuli a inigogona minei*

<sup>14</sup> Eau ma niage ete a inade ieli mina toemaelene amutou. Boa. Eau niage, vuna eau kale mamai sele amutou e natatugu, me eau kale na toebilesi a damutatalana mine amutou.

<sup>15</sup> Ivu, mane amutou isa a vanunua na matetengina savuluvulu savulu tasa (10,000) mina itaelene amutou a inigogona mine Kraiss, amutou ma isa oto e tamane amutou makuba. Boa. Na inigogona mine Kraiss Iesu eau paleasi e tamane amutou. Amutou palea e natatugu na ilala

\* 3:19 Iop 5:13 † 3:20 Laulau na Inala 94:11



eau veipale ane amutou a malongolongona kubaana.

<sup>16</sup> Maido me eau kale na mailisi e amutou namutou ite kube a inigogona minau me mu ogomuli.

<sup>17</sup> Na vuna moni ieli eau peltase Timoti usino ne amutou. Ei tomane natugu, me eau kale sele ei. Ei itealale kube a pipigona mine Bibi Taula. Ei ni mailisiliu lei a damutatalana mine amutou na inigogona vuso minau lilo ne Kraisi, iede a inigogona eau matetengi a vanunua ma tavivine mina viepiluna kinaka vuso mina aububuna vuso ne sou ogomuli.

<sup>18</sup> Saniu mine amutou sou damu ve eau na ma asu oto usino ne amutou, maido me sou toevautauta maisaba.

<sup>19</sup> Moni mane Bibi Taula ei kale, io eau na asu asi usino ne amutou. Na ilala eau asu usino, eau na ma longe ete a inadnade mine sou a vanua sou toevautauta. Boa. Eau na pogeputi sei matana sagalina sou isa i.

<sup>20</sup> Vuna maido, niitealalena mine Salemo ei a gona inadade moni boa, ei a golu mina sagalina.

<sup>21</sup> Io amutou kale eau na asu usino ne amutou pilu e sei matana inigogona? Nane amutou kale eau na guale a butu me na asu usino mina toebilelesine amutou? Ue amutou kale ne eau bilii a lilogu usino ne amutou pilu a inigogona i mea?

## 5

*Inigogona sualolona balivua ne sou e Korin*

<sup>1</sup> Eau longe sou mapamuli maido, a matana inigogona sualolona tasa i palea balivua ne amutou, iede sou a vanua masala oto tamai sou ma goligoli ete. Inigogona do i maido, bibi tasa ei mailae susuna tasa mine tamana.

<sup>2</sup> Moni amutou damu i amutou oto a munuganugana mine viepiluna kinaka me mu muge sou saniu, io? I puiale namutou litase a inigogona masalaine amutou oto, me amutou lilomomolu me mu tangi. I puiale namutou taulele a bibi ei goli a inigogona pagu odo, me ei ni ma muina pilu oto e amutou.

<sup>3</sup> Patotona, a vovogu ei bulago ane amutou, moni a nunugu ei ino pilu e amutou. Me i tomane eau oto eau ino ivu pilu e amutou, me eau vilemulialesi e sei bibi ei goli a inigogona ie.

<sup>4</sup> Maido me, ilala amutou viepiluna na aisane Iesu, Bibi Taula mine eitou, nunugu ei ino pilu e amutou ma sagaline Iesu tamai muina pilu e amutou.

<sup>5</sup> Me ne eitou tau a bibi iedo na limane Satan, ne a vovone ei ni mamau. Moni na malada mine Bibi Taula, Salemo ei ni gualeliu a nunu na bibi iedo.

*Sou e Korin ne sou taulele a bibi ei goli a inigogona i pagu*

<sup>6</sup> Amutou masalalai e amutou oto, me ei a inigogona doana boa. Nane amutou ma muada oto i maido, a is bisii ei goli a ulalu vuso i sosoge?

<sup>7</sup> Maidolo me namutou taulele vuse a is mumugumugu, ne amutou tomane a ulalu alaba a is boa. Eau muada, amutou tomanesi a ulalu a is boa, vuna Kraisi ei mate tomane a sipsip sou oabi na Malada na asuleletasena.

<sup>8</sup> Neitou maimonge a Malada na Asuleletasena. Ma maulina mine eitou ni ogomuli a inigogona mine sou a vanua sou masusulu a malada buo mina kinaka do. Neitou taulele a sinusu vuso ma inigogona pagu na maulina mine eitou, tomane a vanunua sou taulelele vuse a is mumugumugu na luma mine sou na ilala sou kale ne sou masusulu a malada buo do. Me neitou ogomuli a inigogona mina liloalaba ma adeivuna, na inigogona dolo ei ni muina tomane a ulalu alaba a is boa.

<sup>9</sup> Na laulau tasa sea eau niagesi usino ne amutou, eau vei maido, "Amutou ma ugu pilupilu lou a vanunua mina gunolina inigogona sualolona."\*

<sup>10</sup> Eau ma vei ete namutou ilisitase vuse a vanua vuso mina magamaga ie sou goligoli a sualolona, me sou a vanua sou isualale, me sou a vanua na paaalina, me sou a vanua sou totopatulialale a salemo auale. Boa. Mane amutou kale namutou ilisitase sele sou a matana vanua maido, io namutou ilisitase vuse a magamaga ie.

<sup>11</sup> Moni a vuna inadade eau niage li ei maido. Mane a bibi tasa ei damu ve ei a kristen, ei goli a sualolona, ue ei isuale a golugolu mina vanua saniu, ue ei totopatuliale sou a salemo auale, ue ei aualala, ue ei inu mei matalilili, ue ei paaali a golu, io namutou ma ugu pilupilu lou e ei, me tamai, namutou ma aani pilupilu lou a matana bibi maido.

<sup>12</sup> Nane eau ma isa oto a pipigona mina vilemulialena inigogona mina vanunua sou ino masala na viepiluna kinaka. Moni a pipigona mina vilemulialena inigogona mina vanua sou lilo na viepiluna kinaka, iede a pipigona mine amutou bilesi.

<sup>13</sup> Sou a vanunua masala Salemo oto ei ni vilemuliale a inigogona mine sou. Moni a Laulau mine Salemo ei vei maido, "Amutou

\* 5:9 2 Korin 6:14-15 † 5:13 Binea 17:7, 19:19, 21:21, 22:21, 24:7

peltaselele a bibi pagu odo balivua ne amutou.”†

## 6

*Kristen ne sou ma vavasava lou ana vanunua ma tavivine sanii na viepiluna kinaka*

<sup>1</sup> Mane tasa balivua ne amutou ei isa a vavasana ane tamaina, neitou maasi ei usino ne vanunua ma tavivine mine Salemo, neitou ma maasi ete ei usino na vanunua masala.

<sup>2</sup> Nane amutou ma muada oto i maido, eitou a vanunua ma tavivine mine Salemo ne eitou vilemuliale a inigogona mina vanunua ma tavivine vuso mina magamaga? Me mane eitou goli maido, io vuna matina amutou ma mapigogoi ete namutou toebilelesi a matana inade banini i palea balivua ne amutou oto?

<sup>3</sup> Nane amutou ma muada oto i maido ne eitou vilemuliale a bineanea mine Salemo tamai? Io mane eitou goli maido, nane eitou mapigogoi sele neitou vilemuliale a inade mina golugolu na magamaga ie.

<sup>4</sup> Maido me ilala amutou isa a vavasana i palea balivua ne amutou, posa matina amutou asu usino na bibi ei ma isa oto a aisa lilo na viepiluna kinaka?

<sup>5</sup> Eau ade a inade ieli mina toemaelene amutou. Nane amutou ma isa oto a bibi tasa ei muada i puiale ni vilemuliale a inade i palea balivua ne tametatasi?

<sup>6</sup> Io, vuna matina a bibi tasa ei tau e tasina usino na vavasana, me ei vavasa ane ei na matane sou a vanunua sou ma silimuli ete Krai?

<sup>7</sup> E, amutou tau a vanua sanii na viepiluna kinaka usino na vavasana, inigogona mine amutou ieli ei maite i maido amutou bosasi a ogomulina inigogona mine Krai. Vuna matina amutou ma itetase ete sou ne so toegegeli e amutou? Vuna matina amutou ma itetase ete sou ne so auala ane amutou?

<sup>8</sup> Moni amutou ma kale ete namutou ogomuli a inigogona doana ie. Amutou oto mu goli a inigogona pagupagu usino ne sou sanii me mu lapuale a golugolu mine sou. Me amutou gologoli a inigogona ieli usino ne tamtamaine amutou oto.

<sup>9</sup> Vanunua sou gologoli a inigogona pagu, ne sou ma mapigogoi ete gali ulilo na niitealalena mine Salemo. Nane amutou ma muada oto i, io? Ne amutou ma auala lou ana lilone amutou oto. Vanua sou gologoli a sualolona, me sou totopatulialale sou a salemo auala, me sou gologoli a inigogona pagu usino na tavivine sou taulai, me sou goli a matamatana inigogona ei isa a maelana pilu e sou a vanua sanii,

<sup>10</sup> ma vanua na paaalina, ma vanua na isualalena, ma vanua sou inu me sou matalilili, ma vanua sou adepintolatola ane sou sanii, ma vanua sou lapualale a golu mine sou a vanua sanii, sou vuso a matana vanua maido ne sou ma mapigogoi ete ne sou gali ulilo na niitealalena mine Salemo.

<sup>11</sup> Me lisa sanii mine amutou sou a matana vanua maido. Moni e amutou avutuosi me amutou palea alabasi. Me na aisane Bibi Taula Iesu Krai me na sagalina Nunu mine Salemo oto, Salemo i toe amutou palea a bilesina vanunua ma tavivine na matane ei.

*Vovone eitou ei a luma mina Maolona Nunu*

<sup>12</sup> Golugolu vuso i puiale ane eau na goli, moni a golugolu vuso do ei ma buloiloi ete eau na ugu iiti. Golugolu vuso i puiale ane eau na goli, moni eau na ma itetase ete a golu tasa ni iteale eau.

<sup>13</sup> “Gona inani ei mavoni a tiane eitou, ma tiane eitou ei mina gualena gona inani.” Inade li ei patotona, moni Salemo ei ni mapuli e sou a matamatana gona inani ma vovone eitou vuso pilu. Ma vovone eitou, ei mina gunolina inigogona sualolona boa. Vovone eitou ei mine Bibi Taula moni. Me Bibi Taula ei mina vovo.

<sup>14</sup> Na sagalina mine ei oto Salemo ei mailisi e Bibi Taula na minate, me ei ni mailisi tamai e eitou.

<sup>15</sup> Nane amutou ma muada oto i maido, vovone amutou vuso ei a madumaduna vovone Krai? Maido me mane eau guale a madumaduna vovone Krai me eau toe ei palea a maduna vovona tavine sualolo, iedele a inigogona doana, io? Boa vuso sele.

<sup>16</sup> Bibi ei valitole a tavine sualolo, ei palea a vovo tasa pilu e ei. Nane amutou ma muada oto i, io? Laulau mine Salemo ei vei maido, “Sulu ne su palea a vovo tasa moni.”\*

<sup>17</sup> Moni a bibi ei valitole Bibi Taula, io na nunu ei palea tasa pilu e ei.

<sup>18</sup> Taliuliu namutou ugu bulago ana inigogona sualolona. Sou a sinusu sanii vanunua sou goli, sou palea sala na vovo. Moni a bibi ei goli a inigogona sualolona, ei toegegeli a vovone ei oto.

<sup>19</sup> Nane amutou ma muada oto i maido, vovone amutou ei a luma mina Maolona Nunu. Salemo ei biliosio e amutou a Nunu, me ei ino lilo ne amutou. Amutou mine amutou oto boa.

<sup>20</sup> Salemo ei oliliale amutou na mapa buo sele. Maido ma golugolu vuso amutou goli na vovone amutou, namutou goli mina masalaine Salemo.

\* 6:16 Sinokona 2:24

## 7

*Inigogona mina taulaina*

<sup>1</sup> Seidei eau malii a inade amutou niage na laulau odo. Mane a bibi ei ma taulai oto, ei doana.

<sup>2</sup> Moni a inigogona sualolona ei tovetove amutou, maido me ei puiale lou a vanua vuso tastasa ne sou isa e susune sou oto, ma tavivine vuso ne sou isa e suane sou oto.

<sup>3</sup> Vovona bibi ei mine susuna, ma bibi ei ni ma matileilei lei. Tomane moni, vovona tavine ei mine suana, ma tavine tamai ni ma matileilei lei.

<sup>4</sup> Tavine ei ni ma iteale ete a vovone ei oto. Boa. Suane ei ni iteale. Me i tomane moni, a bibi ei ni ma iteale ete a vovone ei oto. Boa. Susuna ei ni iteale.

<sup>5</sup> Mane amulu taulai, io namu ma matileilei lei e tasa mine amulu a vovona. Ivu, mane a lilone amulu i tasa me amulu kale ne mu valisobe a vovone amulu na ilala boto moni mina kinaka, io a inigogona do i doana. Moni mulimuli ne amulu maitulu vovo lou. Dae ne amulu ma mapigogoi ete ne mu iteale a masagana mina vovone amulu oto, me Satan ni tove amulu.

<sup>6</sup> Inade eau goli ieli, ei mina buloine amutou moni. Ei ni ma muina oto tomane a binea ne amutou ogomuli.

<sup>7</sup> Eau kale na vanunua ma tavivine vuso ne sou ugu samula tomane eau. Moni e Salemo i bilii a matamatana niabi usino ne sou a vanua tastasa. Bibi tasa ei guale a matana niabi tasa, ma bibi tasa sea ei guale a matana niabi tasa sea.

<sup>8</sup> Moni eau vei le sou a vanunua ma tavivine sou ma taulai oto me sou a basusua maido, mane sou ugu samula tomane eau, ei doana.

<sup>9</sup> Moni mane sou ma mapigogoi ete ne sou iteale iiti a masagana mina vovone sou oto, io puiale ne sou taulai. Dae a lilone sou ei ni tulatula a gunolina inigogona sualolona.

<sup>10</sup> Usino ne sou a vanunua ma tavivine sou taulaios, eau bilii e sou a binea ie. Ieli a binea minau oto boa. Ei a binea mine Bibi Taula. Ei maido, tavine ei ni ma veletatase lei e suana.

<sup>11</sup> Moni mane ei veletasesi e suana, io ei ni ma taulai oto lou ue ei ni vetelii lou usino ne suana. Ma bibi tamai ei ni ma veletatase lei e susuna.

<sup>12</sup> Me eau isa a inade usino ne sou sanii lou. Ieli a binea mine Bibi Taula boa. Eau vei maido, mane tamaine Kraiis tasa ei taulai me susuna i ma silimuli ete Kraiis, me susuna ei kale ni ugu pilu e ei, io tamaina do ei ni ma taulele ete ei.

<sup>13</sup> Me mane a tavine tasa ei taulai me suana i ma silimuli ete Kraiis, me suana ei

kale ni ugu pilu e ei, de tavine do ei ni ma iavetatase lei e suana.

<sup>14</sup> Amutou muada, bibi ei ma silimuli ete, moni ei valitole susuna, me na inigogona do moni ei valitole e tamaina do, me na inigogona do tavine i palea maolo. Mane boa, io natatune amutou ne sou ma mapigogoi ete ne sou muina maolo na matane Salemo. Moni seidei sou ino maolo.

<sup>15</sup> Moni mane a bibi ue a tavine ei ma silimuli ete, iede ei kale ni veletase susuna ue suana, i kubaana ei ni veletase. Matana inigogona do ei ma mapigogoi ete ni papalesobe a bibi ue a tavine ei silimuli e Kraiis. Boa. Salemo ei toleale amutou namutou ugu iiti pilu e sou sanii.

<sup>16</sup> Oo a tavine, oo mapigogoi no buloi e suamu ni palea a kristen ue boa, ede oo ma muada oto i. Me oo a bibi, oo mapigogoi no buloi e susumu ni palea a kristen ue boa, iede tamai oo ma muada oto i.

*Eitou neitou malu na matana maulina Salemo ei vilealesi mine eitou*

<sup>17</sup> Eitou tastasa neitou malu moni na matana maulina Salemo ei vilealesi ane eitou. Sei matana maulina eitou ino i na ilala Salemo ei toleale eitou, neitou asu na matana maulina moni iedo. Eau tau a binea li ana viepiluna kinaka vuso.

<sup>18</sup> Mane a ilala Salemo ei toleale ei, ei mogesi e ei, io ei ni ma toebilelesi liu ete a uliulina. Me mane a bibi tasa ei ma moge ete a uliuline ei na ilala Salemo i toleale ei, io ei ni ma moge ete a uliulina.

<sup>19</sup> Inigogona munoge ei a golu sabubu. Ma inigogona bibi ei ma moge ete ei, iede tamai ei a golu sabubu. Moni a inigogona ogomulina binea mine Salemo, ei a golu ivu.

<sup>20</sup> Sei matana maulina eitou ino i na ilala e Salemo i toleale eitou, io eitou neitou malu moni na matana maulina do.

<sup>21</sup> Nane o muimu a bibi na pipigona sabubu ue a tavine na pipigona sabubu na ilala Salemo i toleale oo? Io, oo ma lilo mavaavaa lou a golu ie. Moni mane oo isa a vea no palea malamala, io ei kubaana no ogomuli a vea do.

<sup>22</sup> Moni a bibi ei ugu a bibi na pipigona sabubu na ilala Salemo ei toleale ei, io seidei ei mine Bibi Taula me na matane Bibi Taula ei ma ugu otosi a bibi na pipigona sabubu. Tomane moni, a bibi ei ugu malamala na ilala Bibi Taula ei toleale ei, io seidei ei palea a bibi na pipigona sabubu mine Kraiis.

<sup>23</sup> Salemo ei oliiualae amutou na mapa buo sele, maido me namutou ma palealea lou a bibi na pipigona sabubu mine sou a vanua.

<sup>24</sup> Tamtamaigu, sei matana maulina eitou eilios i na ilala Salemo i toleale eitou, eitou

neitou ugu na matana maulina moni maido pilu e Salemo.

*Inade usino ne sou a vanunua ma tavivine sou ma taulai oto*

<sup>25</sup> Eau ma isa oto a binea mine Bibi Taula mina biliine sou a vanunua ma tavivine saboa sou taulai, moni eau kale na veipale a damutatalana minau oto, vuna maido Salemo ei dode eau me ei toe eau na palea a bibi na veipalena inade patotona moni.

<sup>26</sup> Na ilala seidei ie sou a mavaana buobuo i palealea, maido me i puiale ne amutou vuso mu ugu tomane amutou ugu seidei.

<sup>27</sup> Mane o gualesi a tavine, io o no ma tilotilo lou a vea na oavetasene ei. Me mane o saboa taulai, io o ma damudamu lou a gualena tavine.

<sup>28</sup> Moni mane o guala a tavine, oo ma goli ete a sinusu. Me mane a tavine alaba ei taulai, ei ma goli ete a sinusu. Moni e sou a vanunua ma tavivine sou taulai ne sou poge a mavaana makuba na maulina mine sou, me eau ma kale ete a mavaana vuso li ni palea le amutou.

<sup>29</sup> Tamtamaigu, eau vei maido, ilala i boto moniosi, maido me na maduna ilala saboa eili ie, vanua sou isa e sususune sou ne sou malu tomane sou ma isa oto e sususune sou.

<sup>30</sup> Me sou a vanua sou tangitangi, ne sou malu tomane sou ma tangi oto. Me sou a vanua sou mongemonge, ne sou malu tomane sou ma mongemonge oto. Me sou a vanua sou olioli a golugolu, ne sou malu tomane sou ma isa oto a golu.

<sup>31</sup> Ma vanua sou goli a pipigona a golugolu na magamaga, ne sou malu tomane a pipigona do ei a golu tasa i ma buo oto na maulina mine sou. Eitou muada, ma tabaa oto a magamaga ieli pilu a golugolu vuso minei ni pulu.

<sup>32</sup> Eau ma kale ete sou a lilobuuna mina magamaga li ni lapuale maisabe a damutatalana mine amutou. Bibi ei ma taulai oto ei damutala papai a pipigona mine Bibi Taula. Ei kale ni goli a inigogona Bibi Taula ei kale.

<sup>33</sup> Moni a bibi ei taulai ei damutala papai a golugolu mina magamaga ie. Ei kale ni goli a inigogona susuna ei kale.

<sup>34</sup> Maido ma damutalana minei i mapola. Me sou a tavivine alalaba me sou a tavivine sanii sou ma taulai oto, sou damutatala papai a pipigona mine Bibi Taula. Sou kale ne sou bilii vuse sou oto usino ne Salemo me sou muina maolo na vovone sou me na nunune sou tamai. Moni a tavine ei taulai ei damutatala papai a golugolu mina magamaga ie. Ei kale ni goli a inigogona suana ei kale.

<sup>35</sup> Eau ade a inade li mina buloine amutou ne mu ugu iiti. Ei mina magilisobene

amutou boa. Eau kale ne amutou ogomuli e sou a inigogona i bilesi me mu goli a pipigona mine Bibi Taula taliuli. Eau ma kale ete a golu tasa ni lapuale maisabe a damutalana mine amutou.

<sup>36</sup> Mane a bibi tasa ei damu ve ei goli a inigogona i ma bilesi oto usino na tavine alaba sou vileale minei, me mane a masagana minei usino na tavine do i sagali mamau, me mane ei ma isa oto a vea tasa lou, io ei mapigogoi ni ogomuli a masagana minei mei ni tavui a tavine do. Ei ma goli ete a sinusu.

<sup>37</sup> Moni mane a bibi tasa ei sagali na lilone ei me a golu tasa boa ni toeasi ei, me ei mapigogoi ni iteale a masagana minei oto, me mane ei papalesobesi a damutatalana ne ei ma kale ete ni tavui a tavine alaba do sou vilealesi le ei, moni ne sulu ugu samula moni, io a inigogona li ei doana.

<sup>38</sup> Maido ma bibi ei tavui a tavine alaba sou vileale le ei, ei goli a inigogona i doana. Moni a bibi ei ma tavui ete a tavine alaba sou vileale le ei, ei goli a inigogona i doana lou.

<sup>39</sup> Mane suane tavine tasa i saboa mate, io a tavine do ni ugu moni tomane susuna bibi iedo. Moni mane suana ei mate, io a tavine do ei ni ugu malamala. Mane ei kale ni taulai a bibi tasa, io ei mapigogoi ni taulaiale ei. Moni ei ni taulaiale a bibi ei silimuli e Bibi Taula.

<sup>40</sup> Moni eau oto eau damu i maido, mane ei ma taulai lou oto, munongena minei ni buo lou. Eau damutale a Nunu mine Salemo ei eili pilu e eau, me eau adepalea a inadnade ie.

## 8

*Golu vivi sou oabi ane sou a salemo auala*

<sup>1</sup> Seidei eau kale na ade a inigogona mina inanina golu vivi sou oabi ane sou a salemo auala. Vanua sanii sou veivei, "Eitou vuso eitou isa a muadana." A inade ieli i patotona, moni a muadana ei mailisilisi a inigogona masalaina. Moni a inigogona mina bilina lilone eitou usino na vanua sanii, ielili ei toe eitou palea a kristen sagali.

<sup>2</sup> Bibi tasa ei mapigogoi ni damu i maido ei muada sele a golu tasa, moni a muadana mina bibi iedo ei saboa mapigogoi.

<sup>3</sup> Moni mane a bibi tasa ei kale sele Salemo, io Salemo ei muada sele a bibi iedo.

<sup>4</sup> Na inigogona li mina inanina golu vivi sou oabi ana salemo auala, eau isa a inade maido. Eitou muada, salemo auala ei ma golu ivu oto. Ei a nunu sabubu moni. Eitou ma isa oto e salemo makuba. Boa. Salemo tasa moni eili.

<sup>5</sup> Ivu, a golu makuba eili sou vate e "salemo" me a "bibi taula." Moni muina

mane ivu sou e “salemo” sou ino na langi ue nani na magamaga,

<sup>6</sup> moni eitou isa e Salemo tasa moni, ei e Salemo Tamane eitou. Ei a vuna golugolu vuso, me eitou a vanunua ma tavivine minei bilesi. Me Bibi Taula tasa moni ino, ei e Iesu Krai. A golugolu vuso palea maino ne ei, me ne ei moni eitou mauili.

<sup>7</sup> Moni a vanua sanii sou ma muada oto a golu sou ie. Sanii sou ogomuli a inigogona mina salemo auala lisa. Maido ma ilala sou ani a maini ie, sou damudamu ve iede a niabi ivu ana salemo auala. Damutatalana mine sou i ma muada oto, me sou ani, maido me sou somiale maido sou goli a inigogona i ma bilesi oto.

<sup>8</sup> Ivu, gona inani ei ma mapigogoi ete ni maasi e eitou agavuale Salemo. Mane eitou ma ani ete, io ielili ei ma toe mamau ete eitou na matane Salemo. Mane eitou ani, io ielili tamai ei ma toe kube ete eitou na matane Salemo.

<sup>9</sup> Moni amutou tilale. Amutou muada i maido, amutou mapigogoi namutou ani sei golu amutou kale. Moni dae a inigogona amutou goli ieli ni toe e sou a vanua sou ma isa oto a muadana doa ne sou bosa na sinusu.

<sup>10</sup> Oo a bibi oo isa a muadana, mane oo asu usino na luma na kinaka mina salemo auala me oo ugu mo aani, me mane a bibi a damutatalana minei i ma muada oto, ei ite oo, io nane a inigogona minio iedo ni mailisi a lilone ei me ei tamai ni ani a golu sou oabi ane sou a salemo auala.

<sup>11</sup> Me na inigogona iedo, muadana minio i toegegeli a bibi iedo a silimulina minei i saboa sagali, ei e tamaine eitou Krai ei mate mina gualeliue ei.

<sup>12</sup> Longe. Damutatalana mine tamtamaine eitou sanii ei ma muada oto. Mane amutou goli a sinusu iede usino ne sou me amutou toegegeli a silimulina mine sou, na inigogona iede amutou goli a sinusu usino ne Krai.

<sup>13</sup> Maido me mane a inani ei toe tamaigu ni bosa na sinusu, io eau ma mapigogoi ivu ete na ani lei a maini na maulina minau. Dae ne eau magoli e tamaigu ni bosa na sinusu.

## 9

*Pol ei guale sei mapana pipigona minei?*

<sup>1</sup> Amutou ite a inigogona minau. A golu tasa ma mapigogoi ete ni magilisobe eau. Boa. Eau mapigogoi na goli e sei matana inigogona eau kale. Eau a aposel tasa ue boa? Nane eau ite Iesu, Bibi Taula mine eitou ue boa? Eau goli a pipigona mine Bibi

Taula, me nane amutou palea a kristen na pipigona minau ue boa?

<sup>2</sup> Vanunua sanii sou damu ve eau a aposel boa, moni umana, amutou muada i maido, eau a aposel. Amutou kristen palasi, me ielili i tomana matailala mina maitena maido, eau a aposel ivu mine Bibi Taula.

<sup>3</sup> Vanua sanii sou vilemulialale a inigogona minau, me eau maliuliu a matana inade iedo usino ne sou.

<sup>4</sup> Nane i ma puiale ete amiteu a aposel namiteu guale a gona inani ma nanu tomana mapa na pipigona mine amiteu?

<sup>5</sup> Nane i ma puiale ete namiteu guale susune amiteu ne sou gaga pilu e amiteu, tomane sou a aposel sanii me sou tamtamaine Bibi Taula me Pita sou goligoli?

<sup>6</sup> Nane Banabas pilu e eau moni ne amilu pipigo a gualena vatu mina itealne amilu oto, io?

<sup>7</sup> Sei bibi ei goligoli a pipigona mina maubina me ei oto ei poge a gona inani minei? Sei bibi ei danidani a mauma me ei ma pa oto a gona inani mine ei? Me sei bibi ei itealale a abuna sipsip me ei oto ei ma ini ete a susu ne sou, io?

<sup>8</sup> Dae ne amutou damu ve eau ogomuli moni a damutatalana mina vanua me eau goli a inade ie. Boa. Binea tamai ei isa a matana inade maido.

<sup>9</sup> Moses ei niage a inade maido na binea, “Amutou ma avisobesobe lei a asena bulmakau na ilala ei pipigo a taulelena uliulina vit ue sei golu.”\* Nane Salemo ei damutale sou a bulmakau mei goli a inade ie? Boa.

<sup>10</sup> Ei damutale e eitou. E, a inade ieli ei ane eitou, vuna Salemo i kale neitou ogomuli a inigogona maido. Bibi ei kesilange a magamaga mina mauma ma bibi ei taulele a uliulina vit ue sei golu, sulu goli a pipigona li, vuna sulu muada i ve ne sulu guale a maduna gona inani i palea na pipigona mine sulu.

<sup>11</sup> Amiteu dani a golugolu doanana mina nunu balivua ne amutou. Maido me mane amutou bilii e amiteu a golugolu mina buloina vovo, nane ieli ei ma bilesi oto, io? Ei tomane amiteu guale a gona inani na golu amiteu dani ie.

<sup>12</sup> Mane amutou longo a vanua sanii ne sou guale a golugolu mine amutou, io namutou longo mamau sele ne amiteu guale.

Moni a golugolu sou ie amiteu mapigogoi namiteu guale ne amutou, iede amiteu ma gualeale ete. Moni amiteu tabulebule a mavaana makuba, vuna maido amiteu ma kale ete namiteu magilisobe a vea mina malongolongona kubaana mine Krai.

<sup>13</sup> Vanunua sou goli a pipigona na luma mine Salemo, sou gualeale a gona inani na

\* 9:9 Binea 25:4

luma mine Salemo. Ma vanunua sou goli a pipigona na poso na niabi, sou gualeale a maduna golu vivi mina niabi vuso a vanunua ma tavivine sou tau na poso. Nane amutou ma muada oto a golu ieli?

<sup>14</sup> Tomane moni Bibi Taula i bilii e eitou a inadé maido, sou a vanunua sou pipigopigo a veipalena malongolongona kubaana, ne sou guale a golugolu mina buloina vovo maino na vanunua ma tavivine sou guale a malongolongona.

<sup>15</sup> Moni eau oto eau ma guale ete a mata-matana mapana ieli. Me seidei tamai eau ma niage ete a inadé mina gualena golu tasa maino ne amutou. Boa vuso sele. Puiale lou eau na mate pala ane a bibi tasa ei ni magilisobe a inigogona minau ie, iede ei bilii e eau a munonge.

<sup>16</sup> Eau adepalea a malongolongona kubaana, moni eau ma mapigogoi ete na masalai e eau oto. Vuna adepaleana malongolongona kubaana, iede a pipigona Bibi Taula i bilii e eau me eau na goli. Eau ma mapigogoi ete na litase a pipigona ie. Mane eau ma adepalea oto a malongolongona kubaana, mavaana ni palea le eau.

<sup>17</sup> Mane eau goli a pipigona ieli na masagana minau oto, eau mapigogoi na guale a mapana pipigona ie. Moni eau goli a pipigona ieli tomane a pipigona tasa eau na goli, vuna Bibi Taula ei bilii e eau a pipigona ie.

<sup>18</sup> Maido me sei mapa eau na guale? Ilala eau veipale a malongolongona kubaana eau ma guale ete a mapa, me eau ma guale ete a golugolu eau mapigogoi na guale na ilala eau pipigo, iede a mapagu.

#### *Pol ei malamala moni*

<sup>19</sup> Eau malamala moni, eau ma bibi na pipigona sabubu oto. Moni na masagana minau oto, eau paleasi a bibi na pipigona sabubu ane sou a vanua vuso mina maasina vanua makuba lou usino mine Krai.

<sup>20</sup> Maido ma ilala eau ino pilu e sou e Iuda eau ogomulimuli a inigogona mine sou e Iuda mina gualene sou e Iuda. Me ilala eau ino pilu e sou a vanua sou matano na binea, eau oto eau ma matano oto na binea mine Moses, moni eau ogomulimuli a inigogona mine sou, ne eau na guale a vanunua sou ino matano na binea.

<sup>21</sup> Na matane sou a vanua sou ma isa oto a binea mine Moses, eau ugugu tomane a bibi ei ma matano oto na binea ie, ne eau na guale a vanunua sou ma matano oto na binea ie. Moni eau ma litase ete a binea mine Salemo. Boa. Eau ogomuli a binea mine Krai.

<sup>22</sup> Na matana vanunua sou ma isa oto a silimulina sagali, eau ugugu tomane a bibi

ei ma isa oto a silimulina sagali, ne eau na guale sou a vanua do. Eau guale a inigogona mina matana vanua vuso, vuna maido eau kale na gualeliu e sanii.

<sup>23</sup> Eau goli a pipigona vuso ieli mina malongolongona kubaana mine Iesu, me eau tamai na guale a golugolu doana Bibi Taula ei masusuliosii ni bilii e sou a vanua sou silimuli a malongolongona kubaana.

*Eitou neitou vele sagali me neitou guale a mapa*

<sup>24</sup> Vanua vuso sou vele na mailabana, sou vuso sou velevele, me tasa moni ei guale a mapa. Nane amutou ma muada oto a golu ie? Io amutou tamai namutou vele sagali mina gualena mapa.

<sup>25</sup> Ma vanua vuso sou kale ne sou muge a mailabana, sou taupui a masagana vuso mina vovo. Ma mapa vuso sou guale ieli, mulimuli ne sou mamau moni. Moni a mapa eitou damutale a gualena, ei ni ma mamau oto.

<sup>26</sup> Maido me eau vele sagali, me eau ma gegemu maisaba oto. Me eau maubi iiti a lima, me eau ma lange maisabe ete a limagu tomane a bibi ei lange sabubi a limana. Boa.

<sup>27</sup> Eau vali na vovogu me eau toe ei ni ogomuli a masagana minau, dae ne eau adepalea a malongolongona kubaana usino na vanua sanii me mulimuli eau oto eau ma guale ete a mapa.

## 10

*Tilale kube, dae ne eitou bosa na tinovo*

<sup>1</sup> Tamtamaigu, eau kale ne amutou muada iiti maido, na ilala mine Moses, sou e eisuusune eitou sou ino matano na ausa do me sou vuso sou tuluuti a dasi.

<sup>2</sup> Me i tomane sou vuso sou guale a maavuvutuna mina ausa me a dasi, Salemo ei maavuvuti e sou ne sou palea a abuna mine Moses.

<sup>3</sup> Me sou vuso sou ani a gona inani iedo a Nunu mine Salemo ei bilii e sou.

<sup>4</sup> Me sou vuso sou ini a nanu Nunu mine Salemo ei bilii e sou. Iede a nanu na vatu mina Nunu, ei asu pilu e sou. Vatu odo e Krai oto.

<sup>5</sup> Moni Salemo ei ma mongemonge oto makuba mine sou a abuna vanunua ma tavivine do. Maido me sou mate na avena sabubu i tagasa, ma aitolane sou i tabuli maisaba na avena do.

<sup>6</sup> Ma golugolu vuso do ei palea tomane a mira, ve neitou ite me neitou ma isualene lei a golugolu pagu, tomane sou goligoli.

<sup>7</sup> Namutou ma totopatulialale lei e sou a salemo auala, tomane sanii mine sou so goligoli. Laulau mine Salemo ei vei maido, "Sou ugu a aanina ma niinuna,

me mulimili sou magili a gealelene sou a tavivine.”\*

<sup>8</sup> Neitou ma gologoli lei a inigogona sulolona, tomane sanii mine sou so gologoli, me na malada tasa do moni savuluvulu savulu lua timana savuluvulu tolu (23,000) mine sou i matesi.†

<sup>9</sup> Me neitou ma tovetove lei e Bibi Taula tamai, tomane sanii mine sou so gologoli, ma aliusu pagupagu sou aleale sou me sou mate.‡

<sup>10</sup> Me amutou ma adesinoanoa lou ane Salemo, tomane sanii mine sou so gologoli, ma bineanea mina valiputena vanua sou asu maino me ei valipute sou.§

<sup>11</sup> Golugolu sou odo i palea le sou, ei tomane a mira a vanua sanii ne sou ite. Golugolu iedo sou bilii a damutatalana tamai usinani ne eitou a vanua eili na ilala seidei ie, ei a ilala a magamaga ieli i agaviosi ni pulu. Mapamulina ieli sou ino na Laulau mine Salemo.

<sup>12</sup> Maido me mane amutou damu amutou magili sagali, io amutou namutou tilale kube, dae ne amutou bosa.

<sup>13</sup> Tinovonovo sou palea le amutou, sou palea le sou a vanua vuso. Me Salemo ei ogomuli ivu a inade minei, mei ma litase ete tasa mine sou a tinovonovo ni palea le amutou, ei vululusi a sagaline amutou. Mane a tinovo ei palea le amutou, io Salemo ni goli a vea ni buloi e amutou. Vea li ei maido, ei ni toe amutou ne mu magili sagali, ma tinovo odo ei ni ma mapigogoi ete ni toebose amutou.

*Neitou ma totopatulialale lei salemo auala*

<sup>14</sup> Maido me, tamtamaigu ivu, namutou bulagetase a inigogona mina totopatulialene sou a puigolo.

<sup>15</sup> Eau vei le amutou tomane amutou isa a muadana. Amutou oto namutou vilemuliale a inadegu.

<sup>16</sup> Ilala eitou inu na taogo na maibalavana mine Salemo, eitou toledadangidangi e Salemo na maibalavana minei, ei viepili e eitou pilu a dalane Krai. Ma ilala eitou ani a ulalu eitou lee do, ei viepili e eitou pilu a maine Krai.

<sup>17</sup> Ulalu ei tasa moni, me eitou a vanunua na tavivine makuba eitou a vovo tasa moni, vuna maido eitou vuso eitou ani a ulalu tasa do.

<sup>18</sup> Amutou damutale a inigogona mine sou e Israel. Ilala sou ani a golu vivi sou anone oata na poso na niabi, ielili ei viepilipili e sou pilu e Salemo na poso do.

<sup>19</sup> Maido me amutou ma damudamu lou ve a niabi a vanua masala sou goli ane sou

a puigolo, iede a golu ivu. Boa. Me eau ma vei ete maido sou a puigolo, sou a golu ivu. Boa.

<sup>20</sup> Eau vei maido, a golu sou a vanua masala sou oabi, iede a golu sou oabi usino ne sou a nunu pagu. Sou ma oabi ete usino ne Salemo. Me eau ma kale ete namutou viepilu pili e sou a nunu pagu.

<sup>21</sup> Ei ma mapigogoi ete namutou inu a taogo mine Bibi Taula ma taogo mine sou a nunu pagu tamai. Me ei ma mapigogoi ete amutou aani na poso mine Bibi Taula me na poso mine sou a nunu pagu tamai.

<sup>22</sup> Nane eitou kale neitou goli a lilone Bibi Taula ni pagu me ei ni sinoa ane eitou, io? Sagaline eitou ei seleuli a sagaline ei, io?

*Taliulu neitou masalai e Salemo*

<sup>23</sup> “Golugolu vuso ei doana ne eitou goli,” moni a golugolu vuso i ma buloiloi ete eitou neitou ugu kuba. “Golugolu vuso ei doana ne eitou goli,” moni a golugolu vuso ei ma toe ete eitou neitou palea a Kristen sagali.

<sup>24</sup> Neitou ma damutalele lei a buloine eitou oto. Boa. Neitou damutale a buloine sou sanii.

<sup>25</sup> Maini na golu vivi ue a sava sou oababi na muina oolina, iede amutou mapigogoi namutou ani. Namutou ma damutala papaipai lou me mu ma tagu maisabasaba lou. Boa.

<sup>26</sup> Eitou muada, “Magamaga ieli pilu a golugolu vuso ino ne ei, sou vuso do mine Bibi Taula moni.”\*

<sup>27</sup> Me tamai, mane a bibi tasa ei ma silimuli ete Iesu, ei tagi e amutou namutou asu me mu aani pilu e ei, me mane amutou kale namutou asu, ei kubaana. Namutou ani a golugolu vuso ei bilii e amutou. Me amutou ma damutala papaipai lou me mu ma tagu maisabasaba lou.

<sup>28</sup> Moni mane a bibi tasa ei vei le amutou maido, “Maini ieli sou oabi usino na puigolo,” io namutou damutale a bibi ei vei le amutou odo, me namutou ma aniani lei, dae ne ei somiale amutou goli a inigogona pagu.

<sup>29</sup> Eau ma vei ete ne amutou oto namutou somiale amutou goli a inigogona pagu. Eau vei a bibi tasa do ei ni somiale maido amutou goli a inigogona pagu. Moni mane a bibi tasa boa ei goli a matana inade maido, io eau mapigogoi na ani a sava eau kale. Posa matina eau na ogomuli a damutatalana mina bibi tasa sea a sei golu sou magilisobe eau na goli?

<sup>30</sup> Mane eau toledangangi e Salemo me eau ani, io posa matina a bibi tasa sea i mapigogoi ni adegegeli e eau a golu eau toledangangi e Salemo me eau goli?

† 10:8 Savuluna 5:1-18

‡ 10:9 Savuluna 21:5-6

§ 10:10 Savuluna 16:41-49

\* 10:26 Laulau na Inala 24:1

<sup>31</sup> Maido me mane amutou aani me mu inu ue amutou goli a golu tasa, namutou goli a golugolu vuso ieli mina biliina aisa buo usino ne Salemo.

<sup>32</sup> Namutou damutale sou e Iuda me sou e Grik me sou a vanunua ma tavivine mina viepiluna kinaka mine Salemo, me namutou ma gologoli lei a matamatana inigogona i mapigogoi ni toe sou so bossa na sinusu.

<sup>33</sup> Eau tamai, eau goli a golugolu vuso i mapigogoi a vanua vuso ne sou kale a inigogona vuso eau goli. Eau ma pipigopigo oto mina buloine eau oto. Eau pipigo mina buloine sou a vanunua ma tavivine sanii, ne Salemo ni gualeliu e sou.

## 11

<sup>1</sup> Namutou ogomuli a inigogona minau, tomane eau ogomulimuli a inigogona mine Krai.

*Pol ei ade a inigogona mina avisobena lete*

<sup>2</sup> Eau mongemonge e amutou, vuna taliulu amutou damutaletale eau me mu sautole obi a inadenade vuso eau bilii e amutou.

<sup>3</sup> Moni eau kale ne amutou muada tamai maido, letena vanua vuso ei e Krai, ma bibi ei a letena tavine, ma letene Krai e Salemo.

<sup>4</sup> Mane a bibi ei avisobe a letena me ei kaka ue ei malongo a inade mine Salemo, bibi iedo ei tomaele a letene ei, e Krai.

<sup>5</sup> Me mane a tavine tasa ei ma avisobe ete a letena me ei kaka ue ei malongo a inade mine Salemo, ei tamai ei tomaele a letene ei. Ei tomane moni a tavine ei oove a aivuna vuso.

<sup>6</sup> Mane a tavine ei ma avisobe ete a letena, io ei ni oovebote a aivuna. Me mane a tavine ei maela a oovebotena aivune ei ue a taulelevusena, de ei ni avisobe a letena.

<sup>7</sup> Bibi ei ni ma avisobesobe lei a letena, vuna maido ei maite a nunu ma aisa buo mine Salemo. Ma tavine ei maite a aisa buo mina bibi.

<sup>8</sup> Salemo ei ma mapale ete a bibi maino na vovona tavine. Boa. Ei mapale a tavine maino na vovona bibi.

<sup>9</sup> Me Salemo ei ma damutale ete a tavine me ei mapale a bibi mina buloine ei. Boa. Ei damutale a bibi me ei mapale a tavine mina buloine ei.

<sup>10</sup> Vuna ieli, a tavine ei ni avisobesobe a letena tomane a matalala ne ei ino matano ne suana.

<sup>11</sup> Moni na abuna mine Bibi Taula, sou a tavivine sou ma muine ete sou moni, me sou a vanua tamai sou ma muine ete sou moni. Boa. Tavine ino mina buloina bibi, ma bibi ei ino mina buloina tavine.

<sup>12</sup> Palapala Salemo ei mapale a tavine maino na vovona bibi, moni bibi ei tamai palealea na vovona tavine. Me Salemo oto ei a vuna golugolu vuso.

<sup>13</sup> Amutou oto mu vivilemuliale a inade ie. Mane a tavine ei ma avisobe ete a letena me ei kake Salemo, ieli nane a inigogona doana, io?

<sup>14</sup> Inigogona mine eitou a vanunua ma tavivine oto ei maite e amutou maido, mane a bibi ei isa a aivuna i lago, iede ei tomaele ei oto.

<sup>15</sup> Me mane a tavine ei isa a aivuna i lago, iedele ei tomane a malolomena doana minei. Vuna maido, Salemo i bilii e ei a aivuna lago mina avisobena letene ei.

<sup>16</sup> Moni mane a bibi tasa ei kale ni adesinoa a inade minau ie, ei ni muada kuba i maido, amiteu ma ogomulimuli ete a matana inigogona sanii sea, me sou a viepiluna kinaka mine Salemo tamai sou ma isa oto a inigogona sanii sea.

### *Inani mine Bibi Taula na lodo*

<sup>17</sup> De eau kale na vei le amutou a inigogona sanii ne amutou ogomuli. Na golu ieli eau na ma ade munonge oto a inigogona amutou goli. Na ilala amutou viepilu, a inigogona doana i ma palealea oto. Inigogona mina viepiluna mine amutou ei ma puialale ete.

<sup>18</sup> Palapala eau longe a inade maido, ilala amutou viepilu, amutou vilelue mais- abesabe me mu goli a adesinoa na balivua ne amutou oto. Me eau silimuli sape a inade do,

<sup>19</sup> vuna eau damu a viepiluna mina kinaka mine amutou ei ni vilelue sapa, ne amutou muada kuba e sei sou a vanunua ma tavivine mine amutou sou ogomulimuli sele a inigogona Salemo ei kale.

<sup>20</sup> Maido ma ilala amutou viepilu a inani iedo, ei ma gona inani ivu oto mine Bibi Taula. Boa.

<sup>21</sup> Amutou tastasa amutou toeiasia a gualena gona inani mine amutou oto me mu ani. Me sanii ino sou ugugu a vitolona, me sanii sou inini a vain papaina me sou matalilili.

<sup>22</sup> Vuna matina? Nane amutou ma isa oto a lumaluma mina inani me mina ninu, io? Amutou damu i a viepiluna mina kinaka mine Salemo ei a golu sabubu, me amutou asu maino mina gunoline tamtamaine amutou sou ma isa oto a gona inani ne sou somiale a maelana? Eau na ade ane amutou matina? Nane eau na ade munonge a inigogona mine amutou, io? Na golu ieli eau na ma ade munonge oto ane amutou. Boa vuso sele.



*Bibi Taula Iesu ei bilii a ulalu ma taogo na vain ne sou a disaipel*  
(Mat 26:26-29; Mak 14:22-25; Luk 22:14-20)

<sup>23</sup> Inade eau bilii e amutou, iede eau guale maino ne Bibi Taula moni. Inade do ei maido. Na lodo sou tau e Iesu mina limane sou a butu, na lodo iedo Bibi Taula Iesu ei guale a ulalu,

<sup>24</sup> me ei toledadangi e Salemo, me ei lee, me ei vei, "Ieli ei a mainigu, eau bilii mina buloine amutou. Ne amutou goli maido mina damutalene eau."

<sup>25</sup> Ma ilala sou aani pulosi, na inigogona tasa moni ei guale a taogo na vain mei vei maido, "Taogo na vain ieli ei a magilipiluna alaba eau goli na dalane eau oto. Taliuliu amutou ininu a taogo ie, namutou goli maidolo mina damutalene eau."

<sup>26</sup> Inade mine Iesu ieli ei maite i maido, taliuliu amutou ani a ulalu ieli me mu inu a taogo ieli, amutou adepalealea a davutina ma minate mine Bibi Taula mapigogoi na ilala ei veteliu.

*Neitou vivilemuliale kube a lilone eitou me eitou guale a gona inani mine Bibi Taula*

<sup>27</sup> Maidolo me mane a bibi tasa ei ani a ulalu mine Bibi Taula ue inu a taogo na vain mine Bibi Taula na inigogona i ma biliesi oto, io ei toegegeli a mainina ma dalane Bibi Taula oto mei isa a mamauna na inigogona minei odo.

<sup>28</sup> Bibi ei ni vivilemuliale kube pale a lilone ei, me ei mapigogoi ni ani a ulalu ieli mei inu a taogo na vain ie.

<sup>29</sup> Vuna maido, sei bibi ma damutale kube ete a mainine Bibi Taula, me ei ani me ei inu, ei maasi a mavaana usinani minei oto, me Salemo ni toegegeli sele ei.

<sup>30</sup> Na vuna moni ieli a vanunua ma tavivine papaina balivua ne amutou sou ma sagali otosi, me sou isa a sinobe me sanii sou matesi.

<sup>31</sup> Moni mane eitou vivilemuliale kube a lilone eitou oto me eitou aani me eitou inu, de a mavaana ni ma palea le ete amutou.

<sup>32</sup> Moni a ilala Bibi Taula ei ite a inigogona vuso mine eitou i ma biliesi oto me ei bilii e eitou a mavaana vuso, ei goli maido mina toebilelesine eitou, ne eitou ma buale oto pilu a vanunua ma tavivine mina magamaga.

<sup>33</sup> Maido me, tamtamaigu, mane amutou viepilu a aanina, namutou magitali muge sou sanii.

<sup>34</sup> Mane tasa ei vitolo, ei ni aani na luma minei. Dae a viepiluna mine amutou ei ni mapale a vavasana mine amutou.

Golugolu sanii saboa ino, iede eau na toe-bilelesi na ilala eau asuale amutou.

## 12

*Sou a niabi mina Maolona Nunu*

<sup>1</sup> Tamtamaigu, seidei eau kale na vei kube le amutou a niabi mina Maolona Nunu.

<sup>2</sup> Amutou muadasi i, ilala amutou saboa ino a vanua masala, mane a golu tasa ei lapuale amutou usino na puigolo sou ma adeade oto, io amutou asu moni.

<sup>3</sup> Maido me eau kale ne amutou damutatala iiti a inade tasa maido. Mane a Nunu mine Salemo ino na bibi tasa me ei bilii e ei a inade, bibi iedo ei ma mapigogoi ete ni vei, "Iesu ei ni mamau." Me mane a bibi ei ma isa oto a Maolona Nunu, ei ma mapigogoi ete ni vei, "Iesu ei e Bibi Taula."

<sup>4</sup> A matamatana niabi mina Maolona Nunu eili, moni a Nunu tasa moni ino.

<sup>5</sup> Me eitou mapigogoi neitou goli a matamatana pipigona mine Bibi Taula, moni e Bibi Taula tasa moni ino.

<sup>6</sup> A matamatana inigogona ino mina gunolina pipigona, moni e Salemo tasa moni ei bilii a sagalina usino ne sou a vanunua ne sou goli a pipigona vuso ie.

<sup>7</sup> Maolona Nunu ei mapalele a sagalina minei ane sou a vanunua ma tavivine tas-tasa, ne sou buloi e sou sanii.

<sup>8</sup> Na bibi tasa Maolona Nunu ei bilii a inade mina damutatalana doana, me na bibi tasa sea Nunu tasa moni iedo ei bilii i a inade mina muadana sanii.

<sup>9</sup> Me a bibi tasa sea ei guale a silimulina i sagali na Nunu tasa moni iedo. Me na Nunu tasa moni iedo, tasa sea ei guale a sagalina mina toekubena vanua sou sobe,

<sup>10</sup> me tasa ei guale a sagalina mina gunolina gona sinaga. Me tasa ei guale a sagalina mina malongona inade mine Salemo, me tasa ei guale a muadana mina vivilemulialena matamatana nunu. Me tasa ei guale a muadana mina gunolina inade mina matamatana inade, me tasa ei guale a muadana mina sauvulena inadnade sou odo.

<sup>11</sup> A Nunu tasa moni iedo ei mapalele a golugolu vuso do. Na masagana minei oto ei soebule a niabi tastasa usino na bibi tastasa.

*Eitou a aveavena mina vovo tasa moni*

<sup>12</sup> Vovona bibi ei tasa, moni ei isa a avena papaina. Ma aveavena papaina mina vovo iedo sou vuso ei a vovo tasa moni. Me Kraisi tamai ei tomene moni simaido,

<sup>13</sup> vuna maido a Maolona Nunu tasa moni ei maavuvuti e eitou vuso me ei toe eitou palea a vovo tasa moni. Eitou e Iuda me Grik, me eitou a vanua na pipigona sabubu me eitou a vanua malamala, eitou vuso eitou guale a Nunu tasa moni neitou inu i.

<sup>14</sup> Eitou muada, vovo ei a avena tasa moni boa. Ei isa a avena papaina.

<sup>15</sup> Mane a ubu ei vei maido, “Eau a lima boa, maido me eau a avena mina vovo boa,” muina, ei saboa ino tomane a avena mina vovo.

<sup>16</sup> Me mane a tuli ei vei, “Eau a mata boa, maido me eau a avena mina vovo boa,” muina, ei saboa ino tomane a avena mina vovo.

<sup>17</sup> Mane a vovo vuso ei a mata moni, ei ni longe a inade matina? Mane a vovo vuso ei a tuli moni, ei ni oase a golugolu matina?

<sup>18</sup> Moni a vovo i maido boa. Salemo ei tau a aveavena vuso tastasa na vovo tomane ei oto ei kale.

<sup>19</sup> Mane a vovo ei isa a avena tasa moni, io iede a vovo ivu boa.

<sup>20</sup> Moni a vovo i maido boa. Aveavena papaina ino na vovo, moni sou a vovo tasa moni.

<sup>21</sup> Ma mata ei ma mapigogoi ete ni vei ana lima maido, “Eau ma masage ete oo.” Ma lete tamai ei ma mapigogoi ete ni vei ana ubu, “Eau ma masage ete oo.” Boa.

<sup>22</sup> Sou a aveavena vovo eitou muada sou ma sagali oto, mane sou ma eili oto, vovo i ma mapigogoi ete ni tabuli kuba.

<sup>23</sup> Me eitou damu ve a aveavena vovo sou muina sabubu, eitou malolome mamai lei e sou. Ma aveavena vovo eitou maelaela i, eitou taboboli iiti sele.

<sup>24</sup> Moni e sou a aveavena vovo sanii malasa, eitou itetatase sabubi. Salemo ei tau a aveavena vuso mina vovo ei muina pilu. Ma aveavena sanii sou ma isa oto a aisa, sou guale a munugana ivu.

<sup>25</sup> Ei goli simaido, ei toe a vovo ei ni tasa moni, me sou vuso a aveavena tastasa ne sou iteale a aveavena sanii na inigogona tasa moni.

<sup>26</sup> Maido me mane a avena vovo tasa ei somiale a davutina, aveavena vuso do sou somiale a davutina pilu. Me mane a avena tasa ei guale a aisa buo, aveavena vuso sou mongemonge pilu e ei.

<sup>27</sup> Io amutou vuso ino a vovo mine Krai. Me amutou tastasa amutou a avena mina vovone ei.

<sup>28</sup> Me Salemo ei vileale sou a vanunua ma tavivine mina gunolina pipigona mina viepiluna kinaka. Munugana e sou a aposel, maluana e sou a abuna mina veipalena inade na malongolongona, matoluna e sou a abuna mina vanunua ma tavivine mina matetengina. Me tamai, sou a abuna ino mina gunolina gona sinaga. Me sou a abuna mina toekubene sou so sobe, me sou a abuna mina buloine sou sanii, me sou a abuna mina itealena matamatana pipigona, me sou a abuna sou ade a matamatana inade.

<sup>29</sup> I matina? Nane sou vuso sou a aposel? Nane sou vuso sou isa a pipigona mina

veipalena inade na malongolongona? Nane sou vuso sou isa a pipigona mina matetengina vanunua ma tavivine? Nane sou vuso sou isa a sagalina mina gunolina gona sinaga?

<sup>30</sup> Nane sou vuso sou isa a sagalina mina toekubene sou so sobe? Nane sou vuso sou ade a matamatana inade? Nane sou vuso mapigogoi ne sou sauvule a inade do? Boa. Sou vuso sou isa a pipigona mine sou oto.

<sup>31</sup> Moni namutou kaka sagali a niabi bou lou mina Maolona Nunuu. Me seidei eau na maite e amutou a vea i doana sele ie.

## 13

*Neitou bilii a lilone eitou usino ne sou sea*

<sup>1</sup> Mane eau adeade ane sou a vanunua ma tavivine na matamatana inade seasea na vanua me na inade ne sou a bineanea mine Salemo tamai, moni eau ma bilii ete a lilogu usino ne sou, io eau tomane a tuai ei goli a tinangi buo moni me eau tomane a galamo ei tupaga sabubu moni.

<sup>2</sup> Me mane eau veipalele a inade na malongolongona, me eau muadasi e sou a damutatalana ovu mine Salemo me eau isa a muadana sanii tamai, me mane eau isa a silimulina sagali sele mapigogoi ni toe sou a loena ne sou salasuu usino na avena tasa, moni mane eau ma bilii ete a lilogu usino ne sou a vanunua ma tavivine, io eau tomane a golu sabubu.

<sup>3</sup> Me mane eau bilii a golugolu vuso minau usino ne sou a kapelabe, me mane eau itetase a vanua sou saavi eau me sou tuni a vovogu na oavi me eau matesi, moni mane eau ma bilii ete a lilogu usino ne sou, io a inigogona vuso minau odo ei ma buloi sape ete eau.

<sup>4</sup> Bibi ei bilii a lilona usino ne sou sea, ei ma sinoa asasi oto mei ma malii ete a inigogona pagu sou goli le ei, mei ma lilo-gegelugelu oto ana vanua sou isa a golugolu papaina, mei ma masalailai ete ei oto, mei ma toebibibi ete ei, mei ma toevautauta oto,

<sup>5</sup> me ei ma damutale tale mamai ete ei oto, mei ma sinoa asiasei oto, me ei ma damutale tale ete a inigogona pagu sou goli le ei,

<sup>6</sup> mei ma mongemonge oto a inigogona i ma bilesi oto. Boa. Ei mongemonge a inigogona i patotona moni.

<sup>7</sup> Bibi ei bilii a lilona usino ne sou sea ei ma itetatase ete a golu tasa ni toebise ei. Taliulu ei silimulimuli e Salemo, me ei magitali e Salemo ni buloi e ei, me na ilala na mavaana ei magili sagaligali.

<sup>8</sup> Biliina lilone eitou usino ne sou sea, ei ni ma pulu oto. Boa vuso sele. Veipalena inade mine Salemo tomane a profet, ei ni pulu, me sou a matamatana inade tamai ni pulu, me sou a matamatana muadana vuso mine sou a vanua, ei tamai ni pulu.

<sup>9</sup> Seidei eitou isa a madumaduna muadana moni na golugolu. Me tamai, eitou veipalele a madumaduna inade na malongona moni.

<sup>10</sup> Moni mulimuli a golu ivu sele ni palea, na ilala do madumaduna golugolu vuso seidei eitou muada i ne sou pulu.

<sup>11</sup> Na ilala eau saboa ino alabaini, muadana minau tomane a muadana mine sou seleanini, me eau damutaletale me eau adeade na inigogona mine seleanini. Moni na ilala eau buosi, eau litase a inigogona vuso mine seleanini.

<sup>12</sup> Seidei eitou muada e Salemo tomane eitou ite ei na mira moni. Moni na ilala mulimuli neitou ite ivu e ei a matane eitou. Me seidei eitou muada sapa moni ei, moni na ilala do neitou muada iiti e ei tomane ei muada sele e eitou.

<sup>13</sup> Inigogona silimulina, ma magitalina, ma inigogona biliina lilone eitou, a inigogona tolu ieli ni muina taliului. Moni a munugana inigogona ivu, ei a inigogona biliina lilone eitou usino ne sou sea.

## 14

*Neitou sagali a gualena sou a niabi ni toesagali a viepiluna kinaka*

<sup>1</sup> Amutou namutou sagali a biliina lilone amutou usino ne sou a vanunua ma tavivine taliului. Me ne amutou kale mamai sele a gualena niabi vuso mina Maolona Nunu. Moni a munugana niabi ne amutou kale mamai sele a gualena, iede a sagalina mina veipalena inade mine Salemo tomane a profet.

<sup>2</sup> Eitou muada, bibi ei goli a inade mina inade tasa sea, ei ma ade oto usino ne sou a vanua. Boa. Ei adeade usino ne Salemo moni, vuna maido bibi tasa boa ei muada e sei inade ei goli. Na sagalina mina Maolona Nunu ei ade a inade vuso i ovu.

<sup>3</sup> Moni a bibi ei veipale a inade na malongolongona, inade mina bibi iedo ei toesagaligali a silimulina mine sou a vanua me ei mailisilisi e sou a gunolina inigogona kubaana me ei toekukube a lilone sou.

<sup>4</sup> Bibi ei goli a inade mina inade tasa sea, ei toesagali a lilone ei oto moni. Moni a bibi ei veivei a inade na malongolongona, ei toesagali a silimulina mina vanunua ma tavivine vuso mina viepiluna kinaka.

<sup>5</sup> Eau kale ne amutou vuso namutou goli a inade mina inade tasa sea. Moni eau kale mamai sele ne amutou veipale a inade na malongolongona. Mane a bibi ei goli a inade mina inade tasa sea, io a bibi tasa ni magili mina sauvulena inade ne sou a vanunua ma tavivine mina viepiluna kinaka ne sou guale a masovana. Mane a bibi tasa boa mina sauvulena inade, io a bibi ei

veipale a inade mine Salemo ei vululusi a bibi ei goli a inade mina inade tasa sea.

<sup>6</sup> Tamtamaigu, amutou damutatala kube a inade ie. Mane eau asu usino ne amutou me eau goli a inade na matamatana inade i sea, moni eau ma vei ete le amutou a inade sanii Salemo ei maite e eau, ue eau ma bilii ete e amutou a muadana, ue eau ma veipale ete a inade mine Salemo tomane a profet ue eau ma matetengi ete e amutou, eau na buloi e amutou matina?

<sup>7</sup> Na ilala a vivigo ma ude sou tatangi, mane a tinangi ne sou i ma palea kuba oto, io neitou muada i matina sei inala ne sou ale?

<sup>8</sup> Me mane a tuai ei ma tatangi kuba oto, sei ni masusulu a maubina?

<sup>9</sup> Amutou tamai amutou simaido. Mane amutou ade a inade tasa sea, a vanunua sou ma muada oto i ne sou muada a vuna inade ieli matina? Inade mine amutou ei ni golu sabubu.

<sup>10</sup> Ivu, a matamatana inade makuba eili na magamaga, me sou vuso isa a masovana mine sou oto.

<sup>11</sup> Maido me mane eau ma muada oto a inade bibi tasa ei ade i, ei ni damu ve eau a bibi mina abuna tasa sea. Me eau tamai ea na damu ve a bibi ieli ei a bibi mina abuna tasa sea.

<sup>12</sup> Eau muada, amutou kale mamai sele a gualena niabi vuso mina Maolona Nunu. Mane maido, amutou namutou kaka sagali a gualene sou a matana niabi ieli ei toesagaligali a viepiluna kinaka.

*Inigogona mina gunolina inade na matamatana inade sanii sea*

<sup>13</sup> Io a bibi ei goli a inade mina inade tasa sea, ei ni kake Salemo ni bilii e ei a sagalina mina sauvulena inade ie.

<sup>14</sup> Amutou damutale. Mane eau kaka na inade tasa sea, io nunugu ei kaka, moni a damutatalana minau ei muina sabubu.

<sup>15</sup> Maido me eau na goli a sava? Eau na kaka na nunugu pilu a inade eau muade i. Eau na ale a inala na nunugu pilu a inade minau tamai.

<sup>16</sup> Mane oo ma goli ete maido, me na nunu minio moni oo toledadangi e Salemo, me mane a bibi tasa ino me ei ma muada oto a inadenade oo goli, ei ni muada i matina oo toledadangi e Salemo, me ei ni vei "Moliana" na toledadangina minio? Ei ni ma mapigogoi ete, vuna maido ei ma muada oto a inade oo goli.

<sup>17</sup> Ivu, oo goli a inade kubaana mina toledadangina, moni oo ma masagali ete a lilona bibi tasa do.

<sup>18</sup> Eau toledadangi e Salemo, vuna eau goli a inade tasa sea mapapaina lou ane amutou.

<sup>19</sup> Moni mane eau goli a malevina inade lima sou muada i na viepiluna kinaka, iede ei doana lou ane eau na matetengi e sou a inade savuluvulu savulu tasa (10,000) mina inade sea.

<sup>20</sup> Tamtamaigu, amutou ma ugugu lou tomane seleanini na damutatalana mine amutou. Na matamatana inigogona pagu vuso ne amutou ugu tomane seleanini. Moni a damutatalana mine amutou ei ni muina tomane a damutatalana mine sou buobuo.

<sup>21</sup> Na binea mine Salemo sou niage a inade maido, "Bibi Taula ei ade maido, 'Eau na bilii a inade usino ne sou na asene sou a vanua sea ma inade sea.

Moni ne sou ma kale ete a nilongena inadegu.' ")\*

<sup>22</sup> Maidolo ma inigogona mina gunolina inade na inade i sea, ei a matailala Salemo ei maite e sou a vanua sou ma silimuli ete. Moni a inigogona mina veipalena inade mine Salemo tomane a bibi na malongolongona, ei a matailala Salemo i bilii e sou a vanua sou silimuli.

<sup>23</sup> Maidolo me mane a vanunua ma tavivine mina viepiluna kinaka vuso sou ade a inade seasea, me mane sou a vanua sanii sou ma silimuli ete ue sou a vanua sou ma muada iiti oto i sou gali ulilo na viepiluna kinaka do, ne sou vei maido amutou vauta.

<sup>24</sup> Moni mane amutou vuso amutou veipale a inade na malongolongona, me mane a bibi tasa ei ma silimuli ete ue ei ma isa oto a muadana buo, ei gali ulilo na viepiluna kinaka do, io a inade mine amutou vuso ei ni ubi a liloni bibi iedo me ei ni maite i maido ei a bibi mina gunolina sinus, me ei iteilale a inigogona pagu minei

<sup>25</sup> ma damutatalana vuso mamau ino ovu na lilone ei, iedele ei palea muada. Me ei ni totopatulu mei ni lagu motutu utano, mei ni kake Salemo. Me ei ni adepalea maido, "Ivu, Salemo ei eili balivua ne amutou."

*Pipigona vuso mina viepiluna kinaka ei ni palea bilesi*

<sup>26</sup> Maido me amutou tamtamaigu, nami-teu vei a sava? Ilala amutou viepilu amutou vuso, amutou isa a inala ma inade mina matetengine sou sanii, me amutou sanii isa a inade ovu, me sanii sou isa a inade mina inade tasa sea, me sanii sou isa a pipigona mina sauvulena inade ie. Golugolu vuso amutou goli, namutou goli mina toesagalina viepiluna kinaka.

<sup>27</sup> Mane sanii sou kale ne sou goli a inade mina inade sea, tao lua ue tao tolu moni

ne sou goli. Me ne sou ma ade pilu oto. Boa. Tasa ei ni ade pala me tasa ei ni ademulimuli. Me tasa ei ni sauvule a inade mine sou.

<sup>28</sup> Me mane a bibi tasa ino boa mina sauvulena inade, io bibi na gunolina inade mina inade sanii sea, ei ni vale moni me ei ni ma adeade lou. Ei ni goli a inadenade ei oto usino ne Salemo moni.

<sup>29</sup> Ma bibi lua ue tolu mina veipalena inade mine Salemo tomane a profet, sou moni ne sou veipale a inade. Me sanii ne sou vilemuliale a inade mine sou.

<sup>30</sup> Me mane tasa ei ugu muina, me Salemo ei maite ei a inade tasa ovu, io a bibi ei ino adeade ei ni vale moni.

<sup>31</sup> Na inigogona ieli amutou vuso mapi-gogoi namutou malongo a inade tastasa, ne sou a vanua vuso guale a muadana me ne sou vuso guale a sagalina.

<sup>32</sup> Sou a vanua na veipalena inade na malongolongona, sou iteale a asene sou oto me ne sou veipale a inade na ilala mine sou.

<sup>33</sup> Salemo ei toebilelesi a pipigona vuso minei. Ei ma toe ete a golugolu vuso i maisaba. Ei kale ne eitou ugu a lilone eitou tasa me eitou pipigo iiti pilu.

<sup>34</sup> Ilala sou viepilu, tavivine ne sou ma adeade lou a inadenade me ne sou vale moni. Sou vuso a viepiluna kinaka sou toe moni maido. Tavivine ne sou muina matano moni, tomane a binea mine Moses ei vei.†

<sup>35</sup> Mane sou kale ne sou muada a vuna inade tasa, io ne sou tagi e suane sou oto na luma mine sou. Mane a tavine ei goli a inade lilo na viepiluna kinaka, iedele ei toemaele ei oto.

<sup>36</sup> Nane a inade mine Salemo ei palea pala ne amutou, io? Amutou moni mu guale a inade mine Salemo, me sou a vanunua ma tavivine sanii boa, io?

<sup>37</sup> Mane a bibi tasa ei damu ve ei a profet, ue ei damu ei oto ei isa a damutatalana mina Maolona Nunu, io ei ni muada, a inade ieli eau niage usino ne amutou ei a binea mine Bibi Taula.

<sup>38</sup> Me mane a bibi tasa ei ma longe ete a inade li, io namutou ma longemulimuli lei a inadana.

<sup>39</sup> Maido me, tamtamaigu, amutou namutou kale mamai sele a veipalena inade na malongolongona, me namutou ma mag-lisobesobe lei a inigogona mina gunolina inade na matamatana inadenade sea.

<sup>40</sup> Moni namutou goli a golu vuso na vea i bilesi me na inigogona doana lilo na viepiluna kinaka.

\* 14:21 Aisaia 28:11-12 † 14:34 Sinokona 3:16

## 15

### *Ilisiliuna mine Krais*

<sup>1</sup> Tamtamaigu, eau kale na mailisi a damutatalana mine amutou lou na malongolongona kubaana eau veipale le amutou. Amutou gualesi a malongolongona kubaana iede, me amutou magili sagaligali.

<sup>2</sup> Mane amutou lapitole obi a inade mina malongolongona kubaana eau veipale le amutou me amutou ma silimuli sabububi ete, io na malongolongona kubaana moni iodo Salemo ni gualielu e amutou.

<sup>3</sup> Inade buo sele eau bilii e amutou, iede eau guale lisa, ei maido. Krais ei mate mina taulelena sinusu vuso mine eitou tomane a inade ino na Laulau mine Salemo.

<sup>4</sup> Me sou tau e ei na muina minate, me na malada tolu ei ilisiliu, tomane a inade ino na Laulau mine Salemo.

<sup>5</sup> Me mulimuli ei palea le Pita, me mulimuli lou ei palea le sou a aposel savulu tasa timana lua.

<sup>6</sup> Me mulimuli ei palea le tamtamaina papaina, savulu ne sou ei vululusi savulu sobo lima. Papaina sele mine sou saboa eili, moni sanii sou matesi.

<sup>7</sup> Me mulimuli ei palea le Iemus, me mulimuli lou ei palea le sou a aposel vuso.

<sup>8</sup> Me mulimuli sele ei palea le eau tamai tomane a bibi tinana i vasusuuti.

<sup>9</sup> Eau alabaini sele balivua ne sou a aposel. Ei ma mapigogoi ete ne sou tole e eau a aposel, vuna palapala eau toegegeli a viepiluna kinaka mine Salemo.

<sup>10</sup> Moni e Salemo i dode e eau me ei toe eau palea a bibi tomane seidei eau eili i ie. Ma dinodo minei usinani minau ei ma buale sabubu oto. Boa vuso sele. Eau pipigopigo sagali sele lou ane a aposel vuso. Moni e eau oto eau ma goli ete a pipigona do. Boa. Salemo i dode eau mei bilii e eau a sagalina mina gunolina pipigona sou odo.

<sup>11</sup> Maido me muina mane eau goli ue sou a aposel sanii sou goli, amiteu vuso amiteu veipalele a inade do mine Iesu ei mate mei ilisiliu. Me amutou longe me mu silimuli.

### *Ilisiliuna mina vanua vuso sou matesi*

<sup>12</sup> Taliliu amiteu veipalele a inade ne Krais ei mate me Salemo i mailisiliu e ei. Me posa matina sanii balivua ne amutou sou veivei maido, bibi ei matesi, ei ma mapiogoi ete ni ilisiliu?

<sup>13</sup> Mane i patotona a vanunua sou matesi, sou ma mapigogoi ete ne sou ilisiliu, io neitou vei maido, "Salemo i ma mailisi ete Krais."

<sup>14</sup> Mane patotona Salemo ei ma mailisi ete Krais, io a inade amiteu veipale do, ei a

golu sabubu, ma silimulina mine amutou ei tamai a golu sabubu.

<sup>15</sup> Mane i maido, de amiteu palea tomane a vanua sou auale a golu Salemo ei goli, vuna amiteu veipale muade maido Salemo ei mailisi e Krais. Moni mane i patotona Salemo ei ma mailisiliu ete sou a vanua sou matesi, de ei ma mailisi ete Krais tamai.

<sup>16</sup> E, mane i patotona Salemo ei ma mailisiliu ete sou a vanua sou matesi, io neitou vei maido, "Salemo ei ma mailisi ete Krais."

<sup>17</sup> Mane i patotona Salemo ei ma mailisi ete Krais, de a silimulina mine amutou i ma mapigogoi ete ni buloi e amutou. Amutou saboa ino na sinusu mine amutou.

<sup>18</sup> Me sou a vanua sou silimuli e Krais me sou matesi, sou tamai sou bualesi.

<sup>19</sup> Mane eitou magitali a golugolu neitou guale i lilo na maulina mina magamaga ieli moni, io patotona sele maule eitou a abuna eili ie. Eitou vululusi maule sou sanii mina magamaga ie.

<sup>20</sup> Moni maido boa. Krais ei matesi me patotona sele Salemo ei mailisiliu e ei. Ei ilisi pala ane sou a vanua sanii sou matesi, tomane a munugana vua ei matua na mauma.

<sup>21</sup> Bibi tasa ei mapale a minate me tomane moni a bibi tasa ei mapale a ilisiliuna.

<sup>22</sup> Ei maido, sou a vanua vuso mina abuna mine Adam sou matemate, me tomane moni sou vuso a vanua mina abuna mine Krais ne sou guale a maulina.

<sup>23</sup> Moni e eitou vuso neitou ilisiliu me eitou guale a maulina na ilala mine eitou oto. Munugana e Krais. Me mulimuli, na ilala ei vetelii, eitou vuso a abuna minei neitou ilisiliu.

<sup>24</sup> Na ilala do a golugolu vuso ni pulu, Krais ni mapuli e sou so iteale a binea, me a nunu vuso i sagali ma golugolu ei isa a sagalina, me ei ni tau a niitealalena minei usino ne Salemo Tamane eitou.

<sup>25</sup> Vuna Krais ei ni muina a mapana i asu mapigogoi Salemo ei ni taupui a butu minei vuso.

<sup>26</sup> Ei ni mapuli vusesi e sou a butu, ma punuluna butu ei a minate, minata ieli ni pulu.

<sup>27</sup> Laulau mine Salemo i vei maido, "Salemo i tau a golugolu vuso muina matano minei."\* Inade do ei vei maido, Salemo oto i goli a pipigona ieli mina tinauna golugolu vuso matano ne Krais. Maido me eitou muada Salemo oto ei ma ino oto matano ne Krais.

<sup>28</sup> Me mulimuli na ilala golugolu vuso i muina matanosi ne Krais, io Natune Salemo ei ni tau e ei oto matano ne Salemo. Palapala Salemo i tau a golugolu vuso matano

\* 15:27 Laulau na Inala 8:6

mine Natune ei, moni a ilala Natune Salemo i tau e ei oto matano ne Salemo, io Salemo ei ni muina a letena ivu mina golugolu vuso.

<sup>29</sup> Mane a vanua sou matesi sou ma mapigogoi ete ne sou ilisiliu, io vuna matana sou a vanua sanii sou gualeale a maavuvutuna mina buloine sou a vanua sou matesi? Mane sou a vanua sou matesi sou ma mapigogoi ete ne sou ilisiliu, io posa matina a vanua sou guale a maavuvutuna mina buloine sou?

<sup>30</sup> Mane sou a vanua sou matesi sou ma mapigogoi ete ne sou ilisiliu, posa matina amiteu ma lae oto a golu pagu ni palea le amiteu na maladalada vuso.

<sup>31</sup> Tamtamaigu, eitou vuso eitou lilo ne Krais Iesu, me eau mongemonge sele e amutou. Me eau ma tau oovi ete a inade ieli ne amutou maido, patotona sele eau oto eau matemate na maladalada vuso.

<sup>32</sup> Mane eau maubi pilu e sou a vanunua tomane a viuviu masivo ne Epesus na masagana minau oto, io eau guale a sei golu? Mane a vanua sou matesi sou ma mapigogoi ete ne sou ilisiliu, io puiale “Neitou aani me eitou inu,

vuna matina, savulo ne eitou mate.”†

<sup>33</sup> Amutou ma itetasetase lei a vanua sanii ne sou auale ane amutou. Amutou muada a inade ie, “Mane eitou maitamaina pilu a vanua pagupagu, ne sou toegegeli a inigogona doana mine eitou.”

<sup>34</sup> Amutou namutou litase a vautana inigogona me mu damutatala bilesi. Amutou ma gologoli ase a sinusu. Amutou longe. Sanii mine amutou saboa sou muada e Salemo, maido me eau vei le amutou ne amutou maela a inigogona mine amutou.

*Vovo i ilisiliu, ei sea sele*

<sup>35</sup> Nane a bibi tasa ei ni tagu maido, “Sou a vanua sou matesi, ne sou ilisiliu matina? Ne sou isa a sei matana vovo ilala sou ilisiliu?”

<sup>36</sup> Ieli a vautana inade moni! Oo muada, ilala oo dani a vuana vit ue a golu, vuana iedo ei ni mate pala, me ei ni guale a maulina.

<sup>37</sup> Ma vuana oo dani odo, ei a vuana vit ue sei golu, ei a vuana moni me ei ma lagu oto tomane a vit ue sei golu ei ni palea mulimuli.

<sup>38</sup> Me na masagana mine ei oto, Salemo ei biliiili a lalana ma uliulina ma laulauna ue sei golu na matamatana vuana inani vuso. Maidolo me sou vuso sou gualeale a matana vovo sea ane sou oto.

<sup>39</sup> Vovo vuso ei ma tasa moni oto. Boa. Vanunua sou isa a matana vovo tasa, ma viuviu a matana vovo sea, ma manumanu a matana vovo sea, ma aiaia sou a matana vovo sea.

<sup>40</sup> Golugolu mina langi sou isa a matana vovo mine sou, ma golugolu mina magamaga tamai sou isa a matana vovo mine sou. Moni a malasana golugolu mina langi, ei a matana tasa, ma malasana golugolu mina magamaga ei a matana sea.

<sup>41</sup> Oaso i isa a matana malasana tasa, ma game ei isa a matana malasana sea, me sou a mataidoido sou isa a matana malasana sea. Me sou a mataidoido tastasa tamai sou isa a matana malasana mine sou oto.

<sup>42</sup> Inigogona mina bibi i matesi me ei ilisiliu, ei maido moni. Vovo eitou peilai, ei mamaumau. Vovo i ilisiliu, ei ni ma mamau oto.

<sup>43</sup> Vovo eitou peilai, ei a golu pagu. Vovo ei ilisiliu, ei kubaana sele. Vovo eitou peilai, ei ma isa oto a sagalina. Vovo i ilisiliu, ei isa a sagalina.

<sup>44</sup> Vovo eitou peilai, ei mina magamaga. Vovo ei ilisiliu, ei mina langi.

Vovo mina magamaga ino, ma vovo mina langi tamai ino.

<sup>45</sup> Laulau mine Salemo i vei maido, “Munugana bibi, e Adam, ei guale a maulina.” Moni e Adam tasa sea ei palea mulimuli sele, ei palea a nunu mina biliina maulina na vanunua.

<sup>46</sup> Maulina mina nunu ei ma palea pala oto. Boa. Maulina mina magamaga ie, ei palea pala. Ma maulina mina nunu ei palea mulimuli.

<sup>47</sup> Munugana Adam ei mina magamaga. Salemo i vie ei a magamaga moni. Adam maluanai ei mina langi.

<sup>48</sup> Vanua vuso mina magamaga, sou tomane moni a bibi mina magamaga iedo. Me sou vuso a vanua mina langi ne sou palea matana tasa tomane a bibi mina langi odo.

<sup>49</sup> Seidei eitou muina tasa moni tomane a bibi mina magamaga ie, me maido moni mulimuli neitou muina tasa moni tomane a bibi mina langi iedo.

<sup>50</sup> Tamtamaigu, eau vei sagali le amutou, bibi mina magamaga ieli ei ma mapigogoi ete ni guale sou a golugolu doana mina niitealalena mine Salemo. Ma golu mina mamauna ei ma mapigogoi ete ni guale a golu i ma mamaumau oto.

<sup>51</sup> Amutou longe. Eau kale na veipale a inade tasa i ovu usino ne amutou. Eitou vuso neitou ma mate oto. Moni e eitou vuso neitou sauvule me neitou palea sea.

<sup>52</sup> Ieli ei ni palea asi sele na ilala mina punuluna tuai i tangi. E, a tuai ni tangi, me sou a vanunua ma tavivine sou matesi ne sou ilisi, me sou ma mapigogoi ete ne sou mamau lou. Me eitou a vanua saboa mate, neitou sauvule me neitou palea sea.

† 15:32 Aisaia 22:13

<sup>53</sup> Ei maido. Vovo ei mamaumau odo, ei ni sauvule mei ni muina kuba taliuliu. Vovo ei matemate do, ei ni sauvule mei ni muina mauili taliuliu.

<sup>54</sup> Patotona, vovo i mamaumau odo, ei ni sauvule mei ni muina kuba taliuliu. Ma vovo ei matemate do, ei ni sauvule mei ni muina mauili taliuliu. Na ilala do inade ino na Laulau mine Salemo, ei ni palea sele. Laulau mine Salemo i vei maido, "Salemo ei vululusi a maubina mei mapuli sele a minate.<sup>‡</sup>

<sup>55</sup> "Minate, sagalina minio ino iva mina taupuine sou a vanunua?

Minate, lumusu minio ino iva mina toegegeline sou a vanunua?"<sup>§</sup>

<sup>56</sup> Lumusu mina minate, ei a sinusu moni, ma sinusu i guale a sagalina minei na binea.

<sup>57</sup> Moni eitou toledadangi e Salemo. Na sagalina mine Bibi Taula mine eitou Iesu Krai, Salemo i toesagaligali e eitou me eitou vululusi a maubina.

<sup>58</sup> Maido me tamtamaigu ivu, namutou muina sagali, me mu ma suduliliuliu lou, me taliuliu namutou pipigo sagali ane Bibi Taula. Vuna maido amutou muada i, pipigona sagali mine amutou ei ni ma buale sabubu oto.

## 16

*Niabi sou masosove usino na viepiluna kinaka ne Ierusalem*

<sup>1</sup> Seidei eau kale na ade a niabi odo amutou kale namutou bilii e sou a vanunua ma tavivine mine Salemo ne Ierusalem. Eau maite a vea na gunolina pipigona do ne sou a viepiluna kinaka ne Galesia, me amutou tamai namutou goli a inigogona tasa moni.

<sup>2</sup> Na munugana malada mina wik vuso amutou vuso tastasa namutou tause a vatu amutou guale na wik iodo me a vatu ni sala-suu sapa uata. Maido ma ilala eau sibitala, namutou ma pipigo oto a punogena vatu mina biliine sou.

<sup>3</sup> Ilala eau sibitala, io amutou oto namutou vileale a vanua sanii mina maasina niabi mine amutou odo usino ne Ierusalem. Eau na bilii e sou a laulau me eau na peltase sou usino.

<sup>4</sup> Mane eau damu i doana eau tamai na asu, io sou ne sou asu pilu e eau.

*Pol ei kale ni asu ni ite sou e Korin*

<sup>5</sup> Eau na asu ne Masedonia pala, me mulimuli eau na asu sibitala le amutou.

<sup>6</sup> Me nane eau na muigu sapa pilu e amutou mapigogoi na ilala na maigina ma avivili sagali ei pulu. Maido ma ilala eau kale na asu usino, io namutou buloi e eau a inasu.

<sup>7</sup> Eau ma kale ete na muigu a ilala boto moni pilu e amutou. Boa. Mane Bibi Taula ei itetase eau, eau kale na ugu tabaa sapa pilu e amutou.

<sup>8</sup> Moni eau kale na muigu nani ne Epesus mapigogoi na malada mina Pentikos,

<sup>9</sup> vuna Salemo ei peesi a vea ane eau, me eau isa a pipigona buo mina buloina vanunua ma tavivine makuba sou palea a kristen. Me tamai, a vanua makuba sou butuale amiteu.

<sup>10</sup> Mane Timoti ei sibitala le amutou, io namutou buloi e ei ni ugu a lilomeana balivua ne amutou, me ei ni ma laelae lou. Amutou longe. Ei goligoli a pipigona mine Bibi Taula, tomane eau oto eau goli.

<sup>11</sup> Dae sanii mine amutou ne sou ite ei tomane a golu sabubu me ne sou lametase ei. Namutou buloi e ei na ilala ei kale ni ilisitase amutou me mu litase ei ni asu pilu a lilomeana, me ei ni veteliuale eau. Eau magitali e ei ni asu usinani pilu e tamtamaina.

<sup>12</sup> Ma inade mine tamaine eitou e Apolos, ei maido. Ilala papaina eau ade sagali ane ei ni asu pilu e sou e tamtamaina sanii na ilala sou asu usino a niitene amutou. Moni ei ma kale sape ete ni asu usino seidei. Mulimuli mane ei oto i somiale ei a ilala doana na inasu usino, io ei ni asu usino.

*Inade sanii lou*

<sup>13</sup> Amutou namutou ulago kuba me mu magili sagali na silimulina. Namutou ugu sagali, me amutou ma laelae lou a golu tasa.

<sup>14</sup> Me amutou namutou bilii a lilone amutou usino ne Salemo me usino ne sou a vanua, me na inigogona maido namutou goli a golugolu vuso.

<sup>15</sup> Tamtamaigu, amutou muada e sou a abuna mine Stephanas. Sou palea a kristen pala ane sou a abuna sanii ino ne Akaia. Me na masagana mine sou oto sou buloi a vanunua ma tavivine mine Salemo.

<sup>16</sup> Namutou matano moni ane sou a matana vanua maido me sou a vanua sou buloi e sou me sou toe a matana pipigona do.

<sup>17</sup> Stephanas me Portunatus me Akaikus sou asuale eau, me eau mongemonge a nitene sou, vuna amutou vuso ma mapigogoi ete namutou asu usinani me mu ite eau

<sup>18</sup> me sou toe a lilogu i mea, ma lilone amutou tamai. Namutou mongemonge e sou a matana vanua do.

<sup>19</sup> Sou a viepiluna kinaka ne Esia sou vate oaso usino ne amutou, Akila me Prisila pilu e sou a vanunua ma tavivine na viepiluna kinaka sou viepilupilu na luma mine sulu, sou vate oaso buo sele usino ne amutou na aisane Bibi Taula.

<sup>20</sup> Sou e tamtamaigu sou vate oaso usino ne amutou. Na inigogona mine eitou a vanunua ma tavivine mine Salemo, amutou vuso tastasa namutou gamumi e sou sea.

<sup>21</sup> Eau e Pol, na limagu oto eau niage a oaso minau usino ne amutou.

<sup>22</sup> Mane a bibi tasa ei ma kale ete ni bilii a lilone ei usino ne Bibi Taula, io ei ni mamau. Asu usinani, oo Bibi Taula!

<sup>23</sup> Dinodo mine Bibi Taula Iesu ei ni muina pilu e amutou.

<sup>24</sup> Ne Krais Iesu, eau bilii a lilogu usino ne amutou vuso.



## 2 Korin Maluana Laulau Pol ei niage usino ne sou e Korin

*Pol ei vei oaso doana usino ne sou e Korin*

<sup>1</sup> Eau e Pol, na masagana mine Salemo oto ei vileale eau a aposel mine Kraiss Iesu. Eau pilu e tamaine eitou e Timoti amilu niage a laulau ieli usino na viepiluna kinaka mine Salemo ino ne Korin pilu e sou a vanunua ma tavivine mine Salemo ino na avena vuso ne Akaia.

<sup>2</sup> Salemo Tamane eitou pilu e Bibi Taula Iesu Kraiss, ne sulu dode amutou me ne su toemea a lilone amutou.

*Pol ei toledadangi e Salemo*

<sup>3</sup> Eitou beilange a aisane Salemo, ei e Tamane Bibi Taula mine eitou Iesu Kraiss. Ei a vuna inigogona dinodo ma inigogona lilomulina vuso.

<sup>4</sup> Ei e Salemo mina maalilimena vanunua sou isa a mavaana. Mavaana vuso i palea le amiteu, moni Salemo ei maalilime amiteu. Maido me amiteu mapigogoi namiteu maalilime a vanunua sou isa a matamatana mavaana tomane Salemo i maalilime amiteu.

<sup>5</sup> Davutina buo Kraiss ei tabule, iede amiteu tamai tabule, tomane moni a maalilimena buo mine Kraiss ei vonu sele ne amiteu.

<sup>6</sup> Mane amiteu tabule a mavaana, iede mina maalilimene amutou, me mine Salemo ni gualieliu e amutou. Mane Salemo i maalilime amiteu, iede mina maalilimene amutou tamai. Maido me amutou mapigogoi namutou magili sagali me mu tabule a davutina tomane amiteu tabule.

<sup>7</sup> Me amiteu silimuli sagali sele maido namutou magili sagali. Amiteu muada, amutou tabule a davutina pilu e amiteu, maidolo me ne amutou guale a maalilimena pilu e amiteu tamai.

<sup>8</sup> Tamtamaigu, amiteu kale ne amutou muada a mavaana iodo i palea ne amiteu na avena buo ne Esia. A mavaana buo lou ei toebose amiteu, me ei vululusi sele a sagalina amiteu isa i. Maido me amiteu damu ve namiteu mate.

<sup>9</sup> Ivu sele, amiteu somiale namiteu mate tomane a bibi na vilemulialena ei vei le amiteu. Ma golu ie i palea maido namiteu ma soetase etesi a sagalina mine amiteu oto, moni ne amiteu soetase moni a sagalina mine Salemo, ei mailisi liuliu a vanunua sou matesi.

<sup>10</sup> Golu mamau sele ieli ei mapigogoi sele ni valiputemate amiteu, moni e Salemo ei

gualieliuosi e amiteu. Me mulimuli ei ni gualieliu lei e amiteu tamai. Amiteu silimuli sagali maido, ilala taliuliu a golu pagu ei kale ni toegegeli e amiteu, moni Salemo ni gualieliu e amiteu, me namiteu ugu kuba.

<sup>11</sup> Tomane moni amutou buloi e amiteu a kinaka, Salemo ni longe a kinaka mina vanunua ma tavivine papaina mei ni buloi e amiteu. Ma vanunua ma tavivine makuba ne sou ite do, me ne sou toledadangi e Salemo na golugolu ei goli mina buloine amiteu.

*Pol ei sauvule a damutatalana minei*

<sup>12</sup> Amiteu masalai e amiteu a golu tasa. Na lilone amiteu, amiteu muada i maido, amiteu goli a inigogona bilesi ma inigogona i moliana usino ne sou a vanunua ma tavivine me usino ne amutou bilesi tamai, ei a inigogona Salemo i bilii e amiteu. Amiteu ma goli ete a inigogona ieli na damutatalana i doana mina vanunua na magamaga, moni amiteu goli a dinodo mine Salemo.

<sup>13-14</sup> Amiteu niage moni a inade i mapigogoi namutou gi me ne amutou muada iiti a vuna. Amiteu ma niage ete a matana inade sea usino ne amutou. Ivu, seidei amutou ma muada iiti oto e amiteu, moni amiteu kale ne amutou muada iiti sele e amiteu mulimuli, me na malada na vavasana buo mine Iesu, Bibi Taula mine eitou, ne amutou masalai sele e amiteu na inigogona tasa moni tomane namiteu masalai e amutou.

<sup>15-16</sup> Eau silimuli sagali maido ne amutou mongemonge a inigogona eau goli, me na vuna moni iedo eau kale na ite pale amutou na inasugu usino ne Masedonia. Ma ilala eau ilisitase Masedonia eau damutale eau na vetelieu lou usino ne amutou me na inigogona ieli Salemo ei ni toe iiti amutou maluanai. Me namutou buloi tamai eau na inasugu usino ne Iudia.

<sup>17</sup> Moni posa matina amutou damu i eau a bibi mina adegatunana sabubu me eau sauvule a inade maisaba tomane sou a vanunua mina magamaga sou goligoli me eau longo "E" me "Boa" pilu, io? Boa vuso sele.

<sup>18</sup> Salemo ei ogomulimuli a inade vuso mine ei oto. Tomane moni eau ade ivu sele ane amutou, inade vuso eau goli le amutou, ei ma isa oto a nilongo "E" me "Boa" pilu.

<sup>19</sup> Iesu Kraiss, natune Salemo, eau pilu e Sailas me Timoti amiteu ademuada i balivua ne amutou, ei ma bibi oto mina nilongo "E" me "Boa" pilu. Boa. Taliuliu Kraiss ei longo "E" moni.

<sup>20</sup> Adegatunana papaina mine Salemo ino, me Kraiss ei veivei "E" na adegatunana vuso do, maido ma ilala eitou longe a inade

mine Salemo, na aisane Krai eitou vei taliuliu a inade, "Ei moliana," me eitou beilangelange a aisane Salemo.

<sup>21</sup> Me Salemo oto ei masagali e amiteu pilu e amutou, me eitou valitole Krai me eitou magili sagali. Me ei vileale eitou mine ei oto.

<sup>22</sup> Me ei tau a matailala mine ei oto usinani ne eitou mei iabi a Maolona Nunu ni muina na lilone eitou. Maolona Nunu ei tomane a matailala mina gatunasobe na golu i doana Salemo i kale ni bilii e eitou. Me eitou gualesi a Maolona Nunu.

<sup>23</sup> Na aisane Salemo, inade vuso minau ei patotona sele. Eau maiademuliosi maido eau na ma asu oto usino ne Korin, dae eau na adesinoa usino ne amutou, vuna eau vietole sele amutou.

<sup>24</sup> Amiteu ma vei oto maido ne amiteu iteale a silimulina mine amutou. Boa. Vuna silimulina ne amutou ei magili sagaliosi. Moni amiteu pipigopigo pilu e amutou mina mapalena munonge mine amutou.

## 2

<sup>1</sup> Maido me eau masagesi maido eau na ma bilii ete amutou a mavaana lou na inasuminau usino ne amutou.

<sup>2</sup> Mane eau toe mavae a lilone amutou, io sei eili ni mamongemonge e eau? Amutou eau bilii a mavaana do, amutou moni.

<sup>3</sup> Amutou a vanunua ma tavivine mina toemunongene eau, maido me eau ma kale ete na asu usino ne amutou mea guale a lilomavaana. Na vuna moni ieli eau niage a laulau eau masosove usino ne amutou lisa. Eau muadasi, mane eau mongemonge a golu tasa, io amutou vuso amutou mongemonge tamai a golu iedo.

<sup>4</sup> Ivu, ilala eau niage a laulau usino ne amutou, eau lilomomolu gegelu sele ma lilogu ei isa a mavaana buo sele ma matananugu i kokolo. Moni eau ma niage ete a laulau ieli mina biliine amutou a mavaana. Boa. Eau niage ne amutou muada i maido, eau kale mamai sele amutou.

*Sou e Korin ne sou lilotase a bibi ei goli a sinusu*

<sup>5</sup> A bibi tasa ei bilii a lilomavaana ne sou sanii, ei ma bilii ete eau a mavaana. Boa. Eau ma kale ete na goli a inade sagali papaina na golu ie, moni eau mapigogoi na vei maido, ei toe amutou vuso mu lilomavaa sapa.

<sup>6</sup> Moni a mapa pagu iedo papaina ne amutou sou vei a bibi iedo ni guale, ei mapigogoi e ei.

<sup>7</sup> Maidolo me puiale lou namutou goli a inigogona tasa sea seidei. Ei puiale namutou lilotase a sinusu minei, me mu toemea a lilone ei. Dae a lilomavaana buo mamau ni toebose sele a bibi iedo.

<sup>8</sup> Maido me eau kale namutou maite ei maido amutou kale sele ei.

<sup>9</sup> Laulau lisa eau niage do, ede mina tinovene amutou moni. Eau kale na muada i amutou ogomulimuli a inade minau na golugolu vuso, ue boa.

<sup>10</sup> Mane amutou lilotase a sinusu mine sei bibi, de eau tamai ea na lilotase. Mane a sinusu tasa eau na lilotase, de eau lilotasetase na matane Krai mina buloine amutou.

<sup>11</sup> Eau goli maido, vuna dae ne Satan ei auala ane eitou. Eitou muadasi i a damutatalana ma inigogona minei.

### *Pol ei kale ni ite Taitus*

<sup>12</sup> Ilala eau sibitala ne Troas mina veipalena malongolongona kubaana mine Krai, Bibi Taula ei masusulu a vea minau.

<sup>13</sup> Moni a lilogu ei ma puiale ete. Vuna maido, eau ma ite ete tamaine eitou e Taitus. Maidolo me eau ilisitase sou e Troas me eau asu sibitala na avena buo ne Masedonia.

*Na sagagalina mine Salemo sou a aposel sou vululusituli a maubina*

<sup>14</sup> Moni seidei eau toledadangi e Salemo, vuna taliuliu ei maasi e amiteu usino maisaba mina veipalena pipigona i sagali Krai ei goli mina gualeliune amiteu mei toe amiteu palea a abuna minei. Me na inigogona ieli abuna vanunua ma tavivine vuso sou muada e Krai. Ei tomane a manginana doana ei palea ma avivili maivele usino maisabe na avena vuso.

<sup>15</sup> Ivu sele, amiteu oto amiteu tomane a golu a manginana i doana, ede Krai i guale me ei iabi usino ne Salemo. Manginana golu ie ei vele bubula lilo ne sou a vanunua mine Salemo, me sou a vanunua sou buale tamai.

<sup>16</sup> Ane sou so buale, manginana do ei tomane a manginana minate, me ei mapalele a minate ne sou. Moni na abuna mine Salemo, manginana do ei tomane a manginana maulina, me ei mapalele a maulina ne sou. Sei mapigogoi sele ni goli a matana pipigona ie?

<sup>17</sup> Moni amiteu ma tomane ete sou sanii, sou asu maisabasaba me sou goli a pipigo vuvutina na inade mine Salemo. Amiteu guale a pipigona ieli maino ne Salemo oto me amiteu ma auala maisabasaba oto. Amiteu lilo tasa moni pilu e Krai, me na matane Salemo amiteu veimuadade bilei a inadenade ei bilii e amiteu.

### 3

*Sou a vanua na pipigona mina magilipiluna alaba*

<sup>1</sup> Amiteu kale namiteu toegolali e amutou lou ve namutou damu i amiteu a bilesina vanunua? Ue nane amiteu kale namiteu tagi e sou a vanua ne sou niage a laulau i vei le amutou maido, amiteu a doadoana vanua? Ue nane namiteu tagi e amutou namutou niage a matana laulau maido mina buloine amiteu? Boa vuso sele.

<sup>2</sup> Amutou oto amutou tomane a laulau mina vinei ana vanunua a inigogona mine amiteu. Ma inade vuso lilo na laulau ieli ei ino lilo na lilone amiteu, me sou vuso a vanunua ne sou ite me sou gi.

<sup>3</sup> Amutou tomane a laulau tasa maino ne Krai. Na pipigona mine amiteu Krai ei niage a laulau ie. Ei ma niage ete a nanu na niagona. Boa. Ei niage na Nunu mine Salemo ei ino taliuliu. Me ei ma niage ete muata na madumaduna vatu. Boa. Ei niage na lilone sou a vanunua ma tavivine.

<sup>4</sup> A vuna inade do ei maido, ne Krai moni Salemo ei matoale amiteu mina gunolina pipigona iedo, maido me amiteu muada i Salemo ei ni goli a pipigona minei ni palea doana sele.

<sup>5</sup> Ivu, amiteu ma vei ete ve amiteu oto amiteu goli a golu tasa. Boa. Salemo tasa moni ei toe amiteu mapigogoi na pipigona iedo.

<sup>6</sup> Me ei oto ei toe amiteu i mapigogoi namiteu muina a vanua na pipigona mina magilipiluna alaba. Magilipiluna iedo ei ma golu oto sou niage na laulau mina binea. Boa. Ei a golu mina Maolona Nunu. Inade mina binea ei valipute a bibi, moni a Maolona Nunu ei bililili a bibi a maulina.

<sup>7</sup> Damutale. Pipigona Salemo ei goli mina biliina binea lisa do, ei mapale a minate mina vanunua ma tavivine. Ma ilala Salemo ei niage a binea iedo na vatu me ei bilii e sou, a binea do ei asu pilu a muada buo mine Salemo. Maido me palapala lagune Moses ei muada mamau, a muada iedo bisii moni ei ni buale, moni sou e Israel sou ma mapigogoi ete ne sou ite a lagune ei.

<sup>8</sup> De pipigona Salemo ei bilii a vanunua ma tavivine a Maolona Nunu, ei vululusi sele a pipigona mina biliina binea, ma malasana buo mine Salemo ni buo mamau lou na pipigona do.

<sup>9</sup> Pipigona mina binea do ei vavasava ane eitou me ei vei neitou buale. Moni mane a pipigona iedo ei asu pilu a muada buo mine Salemo, io a pipigona mina gunolina vanunua ma tavivine ne sou palea bilesi na matane Salemo, ei ni asu pilu a muada buo mamau sele lou mine Salemo.

<sup>10</sup> Malasana buo mine Salemo ei ino makuba sele pilu a pipigona alaba do Salemo ei goli, me ei vululusi sele a muada mine Salemo ei ino pilu a pipigona lisa. Maido me seidei a muada mina pipigona lisa odo ei pulu vuso.

<sup>11</sup> Pipigona lisa iedo ei ma muina oto taliuliu, moni ei asu pilu a muada buo mine Salemo. Maido me eitou muada, a pipigona alaba ei muina taliuliu odo, ei asu pilu a muada buo lou mine Salemo.

<sup>12</sup> Amiteu isa a silimulina ieli, maido me amiteu malongo sagali.

<sup>13</sup> Amiteu ma tomane ete Moses. Na ilala muada do ei saboa buale na lagune ei, ei guale a maduna malo mei avisobe a lagune ei, ne sou e Israel ma ite ete.

<sup>14</sup> Ma damutatalana mine sou e Israel i sobo sele, ma ilala lisa pea seidei sou gi a inade mina magilipiluna lisa, sou ma mapigogoi ete ne sou muada a vuna inade sou longe do. Ei tomane a maduna malo do saboa ino, mei tabesobe a damutatalana mine sou. Bibi tasa ei ma taulele ete a malo do. Boa. Ne Krai tasa moni Salemo ei taulele a malo do.

<sup>15</sup> E, ilala vuso sou gi a binea mine Moses, maduna malo ei tabesobe a damutatalana mine sou i asu mapigogoi seidei.

<sup>16</sup> Moni mane a bibi ei sauvule a lilone ei usino ne Bibi Taula, de Salemo ei ni taulelele a maduna malo ei tabesobe a damutatalana minei.

<sup>17</sup> Bibi taula ei a Nunu, me mane a Nunu mine Bibi Taula ei ino na bibi tasa, io a golu tasa boa ei magilisobe a bibi iedo. Boa. Ei ino malamala.

<sup>18</sup> Me eitou vuso eitou ma isa oto a malo tasa ei taboboli a lagune eitou. Maido ma malasana buo mine Bibi Taula ei asu usinani ne eitou, me eitou palea tomane a niitoitona ei silida usino na vanunua ma tavivine sea. Taliuliu eitou gualeale a malasana do makuba mamau lou, me ieli ei sauvulevule eitou, me neitou palea tomane a nunu mine Bibi Taula oto. Bibi Taula ei a Nunu, mei toe simaido.

### 4

*Sou a aposel sou tomane a taogo a magamaga*

<sup>1</sup> Salemo ei lilomuli e amiteu me ei bilii e amiteu a pipigona ie. Maido me amiteu ma bale oto a pipigona ie. Boa.

<sup>2</sup> Amiteu lametasesi a matamatana inigogona pagu vanua sou ovu me sou goli. Amiteu ma asuasou oto na inigogona aualana. Me amiteu ma sauvulevule ete a inade mine Salemo. Boa. Amiteu malongolongo a inade ivu moni na avena muada, na vanua vuso ne sou gegemuliale a

inigogona mine amiteu, me na lilone sou ne sou muada i maido amiteu goli a pipigona i bilesi moni na matane Salemo.

<sup>3</sup> Mane a abuna vanunua sanii sou ma muada oto a malongolongo doana amiteu malongo i iodo, abuna vanunua do ne sou buale.

<sup>4</sup> Satan, ei e salemo auala na magamaga ie, ei tabesobesi a damutatalana mine sou a vanunua sou ma silimuli ete do, ma muada mina malongolongona kubaana mina dinodo ma lilomulina mine Krai ei ni ma mapigogoi ete ni gali ulilo na lilone sou. Me sou ma iteite ete Krai, ei a nunu ivu mine Salemo.

<sup>5</sup> Longe. Amiteu ma ademuadada oto a inigogona mine amiteu oto. Boa. Amiteu ademuadada maido, “Krais Iesu ei e Bibi Taula mine eitou, me amiteu ogomuli a inade mine Iesu me amiteu tomane a vanua na pipigona mine amutou.”

<sup>6</sup> Lisa otosi Salemo ei ade, “Lilo na tunuui muada ni lada.”\* Me seidei muada mine Salemo oto asu usinani ne amiteu, me ei goli a lilone amiteu ni muada mamau sele. Amiteu ite a lagune Iesu Krai me amiteu ite a muada ivu me amiteu muada a aisa buo ma sagagalina mine Salemo.

<sup>7</sup> Moni a golu doana ivu ieli ei eili ne amiteu, amiteu tomane a taogo a magamaga. Iede mine sou a vanunua ne sou muada i, a sagagalina buo sou ite iede ei a sagagalina mine Salemo, ei mine amiteu boa.

<sup>8</sup> Na avena vuso, matamatana mavaana ei palea ne amiteu, moni sou ma mapuli ivu ete a sagagalina mine amiteu. Golugolu makuba i toemaisabesabe a damutatalana mine amiteu, moni a damutatalana mine amiteu i ma bosa oto.

<sup>9</sup> Ilala vanunua sou toegegeligeli amiteu, moni Salemo ei ma itetase ete amiteu. Sou valibilibili e amiteu me sou toebose amiteu, moni amiteu ma mamau sele oto.

<sup>10</sup> Na vovone amiteu, taliuliu amiteu tabule a minate mine Iesu. Maido ma maulina mine Iesu tamai i palea muada na vovone amiteu.

<sup>11</sup> Amiteu pipigopigo ane Iesu, maido ma ilala vuso amiteu maui, vanunua sou tovetove ne sou valiputemate amiteu. Maido ma maulina mine Iesu tamai i palealea muada na vovone amiteu, a vovo do ei ni mate.

<sup>12</sup> Maidolo ma minate ei pipigopigo lilo ne amiteu, moni a maulina ei pipigopigo lilo ne amutou.

<sup>13</sup> Amiteu goli a matana pipigona tasa moni tomane a Laulau mine Salemo i ade i, “Eau silimuliosi e Salemo, maido me eau ademuada i.”† Amiteu tamai amiteu silimuli, maidolo me amiteu ademuadada i

tamai.

<sup>14</sup> Eau muadasi i maido, Salemo i mailisi e Bibi Taula Iesu, me ei ni mailisi e amiteu tamai pilu e Iesu, me ei ni maasi e amiteu pilu e amutou usino agavuale ei.

<sup>15</sup> Eau vei maido, vuna eau muada, golu vuso ieli ei palea ne amiteu mina buloine amutou. Me na inigogona ieli dinodo mine Salemo ei palealea na vanunua ma tavivine papaina mamau sele, ma vanunua ma tavivine do ne sou toledadangi mamai sele Salemo, me sou beilange a aisane ei.

#### *Maulina doana mina langi*

<sup>16</sup> Maidolo me amiteu ma suduliliu oto a pipigona mine Salemo, vuna, vovone amiteu i mamaumau, moni a lilone amiteu i palea alabalaba lou na malada taliuliu.

<sup>17</sup> Amiteu muada, mavaana sou ieli ma davutina amiteu tabulebule, sou ma buo mamau oto, me ne sou muine sou na ilala boto moni. Me ne sou buloi e amiteu na gualena aisa ma munonge buo taliuliu taliuliu. Me amiteu muada, golugolu doana ne amiteu guale do, sou vululusi sele a mavaana vuso ie.

<sup>18</sup> Eitou ma gemugemu oto usino ne sou a golu i mapigogoi neitou ite a matane eitou. Boa. Eitou gemu sagaligali usino na golugolu i ma mapigogoi ete neitou ite a matane eitou. Vuna a golu eitou iteite a matane eitou ei ni muina na ilala boto moni. Moni a golu sou doana i ma mapigogoi ete ne eitou ite a matane eitou odo ei muina taliuliu taliuliu.

## 5

<sup>1</sup> Maido me eitou muadasi i maido, mane a luma malo mina magamaga seidei eitou malu i ieli, ei ni mamau, io eitou isa a luma sea Salemo ei kale ni bilii e eitou. Luma do a vanua sou ma tige ete a limane sou. Ei ino oata na langi, me ei ni muina taliuliu taliuliu.

<sup>2</sup> Seidei eitou eili na luma ieli, me eitou tangitangi a muine eitou. Eitou kale mamai a gualena luma mine eitou odo ino oata na langi me ei ni avisobe e eitou tomane a kinainai.

<sup>3</sup> Vuna, ilala eitou kaiosi a kinainai iedo, ne eitou ma magili ai sabubu oto.

<sup>4</sup> Ilala eitou saboa ino na luma malo mina magamaga ie, eitou somialale a davutina me eitou tangitangi a muine eitou. Ei ma tomane ete eitou kale neitou kaitase a vovo mumugumugu. Boa. Eitou kale mamai a vovo alaba ei ino oata na langi, tomane eitou kai a kinainai alaba, ma vovo mina minate ieli ei ni sauvule usino na maulina ivu.

\* 4:6 Sinokona 1:3 † 4:13 Laulau na Inala 116:10

<sup>5</sup> Salemo oto ei masusulu e eitou mina gualena maolina iedo, me ei bilii e eitou a Maolona Nunu. Maolona Nunu ei tomane a munugana avena mine sou a golugolu doana Salemo i kale ni bilii e eitou. Me eitou gualesi a Maolona Nunu, maidolo me neitou muada, ivu sele ne eitou guale a golugolu vuso sanii tamai.

<sup>6</sup> Maido me eitou silimuli ieli me ei masagaligali a lilone eitou taliuliu. Eitou muada, ilala eitou saboa eili na vovo ie, eitou ma ino pilu oto e Bibi Taula na aubu minei.

<sup>7</sup> Seidei eitou silimuli moni e ei me eitou asu, moni eitou saboa to ite ei.

<sup>8</sup> Lilone eitou ei muina sagali, me eitou kale mamai neitou veletase a vovo ieli me eitou asu ugu pilu e Bibi Taula na aubu ei ino i odo.

<sup>9</sup> Golu tasa boa mane eitou eili na magamaga ieli ue oata na langi, taliuliu eitou masage a ogomulina inigogona Bibi Taula ei kale,

<sup>10</sup> vuna eitou muada, eitou vuso neitou sibitala na vavasana mine Krai. Mane eitou goli a inigogona doana na ilala eitou ino na vovo, ue mane eitou goli a inigogona pagu, eitou vuso tastasa neitou guale a mapa mapigogoi a inigogona eitou goli.

*Eitou buloi a vanunua ne sou lilo tasa pilu e Salemo*

<sup>11</sup> Io amiteu laelae e Bibi Taula me amiteu muina matano moni ne ei, maidolo me amiteu mailisi a damutatalana mina vanunua ne sou silimuli e ei. Salemo ei muadasi i a damutatalana vuso ma inigogona vuso mine amiteu. Me eau silimuli maido, na lilone amutou amutou tamai mu muada i maido amiteu goli a pipigona i bilesi.

<sup>12</sup> Na inade ieli amiteu ma toegolali ete amutou namutou damu ve amiteu a bilesina vanunua. Boa. Amiteu niage a inade ieli ne amutou masalai a inigogona mine amiteu. Amiteu kale ne amutou maliu a inade usino ne sou a vanunua sou beilange a aisane sou, me ne sou ma masalai ete a inigogona i palea na lilone sou.

<sup>13</sup> Mane patotona amiteu vauta, moni muina, vuna amiteu goli a pipigona mine Salemo moni. Mane amiteu damutale bilesi, io amiteu toe maidolo mina buloine amutou.

<sup>14</sup> Krai ei kale sele amiteu na lilone ei, me ieli ei mailisi e amiteu a pipigona. Amiteu muadasi i, Krai ei puisobe a muine eitou vuso mei mate, me na vea ieli eitou vuso eitou matesi.

<sup>15</sup> Krai ei matesi ane eitou vuso, maidolo ma vanunua sou mauli sou ma malu oto ane sou oto, boa. Sou malu moni ane Bibi ei

mate mei puisobe a muine sou mei ilisilui lou.

<sup>16</sup> Maido me seidei eitou ma vivileale ete a vanunua ma tavivine a inigogona mina magamaga. Ivu, lisa eitou vivileale a inigogona mine Krai a inigogona mina magamaga, moni seidei eitou ma vivileale etesi e ei na inigogona do.

<sup>17</sup> Maidolo me mane a bibi tasa ei valitole Krai, io Salemo ni toe ei palea a bibi alaba ivu. Longe kube. Seidei inigogona mumugu ei puluvusosi, ma inigogona alaba ei paleasi.

<sup>18</sup> Salemo oto ei mapalesi a golugolu vuso ie. Lisa eitou ino a butu minei, moni ne Krai ei toe eitou palea lilo tasa moni pilu e ei. Me ei bilii e eitou a pipigona mina toemamaline sou a butu minei ne sou palea lilo tasa pilu e ei.

<sup>19</sup> Salemo ei ino ne Krai mei toe a vanua vuso ne sou palea lilo tasa pilu e ei, me ei ma damutale etesi a sinusu vuso sou goli mei bilii e amiteu a pipigona mina veipalena inade ieli, mine sou a butu ne sou palea lilo tasa moni pilu e ei.

<sup>20</sup> Maidolo me amiteu guale a muine Krai me amiteu ademuada a inade minei tomane Salemo oto ei tole sou vuso a vanua na asene amiteu. Amiteu malongolongo a inade mine Krai ana vanua vuso maido, "Puiale namutou litase a inigogona butualena me mu palea lilo tasa moni pilu e Salemo."

<sup>21</sup> Krai ei ma goli ete a sinusu, moni Salemo ei taupilipili a sinusu vuso mine eitou muata ne ei, me Krai ei palea tomane a bibi mina gunolina sinusu sele. Salemo ei toe maido, ne eitou palea a bilesina vanunua ma tavivine mine Salemo lilo ne Krai.

## 6

*Sou a aposel sou tabule a mavaana papaina na pipigona mine sou*

<sup>1</sup> Amiteu pipigopigo pilu e Salemo me amiteu ade sagali ane amutou maido, "Amutou gualesi a dinodo mine Salemo, dae ne amutou litase sabubi a dinodo minei.\*"

<sup>2</sup> Salemo ei vei maido, "Na ilala na dinodo eau longe a tinola mine amutou, me na ilala na gualeliune amutou eau buloi e amutou."

Longe. Simonimoni ieli ei a ilala mine Salemo ei dode eitou. Seidei moni ieli ei a ilala mine Salemo ei gualeliu e eitou.

<sup>3</sup> Amiteu ma kale ete a vanunua ne sou adegegeli a pipigona mine amiteu ie. Maido

\* 6:1 Aisaia 49:8

me amiteu ma goligoli ete a golu tasa ei iububi a ubuna vanua ne sou bosa. Boa.

<sup>4</sup> Amiteu a vanua na pipigona mine Salemo, me taliuliu amiteu maiteite a inigogona doana mine amiteu usino na vanunua ma tavivine vuso. Amiteu magili sagaligali sele na mavaana i palealea ne amiteu, me na golugolu sou ma toekubekube ete amiteu, me na golugolu sou toegegeli e amiteu.

<sup>5</sup> Sou valibilibili e amiteu me sou tau e amiteu na luma na tunuui. Sou a butu sou magili saiiilili e amiteu me sou tole vau-teute amiteu. Amiteu mangavangava sele. Amiteu ma ngolo kubakuba oto me amiteu vitolotolo.

<sup>6</sup> Moni amiteu goligoli a inigogona maolo me amiteu lapitole a muadana doa. Amiteu ma sinoa asiási oto. Boa. Amiteu toekukube sou a vanunua ma tavivine. Amiteu goli a pipigona vuso ieli pilu a sagagalina mina Maolona Nunuu. Amiteu goligoli a inigogona ivu mina kinale sele ne sou usino. Amiteu ma adeade moni oto a asene amiteu. Boa.

<sup>7</sup> Amiteu malongolongo a inade i patotona, me amiteu goligoli a pipigona na sagagalina mine Salemo. Amiteu lapitolete a inigogona bilesi moni tomane a golu mina maubina ino na limana e gata me na limana e meli, me na inigogona ieli amiteu maububi a pipigona mine Salemo.

<sup>8</sup> Vanua sanii sou beilangelange a aisane amiteu, me sanii sou taupui a aisane amiteu. Sanii sou adeptintola ane amiteu, me sanii sou veivei ane sou usino ve amiteu goli a inigogona doana. Vanua sanii sou damu ve amiteu a vanua mina niioto. Moni boa, amiteu goli a inade i patotonatona moni.

<sup>9</sup> Amiteu tomane sou ma muada oto e amiteu, moni papaina mine sou sou muada e amiteu. Amiteu tomane a bibi bisii moni ni mate, moni amiteu saboa eili amiteu mauili. Amiteu tomane Salemo ei tibi e amiteu mina toebilelesine amiteu, moni ei ma valiputemate ete amiteu.

<sup>10</sup> Amiteu tomane amiteu ugu lilomavaa sele, moni taliuliu amiteu mongemonge. Amiteu eili tomane a vanua sou kapelabe, moni amiteu goli a vanunua ma tavivine sou palea vuvuti. Amiteu tomane amiteu ma isa oto a golu tasa, moni amiteu isa a golugolu vuso.

<sup>11</sup> Tamtamaigu ne Korin, amiteu ade-muada ane amutou, me amiteu bilii a lilone amiteu buo lou usino ne amutou.

<sup>12</sup> Amiteu ma lilosobo oto. Boa. Amiteu kale sele amutou. Moni amutou oto amutou lilosobo ane amiteu.

<sup>13</sup> Eau vei le amutou tomane tamana ei vei le natatuna. Ne amutou goli a matana

inigogona tasa moni tomane amiteu goli le amutou. Amutou tamai namutou bilii a lilone amutou vuso usinani ne amiteu.

#### *Eitou a luma mine Salemo*

<sup>14</sup> Ne amutou ma valitolete lei e sou so ma silimuli ete e Bibi Taula me mu ma pipigopigo pilu lou e sou. Inigogona bilesi ma inigogona mina saukikina binea, ne sulu pipigo pilu matina? Muada ei ni magili pilu a tunuui matina?

<sup>15</sup> Nane Krai ei maitamaina pilu e Satan, io? Bibi ei silimuli e Krai ma bibi ei ma silimuli ete, ne sulu lapitole a damutatana tasa, io?

<sup>16</sup> Luma mine Salemo pilu a luma na kinaka mine sou a salemo auala, ne sulu magili pilu matina? Amutou muada, eitou oto eitou a luma mine Salemo ei muina taliuliu, tomane lisa Salemo i vei, "Eau na muigu pilu e sou me eau asu balivua ne sou.

Me eau na muigu Salemo mine sou me ne sou muina a abuna vanunua ma tavivine minau."

<sup>17</sup> Maido me Bibi Taula i ade lou maido,

" 'Ne amutou ilisitase sou me amutou asu mu malu na avena tasa sea.

Me amutou tilale, dae ne amutou valitole amutou na golu i ma alaba oto na matane Salemo.†

Me eau oto na guale amutou

<sup>18</sup> me eau na muigu e Tamane amutou me ne amutou muina e natatugu.'

Bibi Taula, ei e Salemo ei isa a sagagalina vuso ei vei simaido."‡

## 7

<sup>1</sup> Tamtamaigu ivu, eitou gualesi a ade-gatuna mine Salemo ie, maidolo me ne eitou taulele a inigogona vuso mumugu mina vovo me mina nunu, me ne eitou palea alaba vuso na matane Salemo. Me ne eitou lae me neitou matano moni ne Salemo me ne eitou bilii e eitou vuso oto usino ne Salemo me neitou ogomuli ivu a inigogona maolo taliuliu.

#### *Pol ei mongemonge e sou e Korin*

<sup>2</sup> Amutou ne mu bilii a lilone amutou usinani ne amiteu. Amiteu ma goli ete a inigogona pagu usino na bibi tasa. Amiteu ma toegegeli ete a silimulina mina vanunua ma tavivine. Amiteu ma auala oto ana bibi tasa me amiteu guale a golugolu minei.

<sup>3</sup> Eau ma damutale ete na ubi e amutou a inade ie. Boa. Eau veiosi lisa, amiteu kale mamai sele e amutou me taliuliu amutou ino na damutatane amiteu, amiteu masusuluosi namiteu malu pilu e amutou ue mate tamai pilu e amutou.

<sup>4</sup> Eau veipale bilesi le amutou, me eau ma tau oovi ete a inade. Eau silimuli sagali e amutou mea masalai e amutou ma lilogu ei mea sele. Mavaana sou ieli ei palealea le amiteu, moni eau eili eau damutalete e amutou, me na lilogu munonge i vonu sele.

<sup>5</sup> Tauluna amiteu sibitala ne Masedonia, amiteu ma manoa sapa oto. Boa. Na avena iedo tamai a matamatana mavaana ei palea ne amiteu. Vanunua sou adesinoanoa ane amiteu, me amiteu saga sele me amiteu lae.

<sup>6</sup> Moni e Salemo ei maalimelime a vanunua ma tavivine sou lilomavaa, ei peltase Taitus usinani ne amiteu, me na inigogona ieli Salemo ei maalilime amiteu.

<sup>7</sup> Salemo ei maalilime amiteu na vea ieli moni, boa. Palapala amutou maalilime Taitus, me ei vei le amiteu a inigogona mine amutou odo. Maido me na inigogona ieli tamai Salemo ei maalilime amiteu. Taitus i vei le amiteu maido amutou kale mamai ne amutou ite eau, ma lilone amutou i momolu, me amutou damutale mamai ne amutou ugu lilo tasa pilu e eau. Maidolo me eau mongemonge mamau sele.

<sup>8</sup> Eau muada, laulau minau ei goli a lilone amutou i mavaa, moni eau ma damutale mamai ete ie. Lisa eau lilobuu, moni seidei boa. Eau muada, laulau iedo ei toe a lilone amutou i mavaa mei mamaele amutou, moni ei mina ilala boto moni.

<sup>9</sup> Me seidei eau mongemonge, moni eau ma mongemonge oto na tau e amutou na mavaana. Boa. Eau mongemonge, vuna maido lilomavaana ma maelana do ei toe amutou mu sauvule a lilone amutou. Eau muada, Salemo oto ei toe a lilomavaana ma maelana do ne amutou veteliu usino minei, maido ma inade mine amiteu ei ma toegegeli sape ete amutou. Boa.

<sup>10</sup> Lilomavaana ma maelana Salemo i mapalele, ieli ei toe eitou a vanua eitou sauvulevule a lilone eitou. Me na inigogona ieli Salemo ei gualeliulu e eitou, maido me mane eitou sauvule a lilone eitou, eitou ma kale ete neitou veteliu lou usino na lilomuguna mine eitou. Moni a lilomavaana ma maelana ei palea na inigogona mina vanua na magamaga, ieli ei mapalele a minate.

<sup>11</sup> Namutou damutatala kuba. Lilomavaana Salemo i bilii e amutou iedo, ei mapale a matamatana inigogona doana ne amutou. Na inigogona dolo Salemo i toe asi e amutou me amutou ilisi a masagana buo mine amutou me amutou toebilelesi a inade mine amutou. Ei mailisi e amutou a sinoana ana bibi ei goli a inigogona pagu, me ei toe amutou lae e Salemo. Seidei amutou lilobuu sele e amiteu, me amutou sagali a toebilelesina inigogona mina bibi ei goli a inigogona pagu. Na golugolu vuso

amutou goli mina toebilelesina inade ie, inigogona mine amutou ei maite muade maido, amutou ma isa oto a mamauna.

<sup>12</sup> Ilala eau niage a laulau do usino ne amutou, eau ma damutale ete a toebilelesina inigogona pagu bibi ei goli, ue eau ma damutale ete a bibi sea, ei guale a mavaana maino ne bibi iedo. Boa. Eau kale a inigogona doana mine amutou ni palea na avena muada, me na matane Salemo namutou muada kuba i maido, ivu amutou bilii a lilone amutou usinani ne amiteu. Na vuna moni ieli eau niages a laulau iedo.

<sup>13</sup> Me seidei inigogona mine amutou odo ei toe a lilone amiteu i tabuli kuba sele.

Moni amiteu mongemonge mamau sele lou, vuna amutou vuso amutou mapuli a lilobuuna mine Taitus, me amutou toe a lilona i kubaana.

<sup>14</sup> Lisa eau vei le Taitus a inigogona doana mine amutou me eau beilange a aisane amutou, me eau ma maela oto na inade minau ie. Vuna, inade vuso amiteu goli a inigogona mine amutou, ei patotona. Tomane moni seidei Taitus ei muada, inade amiteu vei mina beilangen a aisane amutou odo, ei patotona vuso.

<sup>15</sup> Ilala Taitus ei asuale amutou, me amutou guale ei pilu a nilae ma vovo palilina, me amutou vuso amutou ogomuli a inade minei. Ei saboa ino damutalete a inigogona mine amutou iedo me ei kale mamai sele amutou.

<sup>16</sup> Seidei eau mongemonge sele, vuna eau silimuli sagali maido, ne amutou goli a inigogona bilesi moni.

## 8

### *Niabi mine sou kristen ni pilu a lilone sou*

<sup>1</sup> Tamtamaigu, amiteu kale namutou muada a dinodo Salemo ei bilii a vanunua ma tavivine mina viepiluna kinaka ne Masedonia.

<sup>2</sup> Na ilala mavaana makuba i palea le sou me sou ugu kapelabe sele, moni Salemo i toe sou mongemonge mamau sele, me sou damutale sou a kristen sea me sou taupili a vatu makuba mina buloine sou.

<sup>3</sup> Eau adepalea maido, sou ogomuli a masagana mine sou oto me sou oabi lei muata lou na masagana mine sou oto.

<sup>4</sup> Sou ade sagali sele ane amiteu ne amiteu litase sou ne sou guale a balavana mina buloine sou a vanunua ma tavivine mine Salemo.

<sup>5</sup> Amiteu damu i maido, ne sou oabi a vatu sanii. Moni palapala sou bilii e sou oto usino ne Bibi Taula me usinani ne amiteu tamai mina ogomulina masagana mine Salemo.

<sup>6</sup> Lisa Taitus ei mailisi a niabi mina dinodo iedo balivua ne amutou. Maido me

amiteu ade sagali ne ei ni veteliu usino ne amutou mei mapuli a pipigona do.

<sup>7</sup> Amutou isa a silimulina, ma inade ma muadana. Me amutou tamai isa a masagana buo sele mina gunolina pipigona mine Salemo. Me amutou kale mamai sele amiteu tamai. Io tomane moni seidei ne amutou goli a inigogona doana mamau sele na pipigona mina niabi tamai.

<sup>8</sup> Eau ma ade sagali oto a inade minau ne amutou ogomuli. Moni eau ademuada ane amutou ve a vanunua ma tavivine sanii sou goli a pipigona ie na masagana sagali mine sou, me na inigogona ieli eau tove amutou ne amutou maite i maido, inigogona mine amutou mina kinale sele ne sou usino, ei a golu ivu.

<sup>9</sup> Amutou muadasi i a dinodo mine Bibi Taula mine eitou Iesu Krai. Ei vuvuti, moni ei palea tomane a kapelabena bibi. Ei palea a kapelabena bibi mina buloine amutou namutou vuvuti.

<sup>10</sup> Seidei eau kale na mapale a damutatalana minau usino ne amutou na pipigona do mina taupilina vatu. Na avala tasa pulosi odo amutou mailisi a pipigona iedo, me amutou kale mamai ne amutou goli simaido.

<sup>11</sup> Io, seidei i kubaana mane amutou mapuli a pipigona iede. Lisa lilone amutou ei ilisi a gunolina pipigona ie, me tomane moni seidei ne amutou mapuli sele a pipigona ieli a golugolu seidei amutou isa i.

<sup>12</sup> Ei a golu tasa buo boa visa amutou oabi. Salemo ei ni guale a golugolu mina niabi amutou isa i, ei ni ma guale ete a golugolu amutou ma isa oto i.

<sup>13</sup> Eau ma kale ete ne amutou tabule a mavaana buo, ne sou a vanunua ma tavivine sea ne sou ugu kuba. Boa. Eau kale ne eitou vuso neitou malu na matana tasa moni na inigogona mina maibuloina.

<sup>14</sup> Seidei na ilala ieli amutou isa a golu papaina, me namutou oabi a golugolu mina buloina vanunua ma tavivine sou boto. Me mulimuli, mane amutou boto me sou isa i makuba, io ne sou oabi a golugolu mina buloine amutou. Maido me amutou vuso namutou goli a matana inigogona tasa moni, me amutou vuso namutou ugu kuba.

<sup>15</sup> Ei tomane a Laulau mine Salemo i vei, "Inani mine sou a vanua sou guale papaina, ei ma valagege oto. Ma vanua sou guale alabaini moni, gona inani mine sou i ma boto oto."\*

*Pol i peltase Taitus usino ne Korin*

<sup>16</sup> Taitus tamai ei kale mamai sele ni buloi e amutou tomane amiteu. Maidolo me eau toledadangi e Salemo.

<sup>17</sup> Amiteu tagi e ei ni veteliu usino ne amutou, mei longo. Moni ei tamai kale sele ni goli a pipigona do, maido me na masagana minei oto ei asu usino ne amutou.

<sup>18</sup> Me amiteu peltase tamaine eitou tasa ei asu pilu e ei. Na viepiluna mina kinaka vuso sou muada maido, a pipigona minei mina veipalena malongolongona kubaana i doana.

<sup>19</sup> Me ieli moni boa, sou a viepiluna kinaka sou matoale ei ni asu pilu e amiteu, me ei buloi e amiteu a gunolina pipigona niabi ie. Amiteu goli a pipigona ieli mina beilangena aisane Bibi Taula oto, me mina maitene sou a vanua maido, lilone amiteu i ilisi a gunolina pipigona ie.

<sup>20</sup> Amiteu ma kale ete ve tasa mine sou ni poge a sinusu mina vea amiteu lapitole a niabi buo mine amutou. Maido me amiteu peltase a tamaine eitou ieli pilu e Taitus usino ne amutou.

<sup>21</sup> Amiteu kale ne amiteu iteale amiteu oto mina gunolina inigogona doana ieli na matane Bibi Taula me na matane sou a vanunua ma tavivine tamai.

<sup>22</sup> Me amiteu peltase tamaine eitou tasa tamai ni asu pilu e sulu. Mapapaina amiteu tove ei a matamatana pipigona, me amiteu ite ei isa masagana sagali sele mina gunolina pipigona minei. Ei muada sele i maido ne amutou goli a inigogona doana moni, maido me seidei ei isa a masagana buo mina gunolina pipigona ie.

<sup>23</sup> Taitus pilu e eau, amilu a pipigona tasa moni mina buloine amutou. Me ne tamaine eitou lua iede, ne amutou muada i maido, sulu magili ane sou a viepiluna kinaka, me sulu beilangelange a aisane Krai na pipigona mine sulu.

<sup>24</sup> Ne amutou maite a kinale selena mine amutou usino ne sou a vanua do, maido me ne sou a viepiluna kinaka sou muada ivu a inigogona mine amutou, me ne sou muada, amiteu ma masalai sabubi ete a inigogona doana amutou goligoli.

## 9

*Niabi mine sou e Korin*

<sup>1-2</sup> Eau muadasi i, lilone amutou i sagali sele a pipigona do mina buloine sou usino, me eau beilange a aisane amutou na matane sou e Masedonia maido, "Na avala tasa pulosi odo sou e Akaia sou masusuliosi a mailisina pipigona iedo." Ma ilala sou longe a inade do maido, lilone amutou i sagali sele a pipigona do mina buloine sou usino, iede ei mailisi a lilone sou e Masedonia makuba tamai. Maido me eau ma isa oto a vuna eau niage a inade lago na golu ie.

\* 8:15 Gualeliuna 16:18



<sup>3</sup> Moni eau peltase tamtamaine eitou sanii usino ne amutou, vuna eau ma kale ete a inade amiteu vei mina beilangena aisane amutou iedo ni palea tomane a inade sabubu. Eau kale ne amutou masusulu a niabina golugolu ie tomane eau ade ane sou ie.

<sup>4</sup> Moni mane na ilala sou e Masedonia sou pilu e eau amiteu sibitala ne amutou me amiteu ite amutou saboa masusulu, ne amiteu guale a maelana a golu ieli amiteu silimuli i me amutou tamai.

<sup>5</sup> Maidolo me eau damutale eau na vei le sou e tamtamaine eitou ne sou asu pala usino ne amutou, me sou buloi e amutou a masusuluna niabi iedo amutou veiosi a sinovena usino. Maido ma vanua ne sou ite maido amutou mongemonge a biliina niabi iedo, me ei ma tomane ete amiteu lapuale a vatu mine amutou.

<sup>6</sup> Amutou damutale kube ie. Bibi ei dani a vuana gona inani ma makuba oto, ei ni guale a inani ma makuba oto. Ma bibi ei dani makuba, ei ni guale makuba.

<sup>7</sup> Maido me amutou vuso tastasa namutou damutatata kuba pala me mu muada kuba a sei golu amutou kale ne amutou oabi. Dae a bibi tasa ei ni lilomavaa a biliina golu mei ni damu i a vanua sou sagali mamau ne ei ni iabi. Inigogona mina niabi do ei ma doana oto. Salemo ei kalekale a bibi ei mongemonge me ei iabi a golu na masagana minei oto.

<sup>8</sup> Me Salemo ei mapigogoi ni bilii a golu doana vuso usino ne amutou, me taliuliu ne amutou isa a golugolu makuba sele, maido amutou mapigogoi namutou goli a golugolu vuso i doana.

<sup>9</sup> Laulau mine Salemo i ade maido, “Bibi iedo ei iabi maisabe a golu makuba usino na vanua sou kapelabe.

Bilesina inigogona minei i muina taliuliu.”\*

<sup>10</sup> Salemo ei biliili a vuavua na inani usino na bibi mina dinani na mauma, me ei biliili a gona inani tamai usino na vanunua ma tavivine. Tomane moni e Salemo ni bilii e amutou a golugolu me ne amutou buloi a vanunua ma tavivine sanii sea. Ma inigogona doana mine amutou ni palea buo lou, tomane a vuavua gona inani mina mauma ei palea makuba lou.

<sup>11</sup> Salemo ei ni bilii e amutou a mata-matana golugolu papaina, maidolo me mapigogoi ne amutou bilii a golu papaina usino ne sou sanii sea. Ma niabi mine amutou amiteu maasi usino, ei ni mailisi a vanunua ma tavivine ne sou toledadangi e Salemo.

<sup>12</sup> Pipigona amutou goli iede ei ni buloi a vanunua ma tavivine mine Salemo ne sou ma boto oto a golu tasa, me tamai ei ni toe e sou ne sou toledadangi mamai lei e Salemo.

<sup>13</sup> Pipigona amutou goli iedo, ei ni mapalemuade a inigogona doana mine amutou. Me ne sou muada i maido, amutou guale ivu a malongolongona kubaana mine Krai me amutou ogomulimuli kube a inade minei. Me ne sou ite a golu papaina amutou bilii e sou me a vanunua ma tavivine sea tamai, me ne sou beilange a aisane Salemo.

<sup>14</sup> Ne sou muada i maido, dinodo mine Salemo i vonu sele ne amutou. Maido me ne sou kale mamai e amutou, me ne sou kake Salemo ei ni maibalave amutou.

<sup>15</sup> Ne eitou toledadangi sele e Salemo a niabi buo mamau ei bilii e eitou, i ma mapigogoi ete ne eitou ademuada i a inade vuso ne eitou.

## 10

*Pol i malii a inade mina vanua sou kale ne sou tauipi a pipigona minei*

<sup>1</sup> Vanunua sanii sou ububi e eau a inade maido, “Ilala Pol ei muina pilu e eitou, atena pansaesae, moni na ilala ei muina bulago ei ade sagali ane eitou.” Moni eau e Pol, eau kale ne amutou damutaletale a inigogona Krai ei goli mina tauipine ei oto me ei goli a inigogona mea usino ne sou a vanunua.

<sup>2</sup> Eau vei le amutou maido, amutou tilale, dae ne eau na bilii a inade sagali ane amutou na ilala eau sibitala mea malu pilu e amutou. Eau damutale eau na bilii a inade sagali usino na vanunua dolo sou damu ve amiteu ogomulimuli a inigogona mine sou a vanua mina magamaga.

<sup>3</sup> Ivu, amiteu malumala na magamaga ieli, moni amiteu ma maububi oto tomane a vanua mina magamaga.

<sup>4</sup> Golugolu vuso mina maubina amiteu lapitole, sou a golu mina magamaga ieli boa. Sou isa a sagagalina mine Salemo, me sou mapigogoi ne sou valipee a bigomu sagali mine sou a butu.

<sup>5</sup> Amiteu tauipi a matana vautana damutatalana vuso ma adeaulana i tabulisobe a vea mina vanua ne sou muada e Salemo. Me amiteu bingpipili a damutatalana vuso mine sou a vanua, ne sou ogomuli a masagana mine Krai.

<sup>6</sup> Mane amutou ogomuli iiti sele a inade mine amiteu, de amiteu masusulu ne amiteu malaitabe a vanua vuso mina saukikina inade.

<sup>7</sup> Amutou gegemuliale a golugolu sala moni. Mane a bibi tasa ei damutale maido ei oto ei ino a bibi ivu mine Krai, io ei ni

\* 9:9 Laulau na Inala 112:9

damutatata kuba me ei ni muada i maido, amiteu tamai amiteu ino a bibi mine Krai.

<sup>8</sup> Bibi Taula ei bilii e amiteu a mui, ne amiteu masagali a silimulina mine amutou, me ei ma kale ete ne amiteu toegegeli e amutou. Maido me mane eau mongemonge me eau beilange sape a aisane amiteu na pipigona amiteu goli ieli, eau ma maela oto a inade eau goli ie.

<sup>9</sup> Moni eau ma kale ete ne amutou damu ve eau a bibi mina niagena laulau mina toenilaene amutou.

<sup>10</sup> Vanua sanii sou vevei maido ane eau, "Laulau vuso mine Pol ei isa a matamatana inade sagali, moni na ilala ei oto ei sibitala mei ade ane eitou, eitou ite ei ma sagali oto, ma malongona minei ei ma kubaana oto."

<sup>11</sup> Vanua sou adeade a inade maido, ne sou damutatata kuba me ne sou muada i, inigogona amiteu goli na ilala amiteu malu pilu e amutou, ei ogomuli bilesi a inade amiteu niage do na laulau na ilala amiteu malu bulagotase amutou.

<sup>12</sup> Amiteu ma mapigogoi ete ne amiteu vei ve amiteu tasa moni tomane a vanua sanii sou mongemonge me sou beilange-lange a aisane sou oto moni. Vanua sou oto sou vilemuliale a inigogona mine sou na vilemulialena mine sou oto me na vilemulialena mine sou tastasa moni. Vanua sou toe maido, sou ma isa ivu oto a muadana.

<sup>13</sup> Moni amiteu namiteu ma masalai ete amiteu mamau lou pea na sinuana mine amiteu. Boa. Ne amiteu vei a pipigona do Salemo ei tau ane amiteu moni i asu pea ne amutou e Korin tamai.

<sup>14</sup> Amiteu ma masalai mamai ete amiteu a golu amiteu goli. Vuna, amiteu moni amiteu maasi pale a malongolongona kubaana usino ne amutou e Korin.

<sup>15</sup> Amiteu ma seuti ete a sinuana pipigona mine amiteu me amiteu beilange a aisane amiteu oto na pipigona a vanunua sanii sea sou goli. Boa. Amiteu kale a silimulina mine amutou ei ni palea sagali, ma pipigona mine amiteu ni palea buo balivua ne amutou.

<sup>16</sup> Maido me ne amiteu maasi a malongolongona kubaana usino na aveavena do i ino usino lou na avena mine amutou. Me amiteu ma asu oto usino na aveavena a vanua sanii sou pipigosi i, vuna amiteu ma kale ete ne amiteu beilange sabubi a aisane amiteu na pipigona sou a vanua sea sou goli palesi.

<sup>17</sup> Laulau mine Salemo ei vei maido, "Bibi ei kale ni masalai, ei ni masalai a golu Bibi Taula ei goliosi."\*

<sup>18</sup> Eitou muada, bibi ei masalai ei me ei beilange a aisane ei oto, bibi iedo ei ma isa oto a aisa na matane Salemo. Boa. Mane

Bibi Taula ei beilange a aisana bibi tasa, bibi moni iodo ei isa a aisa ivu.

## 11

*Pol ei ma tomane ete sou a aualana aposel*

<sup>1</sup> Eau kale ne amutou itetase eau na ade sape a inade i ma puiale ete. Mapigogoi ne amutou itetase eau?

<sup>2</sup> Salemo ei isa a masagana sagali sele na vanunua ma tavivine ne sou malu matano ne ei tasa moni, me na inigogona tasa moni eau tamai ea isa a masagana sagali ne amutou ogomuli ivu e Salemo. Eau oto eau matoale amutou ne amutou palea a abuna mine Krai, me eau kale na bilii e amutou usino ne Krai tomane eau lantetase a tavine alaba ei maolo usino na bibi ei kale ni tavui e ei.

<sup>3</sup> Lisa oto sele aliusu ei iotetase Iv. Me eau lae, dae a matana golu maido ni palea ne amutou, ma damutatana mine amutou ni maitavivili me amutou litase a inigogona maolo ma damutalene Krai.

<sup>4</sup> Eau muada, vanua sanii sou asuasu usino ne amutou me sou malongo e Iesu tasa sea, ei ma Iesu ivu oto lisa amiteu malongolongo i. Me na inigogona iedo amutou gualeale a matana nunu sea, ei ma Maolona Nunu oto lisa amutou guale do. Me amutou gualeale a malongolongona sea i ma patotona oto, ei ma tomane ete a malongolongona kubaana amutou gualesi odo. Me eau muada, ilala sou toe a inigogona ieli balivua ne amutou, amutou mongemonge moni a nilongena inade mine sou.

<sup>5</sup> Longe. Eau muada eau ma matano sapa oto ane sou a munugana aposel mine amutou iede.

<sup>6</sup> Golu tasa boa mane eau ma muada kuba oto a vea mina malongona inade, moni muadana minau ei ma boto sapa oto. Taliuliu na inigogona vuso amiteu goli, amiteu maite a muadana ieli usino ne amutou.

<sup>7</sup> Amutou muada, ilala eau malongo a inade mine Salemo usino ne amutou, eau ma guale ete a mapa na pipigona ie. Na inigogona ieli eau taipui e eau oto, ne eau na beilange e amutou. Posa matina? Nane na inigogona minau ieli, eau goli a sinus, io?

<sup>8</sup> Eau guale a vatu ue a golu mina viepiluna kinaka sea, mina buloine eau na pipigona balivua ne amutou. Na inigogona ieli ei tomane eau paaali a golugolu mine sou.

<sup>9</sup> Ilala eau malu pilu e amutou, mane eau boto a golu tasa, eau ma bilii ete a mavaana usino ne amutou. Tamtamaigu sou ilisitase Masedonia me sou sibitala ne Korin, sou

\* 10:17 Ieremaia 9:24

iteale eau na golugolu vuso eau boto i. Eau damutale, seidei me mulimuli eau na ma bilii sape ete amutou a mavaana.

<sup>10</sup> Inade ivu mine Krai ei eili pilu e eau, me eau ade ivu sele maido, na avena buo mine Akaia bibi tasa ei ma mapigogoi ete ni madetase eau na masalaina aisagu ie.

<sup>11</sup> Me posa matina eau goli maido? Nane eau ma kale mamai ete amutou, io? Boa vuso sele. Salemo i muada i maido, eau kale mamai sele amutou.

<sup>12</sup> Moni a vanua sanii sou kale ne sou poge a vea mina beilangena aisane sou oto ne sou palea matana tasa tomane amiteu na matane sou a vanunua. Moni eau na pipigo moni a inigogona eau gologoli, maido eau na magilisobe a vea ieli mine sou.

<sup>13</sup> Vanua sou odo sou a aualana aposel ma aualana vanua na pipigona. Sou sauvulevule a inigogona mine sou, ne sou damu i e sou ino vanua na aposel ivu mine Krai.

<sup>14</sup> Me amutou ma sagasaga lou a inigogona sou goli iodo. Eitou muada, Satan sauvulevule ei tamai mei palea tomane a bineanea mina muada.

<sup>15</sup> Maido me mane a vanua na pipigona mine Satan tamai sou sauvule a inigogona mine sou me sou toegolali a vanua ni damu e sou tomane a vanua na pipigona mina inigogona i bilesi, iedele neitou ma sagasaga lou. Mulimuli ne sou guale a mapa i mapi-gogoi sele a inigogona sou goli iodo.

*Pol i tabule a mavaana makuba na ilala ei goli a pipigona aposel*

<sup>16</sup> Eau ade lou maido Ilala ea ade sape a in-ade i ma puiale ete, amutou ma damudamu lou ve eau a bibi tasa vauta. Moni mane amutou damu ve eau vauta, ei tamai puiale. Moni amutou, mu itetase eau, ne eau tamai na beilange sape a aisagu.

<sup>17</sup> Eau ade tomane a bibi ei vauta me eau beilange a aisagu oto. Inade eau adeade i ei ma ogomuli ete a vea na inade mine Bibi Taula. Boa.

<sup>18</sup> Vanunua papaina sou ogomuli a inigogona mina magamaga me sou beilange a aisane sou oto. Maidolo me eau tamai ea na ogomuli a inigogona do me eau beilange a aisane eau oto.

<sup>19</sup> Amutou damu ve amutou isa a damutatalana doana sele, maido me amutou longemuli a vautana vanua, io?

<sup>20</sup> Ivu, amutou itetatase sou so abesuli e amutou, ue sou mapalipali a golugolu vuso mine amutou, ue sou auala ane amutou, ue sou toebueve sele sou oto, ue sou valigalegale amutou.

<sup>21</sup> Ivu maula, eau maela sele, amiteu ma isa oto a sagalina mina inigogona sou goli usino ne amutou.

Moni mane a bibi tasa ei masalai a inigogona minei oto, de eau tamai ea na masalai e eau. Maula, seidei eau adeade tomane a bibi ei vauta.

<sup>22</sup> Sou mina abuna Hibru, io? E, eau tamai ea mina abuna Hibru. Sou a vanua mine Israel, io? E, eau tamai ea mine Israel. Sou a abuna mine Abraham, io? E, eau tamai ea mina abuna mine Abraham.

<sup>23</sup> Sou a vanua na pipigona mine Krai, io? Seidei eau ade tomana vautana bibi sele. Eau vululusi ivu e sou a gunolina pipigona mine Krai. Eau vululusi ivu e sou na pipigotivulana eau goli. Mapapaina sou tau eau na luma na tunuu me sou valibili e eau, me na mavaana sou odo eau vululusi ivu a vanua sou odo. Mapapaina sele bisii moni eau na mate.

<sup>24</sup> Sou e Iuda sou tibi e eau masavuluu tolu timana ialasuenai a mota na tinibina,\* ma golu ieli i palea le eau mapigogoi na ilala lima vuso.

<sup>25</sup> Sou e Rom sou tibi e eau matolu a butu buo. Sou e Iuda sou ubi e eau a vatu matasa. Matolu a kuta eau sae i, ei mamau, ma lodo tasa ma oaso tasa eau patipati moni lau na dasi.

<sup>26</sup> Mapapaina eau asu usino na aububuna i bulago, me eau ate eau buale na nanu, me eau ate eau mamau na limana vanua na lilimana. Me sou abuna minau oto Iuda ma vanua mina abuna sea tamai sou kale ne sou toegegeli e eau. Bisii moni eau ate a vilua na aubu buobuo, me na ilala eau ino na magamaga a vanua boa. Bisii moni eau buale na dasi. Me bisii moni eau mamau na limane sou a vanua na aualana sou vei ve sou e tamtamaine eitou.

<sup>27</sup> Eau goli a matamatana pipigona i tivula sele. Mapapaina eau ma ngolo oto, me eau vitolo, me eau malou, mea ma aani oto. Malada papaina maigina i toegegeli e eau me eau ma isa oto a kinainai.

<sup>28</sup> Mavaana sou moni ieli boa, na malada vuso eau damutala papaipai a inigogona mina itealekubena viepiluna kinaka vuso, me ielili ei tau a mavaana buo sele ne eau.

<sup>29</sup> Mane sagagalina mine bibi tasa i buale, io eau somiale tamai a sagagaligu i buale. Mane a golu i palea mei toe a kristen tasa i goli a sinusu, de eau sinoa mamaumau sele a golu ie.

<sup>30</sup> Mane eau masalai e eau oto, de eau na ade a golugolu ei maite i maido eau oto eau ma isa oto a sagalina.

<sup>31</sup> Salemo, ei e Tamane Bibi Taula Iesu, ei muada i maido, eau ma auala oto. Neitou beilange a aisane ei taliulu.

<sup>32</sup> Ilala eau ino ne Damaskus, bibi na itealena aubu i matano ne mapana e Aretas

\* 11:24 Mota do sou goli a uliulina golu vivi.

ei tau a vanua na maubina ne sou ulage a tema vuso na bigomu na aubu buobuo, vuna ei kale ni papale eau.

<sup>33</sup> Moni e tamamaigu sanii sou tau eau na tanga tasa, sou volipui kekeke a tanga utano na magamaga mina tema na avivili ino na bigomu odo. Me na vea moni odo eau oava na limane a bibi odo.

## 12

### *Tinada ma mavaana mine Pol*

<sup>1</sup> Vea tasa lou boa, maido me eau masalalai e eau oto. Ivu, a inigogona ieli ei ma mapigogoi ete ni buloi eitou. Moni umana, eau na ade a tinada sanii ma inade ovu Bibi Taula ei mapale na bibi tasa.

<sup>2</sup> Eau muada a bibi tasa mine Kraiss, ma avala savulu tasa timana iva lisa, Salemo i guale ei uata na matoluna aubu na langi. Nane ei ino na vovo ue ei bualetasesi a vovo, ede eau ma muada oto i. Salemo moni ei muada i.

<sup>3</sup> Eau muada i maido Salemo i guale a bibi iedo usino na aubu na munonge. Ei ino na vovo ue ei bualetasesi a vovo, eau ma muada oto i. Salemo ei muada i.

<sup>4</sup> Me na aubu na munonge do ei longe a matana inade a vanunua ma mapigogoi ete ne sou veipale, me sou magilisobe tamai ne sou veipale.

<sup>5</sup> Eau kale na masalai a aisana bibi iodo, moni eau na ma masalai ete eau. Eau na vei maido eau ma isa oto a sagalina, na golu moni ie eau na masalai e eau.

<sup>6</sup> Ivu, mane eau masalai e eau oto, eau ma vauta oto, vuna eau na veipale a inade patotona moni. Moni eau na ma vei mamai ete, vuna eau ma kale ete a vanua ne sou muada a golugolu ei paleasi le eau me sou bilii e eau a aisa buo. Moni ne sou ite a inigogona eau goligoli me ne sou longe a inade eau malongolongo i, me na inigogona ieli ne sou damutale bilesi e eau.

<sup>7</sup> Salemo ei maite eau a golugolu doadoana sele iedo, moni ei ma kale ete ne sou a vanua masalai e eau. Maidolo me ei itetase a tuaga i eili pilu e eau mei iububi a vovogu. Golu ieli ei tomane a pipigona mina bineanea mine Satan, me ei toegegeligeli e eau. Ei palea mina magilisobena beilangena aisagu.

<sup>8</sup> Matolu eau kaka sagali ane Bibi Taula ni taulele a golu ieli mainani minau.

<sup>9</sup> Moni ei vei le eau maido, "Dinodo minau ei vonu sele ne oo. Vuna maido, sagalina minau ei palea sagali sele ana bibi ei ma isa oto a sagalina." Maidolo me seidei eau mongemonge mamau sele a niugu tomane a bibi ei ma isa oto a sagalina. Maidolo a sagalina mine Kraiss ei ni muina ne eau.

<sup>10</sup> Maido ma ilala eau ma isa oto a sagalina, ma vanunua sou ma toekube

ete eau, ma matamatana mavaana ma golu mamau i guale eau, ma vanunua sou toegegeligeli e eau, vuna e Kraiss moni, de lilogu ei kubaana moni. Vuna maido ilala eau ma isa oto a sagalina, na ilala moni iodo eau silimuli sagali lou e Kraiss me eau isa a sagalina.

### *Pol ei masagali a silimulina mine sou e Korin*

<sup>11</sup> Eau vei ieli tomane a vautana bibi. Moni amutou oto amutou toe eau na goli ie. Mapigogoi ne amutou veipale a inigogona doana minau, moni amutou ma goli ete maido, maidolo me eau oto eau veipale. Ivu, eau a golu sabubu, moni eau ma matano oto ne sou a munugana aposel mine amutou.

<sup>12</sup> Na ilala eau ino balivua ne amutou eau goli a golu makuba ni maite i maido eau a aposel ivu. Eau magili sagali me eau tabule a mavaana vuso, me na inigogona ieli a matamatana gona sinaga ma pipigona sagali sea i palea balivua ne amutou, mina maite ne amutou maido eau goligoli a pipigona mine Salemo.

<sup>13</sup> Na golu tasa moni eau ma goli ete usino ne amutou tomane a viepiluna kinaka sea sou gualesi. Eau ma bilii ete amutou a mavaana mina itealene eau a gona inani ue a vatu. Nane eau susu, io? Mane maido, de amutou namutou danivusetase a sinusu minau ie.

<sup>14</sup> De seidei eau masusulu na asu matolunai usino ne amutou, me na ilala tamai iodo eau na ma bilii ete amutou a mavaana. Longe. Eau na ma guale ete a golugolu mine amutou. Boa. Eau kale na guale amutou oto moni. Amutou muada, selebanini sou ma pipigopigo oto a tinilona ma taupilina gona inani ue golu mina buloine tamtamane sou me tinatinane sou. Boa. Tamtamane sou me tinatinane sou moni sou pipigopigo a taupilina golugolu mina buloine selebanini.

<sup>15</sup> Me eau na mongemonge moni a niabina golu vuso minau mina buloine amutou, eau na oabi a maulina minau tamai. Eau biliili mamai a lilogu usino ne amutou, nane amutou bilii a lilone amutou bisii moni usinani minau? Boa vuso sele.

<sup>16</sup> Moni vanunua sanii sou adeade maido, "Ivu, ei ma guale ete a golugolu mine eitou. Moni ei toegolali sele e eitou, me na inigogona mina niitoto ei ubi a tabune eitou me ei lapuale a golugolu mine eitou."

<sup>17</sup> Posa matina? Nane eau itototo me eau peltase a bibi tasa ni paaialia a golugolu mine amutou, io?

<sup>18</sup> Eau bilii a damutatalana usino ne Taitus me ei asu usino ne amutou, me eau peltase tamaina tasa sea usino pilu e ei.

Nane Taitus ei auala ane amutou mei paaali a gologolu mine amutou? Nane amilu ma ogomuli ete a matana damutatalana tasa, io? Amilu ma asu oto na vea tasa moni, io?

<sup>19</sup> Eau damu ve amutou gi a inade vuso ieli me amutou damu ve amiteu niage mina toebilelesina inade mine amiteu na matane amutou. Moni boa. Amiteu eili a vanua mine Kraiss, me amiteu vei a inade ieli na matane Salemo. Amutou tamtamaigu ivu, amiteu goli a inadenade sou ieli mina masagalina silimulina mine amutou.

<sup>20</sup> Vuna maido, eau lae sapa, dae eau na asu usino ne amutou me eau na ite amutou ma ino oto a matana bibi tomane eau kale na ite. Me dae ne amutou tamai mu ite eau ea ma eili oto a matana bibi tomane amutou kale ne amutou ite. Dae ne eau ite a matamatana inigogona maidolo ino balivua ne amutou, ei a inigogona mina maisinoana, ma lilogegeleuna ane sou usino, ma inigogona mina sinoana, ma toebuebuena, ma adeptintolana, ma punoina, ma toevautautana, ma inigogona mina toemaisabena pipigona vuso.

<sup>21</sup> Dae ne eau asuale amutou me Salemo minau ni mamaele lei e eau na matane amutou. Dae ne eau ite a vanunua ma tavivine makuba lisa sou goli a sinusu me sou saboa sou sauvule a lilone sou me saboa sou lametase a inigogona mumugu, ma inigogona sualolona, ma susulolona, ma liloilisina na gunolina matamatana inigogona pagu lisa sou goligoli. Mane eau ite a inigogona sou ieli, eau na maela me eau lilo-momolu sele.

## 13

### *Punuluna abamulina*

<sup>1</sup> Seidei eau na asuale amutou matolunai, ma Laulau mine Salemo i vei maido, "Mane a bibi lua ue tolu ue visa sou vei sou ite a bibi ei goli a inigogona i ma puiale ete, io eitou mapigogoi neitou toebilelesi a inade."

<sup>2</sup> Ilala maluanai eau malu pilu e amutou eau vei ana vanua sou goli a sinusu lisa me sou a vanua sea tamai a inigogona toebilelesina eau kale na goli. Me seidei eau eili bulago me eau vei ane sou lou maido, mane eau veteliu lou usino ne amutou, eau na ma itetase sabubi ete a vanua sou goli a sinusu.

<sup>3</sup> Amutou kale ne amutou muada, Kraiss ei malongologo a inade na asegu, ue boa? De ilala Kraiss ei toebilelesi e amutou, ne amutou muada ivu. Me longe. Kraiss ei ni ma bale oto a toebilelesina inigogona mine amutou. Boa. Ei ni maite sele amutou a sagagalina minei.

<sup>4</sup> Ivu, lisa ei ma isa oto a sagagalina me sou gati e ei na tauvaleuti. Moni na sagagalina mine Salemo seidei ei eili mauili. Me amiteu

tamai ma isa oto a sagagalina, moni amiteu valitole Kraiss, me na sagagalina mine Salemo ne amiteu malu mauili pilu e ei. Me ne amiteu mapale a sagagalina do balivua ne amutou.

<sup>5</sup> Ne amutou gegemuliale iiti e amutou oto me ne amutou pogeuvuti a silimulina mine amutou ei ivu ue boa. Nane amutou ma muada oto e Iesu Kraiss ei ino na lilone amutou? Mane ei ma pilu oto e amutou, io amutou ma silimuli ivu ete ei.

<sup>6</sup> Me eau kale ne amutou pogeuvuti maido, amiteu goli ivu a pipigona mine Kraiss.

<sup>7</sup> Me amiteu kakake Salemo ei ni buloi e amutou ne amutou ma goli ete a inigogona pagupagu. Amiteu ma damu oto ve ne amutou ite amiteu tomane a vanua na pipigona mine Kraiss na kinaka mine amiteu ie. Golu tasa boa, amutou damu ve amiteu a aualana vanua na pipigona moni, masagana buo mine amiteu ei maido, amiteu kale ne amutou goli a inigogona bilesi moni.

<sup>8</sup> Amutou muada, eitou ma mapigogoi ete neitou goli a golu tasa mina soetolena inade patotona. Boa. Neitou pipigo a buloina inade patotona moni.

<sup>9</sup> Mane amutou ino sagali me amiteu ma isa oto a sagalina, amiteu mongemonge. Maido me taliuliu amiteu kakake Salemo ne amutou palea a bilesina vanunua sele.

<sup>10</sup> Bibi Taula i matoale eau mina itealena pipigona minei, me ei bilii e eau a sagagalina mina gunolina pipigona ie. Me seidei eau niage a inade ieli usino ne amutou na ilala eau saboa eili bulago, vuna ilala eau asuale amutou, eau ma kale ete na goli a inade sagali mina toebilelesina inigogona mine amutou. Bibi Taula i bilii e eau a mui ieli mina masagalina silimulina mine amutou, ma mui minau ieli ei mina toegegeleline amutou boa.

### *Punuluna ade munongena*

<sup>11</sup> Io, tamtamaigu, amutou longemuli e eau. Namutou mongemonge moni. Amutou vuso namutou palea a bilesina vanunua sele me mu ugu lilo tasa moni ma lilone amutou ni mea moni. Me eau kaka ane Salemo maido, ei bilii e amutou a lilone ei me ei bilii e amutou a lilomeana, ei ni muina pilu e amutou.

<sup>12</sup> Na inigogona mine eitou vanunua ma tavivine mine Salemo, amutou vuso tastasa ne amutou vate oaso kubaana usino ne amutou oto lilo ne Kraiss.

<sup>13</sup> Vanunua ma tavivine vuso mine Salemo sou vate oaso kubaana usino ne amutou.

<sup>14</sup> Eau kaka maido, Bibi Taula Iesu Kraiss ei ni dode amutou, me Salemo ni bilii a lilone

ei usino ne amutou, ma Maolona Nunu ni  
toe amutou vuso ne amutou lilo tasa ivu.

## Galesia Laulau Pol ei niage usino ne sou e Galesia

*Pol ei vei oaso doana usino ne sou e Galesia*

<sup>1</sup> Eau e Pol a aposel, sou a vanua so ma peltase ete eau ue a bibi tasa ei ma bilii ete eau a pipigona mina aposel. Moni Iesu Krai pilu e Salemo Tamane eitou ei mailisi e Krai na minate, sulu vileale eau mina pipigona ie.

<sup>2</sup> Eau pilu e sou tamtamaigu sou ugu pilu e eau, amiteu niage a laulau ieli usino ne amutou a viepiluna kinaka ino na avena ne Galesia.

<sup>3</sup> Salemo Tamane eitou, pilu e Bibi Taula Iesu Krai, ne sulu dode amutou me ne sulu toemea a lilone amutou.

<sup>4</sup> Krai ei ogomuli a masagana mine Salemo Tamane eitou, me ei iabitase a maulina minei oto ni gualeliu e eitou na sinus mine eitou ma inigogona pagu mina magamaga ie.

<sup>5</sup> Maidu me neitou beilange Salemo taliuli taliuli. Moliana.

*Malongolongona kubaana tasa moni eili*

<sup>6</sup> Eau saga sele a inigogona amutou goli ie. Na dinodo mine Krai, Salemo ei toleale amutou ne nu palea a abuna vanunua ma tavivine minei, moni ma tabaa oto amutou lametase ei, me amutou ogomuli a malongolongona kubaana sea.

<sup>7</sup> Moni a malongolongona kubaana tasa sea lou boa. Vanunua sanii sou toemaisabesabe moni a damutatalana mine amutou, me sou kale ne sou adevuse maisabe a malongolongona kubaana mine Krai.

<sup>8</sup> Moni mane amiteu ue a bineanea tasa na langi ei malongo a malongolongona kubaana ei ma tasa moni oto tomane a malongolongona kubaana lisa amiteu malonge e amutou, de a bibi ei goli a inigogona maidu, puiale ei ni buale na aubu mina davutina.

<sup>9</sup> Lisa amiteu veiosi a inade iede, me seidei eau vei lei le amutou. Mane a bibi tasa ei malongo a malongolongona kubaana i ma tasa moni oto pilu a malongolongona kubaana lisa amutou guale, de a bibi iedo ei ni buale na aubu mina davutina.

<sup>10</sup> Amutou damutala matina? A inade eau goli seidei ieli, ei mine sou a vanua ue mine Salemo ni mongemonge? Nane eau toegolali e sou a vanua, io? Mane eau saboa eili eau toemongemonge sou a vanua, de eau a bibi na pipigona mine Krai boa.

*Mapamulina mine Pol ei palea a aposel*

<sup>11</sup> Amutou tamtamaigu, eau vei bilesi le amutou, malongolongona kubaana lisa eau malonge e amutou iedo, ede a golu bibi tasa ei ma mapale ete.

<sup>12</sup> Me eau ma guale ete a malongolongona kubaana li na bibi tasa. Boa. Ma vanunua sou ma matetengi ete eau. Moni Iesu Krai oto ei maite eau a malongolongona kubaana ie.

<sup>13</sup> Amutou longesi a inade mina golugolu eau goli lisa. Eau ogomuli sagali vuse sele a inigogona mine sou e Iuda, me eau toegegeli sele a viepiluna kinaka mine Salemo me eau tove na mapuli sele.

<sup>14</sup> Ilala do, eau vululusi sele a silimulina mine sou e Iuda, me na inigogona eau goli ie eau vululusi a inigogona mina vanua mine Iuda sou maiavala tasa pilu e eau. Eau sagali mamau sele a ogomuli vusena inigogona mine sou e tubutubugu.

<sup>15</sup> Moni na ilala eina ei saboa maalepose eau, Salemo ei vilealesi e eau, na lilomulina minei, ei toleale eau na palea a bibi minei oto.

<sup>16</sup> Ei kale ni maite eau e Natuna, vuna ei kale eau na ademuada e ei usino ne sou a abuna sea. Na malada do eau ma asu oto na tagi a vanunua sanii a golu ie.

<sup>17</sup> Eau ma asu oto usino na vanunua ino ne Ierusalem sou palea a aposel pala ane eau. Eau asu bilesi usino ne Arabia, me mulimuli eau veteliu usino ne Damaskus.

<sup>18</sup> Tauluna avala tolu, eau asu usino ne Ierusalem na ade pilu e Pita. Me eau ugu pilu e ei mapigogoi a malada savulu tasa timana lima.

<sup>19</sup> Moni eau ma ite ete a aposel sanii lou. E Iemus, ei e tasine Bibi Taula, ei moni eau ite ei.

<sup>20</sup> A inade seidei eau niage usino ne amutou, ei a inade patotona sele na matane Salemo, eau ma auala oto ane amutou.

<sup>21</sup> Me mulimuli lou eau gaga lilo na avena buo e Siria me Silisia.

<sup>22</sup> Moni sou a viepiluna kinaka mine Krai ne Iudia, saboa sou muada iiti e eau.

<sup>23</sup> Sou longelongo moni maidu, "Palapala a bibi iedo ei toegegeli e eitou, moni seidei ei malongolongo a silimulina do lisa ei kale ni toegegeli iodo."

<sup>24</sup> Sou longe a mapamulina Salemo ei goli le eau, me sou beilange a aisane ei.

## 2

*Sou a aposel sanii sou lilo tasa pilu e Pol*

<sup>1</sup> Tauluna avala savulu tasa timana iva, eau pilu e Banabas amilu asu lou usino ne Ierusalem. Eau guale e Taitus tamai.

<sup>2</sup> Eau asu usino do, vuna Salemo ei maitesi e eau na asu. Me eau ademuada ane

sou a malongolongona kubaana li eau malonge e sou a avena sea. Eau ade oovu moni usino na vanua buobuo mina viepiluna kinaka, dae a pipigona li eau goli me lisa tamai ea goli ei ni buale sabubu.

<sup>3</sup> Taitus ei eili pilu e eau, ei a bibi mina abuna mine Grik. Moni sou ma ade sagali oto ne amiteu moqe ei.

<sup>4</sup> Sou a vanua na nioto sanii sou gali oovu ulilo balivua ne eitou. Sou gali ulilo ne sou ite oovi a malamalana mine Krai Iesu ei bilii e eitou me sou kale ne sou toe eitou a vanua na pipigona sabubu mina binea.

<sup>5</sup> Moni amiteu ma longo sapa oto ane sou ne sou goli a inade tasa. Boa. Amiteu kale a inade patotona mina malongolongona kubaana ni muina pilu e amutou taliuliu taliuliu.

<sup>6</sup> Sou a vanua sanii ino tomane a vanua buobuo mina viepiluna kinaka. Na damutatalana minau oto sou isa a aisa buo ue boa, ede a golu sabubu. Salemo ei ma damutale tale ete a aisana bibi. Me a vanua sou isa a aisa do, sou ma adesui ete a inade tasa lou na inadegu.

<sup>7</sup> Moni sou iteilale maido Salemo ei bilii e eau a pipigona mina veipalena malongolongona kubaana usino ne sou a abuna sea, tomane ei bilii e Pita a pipigona mina veipalena malongolongona kubaana usino ne sou e Iuda.

<sup>8</sup> Salemo ei bilii e Pita a sagagalina mina pipigona mina aposel balivua ne sou e Iuda, tomane moni Salemo i bilii e eau a sagagalina mina pipigona mina aposel balivua ne sou a abuna sea.

<sup>9</sup> Na ilala Iemus me Pita me Ioanes, sou a vanua buobuo mina viepiluna kinaka, sou iteilalesi a dinodo ma pipigona Salemo ei bilii e eau, io sou mailapulima pilu e eau me Banabas, me sou guale amilu tomane tamaine sou sele. Vuna sou muadasi i maido, ne amilu pipigo balivua ne sou a abuna sea, me sou pipigo balivua ne sou e Iuda.

<sup>10</sup> Sou bilii e inadu a inade tasa moni, iede a buloine sou a kapelabena vanua. Lisasi eau goli sagali a matana pipigona iedo.

### *Pol i sinoa ane Pita*

<sup>11</sup> Moni malada Pita ei asu usinani ne Antiok, eau sinoa ane ei na matane ei bilesi, vuna ei goli a inigogona i ma bilesi oto.

<sup>12</sup> Na malada a abuna mine Iemus saboa sou sibalata, Pita ei aani pilu e sou a abuna sea. Moni na ilala sou a abuna mine Iemus sou diviosi, io Pita ei lae e sou a abuna sou sagaligali a munogena, maido me ei ugu bulagetase sou a abuna sea, me ei ma maitamaina pilu oto e sou.

<sup>13</sup> Maido me sou e Iuda sanii tamai sou tabele i luasi pilu e Pita. Me mulimuli a

inigogona tabele luana ne sou ei lapuale a damutatatalana mine Banabas tamai.

<sup>14</sup> Maidolo me na ilala eau ite sou so ma ogomuli bilesi ete a inade patotona mina malongolongona kubaana, eau vei le Pita na matane sou maido, "Oo a bibi tasa mina abuna ne Iuda. Moni oo ogomuli a inigogona tomane oo a bibi mina abuna sea, me ei ma tomane ete oo a bibi na abuna ne Iuda. De, posa matina oo sagali ane sou a abuna sea ne sou ogomuli a inigogona mine sou e Iuda?"

### *Bibi ei silimuli e Iesu, ei palea a bilesina bibi*

<sup>15</sup> Ivu, amiteu e Iuda, vuna sou e Iuda sou maalepose amiteu. Amiteu ma palea oto na abuna sea, iede sou a vanunua na sinusu.

<sup>16</sup> Moni amiteu muada, Salemo ei ma damutale ete a bibi ei ogomuli a binea mine Moses, me na vuna moni ieli ei vate e ei a bilesina bibi. Boa. Bibi ei silimuli e Krai Iesu, ei moni Salemo vate e ei a bilesina bibi. Amiteu tamai amiteu silimuliosi e Krai Iesu, vuna amiteu muada a vea moni iedo Salemo ei vate e amiteu a bilesina bibi, me a vea na ogomulina binea boa. Vuna maido a bibi tasa boa ei mapigogoi ni ogomuli kube sou a binea, me ne Salemo ni vate ei a bilesina bibi. Boa.

<sup>17</sup> Moni mane amiteu tove a ogomulina vea mina silimuline Krai namiteu palea a bilesina bibi na matane Salemo, amiteu iteilale maido amiteu tamai a vanua na sinusu tasa moni tomane sou a abuna sea, de amiteu mapigogoi namiteu vei maido Krai ei a bibi ei toe amiteu palea a vanua na sinusu, io? Boa vuso sele. Amiteu ma mapigogoi ete namiteu vei maido.

<sup>18</sup> Mane eau mapuli a inigogona mina binea me mulimuli eau mailisi lei a inigogona iede, de eau oto eau palea a bibi na sinusu.

<sup>19</sup> Moni a binea ei tau e eau na vea na minate, vuna eau ma mapigogoi ete na ogomuli a binea vuso. Me na binea eau tomane a bibi ei matesi. Me na vea li, eau mauli pilu e Salemo.

<sup>20</sup> Eau matesi pilu e Krai na tauvaleuti, maido ma maulina minau ieli ei a maulina minau oto boa, moni Krai ei mauli lilo minau. Me seidei a inigogona vuso ma pipigona eau gologoi na magamaga ie, ei a golu mina vea na silimulina. Eau silimuli e Natune Salemo, ei kale sele eau me ei iabitate a maulina minei oto mina gualeliune eau.

<sup>21</sup> Eau ma goli ete a dinodo mine Salemo ni palea a golu sabubu. Mane a binea ei mapigogoi ni toe eitou palea a bilesina bibi na matane Salemo, io Krai ei mate sabubu moni.



## 3

*Ve a mina ogomulina binea ue vea mina silimulina*

<sup>1</sup> Amutou e Galesia, amutou a vautana vanunua! Amiteu maitesi e Iesu Kraisi e amutou me a matane amutou oto i ite Iesu Kraisi ei kulu oata na tauvaleuti. Sei seidei ei toemaisabe a damutatalana mine amutou?

<sup>2</sup> Eau kale na tagi e amutou a golu tasa moni. Amutou guale a Maolona Nunu ne sei vea bilesi? Na vea mina ogomulina binea? Ue na vea mina silimulina malongolongona kubaana amutou longe?

<sup>3</sup> Amutou palea vautasi, io? Amutou soke a inasu mine amutou na sagalina mina Maolona Nunu, moni seidei amutou kale namutou mapuli na sagalina mina vovone amutou oto, io?

<sup>4</sup> Nane sou a mavaana lisa i palea ne amutou, ede amutou tabule sabubu, io? Moni eau ma damu oto i amutou tabule sabubi.

<sup>5</sup> Salemo ei bilii a Maolona Nunu usino ne amutou mei goli a gona sinaganaga balivua ne amutou. Vuna matina ei goli maido? Vuna amutou ogomuli a binea ue amutou silimuli a malongolongona kubaana amutou longe?

<sup>6</sup> Laulau mine Salemo ei vei maido, "Abraham ei silimuli e Salemo, maido me Salemo ei vate ei a bilesina bibi."\*

<sup>7</sup> Maido me namutou muada i maido, vanunua so silimuli a malongolongona kubaana, sou e natatune Abraham bilesi.

<sup>8</sup> Lisa otosi Laulau mine Salemo i veimuade maido, mulimuli sou a abuna sea ne sou silimuli a malongolongona kubaana, me Salemo ni vate e sou a bilesina vanunua. Maido me lisa otosi ei veimuade a malongolongona kubaana usino ne Abraham, tomane a Laulau mine Salemo ei vei, "Ne oo moni, Salemo ni maibalave a abuna sea vuso."†

<sup>9</sup> Maido me Salemo maibalave e sou a vanunua ma tavivine vuso sou silimuli e Salemo, tomane Salemo i maibalave e Abraham, bibi na silimulina.

<sup>10</sup> Moni e Salemo ei ni toegegeli a vanunua vuso sou damutale a inigogona mina ogomulina binea ei mapigogoi ni toe e sou ne sou palea a bilesina vanunua na matane Salemo. Vuna, Laulau mine Salemo ei vei maido, "Mane a bibi tasa ei ma ogomuli ivu ete a inade vuso ino na laulau mina binea, de Salemo ei ni toegegeli a bibi iedo."‡

<sup>11</sup> A vea tasa boa mina bibi tasa ni ogomuli a binea me Salemo ni vate ei a bilesina bibi. Vuna, Laulau mine Salemo ei vei

maido, "Sou a bilesina vanunua ne sou maui pilu a silimulina."§

<sup>12</sup> Ve a mina ogomulina binea, ei a gona mina silimulina boa. Vuna, Laulau mine Salemo ei vei maido, "Bibi ei ogomuli a binea vuso, ei ni maui."\*

<sup>13</sup> Binea ei vei maido, eitou vanunua vuso eitou ma ogomuli ete a inade vuso mina binea, neitou mamau. Mina gualeli-une eitou maino na mamauna mina binea, Kraisi oto ei tabule a lilotivulana mine Salemo. Laulau mine Salemo ei vei maido, "Vanunua vuso sou kulu na obu, Salemo ei ite sou tomane a vanunua na mamauna moni."†

<sup>14</sup> Ne Kraisi Iesu, Salemo ei maibalave a abuna sea vuso tomane ei maibalave Abraham. Mane eitou silimuli e Kraisi Iesu, ei ni bilii e eitou a Maolona Nunu tomane lisa Salemo ei adegatunasi i.

*Binea mine Moses ei ma mapigogoi ete ni taulele a adegatuna mine Salemo*

<sup>15</sup> Amutou tamtamaigu, seidei eau ade a inigogona inasu mine eitou a vanunua ma tavivine. Mane a inade mina magilipiluna balivua na vanunua ei paleasi, a bibi tasa lou boa ei ni taulele lei a inade tasa, ue ei ni adesui a inade tasa lou na inade ie.

<sup>16</sup> Adegatuna sou ieli Salemo lisa ei vei le Abraham pilu e natuna. Moni Laulau mine Salemo ei ma vei ete maido, "Usino ne natatumu." Ei ma vei ete selebanini papaina. Boa. Ei vei moni tasa, "Ne natumu." Bibaini iedo ei e Kraisi.

<sup>17</sup> Vuna inade minau ei maido, a magilipiluna pilu e Abraham ei palea palapala, me mulimuli avala savulu sobo iva savulu tolu (430) ei pulosi, de a binea ei palea. A binea li ma mapigogoi ete ni taulele a magilipiluna lisa Salemo ei goli. Ei ma mapigogoi ete ni mapuli a adegatuna Salemo ei goli lisa.

<sup>18</sup> Mane eitou guale a golugolu vuso e Salemo ei vileale le eitou na vea mina ogomulina binea, iede eitou ma guale ete na vea mina adegatuna. Boa. Moni Salemo ei biliitase a golugolu vuso do usino ne Abraham na vea mina adegatuna.

<sup>19</sup> Vuna matina a binea ei eili? Vuna Salemo ei kale a sinusu ni palea muada a binea li. Me ei kale a binea ni muina mapigogoi a malada a Bibaini iedo ni palea, lisa Salemo ei adegatunasi i. Salemo ei bilii a binea li usino ne sou a bineanea me sou veimuade ane Moses, a balivuana bibi tasa, me ei bilii e eitou a binea.

<sup>20</sup> Me mane a bibi tasa ei oto ei kale ni goli a pipigona tasa, ei ma mapigogoi ete ni bilii a pipigona do usino na balivuana bibi tasa.

\* 3:6 Sinokona 15:6 † 3:8 Sinokona 12:3 ‡ 3:10 Binea 27:26 § 3:11 Habakuk 2:4 \* 3:12 Pipigona mina Prist 18:5 † 3:13 Binea 21:23

Moni Salemo ei tasa me ei vululu moni ei bilii a adegatuna.

*Binea ei maasi e eitou usino ne Krai*

<sup>21</sup> Nane a binea ei a butu mine sou a adegatuna mine Salemo, io? Boa vuso sele. Mane Salemo ei bilii a binea ei mapigogoi ni bilii e eitou a maulina, de a inigogona mina ogomulina binea ei mapigogoi ni toe eitou palea a bilesina vanunua ma tavivine.

<sup>22</sup> Moni a Laulau mine Salemo ei veipale maido, "Sinusu ei papalesobe a vanunua ma tavivine vuso tomane sou ugu na luma na tunuu." Moni Salemo kale ni mapale a vea tasa mina gualeliune eitou. Maido me vanunua ma tavivine sou silimuli e Iesu Krai, sou guale a golu doana ei adegatuna i.

<sup>23</sup> Ilala silimulina ei saboa palea, binea ei palesobesi eitou. Me eitou ugu na luma na tunuu mapigogoi Salemo maite a silimulina i palea muada.

<sup>24</sup> Maido ma binea ei eili tomane a bibi na itealene eitou i asu mapigogoi Krai ei asu usinani, maido neitou silimuli a malongolongona kubaana me Salemo ni vate eitou a bilesina vanunua ma tavivine.

<sup>25</sup> Me seidei a ilala na silimulina ei paleasi, me eitou ma muina otosi matano na binea tomane a bibi na itealene eitou.

*Silimulina ei toe e eitou palea natatune Salemo*

<sup>26</sup> Na silimulina mine Krai Iesu amutou vuso amutou paleasi e natatune Salemo.

<sup>27</sup> Amutou vanunua ma tavivine amutou guale a maavuvutuna mina valitolene Krai, amutou vuso amutou kaiosi a kinainai mine Krai.

<sup>28</sup> Me na abuna mine Krai, sou e Iuda me sou e Grik moni boa, ma vanunua na pipigona sabubu ma vanunua sou ugu malamala tamai bou, ma bibi ma tavine boa. Lilo ne Krai Iesu amutou vuso amutou tasa moni.

<sup>29</sup> Mane amutou ino a abuna mine Krai, de amutou e natatune Abraham tamai. Amutou moni namutou guale a golugolu vuso doana do lisa Salemo ei adegatuna ni bilii e sou a abuna mine Abraham.

## 4

*Na pipigona mine Krai eitou palea e natune Salemo*

<sup>1</sup> Inadegu ei maido, a bibi tasa ei mulimuli ni guale a golugolu vuso mine tamane ei, moni mane ei saboa bibaini, ei tasa moni tomane a bibi na pipigona sabubu.

<sup>2</sup> Ei ni matano moni ana vanua na ulagona ma vanua na niitealalena, i asu mapigogoi a malada tamana ei tau.

<sup>3</sup> Eitou tamai ilala eitou ino tomane sou selebanini, eitou tomane a vanua na pipigona sabubu mina matamatana nunu ei

matetengi a sinokona muadana mina magamaga.

<sup>4</sup> Moni na matailala bilesi Salemo i tau, ei peltase Natune ei usinani. A tavine ei maalepose ei, me a bibaini iedo tamai ei malu matano na binea mine Moses,

<sup>5</sup> mina oleliualene eitou a vanunua ma tavivine ino matano na binea, me ei ni toe eitou palea natatune Salemo.

<sup>6</sup> Seidei amutou natatune Salemo. Maido me Salemo ei peltasesi a Nunu ne Natuna usinani na lilone eitou ma Nunu ei toe eitou tola ane Salemo maido, "Aba, Euma!"

<sup>7</sup> Maido me oo ma muina otosi tomane a bibi na pipigona sabubu lou. Salemo ei toe oo palea natune ei. Me mane oo a natune Salemo, de oo no guale a golugolu vuso i doana mine ei.

*Pol ei lilobuu sele e sou e Galesia*

<sup>8</sup> Lisa amutou ma muada oto e Salemo, me amutou tomane a vanua na pipigona sabubu moni mina matamatana golugolu, sou salemo ivu boa.

<sup>9</sup> Moni seidei amutou muadasi e Salemo, ue nane puiale eau na vei, Salemo ei muadasi e amutou. Maido me posa matina amutou veteliu lou usino na matamatana matetengina mina magamaga? Sou ma isa oto a sagagalina me sou a golu sabubu moni. Amutou kale namutou palea a vanua na pipigona sabubu mine ei lou, io?

<sup>10</sup> Taliuliu amutou damutale a ogomulina binea mina malada buobuo, gamegame, matailala me avalavala.

<sup>11</sup> Eau lae, dae a pipigona eau goli le amutou ei ni buale sabubu.

<sup>12</sup> Eau tagi sagali e amutou tamtamaigu namutou palea tasa moni tomane eau. Vuna eau asutase a binea me eau palea tasa moni tomane amutou. Me pea na malada iedo amutou ma goli ete a sinusu tasa usinani minau.

<sup>13</sup> Amutou muada, munugana ilala eau veipale a malongolongona kubaana usino ne amutou, iede ilala sinobe buo i guale eau.

<sup>14</sup> Sinobe minau iodo ei bilii a mavaana buo usino ne amutou. Moni amutou ma lametase ete eau, me amutou ma bale oto a ugu pilu ne eau. Amutou guale eau tomane amutou guale a bineanea tasa mine Salemo, ue tomane amutou guale e Krai Iesu oto.

<sup>15</sup> Na malada do amutou mongemonge me mu lilokuba agu, moni a munonge ne amutou iede, seidei ino iva? Eau veipale le amutou, mane amutou mapigogoi namutou osetase a matane amutou na malada do, de namutou osetase me ne mu bilii e eau.

<sup>16</sup> Moni posa matina seidei eau palea a butu mine amutou? Vuna eau veipale a inade patotona usino ne amutou, io?

<sup>17</sup> Sou a vanua sanii sou ogomuli a binea do, sou toesagali e amutou mu ogomuli a inade mine sou, moni ei ma kubaana oto le amutou. Sou kale ne sou gualelele amutou mainani minau, me sou toe e amutou mu ogomuli sagali e sou.

<sup>18</sup> Ei puiale mane amutou pipigo sagali na ogomulina inigogona kubaana. Taliuliu ne mu goli a inigogona do, me na malada eau ma pilu oto e amutou tamai.

<sup>19</sup> Amutou natatugu, eau lai a davutina lou tomane a tavine ei maalepose a bibaini mapigogoi a inigogona mine Kraisi ei ni palea lilone amutou.

<sup>20</sup> Maula, eau ma pilu oto e amutou seidei. Mane eau ino pilu e amutou, eau na ade iiti usino ne amutou. Eau lilobuu sele e amutou, me tamai eau ma muada oto na buloi e amutou matina.

#### *Adetinovo mine Hagar me Sara*

<sup>21</sup> Amutou a vanunua amutou kale namutou matano moni na binea, mu vei le eau seidei. Nane amutou ma muada oto a golu a binea ei ade i, io?

<sup>22</sup> Laulau mine Salemo ei vei maido, Abraham ei isa e natuna bibi lua. Tavine ei pipigo sabubu, ei maalepose tasa, me tavine ei malamala, ei maalepose tasa.

<sup>23</sup> Natune tavine ei pipigo sabubu, ei alaposa na vea mina taulaina. Moni natune tavine ei malamala, ei alaposa na adegatunana mine Salemo.

<sup>24</sup> Adetinovona ino lilona mapamulina ie. Tavine lua li sulu matailale a magilipiluna lua. Hagar ei matailale a magilipiluna mina loena e Sainai, me natatuna sou palea a vanunua na pipigona sabubu.

<sup>25</sup> Hagar ei matailale a loena e Sainai, a loena do ei mina avena buobuo e Arabia, me ei tamai ei matailale e Ierusalem ei ino seidei. Ierusalem ieli ei a tavine na pipigona sabubu pilu e natatune ei.

<sup>26</sup> Moni e Ierusalem tasa ei ino oata na langi, ei ugu malamala. Ei e tinane eitou.

<sup>27</sup> Laulau mine Salemo ei vei maido,  
“Oo a tavine, tiamu ei sobo, o ma natatua  
oto,

oo no mongemonge.

Oo a tavine, o ma lai ete a davutina mina  
maaleposena bibaini,

oo no ala me oo no mongemonge me oo  
tola,

vuna oo no isa e natatumu ni makuba sele,  
ei vululuſi a natatuna tavine ei isa e  
suana.”\*

<sup>28</sup> Amutou tamtamaigu, amutou tamai amutou e natatuna mina adegatunana mine Salemo tomane Aisak.

<sup>29</sup> Moni bibaini ei alaposa na vea sou a vanunua ma tavivine sou mapalele seleanini, ei toegegeli a bibaini tasa ei alaposa na sagagalina mina Maolona Nunu. Seidei tamai a matana inigogona do ei eili moni.

<sup>30</sup> Laulau mine Salemo ei vei matina? Ei vei maido, “Peltaselele a tavine na pipigona sabubu pilu e natuna. Natune tavine na pipigona sabubu ei ni ma mapigogoi ete a gualena a golu doana mine tamana pilu e natune tavine ei malamala.”†

<sup>31</sup> De amutou tamtamaigu, eitou e natatune tavine na pipigona sabubu boa, eitou e natatune tavine ei malamala.

## 5

### *Neitou ugu malamala sele*

<sup>1</sup> Kraisi ei toe eitou palea malamala, ne eitou ma ugu oto matano na binea. Maido me namutou magili sagali, me namutou ma itetasetase lei a vanunua ne sou toe e amutou palea tomane a vanua na pipigona sabubu lou.

<sup>2</sup> Longe a inadegu! Eau e Pol eau vei le amutou, mane amutou itetase sou ne sou moge amutou, de a pipigona mine Kraisi ei ni ma buloi sape ete amutou. Boa vuso sele!

<sup>3</sup> Mane amutou vuso mu itetase sou moge amutou, eau kale na ademuada lou ane amutou maido, mane amutou goli a inigogona maido, de namutou ogomuli sele a binea vuso.

<sup>4</sup> Mane amutou kale ne amutou ogomuli a binea, na vea li amutou kale ne Salemo ni vate amutou a bilesina vanunua, de na inigogona li amutou veletasesi e Kraisi me a dinodo mine Salemo.

<sup>5</sup> Moni na Maolona Nunu eitou silimuli e Salemo me eitou magitali sagali ei ni vate eitou a bilesina vanua.

<sup>6</sup> Mane a bibi ei eili ne Kraisi Iesu, de a inigogona munuge ei a golu sabubu, ma inigogona bibi ei ma moge ete ei, ede tamai ei a golu sabubu. Moni a golu tasa buo ei a pipigona silimulina ei mapale a kinalena.

<sup>7</sup> Lisa amutou vele iiti na vea Kraisi maite e amutou i. Moni sei tausobe a vea me amutou ma ogomuli ete a inade ivu?

<sup>8</sup> Damutatalana iede seidei amutou ogomuli ie ei ma asu oto maino ne Salemo ei tolealale amutou.

<sup>9</sup> A is bisii moni ei mapigogoi ni goli a ulalu vuso ni sosoge.

<sup>10</sup> Eau silimuli sagali e Bibi Taula maido, ne amutou ma lapitole ete a damutatalana sea. Sei bibi toemaisabe a damutatalana mine amutou, matana bibi iedo ni guale a mapana mavaana.

<sup>11</sup> Amutou tamtamaigu, mane eau saboa eili eau ade suusuu a munogena, de posa

\* 4:27 Aisaia 54:1 † 4:30 Sinokona 21:10

matana sou saboa eili sou toegegeligeli eau? Mane eau vei a vanunua ne sou moge, de inade na tauvaleuti ei ni ma toegegeli lei a damutatalana mine sou.

<sup>12</sup> Sou a vanunua li sou toemaisabe sele a damutatalana mine amutou, ei puiale ne sou moge a uliuline sou oto.

<sup>13</sup> Amutou tamtamaigu, Salemo ei toleale amutou ne amutou ugu malamala. Moni namutou ma gologoli lei a malamalana mine amutou ni ogomuli a masagana lilo-mumuguna mine amutou. Moni amutou tastasa namutou maibuloi e amutou na inigogona kinalena.

<sup>14</sup> Inade vuso na binea ei ino lilo na inade tasa moni iedo, "Oo no kale sou a vanunua tomane oo kale oo oto."

<sup>15</sup> Mane amutou sinoanoa me mu maububi maisaba balivua ne amutou oto, de amutou tilale, dae ne amutou vuso mu toegegeligeli amutou oto.

*Inigogona mina Maolona Nunu ma inigogona lilomumuguna*

<sup>16</sup> Inadegu ei maido, namutou longemuli a Maolona Nunu ni au a inasu ne amutou. Mane amutou goli maido, io ne amutou ma ogomuli ete a masagana mina lilomumuguna.

<sup>17</sup> Amutou muada, masagana mina lilo-mumuguna ei kale ni toebose a Maolona Nunu, ma Maolona Nunu ei kale ni toebose a lilomumuguna. Sulu maibutuala pilu, ma golu amutou kale namutou goli, ede amutou ma mapigogoi ete namutou goli.

<sup>18</sup> Moni mane amutou ogomuli a Maolona Nunu, io amutou ma ino oto matano na binea.

<sup>19</sup> Amutou muadasi a inigogona lilomumuguna. Ede sou a matana inigogona maido, sualolona, ma mumuguna ma inigogona ogomulina masagana vovo,

<sup>20</sup> ma kinaka ane a salemo auala ma gunolina milolo, ma butualena, ma inigogona valipolena vanunua, ma lilovilivilina ma sinoana, ma inigogona damutalene oo oto moni ma isualena,

<sup>21</sup> ma lilogegeluna, ma matalililina, ma toevautautana ma ngalavautana maisaba, ma matamatana inigogona maido. Lisa eau veiosi le amutou, me seidei eau ade lou ane amutou. Sou a vanunua sou goli a matana inigogona maido, ne sou ma mapigogoi ete ne sou gali ulilo na niitealalena mine Salemo.

<sup>22</sup> Moni a vuavua doana mina Maolona Nunu i maido, kinalena, ma munongena, ma lilomeana, ma maovuna, ma buloina, ma gunolina inigogona kubaana, ma inasu bilesi taliuliu,

<sup>23</sup> ma uguvalena, ma itealeliune oo oto. A binea tasa boa ei magilisobe a inigogona sou ie.

<sup>24</sup> Vanunua ma tavivine tastasa mine Krai Iesu sou gatitolei a masagana mina lilomumuguna pilu a niisualena mamauna mine sou na tauvaleuti.

<sup>25</sup> Maolona Nunu ei bilii e eitou a maulina, maido me neitou itetase a Maolona Nunu ni muge a inasu vuso mine eitou.

<sup>26</sup> Neitou ma beilange sabububi lei a aisane eitou oto, me neitou ma ububi lei a lilone sou sanii na tateilisina maubina, me neitou ma isualale lei a golugolu mine sou sanii.

## 6

*Sei matana inani o dani, iedo moni oo no guale*

<sup>1</sup> Amutou tamtamaigu, mane tasa mine amutou ei goli a sinus, de amutou vanua mu ogomuli a Maolona Nunu, ne amutou goli a inigogona mea usino na bibi iedo me mu buloi e ei ni toebilelesi a inigogona minei. Moni mu iteale kube amutou oto, dae Satan ni tove amutou me amutou tamai namutou bosa a sinus.

<sup>2</sup> Namutou maibuloi a tabulena mavaana mine amutou. Na inigogona li ne amutou toesele a binea mine Krai.

<sup>3</sup> Mane sei bibi ei damutale ei isa a aisa, moni ei a bibi sabubu, io a bibi edo ei ioto ane ei oto.

<sup>4</sup> Vanunua vuso tastasa ne sou vivileale a pipigona mine sou oto i kubaana ue boa. Bibi ei goli maido, ei ni mongemonge sele a inigogona ei oto ei goli, mei ni ma vivileale ete a inigogona minei pilu a inigogona mina bibi sea,

<sup>5</sup> vuna maido vanunua vuso tastasa ne sou tabule a mavaana mine sou oto.

<sup>6</sup> Bibi tasa ei guale a matetengina na inade mine Salemo, ei ni soebule a golugolu doana minei usino na bibi ei matetengi e ei.

<sup>7</sup> Ne amutou ma auala lou ane amutou oto. Amutou ma mapigogoi ete ne amutou ioto ane Salemo. Oo dani sei matana vuavua na gona inani, matana gona inani moni iedo ei ni palea na mauna minio.

<sup>8</sup> Mane sei bibi ei dani a masagana lilomumuguna minei oto, de a inigogona mina lilomumuguna ei ni mapale a maulina mamau. Moni mane ei dani a inigogona Maolona Nunu, de a Maolona Nunu ei ni mapale a maulina i doana taliuliu taliuliu na bibi iedo.

<sup>9</sup> Maido me neitou ma balebale lou a gunolina inigogona doana. Mane oo ma bale oto a gunolina pipigona doana, de na malada bilesi na gualena gona inani, neitou guale a gona inani doana sele.

<sup>10</sup> Maido me sei malada eitou mapigogoi neitou goli a inigogona doana usino ne vanunua vuso, neitou goli. Me neitou sagali sele a gunolina inigogona doana usino na abuna sou silimuli.

*Pol ei mongemonge a tauvaleuti mine Kraís*

<sup>11</sup> Oite, sou a niagona buobuo ieli ede eau oto eau niage a limagu oto.

<sup>12</sup> Sou a vanua sou sagali mamau ane amutou ne mu moge, sou goli maido, vuna sou kale ne sou guale a aisa buo na matane sou a vanua. Sou laelae moni ve vanua ne sou toegegeli e sou a silimulina tauvaleuti mine Kraís.

<sup>13</sup> Sou a vanunua sou gualesi a munogena, sou oto sou ma ogomuli kube ete a binea. Moni sou kale ne sou moge amutou, ve ne sou guale a aisa buo na vovone amutou.

<sup>14</sup> Moni eau ma mapigogoi ete na beilange a aisane eau oto. Boa. Eau na beilange a tauvaleuti mine Iesu Kraís Bibi Taula mine eitou moni. Na pipigona Kraís ei goli mina tauvaleuti, inigogona magamaga li ei matesi na damutatalana minau, me ei tomene eau oto eau matesi na tauvaleuti me eau na ma ogomuli ete lei a inigogona mina magamaga.

<sup>15</sup> Seidei a inigogona mina munogena, ei a golu sabubu, ma inigogona mina bibi ei ma moge ete, ei tamai ei a golu sabubu. Salemo ei toe eitou palea a vanunua ma tavivine alaba, ieli moni ei a golu ivu.

<sup>16</sup> Salemo ei ni bilii a dinodo pilu a lilomeana usino ne vanunua ma tavivine vuso sou ogomuli a vea doana li, iede e Israel mine Salemo.

<sup>17</sup> Namutou ma bilii lei e eau a mavaana lou. Vuna a poposi eiliosi na vovogu, ei maite eau maido, a bibi na pipigona sabubu mine Iesu.

<sup>18</sup> Amutou tamtamaigu, dinodo mine Bibi Taula mine eitou Iesu Kraís, ei ni pilu a nunu mine amutou tastasa. Moliana.

## Epesus

### Laulau Pol ei niage usino ne sou e Epesus

*Pol ei vei oaso doana usino ne sou e Epesus*

<sup>1</sup> Eau e Pol, na masagana minei oto Salemo ei vileale eau a aposel mine Krai Iesu. Eau niage a laulau ieli usino ne amutou a vanunua ma tavivine mine Salemo ino ne Epesus me lilo ne Krai Iesu.

<sup>2</sup> Eau kakake Salemo Tamane eitou pilu e Bibi Taula Iesu Krai, ne sulu dode amutou me ne sulu toemea a lilone amutou.

*Ne Krai, Salemo ei maibalave eitou na golugolu vuso mina langi*

<sup>3</sup> Neitou beilange a aisane Salemo, ei e Tamane Bibi Taula mine eitou Iesu Krai. Lilo ne Krai, Salemo ei maibalave eitou pilu a golugolu vuso mina langi mina buloina nunu ne eitou.

<sup>4</sup> Malada Salemo saboa i mapale a magamaga ma golugolu vuso, ei vilealesi eitou lilo ne Krai, ne eitou maolo me neitou muina bilesi na matane ei.

<sup>5</sup> Lisa otosi ei vileale eitou neitou palea e natatune ei oto a pipigona mine Iesu Krai. Salemo ei toesi ieli na masagana ma munongena minei oto.

<sup>6</sup> Maido me neitou damutale a dinodo buo minei iedo, me neitou beilange a aisane Salemo. Ei dode mamai sele eitou lilo ne Natuna ei kale mamai iodo.

<sup>7</sup> Dinodo mine Salemo ei vonu sele, maido me Salemo ei longo ane Krai ei singi a dalana mina oliliuale ne eitou, mina lilotasena sinusu vuso mine eitou.

<sup>8</sup> Salemo ei singi mamai a dinodo minei usinani ne eitou, me ei bilii e eitou a matamatana muadana pilu a damutatalana doana.

<sup>9</sup> Me seidei Salemo ei maitesi eitou a damutatalana ovu minei na masagana doana minei oto, iede lisa ei damutalesi lilo ne Krai.

<sup>10</sup> Golu ei kale ni toe ei maido, na malada ei vilealesi, ei kale ni taupili bilesi a golugolu vuso mina langi me mina magamaga tamai usino ne Krai, me ei ni iteale a golugolu vuso iedo.

<sup>11</sup> Salemo ei goli a golugolu vuso na masagana ma damutatalana minei oto, lisa otosi na damutatala minei oto ei vileale amiteu e Juda ni palea a abuna vanunua ma tavivine sele mine Salemo lilo ne Krai.

<sup>12</sup> Salemo ei vileale amiteu a munugana abuna mina silimuline Krai mina beilange a isa buo minei.

<sup>13</sup> Me amutou a vanunua ma tavivine mina abuna sea, amutou tamai amutou longesi a inade ivu, ede a malongolonga kubaana mine Salemo ei gualeliu e amutou. Me amutou silimuliosi e Krai, maido me Salemo ei bilii a Maolona Nunu usino ne amutou ei adegatunasi i, tomane a matailala maido amutou ino a abuna vanunua ma tavivine minei bilesi.

<sup>14</sup> A Maolona Nunu ei a patotonana matailala, maido me eitou muada, ei oliliualesi eitou a vanunua ma tavivine minei oto, me mulimuli Salemo ei ni bilii a golugolu doana usinani ne eitou ei adegatunasi i. Me neitou damutale a pipigona ei goli, me neitou beilange a aisa buo minei.

*Pol ei kake Salemo ni bilii a damutatalana doana ne sou e Epesus*

<sup>15</sup> Eau longe a mapamulina ne amutou, amutou silimuli sele e Bibi Taula Iesu, me amutou bililili a lilone amutou usino na vanunua ma tavivine vuso mine Salemo.

<sup>16</sup> Maido me na malada eau kaka, taliuluu eau damutaleale amutou, mea toledadangi e Salemo. Me eau kakake

<sup>17</sup> Salemo mine Bibi Taula mine eitou Iesu Krai, ei e Tamane eitou ei isa a aisa buo, ei ni bilii e amutou a damutatalana doana, me ei toe e amutou mu muada kuba a vuna inade minei, ne amutou muada kuba e ei oto.

<sup>18</sup> Eau kake ei ni toe muade a damutatalana mine amutou, maido me namutou muada kuba a golugolu doana, ede a golu Salemo ei toleale amutou namutou guale mulimuli. Salemo ei vileale eitou a vanunua ma tavivine minei mei ni bilii e eitou a golugolu na vuvutina buo minei.

<sup>19</sup> Ne amutou muada i maido, sagagalina mine Salemo ei buo mamau sele, me ei buloiloi eitou a vanunua ma tavivine sou silimuli. Ei pipigopigo ane eitou,

<sup>20</sup> ei moni lisa ei pipigo lilo ne Krai. Krai ei matesi, me na sagagalina buo mine Salemo do, Salemo ei mailisi ei na muina minate, mei maugi e ei na limane ei a gata na langi.

<sup>21</sup> Maido me Krai ei ugu oata oto sele, ane a matamatana nunu i sagali ma munuganuga vuso me sou a vanunua na niitealalena aveavena ma golugolu vuso ei isa a sagagalina. Ei ino muata na vanunua vuso, sou isa a aisa seidei na malada ie me mina malada mulimuli tamai.

<sup>22</sup> Salemo ei tau a golugolu vuso matano ne Krai, me ei toe ei ni muge a golugolu vuso, me na inigogona li, ei muina a letena viepiluna kinaka.

<sup>23</sup> Viepiluna kinaka ei a vovone Krai. Krai ei mavoni sele sou a golugolu vuso

minei, me ei vonu sele na viepiluna kinaka minei.

## 2

### *Ne eitou mauili pilu e Krai*

<sup>1</sup> Lisa nunu mine amutou matesi a inigogona pagu ma sinusu mine amutou.

<sup>2</sup> Na ilala iedo, amutou asuasu na inigogona pagu mina magamaga ie me amutou ogomuli a inigogona mina mapana mina nunu pagu vuso ino na avena oata, ede a nunu sagali ei pipigopigo lilo na lilone sou a vanunua sou saukikiki a inade mine Salemo.

<sup>3</sup> Lisa eitou vuso tamai eitou ino pilu a abuna iedo, me eitou ogomulimuli moni a masagana pagu mina lilomumuguna mine eitou. Eitou ogomuli a masagana mina vovo, ma masagana damutatalana mine eitou oto. Maidolo me eitou tamai eitou a vanunua ma tavivine mina gualena mapa pagu mine Salemo, tomane ei masusuliosi ane sou a vanunua ma tavivine sou goli a matana inigogona simaido.

<sup>4</sup> Moni a dinodo mine Salemo i vonu sele, me ei bilii a lilone ei mamau lou usinani ne eitou.

<sup>5</sup> Patotona, eitou matesi vuna a sinusu mine eitou, moni Salemo ei bilii e eitou a mauilina ilala ei mailisi e Krai maino na minate. E, na dinodo mine Salemo moni, ei gualeliu e amutou!

<sup>6</sup> Ei mailisi eitou pilu e Krai Iesu. Me ei toe eitou ugupiluosi e Krai mina niugugu a mapana minei na langi.

<sup>7</sup> Na pipigona mine Krai Iesu, Salemo ei goli a inigogona doana do usinani ne eitou, vuna maido ei kale ni maite a dinodo buo sele minei usino na vanunua vuso, na avalavala vuso mulimuli.

<sup>8</sup> Na dinodo mine Salemo, amutou guale a mauilina alaba ilala amutou silimuli e Krai. Ede a golu amutou oto mu ma goli ete. Boa. Ieli i a niabi moni Salemo ei bilii sabubi e amutou.

<sup>9</sup> Ei ma tomane ete a mapana pipigona amutou goli. Maido ma bibi tasa boa i mapigogoi ni beilange a aisane ei oto.

<sup>10</sup> Eitou a malasana vanunua Salemo i mapale. Lilo ne Krai Iesu, Salemo ei mapale eitou a vanunua ma tavivine i alaba, neitou goli a pipigona kubaana, lisa e Salemo ei masusuliosi ane eitou.

### *Eitou palea tasa moni pilu e Krai*

<sup>11</sup> De ne amutou damutale kube, lisa amutou a vanunua mina abuna sea. Sou a abuna mine Iuda, sou tole sou oto a vanunua na munoge, sou vate e amutou maido, "Vanunua sou ma mogemoge ete." Moni ieli sou moge moni a vovone sou, a lilone sou boa.

<sup>12</sup> Me na ilala do, amutou bulagetase Krai. Amutou ino masala na abuna mine Israel. Amutou tamai ino masala na magilipiluna, ieli Salemo ei adegatunasi ne sou a abuna mine Israel. Me amutou eili na magamaga ie, me amutou ma muada oto e Salemo, me amutou ma isa oto a golu doana Salemo ei bilii a vanunua mine ei mulimuli.

<sup>13</sup> Lisa amutou bulago sele ane Salemo. Moni seidei na dalane Krai, Salemo ei maasi e amutou usinani, me amutou valitole Krai Iesu, me amutou ugu agavuale sele Salemo.

<sup>14</sup> Krai oto ei a lilomeana mine eitou. Krai ei taupili a abuna lua, mei toe sou e Iuda ma abuna sea sou palea a abuna tasa moni, ei lopetase a bigomu iedo mei mapuliosi a maibutualena.

<sup>15</sup> Me na vovone ei oto, ei taulelesi a binea mine Moses pilu a maduna inade vuso ma binea vuso. Na inigogona ieli ei taupili a abuna lua, Iuda ma abuna sea, ne sulu palea lilo ne ei oto tomane a bibi tasa alaba mei toe eitou palea a lilo tasa moni.

<sup>16</sup> Ei mate na tauvaleuti ni viepili a abuna lua do ne su palea a vovo tasa moni. Me na tauvaleuti, ei mapuli a inigogona butualena lisa do me ei toe sulu maitamaina pilu e Salemo.

<sup>17</sup> Ei asu usinani mei ademuade a malongolongona kubaana mina lilomeana usino ne amutou a abuna ino na avena bulago, me ne sou e Iuda sou eili agavi tamai.

<sup>18</sup> Ne Krai, eitou a abuna lua eitou isa a Maolona Nunu tasa, ei pee a vea, ne eitou sibitala ne Tamane eitou.

### *Eitou vuso a kristen eitou a luma ivu mine Salemo*

<sup>19</sup> Maido me, seidei amutou ma tomane ete a mosi sou asu laulau maisaba. Boa. Amutou a abuna tasa moni pilu a vanunua ma tavivine mine Salemo. Amutou eili a abuna sele mine Salemo.

<sup>20</sup> Amutou tomane a luma, Salemo ei tige muata ne sou a aposel pilu e sou a profet, tomane a vuna luma ie. Me Krai Iesu ei a munugana vatu.

<sup>21</sup> Maido ma tuatuana luma vuso do, sou damasosoa ne Krai, me sou vuso so damasosoa pilu iiti me ne sou muina a luma maolo lilo ne Bibi Taula oto.

<sup>22</sup> Amutou tamai mu valitole e Krai, me Salemo ei tigeipili e amutou pilu e sou sanii, ne amutou vuso palea a luma ivu mine Salemo, ma Maolona Nunu mine Salemo ni malu na luma do.

## 3

*Pol ei veimuade a malongolongona kubaana usino ne sou a abuna sea*

<sup>1</sup> Eau e Pol eau ugu na luma na tunuui, vuna eau gologoli a pipigona mine Krai Iesu ane amutou a vanunua mina abuna sea.

<sup>2</sup> Eau damu i amutou longesi maido, Salemo ei lilomuli eau mei vileale eau mina pipigona do, maido me ei goli a dinodo minei usino ne amutou tamai.

<sup>3</sup> Inade Salemo ei goli iedo, lisa ei ino ovu, moni Salemo oto i mapale usinani minau, tomane eau mapamuli sapesi.

<sup>4</sup> Na ilala amutou gi a inade ie, ede amutou muada i maido, eau muada kuba sele a inade ovu mine Krai.

<sup>5</sup> Na malada taliuliu lisa, Salemo ei ma ademuada oto a inade ovu ie. Moni seidei na Maolona Nunu, Salemo ei ademuada ane amiteu a maolona aposel minei, me sou a profet minei.

<sup>6</sup> Inade li ei maido, na malongolongona kubaana, amutou a vanunua na abuna sea, amutou palea a abuna tasa, ma vovo tasa pilu e amiteu. Me eitou vuso neitou guale pili a golugolu vuso Salemo i vileale le eitou lilo ne Krai Iesu.

<sup>7</sup> Salemo ei dode eau me ei toe eau na palea a bibi na pipigona mina veimuadana malongolongona kubaana ie. Me ei bilii e eau a sagalina mina toesagaline eau a gunolina pipigona ie.

<sup>8</sup> Eau matano oto ana vanunua ma tavivine vuso mine Salemo, moni ei dode eau, me ei bilii e eau a pipigona mina veimuadana malongolongona kubaana ane a abuna sea. Na malongolongona kubaana iedo, ei ade a golu doana vuso mine Krai, ede eitou ma mapigogoi ete sele neitou vivileale me neitou gi.

<sup>9</sup> Salemo ei mapale a golugolu vuso, moni ei tau oovi a damutatalana minei na malada vuso lisa. Moni seidei ei vileale eau mina ademuadana damutatalana ovu minei ieli usino na vanunua vuso.

<sup>10</sup> Lisa ei tau oovi, moni seidei ei toe a viepiluna kinaka minei i palea, me na inigogona ieli, ei toe a matamatana damutatalana kubaana minei i palea muada mamau sele ane sou a bineanea sagali ma nunu mina langi, ne sou muada a damutatalana doana mine Salemo.

<sup>11</sup> Lisasi Salemo ei damutale a gunolina golugolu odo, me seidei na pipigona mine Krai Iesu, Bibi Taula ne eitou, ei goliosi.

<sup>12</sup> Me eitou silimuli sagali e Krai, maido me eitou ma lae oto. Vuna eitou muada kuba i maido, Krai ei a vea mine eitou, neitou asu sibalata ne Salemo.

<sup>13</sup> Maido me eau vei le amutou seidei, amutou ma damutatala papaipai lou a davutina iedo eau tabule. Vuna, davutina minau ei buloi e amutou ne mu muina kuba pilu e Salemo.

*Pol ei kaka mina buloine sou e Epesus*

<sup>14</sup> Na vuna moni ieli, eau totopatulialale ei,

<sup>15</sup> ei e Tamana abuna vuso, oata na langi ma magamaga, me ei oto i bilii a maulina ane abuna vuso iedo.

<sup>16</sup> Eau kaka maido, na malasana golugolu papaina minei, Salemo Tamane eitou ei ni mavoni lilone amutou a Maolona Nunu, me ei ni toe amutou namutou magili sagali sele,

<sup>17</sup> me na silimulina mine amutou, Krai ei ni malu na lilone amutou. Ma inigogona kinale sele ne sou sanii, ei ni palea sagali sele lilo na lilone amutou tomane a magamaga ei lapitole obi a aana obu me ei toe a obu ni magili sagali.

<sup>18-19</sup> Maido me namutou guale a sagalina, pilu a vanunua ma tavivine vuso mine Salemo, me ne amutou vuso muada kuba a kinalena mine Krai, ei balabala sele, mei lago mamau lou, mei oata oto sele, mei tano oto sele. E, a kinalena mine Krai ie, ei vululusi a muadana vuso, moni namutou muada sele e ei. Ma golugolu doana vuso ei vonu ne Salemo oto, ne sou vonu ne amutou tamai.

<sup>20</sup> Sagalina mine Salemo oto ei pipigopigo lilo na lilone eitou, ma sagalina iedo ei vululusi sele a damutatalana mine eitou ma golugolu vuso eitou tagi e Salemo ni goli.

<sup>21</sup> Maido me taliuliu taliuliu a viepiluna kinaka ei ni beilange a aisane Salemo lilo ne Krai Iesu i mapigogoi a malada vuso mulimuli. Moliانا.

## 4

*Eitou kristen eitou a vovo mine Krai*

<sup>1</sup> Eau e Pol, eau ino na luma na tunuui, vuna eau gologoli a pipigona mine Bibi Taula. Eau damutale e Salemo i toleale amutou ne mu ogomuli sele ei, maido me eau kale na mailisi amutou namutou asu bilesi na inigogona ei kale.

<sup>2</sup> Namutou toebisii e amutou matano ne sou sanii sea, me mu goli a inigogona i mea usino ne sou. Ne mu ma sinoa asiama lilo ane sou. Amutou tastasa namutou bilii a lilone amutou usino ne sou, me mu tabule a mavaana sou bilii e amutou.

<sup>3</sup> Namutou lapitole obi a inigogona lilo tasa mina Maolona Nunu, ei tomane a mota, i papale eitou neitou ugu a abuna tasa.

<sup>4</sup> Vovone eitou i tasa moni, me eitou isa a Maolona Nunu tasa. Tomane moni Salemo ei toleale amutou namutou magitali a golu tasa moni, iede Salemo ni goli le eitou.

<sup>5</sup> Eitou isa e Bibi Taula tasa moni, ma inigogona silimulina i tasa, ma maavuvutuna i tasa moni.

<sup>6</sup> Salemo tasa moni ino, ei e Tamane eitou vuso. Ei oata oto ane a vanunua ma tavivine vuso, me ei pipigo balivua na vanunua ma



tavivine vuso, me ei ino lilo ne amutou vuso.

<sup>7</sup> Krais ei bilii a niabi buo sele usinani ne eitou, me tomane moni e Salemo ei dode mamai sele eitou vuso tastasa.

<sup>8</sup> Laulau mine Salemo ei vei maido, “Na ilala ei asu uata,

ei maasi a abuna taula mina luma na tunuui ne sou asu pilu e ei.

Me ei bilii a niabi vuso usino na vanunua iodo.”\*

<sup>9</sup> Ma inade li “Ei asu uata,” ei maite eitou maido, palapala Krais ei asu utano oto na magamaga.

<sup>10</sup> Bibi iedo palapala ei asu utano, ei asu uata oto sele na aubu na langi, ne ei ni mavoni a golugolu vuso.

<sup>11</sup> Me Krais moni ei bilii a niabi vuso maido, mina vanua sanii ei bilii a pipigona aposel, me mina vanua sanii ei bilii a pipigona profet, me mine sanii ei bilii a pipigona mina veimuadena malongolonga kubaana, me mine sanii ei bilii a pipigona mina itealalena viepiluna kinaka, ma pipigona mina matetengina.

<sup>12</sup> Krais ei bilii a niabi vuso li mina buloine sou a vanunua ma tavivine mine Salemo ne sou goli a pipigona doana minei. Maido ma vovone Krais ni muina sagali.

<sup>13</sup> Maido me eitou vuso mapigogoi neitou silimuli sele e Natune Salemo me eitou vuso neitou muada sele e ei, me ieli ei toe eitou neitou lilo tasa moni. Maido ma maulina mine eitou ni buo me sagali, me neitou guale sou a inigogona doana tasa moni tomane Krais oto.

<sup>14</sup> Io, eitou ma mapigogoi ete neitou ino lou tomane seleanani, me a inade mina vanunua na toegolalina ma inigogona vuso mina aualana me a iototona sou ma mapigogoi ete ne sou saukiki maisabe eitou, tomane a avivili ma dasi i lange laulau maisabe a bot.

<sup>15</sup> Moni ne inigogona kinale neitou ade a inade patotona moni. Maido me neitou palea a vanunua ma tavivine sagali na inigogona vuso, me neitou valitole sele e Krais, ei a letene eitou,

<sup>16</sup> mei toe a masoosoo vuso, lualua, tutua, ue a golu mina vovone eitou ne sou maidamapilu, me sou ogomuli a inigogona mina kinale usino ne sou sea sea, me na inigogona ieli, vovo ei ni buo me ei sagali me eitou neitou toekube a pipigona ei vileale mine eitou vuso tastasa.

*Sou a kristen ne sou malu na inigogona i alaba*

<sup>17</sup> Maido me eau vei a inade tasa usino ne amutou. Na aisana Bibi Taula, eau adepalea sagali maido, amutou ma malumalu lou

na inigogona mine sou a vanunua masala. Damutatatalana mine sou i maisaba vuso,

<sup>18</sup> ma muadana mine sou, ei tomane a tunuui. Sou ma isa oto a muadana ivu, ma lilone sou i sobo, maido me sou ino masala na maulina mine Salemo.

<sup>19</sup> Sou ma maela oto a inigogona sou goligoli. Sou gali sele ulilo na inigogona pagu, ma lilone sou i ilisi sele a gunolina matamatana inigogona mumugu.

<sup>20-21</sup> Moni amutou longesi a inade mine Krais, me sou matetengiosi e amutou a inade ivu mine Iesu. Me eau muada, sou ma matetengi ete amutou a gunolina inigogona pagu mine sou a vanunua masala.

<sup>22</sup> Lisa amutou tamai mu ogomuli a masagana mina lilomumuguna ma inigogona aualana, ma liloilisina mina gunolina golugolu pagu, me a inigogona maasina vanunua usino na vea na mamauna. Moni seidei ne amutou taulele a inigogona mumuguna mina vanunua lisa,

<sup>23</sup> me ne amutou palea alaba lou na nunu ma damutatatalana mine amutou.

<sup>24</sup> Ne amutou palea a vanunua ma tavivine alaba na inigogona bilesina ma inigogona maolona tomane Salemo ei kale ni mapale.

<sup>25</sup> Maido me ne amutou litase a inigogona mina aualana. Amutou vuso namutou goli a inade patotona moni ane sou a kristen sea, vuna eitou vuso eitou a aveavena mina vovo tasa moni.

<sup>26</sup> Mane a lilomu ei sinoa, de amutou tilale, dae ne amutou goli a sinusu me ne amutou saboa ino mu sinoanoa pea oaso ni solo.†

<sup>27</sup> Ma biliilii lei a vea tasa ane Satan.

<sup>28</sup> Vanunua na paaalina sou ne sou ma paaaliali asa. Boa. Moni ne sou goli a pipigona kubaana na limane sou oto ne sou buloi a vanunua sou boto a golugolu.

<sup>29</sup> Ne amutou ma langelange lei a matamatana inade mamau i palea na asene amutou. Boa. Inade kubaana moni ni palea, i mapigogoi ni masagali a vanunua ma tavivine. Matana inade iede ei maasiasi a dinodo usino na vanunua sou longe.

<sup>30</sup> Ne amutou ma biliilii lei a lilomavaana usino na Maolona Nunu mine Salemo. Salemo ei bilii e amutou a Maolona Nunu tomane a matailala, ne amutou muina a vanunua ma tavivine minei bilesi i mapigogoi a malada mina gualeliune amutou.

<sup>31</sup> Ne amutou taulele a inigogona vuso mina lilogegeluna, ma sinoana ma liloivilina, ma inade vautana, ma adepintolana, ma matamatana inigogona pagu vuso.

\* 4:8 Laulau na Inala 68:18 † 4:26 Laulau na Inala 37:8

<sup>32</sup> Moni ne amutou goli a inigogona doana usino ne kristen sea, me bilii a lilone amutou usino ne sou. Ne amutou lilotase a sinusu mine sou, tomane Salemo ei lilotase a sinusu mine amutou lilo ne Kraiss.

## 5

### *Neitou asu lilo na muada*

<sup>1</sup> Amutou natatune Salemo, Salemo ei kale sele amutou. Maido me namutou ogomuli a inigogona mine Salemo oto.

<sup>2</sup> Namutou asu na inigogona mina kinale sele ne sou sea, tomane Kraiss ei kale sele eitou, me ei bilii a maulina minei oto mina buloine eitou. Ei bilii e Salemo a maulina minei, tomane a niabi a manginana i doana.

<sup>3</sup> Amutou ma goligoli lei a inigogona sualolona, ma matana inigogona vuso i mumugu, me amutou ma isualale lei a golugolu mine sou sea. Vuna sinusu sou ieli ei ma puiale ete ane eitou a vanunua ma tavivine mine Salemo.

<sup>4</sup> Amutou ma veivei lei a inade mumugu, ma adevautautana, ma adeginelena i pagu. Matana inade maido, ei ma mapigogoi ete neitou ade i. Boa. Moni neitou vate kubaana ane Salemo.

<sup>5</sup> Namutou muada kuba i maido, vanunua ma tavivine mina sualolona ma matamatana inigogona mumugu, ma vanunua ma tavivine mina isualena, ei a tasa moni tomane a kinaka ana puigolo, sou a abuna do so ma mapigogoi ete ne sou gali ulilo na itealalena mine Kraiss me Salemo.

<sup>6</sup> Namutou ulago kuba, dae ne amutou ogomuli a inade pagu sabubu mina vanua, sou kale ne sou lapuale amutou usino na gunolina inigogona pagu, matana inigogona moni iedo, ei toe Salemo ni sinoa ana vanunua sou saukiki a inade minei.

<sup>7</sup> Maido me namutou ma maitamaina pilu oto a matana vanunua maido.

<sup>8</sup> Lisa amutou ino na tunuui, moni seidei Bibi Taula ei maasi e amutou usino na muada. Maido me namutou malu tomane sou a vanunua ma tavivine mina muada.

<sup>9</sup> Vuavuana muada do sou a inigogona doana, ma inigogona bilesi, ma inigogona adepatotona.

<sup>10</sup> Namutou tove sagali a punogena inigogona Bibi Taula ei kale.

<sup>11</sup> Namutou ma maitamaina pilu oto a vanunua sou goligoli a inigogona mina tunuui. Matana inigogona maido, ei ni ma vuale ete a vuana i doana. Boa. Moni namutou maite e sou a vanunua maido, matana inigogona ieli ei pagu.

<sup>12</sup> Eau maela a veipalena matana inigogona sou ovu me sou goligoli.

<sup>13</sup> Moni a lada ei mapale a vuna inigogona pagu vuso mine sou, maido me ne sou muina muada.

<sup>14</sup> Vuna, lada ei toe a golu tasa ni muina muada, de golu tamai iedo ei ni palea tomane a muada. Maido ma inade iedo ei ino,

“Oo a bibi seidei o mavuta, oo ilisi.

Oo ilisi na muina minate,  
me ne Kraiss ladevei e oo.”

<sup>15</sup> Maido me amutou, ulago kuba. Amutou ma goligoli lei, tomane a bibi ei ma isa oto a damutatalana. Boa. Namutou malu tomane a bibi ei isa a damutatalana i doana.

<sup>16</sup> Tilale, amutou ma ugu sabubu lou, taliulu namutou masusulu a maitena inigogona mine Kraiss usino ne sou, dae a ilala do ni pulu sabubu, vuna a ilala seidei ieli, ei a ilala pagu.

<sup>17</sup> Maido me namutou ma goligoli lei a matamatana inigogona tomane a bibi na vautautana. Namutou muada kuba a masagana mine Bibi Taula.

<sup>18</sup> Amutou ma inu mamaumau lou me mu matalilili. Umana. Matana inigogona maido, ei toegegigeli e amutou. Moni namutou toe a Nunu mine Salemo ni vonu ne amutou.

<sup>19</sup> Namutou maiadepilu a vanunua ma tavivine mine Salemo pilu a inala mina Laulau na Inala, ma inalana kinaka, me na inalanala mina Maolona Nunu. Ne amutou ale a inalanala usino ne Bibi Taula, na asene amutou pilu a lilone amutou tamai.

<sup>20</sup> Me taliulu namutou vate kubaana ane Salemo tamane eitou a golugolu vuso na aisane Bibi Taula mine eitou Iesu Kraiss.

### *Pol ei ade e sou a taulalaina*

<sup>21</sup> Namutou matano moni ne Kraiss, me amutou tastasa namutou muine amutou matano moni mina vanunua ma tavivine mine Salemo.

<sup>22</sup> Amutou tavivine mu taulai, amutou ne mu matano moni ane suasuane amutou, tomane amutou matano moni ane Bibi Taula.

<sup>23</sup> Vuna maido, bibi ei a letena mine susune ei, tomane Kraiss ei a letena viepiluna kinaka. Viepiluna kinaka ei a vovone Kraiss, me Kraiss ei a Bibi na gualeliu na viepiluna kinaka.

<sup>24</sup> Viepiluna kinaka ei matano moni ne Kraiss. Maido me amutou a tavivine mu taulai tamai, taliulu namutou matano moni ane sou e suasuane amutou na golugolu vuso.

<sup>25</sup> Amutou a vanua mu taulai, namutou kale sele sususune amutou, tomane Kraiss ei kale sele a viepiluna kinaka, me ei bilii a maulina minei oto mina buloina viepiluna kinaka.

<sup>26</sup> Na nanu me na inade minei, Kraiss ei maavuvuti a viepiluna kinaka, me ei toe ei i

palea maolo na matane ei. Na inigogona li, ei vileale a viepiluna kinaka i minei oto.

<sup>27</sup> Ei kale ni toe a viepiluna kinaka ni palea malasa sele na matane ei, mina viepiluna kinaka ei ma isa oto a meda ma kalakobe ma matana golu maido. Boa. Viepiluna kinaka ei ni muina maolo, me ei ni ma isa oto a mumuguna tasa.

<sup>28</sup> Tomane moni e amutou a vanunua mu taulai, namutou kale sele e sususune amutou, tomane amutou kale a vovone amutou oto. Bibi ei kale sele susuna, ei kale sele ei oto.

<sup>29</sup> Eitou muada, bibi tasa boa ei ni butuale a vovone ei oto. Boa. Ei biliilii ei a gona inani, me ei iteale kube ei, tomane Kraisi ei iteale a viepiluna kinaka.

<sup>30</sup> Eitou tastasa a avena mina vovone Kraisi.

<sup>31</sup> Laulau mine Salemo ei vei simaido, "Maido ma bibi ei ilisitase tamana me tinana, mei valitole e susuna, me sulu palea a vovo tasa moni."\*

<sup>32</sup> Inade oву ie, ei mutu sele. Eau ade e Kraisi pilu a viepiluna kinaka minei.

<sup>33</sup> Moni a inade li ei ade tamai e amutou vanua tastasa mu taulai ne amutou kale sele susune amutou, tomane amutou kale e amutou oto. Ma tavivine mu taulai namutou tade sele suasuane amutou.

## 6

*Pol ei ade e seleanini pilu e tamane sou me tinane sou*

<sup>1</sup> Amutou seleanini, namutou ogomuli a inade mine tamane amutou me tinane amutou lilo ne Bibi Taula, a inigogona ieli ei bilesi sele.

<sup>2</sup> Laulau mine Salemo ei vei maido, "Oo no tade tamamu me tinamu." Binea ieli ei a munugana binea, ei isa a adegatuna,

<sup>3</sup> adegatuna ieli ei vei maido, "Mane oo goli maido, de a golugolu vuso o pipigo ei ni palea kubaana, mo no muimu tabaa sele na magamaga ie."\*

<sup>4</sup> Me amutou e tamtamane sou, namutou ma toe sinoenoe lei e natatune amutou. Moni namutou matetengi e natatune amutou a inigogona doana ma inade mine Bibi Taula.

*Pol ei ade a vanua na pipigona me sou a itealalena*

<sup>5</sup> Amutou a vanua na pipigona sabubu, namutou ogomuli a inade mine sou a itealalena mine amutou me namutou lae me mu tade sou tomane amutou ogomuli a inade mine Kraisi.

<sup>6</sup> Ne amutou ma toegalali lei e sou na malada sou ino agavi moni. Boa. Namutou

damutale tomane amutou ino a vanua na pipigona sabubu mine Kraisi oto, me namutou ogomuli a masagana mine Salemo a lilone amutou.

<sup>7</sup> Maido me namutou lilokuba me pipigo sagali sele tomane amutou pipigo ane Bibi Taula oto, ana vanua boa.

<sup>8</sup> Amutou muada, mane a bibi tasa ei goli a pipigona doana, de Bibi Taula ni biliu a mapa doana usino ne ei, golu tasa boa bibi iede ei a bibi na pipigona sabubu ue ei malamala.

<sup>9</sup> Me amutou a itealalena, amutou tamai namutou goli a inigogona i tasa moni ane sou a vanua na pipigona sabubu mine amutou. Namutou ma toenilae ete sou. Namutou muada, Bibi Taula ei ino na langi ei e Bibi Taula mine amutou ma Bibi Taula mine sou tamai, ei vilemuliale iiti a inigogona mina vanunua ma tavivine vuso na inigogona tasa moni.

*Namutou labetole a kinainai vuso na maubina mine Salemo*

<sup>10</sup> De seidei, eau na mapuli a inade minau maido, namutou valitole e Bibi Taula, me namutou magili sagali pilu a sagagalina buo minei.

<sup>11</sup> Namutou labetole a kinainai vuso na maubina mine Salemo, maido me namutou magilisobe a toegalalina mina nunu pagu.

<sup>12</sup> Eitou ma maububi oto ana vanunua ma tavivine sou isa a vovo ma daladala. Boa. Eitou maubi ane sou a mapana mina nunu pagu, me sou a itealalena pagu, me sou a munuganuga mina magamaga na tunuuu mina malada seidei. Eitou maubi ana nunu pagu vuso sou ino oata.

<sup>13</sup> Maido me namutou labetole a kinainai vuso na maubina mine Salemo, ne amutou mapigogoi namutou magili sagali a maubina na malada pagu, me na malada maubina i pulu, namutou magili sagali.

<sup>14</sup> Maido amutou magili sagali, me amutou paletole a loaloe mine amutou a inade patotona, me avisobe a madalane amutou a kinainai a bras mina inigogona i bilesi,

<sup>15</sup> ne amutou labetole a ubupolo mine amutou, ne amutou masusulu a malongolongona kubaana mina lilomeana mine Salemo.

<sup>16</sup> Namutou guale a golugolu vuso mina maubina iedo, me ne amutou lapitole tamai a silimulina tomane a galiau, ne amutou mapigogoi namutou valimate e sou a barnara oavi mine Satan, ei langelange usino ne amutou.

<sup>17</sup> Namutou damutaletale Salemo ei gualeliuosi e amutou, ei tomane a letepolona maubina amutou kai. Ne

\* 5:31 Sinokona 2:24

\* 6:3 Gualeliuna 20:12

amutou lapitole a viso na Maolona Nunu, ede a inade mine Salemo.

<sup>18</sup> Na sagagalina mina Maolona Nunu, namutou kaka taliuliu me namutou sagali a gunolina matamatana kinaka. Taliuliu namutou ulage kube amutou me namutou kaka ane sou a vanunua ma tavivine maolo mine Salemo.

<sup>19</sup> Me namutou kaka tamai agu maido, Salemo ni tau a inade na asegu, mea na taupui a nilae, mea na veimuade sele a inade ovu mina malongolongona kubaana.

<sup>20</sup> Na vuna moni iedo, eau ugu na luma na tunuui, moni eau a bibi na veimuadena malongolongona kubaana mine Salemo, maido me namutou kake Salemo ni masagali e eau, mea na taupui a nilae, mea na ade sagali ane sou.

*Punuluna ade munongena*

<sup>21</sup> Tikikus, ei e tamaine eitou ivu ma bibi na pipigona doana sele mine Bibi Taula. Ei ni veimuade le amutou eau ino matina ma pipigona vuso eau goli.

<sup>22</sup> Eau peltase ei usino ne amutou, ne amutou muada, amiteu ino matina, me ei ni masagali a lilone amutou.

<sup>23</sup> Salemo Tamane eitou pilu e Bibi Taula Iesu Kraiss, ne sulu toemea a lilone amutou vuso tantamaigu, me ne sulu toe e amutou ne mu silimuli sele, me ne mu kale sele sou sea.

<sup>24</sup> Salemo ei ni dode a vanunua vuso sou kale sele Bibi Taula mine eitou Iesu Kraiss taliuliu taliuliu.

## **Pilipai**

### **Laulau Pol ei niage usino ne sou e Pilipai**

#### *Pol ei vei oaso doana*

<sup>1</sup> Pol pilu e Timoti, amilu a bibi na pipigona mine Krai Iesu, amilu niage a laulau ieli usino ne amutou vuso, a maolona vanunua ma tavivine mine Krai Iesu ino ne Pilipai pilu e amutou a vanua na itealalena me amutou a vanua na buloina viepiluna kinaka.

<sup>2</sup> Salemo Tamane eitou pilu e Bibi Taula Iesu Krai, ne sulu dode amutou me ne sulu toemea a lilone amutou.

#### *Pol ei toledadangi e Salemo*

<sup>3</sup> Eau toledadangi e Salemo taliuliu taliuliu na ilala eau damutaletale amutou.

<sup>4</sup> Na kinaka vuso minau mina buloine amutou, taliuliu eau kaka pilu a munonge,

<sup>5</sup> vuna maido soke mina munugana malada i asu mapigogoi seidei, amutou maitamaina pilu e amiteu na pipigona mina veimuadana malongolongona kubaana.

<sup>6</sup> Eau muada sele i maido, Salemo ei soke a pipigona doana lilo ne amutou, ei ni mapuli a pipigona do na malada mine Krai Iesu.

<sup>7</sup> Damutatalana ieli ei bilesi moni, vuna amutou eili na buugu, me amutou vuso amutou maitamaina pilu e eau na ilala eau ino na luma na tunuui, ue eau masagali a malongolongona kuba me eau veipale a pipigona ieli Salemo i bilii e eau na dinodo minei.

<sup>8</sup> Salemo ei muada i maido, eau kale mami sele amutou vuso a kinale mine Krai Iesu.

<sup>9</sup> Eau kakaka maido, kinale mine amutou usino ne sou sanii ei ni buo lou pilu a muadana ma damutatalana doa.

<sup>10</sup> Maido me ne amutou mapigogoi ne mu vivileale sei inigogona i doana sele me sei inigogona i pagu. Me pea na malada e Krai i vavasa ane sou, ne amutou ma isa oto a mumuguna ma sinusuna mina golu tasa.

<sup>11</sup> Ma vuavua na inigogona bilesi Iesu Krai ei mapalele, ei ni vonu sele ne amutou, me sou a vanunua ma tavivine ne sou ite amutou, ne sou bilii a aisa buo usino ne Salemo me ne sou beilange a aisane ei.

#### *Pol ei ino na luma na tunuui, me ieli ei buloi a malongolongona kubaana*

<sup>12</sup> Tamtamaigu, eau kale ne amutou muada i, golu ieli i palea le eau, ei buloi a malongolongona kubaana i palea sagali lou.

<sup>13</sup> Vanua na maubina vuso mina ulagena luma mine Sisar ma vanunua sanii na aubu

ieli tamai, sou muadasi i maido, sou tau eau na luma na tunuui, vuna eau veipale e Krai.

<sup>14</sup> Me tamtamaigu papaina sou muada e eau ino na luma na tunuui, me iedo i masagali a lilone sou me sou silimuli sagali e Bibi Taula me sou taupui a nilae, me sou sagali lou a veimuadana inade mine Salemo.

<sup>15</sup> Patotona, sanii sou veipale e Krai, vuna sou lilogegelu ane eau, me sou kale ne sou tau eau utano. Moni sanii sou isa a damutatalana doana, me sou veipale a inade.

<sup>16</sup> Sou a vanunua li sou muada, eau ino na luma na tunuui mina masagalina pipigona mina malongolongona kubaana, maido me sou kale sele eau me sou veimuade a inade.

<sup>17</sup> Moni a vanunua sanii sou kale ne sou mapale a aisa buo mine sou oto, me sou veimuade a inade mine Krai. Sou ma isa oto a damutatalana bilesi. Boa. Sou kale ne sou adesui a mavaana sanii lou usinani minau na malada eau ino na luma na tunuui.

<sup>18</sup> Moni sou isa a damutatalana kubaana ue a damutatalana pagu, sou veimuade e Krai, ieli ei goli a lilogu i mongemonge sele.

#### *Pol ei damu i ei ni maui tabaa, me ei ni buloi e sou Pilipai*

<sup>19</sup> Me eau na mongemonge lou, vuna eau muada i, taliuliu amutou kakake Salemo ni buloi eau, ma Nunu mine Iesu Krai ei masagaligali e eau, na vea li Salemo ni buloi e eau na malamala.

<sup>20</sup> Eau isa a masagana i buo sele maido, eau na ma goligoli lei a golu tasa eau na gualae a maelana. Boa. Moni seidei me mulimuli tamai, eau na magili sagali sele mea na goli a inigogona doana moni tomene eau goli taliuliu. Mane eau maui ue eau mate, golugolu vuso eau goli, ei ni bilii e Krai a aisa buo.

<sup>21</sup> Damutatalana minau ei maido, mane eau maui, de eau na ugu pilu e Krai, me mane eau mate, ieli tamai doana le eau.

<sup>22</sup> Mane eau saboa eili eau maululi, de eau mapigogoi na buloi a vanunua ma tavivine papaina. Moni eau na ogomuli a sei vea? Eau ma muada oto i.

<sup>23</sup> Eau isa a damutatalana lua a golu ie. Eau kale sele na asu, me na ugu pilu e Krai. Ei ni doana sele.

<sup>24</sup> Moni nane i puiale lou eau na muigu na magamaga mina buloine amutou.

<sup>25</sup> Eau silimuli sagali sele i maido, eau na muigu lou mea na pipigo pilu e amutou mina buloine amutou na silimulina sagali ma munonge.

<sup>26</sup> Maido na malada eau asu lou usino ne amutou, ne amutou mongemonge e eau me mu beilange a aisane Krai Iesu.

*Inasu mine amutou, ei ni ogomuli sele a malongolongona kubaana mine Krai*

<sup>27</sup> Golu buo ei maido. Inasu mine amutou ei ni ogomuli sele a malongolongona kubaana mine Krai. Maido me mane eau asu usino mea ite amutou, ue eau longe moni a inade ne amutou, eau kale na poge maido amutou magili sagali ma lilone amutou ni tasa moni, me na damutatalana tasa moni, amutou pipigo pilu mina mailisina vanunua ma tavivine a silimulina mina malongolongona kubaana.

<sup>28</sup> Me eau kale tamai na muada i maido sou a butu mine amutou, ne sou ma mapigogoi ete ne sou toenilae amutou. Me mane sou ite amutou mu ma lae oto, de ne sou muada i maido, sou ne sou mamau, moni Salemo oto ei ni toe amutou mu ugu kuba iiti.

<sup>29</sup> Longe. Salemo ei toekubesi e amutou, mei bilii e amutou a pipigona mine Krai. Ei ma bilii ete amutou a silimuline Krai moni. Boa. Ei bilii e amutou a davutina tamai mina aisane ei.

<sup>30</sup> Lisa amutou ite eau ino na maubina iedo, me seidei amutou longe a inade eau saboa eili eau maububi. De amutou tabule a davutina, vuna maido amutou maitamaina pilu e eau mina maubina ieli.

## 2

*Neitou lilo tasa moni me neitou toekube sou sanii*

<sup>1</sup> Nane Krai i masagaligali a lilone amutou, io? Nane ei kale sele amutou, me iede ei toemea a lilone amutou, io? Nane amutou ino lilo na maulina mina Maolona Nunu, io? Nane amutou lilomulimuli e sou sanii, me mu dode sou, io?

<sup>2</sup> Mane maido, de namutou toe a munonge minau ni vonu sele. Amutou vuso namutou lapitole a damutatalana tasa moni, me mu ogomuli a inigogona tasa mina kinale sele ne sou sanii, me a lilone amutou ni tasa moni sele.

<sup>3</sup> Amutou ma damutaletale lei e amutou oto moni me mu ma beilangelange lei a aisane amutou oto. Amutou toebisii e amutou oto, me namutou damutale a inigogona mine sou sanii i vululusi a inigogona mine amutou.

<sup>4</sup> Amutou ma itealale lei a golugolu mine amutou moni. Boa. Amutou tastasa ne mu iteale tamai a golugolu mine sou a vanunua ma tavivine sanii, me ne mu buloi e sou a niuguna kuba.

*Krai ei taupui e ei oto, me Salemo ei beilange ei*

<sup>5</sup> Ne amutou isa a damutatalana tasa moni, tomane Krai Iesu ei isa i.

<sup>6</sup> Ei e Salemo ivu,

moni ei ma damutale ete ei ni muina tasa moni tomane Salemo. Boa.

<sup>7</sup> Ei litase a inigogona iedo, mei palea tomane a bibi na pipigona sabubu.

Ei palea tomane a bibi,

<sup>8</sup> Me a vanunua sou ite ei a bibi ivu.

Me ei taupui e ei oto, mei ogomuli a inade mine Salemo, i asu mapigogoi ei mate, e, mapigogoi ei mate na tauvaleuti.

<sup>9</sup> Na vuna moni ieli, Salemo ei beilange e Iesu mei tau e ei oata oto sele.

Me Salemo ei bilii e ei a aisa tasa i doana sele, ei vululusi a aisa vuso.

<sup>10</sup> Maidolo me sou a bineanea vuso me sou vuso vanunua ma tavivine ma golugolu vuso ino na langi ma magamaga ne sou totopatulu me ne sou matano moni na aisane Iesu.

<sup>11</sup> Me sou vuso ne sou veimuade maido Iesu Krai ei e Bibi Taula.

Me na inigogona iedo, ne sou bilii a aisa buo usino ne Salemo Tamane eitou.

*Neitou muine eitou tomane a muada balivua na vanunua ma tavivine*

<sup>12</sup> De, amutou tamtamaigu, tomane namutou longemuli taliuliu a inadegu na malada eau muina pilu e amutou, seidei eau eili bulago ane amutou tamai, namutou longoala kuba sele lou. Salemo gualieliuosi e amutou, maido me seidei namutou lae me namutou tade sele Salemo, me namutou pipigo sagali sele a maitena inigogone amutou tomane Salemo ei gualieliuosi e amutou.

<sup>13</sup> Eitou muada, Salemo ei pipigopigo lilo na lilone amutou. Ei oto i mailisi a masagana mine amutou mina ogomulina inigogona ei kale, me ei bilii e amutou a sagalina mina gunolina inigogona sou odo.

<sup>14</sup> Me na golugolu vuso amutou goli, mu ma adepapaipai lou, me mu ma adesinoa maisabasaba lou, namutou ugu vale moni, me mu pipigo moni.

<sup>15-16</sup> Mane amutou goli maido, ne amutou palea natatune Salemo bilisi, me namutou ma isa oto a mumuguna ue a inigogona pagu. Ne amutou lapitole obi a inade ei isa a maulina, me ne amutou muina tomane a muada balivua na abuna vanunua ma tavivine mina magamaga ie, ede sou a abuna sou litase a inigogona bilisi, me sou goli a inigogona pagu makuba. Maido me na malada Krai i vavasa ana vanunua ma tavivine, eau na mongemonge sele a inigogona mine amutou, me eau na muada i maido, pipigona sagali vuso eau goli balivua ne amutou, ede eau ma goli sabubi ete.

<sup>17</sup> Silimulina mine amutou, ei tomane a niabi amutou bilii e Salemo. Golu tasa boa mane sou valipute eau tomane a niabi, me a dalagu i singi tomane a niabi na vain, pilu a niabi mine amutou ieli, eau na mongemonge sele, mea na maimonge pilu e amutou.

<sup>18</sup> Tomane moni, amutou tamai namutou mongemonge me namutou maimonge pilu e eau.

### *Timoti me Epafroditus*

<sup>19</sup> Mane Bibi Taula Iesu ei kale, io ei ni ma tabaa oto eau na peltase Timoti usino ne amutou. Na malada ei veteliu, ei ni vei le eau e amutou, mea na lilokuba iiti.

<sup>20</sup> Bibi tasa lou boasi ni maitomi eau tomane Timoti. Lilona ei tasa moni pilu e eau, me taliuliu ei damutaletale a punogena vea mina buloine amutou.

<sup>21</sup> Sou a vanua sanii sou lilobuu a golugolu mine sou oto me sou ma kale ete sele ne sou goli a pipigona mine Iesu Krai.

<sup>22</sup> Moni amutou muada a inigogona kubaana mine Timoti maido, ei buloi e eau a pipigona mina malongolongona kubaana tomane a bibaini ei buloiloi e tamana.

<sup>23</sup> Maido me eau kale na magitali sape na pogeputi sei golu sele ni palea le eau, me mulimuli eau na peltase ei ni asu asi usino ne amutou.

<sup>24</sup> Me eau silimuli maido, Bibi Taula ni pee a vea me mulimuli eau tamai na asu na ite amutou.

<sup>25</sup> Eau damutale eau na peltase e Epafroditus usino ne amutou. Ei e tamaine eitou, ma pipigona minei ei tasa moni tomane eau, mei e tamaigu na maubina iedo, me amutou peltasesi ei usinani ni buloi e eau.

<sup>26</sup> Ei lilomomolu sele e amutou mei kale ni ite amutou. Ei muada, amutou longe a inade ve ei isa a sinobe, me iede ei toe ei lilomavaa i.

<sup>27</sup> Ivu, lisa ei sobe me bisii moni ei ni mate. Moni e Salemo ei lilomuli ei mei toekube ei. Me Salemo ei lilomuli ei tasa moni boa. Ei lilomuli tamai eau, vuna ei ma kale ete a mavaana buo lou ni avisobe eau.

<sup>28</sup> Maido me eau kale mamai sele na peltase ei usino, ne amutou ite lei ei, me mu mongemonge. Me eau tamai ea na ma lilobuu vauta oto.

<sup>29</sup> Maido me ne amutou mongemonge sele a gualene Epafroditus na aisane Bibi Taula. Ne amutou maite a inigogona doana usino ne sou a matana vanunua do.

<sup>30</sup> Ei goli sagali a pipigona mine Krai, me ei bisii moni ei ni matesi, moni ei ma damutale ete ei oto ni ugu kuba. Boa. Ei damutaletale moni a pipigona amutou bilii e ei

mina buloine eau, mei vivilitase a sinobe minei mei goli lei a pipigona.

## 3

*Bibi ei silimuli e Krai, ei a bilesina bibi ivu*

<sup>1</sup> Tamtamaigu, eau kale na vei a inade tasa lou maido, ne amutou mongemonge e Bibi Taula. Eau ma bale oto a niagena inade ieli lou usino ne amutou, vuna ei ni ulage e amutou.

<sup>2</sup> Amutou tilale a vanunua sou goligoli a inigogona pagu tomane a busebuse, ede a vanunua sou damu i eitou vuso neitou mongemoge a vovone eitou na inigogona mine sou e Israel.

<sup>3</sup> Eitou totopatuliale Salemo na vea mina Maolona Nunu mine Salemo me eitou beilange a aisane Krai Iesu, maido me eitou moni a abuna ivu mina munogena mine Salemo. Eitou ma silimuli ete a golu a vovone eitou ei goli, ei ma mapigogoi ete ni gualeliu e eitou.

<sup>4</sup> Longe. Mane a gona vovone eitou ei mapigogoi ni gualeliu e eitou, io eau oto na ugu kuba iiti lou. Eau vululusi sele sou a vanua sou mongemonge a golu i palea le a vovone sou.

<sup>5</sup> Eina i maalepose eau, me na malada pantolonai sou moge eau. Eau a bibi mine Israel me eau a abuna mine Benjamin. Eau muada a inade Hibu tomane euma me eina tamai. Me eau ogomulimuli sagali a binea mina inigogona mine sou e Parisi.

<sup>6</sup> Eau sagali sele tamai a pipigona mine Salemo, maido me lisa eau toegegeli sou a viepiluna kinaka.\* Mane a vanunua sou damutale a inadnade mina binea me sou gegemuale a inigogona minau i bilesi ue boa, de ne sou poge eau eau bilesi moni.

<sup>7</sup> Moni golugolu vuso sou buloi e eau lisa, seidei eau damutale a golugolu odo sou sabubu moni, vuna eau ogomuli a vea mine Krai.

<sup>8</sup> Me eau tamai muada e Krai Iesu, ei e Bibi Taula minau, me eau ite a muadana iedo ei a golu ivu, me seidei a golugolu kubaana vuso mina magamaga ieli sou tomane a molomolo sabubu moni le eau. Eau kale na ogomuli moni e Krai, me eau litase a golugolu vuso, ne eau na lapitole obi moni e Krai

<sup>9</sup> mea na valitole ei. Eau ma damutale ete na palea a bilesina bibi a inigogona eau oto eau ogomuli a binea. Boa. Eau kale na palea a bilesina bibi a vea tasa sea, ei a vea mina silimuline Krai. Eitou silimuli e Krai, me Salemo oto ei vate eitou a bilesina vanunua ma tavivine.

\* 3:6 Apospel 8:1-3, 9:1-10

<sup>10</sup> Eau kale na muada iiti e Krai. Krai ei ilisiliu na minate mei isa a sagalina buo, me eau kale na muada sele a sagalina minei iedo. Eau kale na maitamaina pilu e ei na inigogona tabulena davutina. Me eau kale na lapitole a damutatalana tasa tomane ei lapitole na malada ei mate i,

<sup>11</sup> me eau damutale eau tamai na ilisiliu na minate.

*Pol ei vele sagali usino na sinuana*

<sup>12</sup> Eau ma damu oto i maido, eau gualesi a inigogona mine Krai me eau palea a bibi kubaana sele. Boa. Moni taliuliu eau vele sagali mina gualena inigogona iedo, tomane Iesu ei toleale eau na guale iedo.

<sup>13</sup> Amutou tamtamaigu, eau ma damu oto i, eau gualesi a inigogona iedo. Moni eau isa a damutatalana tasa moni, ede eau na danivusetase a golugolu vuso lisa, me eau na pipigo sagali a gualena golu sou ieli ni palea mulimuli.

<sup>14</sup> Eau vele sagali na sibitala na sinuana mina gualena mapa. Mapa iedo ei maido, na pipigona mine Krai Iesu Salemo ei toleale eau na asu uata, ne eau na ugu kuba sele pilu e ei.

<sup>15</sup> Maido me mane eitou isa a damutatalana kuba me eitou matuasi, io eitou vuso neitou ogomuli a damutatalana tasa moni iedo tomane seidei eau ademuada i. Mane amutou isa a damutatalana sea, io Salemo ei ni toebilelesi a damutatalana mine amutou iedo.

<sup>16</sup> Moni a inigogona doana eitou gualesi, ede neitou lapitole obi.

*Eitou a vanunua ma tavivine mina aubu na langi*

<sup>17</sup> Amutou tamtamaigu, amutou vuso namutou ogomuli a inigogona minau. Me ne amutou gegemuale kube a inigogona mine sou a vanua do sou ogomulimuli a inigogona mine amiteu tomane amutou ogomulimuli a inigogona mine amiteu.

<sup>18</sup> Moni a vanunua makuba sou ino a butu mina tauvaleuti mine Krai. Malada papai eau veiosi le amutou a inigogona mine sou odo, me seidei eau vei lei le amutou ma matananugu ei kokolo i.

<sup>19</sup> Sou ogomulimuli a masagana mina vovone sou oto, a masagana sou odo ei tomane salemo mine sou. Taliuliu sou damutaletale moni a golugolu mina magamaga moni, me sou mongemonge a gunolina matamatana inigogona mina maelana. Vanunua sou odo, mulimuli ne sou buale na aubu na davutina.

<sup>20</sup> Moni eitou a vanunua ma tavivine mina aubu na langi. Neitou magitali e Bibi Taula Iesu Krai ei ni ilisitase a aubu na langi, mei ni sivo utano mei ni gualeliu e eitou.

<sup>21</sup> Na sagalina minei oto, Krai ei ni goli a golugolu vuso ni muina matano minei, me na sagagalina moni iedo ei ni sauvuvule a vovone eitou i isa a matamatana mavaana ni palea doana mamau sele tomane a vovone ei oto.

## 4

*Taliuliu ne amutou mongemonge e Bibi Taula*

<sup>1</sup> Maido me, amutou tamtamaigu, eau bililili a lilogu usino ne amutou, me eau kale sele na ite amutou. Eau mongemonge sele e amutou me amutou tomane a mapa doana eau pipigo sagali a gualena. Namutou magili sagali lilo ne Bibi Taula tomane eau vei.

<sup>2</sup> Iuodia me Sintike, amulu longe. Amulu a tavine lua mina abuna ne Bibi Taula, maido me a lilone amulu ni tasa moni.

<sup>3</sup> Me oo, o tamaigu sele, eitau a pipigona tasa moni, eau tagi e oo, o no buloi a tavine lua ie. Sulu maitamaina pilu e eau, mina pipigona mina veimuadena malongolongona kubaana. Sulu pipigo pilu e Klemen ma vanua sanii, sou tamai so pipigo pilu e amiteu. Aisane sou vuso do, ei ino na laulau na maulina.

<sup>4</sup> Taliuliu ne amutou mongemonge e Bibi Taula. Eau vei lou, ne amutou mongemonge.

<sup>5</sup> Namutou toe a vanunua vuso ne sou iteilale a inigogona lilomeana mine amutou. Damutale, bisii moni Bibi Taula ni asu usinani.

<sup>6</sup> Ne amutou ma lilobuu lou a golu tasa. Boa. Moni taliuliu ne amutou vei le Salemo a mavaana vuso mine amutou na kinaka pilu a toledangina, me mu tagi e ei ni buloi e amutou.

<sup>7</sup> Lilomeana mine Salemo ei bilii e eitou, ei a golu tasa doana sele. Eitou a vanua eitou ma mapigogoi sele ete neitou muada a vuna mina golugolu vuso. Moni Salemo ei ni toe e amutou namutou ugu lilomea sele. Na inigogona iedo, ne amutou valitole kube e Krai Iesu, me a lilone amutou ma damutatalana mine amutou ni muina kubaana sele.

<sup>8</sup> Tamtamaigu, eau kale na vei a inade tasa lou. Taliuliu ne amutou damutaletale moni a inigogona vuso i patotona, ma inigogona vuso i kubaana, me sou a inigogona bilesi, me sou a inigogona i maolo, ma golugolu i malasa, ma golugolu i doana sele, ma inigogona vuso i muga sele, ma inigogona vuso eitou mongemonge sele a niitena vanunua ne sou goli.

<sup>9</sup> Inigogona vuso eau matetengi amutou me amutou muada iiti e sou, ma inigogona vuso amutou longe eau veimuade e amutou, me a inigogona amutou ite eau gologoli, a inigogona vuso iedo, ne amutou



goli taliuliu. Me Salemo, ei a vuna inigogona lilomeana, ei ni muina pilu e amutou.

*Pol ei mongemonge a niabi sou e Pilipai sou sosove usino ne ei*

<sup>10</sup> Seidei amutou mailisi a damutatalana lou mina buloine eau, maido mea mongemonge sele e Bibi Taula. Ivu, lisa amutou damutaletale eau, moni amutou ma isa oto a vea mina buloine eau.

<sup>11</sup> Ea ma boto oto a golu tasa, mea vei a inade ie. Boa. Eau muadasi a lilomeana, me golu tasa boa sei matana golu i palea le eau.

<sup>12</sup> Golu tasa boa mane eau a kapelabe sele ue eau isa a golugolu makuba, eau lilomea moni. Eau muadasi i a inigogona mina lilomeana, golu tasa boa mane eau isa a gona inani makuba ue eau vitolo, me golu tasa boa eau isa a golu makuba ue eau boto a golugolu. Matamatana golugolu ei ni palea le eau, eau na vale moni mea na lilo iiti moni.

<sup>13</sup> Krai ei masagaligali eau, me na sagalina mine ei, eau mapigogoi na goli a golugolu vuso.

<sup>14</sup> Moni eau mongemonge a inigogona amutou goli mina buloine eau, vuna amutou damutale a maitamaina pilu e eau, na malada eau tabule a mavaana, me amutou goli a inigogona doana ie.

<sup>15</sup> Me amutou a vanunua ma tavivine mine Pilipai, amutou oto mu muada i maido, malada eau soke a pipigona mina veimuadana malongolongona kubaana, mea ilisitase a avena ne Masedonia, viepiluna kinaka tasa boa sou maitamaina pilu e eau mina buloine eau a vatu ue sei golu, amutou moni amutou buloi eau, simaido.

<sup>16</sup> Malada eau ino ne Tesalonaika, amutou buloi e eau a golugolu eau boto na malada sanii.

<sup>17</sup> Ne amutou ma damu lou ve eau tagi e amutou namutou bilii e eau a niabi. Boa. Eau kale a inigogona doana mine amutou ni palea buo lou, me Salemo ni toekube amutou.

<sup>18</sup> To seidei eau niage a inade ieli mina veimuadana iiti i maido, eau gualesi a golugolu vuso amutou bilii e eau. Golugolu amutou sosove usinani, ei mapigogoi sele. Na malada eau guale sou a niabi iedo, Epafroditus ei maasi usinani, eau somiale maido, eau vonu sele. Niabi mine amutou odo, ei tomene a niabi ei isa a manginana doana, ede amutou bilii e Salemo. Salemo i mongemonge sele a gualena matana niabi iedo.

<sup>19</sup> Salemo minau ei vuvuti sele a golugolu vuso, lilo na aisa buo mine Krai Iesu ei ni onevoni sele a golugolu vuso doana amutou boto i.

<sup>20</sup> Salemo ei e Tamane eitou, me neitou beilange a aisane ei taliuliu taliuliu. Ei moliana.

*Pol ei vate oaso kubaana usino ne sou e Pilipai*

<sup>21</sup> Eau vate oaso kubaana usino na vanunua ma tavivine vuso mine Krai Iesu. Me sou tamtamaigu eili pilu e eau sou vate oaso kubaana ane amutou.

<sup>22</sup> Vanunua ma tavivine vuso mine Salemo sou vate oaso kubaana ane amutou, me sou a abuna sou pipigo na luma mine Sisar sou vei sagali le eau na vate oaso kubaana usino ne amutou.

<sup>23</sup> Dinodo mine Bibi Taula Iesu Krai ei ni muina pilu a nunu ne amutou tastasa.

## **Kolosi** **Laulau Pol ei niage usino ne** **sou e Kolosi**

### *Pol ei vei oaso doana*

<sup>1</sup> Eau e Pol, eau a aposel mine Krai Iesu. Na masagana minei oto, Salemo ei vileale eau a aposel. Eau pilu e tamaigu e Timoti,

<sup>2</sup> amilu niage a laulau li usino na vanunua ma tavivine mine Salemo ne Kolosi, amutou, tamtamaigu lilo na Krai, amutou patotonana vanunua.

Salemo Tamane eitou ei ni dode amutou me ei toemea a lilone amutou.

### *Sou e Kolosi sou silimuli sele Iesu*

<sup>3</sup> Na malada amiteu kaka ane amutou, taliuliu amiteu toledadangi e Salemo, ei e Tamane Bibi Taula mine eitou, Iesu Krai.

<sup>4</sup> Vuna amiteu longesi a silimulina mine amutou lilo ne Krai Iesu ma kinale mine amutou usino na vanunua ma tavivine mine Salemo.

<sup>5</sup> A silimulina ma kinale iede ei asu maino na golu doana eitou damutale ve Salemo ei tauosi na langi ane amutou, ma golu doana iede amutou longesi na ilala amutou longe a malongolongona kubaana, ei a inade patotona.

<sup>6</sup> Na avena vuso mina magamaga, malongolongona kubaana ieli ei vele bubula, ma vanunua ma tavivine makuba sou silimuli me sou ogomuli, ma inigogona mine sou i palea kubaana. Na inigogona tasa moni, ei paleasi balivua ne amutou tamai, soke na malada amutou longe a malongolongona kubaana mina dinodo mine Salemo, amutou muada sele i.

<sup>7</sup> Epafra ei matetengi e amutou a inade mina malongolongona kubaana do. Epafra ei a bibi na pipigona kubaana mine Krai. Ei pipigo tomane amiteu, me amiteu kale mamai sele ei. Ei buloiloi e amiteu a buloine amutou.

<sup>8</sup> Ei vei le amiteu a inigogona mina kinale mine amutou usino ne sou a vanunua ma tavivine mine Salemo lilo mina Maolona Nunu.

### *Pol ei kake Salemo ni masagali e sou e Kolosi*

<sup>9</sup> Maido me soke na malada amiteu longe a inigogona doana mine amutou, taliuliu amiteu kake Salemo ni buloi e amutou, ne amutou muada kuba sele a masagana minei, ma Maolona Nunu ni bilii e amutou a matamatana muadana ma damutatalana kubaana, me iede ei ni vonu sele ne amutou.

<sup>10</sup> Maido me amutou mapigogoi namutou malu na maolina mine Bibi Taula e Iesu,

me ne amutou toe mongemonge e Salemo na inigogona vuso, me ne amutou goli a matana pipigona kubaana makuba, me ne amutou muada e Salemo, ma muadana iedo ni palea buo lou taliuliu.

<sup>11</sup> Me na sagalina buo minei oto, Salemo ei ni iabi a sagalina vuso usino ne amutou, ne amutou magili sagali, me mu tabule a mavaana vuso pilu a munongena pea na punuluna malada,

<sup>12</sup> me mu toledadangi e Tamane eitou. Ei toe iiti e amutou namutou guale a golugolu kubaana, iede ei vilealesi le amutou. Iede ne amutou guale pilu a vanunua ma tavivine vuso mine Salemo lilo na muada minei.

### *Pol ei ade a inigogona ma pipigona mine Krai*

<sup>13</sup> Lisa eitou ino matano na sagalina tunuui, moni Salemo ei gualeliuosi e eitou mei maasi usino na niitealalena mine Natuna, ede ei kale mamai sele.

<sup>14</sup> Natune Salemo ei oliliuosi e eitou me ei lilotase a sinusu vuso mine eitou.

<sup>15</sup> Eitou ma mapigogoi ete neitou ite Salemo, moni Natune Salemo ei tomane moni e Salemo oto. Ei ino palasi ana golugolu vuso Salemo ei mapale.

<sup>16</sup> Na limane Natuna iedo, Salemo ei mapale a golugolu vuso na langi ma magamaga. Ei mapale a golugolu vuso eitou ite, ma golugolu vuso eitou ma ite ete, tomane a matamatana bineanea sagali, me sou a nunu i sagali, ma matana golugolu vuso ei iteale me ei sagali tamai. Ne Natune ei oto, Salemo ei mapale a golugolu vuso, ma golugolu vuso do sou palea ane Natune ei oto.

<sup>17</sup> Ilala golugolu vuso saboa sou palea, ei eiliosi. Me ei toe a golugolu vuso do i muina kubaana me ei pipigo kuba pilu.

<sup>18</sup> Ei a letena viepiluna kinaka, ma viepiluna kinaka ei a vovone ei. Ei oto ei a vuna maolina mina viepiluna kinaka. Ei ilililiu pala na minate, maido me ei oto ei ni muge a golugolu vuso.

<sup>19</sup> Salemo ei kale a maolina vuso ma inigogona minei oto ni muina ne Natuna do.

<sup>20</sup> Me Salemo ei kale a golugolu vuso i palea lilo tasa pilu e ei, ede a golugolu na magamaga ma golugolu na langi tamai. Maido me ei itetase Krai ni mate na tauvaleuti ma dalane ei singi. Na inigogona iedo Salemo i taulele a inigogona maibutualena mina golugolu vuso usino ne ei.

<sup>21</sup> Lisa amutou bulago ane Salemo. Na damutatalana mine amutou, amutou butuale ei, me amutou goli a inigogona mamau sele.

<sup>22</sup> Moni Krai ei matesi na tauvaleuti, me na inigogona iedo Salemo i toe amutou

namutou palea lilo tasa moni pilu e ei. Ei gualieli e amutou usino ne ei, me namutou ugu maolo me alaba sele me bilesi na matane ei.

<sup>23</sup> Maido me ne amutou lapitole obi a silimulina, me mu magili sagali sele. Dae a golu tasa ni lapuale amutou me amutou litase a inigogona silimulina sagali mina malongolongona kubaana amutou longe. Eau e Pol eau palea a bibi na pipigona mina malongolongona kubaana, iede amiteu ademuadasi ane sou a vanunua ma tavivine vuso na magamaga.

*Pol ei a bibi na pipigona mina viepiluna kinaka*

<sup>24</sup> Seidei eau mongemonge a tabulena mavaana mina buloine amutou. Eau kale na buloi a viepiluna kinaka mine Krai, ei a vovone ei oto. Davutina mine Krai mina buloina viepiluna kinaka, ei saboa pulu. Eau kale na tabule tamai a davutina mine Krai na vovogu oto me na mapuli sele.

<sup>25</sup> Salemo oto ei vilealesi eau na palea a bibi na pipigona mina viepiluna kinaka mina buloine amutou. Ma pipigona eau na goli, ede a pipigona mina veimuadana inade vuso mine Salemo.

<sup>26</sup> Na malada vuso lisa, inade li ino ovu me vanunua ma tavivine vuso lisa sou ma muada oto i. Moni seidei ei palea muada selesi na matana vanunua ma tavivine mine Salemo.

<sup>27</sup> Na masagana minei oto, Salemo ei maite a inade sou ovu odo usinani ne eitou a vanunua ma tavivine vuso minei, ne eitou muada a inade ieli ei kubaana sele mei tamai mapigogoi ni buloi a vanunua ma tavivine vuso na abuna sea vuso. Inade ovu odo iede e Krai oto lilo ne amutou, me amutou magitali e ei ni maasi amutou usino na muada pilu e ei me namutou guale a golugolu kubaana ino na langi.

<sup>28</sup> Amiteu ademuadada a malongolongona kubaana mine Krai usino ne sou a vanunua vuso tastasa. Me amiteu matetengitengi e sou a damutatalana kuba ma muadana, vuna amiteu kale ne amiteu maasi e sou usino ne Salemo me ne sou palea a sagalina kristen.

<sup>29</sup> Maido me eau pipigo sagali sele a pipigona ieli na sagagalina buo vuso Krai ei bilii e eau, ei pipigo lilo na lilogu.

## 2

*Neitou silimuli sagali me neitou saukiki a aualana inade*

<sup>1</sup> Eau kale ne amutou muada i maido, eau sagali sele a buloine amutou pilu a vanunua ma tavivine mina viepiluna kinaka ne Laodisia, ma vanunua ma tavivine sanii sou saboa so ite a lagugu.

<sup>2</sup> Eau goligoli a pipigona ieli mina masagalina lilone amutou vuso, me mina mailisine amutou mina magilipiluna ma kinale sele ne sou a vanunua ma tavivine sea mine Salemo. Eau kale ne amutou guale a damutatalana kubaana, me iede ei ni masagali a silimulina mine amutou. Me eau kale ne amutou muada kuba a vuna inade ovu mine Salemo, Krai oto ei a vuna inade ovu iedo.

<sup>3</sup> Matana muadana ma damutatalana vuso tomane a gona vuvutina ino ovu lilo ne Krai.

<sup>4</sup> Vuna eau ma kale ete a bibi tasa ni toegolali e amutou, me ei auala ane amutou, maido me eau vei i.

<sup>5</sup> Eau ma pilu oto e amutou, moni na nunu minau eau ino pilu e amutou, me eau mongemonge e amutou, vuna eau longe amutou pipigo bilesi me mu silimuli sagali e Krai.

*Neitou valitole sele Krai.*

<sup>6</sup> Amutou gualesi e Krai Iesu tomane Bibi Taula, maido me namutou asu pilu e ei taliuliu.

<sup>7</sup> Namutou magili sagali lilo ne ei, tomane a aana obu i lapitole sagali a magamaga, me tomane a luma ei magili sagali muata na bao i sagali. Namutou silimuli sagali tomane amiteu matetengi e amutou, me taliuliu namutou toledadangi e Salemo.

<sup>8</sup> Amutou tilale, dae a bibi tasa ni auala ane amutou a inade sabubuna, me ne amutou ogomuli a damutatalana minei. Sou palea maino na inigogona mine eisusune sou ma damutatalana mina nunu na magamaga moni. Sou ma ogomulimuli ete a damutatalana mine Krai.

<sup>9</sup> Amutou muada, Krai ei palea a bibi tomane eitou, ma maulina vuso mine Salemo, ei vonu sele ne ei.

<sup>10</sup> Amutou ino lilo ne Krai, me Salemo i bilii a maulina usino ne amutou, maulina do ei vonu sele ne amutou. Krai ei a letene sou a bineanea ma golugolu vuso, sou isa a sagagalina.

<sup>11</sup> Amutou valitole ei, me amutou guale a munoge, ei a golu mina vovo boa. Na inigogona mine Krai, eitou taulelesi a inigogona mina lilomumuguna. Ede a munoge ivu mine Krai.

<sup>12</sup> Na malada amutou guale a maavuvutuna, amutou valitole e Krai, me Salemo ei peilai e amutou pilu e Krai. Me amutou silimuli a pipigona mine Salemo i mailisiliu e Krai na minate, me na silimulina mine amutou ieli Salemo ei mailisiliu e amutou lilo ne Krai.

<sup>13</sup> Lisa amutou goligoli a matamatana inigogona pagu me amutou saboa guale a munoge maino ne Krai, me na ilala do nunu mine amutou matesi. Moni Salemo i

toe amutou mu guale a maolina pilu e Krai, me Salemo ei lilotase a sinusu vuso mine eitou.

<sup>14</sup> Binea ei vavasa ane eitou, me ei maite a inigogona pagu vuso mine eitou. Moni e Salemo ei taulele a inade vuso iedo mina vavasana ane eitou, me ei mapuli a sagagalina mina binea, me ei gatitole ei na tauvaleuti.

<sup>15</sup> Ei toegegeli vuse a sagalina mine sou a sagagalina nunu, me mina golugolu vuso ei isa a sagalina. Na tauvaleuti Salemo ei maite a vanunua ma tavivine maido, ei vululusi a golugolu vuso mei toe sou palea a golu sabubu.

*A binea ei ma mapigogoi ete ni gualeliu e eitou*

<sup>16</sup> Maido me namutou ma itetasetase lei a bibi tasa ni vavasa ane amutou maido, amutou ma ogomuli ete a binea mina inani ma niinu, me sou a binea mine sou a malada buobuo mina kinaka, ma malada mina game alaba, me mina Maolona Malada mine sou e Iuda.

<sup>17</sup> Golugolu sou odo sou tomane a nunu moni, ne sou maite a golugolu ni palea mulimuli. Moni Krai ei a golu ivu.

<sup>18</sup> Mane a bibi tasa ei vei le amutou na tinada minei ve namutou toebisii e amutou oto me mu kaka ane sou a bineanea mine Salemo, io namutou ma itetasetase lei e sou ne sou vavasa ane amutou. Sou a matana vanua maido sou ogomuli moni a damutatalana mina lilomumuguna, me sou damu ve sou oto sou isa a muadana i kubaana sele,

<sup>19</sup> moni sou ma lapitole obi ete e Krai, ei a letena ivu mine eitou. Lete iedo ei bilii a inani na avena vuso na vovone ei, me ei toe a masoosoo vuso, lualua, ue a golu mina vovona ni maidama kuba pilu. Maido ma vovo ei palea buo na sagagalina mine Salemo.

*Eitou matesi pilu e Krai*

<sup>20</sup> Amutou matesi pilu e Krai, me amutou ma ino lou otosi matano na sagagalina mina nunu i itealale a golugolu na magamaga. Maido me, posa matina seidei amutou asuasu tomane a vanua na magamaga? Posa matina amutou ogomulimuli a matamatana binea maido,

<sup>21</sup> "O ma lapitolele lei, oo ma damedame lei, me oo ma tulituli lei?"

<sup>22</sup> Matana binea maido, ei ade a golugolu eitou pipigo e sou, me saga i sou mamau. Sou a vanua moni sou mapale a binea sou ieli, me sou matetengi eitou a ogomuline sou.

<sup>23</sup> Ivu, sou a matamatana binea ie ei lagu maido, ne sou mailisi eitou a kinaka, me na taupuina lilone eitou, me toevavae a

vovone eitou. Maido ma vanua sanii sou damu i, a binea sou iedo sou ogomuli a damutatalana kuba ma muadana. Moni a binea sou iedo, ei ma mapigogoi ete ni buloi eitou a taupuiselena inigogona lilomumuguna.

### 3

*Eitou ilisiliuosi pilu e Krai*

<sup>1</sup> Salemo ei mailisiliuosi e amutou pilu e Krai, maido me namutou tilotilo a golugolu vuso ino oata na langi. Na aubu oata do, Krai i ugu na niugugu a mapana minei na lima gata mine Salemo.

<sup>2</sup> Taliulu namutou damutaletale a golugolu ino oata. Namutou ma damutaletale lei a golugolu na magamaga.

<sup>3</sup> Amutou matesi, ma maolina mine amutou ei ino ovu lilo ne Salemo, me amutou valitole e Krai.

<sup>4</sup> Krai ei a vuna maolina mine amutou. Na malada ei palea muada sele, ne amutou tamai palea pilu e ei na muada ma malasana mine Salemo.

*Ne Krai moni eitou palea a vanunua ma tavivine i alaba*

<sup>5</sup> Maido me namutou valiputemate a inigogona vuso mina magamaga, ei ino na lilone amutou. Eau ade e sou a matana inigogona maido, sualolona, ma inigogona mumugu, ma liloilisina gunolina inigogona i pagu, ma masagana mina lilomumuguna, ma niisualena. Inigogona mina isualena do, ei a kinakana ane salemo auala.

<sup>6</sup> Vuna moni ieli, sinoana mine Salemo ei agaviosi usino ne sou a vanunua sou ma ogomuli ete a inade minei.

<sup>7</sup> Lisa amutou tamai mu asu pilupilu a matana vanunua ie, me amutou goligoli a inigogona vuso iedo.

<sup>8</sup> Moni seidei namutou pitaselele a matana inigogona pagu vuso, ede a inigogona sinoana, ma liloilisina, ma liloegeluna, ma mailobena, ma inade ei mumugu.

<sup>9</sup> Amutou tastasa ne mu ma aualala lou ane amutou oto, vuna amutou pitasesi a inigogona vuso mina lilomumuguna,

<sup>10</sup> me amutou palea alabasi, me taliulu Salemo ei biliiili a muadana doa vuso usino ne amutou me ei goli e amutou palea i alaba lou pea amutou palea a matana tasa moni tomane ei oto.

<sup>11</sup> Me eitou palea alabasi, eitou vuso eitou a matana tasa moni. Neitou ma damutatale lei maido, eitou a abuna mine Grik ue mina abuna mine Iuda, me eitou moge ue ma moge ete, me eitou mina matamatana inade seasea ue mina matamatana avena i buo, me eitou a bibi na pipigona sabubu ue eitou malamala, vuna Krai moni ei vululusi a

golugolu vuso me ei oto ei eili lilo ne eitou vuso.

*Neitou kale sele sou seasea*

<sup>12</sup> Salemo ei vilealesi e amutou a abuna vanunua ma tavivine minei, me ei kale maimai sele amutou. Maido me namutou dode sele sou seasea, me mu goli a inigogona kubaana usino ne sou, me namutou toebisii e amutou oto, me mu goli a inigogona mea usino ne sou, me mu ma lilovilivili asiasi lou ana vanunua.

<sup>13</sup> Mane a bibi tasa balivua ne amutou ei isa a sinoana ane tamaina, io ei ni tabule a mavaana do me ei lilotase a sinusu mine tamaina. Bibi Taula ei lilotase a sinusu mine amutou, maido moni ne amutou tamai ne mu lilotase a sinusu mine sou seasea.

<sup>14</sup> Namutou bilii a lilone amutou usino na vanunua ma tavivine sanii sea. A inigogona ieli ei vululusi sele a inigogona sea vuso. Inigogona ieli ei tomane a mota ei papalepili a inigogona vuso seasea i palea sagali me sou pipigo pilu.

<sup>15</sup> Ne amutou toe a lilomea mine Kraiis ni iteale amutou. Salemo ei toleale amutou ne amutou lilomea moni me mu palea vovo tasa moni. Ne amutou toledadangi e Salemo taliuliu.

<sup>16</sup> Namutou toe a inade mine Kraiis ni vonu lilo ne amutou. Amutou tastasa ne amutou matetengi e sou a kristen sea, me mu bililiii a damutatalana kuba ma muadana usino ne sou, ne sou goli a inigogona doana moni. Namutou toledadangi e Salemo na lilone amutou, ne amutou ale ane Salemo a inalana mina Laulau na Inala, me sou a inala mina kinaka, ma inala a Maolona Nunu ei mapale na lilone amutou.

<sup>17</sup> A inade vuso mine amutou, ma pipigona mine amutou ma golugolu vuso amutou goli, namutou goli na aisane Bibi Taula e Iesu. Me na aisane ei, namutou toledadangi e Salemo Tamane eitou.

*Pol ei ade e tamenatatuna sou kristen*

<sup>18</sup> Amutou tavivine amutou taulai, namutou matano moni ne suasuane amutou. Inigogona ieli ei bilesi na matane Bibi Taula.

<sup>19</sup> Amutou vanunua, namutou kale sele sususune amutou, ne amutou ma toegegeligeli lei a lilone sou.

<sup>20</sup> Amutou seleanini, namutou ogomuli a inade mine tamane amutou me tinane amutou na golugolu vuso. Bibi Taula ei kalekale a matana inigogona simaido.

<sup>21</sup> Amutou tamtamane seleanini, namutou ma toesinoenoee lei a lilone seleanini, dae ne sou somiale maido, sou ma mapi-goi ete ne sou goli a inigogona doana.

*Pol ei ade a vanua na pipigona me sou a itealalena*

<sup>22</sup> Amutou vanua na pipigona sabubu, namutou ogomuli a inade vuso mina vanua na itealalene amutou na magamaga ie, dae ne amutou damutale moni a toegoline sou, me namutou goli a pipigona doana na malada sou ino agavi moni. Boa. Namutou lae e Bibi Taula, me taliuliu namutou damutale moni a vea mina ogomulina pipigona i doana.

<sup>23</sup> Golugolu vuso amutou goli, namutou pipigo sagali tomane amutou pipigo ane Bibi Taula oto, vuna amutou ma pipigo oto ane a vanua moni.

<sup>24</sup> Amutou muada, mulimuli Bibi Taula ei ni bilii e amutou a mapa doana, ede a golugolu kubaana ei vilealesi mine sou a vanunua ma tavivine minei. Amutou a vanua na pipigona mine Kraiis, me ei moni ei a Bibi na itealalena ivu mine amutou.

<sup>25</sup> Sei bibi ei goli a inigogona pagu, ei ni guale a mapa mina inigogona pagu ei goli iedo. Salemo ei vivileale a inigogona mina vanunua ma tavivine vuso na matana inigogona tasa moni.

## 4

<sup>1</sup> Amutou a vanua na itealalena mine sou a vanua na pipigona, namutou maite a inigogona doana me bilesi usino ne sou. Amutou muada, amutou tamai mu isa a Bibi na itealalena ino na langi.

*Neitou kaka sagali me neitou asu bilesi*

<sup>2</sup> Namutou kaka sagali taliuliu. Na ilala amutou kaka, namutou damutatala kuba me mu toledadangi e Salemo.

<sup>3</sup> Namutou kake Salemo ni buloi e amiteu tamai. Namutou tagi e ei ni pee a vea, ne amiteu veimuade a inade mine Kraiis. Inade ieli, lisa ei ovu, moni seidei ei palea muada selesi. Moni a vanunua sou ma kale ete ne sou longe a inade ie, me sou tau eau na luma na tunuu.

<sup>4</sup> Namutou kaka ane eau na veimuade a inade iedo, tomane Salemo ei kale eau na ade i.

<sup>5</sup> Ilala amutou ino pilu a vanua sou ino masala na kinaka, namutou ogomuli a damutatalana kubaana me mu goli a inigogona bilesi. Taliuliu namutou masusulu ne mu maite a inigogona mine Kraiis usino ne sou.

<sup>6</sup> Taliuliu namutou ade a mamisina inade moni usino na vanua sou kale ne sou lange. Namutou damutale iiti me mu tove a adeli-una inade doana usino na vanunua vuso.

*Pol ei peltase e Tikikus pilu e Onesimus usino ne Kolosi*

<sup>7</sup> Tikikus ei ni mapamuli ane amutou e eau. Tikikus ei pipigo pilu e eau me ei e

tamaine eitou ivu, me ei a bibi na pipigona doana sele mine Bibi Taula.

<sup>8</sup> Eau peltase ei usino ne amutou, vuna namutou muada i, amiteu ino matina, me ei ni masagali a lilone amutou.

<sup>9</sup> Eau peltase Onesimus usino pilu e Tikikus. Onesimus ei a tamaine eitou ivu, me ei a bibi na pipigona doana sele mine Bibi Taula, me ei tasa mine amutou e Kolosi. Ne sulu vei le amutou a golugolu vuso ei palea nani.

*Pol ei vate oaso kubaana usino ne sou e Kolosi*

<sup>10</sup> Aristakus, ei eili na luma na tunuui pilu eau, ei vate oaso kubaana usino ne amutou. Me Mak, ei loane Banabas, ei tamai vate oaso kubaana usino ne amutou. Mane ei asu usino ne amutou, io namutou monge a gualene ei tomane eau veiosi le amutou.

<sup>11</sup> Me Iesu, sou tole e Iastus, ei tamai ei vei oaso kubaana usino ne amutou. Na abuna mine sou e Iuda, a vanua moni iodo sou pipigo pilu eau mina mailisina niitealalena mine Salemo, me sou buloi kube sele eau me eau mongemonge.

<sup>12</sup> Epafras ei vate oaso kubaana usino ne amutou. Ei tamai tasa mine amutou e Kolosi, me ei a bibi na pipigona mine Krai Iesu. Taliuliu ei sagali a kinaka me ei tagi e Salemo ni buloi e amutou namutou magili sagali, tomane sou a kristen so matuasi me sou muada kuba sele a masagana minei.

<sup>13</sup> Eau kale na vei le amutou maido, ei pipigo sagali sele mina buloine amutou pilu a vanunua ma tavivine mine sou a kinaka ino na aubu buo e Laodisia ma aubu buo e Hierapolis.

<sup>14</sup> Me Luk, ei a bibi na toekubena, me amiteu kale sele ei, ei pilu e Demas, sulu vate oaso kubaana usino ne amutou.

<sup>15</sup> Eau kale ne amutou vei le tamta-maigu ne Laodisia a oaso kubaana minau. Me bilii a oaso kubaana tamai usino na tavine Nimfa pilu e sou a vanunua ma tavivine mina kinaka, sou viepilupilu na luma minei.

<sup>16</sup> Malada amutou giosi a laulau ie, io namutou sosove usino na viepiluna kinaka ne Laodisia, ne sou gi tamai. Ma laulau eau sosove usino ne sou e Laodisia, ede tamai namutou gi.

<sup>17</sup> Me namutou vei le Akipus maido, "Oo no iteale kube a pipigona oo guale mine Bibi Taula, me oo no toe iiti sele a pipigona iede."

<sup>18</sup> Eau e Pol, na limagu oto eau niage a inadena oaso kubaana li usino ne amutou. Namutou damutaletale eau, eau saboa eili na luma na tunuui. Dinodo mine Salemo ei ni muina pilu e amutou. Moliana.

## 1 Tesalonaika Munugana Laulau Pol ei niage usino ne sou e Tesalonaika

*Pol ei vei oaso doana*

<sup>1</sup> Amiteu taotolu, Pol, Sailas me Timoti, amiteu niage a laulau ieli usino ne amutou a viepiluna kinaka ne Tesalonaika, amutou a vanunua ma tavivine nu valitole e Salemo Tamane eitou me Bibi Taula Iesu Krai. Salemo ni dode amutou mei ni toemea a lilone amutou.

*Pol ei mongemonge a silimulina mine sou e Tesalonaika*

<sup>2</sup> Malada taliuliu amiteu damutaletale amutou me amiteu toledadangi e Salemo me amiteu buloi e amutou na kinaka vuso mine amiteu.

<sup>3</sup> Amiteu toledadangi e Salemo Tamane eitou, vuna silimulina mine amutou i mailisi a pipigona doana vuso, me a pipigona vuso mina biliina lilone amutou usino ne sou sanii, me masagalina lilone amutou a magitaline Bibi taula mine eitou Iesu Krai.

<sup>4</sup> Tamtamaigu, Salemo ei kale sele amutou, me amiteu muadasi i maido, Salemo ei vilealesi e amutou mine ei bilesi.

<sup>5</sup> Vuna maido, malongolongona kubaana amiteu maasi usino ne amutou odo, ei ma sibitala oto usino ne amutou tomene a inade sabubu. Boa. Ei sibitala pilu a sagagalina me a Maolona Nunu, me amutou muada kubasi i a silimulina mine amiteu. Amutou oto amutou muada a inigogona amiteu goli mina buloine amutou na malada amiteu ino balivua ne amutou.

<sup>6</sup> Ilala amutou gualesi a inade mine Salemo, mavaana makuba i palea le amutou, Maolona Nunu moni ei mailisi amutou namutou mongemonge, me amutou ogomuli a inigogona mine amiteu me mine Bibi Taula.

<sup>7</sup> Maido me amutou maite a inigogona doana mine amutou usino ne sou a vanunua ma tavivine sou silimuli e Krai na avena buo ne Masedonia me Akaia. Boa. Na aububuna vuso sou longesi a mapamulina mine amutou mu silimuli e Salemo, maido me amiteu ma isa oto a pipigona mina ade-muadana ane sou sanii lou.

<sup>8</sup> Inade mine Bibi Taula amutou ade-muada i ei vele bubula tomene a tinangi na galamo. Me ei ma pea oto moni na avena buo ne Masedonia me Akaia. Boa. Na aububuna vuso sou longesi a mapamulina mine amutou mu silimuli e Salemo, maido me amiteu ma isa oto a pipigona mina ade-muadana ane sou sanii lou.

<sup>9</sup> Vanunua vuso do sou mapamuli a golugolu amutou goli le amiteu na malada amiteu asuale amutou. Sou mapamuli

e amutou mu veletase sou e salemo na aualana, me amutou sauvule a lilone amutou usino ne Salemo ivu, me amutou pipigo ane Salemo ei muina taliuliu,

<sup>10</sup> me amutou magitali e Natune ei ni ilisitate a aubu mina langi me ei ni veteliu, ede Natuna ei mate me Salemo ei mailisiliu e ei. Ei e Iesu, ei ni gualeliu e eitou maino na lilo sinoana mine Salemo ni palea mulimuli.

## 2

*Pipigona mine Pol ne Tesalonaika*

<sup>1</sup> Tamtamaigu, amutou oto mu muada a pipigona amiteu goli na malada amiteu ino balivua ne amutou, ei ma buale sabubu oto.

<sup>2</sup> Amutou muada, na ilala amiteu saboa asu usino ne amutou, amiteu ino ne Pilipai, amiteu guale a davutina me sou toegegeli e amiteu. Moni na ilala do Salemo mine eitou ei toesagali a lilone amiteu, me amiteu ma suduliliu oto na matane sou a butu odo. Amiteu magili sagali me amiteu malongo a inade doana mine Salemo usino ne amutou.

<sup>3</sup> Me na ilala amiteu toleale amutou namutou silimuli e Iesu, amiteu ma goli ete a inade na niitou, me amiteu ma goli ete a inigogona mumugu ue a inigogona na aualana. Boa.

<sup>4</sup> Salemo ei tovesi e amiteu, me na masagana minei oto ei bilii e amiteu a pipigona mina malongolongona kubaana, maido me amiteu ma damutale ete namiteu toe mongemonge a vanunua ma tavivine. Boa. Amiteu toe mongemonge e Salemo moni, ei gegemuale a lilone amiteu.

<sup>5</sup> Amutou muadasi i Salemo tamai ei ade buloi e amiteu maido, amiteu ma goli ete a matana inade mina toegolaline amutou, me tamai amiteu ma isu oto ana golugolu mine amutou.

<sup>6</sup> Amiteu ma asu oto usinani na gualena aisa buo maino ne amutou ue ne sou a vanunua ma tavivine sanii.

<sup>7</sup> Ivu, amiteu eili a aposel mine Krai. Maido me mane amiteu kale, amiteu mapigogoi namiteu vei le amutou ne mu buloi e amiteu. Moni na ilala amiteu ino pilu e amutou, amiteu lilo vale moni tomene a tavine ei iteale natatuna.

<sup>8</sup> Amiteu kale mamai sele amutou, maido me amiteu kale namiteu bilii e amutou a malongolongona kubaana mine Salemo. Me amiteu masusulu tamai a biliina maulina mine amiteu mina buloine amutou, vuna amutou palea tamtamaine amiteu ivu.

<sup>9</sup> Tamtamaine amiteu, amutou muadasi a pipigotivulana amiteu goli na ilala amiteu ino pilu e amutou me malongo a malongolongona kubaana. Amiteu pipigo sagali

sele na oaso me na lodo pilu a limane amiteu oto, ne amiteu ma bilii ete amutou a mavaana mina itealene amiteu a gona inani ue a golu maido.

<sup>10</sup> Amutou muada, me Salemo tamai ei muada a inigogona amiteu goli usino ne amutou a vanunua ma tavivine mu silimuli e Krai. Amiteu goli a inigogona maolo ma inigogona bilesi ei doana na matane Salemo, me amiteu ma goli ete a inigogona pagu.

<sup>11</sup> Amutou muada, amiteu goli a inigogona tasa moni usino ne amutou tomane tamana ei goli usino ne natatune ei oto.

<sup>12</sup> Maido me, amiteu ade a inade mina masagalina lilone amutou me mina tolilimene amutou. Me amiteu ademuada ane amutou namutou asu na inigogona ei bilesi na matane Salemo oto, ei toleale amutou ulilo na niitealalena ma malasana buo minei.

*Sou a kristen sou magili sagali a tabulena mavaana*

<sup>13</sup> Taliulu amiteu toledadangi e Salemo, vuna ilala amutou guale a inade mine Salemo mainani ne amiteu, amutou ma guale ete tomane a inade mina bibi. Boa. Amutou guale tomane a inade patotona mine Salemo. Ma inade li ei pipigo sagali na lilone amutou a vanunua ma tavivine amutou silimuli e Krai.

<sup>14</sup> Tamtamaigu, amutou palea tasa moni tomane a viepiluna kinaka mine Salemo ino ne Iudia, ede sou a vanunua ma tavivine sou valitole e Krai Iesu. Amutou guale a mavaana buo na limane sou a abuna mine amutou oto, ei tomane moni a viepiluna kinaka mine Salemo ino ne Iudia sou guale a mavaana na limane sou e Iuda.

<sup>15</sup> Sou Iuda sou valiputesi e Bibi Taula Iesu me sou a profet tamai, me sou peltaselele e amiteu. Sou saukikiki a inigogona Salemo ei kale, me sou butuale a vanunua vuso.

<sup>16</sup> Sou magilisobesobe a vea mine amiteu, ne amiteu ma mapigogoi ete namiteu malongo ane sou a vanunua ma tavivine na abuna sea, vuna sou ma kale ete Salemo ei ni gualeliu a vanunua ma tavivine sou odo. Maido me taliulu sou gologoli a sinusu mine sou ni palea buo mamau lou i mapigogoi a sinoana mine Salemo i paleasi ne sou.

*Pol ei kale mamai ni ite lei e sou Tesalonaika*

<sup>17</sup> Tamtamaigu, amiteu ilisitase amutou na ilala boto moni, me amiteu ma ite ete a lagune amutou. Moni amiteu somiale a lilone amiteu ei ino pilu e amutou, me amiteu tove mapapaina sele na niitene amutou lou.

<sup>18</sup> Amiteu kale namiteu asu usino ne amutou, me eau e Pol, eau tove mapapaina a inasuna usino, moni e Satan ei magilisobe amiteu.

<sup>19</sup> Ilala Bibi Taula mine eitou Iesu ei veteliu, sei golu ni toe e amiteu namiteu magili sagali me namiteu mongemonge na matane ei? Sei golu namiteu maasi ni maite maido amiteu goli kube a pipigona mine amiteu? Amutou moni.

<sup>20</sup> E, aisa buo ma munongena mine amiteu ei e amutou moni.

### 3

*Pol ei peltase Timoti usino ni masagalina sou e Tesalonaika*

<sup>1</sup> De amiteu somiale maido amiteu ma mapigogoi ete namiteu magitali a sava lou. Maido me amiteu maiadepilu ve ne amilu moni ugu ne Athens,

<sup>2</sup> me amilu peltase Timoti ni asuale amutou. Timoti ei e tamaine eitou me ei a bibi na pipigona mine Salemo mina malongona a malongolongona kubaana mine Krai. Amilu peltase ei usino ni masagali e amutou me ni buloi e amutou na silimulina mine amutou,

<sup>3</sup> dae a mavaana ma davutina amutou tabule iede ni toe maisabe sanii mine amutou. Amutou oto amutou muada, Salemo ei vilealesi e eitou neitou tabule a matana mavaana sou ie.

<sup>4</sup> Ilala amiteu saboa ino pilu e amutou, amiteu vei le amutou maido, matamatana mavaana ni palea le eitou. Io ilala pagu iede ei paleasi tomane amutou muadasi i.

<sup>5</sup> Na vuna moni ieli eau ma mapigogoi ete magitali lei a sava, maido me eau peltase Timoti usino ne amutou, ne eau na muada a silimulina mine amutou. Eau damutale, dae a bibi na tinovo ei ni toegolali e amutou, ma pipigona mine amiteu ei ni buale sabubu.

*Timoti ei maasi a inade doana me Pol ei mongemonge*

<sup>6</sup> Io Timoti ei veteliuale amilu simonimoni ie. Me ei malongo ane amilu a inade doana sele. Ei vei maido, amutou silimuli sagali me amutou kale sele sou usino. Ei vei, taliulu amutou damutaletale amiteu me mu lilokuba sele ane amiteu. Me amutou lilomuli e amiteu me amutou kale namutou ite amiteu, tomane amiteu tamai amiteu lilomuli e amutou me amiteu kale namiteu ite amutou.

<sup>7</sup> Tamtamaigu, amiteu longe maido amutou silimuli sagali sele, me iede ei toesagali a lilone amiteu na mavaana ma davutina vuso amiteu tabulebule.



<sup>8</sup> Amiteu muada i maido amutou magili sagali lilo ne Bibi Taula, maido me seidei maulina mine amiteu ei palea kubaana sele.

<sup>9</sup> Amiteu damutaletale amutou me amiteu mongemonge sele na matane Salemo mine eitou, me amiteu somiale maido a toledadangina mine amiteu usino ne Salemo ei ma mapigogoi sele ete a munonge ei bilii e amiteu ie.

<sup>10</sup> Na oaso me na lodo amiteu kake sagali sele Salemo ni longo ane amiteu namiteu ite amutou lou me buloi a silimulina mine amutou i boto sapa ni palea buo lou.

*Kinaka mine Pol usino ne sou e Tesalonaika*

<sup>11</sup> Amiteu kake Salemo Tamane eitou pilu e Iesu Bibi Taula mine eitou, ne sulu maite amiteu a vea usino ne amutou.

<sup>12</sup> Amiteu kake Bibi Taula ei ni toe a inigogona mina kinale ne amutou ni vonu sele, me amutou tastasa namutou bilii a lilone amutou usino ne sou a vanunua ma tavivine mine Salemo me usino ne sou a vanunua ma tavivine vuso tomane amiteu bilii a lilone amiteu usino ne amutou.

<sup>13</sup> Me na inigogona ieli Salemo ni toesagali a lilone amutou, me na ilala Bibi Taula mine eitou Iesu ei veteliu pilu a vanunua ma tavivine vuso minei, io ne amutou maolo, me ne amutou ma isa oto a mamauna na matane Salemo Tamane eitou. Moliana.

## 4

*Neitou ma gologoli lei a inigogona sualolona*

<sup>1</sup> Tamtamaigu, eau mapuli a inade maido, amiteu maitesi e amutou a inigogona vuso ne amutou ogomuli a masagana mine Salemo. Seidei amiteu kale lei ne amiteu masagali kube sele a lilone amutou na aisane Bibi Taula Iesu, ne amutou goli a inigogona sou iedo ni buo lou.

<sup>2</sup> Amutou muada a matetengina vuso ieli amiteu bilii e amutou na aisane Bibi Taula Iesu.

<sup>3</sup> Masagana mine Salemo ei maido, ne amutou palea maolo. Me namutou taulele a matana inigogona sualolona vuso.

<sup>4</sup> Tastasa mine amutou ni muada maido, namutou iteale kube e susane amutou na lilo maolona ma tinada.

<sup>5</sup> Me namutou ma ogomulimuli lei a masagana pagu mina sualolona tomane sou a vanunua masala sou ma muada oto e Salemo.

<sup>6</sup> Amutou ma gologoli lei a matana sualolona maido usino ne sou a kristen, tamtaine eitou. Lisa amiteu ade sagaliosi

ane amutou maido, Bibi Taula ni malaitabe sou a vanunua sou goli a inigogona maido.

<sup>7</sup> Salemo ei ma toleale ete eitou neitou ogomuli a inigogona mumugu. Boa vuso sele. Ei toleale eitou neitou ogomuli a inigogona i maolo.

<sup>8</sup> Maido ma bibi ei saukiki a inade ieli, ei ma saukiki ete a inade mine sou a vanunua moni. Boa. Ei saukiki a inade mine Salemo, ei e Salemo i biliilli a Maolona Nunu minei usino ne amutou.

*Neitou masagali a inigogona doana ni palea sagali*

<sup>9</sup> Eau na ma niage ete a inade sanii usino ne amutou a inigogona mina bilina lilone amutou usino na vanunua ma tavivine mine Salemo, vuna Salemo ei matetengiosi e amutou a inigogona iedo.

<sup>10</sup> Me amutou biliilli a lilone amutou usino ne sou a kristen ino na avena vuso ne Masedonia. Moni, tamtamaigu, amiteu kale namiteu masagali a lilone amutou, me namutou goli a inigogona ieli ni buo lou.

<sup>11</sup> Tomane lisa amiteu vei le amutou, namutou ugu vale moni me mu goli a pipigona mine amutou oto moni. Namutou pipigo na limane amutou oto me amutou mapigogoi namutou iteale amutou oto.

<sup>12</sup> Maido me namutou ma boto oto a golu tasa, me sou a vanunua ino masala na viepiluna kinaka, ne sou tade amutou.

*Bibi Taula ni veteliu mei ni viepili e eitou*

<sup>13</sup> Tamtamaigu, amiteu kale namutou muada kuba sei golu ni palea le sou a vanunua ma tavivine sou matesi, dae ne amutou lilibuu mamau, tomane a vanunua ma tavivine sanii sou ma silimuli ete Salemo, me sou ma magitali ete a ilisiliuna minate.

<sup>14</sup> Eitou silimuli maido Iesu ei mate me ei ilisiliu lou, maido me eitou muada maido, Salemo ei ni maasi e sou a kristen sou matesi lilo ne Iesu usinani pilu e ei.

<sup>15</sup> Amiteu ademuada a inade mine Bibi Taula usino ne amutou maido, ilala Bibi Taula ei veteliu, eitou a vanunua ma tavivine eitou isa a maulina me eitou saboa eili, eitou ma mapigogoi ete neitou muga pala ane sou a vanunua ma tavivine sou matesi. Boa.

<sup>16</sup> Salemo ei ni ade sagali, ma munugana bineanea ei ni tola, ma tuai mine Salemo ni tatangi. Me Bibi Taula ni ilisitase a langi me ei ni sivo utano. Me sou a vanunua sou silimuli e Iesu me sou matesi, ne sou ilisiliu pala.

<sup>17</sup> Na ilala iedo eitou a vanunua ma tavivine eitou mauli me eitou saboa eili, neitou ilisi uata na ausa pilu e sou a vanunua ma tavivine do, me neitou pou e Bibi

Taula na langi me ugu pilu e Bibi Taula taliuliu taliuliu.

<sup>18</sup>Io amutou a vanunua ma tavivine mine Salemo namutou toesagali e amutou tastasa a inade ie.

## 5

*Neitou masusulu ane eitou na ilala Bibi Taula ei ni asu usinani*

<sup>1</sup>Tamtamaigu, amiteu ma niage ete a inade usino ne amutou ne sei malada me ne sei matailala a golugolu sou odo ni palea.

<sup>2</sup>Amutou oto amutou muadasi i, malada mine Bibi Taula ei ni palea moni tomane a bibi mina paaalina ei sibitala na lodo.

<sup>3</sup>Ilala sou a vanunua ma tavivine ne sou vei maido, "Seidei ei a ilala doana sele, eitou puiale moni," moni a golu mina toegegeline sou ei ni palea asi le sou, tomane a davutina ei palea le a tavine ei kale ni maalepose a bibaini. Me sou ma mapigogoi ete ne sou taotase a golu iedo.

<sup>4</sup>Moni e amutou tamtamaigu, amutou ma ino oto na tunuui, maido me namutou ma saga oto a niitena malada ni palea, tomane a bibi ei saga gegelu a niitena bibi mina paaalina ei asu maino. Boa.

<sup>5</sup>Amutou vuso amutou a natatuna muada ma natatuna malada. Eitou ma abuna oto mina lodo ma tunuui.

<sup>6</sup>Maido me neitou ma ngolo lou tomane a vanua sanii. Kubaana neitou pee moni a matane eitou muina.

<sup>7</sup>Eitou muada, sou a vanunua na ngunolona sou ngolongolo na lodo, me sou a vanunua na matalililina sou ininu na lodo.

<sup>8</sup>Moni eitou a vanunua mina malada, maido me damutatalana mine eitou ni muada. Neitou labetole a kinainai a bras mina silimulina ma kinale, me neitou kai a letepolo na maubina mina magitaline Salemo ni gualeliu e eitou.

<sup>9</sup>Salemo ei ma vileale ete eitou mina gualena sinoana mine ei. Boa. Ei vileale eitou ne Iesu Krai, Bibi Taula mine eitou, ni gualeliu e eitou.

<sup>10</sup>Iesu ei mate ane eitou, maido me mane eitou eili mauili, ue mane eitou mate, neitou mauili pilu e ei.

<sup>11</sup>Maido me amutou tastasa namutou suuli e sou a vanunua ma tavivine sanii mine Salemo me masagali a lilone sou, tomane seidei amutou goligoli.

*Punuluna ademuadana ma ade munongena*

<sup>12</sup>Tamtamaigu, amiteu kale namiteu vei le amutou maido, namutou tade moni a vanunua sou pipigo sagali a buloine amutou. Bibi taula ei tau e sou a munuganuga mine

amutou, sou biliilii e amutou a inade mina toebilelesina inigogona mine amutou.

<sup>13</sup>Namutou damutaletale a pipigona sou goligoli iedo, me namutou tade sele sou me mu kale sele sou. Amutou vuso, lilone amutou ni mea moni.

<sup>14</sup>Tamtamaigu, amiteu kale namiteu mailisilii e amutou namutou toebilelesi a inigogona mine sou a vanunua sou bale maisaba me namutou masagali a lilona vanunua vuso sou laelae, me namutou buloi a vanunua sou ma sagali oto. Me namutou lilomea moni ana vanunua vuso.

<sup>15</sup>Mane sou goli a inigogona pagu usino ne amutou, io namutou ma adoliuliu lou. Ilala taliuliu namutou sagali a gunolina inigogona doana usino ne sou a vanunua ma tavivine mine Salemo me ne sou a vanunua ma tavivine vuso.

<sup>16</sup>Taliuliu namutou mongemonge,

<sup>17</sup>me kaka taliuliu.

<sup>18</sup>Me namutou toledadangi e Salemo ne sei golu ei palea le amutou. Vuna ieli a masagana mine Salemo lilo ne Krai Iesu usino ne amutou.

<sup>19</sup>Namutou ma valimatamate lei a oavi mina Maolona Nunu,

<sup>20</sup>me namutou ma longetasetase lei a inade mine sou a profet.

<sup>21</sup>Moni namutou vivileale kube a inade vuso ma inigogona. Me namutou lapitole obi a inigogona doadoana vuso,

<sup>22</sup>me mu asuleletase a matamatana inigogona pagu vuso.

<sup>23</sup>Salemo ei a vuna lilomeana, ei ni toe e amutou palea maolo vuso. Mei ni iteale kube a nunune amutou ma lilone amutou ma vovone amutou ne sou ma isa oto a mavaana na ilala Bibi Taula mine eitou Iesu Krai ni veteliu.

<sup>24</sup>Me Salemo ei toleale amutou, ei ni goli a golugolu ieli ni palea ne amutou, vuna ei ogomuli ivu a inadnade vuso ei vei.

<sup>25</sup>Tamtamaigu, namutou kake Salemo ni buloi e amiteu.

<sup>26</sup>Na inigogona mine eitou a vanunua ma tavivine mine Salemo, amutou tastasa namutou vate oaso kubaana usino ne sou sanii.

<sup>27</sup>Eau ade sagali ane amutou na aisane Bibi Taula, namutou gi muade a laulau ieli usino ne sou vuso a vanunua ma tavivine mine Salemo.

<sup>28</sup>Dinodo mine Bibi Taula mine eitou Iesu Krai ei ni pilu e amutou.

## 2 Tesalonaika Maluana Laulau Pol ei niage usino ne sou e Tesalonaika

### *Pol ei vei oaso doana*

<sup>1</sup> Amiteu taotolu, Pol, Sailas me Timoti, amiteu niage a laulau ieli usino ne amutou a viepiluna kinaka ino ne Tesalonaika, amutou mu valitole Salemo, Tamane eitou pilu e Bibi Taula Iesu Krai.

<sup>2</sup> Salemo, Tamane eitou, pilu e Bibi Taula Iesu Krai, ne sulu dode amutou me ne su toemea a lilone amutou.

*Sou e Tesalonaika sou magili sagali na ilala mina mavaana*

<sup>3</sup> Amutou tamtamaigu, ilala taliuliu amiteu damutaletale amutou, amiteu toledadangi e Salemo. Ei kubaana sele ne amiteu goli simaido, vuna silimulina mine amutou ei palea sagali lou, me amutou vuso tastasa amutou bililili a lilone amutou usino ne sou seasea, ma inigogona ieli ei palea buo mamau lou.

<sup>4</sup> Na vuna moni ieli, ilala amiteu asu maisaba ne sou a viepiluna kinaka vuso mine Salemo, amiteu beilangelange a aisane amutou. Amiteu adeade ane sou a inigogona pagu vuso sou a butu sou goli le amutou, me a mavaana vuso i palea le amutou. Me amiteu veivei maido, “Sou Tesalonaika sou magili sagali me sou lapitole obi a silimulina mine sou, me sou tabule a mavaana ma davutina vuso do.”

*Salemo ei vivilemuliale eitou mina inigogona i bilesi*

<sup>5</sup> Na golugolu ei palea ne amutou odo, Salemo ei maite e eitou maido, ei vivilemuliale a inigogona mine eitou na inigogona bilesi moni. Amutou tabule a mavaana, vuna Salemo ei kale ni toe amutou namutou mapigogoi sele namutou malu lilo na itealalena minei. Patotona amutou tabulebule a mavaana ne amutou mailisi a itealalena mine Salemo.

<sup>6</sup> Salemo ei goli a inigogona bilesi moni. Ei ni maluu a mavaana usino ne sou a vanunua sou bilii e amutou a mavaana.

<sup>7</sup> Me ei ni mapuli a mavaana seidei amutou tabule ieli, me ei ni bilii a manoana usino ne amutou me amiteu tamai. Salemo ei ni goli maido na malada Bibi Taula Iesu pilu e sou a bineanea sagali minei sou ilisitase a langi me sou asu usinani pilu a niluluna oavi,

<sup>8</sup> me ei toegegeli sele sou a vanunua sou ma kale ete ne sou muada e Salemo me sou ma ogomuli ete a malongolongona kubaana mine Iesu, Bibi Taula mine eitou.

<sup>9</sup> Sou a vanunua do ne sou guale a mapa pagu simaido. Ne sou ugu bulagetase Bibi Taula ma sagalina muada buo minei, me ne sou mamau taliuliu taliuliu.

<sup>10</sup> Na malada Salemo ei vileale Iesu ni asu usinani, sou a vanunua ma tavivine mine Salemo sou silimuli e ei ne sou vuso beilange a aisane ei me ne sou masalailai ei. Me amutou tamai namutou masalai ei pilu e sou, vuna amutou silimuli sele a inade mine Salemo amiteu ademuada i balivua ne amutou.

*Pol kake Salemo ni masagali e sou Tesalonaika*

<sup>11</sup> Maido me taliuliu amiteu kake Salemo mine eitou ni toe amutou namutou goli a inigogona doana vuso Salemo ei toleale amutou namutou goli. Me amiteu kakake ei ni bilii e amutou a sagagalina, maido me namutou goli a inigogona vuso ei doana, ma silimulina mine amutou ni mailisi e amutou a gunolina.

<sup>12</sup> Me na inigogona ieli ne amutou beilange a aisane Bibi Taula mine eitou Iesu, me ei ni beilange a aisane amutou tamai. Salemo mine eitou me Bibi Taula Iesu Krai ne su dode amutou me amutou mapigogoi namutou goli a golugolu sou odo.

## 2

*Bibi na saukikina binea ei ni divi*

<sup>1</sup> Tamtamaigu, amiteu kale namutou longe kube a inade mine amiteu maido, Bibi Taula mine eitou Iesu Krai ei ni vetielu lou usinani, me neitou viepili pilu e ei.

<sup>2</sup> Nane a vanunua sanii sou vei le amutou maido, a Malada mine Bibi Taula ei paleasi. Sou veivei maido, a Maolona Nunu i bilii a matana inade na malongolongona usino ne sou, ue a bibi tasa ei ademuada a inade mine Salemo i goli a inade ieli, ue sou sanii vei ve amiteu niage a matana laulau ie, ei isa a inade maido usino ne sou. Moni namutou ma saga asiasi lou me mu ma damtatale papaipai lou a inade iede.

<sup>3</sup> Amutou ma itetasetase lei a bibi tasa ni auala ane amutou a matamatana inade minei. Longe. Malada do ei ma mapigogoi ete ni palea sabubu. Boa. Palapala vanunua papaina ne sou lametase Salemo, me a bibi mina saukikina binea ni palea muada, e a bibi ei ni mamau na aubu na davutina.

<sup>4</sup> Ei ni butuale a golugolu vuso a vanunua sou totopatuliale sou me sou vei ve ei e salemo mine sou. Me ei ni masalailai e ei me ei beilange a aisane ei oto me ei ni soetole a golugolu vuso odo. Mei ni ugu na luma mine Salemo, me ei ni ademuada maido, “Eau oto eau e Salemo.”

<sup>5</sup> Ilala eau ino pilu e amutou, eau veiosi le amutou a golu iedo. Nane amutou danivusesi, io?

<sup>6</sup> Me amutou muada seidei a golu tasa ei tabesobe a vea mina bibi iedo, mine ei ni ma palea asi oto na avena muada. Ei ni palea muada na ilala Salemo ei vileale ei ni divi.

<sup>7</sup> Amutou muada, seidei a inigogona mina saukikina binea ei pipigo ovu. A golu tasa ei ni tausobe a vea mine ei iedo mapigogoi na ilala Salemo ei salasuu e ei usino.

<sup>8</sup> Me na ilala do a bibi na saukikina binea ei ni palea na avena muada, me Bibi Taula Iesu ni asu usinani pilu a muada buo minei, ei ni valipute ei a avivili na asene ei oto me ei toegegeli sele ei.

<sup>9</sup> Bibi mina saukikina binea iedo ei ni palea muada sele na sagagalina mine Satan moni. Mei ni goli a matamatana sagagalina ma matamatana matailalana aualana ma gona sinaga.

<sup>10</sup> Me na aualana vuso na inigogona pagu ei ni auala ana vanunua ma tavivine do sou ogomuli a vea mina mamauna, vuna ilala Salemo i bilii e sou a inade ei patotona ni gualeliu e sou, moni sou ma kale sape ete a inade do.

<sup>11</sup> Maido me Salemo ei toemaisabe sele a damutatalana mine sou, ne sou silimuli a inade i auala.

<sup>12</sup> Maido ma vanunua vuso sou ma silimuli ete a inade patotona, me sou monge-monge moni a gunolina inigogona i pagu, ne sou guale a mapa pagu na vavasana mine Salemo.

*Salemo ei vilealesi e amutou ni gualeliu e amutou*

<sup>13</sup> Tamtamaigu, Bibi Taula ei kale sele amutou. Taliuliu namiteu damutale amutou me namiteu toledadangi e Salemo e amutou. Vuna, amutou a munugana sele Salemo ei vileale amutou ne amutou ugu balivua na abuna vanunua ma tavivine ei kale ni gualeliu. Maolona Nunu ei vileale amutou tomane a vanunua ma tavivine kubaana mine Salemo oto, me amutou silimuli a inade ei patotona, me na inigogona ieli Salemo ei gualeliu e amutou.

<sup>14</sup> Ei kale ne amutou ugu na malasana buo mine Bibi Taula mine eitou Iesu Krai, maido me ei tolealesi e amutou a malongolongona kubaana amiteu ademuadada i.

<sup>15</sup> Maido me amutou tamtamaigu, namutou magili sagali. Ma inade vuso mine Salemo amiteu ademuada i ane amutou ue amiteu niage a laulau mina matetengine amutou, ede namutou ogomuli.

<sup>16</sup> Bibi Taula mine eitou Iesu Krai pilu e Salemo Tamane eitou, sulu kale sele eitou me sulu dode eitou me toemea a lilone eitou

taliuliu. Me sulu buloi eitou neitou magitali e Salemo ni toekube sele eitou.

<sup>17</sup> Me amiteu kake sulu ne sulu masagali a lilone amutou, me ne sulu buloi e amutou mu ogomuli iiti a inigogona vuso ma gunolina inade i doana.

### 3

*Namutou kake Salemo ni buloi e amiteu*

<sup>1</sup> Tamtamaigu, amiteu isa a inade tasa lou i maido. Namutou kake Salemo ni buloi e amiteu maido, a inade mine Bibi Taula ei ni vele bubula asi na aveavena vuso, ma inade ieli ni guale a aisa buo tomane ei guale balivua ne amutou.

<sup>2</sup> Ne amutou kake Salemo ni gualeliu e amiteu na limane sou a vanua pagupagu, iede sou a vanua sou goli a inigogona mau. Amutou muada, vanunua makuba sou ma silimuli ete Krai.

<sup>3</sup> Moni e Bibi Taula ei patotonana, ei ni toesagali e amutou me ei ni iteale amutou, maido me Satan ei ma mapigogoi ete ni toegegeli e amutou.

<sup>4</sup> Me Bibi Taula ei toemuade iiti e amiteu maido, amutou ogomulimuli a inigogona vuso amiteu vei ane amutou. Me mulimuli tamai ne amutou ogomuli moni simaido.

<sup>5</sup> Amiteu kake Bibi Taula ni muge a damutatalana mine amutou, me ne amutou muada ivu a kinalena mine Salemo ma magili sagalina mine Krai.

*Vanunua vuso ne sou goli a pipigona*

<sup>6</sup> Tamtamaigu, na aisane Iesu Krai, Bibi Taula mine eitou, amiteu ade sagali ane amutou maido, mane tamaine eitou kristen sanii sou ugu sabubu moni me sou ma ogomuli ete a inade amiteu bilii e sou odo, io namutou ugu bulagetase sou.

<sup>7</sup> Amutou muada i maido, namutou ogomuli a inigogona mine amiteu. Ilala amiteu ino pilu e amutou, amiteu ma ugu sabubu oto.

<sup>8</sup> Amiteu ma guale sabubi ete a gona inani sanii maino na limane amutou. Boa. Amiteu oli moni. Amiteu pipigo sagali sele na oaso me na lodo, ne amiteu ma tau ete a mavaana usino ne amutou.

<sup>9</sup> Ei ma tomane ete amiteu ma mapigogoi ete namiteu guale a gona inani ue a golu mine amutou. Boa. Amiteu mapigogoi sele namiteu guale, moni amiteu ma guale ete, vuna amiteu kale namiteu maite e amutou a inigogona doana amutou oto ne mu ogomuli.

<sup>10</sup> Amutou muada, ilala amiteu saboa eili pilu e amutou, amiteu matetengi e amutou maido, "Mane a bibi ei ma kale ete ni goli a pipigona, io ei ni ma guale ete a gona inani."

<sup>11</sup> Moni seidei amiteu longe a inade ve sanii ne amutou sou ugu sabubu moni. Sou

ma goli ete a pipigona tasa. Sou ade sabubu moni a golugolu vuso mine sou a vanunua sanii, iede a golu mine sou boa.

<sup>12</sup> Io na aisane Bibi Taula Iesu Krai amiteu ade sagali usino ne sou a vanua do maido, ne sou ugu vale me ne sou goli a pipigona, ne sou iteale sou oto a gona inani ue sei golu.

<sup>13</sup> Tamtamaigu, amutou ma balebale lou a gunolina inigogona i doana.

<sup>14</sup> Mane a bibi tasa ei ma ogomuli ete a inade vuso amiteu niage na laulau ieli, io ne amutou iteilale kube a bibi iedo me namutou ugu bulagetase ei, ne ei ni maela a inigogona ei goli.

<sup>15</sup> Moni, amiteu ma vei ete le amutou ne amutou damutale ve ei tomane ei a butu mine amutou. Boa. Namutou damutale ei e tamaine amutou, me namutou toebilelesi ei.

*Pol ei vei oaso doana ane sou*

<sup>16</sup> Bibi Taula, ei a vuna inigogona lilomeana, taliuliu ei ni toemea a lilone amutou a golugolu vuso. Bibi Taula ei ni pilu e amutou vuso.

<sup>17</sup> Eau e Pol, na limagu oto, eau niage a inade oaso kubaana li usino ne amutou. Eau niagage a matana inade ieli na laulau vuso eau niage. Ei tomane a matailala mina laulau vuso minau.

<sup>18</sup> Dinodo mine Bibi Taula mine eitou Iesu Krai ei ni pilu e amutou vuso.

## 1 Timoti Munugana Laulau Pol ei niage usino ne Timoti

### *Pol ei vei oaso doana*

<sup>1</sup> Eau e Pol, eau a aposel mine Krai Iesu. Salemo ei gualielu e eitou me Krai Iesu eitou magitali, sulu olu su ade sagali ane eau na palea a aposel.

<sup>2</sup> Timoti, oo natugu ivu lilo na silimulina mine Krai, eau niage a laulau ieli usino minio.

Salemo Tamane eitou pilu e Krai Iesu Bibi Taula mine eitou, ne sulu dode me lilo-muli e oo, me ne sulu bilii e oo a lilomeana.

### *Neitou litase a inade na aualana vuso*

<sup>3</sup> Na malada eau asu usino ne Masedonia, eau veiosi le oo no muimu ne Epesus, me oo no ade sagali ana vanunua sanii, ne sou ma adeade lou a matamatana aualana inade sea,

<sup>4</sup> me ne sou litase a mapamulina vineinei ma inadnade mina aisaisa ne tubutubune sou. A matana inade maido ei ma mapigogoi ete ni buloi a pipigona mine Salemo lilo na silimulina, ei mailisi a adesinoana moni.

<sup>5</sup> Salemo ei vei le eitou neitou toe simaido, vuna ei kale neitou goli a inigogona kinale maino na maolona buu ma lilo alaba ma silimulina ivu.

<sup>6</sup> Moni vanunua sanii sou litasesi a inigogona do, me seidei sou mapamuli sabubu moni.

<sup>7</sup> Sou kale ne sou palea a vanua na matetengina mina binea mine Salemo. Moni sou oto sou ma muada oto a masovana inade sou ademuada i, me sou ma muada kuba oto a inadnade mine sou oto.

<sup>8</sup> Eitou muada, mane eitou mapuitase a binea ni goli a pipigona li e Salemo ei vilealesi minei, io binea ei a golu doana.

<sup>9</sup> Binea ei mina toebilelesine sou a vanunua ma tavivine sou ogomuli a inigogona doana, boa. Moni ei mine sou a vanunua ma tavivine sou pope a binea me sou ogomuli a inigogona mina toevautautana. Ei mine sou a vanunua ma tavivine sou lametase e Salemo me sou goli a inigogona mina sinusu. Ei mine sou a vanunua ma tavivine sou ma kale ete a inigogona maolo mine Salemo me sou ogomuli a inigogona vuso mina magamaga. Binea ei mina vavasana ane sou a vanunua sou valipute tamane sou ue tinane sou, me mine sou a vanunua sou valipute sou sanii.

<sup>10</sup> Me ei mina vavasana ane sou a vanunua ma tavivine sou sualolo, me sou ngolongolo pilu e sou a vanua oto, me ei mina

vavasana ane sou a vanua sou paaaliali a vanua me sou goli e sou ne sou pipigo sabubu, me sou a vanua na nioto, me sou a vanua sou aualala na ilala sou vei ivu uata, me sou a vanunua ma tavivine sou goli a matamatana inigogona pagupagu ei butuale a inade patotona.

<sup>11</sup> A inade moliana li ei ogomuli moni a malongolongona kubaana Salemo ei bilii e eau na ademuada i. A malongolongona kubaana ieli ei isa a malasana buo mine Salemo oto, Salemo ei a vuna golugolu vuso i doana.

### *Pol ei toledadangi e Salemo*

<sup>12</sup> Eau toledadangi sele Bibi Taula mine eitou Krai Iesu ei bilii e eau a sagalina, me ei damutale ve eau mapigogoi na lapitole a pipigona minei, me ei bilii e eau a pipigona ie.

<sup>13</sup> Ivu, lisa eau salaitavole a aisane ei, mea butuale ei me eau a bibi na toegegelina. Moni ei muada ilala eau goli a inigogona sou ie, eau ma muada kuba oto e ei, me eau ma silimuli ete ei. Maido me ei lilomuli e eau.

<sup>14</sup> Me Krai Iesu, Bibi Taula mine eitou, ei dode sele eau, me ei mailisi eau na silimuli e ei ne eau na bilii a lilogu usino ne sou sanii.

<sup>15</sup> Krai Iesu ei sivo utano na magamaga mina gualieliune eitou a vanunua ma tavivine mina gunolina sinusu. Inade ieli ei patotona sele mei mapigogoi ne sou a vanunua sou longe me sou silimuli. Lisa eau a munugana bibi na gunolina sinusu.

<sup>16</sup> Moni e Iesu Krai ei lilomuli pale eau, vuna ei kale a vanunua ma tavivine vuso ne sou ite a golu ei goli le eau me ne sou muada iiti i maido ei ma adove asiiasi ete ane sou a vanunua sou goli a sinusu, me tamai ne sou silimuli ei, me ne sou guale a maulina i kubaana taliuliu taliuliu.

<sup>17</sup> Ei a Mapana mina maladalada vuso. Ei ma matemate oto, me eitou ma mapigogoi ete neitou ite ei. Ei vululu moni ei e Salemo ivu. Maido me eitou vuso neitou taliuliu taliuliu bilii e ei a aisa buo me ei ni muina a munugana ivu. Moliana.

### *Timoti ei ni maubi sagali mina taupuina inigogona pagu*

<sup>18</sup> Natugu e Timoti, eau ade sagali ane oo maido oo no ogomuli a inade na sinaa iedo lisa sou goli le oo, me na inade ielo oo no maubi sagali mina taupuina inigogona pagupagu.

<sup>19</sup> Mina maubina do oo no silimuli sele e Iesu me oo no muada i maido oo ma isa oto a mavaana na matane Salemo. Vanunua sanii sou pitase a damutatalana doana iedo, me mulimuli a silimulina mine sou i mau se sele tomane a kuta ei mapola na saalu.

<sup>20</sup> Bibi lua, Himeneus me Aleksander sulu goli maido, me eau litase e sulu usino na limane Satan, ve ne sulu muada iiti me ne sulu ma adegegeli ete lei e Salemo.

## 2

*Neitou kake Salemo ni buloi e sou a vanunua ma tavivine*

<sup>1</sup> Io a munugana golu oo no goli, ei maido. Me oo no kake Salemo ane sou a vanunua ma tavivine vuso me oo no goli a kinaka vuso, mo toledadangi e ei me oo no kake ei ni buloi e sou a vanunua ma tavivine.

<sup>2</sup> Me oo no kaka tamai ane sou a mapapana me sou a vanunua na niitealena avena. Maido me eitou vuso neitou ugu kuba me a lilone eitou ni mea, me neitou ogomuli iiti a inigogona vuso Salemo ei kale.

<sup>3</sup> Matana kinaka maido ei doana na matane Salemo, ei e Salemo mina gualeli-une eitou, me ieli ei toemongemonge e Salemo.

<sup>4</sup> Salemo ei kale ni gualeliu e sou a vanunua ma tavivine vuso, ve ne sou muada a masovana inade i patotona.

<sup>5</sup> Eitou muada, Salemo tasa moni ei eili. Me a bibi tasa moni ei magili balivua ne Salemo me sou a vanunua ma tavivine, bibi iedo ei e Krai Iesu.

<sup>6</sup> Na ilala Salemo ei vileale, Krai ei iabitase a maulina minei oto mina gualeli-una vanunua ma tavivine vuso, me na inigogona ieli Salemo ei maite e eitou maido ei kale ni gualeliu e sou a vanunua ma tavivine.

<sup>7</sup> Maido me Salemo ei vileale eau na palea a aposel me a bibi na pipigona mina veipalena inade minei iedo. Eau ade patotona, eau ma auala oto. Ei bilii e eau a pipigona mina matetengine sou a vanunua ma tavivine mine sou a abuna sea, ne sou silimuli e Krai me ne sou muada a inade i moliana.

<sup>8</sup> Maido me eau kale a vanunua mina aububuna vuso ne sou beilange a limane sou me ne sou kaka. Eau kale ne sou danivusetase a inigogona paselepusina ma maisinoana.

*Malolomena ivu mine sou a tavivine*

<sup>9</sup> Inade tasa lou ei maido. Eau kale sou a tavivine ne sou kai a kinainai doana ue golu i mapigogoi moni e sou. Ne sou ma toetavinevine lei e sou, me ne sou ma malolomelome lei a aivune sou ma vovone sou a golugolu tomane a matamatana gapu me a golu i malasolosolo ma kinainai a mapana ei oata oto sele.

<sup>10</sup> Tavivine sou kale ne sou ogomuli a inade mine Salemo, sou ne sou goli a matamatana pipigona i doana. Iedo ei a malolomena ivu mine sou.

<sup>11</sup> Tavivine, ne sou toebisii e sou oto me ne sou vale moni me ne sou guale a inade mine Salemo.

<sup>12</sup> Eau ma longo oto a tavivine ne sou muge a vanunua me ne sou matetengi a inade mine Salemo. Boa. Tavivine, ne sou vale moni me ne sou longe moni a inade.

<sup>13</sup> Longe. Salemo ei mapale Adam pala, me mulimuli ei mapale Iv.

<sup>14</sup> Me Adam ei ma silimuli ete a inade na aualana. Tavine ei silimuli a inade na aualana, me ei goli a sinusu.

<sup>15</sup> Moni mane sou a tavivine sou silimuli e Krai taliulu me sou mauli lilo na maolona me sou ogomuli a inigogona kinale sele usino ne sou sanii, io Salemo ei ni gualeliu e sou lilo na natuana mine sou.

## 3

*Vanunua na niitealena kinaka ne sou ogomuli a inigogona doana*

<sup>1</sup> Inade li ei patotona sele. Ei maido mane a bibi ei kale ni palea a bibi na itealena kinaka, ei kale a pipigona doana.

<sup>2</sup> Maido ma bibi ei palea a bibi na itealena kinaka ei ni ogomuli moni sou a inigogona bilesi me sou a vanunua ne sou ma ite ete a inigogona pagu tasa minei. Ei ni isa e susuna tasa moni. Ei ni iteale iiti a masagana minei mei ni ogomuli iiti a damutatalana doana moni ma inigogona kubaana. Ei ni iteale kube a mosi sou asu usino na luma minei. Ei ni muada iiti a inigogona matetengine sou a vanunua ma tavivine a inigogona e Salemo ei kale.

<sup>3</sup> Ei ni ma ininu lou mei matalilili. Ei ni ma lilovilivilivi asiasi lou me ei ma maububi lou ane sou sanii. Boa. Ei ni tomamali moni e sou. Ei ni ma kale mamaimai lei a gualena vatuu.

<sup>4</sup> Ei ni iteale kube e susuna me natatune ei oto, me ei ni toe e natatuna ne sou longemuli moni a inade mine ei me ne sou ogomuli.

<sup>5</sup> Bibi ei ma mapigogoi ete a itealene susuna me natatune ei oto, ei ma mapigogoi ete ni guale a pipigona mina itealena kinaka mine Salemo.

<sup>6</sup> A kristen alaba tamai ei ma mapigogoi ete ni palea a bibi na itealena kinaka. Dae ei ni damutale ve ei a bibi kubaana sele mei ni toebue ei, me Salemo ei ni vavasa ane ei tomane ei vavasa ane Satan.

<sup>7</sup> Bibi ei isa a aisana doa balivua ne sou a vanunua masala na kinaka, ei moni ei mapigogoi ni magili a bibi na itealena kinaka. Mane ei ma isa oto a aisa kuba, io sou

a vanunua sou mapigogoi ne sou adegegli e ei me ei ni tigo na vuo mine Satan.

*Sou a vanua na pipigona mina kinaka ne sou ogomuli a inigogona doana*

<sup>8</sup> Tomane moni, sou a vanua na pipigona mina kinaka ne sou damutale bilesi a pipigona mine sou. Ne sou ma ade table e i lualua lou. Ne sou ma ininu lou. Ne sou ma damutatala lou a isualena vatu ma golugolu sanii mina vanunua.

<sup>9</sup> Ne sou muada i maido sou ma isa oto a mavaana na matane Salemo, me ne sou lapitole sagali a inade patotona do Salemo ei maitesi eitou a vanunua eitou silimuli e ei.

<sup>10</sup> Palapala namutou tove muge a pipigona mine sou. Mane sou goli a pipigona i doana, io ne sou magili a vanunua na pipigona mina kinaka.

<sup>11</sup> Sususune sou sou tamai ne sou damutale bilesi a inigogona sou goli. Ne sou ma poipoi lou. Niugu ne sou ni doana moni, me ne sou goli bilesi a pipigona vuso sou guale.

<sup>12</sup> Bibi na pipigona mina kinaka ei ni isa e susuna tasa moni mei ni iteale iiti e susuna me natatune ei oto.

<sup>13</sup> Mane sou goli a pipigona doana, ne sou isa a aisa kuba. Me ne sou ma tau oovi ete a silimulina mine sou ne Krai Iesu.

*Masovana inade mina inigogona mine Salemo ei a golu tasa i buo sele*

<sup>14</sup> Eau kale na asu asi usino na ite oo, moni eau niage a inade li usino minio.

<sup>15</sup> Maido me mane eau ma mapigogoi ete na divi asi, oo no ite a inade ieli, mo no muada a inigogona doana eitou a abuna vanunua mine Salemo neitou ogomuli. Eitou a abuna vanunua mine Salemo me eitou a viepiluna mine Salemo i muina taliuliu, ma luma na kinaka li ei tomane a bao i sagali ei tabule a inade ivu.

<sup>16</sup> Eitou muada iiti i maido, inade ovu mina inigogona mine Salemo ei a golu tasa i buo sele. Inade li Salemo ei matetengiosi e eitou, ei maido,

Ei palea a bibi ivu, me sou a vanunua ma tavivine sou ite ei.

Maolona Nunu ei maite i maido, inigogona minei ei bilesi vuso, me sou a bineanea mine Salemo sou ite ei.

Sou a vanunua sou asu me sou veipale a inade minei ane a abuna vanunua vuso.

Vanunua ma tavivine na magamaga sou silimuli ei,

Me Salemo i maasi e ei uata me ei guale a aisa buo sele.

#### 4

*Aualana vanunua mina matetengina*

<sup>1</sup> Maolona Nunu ei ademuada i maido, ilala mulimuli a vanunua sanii ne sou litase a silimulina mine sou, vuna maido ne sou beli a tagilane sou mina nilonge na inade mine sou a nunu na aualana me mine sou a nunu pagu, me ne sou ogomuli a inade ne sou.

<sup>2</sup> Vanunua na aualana ne sou veipale a inade na aualana iedo usino ne sou a vanunua ma tavivine. Damutatalana mine sou a vanunua do ei maisaba sele, me sou ma damutale etesi a sinusu mine sou.

<sup>3</sup> Sou a vanua do ne sou madetase a taulaina, me ne sou madetase a mata-matana gona inani sanii, moni Salemo ei mapale a gona inani do ane eitou a vanunua ma tavivine. Maido me eitou silimuli e ei me eitou muada a adepatotona minei, neitou guale me neitou ani me neitou toledadangi e Salemo.

<sup>4</sup> Eitou muada a golugolu vuso Salemo ei mapale, sou doana moni, me neitou ma ite ete sou tomane a golu pagu. Boa. Neitou toledadangi e Salemo me neitou guale.

<sup>5</sup> Na inade mine Salemo pilu a kinaka mine eitou i toe a golugolu vuso ni palea maolo.

*Timoti ei ni muina a bibi na pipigona kubaana mine Krai*

<sup>6</sup> Mane oo matetengi e tamtamaimu a inade li, io oo no palea a bibi na pipigona doana mine Krai Iesu. Me oo no guale a sagalina buo mina inadene kubaana eitou silimuli i me mina muadana vuso i doana oo guale me oo ogomuli.

<sup>7</sup> Moni oo no lametase a matana inade pagupagu ma mapamulina mamau sou sanii sou ade ie. Oo no matainai e oo oto a inigogona mine Salemo.

<sup>8</sup> Oo muada, toesagalina vovone eitou ei doana, moni masagalina lilone eitou ei doana sele lou. Ei ni buloi eitou mina maulina seidei me mina maulina mulimuli tamai.

<sup>9</sup> Inade li ei patotona sele, ma vanunua vuso ne sou longe me ne sou silimuli a inade ie.

<sup>10</sup> Salemo ei maui taliuliu, ei gualieliu a vanunua ma tavivine vuso sou silimuli ei. Eitou silimuli sele ei me eitou magitali e ei ni toekube sele eitou, maido ma malada taliuliu neitou pipigo sagali sele.

<sup>11</sup> Oo no matetengi e sou a inade li ne sou ogomuli.

<sup>12</sup> Ma itetasetase lei e sou ne sou taupui oo vuna oo a bibi alaba, moni maite e sou a vanua na silimulina a inigogona doana mina inademu ma inasumu, me mina inigogona kinale, me mina inigogona silimulina, me mina inigogona maolo na matane Salemo.



<sup>13</sup> Mane eau ma asu asi oto usino minio, io oo no pipigo sagali moni a gini a Laulau mine Salemo me a veipalena inade sou ie, ma matetengina usino ne sou.

<sup>14</sup> Oo ma balebale lou a pipigona iedo Salemo ei bilii e oo tomane a niabi na malada sou a munuganuga na viepiluna kinaka sou tau a limane sou muata ne oo me a bibi tasa ei saa ane oo a inigogomu.

<sup>15</sup> Taliuluu oo no iteale kube a pipigona minio. Oo no pipigo sagali, mo no goli a pipigona sou ieli ni palea kuba, me sou vuso ne sou ite a inigogona minio oto ni palea doana sele lou.

<sup>16</sup> Oo no ulage kube a maulina ma matetengina vuso minio oto. Me mane oo sagali a ogomulina maido, Salemo ei ni gualeliu e oo oto, me ei ni gualeliu a vanunua ma tavivine sou longemulimuli a inademu.

## 5

*Timoti ei ni ite a vanunua ma tavivine tomane sou minei bilesi*

<sup>1</sup> Oo ma adesinoanoa lou ana vanunua buobuo. Moni o no ade mea moni, tomane oo ade mea ane tamamu. Me oo no goli a inigogona tasa moni usino na vanunua alalaba tomane oo goli usino ne tatasimu oto.

<sup>2</sup> Mo no goli a inigogona tasa moni usino na tavivine buobuo tomane oo goli usino ne tinamu. Mo no goli a inigogona tasa moni usino na tavivine alalaba a inigogona maolo tomane oo goligoli usino ne latavivinemu.

*Sei ni iteale sou a buasasu?*

<sup>3</sup> Oo no buloi a buasasu sou ugu vululu moni.

<sup>4</sup> Mane a buasu tasa ei isa e natatune ei oto ue sou e tubutubuna, io o no toe e sou ne sou muada kuba i a munugana pipigona mine sou na matane Salemo, ei a niitealena kube e tinane sou. Na inigogona li, ne sou mapuisobe a pipigona sagali lisa e tamane sou me tinane sou so goli mina niitealene sou. Salemo ei kale mamai a matana inigogona simaido.

<sup>5</sup> A buasu tasa ei ugu vululu moni, io ei ni silimuli sele e Salemo, me ei ni magitali e Salemo ni toekube sele ei, me taliuluu na oaso me na lodo ei ni kakake Salemo ni buloi ei.

<sup>6</sup> Moni mane a buasu ei ogomuli moni a masagana mina vovona, io a buasu do ei tomane ei matesi.

<sup>7</sup> Maido me oo no vei le sou a viepiluna kinaka ne sou ogomuli a inigogona iedo, ne sou goli moni a inigogona bilesi, me ne sou a

vanunua ma tavivine ne sou ma adegegelu oto ane sou.

<sup>8</sup> Mane a bibi tasa ei ma iteale ete sou a mautune ei me sou a abuna minei bilesi, io a bibi iedo ei lametasesi a silimulina minei. Vanunua sou ma isa oto a silimulina sou tamai ma goligoli ete a matana inigogona pagu maido.

<sup>9</sup> Mina aisana buasasu, o no niage moni a aisana buasu maido, avalana i peasi savulu pantasa, me suana tasa moni

<sup>10</sup> mei isa a aisa maido, ei a tavine na gunolina matamatana pipigona i doana tomane itealena kube e natatune ei, ma biliina gona inani ma golu sanii usino na mosimosi, me loloina ubune sou a kristen, ma buloine sou a vanunua ma tavivine sou isa a mavaana, ma gunolina matamatana pipigona sanii i doana. O no niage moni a aisana matana buasasu simaido.

<sup>11</sup> Moni oo no ma niage lei a aisane sou a buasasu alalaba, vuna i maido, mane a lilone sou i ilisi a taulaina lou, ne sou lametase e Kraisi,

<sup>12</sup> me ne sou isa a mavaana mina valuitina adegatuna sou goli lisa.

<sup>13</sup> Ma inigogona sanii lou sou goligoli i maido, sou bale bububu me sou gaga maisabasaba na lumaluma mine sou sanii. Me sou ma goli moni ete a inigogona binale moni. Boa. Sou kale mamaimai ne sou longe a inade na gologolu a vanunua ma tavivine sanii sou goli, me sou gaga, me sou poipoi e sou. Maido me sou goli a inade papaina ei ma bilesi oto.

<sup>14</sup> Maido me eau ade sagali ane sou a buasasu alaba ne sou taulai lou, me ne sou natatua, me ne sou iteale a luma mine sou. Mane sou goli maido, io a butu tasa boa ei ni ite a inigogona sou goli me ei ni adegegelu ane eitou.

<sup>15</sup> Oo muada, sanii mine sou a buasasu do sou lametasesi a vea i doana, me sou ogomuli e Satan.

<sup>16</sup> Mane a tavine tasa, ei silimuli e Kraisi, me ei isa a buasasu sou ino na luma minei, de a tavine iodo ei ni iteale kube sou. Ei ni ma bilii ete a mavaana mina itealene sou usino na viepiluna kinaka. Maido me sou a viepiluna kinaka sou mapigogoi ne sou iteale a buasasu sou malu vululu moni.

*Neitou tade mavae sou a munuganuga sou goli a pipigona i doana*

<sup>17</sup> Amutou namutou tade sou a munuganuga sou iteale kube a viepiluna kinaka, me mu oli e sou a mapa doana tamai. Tade mavae lei e sou sou pipigo a veimuadana inade mine Salemo ma matetengina.

<sup>18</sup> Eitou muada, Laulau mine Salemo ei vei maido, "Amutou ma sausobesobe lei a asena bulmakau mina malada ei duitase a uliulina vit.\*" Me eitou muada, "Bibi na pipigona ei mapigogoi ni guale a mapa ne ei."†

<sup>19</sup> Mane a bibi lua ue tolu sou vavasa ane a munuganuga, io oo no longemuli a vavasana mine sou, moni mane a bibi tasa moni ei vavasa, oo no ma longemulimuli lei e ei.

<sup>20</sup> Mane a munuganuga sanii sou goli a sinusu, de o no toe bilelesi e sou na matane sou a viepiluna kinaka, ne sou sanii tamai ne sou lae a gunolina sinusu.

*Timoti ei ni iteale kube a inigogona minei oto*

<sup>21</sup> Na matane Salemo me Kraisi Iesu me sou a bineanea mine Salemo, eau vei bilelesi le oo maido, o no ogomuli a inigogona tasa moni usino na vanunua vuso. Oo no ma gologoli lei a inigogona doana usino moni mine sou a vanunua o kale sou.

<sup>22</sup> Ma no ma toeiasi lei a tinau na limamu muata na bibi tasa. Moni no gege-muale muge a inigogona minei, dae oo tamai no gali ulilo na sinusu minei, me no iteale e oo oto no maolo na matane Salemo.

<sup>23</sup> Ma oinini lei a nanu moni. Puiale oo no ini sape a vain bisii ni buloi e oo a sinobe na tiamu i sagualeale oo na malada sanii.

<sup>24</sup> Sinusu mina vanua sanii ei palea muada me ei sibitala na vavasana pala, moni a sinusu mina vanua sanii ei ni palea mulimuli.

<sup>25</sup> Tomane moni, a inigogona mine sou i doana ei palea muada. Mane a inigogona doana sanii sou ma palea muada asi oto, de sou tamai ne sou ma mapigogoi ete ne sou ovu taliuliu.

## 6

*Vanunua na pipigona sabubu ne sou tade mavae a bibi buo mine sou*

<sup>1</sup> Sou a kristen sou a vanua na pipigona sabubu, ne sou tade a bibi buo mine sou. Maido me sou a vanua buobuo ne sou ma adegegeli ete a aisane Salemo ma inigogona mina silimulina mine eitou a kristen.

<sup>2</sup> Mane a bibi buo mine sou ei a kristen, bibi na pipigona iedo ei ni tade mavae lei e ei, vuna bibi buo iedo ei ni goli a pipigona buloine sou a kristen me ei kale sele sou.

*Kinalena vatu ei a vuna inigogona vuso i pagu*

<sup>3</sup> Inade mine Bibi Taula mine eitou e Iesu Kraisi, ei matetengi kube eitou a inigogona mine Salemo. Mane a bibi tasa ei litase a inade li mei matetengi e sou a vanunua

a inade sanii ei ma tomane ete a bilesina inade mine Iesu,

<sup>4</sup> io neitou muada i, bibi iedo ei toevautautau sabubu moni. Ei ma muada sapa oto. Ei isa a mailabana inade pagupagu ma inade maisabana mina maubina a golugolu banini moni. Matana inade maido ei ni toe a vanunua ne sou lilogegelu ana vanunua sanii, me ne sou maiadesinoanoa, me ne sou maiadepintolatola, me ne sou damutala gegelugelu ane sou sanii.

<sup>5</sup> Damutatalana mina vanunua sou goli a matana inigogona maido, ei maitavivili sele, me sou ma muada sapa oto a inade i patotona. Sou damu i a pipigona mine Salemo ei a vea na vuvutina.

<sup>6</sup> Moni mane eitou ogomuli a inigogona mine Salemo me eitou mongemonge a golugolu vuso e Salemo i bilii e eitou, neitou ite a maulina mine eitou i doana sele.

<sup>7</sup> Eitou muada, malada tinane eitou ei maalepose eitou me eitou palea na magamaga, eitou ma guale ete a golu tasa usinani. Me na malada eitou ilisitase a magamaga, eitou neitou ma guale ete a golu tasa usino.

<sup>8</sup> Moni mane eitou isa a gona inani ma malo ma golu sanii, de eitou neitou vei maido, ei mapigogoi e eau.

<sup>9</sup> Moni sou a vanua sou kale mamai sele a gualena vatu makuba, sou a tinovo ni palea mei lapitole obi e sou, tomane a vuo ei palesobe a golu vivi tasa. Lilone sou ni ilisi a gunolina golugolu makuba i pagu, me ieli ni toemaisabe sele e sou. Me na inigogona ieli ne sou mamau vuso.

<sup>10</sup> Kinale sele na vatu ei a vuna inigogona vuso i pagu. Vanua sanii sou kale mamai a vatu, me a inigogona ieli ei lapuale sou, me sou veletasesi a silimulina me sou tabule a mavaana buo sele.

*Oo no sagali mo no guale a maulina ei muina kubaana taliuliu*

<sup>11</sup> Moni e oo, o a bibi mine Salemo, oo no lametase a matana inigogona pagu sou iedo, mo no pololeletase sou. Moni oo no suduele a gualena inigogona bilesi, ma inigogona ivu mine Salemo, ma inigogona silimulina, ma inigogona kinale sele ne sou sanii, ma magilisagalina ma tabulena mavaana vuso, ma inigogona lilomeana usino ne sou a vanunua ma tavivine.

<sup>12</sup> Bibi ei silimuli e Kraisi, ei tomane a bibi ei vele na mailabana. Maido me oo no vele sagali na mailabana doana iedo, mo no guale a maulina ei muina doana taliuliu taliuliu. Na malada oo magili sagali mo veipale a silimulina minio na matane sou a vanunua papaina, Salemo ei toleale oo mina gualena maulina iedo.

<sup>13</sup> Na matane Salemo ei biliilii a maulina usino na golugolu vuso me na matane Krai Iesu ei magili sagali mei ademuada i na matane Pontius Pailat, eau vei sagali le oo simaido,

<sup>14</sup> o no ogomuli kube a inade oo gualesi. O no ma toemaisabesabe lei a inade ie, me o no ma goligoli lei a golu tasa vanunua ne sou adegegelugelu i. Boa. Oo no ogomuli iiti i asu mapigogoi e Bibi Taula mine eitou e Iesu Krai ei ni palea muada.

<sup>15</sup> Ei ni palea mina malada Salemo ei vileale. Salemo ei a vuna inigogona patotona mina munonge, me ei tasa moni ei iteale a golugolu vuso. Ei a Mapana mine sou a mapana, me ei e Bibi Taula mine sou a vanua buobuo.

<sup>16</sup> Ei tasa moni ei ma matemate oto. Ei ugu na muada buo sele, me eitou ma mapigogoi ete neitou asu agavuale ei. A bibi tasa saboa ite ei, ma bibi tasa ei ma mapigogoi ete ni ite ei. Maido me taliuliu taliuliu eitou vuso neitou masalalai e ei, me ei ni isa a sagagalina vuso. Moliانا.

*Vanunua sou isa a vatu makuba ne sou buloi e sou a kapelabe*

<sup>17</sup> Oo no vei ane sou a vanua na vuvutina, ne sou ma toevautauta lou me ne sou ma beilangelange lei a aisane sou oto. Ne sou ma silimulimuli lei a matamatana golu ei ni mamau asi. Boa. Ne sou silimuli sele e Salemo ei bilii e eitou a golugolu papaina i doana mina toemongene eitou.

<sup>18</sup> Ne sou goli a inigogona papaina i doana mina buloine sou a vanunua ma tavivine sanii. Taliuliu ne sou bilii a golugolu papaina usino ne sou a kapelabe me ne sou goli a inigogona patotona mina toekubene sou sanii.

<sup>19</sup> Mane sou goli maido, io ne sou taupili a golugolu makuba mina buloine sou mulimuli, me ne sou guale a maulina iedo ei a maulina ivu sele.

*Oo no ulago kuba a pipigona minio*

<sup>20</sup> Timoti, oo no ulage kube a pipigona Salemo ei bilii e oo me no lametase a matamatana inade maisaba ei ma ogomuli ete a damutatalana mine Salemo. Mo ugu bulago ana vanunua sou damutale ve sou isa a muadana doana, me sou goli a matamatana inade sou butuale a damutatalana mine Salemo.

<sup>21</sup> Vanunua sanii sou ogomuli a matana muadana maido sou litasesi a inigogona mina silimulina.

Dinodo mine Salemo ei ni muina pilu e amutou.

## 2 Timoti Maluana Laulau Pol ei niage usino ne Timoti

### *Pol ei vei oaso doana*

<sup>1</sup> Eau e Pol, eau a aposel mine Krais Iesu. Na masagana minei oto, Salemo ei peltase eau na veimuade a adegatuna mina maulina iedo lilo ne Krais Iesu.

<sup>2</sup> Timoti, oo natugu ivu, eau niage a laulau ieli usino ne oo.

Salemo Tamane eitou pilu e Krais Iesu Bibi Taula mine eitou, ne sulu dode oo me ne sulu lilomuli e oo me ne sulu bilii e oo a lilomeana.

### *Ade sagali ane Timoti ni magili sagali*

<sup>3</sup> Eau toledadangi e Salemo, me eau kakaka ane ei a damutatalana i bilisi ma lilogu i maolo sele na matane Salemo tomane lisa eisuusne eitou sou goli. Na ilala eau kaka na oaso me na lodo, taliuliu eau damutaletale oo mea toledadangi e Salemo e oo.

<sup>4</sup> Eau kale sele na ite lei e oo, vuna eau damutale a matananumu ei kokolo na ilala eitau mailisibula, maido me mane eau ite lei e oo, eau na mongemonge sele.

<sup>5</sup> Eau damutale maido oo isa a silimulina ivu, a matana silimulina iede tubumu tavine Lois me tinamu Unis sulu isa i, me eau muada oo tamai oo isa i.

<sup>6</sup> Moni eau kale na mailisi a damutatalana minio ni palea sagali lou na maulina minio, tomane na ilala eau tau a limagu muata na letemu, Salemo ei bilii e oo a niabi tomane a bibi ei supipili a oavi.

<sup>7</sup> Oo muada, Nunu Salemo i biliososi e eitou iedo, ei a nunu mina toenilaene eitou boa. Moni ei bilii e eitou a sagagalina ma kinale usino ne sou sanii ma itealekubena maulina mine eitou oto.

<sup>8</sup> Maido me oo no ma maelaela lou a veipalena inade mine Bibi Taula mine eitou. Me oo no ma maelaela lou e eau, eau eili na luma na tunuui na pipigona mine Krais. Oo no guale a sagalina mine Salemo, mo no tabule a mavaana pilu e eau mina pipigona veipalena malongolongona kubaana.

<sup>9</sup> Salemo ei gualeliuosi e eitou mei toleale eitou neitou palea a vanunua ma tavivine minei oto. Moni ei ma damutale ete a inigogona doa eitou goliosii. Boa. Lisa otosi, na malada Salemo ei saboa goli a golu tasa ni palea, ei tolealesi eitou na masagana minei oto pilu a dinodo mine Krais Iesu.

<sup>10</sup> Me seidei, Krais Iesu, ei a Bibi na gualeliune eitou, ei palea muada selesi. Ei

mapuliososi a sagalina minate, me na malongolongona kubaana minei ei toe sou a vanunua ma tavivine vuso ne sou muada a maulina ei muina taliuliu.

<sup>11</sup> Salemo ei kale eau na veipale a malongolongona kubaana, maido me ei vileale eau tomane a bibi na veimuadena inade me a aposel me a bibi na matetengina.

<sup>12</sup> Maido me sei mavaana eau guale, eau na ma maela oto i, vuna eau muadasi i a Bibi eau silimuli, me eau muada kuba i maido ei ni ulage kube a golugolu vuso eau tau na limana, i asu mapigogoi na Malada mine Krais.

<sup>13</sup> Oo no longemuli kube a inade doadoana eau bilii e oo. Me oo no silimuli sagali e Krais Iesu, mo no bilii a lilomu usino ne ei, me na inigogona ieli oo no veipale a inade usino ne sou.

<sup>14</sup> Maolona Nunu ei pipigopigo lilo ne eitou, na sagalina mina Maolona Nunu ie o no iteale a golu doana sele Salemo i tau na limanu.

<sup>15</sup> Oo muadasi i, sou a vanunua mina avena mine Esia sou iavetasesi e eau, me Pigelus me Hermogenes sulu tamai sulu iavetasesi e eau.

<sup>16</sup> Eau kake e Bibi Taula ni lilomuli e Onesiporus pilu e sou minei. Mapapaina, Onesiporus ei tokube a lilogu. Me ei ma maela oto e eau na ilala eau ugu na luma na tunuui.

<sup>17</sup> Ei asu usinani ne Rom, me ei sagali sele a tilomuline eau, me mulimuli ei poge eau.

<sup>18</sup> Eau kake Bibi Taula ni lilomuli ei na malada na vavasana buo mine Salemo. Me oo muada kuba i maido, Onesiporus ei buloi e eau mapapaina ne Epesus tamai.

## 2

### *A bibi na maubina doana mine Krais Iesu*

<sup>1</sup> De, natugu, taliuliu oo no toe a dinodo mine Krais Iesu ni masagali e oo.

<sup>2</sup> Ma inade vuso oo longe eau veimuade na matana vanunua vuso, ielili oo no bilii e sou a vanunua vuso, ne sou lapitole sagali a inade mine Salemo i mapigogoi ne sou matetengi e sou sea tamai.

<sup>3</sup> Oo no guale a davutina pilu e eau tomane a bibi doana na maubina mine Krais Iesu.

<sup>4</sup> Oo muada a vanua na maubina sou ma lapitole ete a pipigona sea lou. Boa. Sou lapitoletele a pipigona mina maubina moni, vuna bibi ei itealale sou ei kale sou ne sou goligoli a pipigona mina maubina moni.

<sup>5</sup> A bibi ei vele a mailabana ei ni ogomuli a binea mina mailabana. Mane boa, ei ni ma guale ete a kele na vululusina.

<sup>6</sup> A bibi na pipigona mauma ei ni guale pale a avena gona inani mina mauma ane sou sanii.

<sup>7</sup> O no damutaletale a inade eau vei ie, maido me Bibi Taula ei ni toe e oo no muada a vuna inade vuso ie.

<sup>8</sup> Oo no damutaletale Iesu Kraisi, ei ilisiliu na minate, me ei a bibi mina abuna mine Devit tomane a malongolongona kubaana eau veipale.

<sup>9</sup> Sou papale eau a sen tomane a bibi ei pagu sele, me sou bilii e eau a matamatana mavaana, vuna maido eau malongo a malongolongona kubaana, moni a inade mine Salemo ei ma tomane ete a sen sou papaletole.

<sup>10</sup> Maido me eau toesagali a lilogu, mea tabule a mavaana vuso li mina buloine sou a vanunua ma tavivine Salemo ei vilealesi minei oto, ne sou tamai guale a maulina ino ne Kraisi Iesu iedo, me ne sou ugu kuba iiti sele pilu e ei taliuliu taliuliu.

<sup>11</sup> Ieli a inade patotona,  
"Mane eitou mate pilu e ei,  
de neitou maui tamai pilu e ei.

<sup>12</sup> Mane eitou ugu sagali a muine eitou me eitou tabule a mavaana sou ie,  
de neitou muina a mapana tamai pilu e ei.

Mane eitou lametase ei,  
de ei tamai ni lametase e eitou.

<sup>13</sup> Eitou ma ogomuli sele ete a inade minei, moni Bibi Taula ei taliuliu ogomulimuli a inade ei veiosi.

Vuna ei ni ma mapigogoi ete ni sauvule a inade minei."

*A bibi na pipigona ivu mine Salemo*

<sup>14</sup> Na matane Salemo, oo no vei sagali ane sou ne sou ma adesinoanoa lou a golugolu banini sabubu. Matana inade maido, ei ma mapigogoi ete ni buloi a bibi tasa. Boa. Ei toegegeligeli moni a maulina mine sou a vanunua sou longe.

<sup>15</sup> Oo no pipigo sagali no palea a bibi na pipigona ivu, me ne Salemo ni kale a pipigona minio. Maido me oo no veimuade bilesi a inade ivu mine Salemo, me oo no ma isa oto a maelana na matane ei.

<sup>16</sup> Bulagetase sou a vautautana inade sabubu, vuna matana inade ei ni maasi a vanunua ma tavivine ne sou bulagetase Salemo.

<sup>17</sup> Matana matetengina maido, ei tomane a tuutuu pagu mina toegegelina bibi, me ei ni palea buo sele. Tau lua ne sou sulu gologoi a matana inade simaido, ede Himeneus pilu e Piletus.

<sup>18</sup> Sulu veletasesi a vea na adepatotona, vuna sulu adeade maido, "Ilisiliuna ei lisasi, maido me mulimuli neitou ma mapigogoi

ete neitou ilisiliu lou." Na inade ieli sou toegegeligeli a silimulina mina vanunua ma tavivine sanii.

<sup>19</sup> Moni Salemo ei mamagiliosi a bao sagali mina tinigena viepiluna kinaka minei, ma baobao iedo sou magili sagali a muine sou. Me na bao do, ei niage a inade maido, "Bibi Taula ei muada kuba a vanunua ma tavivine minei oto." Me ei niage tamai a inade ie, "Vanunua vuso sou veipale a aisane Bibi Taula, ne sou lametase a inigogona pagu."\*

<sup>20</sup> Na luma buo tasa, a matamatana taogoino sou goli a gol ma silva, sanii sou goli a obu, me sanii sou goli a magamaga. Sanii ei mina pipigona doana, me sanii mina pipigona maisaba.

<sup>21</sup> Maido me mane a bibi tasa ei taulele a matamatana inigogona pagupagu ie me ei palea maolo na matane Salemo, io ei ni muina tomane a taogo mina pipigona doana sele. Ei ni muina a bibi ivu mine Salemo, me ei mapigogoi ni pipigo ane Bibi Taula minei. Ei ni masusulu a matamatana pipigona vuso i doana.

<sup>22</sup> Maido me taliuliu oo no lametase a masagana pagupagu, ei ino na lilone sou a vanunua alalaba. Me oo no ogomuli a inigogona bilesi, ma inigogona silimuline Salemo, ma inigogona kinale sele usino ne sou sanii, ma inigogona lilomeana pilu e sou a vanunua sou ino maolo sele na matane Salemo me sou kaka na aisane Bibi Taula.

<sup>23</sup> Me oo no ma belibeli lei a tagilamu usino na vautautana inade ma inade maisabasabana mine sou a vanua sou ma isa oto a damutatalana doana. O muada, a matana inade maido, ei mapalele a adesinoanoa moni.

<sup>24</sup> Ma bibi na pipigona mine Bibi Taula ei ni ma adesinoanoa lou. Boa. Ei ni goli moni a inigogona doana usino na vanunua vuso. Mane a vanua sou ma longemuli ete ei, ei ni vale moni usino ne sou mei ni matetengi e sou a inigogona lilomeana.

<sup>25</sup> Ei ni vale moni, me ei ni toebilelesi a damutatalana mine sou a vanunua na longetasena inade. Mane ei goli maido, io nane Salemo ei ni sauvule a lilone sou, me ne sou guale a muadana doa mina inade ivu.

<sup>26</sup> Io damutatalana mine sou ni palea muada lou, me ne sou veletase a mai mine Satan, ei palebululi e sou ne sou ogomuli a inigogona ei kale.

### 3

*Na punuluna malada vanua ne sou goli a inigogona pagu*

\* 2:19 Savuluna 16:5; Aisaia 52:11

<sup>1</sup> Moni oo no muada i maido, na punuluna malada a mavaana mamau makuba sele ni palea.

<sup>2</sup> Sou a vanua ne so kale e sou oto moni, me ne sou kale mamai sele a vatu, me ne sou masalai a aisane sou oto, me ne sou toebuebue, me ne sou adegégeli e sanii, me ne sou ma longemuli ete a inade mine tamane sou me tinane sou, me ne sou ma toledadangi ete, me ne sou ma ogomuli ete a maolona inigogona mine Salemo,

<sup>3</sup> me ne sou lametase a inigogona mina maitamaina, me ne sou ma valimate ete a sinoana mine sou, me ne sou poipoi e sou sanii, me ne sou ma iteale ete a masagana mina vovone sou, me ne sou sinoanoa tomane a viuviu, me ne sou butuale a inigogona vuso i doana,

<sup>4</sup> me ne sou lametase tamtamaine sou oto, me ne sou ogomuli asi a damutatalana pagu mine sou oto, me ne sou veivei ve, sou oto sou a bibi buo sele, me ne sou kale mamai a matamatana munonge mina magamaga, moni ne sou ma kale ete e Salemo,

<sup>5</sup> me ne sou ogomulimuli a inigogona mine Salemo na vovone sou moni, moni ne sou ma muada sapa oto a sagalina buo i ino na inigogona ivu mine Salemo. Oo no bulagetase a matamatana vanunua maido.

<sup>6</sup> Matana vanua maido, sou tilotilo a vea ne sou gali ulilo na luma mine sou a tavivine sou ma isa oto a damutatalana doana, me ne sou toemaisabe a damutatalana mine sou. Tavivine sou ie, sou goli a sinusu makuba, me sou somiale a mavaana mina sinusu mine sou. Ma lilone sou i ilisilisi a lapualene sou mina gunolina matamatana inigogona pagu.

<sup>7</sup> Tavivine sou ie, sou kale mamai sele a gualena matetengina, moni sou ma mapigogoi ete ne sou guale a muadana patotona inade mine Salemo.

<sup>8</sup> Lisa Ianes pilu e Iambres, sulu butuale e Moses, me tomane moni sou a vanua sou goli a inigogona iedo sou butuale a inade ivu. Damutatalana mine sou i maisaba sele, ma silimulina mine sou i bulage sele ane Salemo.

<sup>9</sup> Moni a inigogona mine sou iedo ei ni ma palea buo mamau oto, vuna vanunua vuso ne sou ite maido, a inigogona mine sou ei pagu sele tomane lisa sou a vanua sou ite a inigogona mine Ianes pilu e Iambres i pagu.

#### *Lapitole sagali a inade mine Salemo*

<sup>10</sup> Moni oo muadasi a matetengina minau vuso, me oo muada a inigogona eau asuasou i, me a masagana vuso minau iedo. Oo muada i maido, eau silimuli sagali e Salemo, me taliulu eau toesagaligali a lilogu me eau goli a pipigona, me eau kale mamai sele sou

sanii, me eau magili sagali me eau tabule a mavaana.

<sup>11</sup> Oo muada a inigogona vuso pagu sou a vanunua sou goli le eau, me a davutina vuso eau guale mine Antiok me Aikoniam me Listra. Oo muada a golugolu pagu sele sou goli le eau na aubu sou iedo, moni e Bibi Taula ei gualeliu e eau mina mavaana vuso ie.

<sup>12</sup> Patotona sele, sou a vanua sou kale ne sou malu pilu e Krai Iesu, ne sou tabule a davutina papaina.

<sup>13</sup> Me sou a vanunua mamau me sou a niitona vanunua, ne sou palea pagu sele lou, me ne sou aualala ane sou a vanunua ma tavivine sanii, me Satan tamai ei auala ane sou oto do.

<sup>14</sup> Moni e oo, no lapitole obi a inade patotona oo guale iede, me no silimuli sagali i. Oo muada iiti sei ei matetengi e oo a inade ie.

<sup>15</sup> Me oo muada, ilala oo saboa ino a bibaini, oo soke a gualena muadana mina Laulau na vinalu mine Salemo. Laulau na vinalu ieli ei mapigogoi ni bilii e oo a damutatalana doana mei ni maite a vea no silimuli e Krai Iesu, me ne Salemo ni gualeliu e oo.

<sup>16</sup> Nunu mine Salemo oto ei mapale a Laulau na vinalu mine Salemo, me a inade li ei matetengi e eitou mei toebilelesi a damutatalana mine eitou me ei toebilelesi a mavaana mine eitou me ei matetengi a inigogona vuso i doana.

<sup>17</sup> Maido ma inade li ei toe eitou a vanunua ma tavivine mine Salemo me neitou guale iiti a inigogona vuso i doana, me ei toe eitou masusulu a pipigona vuso i doana.

## 4

### *Timoti ei ni veimuade sagali a inade mine Salemo*

<sup>1</sup> Na matane Salemo me Krai Iesu ei ni vivileale a inigogona mine sou vuso sou mauili me sou matesi tamai, me eau damutaletale e Iesu Krai ei ni palea na matane sou a vanunua ma tavivine mei ni ugu a mapana, eau vei sagali le oo maido,

<sup>2</sup> oo no sagali a veimuadana inadene ei. Muina mane a vanunua sou masusulu a nilongena inade, ue sou ma masusulu oto, taliulu oo no pipigo sagali a veimuadana inade ne Krai. Oo no bilii e sou a inade sagali ei ni ubi a lilone sou me ei ni mailisi e sou ne sou sauvule a lilone sou, me ne sou ogomuli a inigogona mine Salemo. Me oo no lilomea moni ane sou, mo matetengi kube sou a inigogona e Salemo ei kale.

<sup>3</sup> Longe. Mulimuli sou a vanunua ne sou ma kale ete lei a nilongena inadenede

i bilesi. Boa. Moni ne sou tilotilo a vanunua papaina mina matetengine sou a matamatana inade sou kale ne sou longe.

<sup>4</sup> Me ne sou lametase a inade patotona, me ne sou beli a tagilane sou usino na matamatana mapamulina sabubu.

<sup>5</sup> Moni oo oto no damutala iiti taliuliu, me no tabule a mavaana ma davutina. Oo no pipigo a veipalena malongolongona kubaana usino na vanunua ma tavivine. Oo no toe sele a pipigona mina buloine sou a vanunua ma tavivine.

*Pol bisii moni ei ni mate*

<sup>6</sup> Oo muada, bisii moni eau na mate, ma dalagu ni singi tomane a nanu a vain iedo sou bilii e Salemo tomane a niabi. Ilala eau ilisitase magamaga ieli ei agavios.

<sup>7</sup> Eau vele sagali sele a mailabana doana mina gualena maulina. Seidei eau sibalatalasi na sinuana mailabana, mea lapitole obi a silimulina minau ne Salemo.

<sup>8</sup> Seidei a kele mina bilesina ane a bibi ei vululusi a vinele ei masusuluosi mei magitali a muina. Bibi Taula ei ogomuli moni a inigogona bilesi, me ei vivileale a inigogona mine sou a vanunua ma tavivine, me na Malada buo minei mina vavasana, ei ni bilii a kele iedo usinani minau. Ei ni ma bilii ete eau vululu moni. Boa. Ei ni bilii e sou a vanua sou kale mamai sele ne sou ite ei, me sou magitali e ei ni sibalatala.

*Punuluna inade mine Pol usino ne Timoti*

<sup>9</sup> Oo tove sagali no asu asi usinani.

<sup>10</sup> Longe, Demas ei ilisitasesi e eau. Ei kale mamai sele a inigogona mina magamaga, me ei asu usino ne Tesalonaika. Kresens ei asu usino na avena ne Galesia, me Taitus ei asu usino na avena ne Dalmesia.

<sup>11</sup> Luk tasa moni ei eili pilu e eau. Maido me oo no guale Mak, me no maasi ei usinani pilu e oo. Ei a bibi doana ni buloi e eau mina pipigona.

<sup>12</sup> Eau peltasesi e Tikikus usino ne Epesus.

<sup>13</sup> Malada oo kale no asu usinani, de oo no guale a kinainai lagolago, eau tau na luma mine Karpus ne Troas. Oo no ma danivusevuse lei a gualena laulau tamai sou goli a uliulina golu vivi.

<sup>14</sup> Aleksander, ei a bibi na pipigona a bras, ei toegegeli sele eau. Mulimuli Bibi Taula ni adoliu a inigogona ei goli goli iedo.

<sup>15</sup> Oo tamai oo no tilale oo a bibi iede. Ei butuale sele a inade mine amiteu.

<sup>16</sup> Munugana malada eau adeliu a inade na vavasana, bibi tasa ma magili pilu oto e eau mei buloi e eau a inade. Vanunua vuso sou veletase eau. Eau kake Salemo ni ma damutaletale lei a inigogona pagu mine sou odo.

<sup>17</sup> Moni e Bibi Taula oto ei magili pilu e eau mei toesagali eau. Maido me eau

veimuade a malongolongona kubaana i mapigogoi sele sou a abuna vanunua masala vuso ne sou longe. Me Salemo ei gualeliu e eau maino na asena laion.

<sup>18</sup> Tomane moni Bibi Taula ni gualeliu e eau maino na inigogona vuso pagu sou kale ne sou goli le eau, me ei ni toe eau na ugu kuba, me ei ni maasi eau usino na avena minei na langi. Neitou beilange a aisane ei taliuliu taliuliu. Moliana.

*Oaso kubaana mine Pol usino ne sou*

<sup>19</sup> Oo no bilii a oaso kubaana minau usino ne Prisila pilu e Akila, me ne sou a abuna mine Onesiporus.

<sup>20</sup> Erastus ei saboa ino ne Korin. Me Tropimus ei sobe, me eau asutase ei muina ne Miletus.

<sup>21</sup> O no tove sagali no asu asi usinani, dae o no ugugu na ilala mina maigina ma avivili sagali ni palea.

Iubulus me Pudens me Linus me Klodia me sou a kristen sou sosove a oaso kubaana usino minio.

<sup>22</sup> Bibi Taula ei ni muina pilu a nunumu. Ma dinodo minei ni muina pilu e amutot vuso.

## Taitus Laulau Pol ei niage usino ne Taitus

### *Pol ei vei oaso doana usino ne Taitus*

<sup>1</sup> Eau e Pol, eau a bibi na pipigona mine Salemo me eau a aposel mine Iesu Krai. Salemo ei vileale eau mina toesagalina silimulina mina vanunua ma tavivine minei mina buloine sou ne sou muada kuba a inade patotona me ne sou ogomuli a inigogona mine Salemo.

<sup>2</sup> Lisa otosi, ilala Salemo i saboa mapale a golu tasa, ei adegatunasi ni bilii a maulina i muina taliuliu usinani ne eitou. Ei ma aualala oto mei ogomuli a inade ei adegatunasi i. Maido me eau buloi e sou a vanunua ma tavivine ne sou silimuli a inade sagali odo me ne sou magitali Salemo ei ni bilii e sou a maulina.

<sup>3</sup> Me mulimuli, na ilala ei oto i vileale ei mailisi a vanua sanii ne sou veimuade a inade minei, me na inigogona iedo ei mapale vuso a inade minei. Salemo, ei e Salemo na gualeliune eitou, ei ade sagali ane eau tamai na veimuade i.

<sup>4</sup> Taitus, eau niage a laulau li usino minio. Oo natugu ivu, vuna eitau silimuli e Salemo tasa moni.

Salemo Tamane eitou pilu e Krai Iesu ei a Bibi na gualeliune eitou, ne sulu dode oo me ne sou toemea a lilomu.

### *Taitus ei ni vileale a vanunua buobuo mina viepiluna kinaka*

<sup>5</sup> Eau asutase o na lolopati e Krit, ne oo toebilelesi a avena pipigona vuso, ei saboa bilesi iodo, me oo no vileale sou a vanua buobuo mina viepiluna kinaka na aubu buobuo vuso tomane eau vei le oo lisa.

<sup>6</sup> O no vileale a vanua buobuo, sou ma isa oto a inigogona pagu na matana vanunua ma tavivine, me sou isa e susune sou tasa moni. Me ne natatune sou odo ne sou silimuli e Iesu, me ne sou ma ogomuli lei a inigogona toevautautana, me ne sou ma longetasetase lei a inade mine tamana me tinane sou.

<sup>7</sup> Oo muada, bibi na itealena viepiluna kinaka ei a bibi na niitealalena pipigona mine Salemo. Maido me ei ni ma isa oto a inigogona pagu, mei ni ma toe buebue ete ei oto, mei ni ma sinoa asiasei lou, mei ni ma matalilili lou, mei ni ma ubi maisabesabe lei a vanunua, mei ni ma kale mamaimai lei a gualena vatu.

<sup>8</sup> Moni ei ni iteale kube a mosimosi minei, mei ni kale a inigogona doana vuso, mei ni iteale kube a maulina minei oto, mei

ni ogomuli a inigogona bilesi ma inigogona maolo, mei ni mapigogoi a taupuina masagana minei oto.

<sup>9</sup> Ei ni lapitole obi a inade patotona ei longesi, maido me ei mapigogoi ni matetengi e sou a vanunua ma tavivine na inade patotona, mei ni mapigogoi ni ade sagali ane sou a vanua sou saukiki a inade, ne sou somiale sele a inigogona pagu mine sou.

### *Inigogona pagu mina vanunua ma tavivine mina lolopati e Krit*

<sup>10</sup> Vanunua makuba mina viepiluna kinaka mine Krit sou saukikiki a inade ivu. Sou veivei a inade sabubu makuba, me sou auala ana damutatalana mine sou a vanunua. Abuna buo mina vanunua ieli, ede sou a vanua mina abuna e Iuda, abuna sou odo sou sagali a munogena.

<sup>11</sup> Vanua sou odo sou kale ne sou lapuale a vatu, maido me sou matetengi e sou a inigogona sanii i ma mapigogoi ete neitou goli. Na inigogona do sou toegegigeli a silimulina mina tamenatutana makuba. Maido me oo no magilisobe sou, ne sou ma gologoli lei a matana inade maido.

<sup>12</sup> Lisa, a profet tasa ne Krit oto, ei vei maido, "Sou e Krit sou a vanunua na aualana moni. Sou a vanua pagu sele tomane sou a viuviu me sou damutaletale moni a anipepeina ma binale."

<sup>13</sup> Inade li ei patotona. Maido me oo no ade sagali ane sou ne sou toebilelesi a inigogona mine sou, me ne sou silimuli sele e Salemo,

<sup>14</sup> me ne sou ma longotagigigi lou a mata-matana mapamulina sabubu ne sou e Iuda me a matamatana bine mine sou a vanua sou lametasetase a inade patotona.

<sup>15</sup> Golugolu vuso ei ni alaba ane sou a vanunua ma tavivine sou ino maolo na matane Salemo. Moni mane a vanunua ma tavivine sou ogomuli a inigogona mumugu na matane Salemo me sou ma silimuli ete Krai, de a golu tasa i boa ei alaba, vuna damutatalana mine sou pilu a lilone sou ei mumugu vuso na matane Salemo.

<sup>16</sup> Na asene sou, sou veivei maido, "Eau muada e Salemo," moni a inigogone sou ei maite i maido sou lametasesi e Salemo me sou a vanua na saukikina inade me sou a vanua pagu sele me sou ma mapigogoi sele ete ne sou goli a inigogona tasa i doana.

## 2

### *Sou buobuo ne sou ogomuli itii a inigogona Salemo i kale*

<sup>1</sup> Moni no veivei le sou a inade vuso i ogomuli a bilesina matetengina.

<sup>2</sup> O no vei le sou a vanua buobuo ne sou ma ininu lou me ne sou itealale a masagana mina lilomumuguna, me ne sou damutale



bilesi me ne sou ogomuli a inigogona bilesi moni. Ne sou muada iiti a inade ivu mine Salemo me ne sou silimuli sagali e Salemo, me ne sou isa a inigogona kinale sele usino ne sou sea ma inigogona mina tabulena mavaana.

<sup>3</sup> Mo no vei le sou a tavivine buobuo tamai ne sou asu na inigogona Salemo i kale. Ne sou ma adegegeligeli lei sou sanii. Me ne sou ma inu mamaumau lou, moni ne sou matetengi e sou sanii a inigogona doana.

<sup>4</sup> Me ne sou matetengi e sou a tavivine alalaba ne sou kale sele sou e suasuane sou me natatune sou,

<sup>5</sup> me ne sou iteale kube a damutatalana mine sou oto, me ne sou ugu maolo na matane Salemo, me ne sou pipigo sagali ana luma ne sou oto, me ne sou matano moni ane suane sou. Me mane sou goli a inigogona sou odo, de vanunua sou ma mapigogoi ete ne sou adegegeli a inade mine Salemo.

*Taitus ei ni maite a inigogona kubaana usino na vanunua alalaba*

<sup>6</sup> Tomane moni oo no mailisi a vanunua alalaba sou tamai ne sou iteale kube a damutatalana mine sou oto.

<sup>7</sup> Na golugolu vuso oo gologoli, oo oto no maite e sou a inigogona kubaana moni ne sou ite a inigogona minio me ne sou ogomuli. Na pipigona minio o matetengi e sou a vanunua ma tavivine, o no ma aualala lou ane sou, mo no ma adeginelele lou ma toevautautana maisaba. Boa.

<sup>8</sup> Taliuliu o no veimuade a inade bilesi moni. Mane oo goli maido, io a vanunua sou butuale eitou sou ma mapigogoi ete ne sou poge a mamauna na inade minio. Boa. Ne sou maela a damutatalana mamau mine sou.

*Sou a vanua na pipigona sabubu ne sou ogomuli kube a inade mina vanua na itealalena*

<sup>9</sup> O no matetengi a vanua na pipigona sabubu ne sou matano moni na vanua na itealalena mine sou, me ne sou goli a matana pipigona doana sou kale. Ne sou ma adoliuliu lou usino ne sou a vanua na itealalena,

<sup>10</sup> me ne sou ma paaaliali lei a golugolu mine sou. Ne sou ogomuli kube a inade mine sou, maido me sou a itealalena ne sou mongemonge sele a inigogona mine sou. Golugolu vuso sou goli, ieli mailisi a vanua ne sou bilii a aisa buo na inade iedo eitou veimuadade iodo, ei a inade ivu mine Salemo, ei e Salemo mina gualeliune eitou.

*Neitou magitali a malada mine Kraisi*

<sup>11</sup> Eitou muada, dinodo mine Salemo i palea muadasi ei mapigogoi ni gualeliu a vanunua ma tavivine vuso.

<sup>12</sup> Dinodo mine Salemo ieli ei toe eitou a veletasena inigogona mina lametasene Salemo ma litasena masagana mamau vuso mina magamaga ieli, me ei matetengi eitou a damutatalana kuba ma inasu bilesi. Patotona, eitou eili balivua ne sou a vanunua ma tavivine mina magamaga ie, moni a dinodo mine Salemo ei toe eitou neitou ogomuli a inigogona mine Salemo.

<sup>13</sup> Maido me eitou magitaliali ivu a golu doana iedo neitou monge sele a niitena. A golu doana iedo ei e Salemo mei buo mamau sele, me Iesu Kraisi ei e Bibi Taula mina gualeliune eitou, ei ni palea muada sele pilu a aisa buo mine Salemo.

<sup>14</sup> Kraisi ei iabitasesi a maulina minei oto mina gualeliune eitou maino na matamatana inigogona pagupagu vuso, me neitou malu maolo sele, me neitou ugu a abuna vanunua ma tavivine minei oto, me neitou pipigo sagali a inigogona doana vuso.

<sup>15</sup> O no veimuade a inade li usino na vanunua ma tavivine. Me oo no masagali a lilone sou me no toebilelesi a inigogona mine sou a sagagalina Salemo i bilii e oo. O no ma itetasetase lei a vanunua ne sou taupui e oo.

### 3

*Neitou goli a inigogona kubaana*

<sup>1</sup> O no vei ana vanunua ma tavivine ne sou matano moni usino ne sou a mapana ma vanua na itealalena avena buo, me ne sou ogomuli a inade mine sou, me ne sou masusulu a gunolina matana pipigona vuso i doana,

<sup>2</sup> me ne sou ma adegegeli lei a bibi tasa, me ne sou ma adesinoanoa lou. Taliuliu ne sou ugu vale moni, me ne sou goli a inigogona doana ana vanunua ma tavivine vuso.

<sup>3</sup> Oo muada, lisa eitou tamai eitou toevautauta me eitou saukiki a inade. Satan ei ioto ane eitou, maido me eitou ino tomane a bibi na pipigona sabubu mina matamatana inigogona pagupagu ma matamatana masagana mina vovone eitou. Me eitou asu moni pilu a inigogona mina lilosinoana ma lilomamauna ane sou sanii. Me sou butuale eitou me eitou tamai eitou butuale sou.

<sup>4</sup> Moni Salemo, ei e Salemo na gualeliune eitou, ei kale sele eitou, me ei dode eitou. Me na malada ei goli a inigogona kubaana usinani ne eitou,

<sup>5</sup> ei gualeliu e eitou. Ei ma gualeliu e eitou na inigogona bilesi mine eitou. Boa. Ei gualeliu e eitou na lilomulina minei oto. Ei maavuvuti e eitou a Maolona Nunu, ma Maolona Nunu ieli ei bilii e eitou a maulina

alaba, maido me eitou palea tomane seleanini alaba.

<sup>6</sup> Ne Iesu Krai, ei e Bibi Taula mina gualeliune eitou, Salemo ei singi mamai sele a Maolona Nunu usinani ne eitou.

<sup>7</sup> Krai ei dode eitou me ei toe eitou palea a vanunua ma tavivine bilesi na matane Salemo, me na inigogona ieli Salemo ei mapale eitou mina gualena maulina ei muina taliuliu, maulina iedo eitou magitalitali.

<sup>8</sup> Inade ieli ei patotona. Maido me eau kale no veimuade sagali a inade iede usino ne sou a vanunua ma tavivine sou silimuli e Salemo ne sou pipigo sagali a inigogona doana. Matana inigogona maido ei buloilo i a vanunua ma tavivine, me ei a golu ivu.

<sup>9</sup> Moni oo no ma longotagigi lou a maubina inade i vautauta, ma inade mina aisane eikusone sou, ma maubina inade, ma adesinoana na vuna inade ino na binea mine Moses. Eitou muada, a matamatana inade maido ei ma mapigogoi ete ni buloi eitou a ogomulina inigogona doana.

<sup>10</sup> Mane a bibi tasa ei goli a inigogona mina vileluena viepiluna kinaka, io o no toebilelesi a damutatalana minei. Me mane o goli maido matasa ue maluanai, moni ei ma longemuli ete a inade, de oo no litase ei, mo lametase vuse ei.

<sup>11</sup> Oo muada, a matana bibi maido ei iavetasesi a vea bilesi, ei palea a bibi na gunolina sinusu me a sinusu minei oto ei vavasasi ane ei.

*Mapulina inade mine Pol usino ne Taitus*

<sup>12</sup> Ilala eau peltase Atemas ue Tikikus usino minio, de oo no asu asi usinani na aubu Nikopolis, vuna eau maiademuli na muigu na aubu odo na ilala na maigina ma avivili sagali.

<sup>13</sup> Oo no iteale kube Apolos me Senas ei a bibi na muadana binea. O no buloi e sulu a golugolu mina inasuna, me ne sulu ma boto oto a golu tasa na malada su asu na vea.

<sup>14</sup> Eitou a vanunua ma tavivine mine Salemo neitou guale a inigogona doana mina buloine sou a vanunua ma tavivine sou boto a golugolu, dae ne eitou kristen ugu sabubu me eitou ma ogomuli ete a inigogona mine Salemo.

<sup>15</sup> Vanunua ma tavivine vuso sou eili pilu eau sou masosove a oaso buo usino minio. Mo no maliu a oaso buo li usino ne sou so silimuli e Iesu me so kale amiteu. Dinodo mine Salemo ei ino pilu e amutou vuso.

## Pilemon Laulau Pol ei niage usino ne Pilemon

### *Pol ei vei oaso doana usino ne Pilemon*

<sup>1</sup> Eau e Pol, eau eili na luma na tunuui ane Krai Iesu. Eau pilu e tamaine eitou e Timoti, amilu niage a laulau ieli usino ne oo e Pilemon, oo tamaine amiteu sele ma pipigona minio tasa moni pilu e amiteu.

<sup>2</sup> Amilu niage a laulau ieli usino ne latavinene amiteu e Apia tamai, me Akipus ei a bibi na maubina mine Salemo tomane amilu. Me amilu niage tamai usino na viepiluna kinaka sou viepilupilu na luma minio.

<sup>3</sup> Eau kake Salemo Tamane eitou pilu e Bibi Taula Iesu Krai, ne sulu dode amutou me ne su toemea a lilone amutou.

### *Inigogona kubaana mine Pilemon i toe Pol i mongemonge*

<sup>4</sup> Na maladalada vuso eau kakake Salemo minau, eau damutaletale oo mea toledadangi e Salemo,

<sup>5</sup> vuna eau longe maido, oo iteale sele a vanunua ma tavivine mine Salemo me oo silimuli sele Bibi Taula Iesu.

<sup>6</sup> Oo silimuli e Iesu Krai me oo maitamaina pilu e amiteu, mea kake Salemo ei ni toe eitou neitou muada sele a golugolu vuso i kubaana Krai ei bilii e eitou me neitou maisobula i.

<sup>7</sup> Io, tamaigu sele, oo kale sele a vanunua ma tavivine mine Salemo, me na inigogona ieli oo toemea a lilone sou, me ielili toe mongemonge sele eau me toemea a lilogu tamai.

### *Pol tagi e Pilemon ni toeiiti Onesimus tomane tamaina sele*

<sup>8</sup> Golu tasa eau kale o no goli i mapigogoi eau na vei sagali le oo na aisane Krai,

<sup>9</sup> moni eau kale na vei kekeke le oo na inigogona mina kinalena. Eau e Pol, eau bibi buosi, na pipigona mine Krai ieli, seidei eau ugu na luma na tunuui tamai,

<sup>10</sup> eau kale na tagi e oo no toeiiti e natugu e Onesimus. Onesimus ei asuale eau na malada eau ugu na luma na tunuui, me eau buloi e ei ni silimuli e Krai. Maidolo me ei paleasi e natugu ivu lilo ne Krai.

<sup>11</sup> Lisa ei ma pipigo iiti oto ane oo, moni seidei ei paleasi a bibi ei mapigogoi ni goli a pipigona kubaana ane eita pilu.

<sup>12</sup> Seidei eau peltase ei ni veteliu usino minio, ma lilogu i asu pilu e ei.

<sup>13</sup> Eau kale na lapitole ei ni pilu e eau, me ei ni puisobe a mui ne oo ni buloi e eau na ilala eau eili na luma na tunuui

mina pipigona veipalena malongolongona kubaana.

<sup>14</sup> Moni mane oo ma longo pala muga oto i ie, eau na ma goli ete a golu tasa. Eau damutale, mane o goli a inigogona i kubaana mina buloine eau, io kubaana oo no goli na masagana minio oto.

<sup>15</sup> Patotona, Onesimus ei veletase sape o. Moni nane a golu odo i palea, mo no gualeliu lei e ei mei ni ugu pilu e oo taliulu.

<sup>16</sup> Seidei o no ma damu oto i ei a bibi na pipigona sabubu moni. Boa. Patotona, lisa ei a bibi na pipigona sabubu minio, moni seidei ei palea tamaimu sele. Me eau oto eau ite ei tomane tamaigu sele. Eau muada i, o no kale mamai sele ei me o no kale a pipigona tamai ei goli. Me lilo ne Krai o no ite ei tomane ei tamaimu sele.

<sup>17</sup> Maidolo mane oo damutale eau e tamaimu sele, io o no mongeale ei usinani na inigogona tasa moni tomane o mongeale eau.

<sup>18</sup> Mane ei goli a inigogona pagu sanii usino minio ue mane ei isa a ginau tasa ne oo, io o no tau a aisagu na ginau minei iedo.

<sup>19</sup> Eau e Pol, na limagu oto eau niage a inade ie. Eau oto eau na adevuse a ginau iede. Oo tamai oo gau minau, ei a ginau na maulina minio oto. Moni eau ma kale ete na ade a golu iede.

<sup>20</sup> Tamaigu, longe. Na aisane Bibi Taula eau kale o no goli a golu kubaana ieli ane eau. Eitau eili a bibi mine Krai, maidolo na inigogona li o no toe iiti a lilogu.

<sup>21</sup> Eau muada kuba i maido, oo no ogo-muli a inadegu ie, maidolo me eau niage a laulau ieli usino minio. Eau muada, inigogona o no goli le Onesimus, ei ni seleuli sele a inigogona seidei eau tagi e oo no goli.

<sup>22</sup> Eau isa a inade tasa lou. Eau silimuli maido Salemo ei ni longe a kinaka mine amutou, me ei ni peltase liu e eau usino ne amutou. Maidolo mo no masusulu a vilu tasa eau na ngolo i.

### *Punuluna ade munongena*

<sup>23</sup> Epafra ei sove a oaso doana usino ne oo. Ei tamai eili pilu e eau na luma na tunuui mina aisane Krai Iesu.

<sup>24</sup> Tamtamaigu mina pipigona minau, e Mak, Aristakus, Demas me Luk, sou tamai sou sove a oaso doana usino ne oo.

<sup>25</sup> Dinodo mine Bibi Taula Iesu Krai ei ni pilu a nunune amutou.

## Hibru Laulau usino ne sou e Hibru

### *Nature Salemo ei bilii e eitou a inade*

<sup>1</sup> Lisa Salemo ei vei le eisuusne eitou mapapaina na asene sou a profet na matamatana vea seasea.

<sup>2</sup> Moni ilala na punuluna malada ie Salemo ei ademuada ane eitou na asene Natuna. Salemo ei matoalesi e Natuna mina gualena golugolu vuso. Me na limane ei Salemo ei mapale a magamaga ma langi tamai.

<sup>3</sup> Natuna do ei a muada mina malasana buo mine Salemo, mei tomane moni e Salemo oto. Inade mine ei isa a sagagalina, me na inadena do ei iteale a golugolu vuso ni muina kuba. Ei mapuliosi a pipigona mina taulelena sinusu mine sou a vanunua ma tavivine vuso ne sou palea alaba, seido ei ugu na lima gata mine Salemo, ei a Munugana Mapana ei ino oata oto sele.

### *Nature Salemo ei vululusi e sou a bineanea*

<sup>4</sup> Salemo, Tamana ei toe e Natuna ei palea buo mamau lou ane sou a bineanea, tomane moni ei bilii e ei a aisa i buo mamau lou ana aisane sou.

<sup>5</sup> Salemo ei vei ane Natuna maido, "Oo e Natugu.

Seidei eau paleasi e tamamu."\*  
Me ei vei lou maido,

"Eau na muigu e tamane ei,  
me ei ni muina e natugu."†

Moni sei ilala Salemo ei vei a matana inade maido usino ne sei bineanea minei? Boa vuso sele.

<sup>6</sup> Moni ilala ei peltase Natuna matalagu usinani na magamaga, Salemo ei vei maido, "Bineanea vuso mine Salemo ne sou masalalai e ei."‡

<sup>7</sup> Salemo i damutale sou a bineanea me ei vei maido,

"Salemo toe e sou a bineanea minei a avivili, me ei toe e sou a vanunua na pipigona minei a niluluna oavi."§

<sup>8</sup> Moni ei ade e Natuna maido, "Salemo, o no muimu a mapana taliuliu taliuliu.

Oo iteale a vanunua ma tavivine vuso minio na inigogona i bilesi moni.

<sup>9</sup> O kalekale moni a inigogona bilesi, me oo ma kale sape ete a inigogona pagu.

Maido me Salemo minio oto ei singi a wel mina munongena muata ne oo,

na inigogona iedo ei maite maido oo a mapana, me oo vululusi e tamamaimu vuso."\*

<sup>10</sup> Laulau mine Salemo ei vei lou maido, "Bibi Taula, sinokona o mapale a magamaga ieli me ei muina sagali.

Me na limamu oto o mapale a langi tamai.

<sup>11</sup> Ne sou buale vuso, moni oo no muimu taliuliu.

Ne sou masisinge tomane a kinainai mumugu.

<sup>12</sup> Me oo no vilitatai e sou tomane a malo, me ne sou sauvuvule tomane a kinainai.

Moni oo no muimu moni simaido taliuliu taliuliu.

Ma ilala minio ei ma mapigogoi ete ni pulu."†

<sup>13</sup> Salemo ei vei le Natuna maido,

"Oo ugu na limagu e gata mapigogoi eau na tau e sou a butu minio  
ne sou matano moni ne oo."‡

Moni sei ilala Salemo ei vei a matana inade maidolo usino ne sei bineanea minei? Boa vuso sele.

<sup>14</sup> Sou a bineanea sou a nunu, me sou goligoli a pipigona mine Salemo. Salemo ei peltatase sou usino mina buloine sou a vanunua ma tavivine ei kale ni gualeliu.

## 2

### *Salemo ei gualeliu e eitou, ei a golu tasa buo sele*

<sup>1</sup> Maido ma inade eitou longesi, iedo neitou lapitole obi sele me neitou ogomuli iiti, dae ne eitou patileletase.

<sup>2</sup> Lisa Salemo i bilii a inade usino ne sou e eisuusne eitou na asene sou a bineanea, ma inade do ei mavaa. Maido ma vanunua vuso sou seuti a inade dolo me sou longetase sabubi, sou gualesi a mapa pagu mapigogoi a inigogona sou goli.

<sup>3</sup> Moni seidei Salemo ei gualeliu e eitou, ma pipigona minei iodo ei a golu tasa i buo sele. Maido me mane eitou lametase a pipigona mine Salemo iedo, neitou oava me neitou asuleletase a mapa mina sinusu matina? Eitou ma mapigogoi ete. Palapala Bibi Taula oto ei ademuada a inade mina gualeliune eitou. Ma vanunua sou longe a inade ie, sou vei le eitou maido, "A inade do ei patotona sele."

<sup>4</sup> Me Salemo tamai i goli a matamatana gona sinaga ma matamatana matalala, me ei soebule a niabi mina Maolona Nunu

\* 1:5 Laulau na Inala 2:7 † 1:5 2 Samuel 7:14 ‡ 1:6 Binea 32:43 § 1:7 Laulau na Inala 104:4 \* 1:9 Laulau na Inala 45:6-7 † 1:12 Laulau na Inala 102:25-27 ‡ 1:13 Laulau na Inala 110:1

usino ne sou a vanunua ma tavivine mapigogoi a masagana minei oto, me na inigogona li ei maite i maido a inade mine Natuna, ei moliana vuso.

*Iesu ei a bibi pala mina gualeliune eitou*

<sup>5</sup> Eitou muada maido a magamaga alaba ei ni palea mulimuli, iede Salemo ei ma tau ete sou a bineanea ne sou iteale. Boa.

<sup>6</sup> Na avena tasa mina Laulau mine Salemo a bibi tasa ei vei maido,

“Amiteu a vanunua amiteu a sei golu, me Salemo, oo damutaletale amiteu?

Amiteu a golu sabubu moni. Vuna i matina o iteale kube amiteu?

<sup>7</sup> O mapale amiteu me mina ilala boto moni o tau e amiteu matano moni ne sou a bineanea mine Salemo.

O beilange amiteu mo bilii e amiteu a malasana buo ma aisa buo.

<sup>8</sup> O vileale amiteu mina niitealena gologu vuso o mapale. Oo tau a gologu vuso matano ne amiteu.”\*

Inade mine Salemo ieli, ei tau a gologulu vuso matano ne ei, mei ma itetase ete a golu tasa i muina sabubu mei ma ino oto matano ne ei. Boa. Moni saboa eitou ite a gologulu vuso ei ino matano ne ei.

<sup>9</sup> Moni eitou ite maido, lisa na ilala boto moni e Iesu ei muina matano ne sou a bineanea mine Salemo. Na dinodo mine Salemo, Iesu ei guale a muine sou a vanunua ma tavivine mei tabule a davutina buo mei mate, maido me Salemo ei beilange ei mei bilii a malasana buo ma aisa buo sele.

<sup>10</sup> Salemo ei a vuna gologulu vuso me ei mapale a gologulu vuso, ne sou toe monge-monge e ei. Me ei kale ni maasi e natatune ei makuba usino na niitealalena mine Salemo me ne sou malu kuba sele. Salemo ei kale Iesu ni mailisi a pipigona mina gualeliune sou a vanunua ma tavivine, maidolo me ei itetase Iesu ei tabule a davutina, me na davutina do ei toe Iesu ei palea a munugana bibi ivu mina gualeliune sou a vanunua ma tavivine. Inigogona Salemo ei goli ieli ei bilesi ivu.

<sup>11</sup> A bibi mina tinoena vanunua ma tavivine vuso ne sou palea maolo, ma vanunua ma tavivine vuso ei toe e sou palea maolo do, sou vuso do tamane sou tasa moni. Maidolo me Iesu ei tole sou e tametatasina mei ma maela oto a vinatene sou maido.

<sup>12</sup> Ei vei maido,  
“Eau na veipale a aisamu usino ne sou e tatasigu,  
ilala sou viepilu a kinaka eau na ale a inala na masalai a aisamu balivua ne sou.”†

<sup>13</sup> Mei vei lou,

“Eau na silimuli moni e Salemo”‡ me

“Oite, eau eili pilu e selebanini Salemo ei bilii e eau.”§

*Iesu ei palea a bibi na gualeliune eitou*

<sup>14</sup> Selebanini odo, sou isa a maini ma daladala. Maidolo me Iesu tamai ei palea a bibi tomane sou, ne ei ni mate, me na minate do ei toegegegi vuse e Satan i simitole a sagagalina mina minate.

<sup>15</sup> Vanunua ma tavivine vuso sou laelae a minate, ma ilala vuso sou malu na magamaga, nilae mine sou odo ei toe sou a vanunua na pipigona sabubu mine Satan. Moni e Iesu ei mate ni toe e sou malamala na mavaana odo.

<sup>16</sup> Patotona sele, Iesu ei ma goli ete a pipigona do mina buloine sou a bineanea mine Salemo. Boa. Ei goli ieli mina buloine sou a abuna tubutubune Abraham.

<sup>17</sup> Maido me na gologulu vuso ei ni palea tasa moni ivu tomane tatasine ei, me ei mapigogoi ni muina a mapana prist mine sou me ei ni goli a pipigona mine Salemo. Ei palea a mapana prist mina lilomulina, me ei ogomulimuli a inadenade vuso mine Salemo me ei goli a pipigona minei, ei a pipigona mina taulelena sinusu mine sou a vanunua ma tavivine.

<sup>18</sup> Ma tinovo palea le ei me ei oto ei tabule a davutina. Maido me ei mapigogoi ni buloi e sou a vanunua ma tavivine na ilala a tinovo palea le sou.

### 3

*Iesu ei buo ane Moses*

<sup>1</sup> Maolona Tamtamaigu, Salemo ei ino na langi i toleale amutou tamai muata na langi. Maido me namutou damutatala iiti e Iesu odo, ei a Aposel mine eitou ma Mapana Prist eitou silimulimuli e ei me eitou veipalele a aisane ei.

<sup>2</sup> Ei tosesesele a pipigona Salemo ei bilii e ei tomane Moses ei pipigo sagali na luma mine Salemo.

<sup>3</sup> Moni malasana buo mine Iesu ei buo ane Moses, tomane a bibi na tingenina luma ei isa a aisa buo i vululusi a luma oto do.

<sup>4</sup> Luma vuso tastasa ei isa a bibi ei tige, moni e Salemo ei mapale a gologulu vuso.

<sup>5</sup> Moses ei tosesesele tomane a bibi na pipigona lilonaluma vuso mine Salemo, me ei isa pipigona mina ademuadana a gologulu vuso mulimuli Salemo ei ni ademuada i ane ei.

<sup>6</sup> Moni e Kraisi ei e Natune Salemo, me ei tosesesele a pipigona mina itealena luma mine Salemo. Mane eitou lapitole obi a

\* 2:8 Laulau na Inala 8:4-6

† 2:12 Laulau na Inala 22:22

‡ 2:13 Aisaia 8:17

§ 2:13 Aisaia 8:18

silimulina me magitali a sava ni palea, eitou a luma mine Salemo.

*Vanunua mina saukikina inade sou ma mapigogoi ete ne sou guale a manoana*

<sup>7</sup> Maidolo ma Maolona Nunu ei ade maido,

“Seidei mane amutou longe a baligolune ei,

<sup>8</sup> io namutou ma tabesobesobe lei a lilone amutou,

tomane lisa eisuusune amutou sou saukiki a inadegu

na ilala do sou malu na avena vanunua boa.

<sup>9</sup> Me sou ite a pipigona vuso eau goli mapigogoi a avala savulu iva.

Moni sou tovetove eau na matamatana inigogona.

<sup>10</sup> Maidolo me eau lilosinoa sele ane sou a abuna vanunua ma tavivine do,

me eau vei, ‘Ilala taliuliu lilone sou maisabasaba,

me sou ma muada oto a vea eau vileale le sou.’

<sup>11</sup> Maidolo me eau lilosinoa mea ade sagali ane sou maido,

‘Ivu uata, sou ma mapigogoi ete ne sou gali ulilo mina manoana minau.’<sup>\*,\*</sup>

<sup>12</sup> Tamtamaigu, amutou ulago kuba, dae ne tamaine amutou tasa ei isa a damutata-lana pagu lilo na lilone ei mei litase a silimulina mei lametase Salemo ei mauili.

<sup>13</sup> Moni maladalada vuso eitou vate “seidei,” amutou tastasa namutou bilii a inade doana usino ne sou a vanunua ma tavivine mine Salemo, dae a inigogona mina sinusu ni auala ane tasa mine amutou mei ni tabesobe sagali a lilone ei.

<sup>14</sup> Ilala eitou soke a silimuline Salemo, eitou silimuli sagali sele. Me neitou goli a silimulina mine eitou ni muina sagali asu mapigogoi a ilala na punuluna. Mane eitou goli maido, io eitou eili maitamaina ivu mine Krais.

<sup>15</sup> Eitou muada, inade li saboa ino, “Seidei mane amutou longe a baligolune ei,

de namutou ma tabesobesobe lei a bu-une amutou,

tomane eisuusune amutou sou lametase eau taliuliu lisa.”<sup>†</sup>

<sup>16</sup> Sei sou lisa sou longe a baligolune Salemo, me sou toevautauta me sou saukiki a inade minei? Ede a vanunua ma tavivine vuso Moses ei maasilele e sou maino ne Isip.

<sup>17</sup> Me Salemo ei sinoa ane sei sou mapigogoi a avala savulu iva? Ei sinoa ane sou a vanunua ma tavivine sou goli a sinusu, me sou mate, ma aitolane sou ino na avena vanunua boa. Ei sinoa ane sou a abuna moni iodo.

<sup>18</sup> Ne sei sou Salemo ei vei ivu uata ve sou ma mapigogoi ete ne sou gali ulilo na aubu mina manoana minei? Ede sou a abuna vanunua ma tavivine sou saukikiki a inade minei.

<sup>19</sup> Maido me eitou muada, vanunua ma tavivine do sou ma mapigogoi ete ne sou gali ulilo na aubu mina manoana, vuna sou ma silimuli ete e Salemo.

## 4

*Vanunua ma tavivine mine Salemo ne sou guale a manoana*

<sup>1</sup> Salemo ei adegatuna ni maasi e eitou tamai ulilo na manoana. Maidolo me neitou lae, dae ne Salemo ite a bibi tasa mine amutou ei ma mapigogoi ete ni gali ulilo na manoana odo.

<sup>2</sup> Eitou longesi a malongolongona kubaana, tomane lisa sou e Israel sou longe. Moni sou ma silimuli ete a inade mine Salemo, maidolo ma malongolongona kubaana sou longe do, ei ma buloi ete sou.

<sup>3</sup> Moni eitou a vanunua ma tavivine eitou silimuli e Salemo, ei ni longo moni ane eitou neitou gali ulilo na aubu mina manoana minei. Lisa Salemo ei damutale a aubu iodo mei vei simaido,

“Maidolo me eau sinoa me eau vei le sou maido,

‘Ivu uata, sou ma mapigogoi ete ne sou gali ulilo na aubu mina manoana minau.’<sup>\*,\*</sup>

Ivu, na ilala Salemo ei mapale a magamaga, ei mapalipali a pipigona vuso minei. Maido me soke na ilala do a manoana ei eliosii.

<sup>4</sup> Na avena inade tasa na Laulau mine Salemo, ei vei na malada padiluanai odo maido, “Na malada padilua Salemo ei mapuliosii a pipigona vuso minei, me ei manoa na malada iedo.”<sup>†</sup>

<sup>5</sup> Na avena inade do ei vei lou maido, “Sou ma mapigogoi ete ne sou gali ulilo na aubu mina manoana minau.”

<sup>6</sup> Ieli ei maite e eitou maido, manoana mine Salemo ie ei saboa ino, ma vanunua ma tavivine sanii sou mapigogoi ne sou gali ulilo ne ei. Moni sou a abuna do lisa sou longe a malongolongona kubaana, moni sou saukiki a inade minei, me sou ma mapigogoi ete ne sou gali ulilo na manoana.

<sup>7</sup> Moni mulimuli avala makuba ei pulosi, Salemo ei vileale a malada tasa sea, me ei tole a malada do ei “Seidei” na asene Devit, tomane eitou adesi i,

“Seidei mane amutou longe a baligolune ei, io namutou ma tabesobesobe lei a lilone amutou.”<sup>‡</sup>

\* 3:11 Laulau na Inala 95:7-11 † 3:15 Laulau na Inala 95:7-8

\* 4:3 Laulau na Inala 95:11 † 4:4 Sinokona 2:2

‡ 4:7 Laulau na Inala 95:7-8

<sup>8</sup> Mane lisa Iosua ei bilii e sou a manoana, io mulimuli Salemo ei ni ma vei ete a malada tasa sea.

<sup>9</sup> Maidolo me eitou muada, a manoana ei saboa ino ane sou a vanunua ma tavivine mine Salemo.

<sup>10</sup> Ma bibi ei gali ulilo na aubu mina manoana mine Salemo, ei mapalpali a pipigona minei me ei manoa, tomane moni lisa Salemo ei mapalpali a pipigona minei oto me ei manoa.

<sup>11</sup> De neitou pipigo sagali mina ginali ulilo na aubu mina manoana iedo. Dae a bibi tasa ei ni ogomuli a vea mina saukikina inade do tomane lisa sou goli, mei ni bosa mei ni buale.

<sup>12</sup> Inade mine Salemo ei isa a maulina, me ei pipigo sagali. Ei binaso mamau lou ana viso ei isa a binasona lua. Inade ieli ei iububi a bibi me ei gali ulilo oto sele. Ei asu palea bilesi na buune eitou ma nunune eitou, me na avena masoosona dolo ma augu mavona ma tuatua sou maidama pilu. Maido me ei muada kuba iiti a damutatalana vuso ma masagana mina lilone eitou.

<sup>13</sup> A golu tasa boa Salemo ei mapale, ei mapigogoi ni ovu na lagune Salemo. Boa vuso sele. Golugolu vuso ei peo vuso me ei muina na avena muada sele na matane Salemo. Me Salemo oto ei ni vilemuliale a inigogona vuso eitou goli.

*Iesu ei a mapana prist ei magili balivua mine eitou*

<sup>14</sup> Moni eitou isa a mapana prist buo, ei asu uata na langi, iede e Iesu, Natune Salemo. Maidolo me neitou lapitole obi a silimulina eitou veipalele i iedo.

<sup>15</sup> A mapana prist mine eitou odo ei muada e eitou ma sagali oto, me ei mapi-gogoi ni lilomuli e eitou. Tinovo vuso ei palea le eitou, sou vuso do ei paleasi ne ei mina tinovene ei tamai, moni ei ma goli ete a sinusu.

<sup>16</sup> Maidolo me neitou taliuliu asu pilu a damutatalana sagali me topatuliale ni-ugugu na dinodo mine Salemo. Ei ni dode eitou. Mane eitou isa a mavaana, io ei ni buloi e eitou.

## 5

<sup>1</sup> Salemo ei vileale a mapana prist vuso. Ei guale a bibi tasa mei tau a bibi iedo mina pipigona minei mina buloina vanunua ma tavivine. Mapana prist ei isa a pipigona mina biliina matamatana niabi usino ne Salemo me mina taulelena sinusu.

<sup>2</sup> Moni ei tamai ma sagali oto tomane sou a vanunua ma tavivine, maido me ei mapi-gogoi ni lilomea ane sou a vanunua sou ma

isa oto a muadana me sou a vanunua sou asutase a vea mine Salemo.

<sup>3</sup> Maido me ei ni bilii a niabi mina taulelena sinusu minei oto pilu a niabi vuso mina taulelena sinusu mine sou a vanunua ma tavivine.

<sup>4</sup> Bibi tasa boa ei ni guale a pipigona do na masagana minei oto. Salemo ei vileale ei mina pipigona do tomane lisa Salemo ei vileale Aron.

<sup>5</sup> Me Kraisi tamai ei simaido. Ei ma beilange ete a aisane ei oto me ei palea a mapana prist. Boa. Salemo oto ei vileale ei mina gunolina pipigona do. Salemo ei vei lei maido,

“Oo Natugu,

seidei eau palea Tamamu.”\*

<sup>6</sup> Me na avena laulau tasa sea tamai Salemo ei vei,

“Oo no muimu a prist taliuliu taliuliu tomane moni a abuna mine Melkisedek.”†

<sup>7</sup> Ilala Iesu mau li ma magamaga, ei muada i ei ni mate, maido me ei lilomavaa mei tangi mamau mei kaka sagali usino ne Salemo ei mapigogoi ni gualeliu e ei na minate. Ei tau a masagana minei oto matano moni ne Salemo. De Salemo longemuli a kinaka minei.

<sup>8</sup> Iesu ei e Natune Salemo, moni ei tabule a davutina, me ieli ei matetengi ivu ei oto a inigogona mina ogomulina inade mine Salemo.

<sup>9</sup> Maido me ei palea a bilesina bibi, me ei palea a munugana bibi mina gualeliuna vanunua ma tavivine vuso sou ogomuli a inade minei, ne sou malu kuba taliuliu taliuliu.

<sup>10</sup> Salemo ei vileale ei a mapana prist tomane a abuna mine Melkisedek.

*Neitou ma muimuina oto tomane selebanini*

<sup>11</sup> Amiteu isa a inade papaina ane amutou e Melkisedek. Moni amiteu somiale ei sana sele a matetengine amutou a vuna inade iedo. Vuna a damutatalana mine amutou ei sobo sele.

<sup>12</sup> Ilala ei mapigogoi namutou matetengi vanunua sanii a inade mine Salemo. Moni amutou saboa boto a damutatalana, maido me sou a vanunua sanii ne sou matetengi lei e amutou a sinokona inadenade ivu mine Salemo. Amutou saboa mu masusulu a gualena gona inani ei sagali. Boa. Amutou saboa nana mu sususu.

<sup>13</sup> Mane a bibi tasa saboa ino sususu moni, ede ei a mongomongo. Me ei ma muada kuba oto sei inigogona ei bilesi.

\* 5:5 Laulau na Inala 2:7 † 5:6 Laulau na Inala 110:4

<sup>14</sup> Moni a gona inani ei sagali ei mina vanunua sou buosi. Matana vanunua maido sou muada sei inigogona ei doana me sei inigogona ei pagu, me sou tove mapapainasi a ogomulina inigogona doana. Me seidei sou muada kubasi i, ma damutatalana mine sou ei peo.

## 6

<sup>1</sup> Maidolo me neitou litase a sinokena matetengina, me neitou ma toesuisui lei a inade papaina mina sauvulena lilone eitou, mina inigogona pagu ei maasi eitou usino na minate, me mina silimulina e Salemo,

<sup>2</sup> Me mina matamatana inigogona mina gualena maavuvutuna, me mina tinauna lima muata na vanunua, me mina ilisiliana mina vanunua sou matesi, me mina vavasana i sinuana boa. Neitou ma vaitoletole lei a matana inade vuso maido. Umana. Neitou guale a matamatana matetengina vuso mina vanunua sou buosi.

<sup>3</sup> Mane Salemo ei longo ane eitou maido, io neitou toe simaido.

<sup>4</sup> Vanunua sanii sou gualesi a muada mine Salemo. Sou muadasi a munongena maino na langi. Me sou gualesi a Maolona Nunu.

<sup>5</sup> Sou tovesi a inade mine Salemo, me sou muada a inade dolo ei kubaana sele. Sou somialesi tamai a sagagalina mine Salemo ei ni palea ilala mulimuli.

<sup>6</sup> Io, mane a matana bibi maido ei bosa mei lametase Salemo, a vea tasa lou boa vuso sele ne ei ni veteliu mei sauvule a lilona lou. Boa. Vuna, inigogona ei goli iedo ei tomane ei oto ei gatitole e Natune Salemo na tauvaleuti lou mei oikulikuli ei lou na tauvaleuti, ne sou a vanunua adeptintola ane ei.

<sup>7</sup> Ilala adavu ei pu, magamaga ei oiniale a adavu odo. Mane a magamaga do ei mapale a gona inani doana ane a vanunua ma tavivine sou dani na mauma do, io Salemo ei ni maibalave a magamaga do.

<sup>8</sup> Moni mane a magamaga ei mapale moni a mota oloolo pilu a gulugulu pagu, iede a magamaga pagu. Ma tabaa oto Salemo ei ni ade ane ei ni mamau. Na punuluna, oavi ni aani palipali e sou.

<sup>9</sup> Tamtamaigu ivu, seidei amiteu ade a inade ieli usino ne amutou, moni amiteu muada kuba maido, namutou guale a maibalavana kuba lou. Salemo ei ni buloi e amutou me ei ni gualeliu e amutou.

<sup>10</sup> Salemo ei bilesi moni, me ei ni ma danivuse ete a pipigona doana amutou goli me a kinale amutou maite e ei a buloina e sou a vanunua ma tavivine minei, me amutou saboa nana mu goligoli maido.

<sup>11</sup> Me amiteu kale mamai ne amutou vuso namutou pipigo sagali moni simaido, me mu lapitole obi a silimulina mine amutou, me mu magitali sagali a adegatuna minei mina toekubene eitou asu pea na punuluna malada.

<sup>12</sup> Amutou ma balebale lou. Namutou ogomuli a inigogona mine sou a vanunua sou silimuli sele me sou magili sagali, me sou guale a golugolu vuso lisa Salemo ei adegatuna i ni bilii e natatune ei.

*Neitou silimuli sagali a adegatuna mine Salemo*

<sup>13</sup> Ilala Salemo ei bilii a adegatuna usino ne Abraham, a bibi tasa boa ei vululusi e Salemo, i mapigogoi ne Salemo ni vei ivu uata na aisane ei, maido me Salemo ei vei ivu uata na aisane ei oto maido,

<sup>14</sup> "Eau vei ivu sele, eau na maibalave sele oo, me eau na bilii e oo e tubutubumu makuba sele."\*

<sup>15</sup> Me Abraham ei magitali moni me ei ma bale oto, me mulimuli ei guale a golugolu vuso Salemo ei adegatuna i ni bilii e ei.

<sup>16</sup> A vanunua sou vei ivu uata na aisana bibi tasa ei vululusi e sou. Mane a bibi tasa ei vei ivu uata, ieli i masagali a inade minei me ei avisobe a asene sou a vanunua sou kale ne sou taipui a inade minei.

<sup>17</sup> Salemo ei goli a adegatuna usino ne sou a vanunua ma tavivine. Me ei kale ni maite sou iiti sele maido, ei ma mapigogoi ete ni sauvule a damutatalana minei, maidolo me ei vei ivu uata mina masagalina inade mine ei oto.

<sup>18</sup> Salemo ei vei ivu uata mei adegatuna, me Salemo ei ma mapigogoi sele ete ni auale mei ma mapigogoi ete ni sauvule a inade minei. Maidolo me neitou veleale Salemo, neitou damutale a adegatuna mine Salemo iedo me neitou toesagali sele a lilone eitou na magitalina golugolu vuso Salemo ei adegatuna i ni bilii e eitou.

<sup>19</sup> Golu e Salemo ei vei le eitou neitou magitali, iede ei tomane a augugu doana sagali mina maulina mine eitou. Augugu odo ei magali sele eitou ulilo na vilo maolo sele mamuli na malo buo.

<sup>20</sup> Tesu ei gali pala ane eitou ulilo na vilo iedo mina buloine eitou, me ei muina a mapana prist taliuliu taliuliu tomane a abuna mine Melkisedek.

## 7

*Melkisedek ei a bibi ei isa a aisa buo sele*

<sup>1</sup> Melkisedek iedo ei a mapana mine Salem, me ei a prist mine Salemo oata oto sele. Ilala Abraham ei maubi mei valipute sou a mapana me mulimuli ei asu liu usino

\* 6:14 Sinokona 22:17



na aubu, Melkisedek i poge ei na vea mei maibalave ei.

<sup>2</sup> Me Abraham ei bilii e Melkisedek tasa mina maduna savulu tasa mina golugolu vuso ei guale na maubina do. Malibu-una aisa Melkisedek ei a mapana mina inigogona bilesi, me ei a mapana mine Salem tamai, malibuuna ie a mapana mina lomeana.

<sup>3</sup> Melkisedek ei ma isa oto e tamana me tinana, me ei ma isa oto a abune eisuusne ei. Malada mine tinana i maalepose ei boa, me ei ma isa oto a malada ei mate. Ei muina tasa moni tomane Natune Salemo. Ei muina a prist taliuliu taliuliu.

<sup>4</sup> Namutou damutale e Melkisedek ie, ei isa a aisa buo sele. Munugane tubune eitou, Abraham, ei guale a golugolu vuso doadoana ei guale na maubina, me ei soe-bule na maduna savulu tasa, mei bilii a maduna tasa usino ne Melkisedek.

<sup>5</sup> Sou a abune natatune Livai sou lapitole-tole a pipigona mina prist. Ma binea ei vei maido, sou e Israel ne sou bilii e sou Livai a maduna tasa mina golugolu vuso mine sou. Sou e Israel sou tatasine sou e Livai, me sou tamai sou e natatune Abraham. Moni sou e Israel sou guale a maduna golu tasa mine sou, me sou bilii e tatasine sou odo.

<sup>6</sup> Melkisedek ei ma maino oto na abuna mine sou e Livai. Moni ei guale a maduna tasa mina golugolu mine Abraham. Me Melkisedek ei bilii a maibalavana na bibi ie, a adegatuna mine Salemo ino ne ei.

<sup>7</sup> Eitou muada iiti i maido, bibi ei bilii a maibalavana usino, ei buo lou ana bibi ei guale a maibalavana maino.

<sup>8</sup> Sou e Livai sou gualeale a maduna tasa mina golugolu mine sou e Israel, sou a vanunua ne sou mate. Moni e Melkisedek, a bibi iede ei guale a maduna tasa mina golugolu mine Abraham, a Laulau mine Salemo ei niage ei mauili taliuliu.

<sup>9</sup> Maido me eitou mapigogoi neitou vei maido, ne Abraham moni, Livai sou tamai so bilii a maduna tasa mina maduna savulu tasa mina golugolu usino ne Melkisedek,

<sup>10</sup> vuna ilala Melkisedek i poge Abraham, sou e Livai sou ino na mainine tubune ei, Abraham.

*Mapana prist alaba ei vululusi sele sou a prist lisa*

<sup>11</sup> Lisa vanunua ma tavivine mine Israel sou guale a binea na pipigona mina prist mine sou e Livai. Moni mane a pipigona mina prist mine sou e Livai ei mapigogoi ni toe a vanunua ma tavivine ne sou palea bilesi sele na matane Salemo, io posa matina Salemo ei vei na bibi sea ei guale a pipigona mina prist ni palea mulimuli, ei

a matana tasa moni tomane abuna mine Melkisedek, me ei ma tomane ete e Aron?

<sup>12</sup> Na ilala abuna prist sou maiadovuso, io a binea tamai ni sauvule.

<sup>13</sup> A bibi eitou veivei, ei mina abuna sea, me na abuna minei lisa a bibi tasa ei ma goli ete a pipigona mina poso na niabi tomane a prist.

<sup>14</sup> Eitou muadasi i, Bibi Taula mine eitou ei palea maino na abuna mine Iuda. Me Moses ei ma vei ete a inade tasa usino ne sou a vanunua mina abuna do ne sou muina a prist.

<sup>15</sup> Io eitou ite a prist alaba ei palea tomane Melkisedek, me neitou muada kuba i maido,

<sup>16</sup> ei ma ogomuli ete a binea mine eisuusne sou, moni ei palea a prist na vea mina sagagalina mina maulina ei a punuluna boa.

<sup>17</sup> Salemo ei ade sagali ane ei maido, "Oo no muimu a prist taliuliu taliuliu tomane a abuna mine Melkisedek."\*

<sup>18</sup> Salemo ei taulelesi a binea lisa, vuna a binea iedo ei ma isa oto a sagalina me ei ma mapigogoi ete ni buloi e eitou.

<sup>19</sup> A binea ei ma mapigogoi ete ni toe a golu tasa i palea bilesi. Maido me Salemo ei peosi a vea tasa sea ei doana lou me ei vululusi a binea, me na vea iedo eitou mapigogoi neitou asu agavuale e Salemo.

<sup>20</sup> Me tamai, ilala Salemo ei tau e Iesu ei palea a prist, ei vei ivu me ei vileale e ei. Moni Salemo ma goli ete usino ne sou a prist mine sou e Livai maido.

<sup>21</sup> Salemo oto ei vei ivu uata, me Iesu ei palea a prist. A Laulau mine Salemo ei vei maido,

"Bibi Taula ei veiosi ivu uata, me ei ma mapigogoi ete ni sauvule a inade minei.

'O no muimu a prist taliuliu taliuliu.' †<sup>22</sup> Maidolo me eitou muada, a magilipiluna e Iesu ei goli iedo, ei doana lou me ei vululusi a magilipiluna lisa.

<sup>23</sup> Lisa prist i makuba, vuna sou mamate-mate, maido me sou ma mapigogoi ete ne sou muine sou a prist taliuliu.

<sup>24</sup> Moni e Iesu ei muina taliuliu taliuliu, me ei lapitole a pipigona mina prist taliuliu, ma adevusene ei i boa.

<sup>25</sup> Maido me ei mapigogoi sele ni gualeliu a vanunua ma tavivine vuso sou asu agavualale Salemo na aisane ei, vuna ei ino mauili taliuliu taliuliu mei kakake Salemo mina buloine sou.

<sup>26</sup> Matana mapana prist maido ei mapigogoi sele ni buloi e eitou. Ei maolo, me ei ma isa oto a inigogona pagu tasa. Ei ma mumugu oto na matane Salemo. Me

\* 7:17 Laulau na Inala 110:4 † 7:21 Laulau na Inala 110:4

Salemo ei tau ei oata ivu na langi, i bulago sele ana vanunua na sinusu.

<sup>27</sup> Sou a mapana prist lisa sou oababi a niabi palapala mina taulelena sinusu mine sou oto, me mulimuli sou oabi lei a niabi mina taulelena sinusu mine sou a vanunua ma tavivine na maladalada vuso. Moni e Iesu ei ma gologoli ete a pipigona mapapaina simaído. Ei mapuliosi a pipigona vuso minei na niabi matasa moni me ei bilii a maulina minei oto usino ne Salemo.

<sup>28</sup> A binea ei vileale a vanua sou ma sagali vuso oto ne sou palea a mapana prist. Moni a inade patotona mine Salemo ei palea mamuli na binea, ei matoale e Natune Salemo. A mapana prist iedo ei bilesi mei kubaana sele, mei ni muina moni maído taliuluu taliuluu.

## 8

*Iesu ei a mapana prist mine eitou*

<sup>1</sup> Io a inade eitou kale neitou vei, ei maído. Eitou isa a matana mapana prist, ei uguosi na lima gata na Munugana Mapana na langi.

<sup>2</sup> Ei gologoli a pipigona mina prist na luma bale maolo mine Salemo. A luma bale do a vanunua sou ma mamagili ete, Bibi Taula oto ei mamagili.

<sup>3</sup> A mapana prist vuso sou isa a pipigona mina biliina niabi me niabina taulelena sinusu usino ne Salemo. Maído me Iesu a mapana prist tamai ei ni bilii a niabi.

<sup>4</sup> Moni mane ei muina moni na magamaga, ei ni ma mapigogoi ete ni palea a prist. Vuna maído, sou a prist sou inosi me sou biliilii a matamatana niabi usino ne Salemo, tomane a binea ei vei.

<sup>5</sup> Sou lapitole a pipigona a prist na luma bale maolo mine Salemo na magamaga. Luma bale maolo do ei tomane a nunu ma malivovona moni mina luma mine Salemo ivu ino na langi. Na ilala Moses ei kale ni mamagili a luma bale maolo, Salemo ei vei maído, “Ilala o goli a golugolu vuso mina luma iede, o no ogomuli bilesi a nunune ei eau maite e oo na loena.”\*

<sup>6</sup> Moni seidei Iesu ei gualesi a pipigona mina prist, ma pipigona do ei vululusi sele a pipigona mine sou a prist. Vuna ei muina a balivuana bibi mina toesagalina magilipiluna alaba Salemo ei adegatunasobe ni iabi, ma magilipiluna do ei vululusi sele a magilipiluna lisa.

*A magilipiluna alaba ei vululusi a magilipiluna lisa*

<sup>7</sup> Mane a munugana magilipiluna ei doana sele, io Salemo ei ma goli ete ni mapale a magilipiluna sea lou.

<sup>8</sup> Moni e Salemo ei pogesi a inigogona pagu mina vanunua ma tavivine vuso me ei vei maído,

“Bibi Taula ei vei, ‘Longe. Eau vilealesi a ilala tasa

me eau na goli a magilipiluna alaba pilu e sou a abuna mine Israel me sou a abuna mine Iuda.’

<sup>9</sup> Salemo ei vei lou maído, ‘Magilipiluna do ei ni ma tomane ete a magilipiluna lisa eau goli pilu e sou e eisusune sou na ilala eau maasi e sou maino ne Isip.

Ilala do eau lapitole a limane sou, me eau maasi e sou usino.

Moni sou ma ogomuli ete a inade mina magilipiluna minau, maído me eau e Bibi Taula, eau lametase sou.’

<sup>10</sup> Me Salemo ei vei lou maído, ‘Mulimuli a magilipiluna alaba eau kale na mamagili pilu e sou a abuna mine Israel, ei maído.

Eau na tau a binea vuso minau na damutatalana mine sou,

me eau na niage a inade minau na lilone sou.

Eau na muigu e Salemo mine sou, me sou ne sou muina a vanunua ma tavivine minau.

<sup>11</sup> Na ilala iedo sou ne sou ma matetengi ete a vanua sou malu agavuale ma tatasine sou maído,

“Ne amutou muada e Bibi Taula.”

Vuna sou vuso ne sou muada e eau, golu tasa boa mane sou a vanua sabubu ue sou isa a aisa buo.

<sup>12</sup> Eau na lilotase a sinusu mine sou me eau na ma damutaleliu ete lei a inigogona pagu mine sou.’”†

<sup>13</sup> Salemo ei ade i “A magilipiluna alaba,” na inade ieli ei maite i maído, a munugana magilipiluna ei palea lisasi ni pulu, ei ni muina sapa bisii moni, me ei ni buale vuso.

## 9

*Mapana prist lisa sou oababi a dalane sou a golu vivi*

<sup>1</sup> A munugana magilipiluna do ei isa a binea mina inigogona kinaka ma vilo maolo mina magamaga tamai.

<sup>2</sup> Sou mamagili a luma bale maolo. Lilona munugana vilo a muina lada ma poso pilu a ulalu maolo ino. A vilo do sou vate, “A vilo maolo.”

<sup>3</sup> Me sou oikulikuli a maluana malo buo mamuli na munugana vilo, me mamuli na malo do a vilo tasa lou ino, sou vate “A vilo maolo sele.”

\* 8:5 Gualeliuna 25:40 † 8:12 Ieremaia 31:31-34

<sup>4</sup> A poso mina tinunina kavou mina mapalena muo ei isa a manginana doana, ede sou avisobe a gol, ei ino na vilo do, pilu a maloputu na magilipiluna, sou avisobe a pepepena vuso do a gol moni, me lilo na maloputu odo sou tau a taogo a gol i a manna ino ne ei, ma too mine Aron lisa a uusina ei palea ne ei, pilu a vatu lua Salemo ei niage a magilipiluna ne ei.

<sup>5</sup> A taboboli mina maloputu odo ei a muina taulelena sinusu mine sou a vanunua ma tavivine. Ma puigolo mina bineanea lua mine Salemo sou ino muata na maloputu, ma vevelene sulu sou peo a muina me sou avisobe a maloputu do. Moni seidei eau ma mapigogoi ete na veipale a malibuuna mina golugolu vuso ie.

<sup>6</sup> Sou masusulu a golu vuso simaido, io na malada vuso sou a prist sou galigali ulilo na munugana vilo mina luma bale maolo me sou goli a pipigona mine sou.

<sup>7</sup> Moni a mapana prist ei tasa moni ei gali ulilo na maluana vilo. Ei gali ulilo matasa moni na avala tasa. Me ei mapigogoi ni gali ulilo moni pilu a daladala. Na daladalana iedo i goli a niabi mina taulelena sinusu mine ei oto ma mavaana mina sinusunusu mine sou a vanunua ma tavivine sou ma damutatala kuba oto me sou goli.

<sup>8</sup> Na inigogona ieli Maolona Nunu ei maite eitou maido, ilala a munugana luma bale maolo ei saboa ino, a vea mina ginali ulilo na vilo maolo sele i ma palea muada oto.

<sup>9</sup> A luma bale maolo iedo ei tomane a nunu i maite e eitou a golugolu ei ni palea na ilala seidei ie. Na luma bale maolo do, sou maasi a gona niabi vuso usino ne Salemo, me sou kaka. Moni a golugolu vuso do ei ma mapigogoi ete ni toebilelesi a lilone sou a vanunua sou bilii a matamatana niabi.

<sup>10</sup> A binea vuso do sou maite moni a inigogona mina inani ma niinu ma matamatana inigogona mina loloina. Sou maite a golugolu mina vovo moni. Salemo ei bilii a binea sou odo na vanunua ma tavivine ne sou ogomuli i asu mapigogoi na ilala ei mapale a vea alaba me ei doana lou.

*Krais ei iabitate a dalane ei oto tomane a niabi*

<sup>11</sup> Moni seidei Krais ei asuosi usinani tomane a mapana prist mina golugolu vuso doana i paleasi. Ei galiosu ulilo na luma bale maolo ei doana sele me ei vululusi a luma bale maolo lisa. A bibi ei ma tige ete a luma do a limana, vuna ei a golu mina magamaga boa.

<sup>12</sup> Me Krais ei ma gali oto ulilo na vilo maolo ivu na dalana meme ue mina natuna bulmakau. Boa. Ei gali ulilo na vilo maolo

sele do matasa moni a dalane ei oto mina oliliuale ne eitou taliuliu taliuliu.

<sup>13</sup> Sou gualeale a dalana meme ma bulmakau a togo pilu a kavou maino na natuna bulmakau a tina sou anone vuse na oavi, me sou singi muata na vanunua ma tavivine sou mumugu. Sou goli maido ve ne sou toe a vanunua ma tavivine do palea alaba lou na matane Salemo, me mina matailalene sou so a bilesina vanunua ma tavivine mine Salemo.

<sup>14</sup> Moni a dalane Krais ei vululusi sele iede. Krais ei ma isa oto a sinusu tasa. Me na Maolona Nunu ei ino taliuliu taliuliu, ei bilii a maulina minei oto usino ne Salemo tomane a niabi. Maidolo me ei mapuli a mavaana mina sinusu mine eitou me ei toe eitou alaba sele na matane Salemo. Maidolo me neitou ma ogomulimuli ase a binea i ma isa oto a maulina do, me neitou pipigo ane Salemo ei mauli taliuliu taliuliu.

*Dalane Krais ei toesagali a magilipiluna alaba*

<sup>15</sup> Maidolo me Iesu ei a balivuana bibi mina magilipiluna alaba. Ei matesi mina oliliune sou a vanunua ma tavivine, me mina taulelena sinusu vuso sou goli na ilala munugana magilipiluna ei saboa ino. Maido ma vanunua ma tavivine Salemo ei tole sou e natatuna, sou mapigogoi ne sou guale a maulina i doana taliuliu taliuliu lisa Salemo ei adegatuna ni bilii e sou.

<sup>16</sup> Eitou muada i maido, mane a bibi tasa ei mate, natatuna mapigogoi ne sou guale a golugolu minei tomane ei niage a inadegatuna do na laulau.

<sup>17</sup> Mane a bibi iedo ei matesi, io seidei a inade na magilipiluna ei isa a sagalina. Moni mane a bibi do ei saboa ino mauli, io a inade ei niage na laulau ei muina sabubu.

<sup>18</sup> Na vuna moni ieli, sou masagali a munugana magilipiluna a dalana golu vivi.

<sup>19</sup> Palapala, Moses ei ademuada a binea vuso usino na vanunua ma tavivine, me mulimuli ei guale a daladalana natuna bulmakau ma meme pilu a nanu. Me ei guale a lalana obu a hisop pilu a aivuvuna sipsip i kasoso. Mei tivi a daladala bisii usino muata na laulau mina binea ma vanunua ma tavivine vuso.

<sup>20</sup> Mei vei maido, "Telili ei a daladala mina magilipiluna e Salemo ei vei le amutou ne amutou ogomuli."\*

<sup>21</sup> Me na inigogona tasa moni Moses ei tivi a daladala usino na luma bale maolo ma taogo vuso mina kinaka.

<sup>22</sup> A binea ei vei maido, a daladala moni ei toe a golugolu vuso bisii moni ni palea alaba. Mane sou ma singi ete a daladala, io

\* 9:20 Gualeliuna 24:8

Salemo ei ni ma taulele ete a sinusu mina vanunua ma tavivine.

*Krais ei iabitase ei oto mina taulelena sinusu*

<sup>23</sup> Golugolu mina luma bale maolo iedo, sou a nunu moni mina golugolu na langi. Me na vea li golugolu vuso odo palea alaba na matane Salemo. Moni mina tinoena golu ivu na langi ni palea maolo, ei ni isa a niabi i doana sele me ei vululusi a niabi vuso mina golu vivi.

<sup>24</sup> Krais ei ma gali oto ulilo na luma maolo a vanunua sou tige a limane sou, ei a nunu moni mina luma maolo ivu mine Salemo. Ei gali ulilo na langi bilesi. Me seidei ei ino agavuale sele Salemo, me ei pipigo a buloine eitou.

<sup>25</sup> Na avalavala vuso a mapana prist ei guale a dalana niabi, me ei gali ulilo na vilo maolo ivu. Moni Iesu ei ma muli ete a biliine ei oto usino ne Salemo mapapaina.

<sup>26</sup> Mane ei ni muli lei mapapaina, io ei ni tabule a davutina mapapaina tamai, soke na ilala Salemo ei mapale a magamaga asu mapigogoi seidei. Moni boa. Seidei, na ilala ei agavuale a punuluna malada, Krais ei palea na magamaga matasa moni, mina biliine ei oto usino ne Salemo tomane a niabi mina taulelena sinusu.

<sup>27</sup> Vanunua ma tavivine vuso ne sou mate matasa moni, me mulimuli ne sou magili na vavasana.

<sup>28</sup> Eitou muada maido, Krais tamai ei bilii e ei oto usino ne Salemo matasa moni tomane a niabi mina tabulena mavaana mina sinusunusu mina vanunua ma tavivine makuba. Me mulimuli ei ni palea maluanai, moni na ilala do ei ni ma asu oto mina tabulena sinusu. Boa. Ei ni asu usinani mina gualeliune sou a vanunua sou magitalitali e ei.

## 10

*Niabi lisa ei ma mapigogoi ete ni taulele a sinusu*

<sup>1</sup> A binea mine Moses ei a nunu ue a malivovona moni mina golugolu doana ei ni palea mulimuli. Me ei ma maite kube ivu ete eitou a golugolu sou oto. Binea ei vei, ne sou goli a matana niabi na avalavala vuso, maido me eitou muada, a binea ei ma mapigogoi ete ni toebilelesi ivu a vanunua ma tavivine sou asu agavuale e Salemo.

<sup>2</sup> Mane a matana niabi iodo ei mapigogoi ni toe a vanunua ma tavivine ne sou palea kuba ivu, io ne sou ma oabi ete a niabi lou. Mane a niabi tasa moni ei mapigogoi ni goli a vanunua ma tavivine sou agavuale mamai e Salemo ne sou palea alabasi, io na

lilone sou ne sou ma somiale ete lei maido sou isa a mavaana mina sinusu.

<sup>3</sup> Moni boa. A niabi vuso do ei toe sou so damutaletale lei a sinusunusu mine sou na avalavala vuso.

<sup>4</sup> Vuna, a dalana bulmakau togo me mina meme, sou ma mapigogoi sele ete ni taulele a sinusu.

<sup>5</sup> Maido ma ilala Krais ei asu usinani na magamaga, ei vei maido,

“Salemo, oo ma kale ete ne sou oabi a niabi mina daladalana golu vivi.

Moni oo masusuliosi a vovo tasa ane eau.

<sup>6</sup> Niabiabi sou anone vuse na oavi, ma niabi vuso mina taulelena sinusu, ei tamai oo ma kale ete.

<sup>7</sup> Io seidei eau vei maido, ‘Salemo, seidei eau diviosi na ogomuli a masagana minio,

tomane lisa sou niage e eau na laulau do.’”\*

<sup>8</sup> Palapala Krais ei vei maido, “Oo ma kale ete a matamatana niabi ma daladalana golu vivi ma niabi sou anone vuse na oavi ma niabi mina taulelena sinusu, ede sou ma toe mongemonge ete oo.”

<sup>9</sup> Me mulimuli ei vei maido, “Eau asuosi usinani na ogomuli a masagana minio.” Ei taulele a inigogona lisa do mina mapalena inigogona tasa lou i alaba.

<sup>10</sup> Iesu Krais ei bilii a vovone ei oto i matasa moni na masagana mine Salemo tomane a niabi. Me na inigogona maido ei toe e eitou palea a abuna vanunua ma tavivine maolo mine Salemo bilesi.

*Niabi mine Krais ei mapigogoi sele ni taulele a sinusu*

<sup>11</sup> Sou vuso a prist sou magiligili me sou goli a matana niabi tasa moni mapapaina sele lou na maladalada vuso. Moni matana niabi do ei ma mapigogoi sele ete ni taulele a sinusu.

<sup>12</sup> Moni e Krais ei oabi a niabi matasa moni mina taulelena sinusu, ma niabi iodo ei mapigogoi ni pipigo taliuliu taliuliu. Ei mapuliosi maido, io ei ugu na lima gata mine Salemo.

<sup>13</sup> Me seidei ei magitali a ilala mine Salemo ni tau e sou a butu minei ni muina matano ne ei.

<sup>14</sup> Sou a vanunua ma tavivine do ei toe e sou palea a abuna vanunua ma tavivine maolo mine Salemo bilesi, ei toesi e sou palea doana vuso na niabi tasa moni, me ne sou muina moni maido taliuliu taliuliu.

<sup>15</sup> Maolona Nunu tamai ei ademuada ane eitou maido,

<sup>16</sup> “Bibi Taula ei vei maido,

\* 10:7 Laulau na Inala 40:6-8

‘Magilipiluna alaba eau kale na magili pilu e sou odo, ei maido.

Eau na tau a binea vuso minau na buune sou,

me eau na niage sou na damutatalana mine sou.’”†

<sup>17</sup> Me mulimuli ei adesui a inade do maido, “Eau na ma damutaletale ase a sinusu ma inigogona mina saukikina binea mine sou.”

<sup>18</sup> Salemo ei lilotasesi a sinusu ma inigogona mina saukikina binea simaido, io a niabi mina taulelena sinusu ei boa vuso selesi.

*Neitou silimuli sele me neitou asu agavuale Salemo*

<sup>19</sup> Amutou tamtamaigu, a dalane Iesu ei taulelesi a sinusu mine eitou, maido eitou mapigogoiosi neitou silimuli sagali ni gali ulilo na vilo maolo sele mine Salemo na dalane Iesu do.

<sup>20</sup> Eitou mapigogoi neitou gali ulilo na vilo maolo do na vea alaba ei isa a maulina. Vea do Iesu oto ei pee, ei gali ulilo na malo buo ei kulu a muina tomane a tema na vilo do. A malo do ei a vovone ei oto.‡

<sup>21</sup> Eitou isa a mapana prist buo, me ei itealale sou a abuna vanunua ma tavivine mine Salemo.

<sup>22</sup> Ei tivi a dalane ei usinani na lilone eitou mina mapalpalina mavaana mina sinusu vuso eitou goli, me ei toe eitou muada i maido, eitou ino alaba sele na matane Salemo. Me ei maavuvuti a vovone eitou a nanu ei alaba sele. Maidolo me neitou asu agavuale Salemo na lilo ivu mine eitou ma silimulina sele mine eitou.

<sup>23</sup> Eitou muada, a golugolu vuso Salemo ei adegatunasi ni goli, patotona sele ei ni goli. Maido me neitou lapitole obi a silimulina do eitou ademudadada, me neitou na laelae lou ma suduliliuliu lou.

<sup>24</sup> Eitou tastasa neitou damutale tamai a vanunua ma tavivine sanii mine Salemo, me neitou poge a vea mina mailisine sou a inigogona kinale ma inigogona doana usino ne sou sanii.

<sup>25</sup> Me eitou a vanunua ma tavivine mine Salemo neitou ma litatase lei a inigogona mina viepiluna, tomane a vanunua sanii sou gologoli. Amutou muada, malada mine Kraisi ei agavigavios. Maido me eitou tastasa neitou masagali a lilone sou sanii.

*Neitou ma lametatase lei e Nature Salemo*

<sup>26</sup> Longe. Mane eitou gualesi a muadana mina inade ivu mine Kraisi, me mulimuli na masagana mine eitou oto eitou toe susuisui a inigogona sinusu, io a niabi tasa lou boa ni taulele a sinusu ie.

<sup>27</sup> Me neitou magitali moni a malada mina vavasana buo ma oavi iodo ei tuntunu mamau sele, ei ni tuni sou a butu mine Salemo.

<sup>28</sup> Eitou muada, mane a bibi tasa ei lametase a binea mine Moses, ma bibi lua ue tolu sou ite me sou veipale a sinusu ei goli, io ne sou ma lilomulimuli lei a bibi iedo. Ne sou valiputemate ei.

<sup>29</sup> Io amutou damutala matina a bibi ei lametase Natune Salemo? Bibi iedo ei ni guale a mavaana buo mamau sele. Vuna maido dalane Kraisi ei toesagali a magilipiluna alaba, ei toe a bibi ei palea a bibi mine Salemo bilesi me ei muina maolo. Moni seidei a bibi iedo ei toe a daladala do a golu sabubu. Mei goli a inigogona pagu sele usino na Nunu mina dinodo.

<sup>30</sup> Eitou muada, Salemo ei vei maido, “Adovana ede a pipigona minau. Eau oto eau na adove a sinusu mine sou mea na malaitabe sele sou.”§ Me ei vei lou maido, “Bibi Taula oto ei ni vilemuliale a inigogona mina vanunua ma tavivine minei na vavasana.”\*

<sup>31</sup> Mane a bibi tasa ei muina matano na mavove davutina mine Salemo, io a bibi iedo ei ni lae mamau sele. Salemo ie ei mauli taliuliu taliuliu.

*Neitou magili sagali a silimulina*

<sup>32</sup> Ne amutou damutale lei a ilala lisa amutou guale a muada mine Salemo. Na ilala do sou bilii a mavaana buo usino ne amutou, me amutou tabule a mavaana makuba. Moni amutou magili sagalios i a mavaana do.

<sup>33</sup> Ilala sanii sou mamagili e amutou na matana vanunua ma tavivine, me sou adegegeli sele amutou me sou ma toekube ete amutou. Me a ilala sanii amutou maitamaina pilu a vanunua ma tavivine sou tabule a matana mavaana maido, me amutou buloi e sou.

<sup>34</sup> Na ilala sou tau sanii mine amutou na luma na tunuui, amutou lilomulimuli a vanunua do me amutou kuba sele ane sou. Ma ilala sou lapuale a golugolu vuso mine amutou, amutou mongemonge me amutou itetase moni sou, vuna amutou muada a golu ivu mine amutou ei saboa ino, moni a golu iedo ei muina taliuliu taliuliu.

<sup>35</sup> Maido me namutou ma litatase lei a silimulina sagali mine amutou odo. Mane amutou goli maido, mulimuli ne amutou guale a mapa buo sele.

<sup>36</sup> Namutou magili sagali, maido me amutou mapigogoi namutou ogomuli a masagana mine Salemo, me ne amutou

† 10:16 Jeremiaia 31:33

‡ 10:20 Matiu 27:51; Mak 15:38; Luk 23:45

§ 10:30 Binea 32:35

\* 10:30 Binea 32:36

guale a golugolu doana, lisa Salemo ei adegatunasobe ni bilii e amutou.

<sup>37</sup> E, "A bibi ei ni asu usinani iodo, ma tabaa oto

ei ni asu usinani,

ei ni ma tovilliliu oto.

<sup>38</sup> Me a bilesina bibi minau ei ni mauili a silimulina minei.

Mane ei suduliliu,

io eau na ma mongemonge oto e ei."<sup>†</sup>

<sup>39</sup> Moni eitou ma vanunua ma tavivine oto mina suduliliuna ma bualena. Boa vuso sele. Eitou a vanunua ma tavivine mina silimulina me mina gualena mauilina.

## 11

### *Malibuuna mina silimulina*

<sup>1</sup> Malibuuna mina silimulina ei maido, golugolu vuso Salemo ei gatunasobesi ni bilii e eitou me eitou magitalitali a gualena, ede neitou guale ivu. Ma golugolu vuso matane eitou ma mapigogoi ete ni ite, moni na silimulina eitou muada golugolu vuso odo sou ino.

<sup>2</sup> Na inigogona silimulina odo, lisa vanunua ma tavivine sou gualesi a aisa kuba maino ne Salemo.

<sup>3</sup> Na silimulina moni eitou muadasi i, Salemo ei mapale a langi pilu a magamaga na inade minei oto. Maidolo ma golugolu vuso seidei eitou ite, ede Salemo ei mapale a golu eitou ma mapigogoi ete neitou ite.

*Silimulina mine Abel, Enok me Noa usino ne Salemo*

<sup>4</sup> Na silimulina moni Abel ei goli a niabi doana lou usino ne Salemo ane Kain. Salemo ei mongemonge a niabi mine Abel, moni ei ma kale ete a niabi mine Kain. Me Salemo ei vate Abel a bilesina bibi. Abel ei matesi, moni na silimulina minei iodo ei saboa eili ademuadada ane eitou.

<sup>5</sup> Na silimulina moni Enok ei ma mate oto, mei asu uata na langi. A vanunua sou tilomulimuli e ei, moni sou ma ite ete ei, vuna Salemo ei gualesi e ei uata na langi. Laulau mine Salemo ei vei maido, ilala Salemo ei saboa guale e Enok uata, Salemo ei mongemonge sele e Enok.

<sup>6</sup> Sei bibi ma silimuli ete Salemo, ei ma mapigogoi ete ni toe mongemonge Salemo. Vuna, bibi ei kale ni asu agavuale e Salemo, ei ni silimuli maido Salemo ei mauili, me Salemo ei bilii a mapa doana usino na vanunua sou tilomulimuli e ei.

<sup>7</sup> Noa ei silimuli e Salemo, na ilala Salemo ei ademuada ane ei a golu ei ni palea mulimuli, a golu odo Noa i saboa ite, ei ogomuli a inade mine Salemo me ei tige a kuta tasa. Me ei pilu e susuna natatune ei sou gali ulilo na kuta do, maido me sou puiale

moni, me sou ma mamau oto. Na silimulina minei iodo, Noa ei vavasa a inigogona pagu mine sou vuso a vanunua ma tavivine na magamaga. Noa ei silimuli e Salemo me Salemo ei vate ei a bilesina bibi, tomane Salemo ei goli le sou vuso a vanunua sou silimuli e ei.

*Silimulina mine Abraham me Sara usino ne Salemo*

<sup>8</sup> Na silimulina moni, ilala Salemo ei toleale Abraham, ei ogomuli a inade mine Salemo me ei ilisitase a aubu minei, me ei asu usino na avena magamaga tasa e Salemo ei kale ni bilii e ei tomane a magamaga minei bilesi. Abraham ei ma muada oto ei ni asu usiva, moni ei silimuli, me ei asu.

<sup>9</sup> Na silimulina minei, ei asu malu na magamaga lisa Salemo ei vei ni bilii e ei iodo. Ei tige a luma bale na magamaga do me ei malu pilu e Aisak me Iekop tomane a bibi mina abuna sea. Ede sou vuso a vanunua Salemo ei gatunasobesi ni bilii a magamaga do usino ne sou.

<sup>10</sup> Vuna taliuliu Abraham ei magitalitali ni ite a aubu buobuo do ei muina sagali sele, ede a aubu buobuo Salemo tasa moni ei niage me ei tige.

<sup>11</sup> Abraham me Sara sulu buosi ma ilala mina natuana i pulosi. Moni Sara ei guale a sagagalina i mapigogoi ei ni natua. Vuna ei silimuli maido, "Salemo ei adegatunasi ne eau na natua."

<sup>12</sup> Maido ma bibi iodo ei palea bibi buosi me ei bisii moni ni mate, moni ei palea tamane selebanini makuba sele, tomane a mataidoido vuso na langi ma magamaga lealea mina mado i ma mapigogoi ete a bibi ni gi e sou.

<sup>13</sup> Vanunua ieli sou silimuli e Salemo pea na ilala sou mate. Ilala sou eili na magamaga, sou ma guale ete a golugolu Salemo ei adegatunasobesi ni bilii e sou. Moni sou gegemu usino na golu vuso do ino bulago sele ane sou, me so monge a niitene sou. Me sou ma maela oto a ademuadana maido, "Amiteu malu na magamaga ieli tomane a vanunua ma tavivine mina avena sea. Amiteu asu usinani te malu bisii moni na magamaga ie."

<sup>14</sup> Mane eitou longe a vanunua ma tavivine sou goli a matana inade maido, de eitou muada, sou kale ne sou veteliu usino na magamaga ivu mine sou.

<sup>15</sup> Mane sou damutaletale moni a magamaga sou ilisitase do, io sou mapigogoi ne sou veteliuale lei.

<sup>16</sup> Moni sou kale mamai sele ne sou guale a magamaga sea, ei doana mamau lou mei vululusi sele a magamaga iedo. Ede a aubu mina langi. Me sou a vanunua do sou tole e

<sup>†</sup> 10:38 Habakuk 2:3-4

Salemo maido, “Oo e Salemo mine amiteu.” Salemo ei ma maela oto a veipalena mine sou odo, mei masusuliosu a aubu buobuo tasa ane sou.

<sup>17-18</sup> Salemo ei adegatuna ane Abraham maido, “Maino ne Aisak moni sou a abuna tubutubune natatumu ne sou palea.”\* Moni a ilala Salemo ei tove Abraham ni valipute e natune ei tasa moni iedo tomane a niabi, io Abraham ei silimuli e Salemo mei bilii e Aisak usino ne Salemo.

<sup>19</sup> Abraham ei damutatala maido, “Mane Aisak ei mate, muina, Salemo ei mapigogoi ni mailisiliu e ei.” Maido me eitou mapigogoi neitou vei maido, Abraham ei gualeliu e natune ei na minate.

*Silimulina mine Aisak, Iekop me Iosep usino ne Salemo*

<sup>20</sup> Na silimulina minei, Aisak ei maibalave Iekop me Iso a golugolu ei ni palea ane sulu mulimuli.

<sup>21</sup> Na silimulina moni, na ilala bisii moni Iekop ei ni mate, ei maibalave natuna bibi lua mine Iosep. Me ei magili a too minei, me ei kaka ane Salemo.

<sup>22</sup> Na silimulina moni, na ilala bisii moni Iosep ei ni mate, ei vei maido, mulimuli sou e Israel ne sou ilisitase e Isip, me na ilala do ne sou guale a tuatuane ei.

*Silimulina mine Moses usino ne Salemo*

<sup>23</sup> Ilala tinane Moses ei vasusu ei, na silimulina moni, tinana me tamana sulu ite ei a doana bibaini sele. Maidolo me sulu tau oovi e ei mapigogoi a game tolu. Sulu ma lae oto a punope na inade mina mapana.

<sup>24</sup> Na silimulina moni, ilala Moses ei buosi, ei ma kale ete ne sou tole ei e natune natuna tavine mina mapana mine Isip.

<sup>25</sup> Ei damutale, puiale ei ni guale a mavaana pilu e sou a vanunua ma tavivine mine Salemo. Ei ma kale ete ni ogomuli a inigogona mina sinusu mei ni guale a munonge na magamaga na ilala i boto moni.

<sup>26</sup> Ei damutale maido, a maelana ei guale mina aisane Kraisi, ielili ei ni vululusi sele a golugolu doana vuso mine Isip. Ei damutale a mapa doana Salemo ei ni bilii e ei mulimuli.

<sup>27</sup> Na silimulina moni, Moses ei ma lae oto a sinoana mine mapana me ei ilisitase Isip. Moni ei magili sagali sele, vuna Moses ei gemuale e Salemo eitou ma mapigogoi ete neitou ite na matane eitou.

<sup>28</sup> Na silimulina minei, Moses ei vei le sou e Israel ne sou ogomuli a malada na asuleletasena me ne sou savei a daladala na tematema mine sou, dae ne sou a bineanea

ni valipute a matalagalagu mine sou e Israel.

*Makuba sele ne Israel sou silimuli sagali e Salemo*

<sup>29</sup> Na silimulina mine sou, sou e Israel sou asiuti a dasi kasososo tomane moni sou asu na magamaga i tagasa. Moni ilala sou e Isip sou tove ne sou ogomuli e sou e Israel, sou pumumutu vuso.

<sup>30</sup> Na silimulina mine sou, sou asu saili a bigomu mina aubu buobuo e Ieriko mapigogoi a malada padilua, io a bigomu ei talolobe utano.

<sup>31</sup> Na silimulina moni, sualolona tavine e Rahap ei buloi a bibi lua na gemuovuna. Maidolo me ei ma mavaa oto pilu a vanunua ma tavivine sou saukikiki a inade mine Salemo.

<sup>32</sup> Moni seidei eau na toesusu sei inade lou? Eau a matailala boa mina mapamulina ane Gideon, Barak, Samson, lepta, Devit, Samuel, me sou a vanunua na malongolongona.

<sup>33</sup> Na silimulina, sou vululusi a vanunua na maubina mine sou a mapana makuba me sou goli a inigogona i bilesi. Sou guale a golu vuso e Salemo ei adegatuna ni bilii e sou, me sou tabesobe a asene sou a laion.

<sup>34</sup> Sou soe mate a oavi taula. Sou taotase a viso lagolago i binaso. Sou ma isa oto a sagalina buo, moni mulimuli sou guale a sagalina me sou palea a vanunua sagali sele mina maubina. Sou votetase a abuna vanunua na maubina buobuo mine sou a abuna sea.

<sup>35</sup> Tavivine sanii sou gualeliu a ma-tutune sou so matesi. Sou a butu sou malaitabe sele sou mapigogoi ne sou mate i. Sou a butu sou vei maido, mane sou lametase Salemo, io ne sou toemalemale sou. Moni sou saukiki a inade mine sou, vuna sou damutatala maido, mane sou mate, ne sou ilisiliu na minate me ne sou guale a maolina i doana lou.

<sup>36</sup> Sanii sou guale a mavaana maino ne sou a butu sou adepintola ane sou me tibi e sou, me sou papale sou a sen me tau e sou na luma na tunuui.

<sup>37</sup> Sou a butu sou ubi e sou a vatu, me sou soeuti a mainine sou a so na maduna lua. Sou utimate sou a viso. Sou kai a uliulina sipsip ma meme tomane a malo me sou asu oovu moni usinosi. Sou boto a gona inani me sou vitolo sele, ma vanunua sou bilii e sou a davutina me sou goli a inigogona pagu sele usino ne sou.

<sup>38</sup> Maidolo me sou asu maisaba me sou ovu na magamaga a vanunua boa me na avena loeloena, me na babe na vatu me na aova lilo na magamaga. A vanunua

\* 11:17-18 Sinokona 21:12

ma tavivine mina magamaga sou ma mapi-gogoi sele ete ne sou malu pilu e sou a vanunua ma tavivine odo.

<sup>39</sup> A vanunua ma tavivine vuso do sou silimuli e Salemo, me sou guale a aisa doana sele maino ne Salemo. Moni a ilala sou malu na magamaga, sou ma guale ete a golu Salemo ei adegatuna i ni bilii e sou.

<sup>40</sup> Vuna, lisa otosi Salemo ei masusuliosi a golu tasa doana lou ane eitou vuso, me ei ma kale ete ne sou a vanunua ma tavivine lisa dolo ne sou palea doana ivu pala ane eitou. Ei kale ne eitou palea doana ivu pilu e sou.

## 12

### *Neitou gemuale e Iesu moni*

<sup>1</sup> A vanunua ma tavivine vuso sou maite eitou a inigogona mina silimulina, sou mag-iligili sailii e eitou tomane a ausa buo, maido me neitou litase a matana golu vuso ei toe e eitou to ma mapigogoi ete ne eitou vele sagali, ma sinusu vuso sou vaitoletole eitou. Me neitou toesagali a lilone eitou me neitou vele sagali na mailabana li Salemo ei vileale ane eitou.

<sup>2</sup> Neitou gemuale e Iesu, ei a vuna silimulina mine eitou, mulimuli ei ni tosesesele ivu a silimulina mine eitou. Ei muada kuba sele maido, mane ei ogomuli a inade mine Salemo, mulimuli a munongena ni palea le ei. Maido me Iesu ei tabule a tauvaleuti me ei guale a maelana buo. Moni e Iesu ei ma lilobuu oto a maelana ei ni guale, me ei magili sagali a minate. Maido me seidei ei ugu na lima gata mina niugugu a mapana mine Salemo.

<sup>3</sup> Amutou damutale e Iesu. Sou a vanua na sinusu lisa sou butuale mamai e Iesu, moni ei magili sagali sele. Amutou damutale ie, maido me namutou ma suduliliu oto me amutou ma balebale lou a magili sagalina.

*Salemo ei bilii e eitou a mavaana mina toebilelesine eitou*

<sup>4</sup> Amutou maububi a taupuina sinusu, moni mina maubina dolo dalane amutou ei saboa singi.

<sup>5</sup> Nane amutou danivusesi a inade Salemo ei bilii e amutou odo mina masagalina lilone amutou? Ei tole amutou e natatune ei oto, me ei vei,

“Natugu, mane Bibi Taula ei goli le oo a golu tasa mina toebilelesine oo, o ma damu lou ve ieli a golu sabubu, me mane ei adesinoa ane oo, o no ma lilomavaa mamau lou.

<sup>6</sup> Vuna Bibi Taula ei toebilelesilesi a vanunua ei kale mamai e sou.

Mane ei guale a bibi tasa mei tole ei e natuna, io ei tibitibi tamai e ei.”

<sup>7</sup> Ilala Salemo ei toebilelesi e amutou, namutou magili sagali. Salemo ei goli a inigogona do usino ne amutou tomane moni e tamana bibaini i goli usino ne natatuna. Sei bibaini tamana i ma toebilelesilesi ete e ei? Boa vuso sele.

<sup>8</sup> Salemo ei toebilelesi e natatuna vuso, moni mane Salemo ei ma toebilelesi ete amutou, io amutou muada, amutou ma natatune ei ivu oto. Boa. Amutou tomane moni a natatuna sala.

<sup>9</sup> Amutou damutale tamai ie. Tamtamane eitou na magamaga sou toebilelesi e eitou, me eitou tade mamai e sou. Io, puiale ne eitou matano moni ne Tamane eitou na langi, me neitou guale a maulina.

<sup>10</sup> Tamtamane eitou na magamaga sou toebilelesi a inigogona mine eitou na ilala ei boto moni mapiogogoi a masagana mine sou. Moni e Salemo ei toebilelesilesi e eitou mina buloinea eitou, i mapigogoi neitou guale a inigogona maolo minei oto.

<sup>11</sup> Ilala Tamane eitou ei bilii e eitou a mavaana mina toebilelesine eitou, eitou ma mongemonge oto i, me lilone eitou ei somiale moni a mavaana. Moni ilala toebilelesina ei pulu, a golu doadoana sele ni palea ne eitou. Ne eitou goli a inigogona bilesi vuso, ma lilone eitou ni tabuli mea.

### *Neitou magili sagali*

<sup>12</sup> Maido me toesagali a limane amutou i mamatemate ma patulune amutou i ma sagali oto.

<sup>13</sup> Me mu asu bilesi moni. Mane amutou goli maido, ubune amutou ei ni ma vule oto, me ne sou palea doana lou.

<sup>14</sup> Ne amutou ogomuli sagali a inigogona lilomeana pilu a vanunua vuso. Me namutou malu a inigogona maolo mine Salemo. Bibi ei ma maolo oto, ei ni ma mapigogoi ete ni ite Bibi Taula.

<sup>15</sup> Namutou ulago iiti, dae ne tasa mine amutou ni bosa mei ni litase a dinodo mine Salemo. Me namutou ulage kube, dae ne tasa mine amutou ei ni palea tomane a obu ei tau a vuana i ama, me ei ni bilii e amutou a mavaana me ei ni toe amutou palea mumugu na matane Salemo.

<sup>16</sup> Tilale, dae ne sei bibi i ogomuli a inigogona sualolona me ei ni lametase Salemo tomane lisa Iso ei goli. A inani baini tasa moni, ei iabipole a niugugu mina matalagu usino ne tasina.

<sup>17</sup> Amutou muada, mulimuli ei kale ni guale a maibalavana odo lou, moni tamane ei ma longo oto i. Iso ei tangi mapapaina mina gualena maibalavana, moni a vea boasi mine ei ni sauvule a lilone ei.

*Eitou diviosi ne Ierusalem na aubu na mununge*



<sup>18</sup> Amutou ma divi oto na loena tasa i mapigogoi namutou ite me tau a limane amutou ne ei tomane sou e Israel sou asu usino agavuale a loena e Sainai me sou ite a oavi buo ma tunuui salasala sele ma avivili sagali me sou longe

<sup>19</sup> a tuai ei tangi ma baligoluna bibi tasa ei veipale a inade. A vanunua ma tavivine sou longe a inadenade do, me sou lae sele me sou vei le Moses maido, "Amiteu ma kale ete namiteu longe lei."

<sup>20</sup> Sou lae sele a inade Salemo ei bilii e sou iedo. Ei vei le sou maido, "Mane a bibi tasa ue a golu vivi tasa ei asu uata mina loena iedo, io namutou ubi ei a vatu ni mate."\*

<sup>21</sup> Sou lae sele a golu sou ite do, me Moses tamai ei vei, "Eau lae mamau ma vovogu ei palili mamau sele."†

<sup>22</sup> Moni amutou diviosi na loena e Saion, iede a aubu buobuo mine Salemo i mauli taliulu, ei a aubu buobuo e Ierusalem ino oata na langi. Amutou diviosi na viepiluna mine sou a bineanea sou papaina sele me sou mongemonge a muine sou.

<sup>23</sup> Amutou diviosi na viepiluna mine sou a matalagu mine Salemo, ede sou a abuna Salemo ei niage a aisane sou na laulau minei oata na langi. Amutou diviosi ne Salemo ei vavasa a vanunua ma tavivine vuso. Amutou diviosi na nunu mine sou a billesina vanunua, ede Salemo ei goli e sou palea kuba vuso.

<sup>24</sup> Amutou diviale Iesu, ei a balivuana bibi mina magilipiluna alaba. Me amutou divi na dalane Iesu, ei tivi usino ne amutou mina toesagalina magilipiluna do. Ma daladala do ei veimuade a golu doana lou ana dalane Abel.

#### *Tilale kube*

<sup>25</sup> Amutou tilale, dae ne mu tabesobe a tagilane amutou me ne mu saukiki e Salemo ei adeade ane amutou. Lisa ilala Moses ei bilii a inade sagali usino ne sou a vanunua ma tavivine mina magamaga, sou ma kale ete ne sou longe a inade minei. Me sou ma mapigogoi ete ne sou pololeletase a mapa pagu mina sinusu mine sou. Io seidei Salemo ei oata na aubu na langi i bilii e eitou a inade sagali. Mane eitou lametase ei, nane eitou mapigogoi neitou pololeletase a mapa pagu mina sinusu matina? Boa vuso sele.

<sup>26</sup> Lisa baligolune Salemo ei toe a magamaga ei vuvule. Moni seidei ei veiosi le eitou maido, "Ilala tasa lou eau na toe a magamaga ni vuli. Ma magamaga moni boa. Eau na goli a langi tamai ni maune."‡

<sup>27</sup> Ei vei a ilala tasa lou, a malibuuna inade mina "Ilala tasa lou" i maido, ilala Salemo ei toe a magamaga ma langi ei vuvule, ei ni

taulele a golugolu vuso ei mapale iedo me ne sou ma muine ete sou lou. Ma golugolu ei ma mapigogoi ete ni toe sou so vuvule, sou moni ni muine sou.

<sup>28</sup> Niitealalena mine Salemo ei bilii e eitou, ei ni ma vuvule oto, maido me neitou toledadangi e Salemo. Me neitou beilange a aisane ei me neitou lae e ei me neitou totopatuliale ei na inigogona ei oto ei kale.

<sup>29</sup> Vuna, Salemo mine eitou ei tomane a oavi ei tununi a golugolu vuso.

## 13

*Eitou tastasa neitou kale sele sou sanii sea*

<sup>1</sup> Amutou tamtamaigu, taliulu amutou tastasa namutou bililili a lilone amutou usino ne sou a kristen sea.

<sup>2</sup> Amutou ma danivusevuse lei a inigogona mina gualene sou a mosi usino na luma mine amutou. Amutou muada, lisa vanunua sanii sou gualene a mosi sanii usino na luma mine sou, sou ma muada oto ve ede sou a bineanea mine Salemo.

<sup>3</sup> Damutale sou a vanunua ma tavivine ino na luma na tunuui, tomane moni amutou muina pilu e sou na luma na tunuui. Damutale sou so isa a mavaana buo tomane amutou oto mu isa tamai a mavaana.

<sup>4</sup> Taulaina ei a golu tasa buo sele, maido me amutou vuso namutou tade sele a taulaina mine amutou, ne ei ni muina maolo sele na matane Salemo. Amutou muada, Salemo ei ni malii a mapa pagu usino ne sou a vanunua ma tavivine sou goli a matamatana sualolona.

<sup>5</sup> Amutou ma ogomulimuli lei a inigogona mina isualena vatu. Namutou damutale maido, golu amutou lapitole, iede ei mapigogoi e amutou. Salemo ei veiosi le eitou maido,

"Eau na ma litase ete oo.

Eau na ma itetase ete oo. Boa vuso sele."\*

<sup>6</sup> Maidolo me neitou toesagali a lilone eitou, me neitou vei maido,

"Bibi Taula ei buloilo e eau me eau na ma lae oto.

Vanunua sou ma mapigogoi ete ne sou goli a golu tasa usinani minau."†

*Neitou ma maelaela lou a ogomuline Iesu*

<sup>7</sup> Damutale sou a munuganuga mina viepiluna kinaka mine amutou, sou malongolongo a inade mine Salemo usino ne amutou. Damutale a inigogona sou asu i, me ne mu ogomuli a silimulina mine sou.

\* 12:20 Gualeliuna 19:12-13 † 12:21 Binea 9:19 ‡ 12:26 Hagai 2:6 \* 13:5 Binea 31:6 † 13:6 Laulau na Inala 118:6

<sup>8</sup> Iesu Kraisi, ei muina tasa moni tomane a lavi me seidei, me taliuliu taliuliu.

<sup>9</sup> Maidolo me namutou ma ogomulimuli lei a matamatana inade sea ne sou lapuale a lilone amutou. Neitou longo a dinodo mine Salemo ni toesagali a lilone eitou. Lilone eitou ei ni ma mapigogoi ete ni guale a sagalina maino na matana binea mina inani. Inigogona ieli ei ma buloi ete a vanunua ma tavivine na inasu mine sou.

<sup>10</sup> Eitou isa a poso na niabi tasa, moni a vanunua sou pipigopigo na luma maolo mine Iuda, sou ma mapigogoi ete ne sou aani a niabi na poso do.

<sup>11</sup> Vuna, mapana prist ei gualeale a dalana golu vivi, me ei maasi a daladala do ulilo na vilo maolo sele ni goli a niabi mina taulelena sinusus. Me a aitolana golu vivi odo, ede sou tuni masala na bigomu mina aubu buobuo.

<sup>12</sup> Maidolo me Iesu tamai ei tabule a davutina me ei mate masala na bigomu na aubu buobuo. Na dalane ei oto, ei toe a vanunua ma tavivine ne sou palea maolo.

<sup>13</sup> Maidolo me eitou tamai neitou asuale ei usala, me neitou tabule a maelana tomane moni ei tabule.

<sup>14</sup> Eitou muada, na magamaga ieli eitou ma isa oto a aubu buobuo tasa ei muina taliuliu. Moni eitou magitalitali a aubu buobuo do ei ni palea mulimuli.

<sup>15</sup> Maido me taliuliu neitou masalalai e Salemo na aisane Iesu, a inigogona ieli ni muina taliuliu tomane a niabi eitou biliilii e Salemo. E, taliuliu asene eitou ni beilange a aisane ei.

<sup>16</sup> Namutou ma danivusevuse lei a gunolina inigogona doana usino ne sou sanii ma biliina golu sanii mine amutou mina buloine sou so boto a golugolu. Salemo ei mongemonge sele a matana niabi do.

*Neitou ogomuli a inade mine sou a munuganuga mine eitou*

<sup>17</sup> Namutou ogomuli a inade mine sou a munuganuga mine amutou me mu muine amutou matano ne sou. Sou kale ne sou buloi e amutou me sou ulage ane amutou taliuliu. Me mulimuli ne sou vei le Salemo a pipigona vuso sou goli. Mane amutou goli maido, io a pipigona mine sou ei ni doana moni, me ne sou ma lilomavaa oto. Mane sou lilomavaa a niitealene amutou, iedele ei ni ma buloi ete amutou tamai.

<sup>18</sup> Namutou kake Salemo ni buloi e amiteu. Amiteu somiale sele maido a lilone amiteu ei muina bilesi na matane Salemo, vuna amiteu kale a inasu mine amiteu i bilesi moni na ilala taliuliu.

<sup>19</sup> Eau kale mamai sele namutou kake Salemo ni buloi e eau na veteliu asi usino ne amutou.

*Punuluna ade munonge*

<sup>20</sup> Eau kaka maido, Bibi Taula mine eitou Iesu, ei a munugana bibi na ulagena sipsip, ei biliu a dalane ei oto mina toesagalina magilipiluna ieli ni muina taliuliu. Salemo ei mailisiliu e ei na minate. Salemo ei a vuna mina lilomeana,

<sup>21</sup> ei ni goli a inigogona doana vuso ni palea na maulina mine amutou, i mapigogoi namutou ogomuli ivu a masagana minei. Na pipigona mine Iesu Kraisi, ei ni toe eitou vuso neitou guale a inigogona vuso ei oto ei kale. Me taliuliu taliuliu eitou vuso neitou biliu e Iesu a aisa buo. Moliana.

<sup>22</sup> Tamtamaigu, eau kale namutou beli kube a tagilane amutou usinani na inadnade eau niage iedolo mina masagalina lilone amutou, laulau eau niage le amutou ieli, ei ma lago vauta oto.

<sup>23</sup> Eau kale amutou ne mu muada i maido, tamaine eitou e Timoti, sou taulelesi ei na luma na tunuu. Mane ei divi asi, io amilu pilu nami asu ite amutou nade.

<sup>24</sup> Biliu a oaso doana mine amiteu usino ne sou a munuganuga vuso mine amutou pilu a vanunua ma tavivine mine Salemo. Sou a abuna sou asu usinani maino ne Itali, sou tamai sou vate oaso kubaana usino ne amutou.

<sup>25</sup> Dinodo mine Salemo ei ni muina pilu e amutou vuso.

## Iemus Laulau Iemus ei niage

*Ade munongena mine Iemus*

<sup>1</sup> Eau e Iemus, eau a bibi na pipigona mine Salemo me Bibi Taula Iesu Krai. Eau niage a laulau li usino ne amutou a abuna savulu tasa timana lua mine Israel, amutou malu maisaba. Oaso kubaana usino ne amutou.

*Tinovo masagali e eitou*

<sup>2</sup> Amutou tamtamaigu, mane a matamatana tinovo i palea le amutou, de namutou damutale i ei a gona munonge moni.

<sup>3</sup> Vuna amutou muada, a golu iodo ei ni mapale a inigogona mina magili sagalina ma tabulena davutina.

<sup>4</sup> De taliuliu namutou magili sagali me namutou tabule a mavaana, maido me a inigogona li ni masagali sele e amutou, me namutou ugu kuba me namutou ma boto oto a golu tasa Salemo ei kale.

*Bibi ei boto a damutatalana doa, ei ni kaka*

<sup>5</sup> Mane sei bibi balivua ne amutou ei boto a damutatalana doa, de ei ni kake Salemo ni bilii e ei a damutatalana doa. Vuna Salemo ei iabi a matamata golugolu makuba usino ne sou a vanunua vuso, me ei ni ma sinoa oto ane sou a vanunua so kake ei.

<sup>6</sup> Moni ilala amutou kake Salemo, namutou silimuli moni. Vuna maido bibi ei isa a damutatalana lua, ei tomane a dasi loulou.

<sup>7</sup> Matana bibi maido ei ni ma damudamu lou ve Bibi Taula ni bilii e ei a golu tasa. Boa.

<sup>8</sup> Damutatalana mina bibi iedo ei maisaba, ma inigogona vuso ei goli, ei ma ogomuli ete a vea tasa moni.

*Inade usino ne sou a kapelabe me sou a vuvutina*

<sup>9</sup> Mane a tamaigu tasa a kristen ei kapelabe, ei ni mongemonge, vuna ei isa a aisa buo na matane Salemo.

<sup>10</sup> Moni a bibi ei vuvuti, ei ni mongemonge na malada Salemo taupui a aisana, vuna sou a vuvutina ne so buale tamai tomane a sesena gulugulu.

<sup>11</sup> Eitou muada, mane a oaso i tala, ei tuntunu sele mei voe a gulugulu vuso sou malalai sele ma sesene sou lili, ma malasane sou ni pulu vuso. Na vea tasa moni ieli, bibi na vuvutina ei ni mate na ilala ei pipigo a vuvutina minei.

*Salemo ei ma tove ete eitou a gunolina sinusu*

<sup>12</sup> Bibi ei magili sagali mei tabule a mavaana mina tinovo vuso ei ni mongemonge. Vuna ilala ei veletase vuse a tinovo vuso, Salemo ni bilii e ei a kele mina

maulina tomane a niabi minei. Iedo Salemo ei adegatunasi usino ne sou so kale sele ei.

<sup>13</sup> Mane a tinovo ei palea le amutou, namutou ma vevei lei ve Salemo ei tovetove eau na goli a sinusu. Boa. Sinusu ei ma mapigogoi ete ni tove e Salemo, me Salemo tamai ni ma tove ete a bibi ni goli a sinusu.

<sup>14</sup> Moni a masagana pagu mine eitou oto ieli ei toegolali eitou me ei ioto ane eitou, me ei mailisi eitou neitou goli a sinusu.

<sup>15</sup> Mane a masagana pagu mine eitou ei ilisi lilo na lilone eitou, de mulimuli ei mapale a sinusu, me na matailala sinusu pagu i palea buo, ei mapale a minate.

<sup>16</sup> Amutou tamtamaigu ivu, namutou ma itetasetase lei a inigogona iedo ni ioto ane amutou.

<sup>17</sup> Golugolu vuso i doana eitou gualeale ma niabi vuso ei kubaana sele, ede sou vuso sou asu maino ne Salemo Tamane eitou. Ei mapale a muada vuso mina langi, ei iabi a golugolu sou ieli usinani ne eitou. Tamane eitou ieli ei ma sauvuvule maisabe ete a inigogona minei. Ei ma tomane ete a miau ei salasuusu.

<sup>18</sup> Na masagana minei oto, ei maalepose eitou na adepatotonana minei, ve neitou palea a munugana vua mina golugolu vuso ei mapale.

*Neitou longe a inade me neitou ogomuli tamai*

<sup>19</sup> Amutou tamtamaigu ivu, namutou muada iiti a golu ie. Mu beli kube asi a tagilane amutou, moni ne amutou ma ade asiati lou, me namutou ma sinoa asiati lou.

<sup>20</sup> Vuna, sinoana mina bibi ei ni ma mapale ete a billesina inigogona mine Salemo.

<sup>21</sup> Maido me namutou taulele a inigogona mumugu vuso ma inigogona pagu vuso. Me namutou taupui e amutou me mu guale a inade Salemo ei dani na lilone amutou. A inade li ei mapigogoi ni gualeliu a maulina mine amutou.

<sup>22</sup> Inade amutou longe iede, ede namutou ogomuli. Mane amutou longe sabubi moni, amutou ioto ane amutou oto.

<sup>23</sup> Mane a bibi tasa ei longe sabubi a inade mine Salemo, me ei ma ogomuli ete, ei tomane a bibi ei ite moni a laguna na mira.

<sup>24</sup> Ei ite a lagune ei oto, moni ei asu, ma tabaa oto ei danivuse a lagune ei i lagu matina.

<sup>25</sup> Moni mane a bibi tasa ei gegemuale iiti a binea ivu ei ni toemalemale ei, mei ogomuli sele a binea ie, de Salemo ni maibalave a pipigona vuso minei.

<sup>26</sup> Mane a bibi tasa ei damutale maido, "Eau a bibi na kinaka sele," moni ei ma iteale kube ete a asene ei iedo, io ei auala ane ei oto. Maido ma silimulina minei ma kinaka minei ei a golu sabubu moni.

<sup>27</sup> Inigogona mina kristen ei ni maolo sele mei ma isa oto a mumuguna na matane Salemo Tamane eitou i maido, neitou iteale sou a niututu me sou a buasasu sou tabule a mavaana. Golu tasa tamai, neitou iteale kube a inasu mine eitou oto, ma inigogona mina magamaga li ni ma toemumugi ete eitou na matane Salemo.

## 2

### *Neitou ma kale levilevi lei a vanunua*

<sup>1</sup> Tamtamaigu ivu, amutou silimuli e Bibi Taula mine eitou e Iesu Krai, ei isa a aisa buo. Namutou ma kale levilevi lei e sou a vanunua vuso.

<sup>2</sup> Mane a bibi tasa ei kakai iiti mei isa a maomao malasolosolo na uuna ei gali ulilo na luma na kinaka mine amutou, ue mane a bibi ei kapelabe ei kai a kinainai mumugu ei tamai gali ulilo na luma na kinaka,

<sup>3</sup> de nane ne amutou toe iiti sou a vanua so kakai iiti sele me namutou vei, "Maula, o vele ugu na niugugu doana ie." Me nane ne amutou vei ana bibi ei kapelabe maido, "O magili nade," ue "No ugu na magamaga agavuale a ubugu."

<sup>4</sup> Mane amutou goli a inigogona maido, amutou tomane a bibi ei vivileale sou a vanua a damutatalana pagu minei moni.

<sup>5</sup> Tamtamaigu ivu, amutou longe. Sou a vanunua so kapelabe na matana vanunua mina magamaga, sou a vanunua moni iedo Salemo ei vilealesi ne sou vuvuti a silimulina. Lisa Salemo ei adegatuna maido, vanunua so kale sele ei, ei ni tau e sou na niitealalena mine Salemo.

<sup>6</sup> Moni amutou toemaelele sou a vanunua so kapelabe do. Damutale. Sei tau a mavaana usino ne amutou me ei lapuale amutou usino na vavasana? Ede sou a vanunua na vuvutina moni.

<sup>7</sup> Salemo ei tau a aisa doana mine Krai ne amutou, moni sei ei adeptintola ana aisa do? Iede tamai sou a vanunua na vuvutina moni.

<sup>8</sup> Laulau mine Salemo ei bilii e eitou a binea tasa maido, "Oo no kale sele sou a vanunua sea tomane oo kale oo oto."\* Mane amutou ogomuli iiti a binea ieli, de amutou goli a inigogona doa.

<sup>9</sup> Moni mane amutou kale levilevi e sou a vanua, iede amutou goli a sinusu. Binea li ei maite eitou maido, amutou a vanua na punope na binea.

<sup>10</sup> Mane a bibi tasa ei ogomuli a binea vuso, me ei pope a binea tasa, io ei isa a mavaana tomane a bibi ei pope a binea vuso.

<sup>11</sup> Eitou muada, Salemo ei vei maido, "Namutou ma goligoli lei a inigogona su-alolona." Me ei vei tamai maido, "Namutou ma valiputepute lei a bibi."† De mane o ma goli ete a inigogona su-alolona, moni oo valipute a bibi, io oo paleasi a bibi na punope na binea.

<sup>12</sup> Amutou namutou muada iiti a golu ie. Salemo ei ni vivileale a inigogona mine amutou na binea ni toemalemale a vanunua vuso. Maido me taliuliu namutou ade me mu goli a inigogona mina bibi ei matano na binea ie.

<sup>13</sup> Mane a bibi tasa ei ma lilomuli ete sou sanii, de na malada Salemo ni vivileale ei na vavasana, Salemo ni ma lilomuli ete ei. Moni a bibi ei lilomulimuli e sou a vanunua sanii ei ni vululusi a vavasana.

### *Silimulina ei ni asu pilu a inigogona doa*

<sup>14</sup> Tamtamaigu, mane a bibi tasa ei vei maido, "Eau silimulimuli e Krai," moni ei ma goli ete a inigogona doa tamai, de a silimulina mina bibi iedo, ei a golu sabubu moni. A matana silimulina maido ni gualeliu e ei, io? Boa vuso sele.

<sup>15</sup> Mane a kristen tasa bibi ue tavine ei ma isa oto a kinainai ue a gona inani,

<sup>16</sup> me tasa mine amutou ei vei lei maido, "Lilomu ni mea moni, me oo asu o kai a kinainai ni toetivule a vovomu, mo asu guale a gona inani mo mavoni a tiamu," io inade li ni buloi e ei matina? Amutou oto, mu bilii e ei a kinainai ma gona inani ni buloi a vovona.

<sup>17</sup> Na vea tasa moni, mane a silimulina ei ma asu pilu oto a inigogona doa, io silimulina do ei matesi.

<sup>18</sup> Moni nane a bibi tasa ni vei, "Mane oo silimuli, me oo ma goli ete a inigogona doa tamai, de eau na muada a silimulina minio do i matina?" Moni eau, eau na goli a inigogona doa vuso, me ei ni maite oo a silimulina minau.

<sup>19</sup> Oo silimulimuli maido, "Salemo tasa moni ino." Ei doana. Moni sou a nunu pagu sou tamai so silimuli simaido, me sou lae mamau sele e Salemo.

<sup>20</sup> Oo a vautana bibi, mane oo silimuli moni, me oo ma goli ete a inigogona doa tamai, de a silimulina minio ei a golu sabubu. Nane oo kale no muada a vuna inade ie? De longe.

<sup>21</sup> Lisa tubune eitou e Abraham ei tau e natuna Aisak muata na poso mina niabi me ei bilii e ei usino ne Salemo tomane a niabi. Maido me na matailala ieli Salemo ei ite a inigogona minei me ei tole ei a bilesina bibi.

\* 2:8 Pipigona mina Prist 19:18 † 2:11 Gualeliuna 20:13-14

<sup>22</sup> Damutale kube. Silimulina mine Abraham ma inigogona doa minei ei maita-maina pilu, ma inigogona doa ieli i mavoni sele a silimulina minei.

<sup>23</sup> Maidolo me Laulau mine Salemo ei isa a inade maido "Abraham ei silimuli e Salemo, me Salemo i vate e ei a bilesina bibi,"<sup>‡</sup> ei palea muadas. Me Salemo ei vate e Abraham "Tamaigu."

<sup>24</sup> De seidei amutou muada i, na silimulina moni Salemo ei ma tole ete ei a bilesina bibi. Boa. Ei damutale tamai a inigogona doa a bibi ei goli mei vate e ei a bilesina bibi.

<sup>25</sup> Tomane moni a sualolona tavine Rahap ei tau oovi a bibi na gemu oovuna lua Iosua i peltase sulu usino, me Rahap ei maite sulu a vea tasa sea. Maido me Salemo vate e ei a bilesina tavine.

<sup>26</sup> Eitou muada, mane vovone eitou ei ma isa oto a nunu, ei matesi. Tomane moni, mane a bibi ei silimuli sabubu ma silimulina minei ei ma pipigo oto, io silimulina mina bibi iedo ei matesi.

### 3

#### *Neitou ulage kube a inade mine eitou*

<sup>1</sup> Tamtamaigu, amutou ma tovetove lei ve namutou palea a bibi na matetengina, vuna ilala Salemo ei vilemuliale a inigogona mine sou, ei ni vilemuliale iiti lou a pipigona mine sou.

<sup>2</sup> Eitou vuso eitou goligoli a sinusu. Moni mane a bibi tasa eili ei mapigogoi ni iteale kube a asena, io ei matuasi a itealekubena vovona vuso.

<sup>3</sup> Eitou tau a maduna ain mina asena hos ne sou ogomuli a masagana mine eitou na inasu. Eitou iteale a asene sou, me na inigogona ieli eitou maivele kube a vovone sou vuso.

<sup>4</sup> Amutou damutale a kuta tamai. Kuta ei a golu buo, ma avetale buo i palea mei valitase a kuta ni vele maisaba, moni a ginivi ei alabaini sele, me a inaunauna kuta ei kale ni asu usino na avena tasa, io ei ni sauvule a ginivi ma kuta ei ni vele usino na avena iva ei kale.

<sup>5</sup> Tomane moni, a tabelena bibi ei alabaini moni, moni ei masalailai e ei me ei beilangelange a aisane ei oto. Eitou muada, oavi baini ei mapigogoi ni tununi a autauta vuso mei ni aani a obu vuso.

<sup>6</sup> Ma tabelene eitou ei tomane moni a oavi. Ei a avena tasa moni mina avena vovone eitou vuso, moni ei mapale a matamatana inigogona pagu. Ei goli a vovona bibi vuso ei palea mumugu, me ei goli a inigogona pagu i palea na maulina mine

eitou tomane a oavi. Oavi iedo ei a oavi maino na aubu na davutina.

<sup>7</sup> Vanua sou tomamaliosi a matamatana viuvui masivo me sou a manumanu ma golugolu vuso sou salasala, ma golugolu vuso na dasi.

<sup>8</sup> Moni a bibi ei ma mapigogoi ete ni iteale a tabelene ei oto. Taliuliu table e ei goli a inade pagupagu. Ei tomane a bunu pagu ei vonu na tabelene eitou mina valiputena bibi.

<sup>9</sup> Na tabelene eitou, eitou beilange a aisana Bibi Taula, ei e Tamane eitou. Moni na tabelene eitou, eitou goli a inade pagupagu ni toegegeli a vanunua ma tavivine Salemo ei mapale sou tomane ei oto.

<sup>10</sup> Inade mina beilangena aisane Salemo ma inade pagu tamai sulu pilu palea na tabelene eitou tasa moni. Amutou tamtamaigu, amutou ma goligoli lei a matana inigogona maido.

<sup>11</sup> A aopu na nanu tasa i ma mapigogoi ete ni mapale a nanu doa pilu a nanu masagalai.

<sup>12</sup> Amutou tamtamaigu, nane a obu a fik i mapigogoi ni vuale a oliv, io? Nane a obu a vain i mapigogoi ni vuale a fik, io? Tomane moni, a dasi ei ma mapigogoi ete ni mapale a nanu doa.

#### *Bibi ei isa a muadana doa ei ni goli a inigogona doana*

<sup>13</sup> Sei bibi balivua ne amutou ei isa a damutatalana doa ma muadana? Mane a matana bibi maido eili, de a inasu minei ei ni doana. Ei ni ma toevautauta lou me ei ni ma beilangelange lei a aisane ei oto. Ei ni ogomuli kube a inigogona mina damutatalana doa ma muadana, me sou a vanunua ne sou ite a inigogona doana ei goli.

<sup>14</sup> Moni mane amutou lilogegelu sele ana vanunua sanii, me mane taliuliu amutou gemugemu a vea mina beilangena aisane amutou oto, io namutou ma masalailai lei a damutatalana doa ma muadana mine amutou ue namutou ma taupui lei a inade patotona.

<sup>15</sup> Damutatalana ieli ei ma asu oto maino ne Salemo. Ei a golu mina magamaga moni ie. Ei palea maino na lilomumuguna ma nunu pagu mine Satan.

<sup>16</sup> Longe. Sou a vanua so lilogegelu ana vanua sanii me taliuliu sou tilotilo a vea mina beilangena aisane sou oto, a vanua do sou ma ugu kubakuba oto me sou mailisilisi a mavaana ma matamatana inigogona pagu.

<sup>17</sup> Moni sou a vanua sou guale a damutatalana doana maino ne Salemo sou goligoli a inigogona maido. Munugana, sou ogomulimuli a damutatalana maolo. Me maluanai, sou lilo tasa moni ane sou sanii,

<sup>‡</sup> 2:23 Sinokona 15:6

me sou lilomea ane sou, me sou longemuli a inade mine sou sanii. Sou lilomuli sele sou sanii me sou goli a inigogona doana usino ne sou. Sou ma vile ete a vanunua, me sou ma aualala oto ana vanunua ma tavivine.

<sup>18</sup> Mane eitou ugu lilo tasa moni, iede ei tomane eitou dani a vuavua mina lilomeana. Me na lilomeana moni, a inigogona bilesi i palea na maulina mine eitou tomane a gona inani doana ei palea na mauma.

#### 4

*Bibi ei kale a inigogona mina magamaga ei ni butuale Salemo*

<sup>1</sup> Sei golu ei mailisi a maisinoana ma maubina balivua ne amutou? A matamatana lilogegeluna ei ino ne amutou sou maububi na lilone amutou. Na inigogona moni iedo sou mailisilisi a inade na maisinoana ma maubina.

<sup>2</sup> Amutou kale mamaimai sele namutou guale a matamatana golugolu, moni amutou ma guale ete. Amutou valiputepute a vanunua me amutou isuisu ana golu, moni namutou ma guale ete. Maido me amutou sinoa mamaumau me mu mailisilisi a maubina. Amutou ma kakaka oto e Salemo ni bilii e amutou a golugolu, na vuna moni iodo amutou ma guale ete.

<sup>3</sup> Amutou kaka, moni amutou ma gualeale ete, vuna damutatalana mine amutou ei ma bilesi oto, ma golugolu amutou kale, iede a gona maimongena vovo moni.

<sup>4</sup> Amutou a vanua sualolo, amutou ma muada oto maido, mane a bibi ei kale a inigogona mina magamaga, ei goli a inigogona butualene Salemo. Nane amutou ma muada oto i ieli, io? Maido me mane a bibi ei kale ni maitama pilu a golugolu na magamaga, ei ni butuale Salemo.

<sup>5</sup> Laulau mine Salemo ei vei maido, "A nunu ieli Salemo ei tau na lilone eitou, ede Salemo ei kale mamai ei ni muina matano ne ei tasa moni." Amutou damu ve a inade li ei a inade sabubu, io?

<sup>6</sup> Moni e Salemo ei dode mamaimai sele eitou. Maido ma Laulau mine Salemo ei vei maido,

"Salemo ei taupui a vanunua sou beilange a aisane sou oto,  
monii ei dodode sou a vanunua sou toebisii e sou oto."\*

<sup>7</sup> Maido me namutou matano moni ne Salemo. Namutou saukiki e Satan, me ei ni ilisitase amutou me ei ni iava.

<sup>8</sup> Namutou agavuale e Salemo, me ei ni agavuale e amutou. Amutou a vanua na sinusu, lilone amutou ni palea alaba, tomane

a bibi ei loloi a limana ni palea alaba. Amutou a vanunua amutou isa a damutatalana lua, namutou taulele a damutatalana pagu na lilone amutou.

<sup>9</sup> Namutou lilomavaa me namutou tangi. Amutou a vanunua mu polipoli seidei, namutou tangi. Amutou a vanunua mu mongemonge seidei, namutou lagu dododo.

<sup>10</sup> Namutou toebisii e amutou oto na matane Bibi Taula. Mane amutou goli maido, io Bibi Taula ni beilange amutou.

*Neitou ma ububi lei a inade usino ne sou sanii sea*

<sup>11</sup> Tamtamaigu, namutou ma adegegeligeli lei a vanunua ma tavivine mine Salemo. Bibi ei adegegeli e sou sanii ue ubi a inade usino ne sou, ei adegegeli a binea oto me ei ubi a inade usino na binea. Me mane oo ubi a inade usino na binea, io oo ma muina oto tomane a bibi ei matano na binea. Boa. Oo paleasi a bibi na vivilealena.

<sup>12</sup> Salemo tasa moni ei mapale a binea, me ei moni ei e Salemo na vivilealena. Ei tasa moni ei mapigogoi ni gualeliu e sou a vanunua ma tavivine me ei ni toegegeli e sou. Moni oo e sei no vivileale a vanunua ma tavivine seasea?

*Neitou ma toevautauta lou*

<sup>13</sup> Eau isa a inade tasa usino ne amutou a vanunua mu veivei maido, "Nane seidei ue savulo eau na asu usino na aubu buo tasa me eau na pipigo vuvuti mapigogoi a avala tasa. Me na vea li eau na guale a vatu makuba."

<sup>14</sup> Amutou goligoli a matana inade ie, amutou ma muada oto sei golu ni palea savulo. Maulina mine amutou ei tomane a aulabunu ei palea me ei muina bisii moni me ei pulu vuso.

<sup>15</sup> Moni namutou vei maido, "Mane Bibi Taula ei kale, io eau na mauli me eau na goli a golu eau damutale na goli."

<sup>16</sup> Moni amutou beilangelange a aisane amutou oto me a pipigona buo amutou kale namutou mailisi. Matana inigogona toevautautana maido, ede a inigogona i pagu sele.

<sup>17</sup> Damutale kube. Mane oo muadasi i a inigogona tasa doana oo no goli, moni oo ma goli ete, iede o goli a sinusu.

#### 5

*Sou a vuvutina ne sou guale a mapa pagu*

<sup>1</sup> Seidei eau isa a inade usino ne amutou a vuvutina. Amutou ne mu damutale a mavaana buo ei ni palea le amutou, me namutou tangi mamau sele.

\* 4:6 Niugugu Doana 3:34

<sup>2</sup> Golugolu vuso ma gona malolomene amutou, sou mavuluosi. Ma aivo aniosi a kinainai vuso mine amutou.

<sup>3</sup> Vatu malasolosolo mine amutou, gol pilu a silva, sou mamaوسي, ma mamauna do ni toe a sinusu mine amutou ni palea muada sele, me ei ni aani a vovone amutou tomane a oavi. Punuluna malada ei agaviosi ni palea, moni amutou taupili sabubi a golugolu papai ma vatu.

<sup>4</sup> Longe kube. Sou a vanunua na pipigona sou lulusi a gona inani na mauma mine amutou, moni amutou auala ane sou me mu sautole liu a mapa ne sou. Ma mapa amutou sautole liu iodo, ei tola ane Salemo ni adoliu a inigogona pagu mine amutou. Ma tinola mine sou a vanunua na pipigona do, ei paleasi na tagilane Bibi Taula ei isa a sagagalina vuso.

<sup>5</sup> Na malada vuso amutou malu na magamaga, amutou guale a golu doadoana me amutou mongemonge. Amutou aani mamau ma aine amutou tubuosi na malada na valiputene amutou.

<sup>6</sup> Amutou vavasasi ane sou a bilesina vanunua me mu valiputemate sou. Moni sou ma saukiki ete a sagaline amutou me sou ma maubi liu oto ane amutou.

*Neitou toesagali a lilone eitou me neitou magitali e Bibi Taula ni veteliu*

<sup>7</sup> Maido me tamtamaigu, namutou magili sagali me mu tabule a mavaana, me mu magitali e Bibi Taula ni veteliu. Amutou muada, a bibi ei isa a mauma ei magitali a gona inani doa ni palea na mauma minei. Ei toesagaligali a lilone ei ni magitali a adavu pilu a oaso ne sulu goli a pipigona mine sulu, me mulimuli ei ni guale a gona inani.

<sup>8</sup> De amutou tamai namutou toesagali a lilone amutou me mu tabule a mavaana. Ilala mine Bibi Taula ni veteliu ei agaviosi.

<sup>9</sup> Amutou tamtamaigu, namutou ma ma- iadepintolatola lou balivua ne amutou oto, dae Salemo ni palea tomane a bibi mina vivilealena mei ni vavasa ane amutou. Longe. Bibi na vivilealena ino magili sala na tema.

<sup>10</sup> Amutou tamtamaigu, namutou damutale sou a profet mine Salemo lisa sou veimuade a inade na aisane Bibi Taula. Sou a butu sou toegegeli e sou, moni sou toesagali a lilone sou me sou tabule a mavaana. Namutou guale a inigogona mine sou, me mu ogomuli.

<sup>11</sup> Longe. Eitou veivei maido, "Sou a vanunua so toesagali a lilone sou me sou tabule a mavaana sou ugu kuba me sou mongemonge." Amutou longesi a mapamulina mine Iop, ei toesagali a lilone ei mei tabule a mavaana vuso i palea minei. Me amutou muada, mulimuli Bibi Taula ei goli

a inigogona kubaana usino ne ei. E, eitou muada, Bibi Taula ei dode mamai sele e eitou, me taliuluu ei lilomulimuli e eitou.

*Neitou ma veivei lei a inade ivu uata*

<sup>12</sup> Amutou tamtamaigu, munugana golu namutou goli ei maido. Namutou ma veivei lei a inade ivu uata. Namutou ma vatevate lei a inade ivu uata na langi ue magamaga ue golu tasa. Mane amutou longo, de namutou vei moni, "E," ei mapigogoi. Me mane amutou vei, "Boa," de namutou vei moni, "Boa," ei mapigogoi. Dae Salemo ni bilii e amutou a mapa pagu.

*Kinaka mina bilesina bibi ei isa a sagalina buo*

<sup>13</sup> Mane tasa mine amutou ei tabule a mavaana, de ei ni kake Salemo. Mane tasa mine amutou ei mongemonge, de ei ni ale a inala na masalalai ne Salemo.

<sup>14</sup> Mane tasa mine amutou ei isa a sinobe, de ei ni tole sou a vanua buobuo mina viepiluna kinaka ne sou asuale ei. Me na aisane Bibi Taula ne sou singi a wel na vovone ei, me ne sou kake Salemo ni toekube ei.

<sup>15</sup> Mane sou silimuli sele Salemo me sou kaka, de Bibi Taula ni toekube a bibi na sinobe do me ei ni mailisiliu lei e ei. Me mane ei goli a sinusu, io Bibi Taula ni lilotase a sinusu minei.

<sup>16</sup> Maido me amutou tastasa ne mu veipale a sinusu mine amutou usino me namutou kake Salemo ni toekube lei e amutou. Kinaka mina bilesina bibi ei isa a sagagalina buo, me ei mapigogoi sele ni buloi e sou sanii.

<sup>17</sup> Elaiia ei a bibi tasa tomane eitou. Moni ei kaka sagali usino ne Salemo ni ma longo oto a adavu ni pu, de adavu ma pu oto na magamaga mapigogoi a avala tolu ma game pantasa.

<sup>18</sup> Me mulimuli ei kaka lou, de langi ei longo a adavu i pu, ma gona inani ei palea iiti lou na mauma.

*Bibi ei asutase a vea, neitou gualeliu e ei*

<sup>19</sup> Amutou tamtamaigu, mane tasa mine amutou ei asutase a inade mine Salemo me ei asu maisaba, me tamaina tasa ei maasi liu e ei ni sauvule a lilona,

<sup>20</sup> de namutou damutale kube a inade ie. Mane tamaine amutou tasa ei asuale a bibi tasa ei goli a sinusu, me ei buloi e ei ni veletase a vea pagu me ei veteliu usino ne Salemo, de tamaina do ni gualeliu a maulina mine tamaina maino na minate. Na inigogona li Salemo ni lilotase a sinusu makuba sele.

## 1 Pita Munugana Laulau Pita ei niage

### *Ade munongena mine Pita*

<sup>1</sup> Eau e Pita, a aposel mine Iesu Krai, eau niage a laulau li usino ne amutou a vanunua ma tavivine Salemo i vileale, amutou malu maisabasaba mina avena ne Pontus, Galesia, Kapadosia, Esia me Bitinia tomane a mosimosi.

<sup>2</sup> Lisa otosi Salemo, Tamane eitou ei muadasi e amutou mei vilealesi e amutou palea a abuna minei oto. Na Maolona Nunu, Salemo ei toe e amutou palea maolo, me ne amutou ogomuli iiti a inade mine Iesu Krai. Na dalane Iesu, Salemo ei maavutiosii amutou me amutou palea alaba na matane Salemo.

Eau kake Salemo ei ni dode sele amutou me ei ni toimea a lilone amutou.

### *Neitou damutale taliuliu a maulina doana sele i ino oata na langi*

<sup>3</sup> Eitou beilange a aisane Salemo, ei e Tamane Bibi Taula mine eitou, Iesu Krai. Ei isa a lilomulina buo usinani ne eitou. Ei mailisi e Iesu Krai na minate, me na vea do Salemo ei bilii e eitou a maulina alaba. Ma maulina alaba do ei masagali e eitou neitou magitali e ei ni toeselese a golugolu doana ei kale ni bilii e eitou.

<sup>4</sup> Ei vilealesi eitou neitou guale a maulina doana oata na langi. A maulina do ei ni ma mamau oto me ei maolo sele na matane Salemo, me ei ni ma pulu oto. Salemo ei itealale kube a maulina do, ne mu guale na ilala amutou malu pilu e ei oata na langi.

<sup>5</sup> Amutou silimuli e Krai, me Salemo ei itealale amutou a sagagalina minei. Ei kale ni gualeliu a maulina mine amutou, ma maulina do, ei ni palea muada na punuluna malada.

<sup>6</sup> Nane a matamatana tinovo ei palea mei bilii e amutou a davutina me amutou lilibuu na ilala i boto. Moni namutou damutaletale a golugolu sou odo Salemo ei goli le amutou me ne amutou mongemonge.

<sup>7</sup> Na inigogona do Salemo ei tovetove a silimulina mine amutou. Eitou muada, a gol ei a golu doana sele, moni sou tuni na oavi, ve ne sou pogeputi ei a gol ivu ue boa. Silimulina mine amutou ei doana lou ana gol ei ni mamau. Maido me matamatana tinovo ei palea le amutou, ei mina tinovena silimulina, me ei ni maite i maido, amutou silimuli sele Krai ue boa. Me na punuluna malada, a ilala Iesu Krai ei palea muada, ei

ni mongemonge sele e amutou me ei ni bilii e amutou a aisa buo.

<sup>8</sup> Amutou saboa mu ite Iesu, moni amutou kale mamai sele ei. Seidei amutou ma ite ete ei, moni amutou silimuli e ei me amutou mongemonge sele. A munonge do ei se-leuli a munonge vuso mina magamaga ie, me eitou ma mapigogoi ete neitou ade i na asene eitou.

<sup>9</sup> Me Salemo ei gualeliuliu a maulina mine amutou, iede a vuna amutou silimuli e Krai.

<sup>10</sup> Lisa sou a profet sou tilo sagali a gualeli-una mine Salemo, me sou veipalesi a golu doana do Salemo ei ni goli le amutou.

<sup>11</sup> A Nunu mine Krai ei ino lilo na lilone sou a profet, na asene sou Nunu mine Krai ei adepalea a matamatana davutina Krai ei ni tabule me mulimuli ei ni guale a aisa buo. Me sou a profet sou tagutagu, “Sei malada a bibi na gualeliune eitou odo ei ni asu usinani?” Me “Sei golu ni palea na malada do?”

<sup>12</sup> Moni e Salemo ei maite e sou maido, a golugolu sou adeade i iodo i ma mapigogoi ete ne sou palea na ilala mine sou oto. Boa. Moni e sou a profet sou veipale a inade na golugolu Salemo ei ni goli mina gualeliune amutou. Me seidei Salemo ei peltase a Maolona Nunu muata na langi, me na sagagalina Maolona Nunu odo, sou a vanunua na veipalena malongolongona doana sou veiosi le amutou a golugolu Salemo ei goli. Sou a bineanea tamai sou kale mamai ne sou muada a golugolu doana Salemo ei goli le amutou.

### *Salemo ei toleale eitou neitou maolo*

<sup>13</sup> Maido me taliuliu namutou ulago kuba. Amutou ma goligoli lei tomane a bibi ei ma isa oto a damutatalana. Namutou silimuli sagali me mu magitali e Salemo ni goli a golu doana ei kale ni goli le amutou na ilala Iesu ei palea muada.

<sup>14</sup> Namutou muina tomane seleanini sou longoala. Lisa amutou ma isa oto a muadana, me amutou ogomuli a matamatana masagana pagu. Moni seidei namutou ma ogomulimuli lei a inigogona ie.

<sup>15</sup> Salemo ei maolo sele, ei tolealesi e amutou, maido me namutou maolo tamai na inasu vuso mine amutou.

<sup>16</sup> A Laulau mine Salemo ei vei maido, “Namutou maolo, vuna eau e Salemo mine amutou eau maolo.”\*

### *Salemo ei oliluale eitou a mapa buo sele*

<sup>17</sup> Amutou vate e Salemo e “Euma.” Euma do ei ma kale levi ete eitou. Boa. Ei ite a inigogona mine eitou tastasa mei vilemuli-ale eitou. Maido me na ilala amutou

\* 1:16 Pipigona mina Prist 11:44-45



malu na magamaga ie, namutou muada i maido, magamaga li ei ma aubu ivu oto mine amutou, me namutou tade moni e Salemo.

<sup>18</sup> Amutou muadasi i, lisa amutou ogo-mulimuli a inigogona pagu mine eisisune amutou. Moni e Salemo ei oliliuale amutou maino na inigogona pagu sou ie. Ei ma oliliuale ete amutou a golugolu ei mamaumau tomane a silva ue gol. Boa.

<sup>19</sup> Ei oliliuale amutou a dalane Kraiss. Daladala do a mapana i buo mamau. Kraiss ei tomane a natuna sipsip tasa ei ma isa oto a tuutuu ue poposi na vovone ei.

<sup>20</sup> Ilala Salemo saboa ei mapale a magamaga, ei vileale Kraiss mina oliliualene amutou. Na punuluna malada seidei ie Salemo ei toe e Kraiss palea muadasi mina buloine amutou.

<sup>21</sup> Ne Kraiss moni amutou silimuli e Salemo, ei e Salemo ei mailisi e Kraiss na minate mei bilii e ei a aisa buo. Maido me amutou magitalitali e ei ni goli a golugolu ei adegatunasi ni goli.

*Neitou kale sele e tamtamaine eitou*

<sup>22</sup> Amutou ogomuli a inade ivu, me na inigogona iedo amutou toe amutou oto mu palea alaba na matane Salemo. Me seidei amutou kalekale sele sou a vanunua ma tavivine sanii sea mine Salemo. Io, namutou kale mamai sele lou e tamtamaine amutou na lilone amutou vuso.

<sup>23</sup> Amutou palea alaba louosi. Moni amutou ma palea oto a vuavua gona inani ei mamaumau. Boa. Amutou palea a vuana gona inani ei muina taliuliu. A vuana gona inani iodo ei a inade mine Salemo, ei a inade ei isa a maolina me ei muina taliuliu.

<sup>24</sup> Laulau mine Salemo ei vei maido, "A vanunua ma tavivine vuso sou ma malu taliuliu oto na magamaga.

Sou pulu asi tomane a gulugulu, ma aisa buo mine sou ei pu tomane a sesena obuobu.

Gulugulu sou mamate, ma sesene sou lili, <sup>25</sup> moni a inade mine Bibi Taula ei muina taliuliu taliuliu."<sup>†</sup>

A inade do ei a malongolongona kubaana sou ademuadasi i ane amutou.

## 2

*Bibi Taula ei tomane a vatu ei isa a maolina*

<sup>1</sup> Amutou palea alabasi, maido me namutou litase a inigogona vuso pagupagu, ma inigogona adeualana ma inigogona lilogegeluna ma adeoovuna vuso, iede tamai namutou litase.

<sup>2</sup> Eitou muada, a mongomongo alaba ei kale mamai sele a susu. Tomane moni namutou kale mamai a kumialena susu maino ne Salemo, susu odo ei maolo me ei a inade mine Salemo. A susu odo i buloi a nunune amutou ni uusi buo me ei sagali na maolina alaba Salemo ei bilii e amutou.

<sup>3</sup> Amutou tovesi a inigogona kinale mine Bibi Taula, me amutou muada Bibi Taula ei doana sele.

<sup>4</sup> Amutou asuale ei e Bibi Taula, ei tomane a vatu tasa ei isa a maolina, moni sou damu ei a golu pagu me sou pitaselele ei, moni e Salemo ei matoalesi ei mei ite ei i doana sele.

<sup>5</sup> Maido me amutou tamai namutou palea tomane a vatu ei isa a maolina, me na sagalina mina Maolona Nunu Salemo ei ni toe amutou palea a luma minei oto Salemo ei tige a Maolona Nunu minei oto. Maido me namutou palea a abuna prist Salemo ei vileale minei oto, me na aisane Iesu Kraiss amutou mapigogoi ne mu bilii a maolina mine amutou usino ne Salemo tomane a niabi ei kale sele.

<sup>6</sup> Laulau mine Salemo ei isa a inade maido,

"Longe. Eau vilealesi a vatu tasa ni palea a munugana vatu mina toesagalina luma.

Ei doana mei sagali sele. Seidei eau tau e ei na loena e Saion.

Vanua sou silimuli e ei,

ne sou ma guale ete a maelana."<sup>\*</sup>

<sup>7</sup> Maido me Kraiss ei tomane a vatu doana sele ane amutou a vanunua sou silimuli. Moni ane sou a vanunua sou ma silimuli ete,

"A vatu odo sou a vanua na tinigena luma sou damu i ei pagu me sou pitaselele, seidei ei palea a munugana vatu mina toesagalina luma."<sup>†</sup>

<sup>8</sup> Me "Ei palea tomane a vatu ino na vea ne sou, me papaina mine sou ne sou bosa me sou mamau."<sup>‡</sup>

Sou bosa a vatu odo, vuna sou saukikiki a inade mine Salemo. Lisa Salemo ei veiosi ane sou ei ni goli simaido.

<sup>9</sup> Moni e Salemo ei vilealesi e amutou, me amutou paleasi a abuna vanunua ma tavivine minei bilesi, me amutou paleasi a abuna mina prist mine Mapana, me amutou paleasi a maolona vanunua ma tavivine mine Salemo, me amutou paleasi a abuna minei oto. Maido me amutou mapigogoi namutou veipale a inigogona doana vuso ei goli le amutou me ne mu veipale e ei, ei toleale amutou ne mu ilisitase a tunuui amutou ino i, me ei maasi e amutou ulilo na muada minei, ei muada doana sele.

<sup>†</sup> 1:25 Aisaia 40:6-8

<sup>\*</sup> 2:6 Aisaia 28:16

<sup>†</sup> 2:7 Laulau na Inala 118:22

<sup>‡</sup> 2:8 Aisaia 8:14

<sup>10</sup>Lisa amutou ino a vanunua ma tavivine sabubu, moni seidei amutou ino a abuna vanunua ma tavivine mine Salemo. Lisa amutou ma guale ete a lilomulina mine Salemo, moni seidei amutou gualesi.

*Neitou palea a vanunua na pipigona mine Salemo*

<sup>11</sup>Tamtamaigu ivu, amutou eili na magamaga ieli tomane sou a vanunua mina avena seasea me tomane sou a mosimosi. Maido me eau vei sagali le amutou maido, namutou lametase a masagana vuso pagu mina lilomumuguna, iede sou maububi ana nunune amutou.

<sup>12</sup>Amutou namutou asu bilesi balivua mine sou a vanunua sou ma muada oto e Salemo. Mane amutou goli maido, vanunua ne sou adegegeli e amutou, moni mulimuli ne sou ite a inigogona doana mine amutou, me ne sou beilange a aisane Salemo na malada ei ni asu usinani.

<sup>13</sup>Namutou damutaletale Bibi Taula me mu ogomuli a inade mina matamatana vanua na itealalena binea. A mapana ei ino a munugana sele, me ne mu ogomuli a inade minei.

<sup>14</sup>Me namutou ogomuli tamai a inade mine sou a munugana vanua na binea sou itealale a aveavena buobuo. Mapana ei tau e sou mina maliuna mapa pagu mine sou a vanua sou goli a inigogona pagu, me mina beilangena aisane sou a vanunua sou goli a inigogona doana.

<sup>15</sup>Salemo ei kale ne amutou goli a inigogona doana moni, maido me amutou mapigogoi ne mu sausobe a asene sou a vautana vanunua sou ma isa oto a muadana me sou adegegellugelu e amutou.

<sup>16</sup>Namutou asu tomane sou a vanua sou malamala. Moni amutou ma damudamu lou ve, “Seidei amiteu malamala, maido me amiteu mapigogoi namiteu goli a matamatana inigogona pagu.” Boa vuso sele. Namutou asu tomane sou a vanua na pipigona mine Salemo.

<sup>17</sup>Ne amutou tade a vanunua ma tavivine vuso, me mu bilii a lilone amutou usino ne sou a vanunua ma tavivine seasea mine Salemo. Ne amutou lae e Salemo me mu matano moni minei. Me namutou tade sou a mapamapana.

*Neitou ogomuli a inigogona mine Kraisi me neitou ma balebale lou*

<sup>18</sup>Amutou a vanua na pipigona, ne amutou matano ne sou a vanua sou itealale amutou, me mu ogomuli iiti a inade mine sou. Eau ma ade oto a vanua na itealalena doana moni, iede sou a munuganuga sou lilomea aine amutou. Amutou ne mu

matano ne sou a vanua na itealalena pagu tamai.

<sup>19</sup>E, mane sou bilii sabubi a davutina usino ne amutou, moni namutou damutale e Salemo me mu tabule a davutina do, io Salemo ei ni maibalave amutou.

<sup>20</sup>Mane amutou goli a inigogona pagu me sou valibili e amutou me amutou tabule a davutina do, ne amutou guale a sei golu na golu ie? Moni mane amutou goli a inigogona doana me sou valibili e amutou me amutou tabule a davutina do, io Salemo ei ni maibalave amutou.

<sup>21</sup>Salemo ei tolealesi e amutou mina ogomulina matana inigogona simaido, vuna Kraisi tamai ei tabule a davutina mina buloine eitou. Ei maitesi e amutou a inigogona minei iedo, ve ne amutou ogomuli.

<sup>22</sup>Ei ma goli ete a sinusu, me tamai ei ma goli ete a inade na aualana tasa. §

<sup>23</sup>Sou adegegeli e ei, moni ei ma maliu ete a inade pagu usino ne sou. Ei tabule a davutina, moni ei ma goli ete a inade mina toegegeline sou. Boa. Ei tau e ei oto na limane Salemo i vilemuliale bilesi a golugolu vuso.

<sup>24</sup>Kraisi ei kulu na tauvaleuti me ei tabule a sinusu mine eitou na vovone ei oto. Ei goli maido ve neitou litase a inigogona sinusu vuso me neitou maui me neitou ogomuli a inigogona bilesi vuso. Sou valibili gegeli e ei, me na davutina ei tabule do ei toekubesi e amutou.

<sup>25</sup>Amutou vuso tomane a sipsip sou asu maisabasaba. Moni seidei amutou veteliusi usino na Bibi na itealalena sipsip odo, ei itealale kube a nunune amutou.

### 3

*Inade usino ne sou a taulalaina*

<sup>1</sup>Tomane moni, amutou tavivine mu taulalai, namutou matano moni ne suasuane amutou. Me mane amutou goli maido, sanii ne sou a vanunua sou ma ogomulimuli ete a inade mine Salemo, ne sou ite a inigogona kubaana mine amutou, me ne sou sauvule a lilone sou,

<sup>2</sup>vuna sou ite e amutou tavivine amutou asu bilesi me mu matano moni ne sou.

<sup>3</sup>Amutou ma malolomelome lei a vovone amutou masala moni a inigogona malolomena aivu me tinau a gol ma matamatana malasana kinainai.

<sup>4</sup>Kubaana lou namutou malolome a lilone amutou a matamatana malolomene ei ma mapigogoi ete ni mamau. Matana malolomene maido, ei a inigogona mina lilokubaana ma lilomeana. A matana inigogona do ei kubaana sele na matane Salemo.

<sup>5</sup> Lisa tavivine sou maolo me sou magitali e Salemo ni goli a gologolu ei adegatunasi, sou malolomelome sou oto a matana inigogona maido me sou muina matano ne suasuane sou.

<sup>6</sup> Sara ei ogomuli a inade mine Abraham me ei vate ei a "bibu buo." Mane amutou goli a inigogona kubaana me amutou ma lae oto a golu tasa, io amutou tomane natatune Sara.

<sup>7</sup> Amutou vanunua mu taulai, namutou goli tamai a inigogona doana usino ne sususune amutou a damutatalana doana. Vovona tavivine ei ma sagali vauta oto, maido me namutou ugu kuba pilu e sou. Ne amutou muada i maido, tavivine tamai ne sou guale a maulina i muina taliuliu pilu e amutou. Mane amutou ogomuli a inigogona li, io a golu tasa boa ei ni magilisobe a kinaka mine amutou.

*Taliuliu neitou maite a inigogona kubaana usino ne sou seasea*

<sup>8</sup> Seidei eau kale na mapuli a inade li usino ne amutou vuso maido, namutou lilo tasa moni me mu lilomuli e sou a vanunua. Me ne amutou kale sele a vanunua ma tavivine sanii mine Salemo me mu dode sou, me mu litase a inigogona na toevautautana.

<sup>9</sup> Mane a vanunua sou toegegeli e amutou, io namutou ma adovedove lei. Mane sou lobe e amutou, io namutou ma maliuliu lei a mailobena mine sou. Ne amutou kake Salemo ni toekube sou. Salemo ei toleale amutou ne mu guale a maibalavana minei.

<sup>10</sup> Eitou muada,  
"Mane a bibi ei kale a maulina minei ni palea kubaana,  
me ei kale ni ite a ilala kubaana,  
io ei ma gologoli lei a inade pagu  
me ei ma gologoli lei a aualana inadenade.

<sup>11</sup> Ei ni lametase a inigogona pagu, me ei ni ogomuli moni a inigogona kubaana.  
Ei ni toe a lilomeana pilu e sou a vanunua ma tavivine sea, me ei ni ogomuli sagali a inigogona simaido.

<sup>12</sup> Vuna maido, Bibi Taula ei itealale sou a bilesina vanunua ma tavivine,  
me ei beli a tagilane ei na kinakanaka mine sou.

Moni e Bibi Taula ei ma kale ete sou a vanunua ma tavivine pagupagu.\*

*Neitou tabule a davutina a inigogona kubaana*

<sup>13</sup> Mane amutou ogomuli sagali a inigogona kubaana, io sei ni toegegeli e amutou? Boa.

<sup>14</sup> Moni mane amutou goli a inigogona bilesi, me amutou tabule a davutina a golu

ie, io ne amutou mongemonge. Mane sou toenilae amutou, io amutou ma laelae lou e sou. Ma lilone amutou ni ma sagasaga lou.

<sup>15</sup> Moni na lilone amutou, ne amutou tau e Krai tasa moni ni muina e Bibi Taula mine amutou me mu tade ei. Me mane sou tagi e amutou a vuna golu kubaana ie amutou magitalitali ie, io ne amutou masusulu taliuliu a maliuna inade usino ne sou pilu a lilomeana ma tinade.

<sup>16</sup> Moni taliuliu ne amutou ugu bilesi na matane Salemo. Io, a vanua sou adegegeli me sou adepintola ana inigogona kubaana amutou goli, ne sou maela a inade sou goli iedo.

<sup>17</sup> Mane eitou guale a davutina a inigogona kubaana eitou goli, ei a masagana mine Salemo mei kubaana. Moni mane eitou guale a davutina a inigogona pagu eitou goli, ei a golu i pagu.

*Krai ei mate mei ilisiliu mina gualeliune eitou*

<sup>18</sup> Krai ei a bilesina bibi, moni ei puisobe a muina vanunua ma tavivine mina sinusu, me ei mate matasa moni mina gualeliune sou vuso, maido me ei maasi e eitou usino ne Salemo. Na vovo ei mate, moni na nunu ei mauili.

<sup>19</sup> Ei muina a nunu mei asu malongo a inade usino ne sou a nunu sou ino na aubu na mavove davutina.

<sup>20</sup> Nunu sou odo sou saukiki a inade mine Salemo na ilala mine Noa. Moni e Salemo ei ma adove asi ete sou. Ei magitali asu mapigogoi e Noa ei tige a kuta minei. Ma vanunua ma tavivine pantolu moni, sou sae uata na kuta me Salemo ei gualeliu e sou maino na nanu buo.

<sup>21</sup> A nanu iedolo ei a nunu mina maavuvutuna, vuna Salemo ei gualeliu e eitou a nanu na maavuvutuna. Maavuvutuna ei mina taulelena mumuguna vovone eitou boa. Ei a adegatunana amutou goli le Salemo ne amutou muine amutou alaba na matane ei. Mina gualeliune amutou, Salemo ei mailisi e Iesu Krai maino na minate,

<sup>22</sup> me seidei Krai ei asu uata na langi, me ei ugu na limane Salemo e gata. Me sou a bineanea me sou a sagalina nunu ma gologolu vuso sou isa a sagalina, sou vuso sou muina moni matano ne ei.

## 4

*Neitou litase a inigogona lilomumuguna*

<sup>1</sup> Krai ei tabulesi a davutina na vovone ei, maido me namutou tamai masoo tuatua tomane ei. Vuna mane sei bibi ei tabule a davutina na vovone ei, io ei litasesi a inigogona sinusu.

\* 3:12 Laulau na Inala 34:12-16

<sup>2</sup> Maidolo me avala visa saboa ino na maulina minei, io ei ni ma ogomuliosi a masagana lilomumuguna. Ei ni ogomuli moni a masagana mine Salemo.

<sup>3</sup> Avala asu mapigogoi e amutou ogomuli a inigogona lilomumuguna tomane a vanunua masala sou goli, iede sou a inigogona sualolona, ma mailisina golugolu pagu, ma inigogona matalilili, ma inani papai sele ma niununa nanu sagaligali makuba, ma gunolina inigogona mamau, ma kinaka ane sou a salemo auala.

<sup>4</sup> Seidei amutou ma goligoli ase a matana inigogona pagupagu ieli pilu e sou masala. Me sou saga a golu ieli, me sou lobe amutou.

<sup>5</sup> Moni mulimuli ne sou magili na vavasana mine Bibi Taula me ne sou vei le ei a golugolu vuso sou goli. Bibi mina vilemulialena ei ni vileale a vanunua sou mauli me sou mate.

<sup>6</sup> Na vuna moni iedo vanunua ma tavivine sou matesi sou longe a malongolongona kubaana na ilala saboa sou mate. Ivu, sou mate tomane moni a vanunua ma tavivine vuso sou goli a sinusu me ne sou mate, moni seidei a nunune sou ei mauli tomane Salemo oto.

*Niabi vuso Salemo ei bilii e eitou neitou iteale kube*

<sup>7</sup> Ilala mina golugolu vuso ni pulu ei agaviosi. Maido me ne amutou damutatala kuba, me mu iteale kube a inigogone amutou, me mu kaka sagali.

<sup>8</sup> Palapala amutou tastasa namutou maikalo baoli sele, vuna a inigogona kinale sele usino ne sou sea, ei avipope a sinusu makuba.

<sup>9</sup> Mane a vanunua ma tavivine sanii mine Salemo sou asu usinani me sou ugu pilu e amutou, io ne amutou iteale kube sou. Amutou ma lilogegelugelu lou a gunolina pipigona ie.

<sup>10</sup> Salemo ei dode amutou vuso tastasa me ei bilii e amutou a matamatana niabi. Maido me ne amutou tastasa palea a bibi na pipigona kubaana mine Salemo, me mu iteale a niabi sou odo mina buloina vanunua ma tavivine mine Salemo.

<sup>11</sup> Mane a bibi tasa ei kale ni malongo a inade, io ei ni malongo bilesi a inade mine Salemo. Mane a bibi tasa ei pipigo a buloine sou sanii, io ei ni goli a pipigona ie na sagalina Salemo ei bilii e ei. Maido me ne sou ite a golugolu vuso amutou goli, me na aisane Iesu Krai ne sou beilange a aisane Salemo. Ei isa a aisa buo ma sagagalina buo ei muina taliuliu taliuliu. Moliانا.

*Neitou mongemonge a tabulena davutina tomane Krai*

<sup>12</sup> Tamtamaigu ivu, a tivulana buo tomane a oavi ei palea le amutou, moni e amutou ma sagasaga lou me mu damu ve ei a golu sea sele. Boa.

<sup>13</sup> Amutou tabule a davutina tomane Krai ei tabule, maido me ne amutou mongemonge, vuna na ilala Krai ei palea muada pilu a aisa buo minei, amutou mapigogoi ne mu mongemonge sele me mu lilokuba sele.

<sup>14</sup> Amutou lapitole a aisane Krai, me mane na golu ieli sou lobe amutou, io ne amutou mongemonge. Vuna a Nunu mine Salemo ei a Nunu ei isa a aisa buo ma sagagalina, ei pilu e amutou.

<sup>15</sup> Mane amutou isa mavaana namutou tilale, dae a mavaana ei ni asu maino na valiputematena bibi ue paaalina ue a matamatana inigogona pagu ue toemaisabena pipigona mine sou sanii.

<sup>16</sup> Moni amutou a kristen, mane amutou tabule a davutina, io amutou ma maelaela lou. Namutou mongemonge a aisa kristen, me mu beilange a aisane Salemo.

<sup>17</sup> Ilala Salemo ei mailisi a vavasana ane eitou a abuabuna minei oto, ei paleasi. Me mane a vavasana ei soke ne eitou pala, io ei ni pulu matina na vanunua sou saukiki a malongolongona kubaana mine Salemo?

<sup>18</sup> Laulau mine Salemo ei vei maido, "Mane ei sana sele a gualeliune sou a bilesina vanunua,

io a vanunua sou lametase Salemo me sou goli a sinusu, ne sou matina?"\*

<sup>19</sup> Maido me mane na masagana mine Salemo a vanua sanii sou tabulebule a davutina, io a vanua do ne sou tau a maulina mine sou na limane Salemo me ne sou ogomuli moni a inigogona kubaana. Salemo ei mapale eitou ei itealale iiti sele eitou taliuliu.

## 5

*Amutou vanua buobuo namutou iteale kube a vanunua ma tavivine mine Salemo*

<sup>1</sup> Seidei eau isa a inade usino ne amutou a vanua buobuo mina viepiluna kinaka. Eau tamai eau a bibi buo tomane amutou, me na matagu oto eau ite Krai ei tabule a davutina. Me eau tamai pilu e amutou, eitou vuso neitou guale a golugolu doana do Salemo ei ni bilii e eitou na ilala sagagalina ma aisa buo mine Krai ei palea muada.

<sup>2</sup> Ne amutou iteale kube a sipsip mine Salemo, sou a vanunua ma tavivine mine Salemo na limane amutou. Me amutou ne mu mongemonge a gunolina pipigona do me namutou goli a pipigona do na masagana ivu mine amutou tomane Salemo ei kale namutou ogomuli. Ei na

\* 4:18 Niugugu Doana 11:31

puiale ete a vanunua buobuo sanii abesuli e amutou me amutou goli a pipigona do. Me namutou ma gologoli lei a pipigona do mina gualena vatu moni.

<sup>3</sup> Namutou ma toetoe lei tomane a vanunua buobuo me mu taupui e sou a vanunua ma tavivine Salemo ei tau na limane amutou. Boa. Amutou namutou goli a inigogona doana moni, ne sou ite me sou ogomuli.

<sup>4</sup> Mane amutou toe maido, io ilala a Munugana Bibi ei Itealale a sipsip ei sibitala muada, namutou guale a malasana kele, ede a mapa i muina taliuliu mei ma mamau-mau oto.

*Neitou tau e eitou oto na limane Salemo*

<sup>5</sup> Tomane moni amutou alalaba, namutou matano moni ane sou buobuo. Me amutou vuso tastasa namutou ogomuli a inigogona taupuine amutou oto mina maibuloina. Eitou muada,

“Salemo ei taupui a vanunua sou beilange a aisane sou oto,  
mon i ei dode me ei toeiiti sou a vanunua sou taupui e sou oto.”\*

<sup>6</sup> Maido me namutou taupui a masagana mine amutou oto me mu matano moni na sagagalina limane Salemo. Na ilala ei oto ei vileale, ei ni beilange e amutou.

<sup>7</sup> Salemo ei dode e amutou. Maido ma mavaana vuso amutou tabule, iede namutou tau na limane ei.

<sup>8</sup> Namutou masusulu me mu ulago kuba. Satan, a butu mine amutou odo, ei tomane a laion ei alabangenge sagali. Taliuliu ei gagaga mina tilomulina vanunua ma tavivine mina busongene sou.

<sup>9</sup> Moni namutou magili sagali na silimulina me mu saukiki e ei. Amutou muada, a vanunua ma tavivine mine Salemo sou ino na aveavena vuso na magamaga, sou tamai sou tabule a matana mavaana tomane amutou.

<sup>10</sup> Salemo ei a vuna dinodo vuso. Ei toleale amutou lilo ne Krai Iesu, ne amutou malu pilu e ei na muada doana minei i muina taliuliu. Maido me namutou tabule a davutina na ilala i boto moni, me mulimuli ei oto ni toe iiti lei e amutou, mei masagali a silimulina mine amutou, mei toe e amutou namutou magili sagali taliuliu.

<sup>11</sup> Sagagalina vuso ei ni muina taliuliu taliuliu ne Salemo. Moliana.

*Punuluna inade sanii*

<sup>12</sup> Na limane Sailas eau niage a inade boto ieli usino ne amutou. Sailas ei tamaine eitou ivu. Na laulau ieli eau kale na vei le amutou a inigogona vuso Salemo ei ni maite e amutou a dinodo minei. Eau oto eau muadasi i, ei a dinodo ivu mine Salemo,

maido me eau ademuada e ei. Me eau kale na mailisi a lilone amutou ne amutou magili sagali i.

<sup>13</sup> Sou a viepiluna kinaka ino ne Babilon, iede a vanunua ma tavivine Salemo ei vilealesi pilu e amutou, sou vate oaso kubaana usino ne amutou. Me natugu e Mak, ei tamai ei vate oaso usino ne amutou.

<sup>14</sup> Amutou vuso namutou mailapulima pilu e sou a kristen sanii sea mina maitena maido amutou kale sele sou.

Amutou valitole e Krai, lilone amutou ni mea moni.

\* 5:5 Niugugu Doana 3:34

## 2 Pita Maluana Laulau Pita ei niage

### *Ade munongena*

<sup>1</sup> Eau e Saimon Pita, eau a bibi na pipigona ma aposel mine Iesu Kraiss, ei e Salemo mine eitou, me ei e Bibi na gualeliune eitou. Eau niage a inade ieli usino ne amutou a vanunua ma tavivine amutou guale a silimulina ei kubaana sele. Na inigogona bilesi mine Iesu Kraiss, silimulina mine amutou i palea tasa moni tomane a silimulina mine amiteu.

<sup>2</sup> Seidei amutou guale a muadana doana mine Salemo me mine Iesu, Bibi Taula mine eitou. Na inigogona ieli a dinodo ma lilomeana ni palea buo mamau sele na maulina mine amutou.

### *Salemo ei vileale eitou minei oto*

<sup>3</sup> Iesu Kraiss, na maolona sagagalina mine ei oto, ei bilii e eitou a golugolu vuso mina toesagalina maulina mine eitou me mina buloina inasu mine eitou na inigogona mine Salemo. Na inigogona maido, Kraiss ei toe eitou neitou muada kuba e ei oto. Na aisa buo ma sagagalina minei ma inigogona kubaana sele minei, ei toleale eitou

<sup>4</sup> mei bilii e eitou a golugolu vuso i doana sele me ei buo mamau tamai, golugolu sou edo lisa ei gatunasobesi ni bilii e eitou. Inigogona mina lilovilivilina ei eili ne eitou a vanunua ma tavivine mina magamaga me ei toegegeligeli sele eitou. Moni e Kraiss i bilii vusesi a golu kubaana li usinani ne eitou, me na inigogona li ei kale ni buloi e amutou, ne amutou asuleletase a inigogona pagu sou ieli, me namutou guale a maolona maulina mine Salemo oto.

<sup>5</sup> Maido me namutou toesusui a inigogona kubaana muata na silimulina mine amutou.

<sup>6</sup> Me namutou toesusui a muadana muata na inigogona kubaana, me namutou toesusui a niitealene amutou oto muata na muadana, me ne amutou toesusui a tabulena mavaana muata na niitealene amutou, me namutou toesusui a inigogona maolona muata na tabulena mavaana,

<sup>7</sup> me namutou toesusui a maitamtamaina muata na inigogona maolona, me namutou toesusui a biliina lilone amutou muata na maitamtamaina ivu.

<sup>8</sup> Mane amutou guale sou a matana inigogona ieli me sou palea buo sele lou ne amutou, de a muadana mine amutou ne Iesu Kraiss, Bibi Taula mine eitou iedo ni

ma buale oto me ei ni toe a pipigona mine amutou ni vuale a vuana doana sele.

<sup>9</sup> Moni a bibi ei ma isa oto a inigogona sou ieli, ei ni ma mapigogoi ete ni ite sou a golu ino bulago, me ei tomane a bibi mata ego. Ivu, Salemo i taulelesi a sinusu vuso ei goli lisa mei toe ei palea alaba, moni a bibi iedo ei danivusesi a golugolu sou iedo Salemo i goli le ei.

<sup>10</sup> Tamtamaigu, Salemo i tolealesi e amutou mei vilealesi amutou a abuna minei oto. Maido me ne amutou pipigo sagali ne amutou muina a abuna ivu minei. Mane amutou goli maido, io amutou ma mapigogoi ete namutou bosa.

<sup>11</sup> Me Iesu Kraiss, Bibi Taula mine eitou me Bibi na gualeliune eitou ei ni pee vuse sele a vea vuso ane amutou namutou gali ulilo na avena mina munonge i muina taliuliu taliuliu.

<sup>12</sup> Ivu, amutou muadasi i a golugolu ieli, me amutou gualesi a inade patotona dolo, me amutou magili sagaliosi i. Moni eau ma kale ete namutou danivuse, maidolo ma ilala taliuliu eau kale na vei lei le amutou.

<sup>13</sup> Na ilala eau saboa eili na vovo ie, eau damutale ei kubaana eau na vei lei le amutou mina mailisina damutaleleina golugolu sou ie.

<sup>14</sup> Eau muada, bisii moni eau na buale. Bibi Taula mine eitou Iesu Kraiss ei veiosi le eau simaido.

<sup>15</sup> Maidolo me eau kale na vei sagali le amutou. Na ilala eau matesi, de taliuliu namutou damutale lei a golugolu vuso eau vei le amutou iedo.

### *Sou a aposel sou ite a muada buo mine Salemo ino ne Kraiss*

<sup>16</sup> Amiteu veiosi le amutou a sagagalina ma veteliuna mine Bibi Taula mine eitou, Iesu Kraiss. Moni ilala amiteu ade ane amutou a inade mine Kraiss ieli, amiteu ma ogomuli ete a mapamulina sabubu ei palea maino na damutatalana mine sou a vanunua. Boa. Na matane amiteu oto, amiteu ite a muada buo ma sagagalina mine Salemo i palea ne ei, maidolo me amiteu ade i.

<sup>17</sup> Salemo Tamane eitou i bilii e ei a aisa buo ma muada buo. Me Salemo oto ei ino na muada buo sele mina langi iedo me ei ade e Iesu maido, "Ielili ei e Natugu, eau kale mamai sele e ei, me eau mongemonge e ei."\*

<sup>18</sup> Amiteu muina pilu e ei na maolona loena, me amiteu longe a inade do muata na langi.

<sup>19</sup> Me amiteu isa a inade mine sou a profet i mapigogoi namiteu silimuli, ei tomane a lada ei ladevei a avena tunuui. Maido me namutou tamai lapitole sagali a inade ieli

\* 1:17 Matiu 17:5; Mak 9:7; Luk 9:35

i asu mapigogoi a ilala toesese ei ilisi lilo mina lilone amutou.

<sup>20</sup> Golu buo namutou muada i ei maido. Neitou ma ogomulimuli lei a damutatalana mine eitou oto me eitou veipale a vuna inade mina profet vuso ino lilo na Laulau mine Salemo.

<sup>21</sup> Vuna, inade mina profet ei ma palea oto na masagana mina bibi, moni Maolona Nunu oto ei mailisi e sou a vanunua, me sou malongo a inade Salemo ei bilii e sou.

## 2

*Vanua na aualana sou toemaisabe a damutatalana mine sou a kristen*

<sup>1</sup> Ivu, lisa sanii mina aualana profet sou ilisi balivua ne sou e Israel. Tomane moni a vanua sanii ne sou ilisi balivua ne amutou tamai, me ne sou auala a matetengine sou a vanunua ma tavivine a golugolu mine Salemo. Ne sou ovu me veipale a matamatana adeaualana balivua ne amutou, ede sou a inadenade mina toegegeline silimulina mine amutou. Bibi Taula ei oliliu e sou, moni ne sou lametase Bibi Taula. Na inigogona mine sou ieli, saga i ne sou mamau.

<sup>2</sup> A vanunua papaina ne sou ogomuli a matamatana inigogona pagu mine sou. Me ielili ni toe a vanunua ne sou adegegeli a vea mina inigogona i patotona.

<sup>3</sup> Vanunua sou odo, sou a vanunua mina niisualena sele, maidolo me ne sou goli a adeaualana papaina mina lapualena vatu mine amutou. Moni lisa oto sele Salemo ei vileale a malada mina vavasana ane sou, me ei ade e sou ne sou buale. Ma mamauna do ni palea le sou ei ni ma buale oto. Ei ni muina moni.

<sup>4</sup> Amutou muada, lisa a bineanea sanii sou goli a sinusu, me Salemo i ma itetase ete sou. Ei papale sou a sen mei lange sou na aubu na davutina, a aova i tunuu sele ino iodo. Me ne sou muina moni maido asu mapigogoi a malada mina vavasana buo mine Salemo.

<sup>5</sup> Ei tamai ma itetase ete a vanunua ma tavivine lisa sou lametase Salemo. Ei peltase a sali buo i palea le sou me ne sou buale. Moni e Noa ei a bibi na veimuadena inigogona bilesi. Me Salemo ei gualieliu e ei pilu a vanunua ma tavivine padilua minei.

<sup>6</sup> Me tamai Salemo ei sulii e Sodom pilu e Gomora a oavi, ma kavou na oavi moni ei muina. Ei toegegeli a aubu buobuo lua dolo su mamau vuso. Maidolo me mulimuli a vanunua sou lametase Salemo, sou damutale a golu i sibatila ne Sodom me Gomora, me ne sou muada a golu ei ni palea le sou tamai.

<sup>7</sup> Moni a bilesina bibi iedo e Lot ei muina ne Sodom mei ite a matamatana inigogona

pagupagu iedo, ma lilone ei i mavaa sele. Me Salemo ei gualieliu e Lot, me ei ma mamau oto.

<sup>8</sup> E, a bilesina bibi ieli ei ino balivua ne sou mei ite a inigogona pagu mine sou mei longe a mailobena mine sou na malada vuso. Maido me lilone ei i mavaa sele a inigogona saukikina binea sou goli.

<sup>9</sup> Io, eitou muada, mane a tinovo i palea le sou a vanunua sou ogomuli e Salemo, de Bibi Taula ei muada a vea mina gualieliu sou maino na tinovo do. Me Bibi Taula ei muadasi a inigogona mine sou a vanunua pagupagu, me ei muada a vea mina maliuna mapa pagu ne sou i asu mapigogoi na malada mina vavasana buo mine Salemo.

<sup>10</sup> Vanunua sanii ne sou gualie a mapa pagu buo mamau lou. Ede a vanunua lilone sou i ilisilisi a gunolina inigogona sualolona i mumugu sele, me sou damudamu i a inade mine Bibi Taula ei a golu sabubu. Vanunua pagupagu odo sou toevautauta me sou ogomulimuli a masagana mine sou moni. Me sou ma lae sapesapa oto a adegegeline sou a bineanea mina aubu na langi.

<sup>11</sup> Moni a bineanea mine Salemo sou vululusi sele sou a vanua iedo, me sou isa a sagagalina buo mamau sele, moni sou ma adegegeliugelu oto ane sou me sou ma vavasava oto ane sou na matane Bibi Taula.

<sup>12</sup> Vanunua dolo sou tomane a viuvii masivo sou palea na magamaga, mina vanunua ne sou saavi me sou valipute moni e sou, sou ma isa oto a muadana me sou ogomulimuli a masagana mina vovo moni. Golu sou ma muada oto i, ede sou adegegeliugelu i. Ne sou mamau na inigogona tasa moni tomane a viuvii masivo sou mamau.

<sup>13</sup> Sou goli a matamatana inigogona pagu usino ne sou, ma vanua sanii sea ne sou malii a inigogona pagu mine sou. Sou damu a inigogona mina inani ma niinu papaina na oaso, ei a inigogona mina munongena sele. Sou aaniani pilu e amutou, me sou goli e amutou oto mu palea mumugu me sou toegegeli a aisane amutou. Sou mongemonge a inigogona na aualana sou goli.

<sup>14</sup> Taliuliu sou matapepealale sou a tavivine me sou damutaletale a gunolina inigogona sualolona. Sou ma pulupulu oto a gunolina inigogona maido. Sou toegolalali e sou a vanua a silimulina mine sou ma sagali oto, me sou goli asi a inigogona mina isualena. Maido me Salemo ni toegegeli sele sou.

<sup>15</sup> Sou lametase a vea i bilesi, me sou asu vautauta maisaba. Sou ogomuli a vea mine Balam, natune Beor. Ei goli a sinusu

me ei kale mamai sele a gualena mapa na inigogona pagu minei iedo.

<sup>16</sup> Moni a donki minei ei ade tomane a bibi, mei sinoa ane Balam a inigogona pagu minei. Me na inigogona iedo, donki i toe a profet ei ma goli ete a inigogona vautana do ei damutale ni goli.

<sup>17</sup> Sou a vanua dolo sou tomane a aova na nanu i tagasasi. Me sou tomane a ausa, avilivi buo i valitase maisabe sou. Salemo i masulusioi a aubu i tunuui salasala sele ane sou.

<sup>18</sup> Vanunua do sou ngala mamaumau me sou toebibibi sabubu na inade pagupagu mine sou. Sou toegolalali a vanua simoni moni sou litase a inigogona pagu mine sou a vanua masala, ne sou goli a inigogona sualolona ma matamatana inigogona pagu mina vovo.

<sup>19</sup> Sou a vanua pagupagu odo sou vei ve, “Mane amutou ogomuli e amiteu, ne amutou ugu malamala.” Moni sou oto sou tomane a vanua na pipigona sabubu na inigogona mina mamauna, vuna i maido, mane a bibi tasa i itetase moni a golu tasa ni iteale ei, bibi iedo ei muina tomane a bibi na pipigona sabubu mina golu odo.

<sup>20</sup> Mane a vanunua sou muada e Iesu Kraisi, Bibi Taula mine eitou ma Bibi na gualeliune eitou, ma muadana iedo ei buloi e sou na taulelana inigogona mumugu nani na magamaga, moni mane sou veteliuale lei a matana inigogona iedo, io a maulina mine sou ni mamau sele lou.

<sup>21</sup> Puiale lou ne sou ma muada oto a vea mina bilesina inigogona, vuna i maido, seidei sou muada a vea ieli me sou guale a binea mine Salemo oto, moni sou lametasesi e ei.

<sup>22</sup> Golu ei palea le sou odo, ei tomane a patotonana inade tasa ei vei maido, “Buse i alualuasi me ei veteliu mei ani liu a alualuane ei.” Ma inade tasa lou ei maido, “Bolo ei avutuosi na nanu, moni ei asu tulibubuli maisabe ei na pata.”\*

### 3

#### *Patotona sele Bibi Taula ni veteliu*

<sup>1</sup> Amutou tamtamaigu ivu, ielili a maluana laulau seidei eau niage le amutou. Na laulau lua ieli eau mailisi e amutou a damutaleliuna golugolu sou iedo, ma damutatalana mine amutou ni muina bilesi vuso.

<sup>2</sup> Eau kale namutou damutale lei a inade mine sou a profet mine Salemo sou ademuada i. Me namutou damutale tamai a binea mine Bibi Taula, ei a Bibi na gualeliune eitou. Amutou longe a binea iedo na asene sou a aposel.

<sup>3</sup> Moni a golu buo ne amutou muada i ei maido. Na ilala mina punuluna malada sou a vanua mina adepintolana ne sou palea, me ne sou ogomuli a masagana pagu na lilone sou.

<sup>4</sup> Ne sou adepintola maido, “Ei vei ve ei ni veteliu lou, io? De ei ino iva? Ei ma mapigogoi ete ni asu usinani. Ilala sou e tubutubune eitou sou mamate, i asu mapigogoi seidei, golugolu vuso ei muina tasa moni tomane lisa a magamaga i palea i.”

<sup>5</sup> Sou ma kale ete ne sou damutatala iiti me ne sou muada a golu maido lisa oto sele Salemo i ade ma langi ei palea, me Salemo i mapale a magamaga maino na nanu.

<sup>6</sup> Maido me, mulimuli Salemo ei peltase a sali buo, ma sali buo do i avisobe a magamaga iedo, ma magamaga i mamau vuso.

<sup>7</sup> Me seidei, na matana inade tasa moni mine Salemo, langi ma magamaga i muina me sou magitali a oavi ni palea mei toegegeli e sou. Langi ma magamaga i magitali a malada na vavasana buo ei ni palea, ma vanunua sou lametase Salemo, ne sou mamau vuso.

<sup>8</sup> Tamtamaigu ivu, amutou ma danivusevuse lei a golu tasa ie. Na damutatalana mine Bibi Taula, malada tasa ei tomane a avala savuluvulu tasa (1,000), ma avala savuluvulu tasa ei tomane a malada tasa.

<sup>9</sup> Bibi Taula ei ma pipigo kekeke oto na mapalena golu ei gatunasobe ni goli tomane a vanua sanii sou veivei. Boa. Moni ei ma kale ete na bibi tasa ni buale. Ei kale a vanunua vuso ne sou sauvule a lilone sou, maido me ei toekekeke ane amutou me ei magitalitali e amutou.

#### *Magamaga ieli ma langi ne sulu pulu vuso*

<sup>10</sup> Moni a malada mine Bibi Taula ni palea tomane moni a bibi na paaalina ei asuasu maino. Na malada do langi ni tupaulu buo mei ni buale vuso. Me sou a golu banini vuso Salemo i mapale na magamaga, oavi ni tununi e sou me ne sou pulu. Maido ma magamaga pilu a golugolu vuso sou ino ne ei, ne sou buale vuso.

<sup>11</sup> De damutale. Mane a golugolu vuso do ei pulu na matana vea ie, de amutou damutale namutou ogomuli sei matana inigogona? Namutou bilii a maulina mine amutou usino ne Salemo, me mu asu na inigogona maolo me mu ogomuli a inigogona vuso mine Salemo.

<sup>12</sup> Na inigogona ieli namutou magitali a malada mine Salemo ni palea, me namutou pipigo sagali a malada do ni palea asi. Na malada moni iedo langi ni lulu mei ni pulu, ma tivulana oavi buo ni aani a golu banini

\* 2:22 Niugugu Doana 26:11



vuso Salemo ei mapale na magamaga ma langi, me ne sou palea nanu sabubu.

<sup>13</sup> Moni e Salemo ei gatunasobesi ni mapale a langi alaba ma magamaga alaba, ma inigogona bilesi moni ni muina ne ei. Eitou magitali moni a golu iedo ni palea.

*Neitou masusulu kuba me neitou magitali e Bibi Taula*

<sup>14</sup> Tamtamaigu ivu, amutou magitalitali a golu ie ni palea, maido me namutou pipigo sagali na mailisine amutou oto ne amutou muina alaba na matane Salemo, me ne amutou ma isa oto a mavaana na golu tasa. Me ne amutou lilo tasa moni pilu e Salemo.

<sup>15</sup> Bibi Taula ei saboa ino magitalitali e eitou me ei toekekeke moni ane eitou. Ne amutou muada, ei goli a inigogona ieli, vuna ei kale ni gualeliu e eitou. Salemo i bilii a muadana doana usino ne Pol tamaine eitou ivu, me ei tamai i niage a matana inade ieli usino ne amutou.

<sup>16</sup> Na laulau vuso minei, ei adeade a golu ie. Ivu, a inade sanii ino na laulau sou ieli eitou ma muada kuba oto i, me ei sana le eitou neitou muada kuba a vuna inade. Maido ma vanua sou ma isa oto a muadana ma silimulina mine sou i ma sagali oto, sou toemaisabesabe a inade ieli ma inade sea vuso ino na Laulau mine Salemo tamai, maidolo me ne sou mamau vuso.

<sup>17</sup> Tamtamaigu ivu, amutou muadasi a golugolu ie. Maido me, namutou iteale kube e amutou oto, dae a aualana mine sou a vanua mina saukikina binea ni lapuale amutou me namutou ma magili sagali oto na silimulina.

<sup>18</sup> Jesu Krai, ei e Bibi Taula mine eitou ma Bibi na gualeliune eitou, ei dodode amutou, me amutou muada kuba e ei. Me ne amutou longo a dinodo mine Krai ni masagali e amutou, me namutou guale a muadana papaina lou ne ei. Ei isa a aisa buo sele, me neitou beilange a aisane ei seidei me taliuliu taliuliu. Moliana.

## 1 Ioanes Munugana Laulau Ioanes ei niage

### *A Inade i isa a maulina ei palea muadasi*

<sup>1</sup> Amiteu veimuadade a inade ei isa a maulina. A inade li ei muina lisasi, me amiteu longe, me amiteu ite a matane amiteu. E, amiteu ite ei me amiteu pige ei.

<sup>2</sup> Maulina li ei palea muada usinani ne amiteu, maido me amiteu ite, me amiteu malongo i usino ne amutou, ei muina taliuliu taliuliu. Lisa ei muina pilu e Tamana, mei palea muadasi usinani ne amiteu.

<sup>3</sup> Amiteu malongolongo ane amutou a golu amiteu ite me amiteu longe, ve a lilone amutou ni tasa moni pilu e amiteu. Ma lilone eitou ni tasa moni pilu e Tamane eitou me Natuna Iesu Kraisi.

<sup>4</sup> Amiteu niage a inade li, ve a munonge mine eitou ni vonu sele.

### *Neitou asu lilo na muada*

<sup>5</sup> Amiteu longe a inade Iesu Kraisi ei malongo i, me amiteu malongo i ane amutou. A inade li i maido, Salemo ei a muada, ma tunuui baini tasa ino ne ei boa.

<sup>6</sup> Mane eitou vei, "Lilone eitou tasa pilu e ei," moni eitou asu na tunuui, de a inadene eitou goli ieli ei a aualana inade, me eitou ma asu oto na inigogona i patotona.

<sup>7</sup> Moni mane eitou asu lilo na muada tomene moni ei ino lilo na muada, de lilone eitou i tasa moni pilu a vanunua ma tavivine mine Salemo. Ma dalane Iesu, Natune Salemo, ei taulele a sinusu vuso mine eitou me eitou palea alaba.

<sup>8</sup> Mane eitou vei ve, "Eitou ma isa oto a sinusu," de eitou auala ane eitou oto, ma inade patotona ei ma lilo oto ne eitou.

<sup>9</sup> Moni mane eitou veipale a sinusu mine eitou usino ne Salemo, de Salemo mina toeselena ma bilesina ei ni lilotase vuse a sinusu mine eitou, mei ni taulele a inigogona pagu vuso mine eitou, mei ni toe eitou neitou palea alaba.

<sup>10</sup> Mane eitou vei, "Eitou ma goli ete a sinusu," de na inade li eitou vei ve Salemo ei a bibi na nioto. Maido ma inade mine Salemo i ma muina oto na lilone eitou.

## 2

### *Krais ei a Buloina mine eitou*

<sup>1</sup> Amutou natatugu, eau niage a inade li usino ne amutou namutou ma gologoli lei a sinusu. Me mane sei bibi balivua ne eitou ei goli a sinusu, de eitou isa a Buloina, ei ino pilu e Tamane eitou. Ede Iesu Kraisi, a bilesina bibi.

<sup>2</sup> Ei oto i mate tomene a niabi mina taulelana sinusu mine eitou. Me ei ma toe ete ieli mina buloine eitou moni. Boa. Ei goli mina buloine sou a vanunua ma tavivine vuso na magamaga tamai.

### *Bibi ei muada e Salemo ei ogomulimuli a binea mine Salemo*

<sup>3</sup> Mane eitou ogomuli a binea mine Salemo, de neitou damutale maido, eitou muada kuba e ei.

<sup>4</sup> Mane sei bibi i vei, "Eau muada e Salemo," moni ei ma ogomuli ete a binea mine Salemo, io bibi iedo ei a bibi na nioto, ma inade patotona ei ma ino oto na lilone ei.

<sup>5</sup> Moni mane a bibi tasa i ogomuli a inade mine Salemo, de eitou muada sele a kinale minei usino ne Salemo ei patotona sele mei valitole e Salemo.

<sup>6</sup> Mane a bibi tasa i vei maido, "Eau valitole e Salemo," io bibi iedo ni asu tomene Kraisi ei asu.

### *Binea i alaba*

<sup>7</sup> Amutou tamtamaigu, binea eau niage usino ne amutou iedo ei a binea i ma alaba oto. Amutou gualesi ieli na sinokona malada mina silimulina. A binea do i ma alaba oto, ei a inade amutou longesi.

<sup>8</sup> Moni eau niage lei a binea alaba ieli usino ne amutou, me eitou ite ei a patotona na maulina mine Kraisi me mine amutou tamai, vuna tunuui ei agaviosi ni pulu, ma muada ivu i sibitalasi mei eili.

<sup>9</sup> Mane a bibi tasa i vei, "Eau eili na muada," moni ei ino lilogegelu ane tamaina a kristen tasa, io bibi iedo ei saboa ino na tunuui.

<sup>10</sup> Bibi ei bililili a lilone ei usino ne tamaina, ei ino na muada, ma golu tasa boa ei ni toebose ei.

<sup>11</sup> Moni a bibi ei lilogegelugelu ane tamaina a kristen tasa, ei ino na tunuui. Ei asu na tunuui, me ei ma muada oto sei vea ei ni ogomuli, vuna tunuui ei avisobesi a matane ei.

<sup>12</sup> Amutou natatugu, eau niage a inade li usino ne amutou, vuna Salemo i taulelesi a sinusu vuso mine amutou na aisane Kraisi.

<sup>13</sup> Amutou tamatamana, eau niage a inade li usino ne amutou, vuna amutou muadasi a bibi ie ei eili lisa otosi mei mapigogoi seidei.

Amutou vanunua alalaba, eau niage a inade li usino ne amutou, vuna amutou vululusi e Satan.

<sup>14</sup> Amutou selebanini, eau niage a inade li usino ne amutou, vuna amutou muadasi e Tamane eitou. Amutou tamatamana, eau niage a inade li usino ne amutou,

vuna amutou muadasi a bibi ie ei eili lisa otosi mei mapigogoi seidei.

Amutou vanunua alalaba, eau niage a inade li usino ne amutou,

vuna amutou isa a sagagalina, ma inade mine Salemo ei vonu sele ne amutou, me amutou vululusi e Satan.

*Umana sele neitou guale a inigogona mina magamaga*

<sup>15</sup> Umana sele namutou kale a inigogona mina magamaga ma golugolu vuso mina magamaga. Mane sei bibi ei kale a inigogona mina magamaga, de kinale minei usino ne Tamana ei ma ino oto ne ei.

<sup>16</sup> Eitou muada, inigogona mina vanunua vuso na magamaga, ieli a masagana mina vovo ma matapallina ma toebuebuena, ma inigogona sou odo ei ma maino oto ne Tamane eitou. Boa. Inigogona sou odo ei mina magamaga moni.

<sup>17</sup> Magamaga li ei ni pulu, ma masagana pagu vuso mina magamaga ieli tamai ni pulu. Moni a bibi ei ogomuli a inade mine Salemo ei ni muina taliulu taliulu.

*Butu mine Kraisi ei sibitalasi*

<sup>18</sup> Amutou natatugu, punuluna malada ei agaviosi. Lisa amutou longe ve a butu mine Kraisi ei ni sibitala. Seidei butu papaina mine Kraisi sou sibitalasi. Maido me eitou muada, punuluna malada ei agaviosi.

<sup>19</sup> Sou ma muina ivu oto mina abuna mine eitou, maido me sou asutase eitou. Moni mane sou mine eitou ivu, io ne sou muina pilu e eitou. Moni sou asutasesi eitou, maido me eitou muada i, vanunua do sou ma mine eitou oto.

<sup>20</sup> Kraisi ei singi a Maolona Nunu muata ne amutou, me amutou vuso mu muadasi a patotonana inade.

<sup>21</sup> Maido me eau ma damu oto i ve amutou ma muada oto a inade i patotona, me ea niage a inade li usino ne amutou. Boa. Eau niage, vuna amutou muadasi a patotonana inade, me amutou muada a inade na aualana ei ma palea oto maino na inade patotona.

<sup>22</sup> Bibi na aualana ei e sei? Ei a bibi ei veivei maido, "Iesu ei ma Kraisi oto." Bibi ei vei simaido ei lametase Tamana pilu e Natuna, maido me ei a butu mine Kraisi.

<sup>23</sup> Bibi ei lametase Natuna ei lametase Tamana tamai. Bibi ei silimuli e Natuna ei silimuli e Tamana tamai.

*Maolona Nunu ei matetengi eitou a inade patotona*

<sup>24</sup> Inadenade lisa amutou longesi odo, iede namutou tau na lilone amutou. Mane amutou toe maido, io Natuna pilu e Tamana sulu ne su muina pilu e amutou taliulu.

<sup>25</sup> Me Kraisi i adepatotona ane eitou maido, ei ni bilii e eitou a maulina i muina kubaana taliulu.

<sup>26</sup> Eau niage a inade li usino ne amutou a vanunua sou kale ne so ioto ane amutou.

<sup>27</sup> Moni a Maolona Nunu Kraisi ei singi muata ne amutou, ei ino pilu e amutou. Maido me amutou ma boto oto a muadana ne sou matetengi lei e amutou. Maolona Nunu oto ei matetengi e amutou a golugolu vuso, ma inade mina Nunu iedo ei patotona, ei ma auala oto. Maido me namutou valitole e Kraisi, tomane a Nunu ei matetengi e amutou.

*Seidei eitou eili e natatune Salemo*

<sup>28</sup> E, amutou natatugu, namutou valitole e Kraisi. Maido na ilala ei ni veteliu, eitou neitou ma lae oto, me neitou ma maelaela lou a magilina na matane ei.

<sup>29</sup> Mane amutou muada i maido, Kraisi ei bilesi, io ne amutou muada tamai maido, vanunua vuso sou goli a inigogona bilesi sou paleasi e natatune Salemo.

### 3

<sup>1</sup> Oite, Tamane eitou ei kale sele eitou, mei bilii a lilone ei buo lou usinani ne eitou, mei tole e eitou e natatune Salemo. Ei patotona sele, eitou eili e natatune Salemo. Moni a vanunua na magamaga, sou ma muada oto e Salemo, maido me sou ma muada oto e eitou tamai.

<sup>2</sup> Tamtamaigu, seidei eitou eili e natatune Salemo. Me mulimuli ne eitou muine eitou matina, ieli eitou ma muada oto i. Moni eitou muada, malada Kraisi ni veteliu, neitou palea tomane ei oto, vuna neitou ite bilesi e ei.

<sup>3</sup> Vanunua vuso sou magitalitali e ei, sou toe e sou oto ne sou palea maolo na matane Salemo tomane Kraisi ei maolo.

<sup>4</sup> Bibi ei goligoli a sinusu ei pope a binea mine Salemo, vuna sinusu ei a inigogona punope na binea.

<sup>5</sup> Amutou muada, Kraisi i palea mina taulelena sinusu, ma sinusu ino ne ei boa.

<sup>6</sup> Bibi ei valitole e Kraisi, ei ma ogomulimuli ete a inigogona sinusu. Mane sei bibi ei ogomulimuli a inigogona sinusu, io neitou muada, ei ma ite ete Kraisi, mei ma muada oto e ei.

<sup>7</sup> Amutou seleanini, amutou tilale, dae a bibi tasa ni auala ane amutou. Bibi ei goli a inigogona bilesi ei a bibi i bilesi tomane Kraisi ei bilesi.

<sup>8</sup> Soke na ilala lisa otosi, Satan ei goligoli a sinusu taliulu, maido me a bibi ei goligoli a sinusu ei a bibi mine Satan. Maido me Natune Salemo ei paleasi ni taulele vuse a pipigona mine Satan.

<sup>9</sup> Mane sei bibi ei palea e natune Salemo, io ei ni ma gologoli lei a sinusu, vuna maulina mine Salemo oto ei ino na bibi iedo. Maido me ei ma mapigogoi ete ni goli a sinusu, vuna ei paleasi e natune Salemo.

<sup>10</sup> Eitou muada i maido, sei e natune Salemo me sei e natune Satan. Me a bibi i ma goli ete a inigogona bilesi, ei mine Salemo boa. Ma bibi ei ma kalekale ete natatune Salemo sanii, ei tamai ei mine Salemo boa.

*Neitou kale sele sou sanii sea*

<sup>11</sup> Lisa otosi amutou longe a inade maido, eitou tastasa neitou kale sele sou sanii sea.

<sup>12</sup> Neitou ma toetomane lei e Kain. Ei a bibi mine Satan, me ei valiputemate tasina. Vuna matina ei valiputemate tasina? Vuna i maido, a inigogona minei ei pagu ma inigogona mine tasina ei bilesi.

<sup>13</sup> Tamtamaigu, mane a vanunua mina magamaga sou butuale amutou, io namutou ma sagasaga lou a golu ie.

<sup>14</sup> Mane eitou bililili a lilone eitou usino na vanunua ma tavivine sanii mine Salemo, eitou muada maido, eitou asuleletasesi a minate, me eitou eili na maulina. Bibi ei ma bilii ete a lilone ei usino ne sou tamtamaina, ei saboa ino na minate.

<sup>15</sup> Sei bibi ei lilogegele sele ane tamaina, ei tomane ei valiputemate a bibi. Amutou muada, bibi ei valiputemate a vanunua, a maulina doana ei ma ino oto na lilona.

<sup>16</sup> Iesu i iabi a maulina minei oto mei mate mina buloine eitou, ma inigogona minei ieli ei maitesi e eitou a inigogona kinale sele ne sou sanii sea. Maido me eitou tamai neitou iabi a maulina mine eitou mina buloine tamtamaine eitou.

<sup>17</sup> Moni mane sei bibi ei isa a golugolu mina magamaga ieli, me ei ite tamaina tasa ei boto a golugolu sou odo, moni mane ei ma lilomuli ete ei me ei ma buloi ete ei, io eitou muada, kinale mine Salemo ei ma ino oto na bibi iedo.

<sup>18</sup> Amutou selebanini, neitou ma kale ete tamtamaine eitou a inade ue na asene eitou moni. Boa. Neitou bilii a lilone eitou ivu usino ne sou pilu a inigogona kubaana.

<sup>19-20</sup> Mane eitou kale sele sou sanii sea, io neitou muada, eitou ogomuli a inade i patotona. Me muina mane a lilone eitou i vavasa ane eitou a golu tasa ue boa, neitou ugu a lilomeana na matane Salemo. Vuna Salemo i muada a golugolu vuso, ma muadana minei i seleuli a muadana ei eili na lilone eitou.

<sup>21</sup> Tamtamaigu, mane a lilone eitou i ma vavasa oto ane eitou, io eitou ma lae oto na matane Salemo.

<sup>22</sup> Mane eitou kake ei a golu tasa, io ei ni bilii e eitou, vuna eitou ogomuli a binea minei, me eitou goli a inigogona ei kale.

<sup>23</sup> Binea minei i maido, neitou silimuli a aisane Natuna e Iesu Krai, me neitou tastasa neitou maikalo sele tomane ei veiosi le eitou.

<sup>24</sup> Mane sei bibi i ogomuli a binea mine Salemo, de ei valitole e Salemo, me Salemo i valitole e ei. Salemo i bilii e eitou a Maolona Nunu, ma Nunu odo i maite eitou maido, Salemo i eili pilu e eitou.

**4**

*Namutou tove sou a nunu sou a nunu ivu mine Salemo ue boa*

<sup>1</sup> Amutou tamtamaigu, aualana profet makuba sou gaga maisaba na magamaga. Maido me namutou ma silimulimuli lei e sou, mane sou asuale amutou me sou vei maido, "Nunu mine Salemo i bilii e eau a inade." Io, mu tove pale a nunu vuso do, ne amutou muada i sou asu maino ne Salemo ue boa.

<sup>2</sup> Na vea ieli namutou muada a Nunu mine Salemo. Mane a bibi tasa i ade patotona ve, "Iesu Krai ei paleasi a bibi ivu," io a Nunu mine Salemo ino na bibi iedo.

<sup>3</sup> Moni mane a bibi ei ma veipale oto e Iesu, io a bibi iede ei isa a nunu sea, ei ma maino oto ne Salemo. Ei a nunu mina butuale Krai, lisa amutou longe ve ei ni asu usinani, seidei ei sibitalasi mei eili na magamaga.

<sup>4</sup> Amutou natatugu, amutou mine Salemo, me amutou soetolesi sou a aualana profet, a vuna, Nunu ei ino na lilone amutou ei vululusi a nunu mina magamaga ie.

<sup>5</sup> Vanua do sou a vanua na magamaga, maido ma inade ne sou ei mina magamaga moni, me sou a vanua mina magamaga sou longemuli a inade ne sou.

<sup>6</sup> Eitou mine Salemo, me sou a vanunua ma tavivine sou muada e Salemo sou longemulimuli a inadene eitou. Moni sei bibi ei ma ino oto ne Salemo, ei ma longemuli ete a inadene eitou. Na vea ieli, eitou muada a Nunu na inade patotona ma nunu na nioto.

*Bibi ei kale sele Salemo ei ni kale sele e sou sea tamai*

<sup>7</sup> Tamtamaigu, eitou tastasa neitou kale sele sou sanii sea, vuna inigogona kinale ne sou sanii sea, ei a inigogona mine Salemo. Bibi ei kale sele sou sanii sea, ei e natune Salemo mei muada sele e Salemo.

<sup>8</sup> Salemo oto ei a vuna inigogona kinale ne sou sanii sea. Maido ma bibi ei ma kalekale ete sou sanii sea, ei ma muada oto e Salemo.

<sup>9</sup> Salemo ei isa e Natuna tasa moni, me ei peltase Natuna utano nani na magamaga,

ne eitou guale a maulina minei. Na inigogona li Salemo i maite eitou maido, ei kale mamai sele e eitou.

<sup>10</sup> Inigogona kinale ieli, ei a inigogona mine Salemo. Neitou ma damudamu lou, eitou kale pale Salemo. Boa. Salemo ei kale pale eitou. Maido me ei peltase Natuna Bibi utano nani na magamaga mina taulelena sinusu vuso mine eitou.

<sup>11</sup> Tamtamaigu, na inigogona li ei maite eitou maido, ei kale sele eitou. Maido me eitou tastasa tamai neitou kale sele sou sanii sea.

<sup>12</sup> Tasa mine eitou ei ma ite ete Salemo. Boa. Moni mane eitou maikalo sele, de Salemo ni eili pilu e eitou, ma kinale minei iodo i palea sagaliosi na lilone eitou.

<sup>13</sup> Eitou muada i maido, Salemo ei valitole e eitou, me eitou valitole e ei, vuna ei bilii e eitou a Nunu minei oto.

<sup>14</sup> Me eitou itesi a golu Tamana ei goli. Ei peltase Natuna utano nani ni gualeliu a vanunua ma tavivine na magamaga, me eitou veipale a golugolu ie.

<sup>15</sup> Mane a bibi tasa i veipale, "Iesu ei e Natune Salemo," io Salemo ei ino na bibi iedo, me ei tamai ino ne Salemo.

<sup>16</sup> Maido me eitou muada me silimuli sagali maido, Salemo ei kale sele eitou. Salemo oto ei a vuna inigogona kinale sele. Ma bibi ei kalekale sele sou sanii sea, ei valitole e Salemo, me Salemo ei valitole e ei.

<sup>17</sup> Maido me a inigogona kinale ei palea sagaliosi na lilone eitou. Me neitou ma lae oto a malada na vavasana buo mine Salemo. Ivu, eitou eili na magamaga ie, moni eitou tasa moni tomane Krai oto lisa ei malu na magamaga.

<sup>18</sup> Mane a kinale ei paleasi sagali lilo na maulina mina bibi tasa, io ieli ei taulele a nilaena, vuna kinale patotona ei votetase a nilae. Bibi ei muada maido ei ni guale a mapa pagu, ieli ei toe ei lae. Mane a bibi tasa ei lae, io neitou muada, inigogona kinale minei i saboa palea sagali lilo na maulina minei.

<sup>19</sup> Salemo ei kale pale eitou, maido me eitou kalekale sou sanii sea tamai.

<sup>20</sup> Mane a bibi tasa i vei maido eau kale sele Salemo, moni ei ma kale ete tamaina, io a bibi iedo ei a bibi na aualana. Vuna bibi ei ma kalekale ete sou sanii sea ei iteite, ei ma mapigogoi ete ni kale Salemo, ei saboa ite.

<sup>21</sup> Binea eitou guale ne Krai ieli ei maido, bibi ei kale sele Salemo ei ni kale sele tamaina tamai.

## 5

*Sou a kristen sou vululusi a sagalina mina magamaga*

<sup>1</sup> Vanunua sou silimuli e Iesu ei e Krai sou e natatune Salemo. Me a vanunua sou kalekale tamana sou kale tamai e natuna.

<sup>2</sup> Mane eitou kale sele Salemo, me eitou ogomuli a binea vuso minei, io na inigogona li eitou muada, eitou kale sele natatune Salemo.

<sup>3</sup> Mane eitou kale sele Salemo, io eitou ogomulimuli a binea vuso minei. Ma binea vuso minei ei ma bilii ete eitou a mavaana.

<sup>4</sup> Vanunua vuso sou natatune Salemo sou vululusi a sagalina magamaga ie. Eitou silimuli e Salemo, me na inigogona li, eitou vululusi a maubina me eitou taupui a sagalina mina magamaga.

*Salemo ei veimuade a inade mine Natuna*

<sup>5</sup> Sei ni vululusi a sagalina mina magamaga ie? Bibi ei silimuli e Iesu ei e Natune Salemo, bibi iedo moni ei vululusilusi.

<sup>6</sup> Iesu Krai ei asu usinani na inigogona gualena maavuvutuna a nanu ma dalane ei muata na tauvaleuti. Ei ma asu oto usinani na nanu moni. Boa. Ei asu usinani na nanu pilu a dalana. Maolona Nunu ei tamai veimuade a inigogona ieli mine Iesu ei a inade patotona.

<sup>7</sup> Sou taotolu sou veimuade a inigogona minei,

<sup>8</sup> ede a Maolona Nunu, nanu ma dalana. Me taotolu sou goli a inade tasa moni.

<sup>9</sup> Eitou longo a inadenade sou a vanunua sou malongo i. Moni a inade Salemo ei malongo i, ei vululusi sele a inade mine sou a vanunua. Ma inade iedo Salemo i malongosi i, ei ade e Natuna.

<sup>10</sup> Bibi ei silimuli e Natune Salemo, inade mine Salemo ino na lilone ei. Moni a bibi ei ma silimuli ete a inade mine Salemo, ei veivei ve Salemo ei a bibi na aualana. Vuna ei ma silimuli ete a inade mine Salemo i malongo a inigogone Natuna.

<sup>11</sup> Salemo i maite eitou a inade minei i patotona. Ma inade patotona minei ei maido, Salemo ei bilii e eitou a maulina mina niugu kubaana taliuliu taliuliu, ma vuna maulina iedo ei ino ne Natuna.

<sup>12</sup> Bibi ei valitole Natune Salemo, ei isa a maulina iedo. Ma bibi ei ma valitole ete Natune Salemo, ei ma isa oto a maulina iedo.

*Eitou muada, eitou isa a maulina mina niuguna kuba taliuliu*

<sup>13</sup> Eau niage a inade li usino ne amutou a vanunua ma tavivine, ne amutou silimuli a aisane Natune Salemo, ede namutou muada i maido, amutou gualesi a maulina mina niuguna kuba taliuliu taliuliu.

<sup>14</sup> Eitou silimuli sele maido, mane eitou ogomuli a masagana mine Salemo oto, me eitou kaka me tagi e ei a sei golu, io ei ni longemuli a kinaka mine eitou.

<sup>15</sup> Eitou muada, ei longemulimuli a kinaka vuso mine eitou. Maido ma ilala eitou tagi e ei ni bilii e eitou a golu tasa, eitou muada maido, neitou guale bilesi a golu iedo.

<sup>16</sup> Mane a bibi tasa ei ite tamaina kristen tasa i goli a sinusu, moni sinusu odo i ma mapigogoi ete ni toe a nunu mine tamaina do ni mate, io bibi iedo ni kake Salemo, me Salemo ni bilii a maulina iedo usino ne tamaina. Moni a matana sinusu i mapigogoi ni toe a bibi ni mate, mea ma vei ete namutou kaka a golu iedo.

<sup>17</sup> Inigogona vuso ei ma bilesi oto, iede a sinusu. Moni a matana sinusu sanii ei ni ma toe ete a bibi ni mate.

<sup>18</sup> Eitou muada, vanunua vuso sou natatune Salemo, sou ma ogomulimuli ete a inigogona sinusu. Boa. Salemo ei iteale kube a bibi ei e natuna, me Satan ei ma mapigogoi ete ni lapitole ei.

<sup>19</sup> Eitou muada, eitou natatune Salemo, moni a magamaga vuso li ei ino matano na sagagaline Satan.

<sup>20</sup> Eitou muada, Natune Salemo ei sibitalasi, mei bilii e eitou a damutatalana, ne eitou muada e Salemo ivu. Eitou valitole Salemo ivu pilu e Natuna Iesu Krai. Iesu Krai ei e Salemo ivu, me ei a vuna maulina kubaana taliuliu taliuliu.

<sup>21</sup> Amutou natatugu, amutou namutou bulagetase sou a salemo auala.

## 2 Ioanes Maluana Laulau Ioanes ei niage

*Neitou lapitole sagali a inade ivu mine  
Salemo*

<sup>1</sup> Eau a bibi buo mina viepiluna kinaka eau niage a laulau li usino ne oo a tavine pilu e natatumu. Salemo ei vileale oo minei oto, me eau kale ivu sele amutou. Eau moni boa, vanunua ma tavivine vuso sou muada a inade ivu sou tamai kale sele amutou.

<sup>2</sup> Inade ivu ei eili ne eitou, me ei ni muina ne eitou taliuliu taliuliu, maido me amiteu kale sele amutou.

<sup>3</sup> Na inade ivu ma inigogona kinale sele, Salemo Tamane eitou pilu e Iesu Krai ei e Natune Tamane eitou, ne sulu toe a inigogona dinodo ma lilomulina ma lilomeana i muina pilu a maulina mine eitou.

*Neitou ogomuli a inigogona kinale sele  
ne sou sanii sea*

<sup>4</sup> Eau mongemonge sele eau longe natatumu sanii sou ogomulimuli a inade ivu tomane Tamane eitou ei vei neitou ogomuli.

<sup>5</sup> Moni oo a tavine, eau isa a inade tasa eau kale no ogomuli. Ei maido, eitou tastasa neitou kale sele sou sanii sea. Ei ma tomane ete eau bilii e oo a binea alaba. Boa. Lisa otosi eitou guale a binea ie.

<sup>6</sup> Inigogona kinale sele ei maido, neitou ogomuli a binea vuso mine Salemo. Ma binea ieli lisa amutou longesi ei maido, ne amutou ogomuli a inigogona kinale sele ne sou sanii sea.

*Neitou lapitole sagali a inade mine Krai*

<sup>7</sup> Longe. Vanunua papaina sou kale ne sou iotetase eitou, sou gaga maisaba na magamaga. Sou ma silimuli ete maido, Iesu Krai ei palea tomane a bibi. Matana bibi maido, ei a bibi na nioto, me ei a butu mine Krai.

<sup>8</sup> Maido me amutou tilale kube, dae ne amutou litase a golugolu amutou pipigo sagali a gualena. Namutou magili sagali, me namutou guale a mapa vuso ne amutou.

<sup>9</sup> Mane a bibi tasa ei ma lapitole sagali ete a inade mine Krai mei seu usino na inade sea, de Salemo ei ma ino pilu oto ei. Moni mane a bibi tasa ei lapitole sagali a inade mine Krai, io Tamana pilu e Natuna ne sulu muina pilu e ei.

<sup>10</sup> Mane a bibi tasa ei asu usinani ne amutou pilu a malongona sea, io namutou ma biliilii lei e ei a oaso doana, me mu ma gualeale lei ei ulilo na luma ne amutou.

<sup>11</sup> Bibi ei vate oaso doana usino na matana bibi maido, ei buloi e ei a pipigona pagu minei.

*Punuluna ade munongena*

<sup>12</sup> Ei mapigogoi eau na niage a inade papai lou usino ne amutou, moni eau ma kale ete na niage a inade na laulau tasa. Eau kale na asu usino me na ite amutou, me neitou maiade pilu, me neitou mongemonge sele.

<sup>13</sup> Sou e natatune latavinemu Salemo ei vilealesi minei oto sou vei oaso doa usino ne oo.

## 3 Ioanes Matoluna Laulau Ioanes ei niage

### *Ade munongena*

<sup>1</sup> Eau a bibi buo mina viepiluna kinaka eau niage a laulau li usino ne oo, Gaius, oo tamaigu ivu. Patotona eau kale sele oo.

<sup>2</sup> Tamaigu ivu, eau kake Salemo maido, a golugolu vuso oo goli, ei ni palea kuba moni, me oo oto no ugu kuba, ma nunumu ni puiale sele tamai.

<sup>3</sup> Lisa tamtamaigu sanii sou asu usinani, me sou ite eau, me sou vei le eau maido, oo ogomulimuli sele a inade patotona. Eau longe a inade li, mea mongemonge. Eau muada, taliuliu oo asu pilu a inade i patotona.

<sup>4</sup> Ilala eau longe a inade mine natatugu sou ogomuli a inade i patotona, io eau mongemonge sele, ma munonge iedo ei vululusi sele a munonge minau sanii.

### *Gaius ei goli a pipigona doana*

<sup>5</sup> Tamaigu ivu, oo ogomulimuli iiti a inade ivu, me oo goligoli a pipigona doana mina buloine tamtaimu sou a kristen. Me oo goligoli tamai a inigogona li usino ne sou a vanunua oo oto o ma muada oto e sou.

<sup>6</sup> Tamtaimu sanii sou mapamuli ane sou a vanunua ma tavivine mina viepiluna kinaka a inigogona kinale vuso minio usino ne sou. Ma malada sou kale ne sou asu lou, ei ni doana sele, mane oo no langetase sou pilu a golugolu sou kale. Oo no buloi e sou a vea Salemo oto ei mongemonge i.

<sup>7</sup> Vuna, sou ilisi a inasu mina gunolina pipigona mine Iesu, me sou ma gualeale ete a buloina tasa maino ne sou a vanunua masala.

<sup>8</sup> Maido me neitou buloi e sou a matana vanunua simaido. Na inigogona ieli, eitou palea tomane a bibi na pipigona tasa pilu e sou, mina masagalina pipigona inade ivu mine Salemo.

### *Diotrepes ei goli a inigogona pagu*

<sup>9</sup> Eau niagesi a inade sanii usino ne sou a viepiluna kinaka. Moni e Diotrepes ei kale ni muina a munuganuga mine sou, me ei ma longemulimuli ete a inadene amiteu.

<sup>10</sup> Maido me mane eau asuale amutou, eau na veipale a inigogona ei goli iedo. Ei ade maisabasaba ane amiteu a mata-matana inade pagupagu. Me ei ma goli ete ieli moni. Boa. Ei ma gualeale ete tamta-maina usino na luma minei. Na malada sou sanii sou kale ne sou maasi e sou kristen sanii usino na luma ne sou, ei madetasetase sou mei tamai votetaselele sou na viepiluna kinaka.

### *Demitrius ei goli a inigogona kubaana*

<sup>11</sup> Tamaigu ivu, o no ma ogomulimuli lei a inigogona pagu. Boa. Oo no ogomuli a inigogona i kubaana. Bibi ei goli a inigogona kubaana ei a bibi mine Salemo. Moni a bibi ei goli a inigogona pagu ei ma ite ete Salemo.

<sup>12</sup> Vanunua vuso sou veipale a inigogona kubaana mine Demitrius. Ma inade ivu mine Salemo tamai i veipale a inigogona kubaana minei. Me amiteu tamai amiteu veipale a inigogona doana minei, me oo muada a inade mine amiteu i patotona.

### *Punuluna ade munongena usino ne Gaius*

<sup>13</sup> Ei mapigogoi eau na niage a inade pai usino minio, moni eau ma kale ete na niage a inade li na laulau ma dusi.

<sup>14</sup> Eau kale na ite asi oo, me neitau maiade pilu.

<sup>15</sup> Lilomu ni mea. Tamtaimu sou sosove a oaso doana usino ne oo, mo no bilii a oaso kubaana minau usino ne sou tamtamaigu vuso.



## Iudas Laulau Iudas ei niage

*Iudas ei vei oaso doana usino ne sou*

<sup>1</sup> Eau e Iudas, eau a bibi na pipigona mine Iesu Krai, me eau e tasine Iemus. Eau niage a laulau li usino ne amutou a vanunua ma tavivine Salemo i toleale. Salemo Tamane eitou ei kale sele amutou, me Iesu Krai oto ei itealale amutou.

<sup>2</sup> A inigogona mina dinodo ma lilomeana, ma inigogona mina kinale seleni ni vonu ne amutou.

*Sou a aualana vanunua na matetengina sou gali ulilo na viepiluna kinaka*

<sup>3</sup> Amutou tamtamaigu ivu, palapala eau isa a masagana buo mina niagena laulau na pipigona Salemo ei gualeliu e eitou vuso. Moni seidei eau damutale na niage a inade tasa lou usino ne amutou maido, namutou magili sagali na itealena silimulina mine amutou, silimulina iede Salemo ei bilii e eitou a vanunua ma tavivine minei na ilala matasa moni.

<sup>4</sup> Vuna, vanua sanii sou gali oovuoosi ulilo ne eitou. Lisa otosi Salemo ei vei maido, matana vanunua maido ne sou palea na vavasana mine Salemo, me ne sou buale. Sou lametase e Salemo me sou sauvulevule a inade na dinodo mine Salemo ni palea a inade mine sou a matamatana inigogona i pagu. Sou a vanunua do, sou lametasetase a Mapana tasa moni, ei e Bibi Taula mine eitou e Iesu Krai.

<sup>5</sup> Amutou muadasi i, Bibi Taula, lisa ei gualeliu e sou e Israel maino ne Isip, me sou asu usinosi. Me mulimuli ei toegegeli a vanunua ma tavivine sou ma silimuli ete ei. Amutou muadasi i, moni eau kale na mailisi lei e amutou ne mu damutale lei a golu ie.

<sup>6</sup> Me mu damutale sou a bineanea mine Salemo iedo, sou ma kale ete ne sou ugu kuba mina pipigona Salemo ei bilii e sou, me sou ilisitase a mui ne sou. Maido me Bibi Taula ei papale sou a sen i muina taliulu taliulu, me ei tauosi e sou ulilo na aubu i tunuui mamau sele mapigogoi a malada buo mina vavasana mine Salemo.

<sup>7</sup> Lisa sou e Sodom pilu e Gomora me sou a aububu buo ino agavuale sou, sou ogomuli a inigogona pagu moni tomane sou a bineanea mine Salemo iedo, me sou ogomuli a inigogona sea mina sualolona i pagu sele. Maido me Salemo ei toegegeli sele e sou a oavi i muina taliulu. Golugolu sou odo sou palea lisa, neitou damutale sou me neitou ma ogomulimuli lei a inigogona pagu mine sou a abuna do.

<sup>8</sup> Na matana inigogona tasa moni iedo, a vanua do sou ogomulimuli a tinada mine sou, ei mailisi e sou ne sou goli a inigogona mumugu mina vovone sou. Sou laivilivili e Bibi Taula mine eitou, me sou adegegellugelu ane sou a bineanea mine Salemo na langi tamai.

<sup>9</sup> Moni ilala a munugana bineanea mine Salemo e Mikael ei maubi a inade pilu e Satan, ne sei ni guale a aitola ne Moses, Mikael ei ma laivilili ete Satan, ei ma adegegeli ete ei. Ei vei maido, "Bibi Taula oto ei ni sinoa amu."

<sup>10</sup> Moni a vanua sou ie, sou adegegelligeli a golugolu vuso sou ma muada oto a vune sou. Sou tomane a viuviu sou ma isa oto a damutatalana, me sou ogomulimuli moni a masagana mina vovone sou. Na inigogona mine sou ieli, sou toegegeli sele sou oto.

<sup>11</sup> Maule sou, mavaana buo ei ni palea le sou. Sou asuasu na inigogona ne Kain. Sou damutatale moni a gualena vatou tomane Balam. Me sou laivilili e Salemo tomane Kora, me na inigogona do sou buale sele.

<sup>12</sup> Na malada amutou viepilu a inani pilu a lilo tasa, sou a vanua do sou asuasu usinani, me sou toegegeli a viepiluna do ni palea mumugu. Sou ma maelaela oto a aanina tomane sou ino na inani buo, me sou damutatale moni e sou oto. Sou tomane a ausa i ma maasi ete a adavu usinani, ma avivilili i valitase sou usino. Me sou tomane a obu i ma vua oto na ilalane ei tomane a obu i magoluosi me sou lusioosi a aane sou.

<sup>13</sup> Sou tomane a dasi buo i pusi maisaba. Me sou ma maelaela oto a gunolina inigogona pagu tomane a palapala buo i palea muata na dasi. Me sou tomane a mataidoido i ma ogomulimuli ete a vea ne sou. Maido me Salemo ei masusulioosi a aubu i tunuui sele, me ne sou asu malu nado taliulu taliulu.

<sup>14</sup> Enok, ei a padiluana mine sou a tubutubune natatune Adam, me ei malongo a golugolu vuso ni palea usino na vanunua sou pagupagu iedo. Ei ade maido, "Eau ite e Bibi Taula ei asu usinani pilu a bineanea savuluvulu papaina minei.

<sup>15</sup> Ei kale ni vavasa ana vanua vuso. Me ei toe a vanua sou ma ogomulimuli ete ei ne sou somiale ivu a mavaana mina inigogona vuso i mamau sou goli. Me ei tamai toe a vanua sanii mina gunolina sinus, sou lametasetase Salemo mamau lou ne sou somiale ivu a mavaana mina matamatana inade mamau sou goli usino ne ei."

<sup>16</sup> Sou a vanua do sou lilogegellugelu ana golugolu vuso i palea le sou, me sou ade papai taliulu taliulu. Sou ogomulimuli a masagana pagu mina lilone sou oto. Sou ade mamaumau me so beilangelange a aisa ne sou oto, me sou toegolali e sou a vanua ne sou ogomuli a masagana mine sou.

*Namutou toesagali a silimulina mine amutou ni maolo sele*

<sup>17</sup> Amutou tamtamaigu ivu, namutou damutale lei a inade mina golu ei ni palea mulimuli, ede sou a aposel mine Bibi Taula mine eitou Iesu Kraiss sou ademuada i.

<sup>18</sup> Sou vei le amutou maido, “Na ilala na punuluna malada, vanunua na adepintolana ne sou palea, me ne sou lametase Salemo, me ne sou ogomuli a masagana pagu mine sou oto.”

<sup>19</sup> A vanua do sou vileluelue a viepiluna kinaka me sou ogomulimuli moni a masagana mina vovone sou oto, moni Maolona Nunu ei ma ino pilu oto e sou.

<sup>20</sup> Moni amutou tamtamaigu ivu, taliuliu namutou toesagali a silimulina mine amutou ni maolo sele, silimulina odo Salemo oto i bilii e amutou. Me taliuliu namutou kaka a Maolona Nunu.

<sup>21</sup> Namutou malu lilona kinale mine Salemo. Me taliuliu namutou magitali a dinodo mine Bibi Taula mine eitou Iesu Kraiss, ei ni bilii e amutou a maolina ivu i muina taliuliu taliuliu.

<sup>22</sup> Namutou dode a vanunua sou damutala papaipai.

<sup>23</sup> Namutou gualieliu e sanii mine sou maino na oavi. Me ilala amutou dode sou sanii, namutou lae tamai e sou. Sou ogomuli sele a lilomumuguna, me sou palea mumugu vuso i mapigogoi na kinainai mine sou tamai ei mumugu. Namutou ugu bulago sele ana golugolu vuso do i mumugu na matane Salemo.

*Neitou beilange a aisane Salemo*

<sup>24</sup> Salemo ei mapigogoi ni iteale kube amutou ne amutou ma bosa oto. Ei mapigogoi ni guale amutou usino ne amutou ugu masae na malasana minei, ne amutou ma isa oto a mavaana, ne amutou isa a munonge buo sele moni.

<sup>25</sup> Salemo tasa moni iedo ei ino, mei gualieliu e eitou na pipigona mine Iesu Kraiss, Bibi Taula mine eitou. Neitou beilange a aisane ei, ei ni muina a munugana mapana, mei isa a sagagalina buo, mei ni muina letena golugolu vuso. Lisasi, me seidei, mulimuli tamai ei ni muina moni simaido taliuliu taliuliu. Moliana.

## Inade i Ovu Krais ei veipale a Inade i ovu usino ne Ioanes

*Krais ei veimuade a inade i ovu usino ne Ioanes*

<sup>1</sup> Iesu Krais ei veimuade a inade i ovu. Salemo ei maite a inade li usino ne Iesu ni maite e sou a vanua na pipigona minei a golugolu ei ni palea asi. Iesu peltase a bineanea minei ni bilii a inade li usino ne Ioanes a bibi na pipigona minei.

<sup>2</sup> Me Ioanes veimuade a golugolu vuso ei itesi me ei longesi, golugolu ie ei a inade mine Salemo ma veimuadena mine Iesu Krais.

<sup>3</sup> A inade li ei a inade na malongolongona maino ne Salemo. Salemo ei ni maibalave a bibi ei gi a inade li usino ne sou sea, me Salemo ei ni maibalave sou so longe a inade li me sou ogomuli a inade eau niage ie, vuna golugolu Salemo ei veiosi ni goli ei bisii moni ni palea.

*Inade mine Ioanes usino na viepiluna kinaka padilua*

<sup>4</sup> Eau e Ioanes eau niage a inade li usino ne amutou a viepiluna kinaka padilua na avena buo e Esia. Salemo eili seidei ma lisa tamai me mulimuli ei ni asu usinani ei ni dode amutou mei ni toemea a lilone amutou. Ma nunu padilua, sou ino masae na niugugu a mapana mine Salemo, sou tamai ne sou dode amutou me ne sou toemea a lilone amutou.

<sup>5</sup> Me Iesu Krais ei a bibi ei veipale bilisi a inadnade vuso mine Salemo. Ei a munugana bibi ei ilisiliu na minate, me ei a bibi buo mine sou a mapana mina magamaga ie. Ei tamai ei ni dode amutou mei ni toemea a lilone amutou.

Iesu ei kale mamai sele eitou, me na dalane ei oto ei taulele a sinusu vuso mine eitou.

<sup>6</sup> Ei toe eitou palea a abuna niitealalena mine Salemo ma abuna prist minei ane Salemo, ei e Tamane Iesu. Eitou kaka maido, taliuliu taliuliu Iesu Krais ei isa a aisa buo sele ma sagagalina mina itealena golugolu vuso. Moliana.

<sup>7</sup> “Oite, ei ni asu maino pilu a ausa,”

ma “vanunua vuso ne sou ite ei a matane sou oto.

Vanua sou ubi ei a lumusu sou tamai ne sou ite ei.”

Me sou a abuna vanunua ma tavivine vuso mina magamaga “ne sou damutale ei, me ne sou tangi dododo sele.” E, golu ieli ni palea sele simaido. Moliana.

<sup>8</sup> Salemo, Bibi Taula ei vei maido, “Eau a Alpa me eau a Omega, eau eili seidei ma lisa tamai, me mulimuli eau na asu usinani, eau isa a sagagalina vuso.”

*Ioanes ei ite Krais*

<sup>9</sup> Eau e Ioanes, tamaine amutou. Eau tamai eau guale a mavaana ma davutina tomene amutou, eau magitalitali a niitealalena mine Salemo. Eau malongo a inade mine Salemo, mea veimuade e Iesu. Vuna moni ieli, sou peltaselele eau me sou tau e eau na lolopatipati iedo sou tole e Patmos.

<sup>10</sup> Na malada mine Bibi Taula, a Maolona Nunu ei sibitala mei vonu lilo na lilogu, me eau longe a baligoluna bibi tasa ei tola sagali tomene a tinangi na tuai.

<sup>11</sup> A bibi iedo ei vei maido, “Golugolu vuso oo ite, iede oo no niage mo masosove usino na viepiluna kinaka padilua, ne Epe-sus, Smena, Pegamum, Taiataira, Sadis, Piladelpia me Laodisia.”

<sup>12</sup> Io eau sauvulesi ve na ite a bibi ei bilii e eau a inade do, me eau ite a butu na lada a gol padilua.

<sup>13</sup> Me eau ite a bibi tasa magili balivua na butu na lada sou odo. Ei lagu tomene e Iesu. Ei kai a kinainai lagolago i avisobe a ubuna, me ei labetole a loaloe a gol na madalone ei.

<sup>14</sup> A aivuvuna ma letena i keakea sele tomene a aivuna sipsip ma ausa keakea. Ma matana i lada tomene a oavi ei lulu sagali sele.

<sup>15</sup> Ubuna i lada sele tomene a bras sou tuni na oavi taula. Me eau longe a baligoluna i tagogolo tomene a nanu taula i sali.

<sup>16</sup> Ei sautole a mataidoido padilua na limana e gata. Ma viso tasa ei isa a matana i lua i binaso sele ei palea usala na asene ei. Ma laguna i lada sele tomene a oaso i lada mamau sele.

<sup>17</sup> Eau ite ei mea bosa agavuale a ubuna, me eau palea tomene a bibi ei matesi. Moni ei tau a limana e gata muata ne eau, me ei vei maido, “Oo ma laelae lou. Eau a munugana sele me a punuluna sele.

<sup>18</sup> Me eau eili eau mauili. Lisa eau matesi. Oite, seidei eau mauili taliuliu taliuliu. Me eau sautole a ki mina minate me mina aubu mine sou so matesi.

<sup>19</sup> “Maido me oo no niage a golugolu oo itesi odo, iede a golugolu ei eili seidei ma golugolu ei ni palea mulimuli.

<sup>20</sup> Oo ite a mataidoido padilua do sou ino na limagu e gata, ma butu na lada a gol padilua. Iede a inade i ovu, ma vune ei i maido, a mataidoido padilua do, iede sou a bineanea mina viepiluna kinaka padilua, ma butu na lada padilua do, iede a viepiluna kinaka padilua.”

## 2

*Inade usino na viepiluna kinaka mine Epesus*

<sup>1</sup> Bibi iedo ei ade lou maido, “Oo no ni-age a inade sanii usino na bineanea mina viepiluna kinaka ne Epesus. Inade oo no masosove usino ne ei i maido,

‘Eau sautole a mataidoido padilua na limagu e gata, me eau asuasu balivua na butu na lada a gol padilua.

<sup>2</sup> Eau muada a inigogona vuso o goli ma pipigona sagali minio. Me eau muada oo magili sagali me oo ma kale sape ete sou a vanunua pagupagu. Sou a vanua do sou vei lio maido, “Amiteu tamai a aposel.” Moni sou ma aposel oto. Me oo gegemulialesi a inade ne sou, me oo pogeuvuti maido sou a vanua na aualana moni.

<sup>3</sup> Eau muada oo sautole a aisagu, me na vuna moni ieli sou toegegeligeli e oo. Moni eau muada i maido, oo magili sagali a tabulena davutina do me oo ma bale oto a pipigona sagali iedo.

<sup>4</sup> Moni eau ade papai ane oo maido, palapala o kale sele eau, moni seidei boasi.

<sup>5</sup> Lisa oo ogomuli a vea doana sele, moni seidei oo litase a vea do me oo bosasi. Maido me oo no damutale lei a inigogona oo goli lisa me oo no sauvule a lilomu me oo goli a matana inigogona tomane palapala oo goli. Mane oo ma goli ete maido, io eau na asu usino minio mea na taulele a butu na lada minio maino na muina.

<sup>6</sup> Moni a inigogona minio tasa i kubaana i maido. Oo ma kale sele ete a inigogona mine sou a abuna mine Nikolas. Eau tamai, eau ma kale sele ete a inigogona mine sou.

<sup>7</sup> Io a bibi ei isa a tagilana, ei ni longe kube a inade li a Maolona Nunu ei malongo ane sou a viepiluna kinaka. Mane a bibi ei vululusi a maubina, eau na longo ane ei ni guale a vua na obu mina maulina. Obu iedo ei ino na aubu na munonge mine Salemo.’ ”

*Inade usino na viepiluna kinaka mine Smena*

<sup>8</sup> Bibi iedo ei ade lou maido, “Oo no ni-age a inade sanii usino na bineanea mina viepiluna kinaka mine Smena. Inade oo no masosove usino ne ei i maido,

‘Eau a munugana sele mea a punuluna sele. Lisa eau matesi, moni seidei eau eili mauli. Me eau masosove a inade li usino minio.

<sup>9</sup> Eau muada a mavaana ma davutina vuso ei palea le oo, me eau muada i maido oo ino kapelabe sele. Moni oo isa a golugolu papaina sele. Me eau muada a adepintolana sou a vanua sanii sou goli le oo. Sou

a vanua do sou vei, sou mina abuna Iuda. Moni sou ma abuna Iuda oto. Sou a abuna mine Satan moni.

<sup>10</sup> Mulimuli sapa oo no tabule a davutina, moni oo ma laelae lou. Longe. Satan ei ni tau sanii mine amutou ulilo na luma na tunuui mina tinovene amutou. Me ne amutou tabule a mavaana ma davutina mapigogoi a malada savulu tasa. Moni oo no silimuli sagali i asu pea na ilala oo mate, me eau na bilii e oo a kele na maulina.

<sup>11</sup> Io a bibi ei isa a tagilana, ei ni longe kube a inade li a Maolona Nunu ei malongo ane sou a viepiluna kinaka. Mane a bibi ei vululusi a maubina, io maluana minate ei ni ma mapigogoi ete ni toegegeli e ei, boa vuso sele.’ ”

*Inade usino na viepiluna kinaka mine Pegamum*

<sup>12</sup> Bibi iedo ei ade lou maido, “Oo no ni-age a inade sanii usino na bineanea mina viepiluna kinaka ne Pegamum. Inade i maido,

‘Eau sautole a viso lago ei binaso sele i isa a matana lua. Eau masosove a inade li usino minio.

<sup>13</sup> Eau muada kuba a aubu oo malu i iodo. A niugugu na mapana mine Satan ino na aubu iedo. Moni oo sautole obi a aisagu me oo silimuli e eau, me oo ma litasetase lei a silimulina ie. Lisa e Antipas, ei a bibi mina malongona inadegu, ei ino pilu e amutou. Ei ogomuli sele a inadegu, me sou valiputemate ei na aubu mine amutou, iede a aubu odo Satan ei ino i. Na ilala tamai iodo oo ma lametase ete eau.

<sup>14</sup> Moni eau ade papai ane oo a golu sanii. Oo isa a vanua sanii sou sautole obi a matetengina mine Balam. Lisa Balam ei maite e Balak a inigogona mina aualatasene sou e Israel me mina toebosene sou na sinusu. Maido me Israel sou ani a inani sou oabi usino ne sou a salemo auala, me sou goli a inigogona sualolona.

<sup>15</sup> Tomane moni, a vanua sanii nana minio, sou ogomulimuli a inade mine sou a abuna mine Nikolas.

<sup>16</sup> Maido me oo no sauvule a lilomu. Mane boa, ma tabaa oto eau na asuale oo, mea na maubi ane sou a vanua do a viso i eili na asegu.

<sup>17</sup> Io a bibi ei isa a tagilana, ei ni longe kube a inade ieli a Maolona Nunu ei malongo ane sou a viepiluna kinaka. Mane a bibi ei vululusi a maubina, io eau na bilii e ei a manna sanii ei ino ovu, me eau na bilii e ei a vatu tasa i keakea. Muata na vatu odo a aisa alaba tasa ino, ma bibi tasa boa ei muada a aisa ie. Bibi ei guale a vatu, ei moni ni muada i.’ ”

*Inade usino na viepiluna kinaka mine Taiataira*

<sup>18</sup> Bibi iedo ei ade lou maido, “Oo no niage a inade sanii usino na bineanea mina viepiluna kinaka ne Taiataira. Inade i maido,

‘Eau e Natune Salemo, ma matagu ei tomane a oavi ei lulu mamau sele, ma ubugu ei tomane a bras sou gulasi iiti sele. Eau masosove a inade li usino minio.

<sup>19</sup> Eau muada a inigogona vuso oo goli. Oo kale sele a vanunua ma tavivine me oo silimuli e eau, me oo buloi e sou a mata-matana pipigona, me oo magili sagali na mavaana vuso i palea le oo. A inigogona vuso oo goli lisa sou doana, me seidei a inigogona minio i palea doana sele lou.

<sup>20</sup> Moni eau ade papai ane oo. Oo iteatase a tavine Iesebel iede nana pilu e oo. Tavine do ei veivei maido ei a profet tavine, moni ei aualala ana vanua na pipigona minau me ei matetengi e sou ne sou goli a inigogona سوالولونا me sou ani a gona inani sou oabi usino ne sou a salemo auala.

<sup>21</sup> Eau bilii e ei a ilala sanii i mapigogoi ne ei ni sauvule a lilone ei, moni ei ma kale ete ni sauvule a inigogona سوالولونا minei.

<sup>22</sup> Io longe. Eau na malaitabe a tavine do ni guale a sinobe mei ni isa a davutina buo. Me sou a vanua sou goli a inigogona سوالولونا pilu e ei, mane sou ma sauvule ete a lilone sou me sou ma lametase ete a inigogona vuso ei goli, io eau na bilii e sou tamai a davutina ma mavaana buo.

<sup>23</sup> Sou e natatuna tamai, eau na vali-putemate sou. Maido ma viepiluna kinaka vuso ne sou muada maido, eau gegemumu-liale iiti a lilone sou ma damutatalana mina vanunua vuso. Eau na malii a mapa usino ne amutou tastasa mapigogoi a inigogona amutou goli.

<sup>24</sup> Moni seidei eau vei le amutou sanii mina viepiluna kinaka ne Taiataira. Amutou ma ogomuli ete a inade mina tavine iede, me amutou ma guale ete a muadana mina inigogona ie sou vate “A inade i ovu mine Satan.” Eau vei le amutou maido, eau na ma tau ete a mavaana sea usino ne amutou.

<sup>25</sup> Moni a golugolu vuso amutou sautole, iede ne amutou sautole sagali pea na ilala eau asu usinani.

<sup>26</sup> Mane a bibi ei vululusi a maubina mei ogomuli a inigogona minau pea na ilala mina golugolu vuso ni pulu, io eau na bilii e ei a sagagalina ni muina a mapana mine sou a abuna vanunua ma tavivine vuso.

<sup>27</sup> Me ei ni iteale sagali sele sou a butu a

ain tomane a bibi ei valipole gigini a taogo magamaga tasa. Sagagalina do eau na bilii e ei ieli, ei tomane a sagagalina Euma ei bilii e eau.\*

<sup>28</sup> Me tamai, eau na bilii e ei a mataidoido tosele.

<sup>29</sup> Io a bibi ei isa a tagilana ei ni longe kube a inade li a Maolona Nunu ei malongo ane sou a viepiluna kinaka.’ ”

### 3

*Inade usino na viepiluna kinaka mine Sadis*

<sup>1</sup> Bibi iedo ei ade lou maido, “Oo no niage a inade sanii usino na bineanea mina viepiluna kinaka mine Sadis. Inade i maido,

‘Eau isa a nunu padilua mine Salemo me eau lapitole a mataidoido padilua do. Eau muada a inigogona vuso oo goli, oo lagu mauli, moni boa, oo matesi.

<sup>2</sup> Oo no lutu mo ilisi. Golu ieli saboa mate, moni i agaviosi ni mate, iede oo no masagali. Vuna saboa eau ite a inigogona minio i bilesi vuso na matane Salemo minau.

<sup>3</sup> A malongolongona kubaana lisa oo longe mo guale do, iede no damutaleliu lei. Me oo no ogomuli iiti me oo sauvule a lilomu. Mane oo ma lutu oto a ngunolo, io ma tabaa oto eau na asuale oo tomane a bibi na paaalina. Oo ma mapigogoi ete no muada sei ilala eau na asu usinani.

<sup>4</sup> Moni oo isa a vanunua ma tavivine sanii ino ne Sadis sou ma toemumugi ete a kinainai mine sou. A inigogona mine sou ei bilesi, mapigogoi ne sou kai a kinainai keakea me sou asu pilu e eau.

<sup>5</sup> Mane a bibi ei vululusi a maubina, io eau na makai ei a matana kinainai keakea, me eau na ma saveitase ete a aisane ei na laulau mina maubina. Eau na veipale a aisane ei na lagune Euma me sou a bineanea minei.

<sup>6</sup> Io a bibi ei isa a tagilana ei ni longe kube a inade a Maolona Nunu ei malongo ane sou a viepiluna kinaka.’ ”

*Inade usino na viepiluna kinaka mine Piladelpia*

<sup>7</sup> Bibi iedo ei ade lou maido, “Oo no niage a inade sanii usino na bineanea mina viepiluna kinaka mine Piladelpia. Inade oo no masosove usino ne ei i maido,

‘Eau maolo, ma inigogona vuso minau i patotona. Eau lapitole a ki mine Devit. Ma golu eau pee, a bibi tasa i ma mapigogoi ete ni kapi, ma golu eau kapi, a bibi tasa i ma mapigogoi ete ni pee.

<sup>8</sup> Eau muadasi a inigogona vuso oo goli. Io oite. Na lagune oo, eau peesi a tema, ma

\* 2:27 Laulau na Inala 2:8-9

bibi tasa i ma mapigogoi ete ni kapi. Eau muada i maido a sagagalina minio ma buo oto, moni oo ogomuli a inadegu, me oo ma lametase ete a aisagu.

<sup>9</sup> Oo muada e sou a abuna mine Satan, sou vei ve, sou a abuna mine Iuda, moni boa. Sou a vanunua na aualana. Io longe. Eau na toe sou a vanua ie ne sou asu me sou totopatulu agavuale a ubumu me ne sou muada i, eau kale mamai sele oo.

<sup>10</sup> Oo ogomuli iiti a inadegu, me oo magili sagali na mavaana vuso ei palea le oo. Maido me eau na iteale oo na ilala tinovo do ei kale ni palea mei tove sou a vanunua ma tavivine na aveavena vuso na magamaga.

<sup>11</sup> Eau na asu asi usino minio. Golu oo lapitole, iede oo no lapitole obi, dae a bibi tasa ei ni guale a kele minio.

<sup>12</sup> Mane a bibi ei vululusi a maubina, eau na mamagili e ei tomane a baobao na toesagalina luma mine Salemo minau, me ei ni ma ilisitase ete a luma mine Salemo. Boa vuso sele. Eau na niage a aisane Salemo minau muata ne ei me eau na niage a aisana aubu buobuo mine Salemo minau, ei e Jerusalem alaba i asu maino ne Salemo minau mei ilisitase a langi mei sivo utano. Ma aisagu alaba do, iede tamai eau na niage muata ne ei.

<sup>13</sup> Io a bibi ei isa a tagilana, ei ni longe kube a inade do a Maolona Nunu ei malongo ane sou a viepiluna kinaka.’ ”

*Inade usino na viepiluna kinaka mine Laodisia*

<sup>14</sup> Bibi iedo ei ade lou maido, “Oo no niage a inade sanii usino na bineanea mina viepiluna kinaka mine Laodisia. Inade oo no masosove usino ne ei i maido,

‘Eau a bibi sou tole e “Amen,” me eau ogomuli sagali sele a inade vuso mine Salemo. Me taliulu eau veipale a inade patotona moni. Eau a vuna golugolu vuso Salemo ei mapale.

<sup>15</sup> Eau muadasa a inigogona vuso oo goli. Eau muada, oo ma maigi oto me oo ma tivula oto. Eau kale oo no maigi ue oo no tivula,

<sup>16</sup> moni boa. Oo tivula bisii moni. Oo ma tivula vauta oto me oo ma maigi vauta oto. Maido me eau na luetaselele oo na asegu.

<sup>17</sup> Oo adeade maido, “Eau isa a vatu makuba, me eau isa a golugolu makuba i doana. Eau ma boto oto a golu tasa.” Moni boa. Oo ugu gegelu sele, mapigogoi ne sou a vanua ne sou lilomuli e oo. Oo kapelabe sele me oo mata ego me oo magili aimu moni. Me oo oto o ma muada oto a golu ie.

<sup>18</sup> Maido me eau ade sagali ane oo. No oli a gol minau, iede a oavi ei tuni mei taulele sele a golugolu pagu ne ei. Maidolo

oo no palea vuvuti. Me puiale oo no oli a kinainai keakea mina kaisobena vovomu, me sou a vanua ma mapigogoi ete ne sou ite oo magili aimu moni me oo maela i. Me puiale oo no oli a bunu mo no tau na matamu, me oo no gemu kuba.

<sup>19</sup> A vanua sanii eau kale, io eau ade papai ane sou mea toebilelesi a inigogona mine sou. Maido me oo no sagali a toebilelesina inigogomu, me oo no sauvule a lilomu.

<sup>20</sup> Longe, eau magili na tema mea lalaba. Mane a bibi tasa ei longe eau mei pee a tema, io eau na gali ulilo mea na aani pilu e ei, me ei ni aani pilu e eau.

<sup>21</sup> Mane a bibi ei vululusi a maubina, eau na longo ei ni ugu pilu e eau na niugugu a mapana minau tomene lisa eau vululusi a maubina, mea ugu pilu e Euma na niugugu a mapana minei.

<sup>22</sup> Io a bibi ei isa a tagilana ei ni longe kube a inade ieli a Maolona Nunu ei malongo ane sou a viepiluna kinaka.’ ”

## 4

*Sou totopatuliale Salemo na langi*

<sup>1</sup> Tauluna golu ieli eau gemu lou mea ite a tema tasa i peosi na langi. Eau longe a baligoluna bibi iedo, lisa ei tola sagali ane eau tomene a tinangi na tuai, ei vei maido, “Oo asu uata na, mea na maite oo a sei golu ni palea mulimuli.”

<sup>2</sup> Ma tabaa oto a Maolona Nunu ei muge eau usino na langi, me eau ite a niugugu a mapana tasa ino, ma Bibi tasa ugugu na niugugu odo.

<sup>3</sup> Bibi iedo ei lada tomene a vatu iaspa ma vatu kasososo konilian. Oolo tasa i tabuli saiiili a niugugu a mapana, mea ite a oolo do ei lada tomana vatu esaesa emeral.

<sup>4</sup> Ma niugugu savulu lua timana iva sou magili saiiili a niugugu a mapana do, ma vanua buobuo savulu lua timana iva sou ugu na niugugu sou odo. Vanua buobuo do sou kai a kinainai lagolago keakea me sou kai a kele a gol na letene sou.

<sup>5</sup> Na niugugu a mapana eau ite a sima i lada, ei vele maisaba, mea longe a mangelengelena buo ei palea ma ausa i tupaulu. Masae na niugugu sulu padilua sou lulu. Sulu sou odo sou a nunu padilua mine Salemo.

<sup>6</sup> Masae na niugugu a mapana a golu tasa ino ei lagu tomene a dasi taula sou goli a glas, me ei muada sele tomene a kristal.

Ma golu iva mauili sou magili balivua na niugugu a mapana me magili saiiili odo. Golu iva sou isa a maulina do sou isa a mata makuba sou avisobe a vovone sou vuso masae me mamuli tamai.

<sup>7</sup>A munugana golu i mauli ei lagu tomane a laion. Maluana golu i mauli ei lagu tomane a bulmakau a togo. Matoluna golu i mauli ei lagu tomane a laguna bibi. Maivana golu i mauli ei lagu tomane a loaulu ei lovolovo.

<sup>8</sup>Golu iva sou mauli odo, sou vuso tastasa sou isa a vevelene sou pantasa. Ma mata makuba ei avisobe a vovone sou, me ei ino matano na vevelene sou tamai. Me na oaso me na lodo sou adeade maido,

“Bibi Taula, ei maolo, ei maolo, me ei maolo.

Ei e Salemo, ei isa a sagalina vuso. Lisa ei eili, me seidei ei eili, me mulimuli ei ni asu usinani.”

Sou ma manoanoa oto a inade ie.

<sup>9</sup>Golugolu sou mauli odo sou tadetade a Bibi iedo ei ugu na niugugu a mapana minei me ei mauli taliulu taliulu. Me sou beilangelange a aisane ei me sou toledadangi-dangi e ei. Na ilala a golu iva sou toe simaido,

<sup>10</sup>io sou a vanua buobuo savulu lua timana iva do sou totopatulutulu na laguna Bibi iedo ei ugu na niugugu a mapana. Me sou totopatuliale ei, ei a Bibi ei muina taliulu taliulu. Sou guale a kele a gol mine sou me sou lange sou masae na niugugu a mapana, me sou alaala maido,

<sup>11</sup>“Bibi Taula, oo Salemo mine amiteu.

Mapigogoi sele sou a vanunua vuso ne sou tade oo

me sou beilange a aisamu me sou muina matano na sagalina minio.

Vuna, oo mapale a golugolu vuso.

Na masagana minio oto oo toe a golugolu vuso i palea, me seidei a golugolu vuso do sou eili.”

## 5

*Ioanes ei ite a laulau tasa sou kapiosi*

<sup>1</sup>Eau ite a Bibi iedo ei ugu na niugugu a mapana i sautoletole a laulau tasa na limana e gata. Laulau odo sou vivili me sou papale, na laulau odo sou niage masae me mamuli me sou bulibulitole, a bulibulitolena ei padilua.

<sup>2</sup>Me eau ite a bineanea tasa sagali ei tola vauta maido, “Sei ei doana i mapigogoi ni taulele a bulu na kandel sou madamsoe a laulau odo mei pee a laulau?”

<sup>3</sup>Moni tasa na langi, ue ieli na magamaga, ue matano na magamaga i ma mapigogoi ete ni pee a laulau odo me ei gegemuale.

<sup>4</sup>Me eau ite maido a bibi tasa i ma mapigogoi ete ni pee a laulau odo me ei gegemuale, maido me eau tangi mamau sele.

<sup>5</sup>Me tasa mine sou a vanua buobuo ei vei le eau maido, “Oo ma tangitangi lou. Oite, Laion iedo ei palea na abuna ne Iuda, iedo

aana ei palea maino ne sou a abuna mina Mapana e Devit, ei vululusi a maubina me ei taupuiosi a butu vuso minei. Maido me ei mapigogoi ni taulele sou a bulu na kandel padilua i madamsoe a laulau odo me ei pee a laulau.”

*Ioanes ei ite e Natuna Sipsip*

<sup>6</sup>Me eau ite e Natuna Sipsip i magili muina. Ei lagu tomane sou valiputemate ei. Ei magiligili na niugugu a mapana ino balivua na golu iva sou mauli odo ma vanua buobuo sou magili saili e ei. Ei isa a siilina padilua ma matana i padilua, matana padilua iede sou a nunu padilua mine Salemo ei peltase sou usino na aveavena vuso mina magamaga.

<sup>7</sup>Io Natuna Sipsip ei asu maino me ei guale a laulau odo maino na lima gata mina Bibi iedo ei ugu na niugugu a mapana.

<sup>8</sup>Ei gualesi a laulau odo, ma golu iva sou mauli odo me sou a vanua buobuo savulu lua timana iva sou totopatulua agavuale Natuna Sipsip. Sou a vanua buobuo sou tastasa lapitole a galamo ma taogo a gol i vonu sele a muo a manginana doana, iede ei a kinaka vuso mina vanunua ma tavivine sou maolo.

<sup>9</sup>Me sou ale a inala alaba tasa maido, “Oo puiale sele no guale a laulau mo taulele a bulu na kandel vuso ei bulubulutole a laulau.

Vuna, sou valiputemate oo, me na dalane oo oo oliliuale sou a vanunua ma tavivine mina abuna vanua vuso, me mina inadenade vuso, me mina matamatana vovo vuso, me mina avena buobuo vuso,

ne sou bilii e sou oto usino ne Salemo.

<sup>10</sup>Oo toe sou palea a niitealalena mine Salemo ma abuna prist mine Salemo. Me ne sou muina a mapana me ne sou iteale a vanunua ma tavivine na magamaga.”

*Sou beilange a aisane Natuna Sipsip*

<sup>11</sup>Io, eau gemu lou, me eau longe a tinola mina bineanea makuba lou. Savulu ne sou i tomane savuluvulu savuluvulu savulu sobo (1,000,000) makuba. Sou magili saili a niugugu a mapana ma golugolu iva sou mauli me sou a vanua buobuo.

<sup>12</sup>Sou tola sagali maido, “Telili e Natuna Sipsip lisa sou valipute ei, ei mapigogoi sele ni guale a niugugu buo ma golugolu doana vuso ma muadana i doana ma sagalina buo ma aisa buo ma masalalaina ma maibalavana.”

<sup>13</sup>Me eau longe a inadenade mina golugolu vuso Salemo ei mapale, iede a golugolu ei ino na langi me na magamaga, me

matano na magamaga me na dasi. E, a golugolu vuso ino mina aveavena vuso, eau longe sou vei maido,

“Bibi iede ei ugugu na niugugu a mapana minei, me Natuna Sipsip tamai, sulu olu ne su guale a maibalavana vuso ma aisa buo ma masalalaina ma sagagalina buo i mapigogoi taliuliu taliuliu.”

<sup>14</sup> Ma golu iva sou mauili sou vei, “I moliana.” Me sou a vanua buobuo sou totopat-uliale sulu.

## 6

*Natuna Sipsip ei taulele a bulu na kandel i madamsœ a laulau*

<sup>1</sup> Eau ite Natuna Sipsip ei lapitole a laulau odo i isa a bulu na kandel padilua, me ei taulele a munugana bulu na kandel. Me eau longe tasa mine sou a golu iva sou mauili odo ei ade, ma baligolune ei tomana ausa ei tupaulu. Ei vei maido, “Oo vele.”

<sup>2</sup> Me eau gemu lou mea ite a hos tasa keakea, ma bibi ei ugu i ei lapitole a banara. Sou bilii e ei a kele tasa mina bibi ei vululusi a maubina, me ei asu me ei vululusi a maubina me ei kale ni vululusi a maubina makuba lou.

<sup>3</sup> Io Natuna Sipsip ei taulele a maluana bulu na kandel, me eau longe a maluana golu ino mauili ei vei maido, “Oo vele.”

<sup>4</sup> Ma hos tasa sea i palea ei kamososo. Sou bilii a sagagalina usino na bibi i ugu na hos odo, a sagagalina iede ei mina mapulina ilala doana mine sou a vanunua ma tavivine mina magamaga, ne sou maivalipute liu. Me sou bilii e ei a viso tasa buo na maubina mina gunolina pipigona do.

<sup>5</sup> Io Natuna Sipsip ei taulele a matoluna bulu na kandel, me eau longe a matoluna golu ino mauili ei vei, “Oo vele.” Me eau gemu lou mea ite a hos tasa paululu. Ma bibi ei ugu i ei lapitole a skel na limane ei.

<sup>6</sup> Me eau longe a golu tomane a tinola na bibi tasa ei malongo balivua na golu iva sou mauili, ma tinola do ei vei maido, “A mapa a vanua sou pipigo me sou guale na malada tasa, iede mapigogoi ne sou oli a taogo na vit alabaini tasa ue a taogo na bali alabaini tolu moni. Moni oo ma toegegelligeli lei a obuobu a oliv ma mauma na vain.”

<sup>7</sup> Io Natuna Sipsip ei taulele a maivana bulu na kandel, me eau longe a tinola na maivana golu i mauili ei vei maido, “Oo vele.”

<sup>8</sup> Me eau gemu lou mea ite a hos tasa ian-gango sapa. Ma bibi ei ugu i, aisana minate, ma aubu mine sou a vanua sou matesi ei ogomuli a minate usinani. Sou bilii e sulu a sagagalina mina soebulena vanunua ma tavivine na abuna iva me mina valiputem- atene tasa mine sou a abuna iva do. Ne sulu

valipute sou a vanunua ma tavivine a viso, ma vitolona buo, ma sinobe buo, ma viuvuu masivo.

<sup>9</sup> Io Natuna Sipsip ei taulele a malimana bulu na kandel, me eau ite a nunu ne sou a vanunua ma tavivine sou matesi sou ino matano na luuvana poso. Lisa a vanunua ma tavivine do sou lapitole sagali a inade mine Salemo me sou veipale a inade do, maido me sou a butu sou valiputemate sou.

<sup>10</sup> Sou a nunu odo sou tola sagali maido, “Mapana Buo mina golugolu vuso, oo maolo, ma inigogona minio ei patotona sele. Mavisa namiteu magitali, me oo no vavasa ane a vanunua ma tavivine na magamaga, me oo no malii a dalane amiteu usino ne sou?”

<sup>11</sup> Io sou bilii a kinainai lagolago keakea usino ne sou a vanunua ma tavivine tas-tasa do, me sou vei le sou maido, “Amutou namutou manoa sapa muga mapigogoi sou a butu ne sou valiputemate sou a maita-maina pipigona mine amutou me tamta-maina amutou vuso tomane sou valipute amutou oto. Ilala sou a butu sou vali-putematesi e sou a vanunua ma tavivine mapigogoi a savulu ne sou ni pulu vuso, io Salemo ei ni malii a dalane amutou usino ne sou.”

<sup>12</sup> Io Natuna Sipsip ei taulele a mapan-tasana bulu na kandel, me eau gemu lou, mea ite a malugulugu buo ei palea na mag-amaga. Ma oaso ei lodoalo tomane a malo paululu na minate. Ma game ei palea ka-soso sele tomane a daladala.

<sup>13</sup> Mataidoido mina langi sou pu utano na magamaga tomane a avivili ei iune a obu a fik ma vua na fik saboa sou malea sou lili.

<sup>14</sup> Langi tamai ei bualesi tomane a moe sou vivili me sou papale. Me sou a lolo vuso ma lolopatipati sou ilisitase a muine sou, me sou suulele usino.

<sup>15</sup> Me sou a mapana mina magamaga pilu a vanua buobuo me sou a munuganuga mina maubina me sou a vanunua na vu-vutina me sou a sagalina vanua me sou a vanua na pipigona sabubu me sou a vanua malamala sou vuso sou oava usino me sou ovu lilo na babe na vatu ma vaivai na vatu buobuo uata na loena.

<sup>16</sup> Me sou tola ana loeloena vuso ma vatu-vatu maido, “Pu muata ne amiteu, me mu tau oovi e amiteu na laguna Bibi ei ugu na niugugu a mapana minei ma lilotivulana buo mine Natuna Sipsip.

<sup>17</sup> Na malada buo mine sulu odo su lilo-tivula ane sou a vanunua ma tavivine me su malii a mapa pagu usino ne sou ei paleasi. Me sei mapigogoi ni saukiki a sagagalina mine sulu mei ni kuba lou?”



## 7

*Vanunua ma tavivine savuluvulu savulu sobo tasa timana savuluvulu savulu iva timana savuluvulu iva (144,000) mine Israel sou guale a matailala mine Salemo*

<sup>1</sup> Tauluna golu ieli, io eau ite a bineanea iva sou magili na sugu iva na magamaga. Sou lapitole liu a avivili iva mina magamaga ne sou ma mapigogoi ete ni vali a magamaga, dasi ma obuobu.

<sup>2</sup> Me eau ite a bineanea tasa sea ei ilisi na avena oaso tala i me ei asu maino. Ei lapitole a matailala mine Salemo ei mauili taliuliu, me ei tola sagali ane sou a bineanea iva Salemo ei bilii e sou a sagagalina mina toegegeli na magamaga pilu a dasi.

<sup>3</sup> Ei vei maido, “Amutou ma toegegeli lei a magamaga, dasi ma obuobu pea amiteu tau pale a matailala mine Salemo mine eitou na palala ne sou a vanua na pipigona minei, mulimuli namutou toegegeli a golugolu.”

<sup>4</sup> Me eau longe sou vate a savulu na vanunua ma tavivine sou guale a matailala i savuluvulu savulu sobo tasa timana savuluvulu savulu iva timana savuluvulu iva (144,000) balivua ne sou a abuna mine Israel.

<sup>5</sup> Vanunua ma tavivine savuluvulu savulu tasa timana savuluvulu lua (12,000) na abuna mine Iuda sou guale a matailala,

me savuluvulu savulu tasa timana savuluvulu lua na abuna mine Ruben, me savuluvulu savulu tasa timana savuluvulu lua na abuna mine Gat,

<sup>6</sup> me savuluvulu savulu tasa timana savuluvulu lua na abuna mine Aser; me savuluvulu savulu tasa timana savuluvulu lua na abuna mine Naptali, me savuluvulu savulu tasa timana savuluvulu lua na abuna mine Manase,

<sup>7</sup> me savuluvulu savulu tasa timana savuluvulu lua na abuna mine Simeon, me savuluvulu savulu tasa timana savuluvulu lua na abuna mine Livai, me savuluvulu savulu tasa timana savuluvulu lua na abuna mine Isakar;

<sup>8</sup> me savuluvulu savulu tasa timana savuluvulu lua na abuna mine Sebulun, me savuluvulu savulu tasa timana savuluvulu lua na abuna mine Iosep, me savuluvulu savulu tasa timana savuluvulu lua na abuna mine Benjamin. Vanunua ma tavivine vuso do sou guale a matailala mine Salemo.

*Abuna vanunua ma tavivine makuba sou totopatuliale Salemo*

<sup>9</sup> Tauluna golu ieli, eau ite a vanunua ma tavivine makuba sele sou viepilu i ma mapigogoi ete a bibi ni gi a savulu ne sou.

Vanunua ma tavivine do sou mina abuna vanua vuso me mina avena buobuo vuso, me mina matamatana vovo vuso, me mina matamatana inade vuso, sou magili na laguna niugugu a mapana me na matane Natuna Sipsip. Sou kai a kinainai lagolago keakea, me na limane sou, sou lapitole a laulau na obu a lou.

<sup>10</sup> Sou tola sagali maido, “Salemo mine eitou ei ugu na niugugu a mapana minei, me Natuna Sipsip, sulu moni su gualeliuliu e eitou me sulu toe eitou malu kuba.”

<sup>11</sup> Me sou a bineanea sou magili saiiili a niugugu a mapana me sou a vanua buobuo me sou a golu iva sou mauili, me sou totopatulu me sou taupute a letene sou utano na magamaga, me sou totopatuliale Salemo.

<sup>12</sup> Sou vei maido,

“Moliana!

Neitou veipale a maibalavana ma malasana buo minei.

Ei isa a damutatalana doana vuso, me eitou toledadangi e ei, me eitou beilange a aisane ei.

Ei isa a sagagalina ivu. E, a sagagalina buo vuso ino ne ei.

Taliuliu taliuliu golugolu vuso do sou mine Salemo mine eitou moni.

Moliana sele!”

*Davutina seidei ei pulosi*

<sup>13</sup> Io tasa mine sou a vanua buobuo ei tagi e eau maido, “Sou a vanunua ma tavivine sou kai a kinainai lagolago keakea do, ede sei sou? Sou asu maino ne sei avena?”

<sup>14</sup> Me eau malii a inade minei maido, “Bibi buo, oo oto oo muada.” Me ei vei le eau maido, “Sou a vanunua ma tavivine do sou guale a mavaana buo ma davutina na limane sou a butu. Me sou loloi a kinainai mine sou a dalane Natuna Sipsip, ma kinainai sou odo i palea kea sele.

<sup>15</sup> Maido me,

“Sou magiligili na laguna niugugu a mapana mine Salemo. Me na oaso me na lodo sou ino na luma mine Salemo me sou pipigopigo ane ei.

Me Salemo ei ugugu na niugugu na mapana, ei oto ei ni muina pilu e sou mei iteale sou.

<sup>16</sup> Ne sou ma vitolo lou oto, ma loone sou ni ma tagasa lou oto.

Oaso ei ni ma mapigogoi ete ni voe a vovone sou, ma golu tasa boa ei ni toe a vovone sou i tivula mamau sele.

<sup>17</sup> Vuna maido, Natuna Sipsip ei ino balivua sele na niugugu a mapana, ei ni muina a bibi na niitealalena mine sou.

Ei ni maasi e sou usino na aopu na nanu, ede a nanu mina biliina maulina.\*

\* 7:17 Aisaia 49:10

Me ‘Salemo ei ni saveitagase a matananu ne sou vuso, me ne sou ma tangi lou oto.’†”

## 8

*Natuna Sipsip ei taulele a padiluana bulu na kandel*

<sup>1</sup> Na ilala Natuna Sipsip ei taulele mapadiluana bulu na kandel, langi ei tabou na baana matailala tasa.

<sup>2</sup> Me eau ite a bineanea padilua sou magili masae ne Salemo, me sou guale a tuai padilua.

<sup>3</sup> Ma bineanea tasa sea ei asu maino me ei magili agavuale a poso na niabi. Ei lapitole a taogo a gol mina kavou mina mapalena muo ei isa a manginana doana. Me sou bilii e ei a matana kavou makuba, mine ei ni taupili a kinaka mine sou a vanunua ma tavivine sou maolo, me ei ni iabi ei usino na poso na niabi a gol ino na laguna niugugu a mapana mine Salemo.

<sup>4</sup> Ma muo ei isa a manginana doana do pilu a kinaka vuso mine sou a vanunua ma tavivine sou maolo, sou ilisitase a limana bineanea me sou vele uata na lagu ne Salemo.

<sup>5</sup> Io a bineanea ei guale a oavi maino na poso na niabi mei totongivoni ei na taogo na muo ei isa a manginana doana do, me ei lange a oavi utano na magamaga. Io, sima i tupaulu ma mangelengelena buo i palea, ma muada na sima ei vele maisaba, ma malugulugu i vuli.

*Bineanea iva sou pusi a tuai*

<sup>6</sup> Io a bineanea padilua do sou lapitole a tuai padilua, me sou masusulu a punusina tuai.

<sup>7</sup> Munugana bineanea ei pusi a tuai minei, ma tabaa oto aulabunu vatu ma oavi pilu a daladala sou palea, me sou pu utano na magamaga. Ma oavi ei aani vuse a avena tasa mine sou a avena magamaga tolu ma maduna tasa mine sou a maduna obu tolu, ma gulugulu esaesa vuso sou tamai oavi ei aani vuse sou.

<sup>8</sup> Io a maluana bineanea ei pusi a tuai minei, me sou lange a golu tasa tomane a lolo buo ei lulu mei pu utano na dasi. Ma avena tasa mine sou a avena dasi tolu ei palea a daladala.

<sup>9</sup> Ma abuna tasa mine sou a abuna mauli na dasi tolu, sou tamai sou mate. Ma abuna kuta tasa mine sou a abuna kuta tolu sou tamai mamau vuso.

<sup>10</sup> Io a matoluna bineanea ei pusi a tuai minei, ma mataidoido tasa buo ei lulu tomane a sulu ei ilisitase a langi mei pu utano. Ma mataidoido iedo ei pu muata na

avena tasa mine sou a nanu avena tolu me sou a aopu na nanu.

<sup>11</sup> Aisana mataidoido iedo sou vate a bunu i isa a pipitina. Ei pu muata na avena tasa mina nanunanu avena tolu odo, me sou a nanu odo sou palea tomane a bunu i ama sele. Vanunua makuba sou inu a nanu odo, me sou mate.

<sup>12</sup> Io a maivana bineanea ei pusi a tuai minei, me sou toegegeli a maduna oaso tasa mina maduna tolu ma maduna game tasa mina maduna tolu ma maduna tasa mina maduna tolu mine sou vuso a mataidoido. Ma avena tasa mina avena tolu mine sou ei palea tunuui, maido ma maduna tasa mina maduna tolu mina oaso me mina lodo ei ma isa oto a muada.

<sup>13</sup> Me eau ite a loaaulu tasa buo ei lovo balivua na langi. Me eau longe ei tola sagali maido, “Maula, maula, maule amutou a vanunua ma tavivine ino na magamaga, vuna a bineanea tolu lou ne sou pusi a tuai mine sou.”

## 9

*Malimana bineanea ei pusi a tuai*

<sup>1</sup> Io a malimana bineanea ei pusi a tuai minei, me eau ite a mataidoido tasa ei ilisitase a langi mei pu utano na magamaga. Me Salemo ei malapitole ei a ki mina aova a sinuana boa.

<sup>2</sup> Io a keadoido ei pee a aova do, ma muo ei bogili maino na aova do tomane a muo na oavi buo. Mei tabesobe a oaso ma langi, me sou palea tunuui.

<sup>3</sup> Ma keadodoo makuba sou lovo maino na muo do, me sou lovo utanosi na magamaga. Sagagalina ne sou tomane moni a tumailu.

<sup>4</sup> Me sou vei le sou a keadodoo vuso do maido, “Amutou ma toegegeligeli lei a gulugulu ma laulau esaesa ma obuobu. Namutou toegegeli moni a vanunua ma tavivine sou ma isa oto a matailala mine Salemo na palalane sou.

<sup>5</sup> Namutou bilii a davutina moni usino na vanunua ma tavivine do asu mapigogoi a game lima, moni amutou ma valiputemate mate lei e sou.” Davutina sou bilii usino na vanunua ma tavivine do, ei tasa moni tomane a tumailu sou ubi a vanunua ma tavivine.

<sup>6</sup> Na ilala do a vanunua ma tavivine ne sou tilotilo a vea ne sou mate, moni ne sou ma poqe etc. Sou kale sele ne sou mate, moni a minate ei ni iavetase sou.

<sup>7</sup> Eau ite a keadodoo sou odo tomane a hos sou masusulu a maubina. Na letene sou, a golu tomane a kele a gol ino. Ma lagune sou tomane a laguna bibi.

<sup>8</sup> Ma aivune sou lagolago tomane a aivuvuna tavivine. Ma livone sou i tomane a livona laion.

<sup>9</sup> Golugolu tomane a kinainai a bras a ain ei avisobe a madalone sou, ma vevelelene sou i tupapaga tomane a hos makuba sou lapuale a papao me sou vele usino na maubina.

<sup>10</sup> Sou isa a iuna tomane a tumailu ma ilina tamai. Ma sagagalina mina bilinga davutina usino ne sou a vanunua ma tavivine i asu mapigogoi a game lima, davutina do ei ino na iune sou.

<sup>11</sup> Sou isa a mapana tasa, ei a munugana mine sou. Ma mapana do ei a bineanea mina aova do i tano oto sele ma sinuana boa. Na inade Hibru sou vate a aisana e Abadon, na inade Grik sou vate ei a Apolion.\*

<sup>12</sup> Io a munugana mavaana buo ei pulosi. Moni longe, mavaana lua saboa ino, mulimuli ei ni palea.

#### *Mapantasana bineanea ei pusi a tuai*

<sup>13</sup> Io a mapantasana bineanea ei pusi a tuai minei, mea longe a baligolu tasa i ade balivua ne sou a siili iva ino na sugu iva na poso a gol ino masae ne Salemo.

<sup>14</sup> A baligolu odo ei vei ana mapantasana bineanea i lapitole a tuai iodo maido, "Oo no lubetase a bineanea iva do sou papale sou me sou ugu na luma na tunuui mina nanu buo sele e Iupretis."

<sup>15</sup> Io ei lubetase a bineanea iva do, ne sou soebule a vanunua ma tavivine vuso na abuna tolu me ne sou valiputemate vuse a abuna tasa. Bineanea sou odo sou masuluosi me sou magitali a baana matailala do ma malada do ma game do ma avala do mina pipigona do.

<sup>16</sup> Eau longe a savulu ne sou a vanua na maubina sou ugu na hos i mapigogoi savuluvulu savuluvulu savulu sobo lua (2,000,000).

<sup>17</sup> Me na golu tomane a tinada eau ite sou a hos ma vanua sou ugu na hos. Vanunua do sou kai a kinainai a bras a ain, ma tatalona mine sou a kinainai iodo ei kasososo, me malavovola, me iangango. Letene sou a hos ei tomane a letena laion. Ma oavi ma muo ma vatu loiloi sou lulu, sou palea maino na asene hos me ei velebula maisaba.

<sup>18</sup> Ma golu tolu pagu odo sou valiputemate vuse a vanunua ma tavivine na abuna tasa maino na abuna tolu. A golu tolu odo iede a oavi ma muo ma vatu loiloi sou asu maino na asena hos vuso.

<sup>19</sup> Sagagalina mine sou a hos odo ino na asena ma iune sou. Iune sou i tomane a

aliosu, me ei isa a letena. Me sou a hos sou toegegeli a vanunua ma tavivine a iune sou.

<sup>20</sup> Vanunua ma tavivine sanii, iede sou a abuna golu pagu tolu odo sou ma valiputemate ete sou, sou ma savvule ete a lilone sou me sou ma lametase ete sou a salemo auala sou pui a limane sou oto. Sou ma litase ete a inigogona totopatulialene sou a nunu pagu me ane sou a nunu na salemo auala vanua sou pui a gol, silva, bras, vatu ma obu, iede sou ma gemugemu oto me sou ma longelonge ete a inade me sou ma asuasuo oto.

<sup>21</sup> Vanunua ma tavivine do sou valiputemate sou sanii, me sou goli a milolo, me sou goli a inigogona sualolona ma paalina. Moni sou ma savvule ete a lilone sou me sou ma lametase ete a inigogona do.

## 10

### *A bineanea ei bilii e Ioanes a laulau me ei ani*

<sup>1</sup> Io eau ite a bineanea tasa sea ei sagali ei asu muata na langi. Ei avisobe a vovone ei a ausa, ma oolo tasa ino oata na letene ei. Laguna ei lada tomane a oaso, ma ubuna lua ei lagu tomane a oavi i lulu uata.

<sup>2</sup> Bineanea do ei lapitole a laulau baini tasa na limane ei, ma laulau i peo muina. Ei tau a ubuna e gata muata na dasi, ma ubuna e meli ei magili muata na magamaga.

<sup>3</sup> Ei tola sagali sele tomane a laion i ngala vauta. Ilala ei tola, tupaga na sima padilua sou malii vauta sele a inadenade mine sou odo.

<sup>4</sup> Na ilala tupaga na sima padilua do sou tupaulu pulosi, de eau kale na niage a inadenade sou goli. Moni eau longe a baligolu na bibi tasa ei tola maino na langi maido, "Inade mine sou a tupaga na sima padilua, iede ni muina moni na damutatalana minio. Oo ma niageage lei."

<sup>5</sup> To a bineanea eau ite ei magili na dasi me mina magamaga do, ei beilange a limana e gata uata na langi,

<sup>6</sup> mei vei ivu uata na aisane Salemo ei mauili taliuliu taliuliu. Ei e Salemo ei mapale a langi pilu a golugolu vuso lilo ne ei, ma magamaga pilu a golugolu vuso lilo ne ei, ma dasi tamai pilu a golugolu vuso lilo ne ei. Ma bineanea ei vei maido, "Ei ni ma tovililiu oto.

<sup>7</sup> Ilala mapadiluana bineanea ei pusi a tuai me a tinangina i palea, io a golu odo Salemo i tau oovi, iede Salemo ni taupagale ivu. Iede a malongolongona kubaana lisa ei bilii a vanunua na pipigona minei sou a profet."

<sup>8</sup> Ma baligoluna bibi iedo ei palea lou na langi, me ei vei le eau maido, "Oo asu

\* 9:11 Malibuuna mine Apolion do ei a bibi na toegegeli na golugolu vuso.

mo guale a laulau ino peo do na limana bineanea ei magili na dasi me na magamaga.”

<sup>9</sup>Io eau asu usino na bineanea me eau vei le ei ni bilii e eau a laulau baini iedo. Ei vei le eau maido, “Oo guale mo ani. Ei ni ama na tiamu. Moni na asemu ei ni mamisi tomane a madu.”

<sup>10</sup>Me eau guale a laulau baini iedo na limane ei, me eau ani. Me na asegu ei mamisi tomane a madu. Moni ilala eau aniosi, ei pipiti na tiagu.

<sup>11</sup>Me ei vei le eau maido, “Oo no veipale lei a inade na malongolongona usino na abuna vanunua ma tavivine vuso, ma aveavena vuso, me sou a matamatana inadenade vuso, me sou a mapamapana tamai.”

## 11

### *Bibi lua sulu veipale a inade*

<sup>1</sup>Io sou bilii e eau a butu na nilovena, ei tomane a too, me sou vei le eau maido, “Oo ilisi mo love a luma mine Salemo ma poso na niabi. Me oo gi a savulu ne sou a vanunua ma tavivine sou kakaka lilo na luma ie.

<sup>2</sup>Moni oo ma lovelove lei a muina viepiluna ino sala na bigomu i saiili a luma mine Salemo. Iede oo no itetase, vuna iede a muina viepiluna mina vanua mine sou a abuna sea, me ne sou soetole a aubu buobuo maolo asu mapigogoi a game savulu iva timana lua.

<sup>3</sup>Me eau na vileale a bibi lua mina veipalena inade minau. Ne sulu kai a kinainai na dinodo, me ne sulu malongo a inade minau asu mapigogoi a malada savuluvulu tasa timana savulu sobo lua timana savulu pantasa (1,260).”

<sup>4</sup>Bibi lua do, ede a obu a oliv lua ma muina lada lua i magili na lagune Bibi Taula ei a munugana mina avena vuso na magamaga.

<sup>5</sup>Mane a vanunua sou kale ne sou toegegi e sulu, io a oavi ni palea na asene sulu me ei tununi sele sou a butu mine sulu. Maido me sei bibi ei kale ni toegegi e sulu, ei ni mate na vea moni iedo.

<sup>6</sup>Sulu isa a sagagalina mina tabesobena langi, ma adavu ei ni ma pu oto na ilala sulu pipigo a veipalena malongona mine Salemo. Me sulu isa a sagagalina mina sauvulena nanu usino na daladala, me mina gunolina matamatana golugolu pagu i palea mina toegegeline sou a vanunua ma tavivine na magamaga. Sulu mapigogoi ne su toe a matana golugolu ni palea ilala sulu masaga.

<sup>7</sup>Ilala sulu mapuli a pipigona mina veipalena inade mine Salemo, io a viu masivo ino na aova a sinuana boa, ei ni

ilisitase a aova do me ei ni asu uata. Me ei ni maubi ane sulu, me ei ni toebose sulu me ei ni valiputemate sulu.

<sup>8</sup>Ma aitolane sulu ni tabuli na vea buobuo na aubu buobuo do, eitou adetinovo i me eitou vate ei maido, Sodom me Isip. Iede a aubu buobuo do lisa sou gatitole Bibi Taula mine sulu na tauvaleuti.

<sup>9</sup>Vanunua ma tavivine mina abuna vanua vuso, me aveavena vuso buobuo, ma matamatana inadenade vuso, ma matamatana vovo vuso, ne sou ite a aitolane sulu mapigogoi a malada tolu ma maduna malada tasa. Ne sou ma longo oto a vanunua ne sou peilai a aitolane sulu.

<sup>10</sup>Ma vanunua ma tavivine na magamaga ne sou mongemonge a niitene sulu su matesi, me ne sou ala, me ne sou maiiabi a niabi ne sou usino ne tamtamaine sou. Vuna, profet lua do su bilii a davutina pagu usino na vanunua ma tavivine na magamaga vuso.

<sup>11</sup>Tauluna malada tolu ma maduna malada tasa, Salemo ei sosove a avivili mina maulina ni gali ulilo ne sulu, me sulu ilisi a ubu ne sulu me su magili. Ma vanunua sou ite sulu, sou lae mamau sele.

<sup>12</sup>Sulu longe a baligoluna bibi tasa ei tola sagali na langi me ei vei le sulu maido, “Amulu asu uata nani na.” Io sou a butu sou ite sulu asuasululo na ausa me su asu uata na langi.

<sup>13</sup>Na ilala bilesi iedo a malugulugu taula ei vuli, ma avena tasa mina avena savulu tasa mina aubu buobuo ei mamau, ma avena ialasue i saboa ino. Ma vanunua ma tavivine savuluvulu padilua (7,000) sou mate na malugulugu odo. Ma vanunua ma tavivine sou mauili sou lae mamau sele me sou beilange a aisane Salemo mina langi.

<sup>14</sup>Io a maluana mavaana buo ei pulosi, moni ilala bisii lou a matoluna mavaana buo ei ni palea.

### *Padiluana bineanea ei pusi a tuai*

<sup>15</sup>Io a padiluana bineanea ei pusi a tuai minei, ma abuna ino na langi sou tola sagali maido, “Aveavena vuso buobuo na magamaga i paleasi a aveavena mine Bibi Taula mine eitou me Krais, ne sulu iteale sou. Me Bibi Taula ei ni muina a mapana taliuliu taliuliu.”

<sup>16</sup>Ma vanunua buobuo savulu lua timana iva sou ugu na niugugu mine sou na matane Salemo, sou totopatulu me sou taupute a letene sou utano na magamaga, me sou totopatuliale Salemo.

<sup>17</sup>Sou vei maido, “Bibi Taula, oo Salemo oo isa a sagagalina vuso.

Oo eili seidei, ma lisa otosi oo eili.

Oo gualesi a sagagalina buo minio, me oo palea a mapana ivu.

Maido me amiteu toledadangi e oo.

<sup>18</sup> Vanunua masala sou sinoa sele, moni a ilala minio na lilotivulana ei paleasi.

Seidei ei a ilala mine sou a vanunua sou matesi ne sou palea na vavasana minio.

Seidei ei a ilala mina biliina mapa doana usino ne sou a vanunua na pipigona minio, iede sou a profet, me sou a vanunua ma tavivine minio, me sou a vanunua vuso sou lae e oo, iede sou a vanunua sou isa a sagagalina ma vanunua sou sabubu tamai.

Seidei a ilala mina toegegeline sou a vanunua sou toegegeli a magamaga.”

<sup>19</sup> Io sou a bineanea sou pee a luma mine Salemo na langi, me sou ite a maloputu na maglipiluna mine Salemo lilo na luma minei. Ma muada na sima ei vele maisaba, ma mangelengelena buo i palea, ma ausa ei tupaulu, ma malugulugu ei vuli, ma aula-bunu vatu buo i pu.

## 12

*Ioanes ei ite a tavine pilu a dregon taula*

<sup>1</sup> Io a matailala tasa buo sele ei palea na langi. Matailala do ei maido, a tavine tasa ei kai a kinainai minei a oaso. Ma game ei ino matano na ubune ei, ma mataidoido savulu tasa timana lua sou ino na kele na letene ei.

<sup>2</sup> Tavine do ei saaavu, ma davutina mina vasusialena bibaini ei paleasi ne ei, me ei somiale a davutina buo sele, maido me ei lalai vauta.

<sup>3</sup> Ma matailala tasa sea ei palea na langi. A dregon buo kasososo ei ino. Ei isa a letena i padilua, ma siili savulu tasa sou ino na letene ei. Ma kele padilua sou ino na leteletene sou.

<sup>4</sup> Iune ei i sasape sele a mataidoido makuba mina langi me ei lange sou utano na magamaga. Ei tomane sou soebule a mataidoido na abuna tolu, ma abuna mataidoido tasa ei pu vuso utano.

Io dregon odo ei magili na laguna tavine i kale ni vasusu, me ei magitali a tavine do i vasusialesi a bibaini, me ei ni busonge a mongomongo baini odo.

<sup>5</sup> Ma tavine ei vasusiale a mongomongo a bibi, iede a bibaini Salemo ei vilealesi ni iteale sagali sou a abuna vanunua ma tavivine vuso a butu a ain. Tavine ei vasusiale a bibaini, io ma tabaa oto sou guale a bibaini uata, me sou maasi ei usino ne Salemo me na niugugu a mapana minei.

<sup>6</sup> Ma tavine do ei iava usino na avena a vanua boa. Salemo ei masusuliosi a avena do ne sou iteale ei, me ei ni malu kuba i

mapigogoi a malada savuluvulu tasa savulu sobo lua timana savulu pantasa (1,260).

<sup>7</sup> Io seidolo a maubina taula ei ilisi na langi. Mikael pilu e sou a bineanea minei sou maubi ana dregon odo. Ma dregon pilu e sou a bineanea minei sou maliu a maubina ne sou,

<sup>8</sup> moni sou ma mapigogoi ete ne sou vululusi a maubina. Maido me sou ma mapigogoi otosi ne sou guale a muina ne sou ugu lou na langi,

<sup>9</sup> me sou a bineanea mine Salemo sou lange a dregon buo odo utano. Aliusu odo ei lisasi, me sou tole ei a mapana nunu pagu ue Satan, ei toegolali a vanunua ma tavivine vuso na magamaga. Sou lange ei utano na magamaga pilu a bineanea minei tamai.

<sup>10</sup> Me na langi eau longe a baligoluna bibi tasa ei tola sagali maido,

“Seidei Salemo mine eitou ei gualieliuosi e eitou,

ma sagagalina ma niitealalena minei ei palea muadasi.

Me Bibi minei, sou tole e Kraiss, ei gualesi a nilongo ma sagagalina.

Vuna, bibi na niubina inade ei vavasa ane tamtamaine eitou na matane Salemo mine eitou na oaso me na lodo,

moni seidei sou a bineanea sou langesi ei utano.

<sup>11</sup> Tamtamaine eitou sou guale a sagagalina maino na dalane Natuna Sipsip ma inade mine sou so veipale i.

Me Satan ei kale ni valiputemate sou, moni sou ma mailengi ete a maulina mine sou.

Na inigogona do sou vululusi a maubina me sou taipui e Satan.

<sup>12</sup> Maido me oo a langi me amutou vuso ino na langi, namutou mongemonge.

Moni oo a magamaga me oo a dasi, amulu tilale. A mavaana buo ni palea le amulu,

Vuna, Satan ei sivosi utano ne amutou, me ei sinoa mamau sele,

vuna ei muada ilala minei boto moni.”

<sup>13</sup> Dregon odo ei iteilale maido sou langesi ei utano na magamaga, me ei veletole a tavine ei vasusiale a bibaini odo.

<sup>14</sup> Moni sou bilii a velevelena loaalu taula lua usino na tavine do, me ei mapigogoi ni lovo usino na aubu minei na magamaga a vanua boa, me ei ni bulago ana aliusu odo. Me na avena do ne sou iteale kube ei i asu mapigogoi a avala tolu ma maduna avala tasa.

<sup>15</sup> Io aliusu odo ei luetase a nanu na asene ei, me a nanu odo ei palea tomane a nanu buo me ei kale a nanu do ni saltase a tavine do.

<sup>16</sup> Moni a magamaga ei buloi a tavine do. Magamaga ei pee a asene ei mei busonge a nanu dregon ei luetase do.

<sup>17</sup> Maido ma dregon ei sinoa mamau sele ana tavine do, mei asu ni maubi ane sou e natatuna sanii, iedo a vanunua ma tavivine sou ogomulimuli a binea mine Salemo, me sou veipale a inade mine Iesu me sou ogomuli.

<sup>18</sup> Ma dregon odo ei asu magili na mado na dasi.

### 13

#### *Viuviu lua masivo*

<sup>1</sup> Eau ite a viuviu tasa ei tala na dasi, ei isa a letena padilua ma siili savulu tasa, ma siiline sou tastasa sou isa a kele na mapana. Na letene sou a aisa ino, ma malibuuna aisaisa do iede a matamatana adeptintolana ane Salemo.

<sup>2</sup> Ma viuviu masivo seidei eau ite ie, ei tomane a pusi aou buo sou vate a leopat, ma ubune ei i tomane a ubuna bea, ma asene ei i tomane a asena laion. Ma dregon odo ei bilii a sagagalina ma aisa buo minei oto usino na viuviu odo, me ei toe ei a mapana tomane ei oto.

<sup>3</sup> Ei lagu tomane sou ubi a letena tasa mina leteletene ei me sou valipute ei. Moni a tuutuu pagu odo ei mavosi. Maido ma vanunua ma tavivine vuso sou saga sele me sou ogomuli e ei.

<sup>4</sup> Sou a vanunua ma tavivine sou muada maido a dregon do ei bilii a sagagalina minei oto usino na viuviu do, maido me sou totopatuliale a dregon odo, me sou totopatuliale a viuviu masivo tamai, me sou vei maido, "Sei tomane a viuviu masivo ie? Sei mapigogoi ni maubi ane ei?"

<sup>5</sup> Io dregon ei bilii a sagagalina na viuviu odo ni adegegelu maisaba mei adeptintola ane Salemo. Ma viuviu odo ei isa a sagagalina mina gunolina inigogona do mapiigogoi a game savulu iva timana lua.

<sup>6</sup> Ei pee a asena me ei adeptintola ane Salemo. Ei adegegeli a aisane Salemo ma avena mine Salemo me sou a abuna mine Salemo ino na langi.

<sup>7</sup> Me dregon ei bilii a sagagalina lou ne ei ni maubi ana vanunua ma tavivine mine Salemo me ei toebose sou. Me ei guale a sagagalina mina niitealena vanunua ma tavivine mina abuna vanua vuso, ma matamatana vovo vuso, ma matamatana inadnade vuso, ma aveavena buobuo vuso.

<sup>8</sup> Vanunua ma tavivine sou malu na magamaga, aisane sou ino boa na laulau na maulina soke na ilala Salemo ei saboa mapale a golugolu vuso na magamaga, ne sou totopatuliale a viuviu masivo do. Laulau

na maulina do, iede a laulau mine Natuna Sipsip, lisa sou valiputemate ei.

<sup>9</sup> Bibi ei isa a tagilana ei ni longe kube a inade ie.

<sup>10</sup> "Mane Salemo ei vileale a bibi tasa ni asu usino na luma na tunuui, io ei ni asu. Me mane ei vileale a bibi tasa sou valiputemate ei a viso, io ne sou valiputemate ei a viso."\*

Me na ilala matana inigogona maido i palea, io a vanunua ma tavivine mine Salemo ne sou magili sagali me sou lapitole obi a silimulina mine sou.

<sup>11</sup> Io eau ite a viuviu masivo tasa sea ei ilisi matano na magamaga me ei asu uata. Na letena siili lua ei ino tomane a siili na natuna sipsip, me ei adeade tomane a dregon.

<sup>12</sup> Maluana viuviu masivo do ei guale a sagagalina vuso maino na munugana viuviu. Me ei pipigo sagali a gunolina magamaga pilu e sou a vanunua ma tavivine ino na magamaga ne sou totopatuliale a munugana viuviu, lisa a tuutuu pagu i guale ei mapigogoi ni valiputemate ei, moni a tuutuu odo ei mavosi.

<sup>13</sup> Maluana viuviu masivo ei goli a matamatana gona sinaga buo. A gona sinaga tasa ei maido, ei lipui a oavi muata na langi utano na magamaga na matane sou a vanunua ma tavivine.

<sup>14</sup> Salemo ei itetase ei ni goli a matamatana gona sinaga na matana munugana viuviu masivo, na inigogona moni iodo ei aualetase a vanunua ma tavivine na magamaga. Ei vei le sou a vanunua ma tavivine maido, "Namutou pui a puigolo mina viuviu masivo do mina beilangena aisane ei. Ei a viuviu masivo do lisa a viso ei uti gegeli ei, moni ei ma mate oto."

<sup>15</sup> Me Salemo ei longo ei ni bilii a avivili na maulina usino na puigolo na viuviu masivo do, maido puigolo do ei mapigogoi ni adeade. Me mane a vanunua ma tavivine sanii sou ma topatuliale a puigolo do, io ei toe sou ne sou valiputemate sou.

<sup>16</sup> Io a maluana viuviu masivo ei ade sagali ne sou tau a matailala tasa na limane sou e gata ue na palala ne sou sou a vanunua ma tavivine sabubu ue sou isa a aisa, me sou isa a vatu makuba ue sou kapelabe, me sou malamala ue sou a vanua na pipigona sabubu.

<sup>17</sup> Me mane a bibi ei ma isa oto a matailala, io ei ma mapigogoi ete ni oli ue sosove a golugolu vuso. Matailala do ei a aisana viuviu masivo ue a savulu mina aisane ei.

<sup>18</sup> Bibi ei isa a damutatalana doana ei ni gi iiti a savulu na viuviu masivo. Savulu odo ei

\* 13:10 Ieremaia 15:2

a aisa mina bibi tasa, ma savulu ino na bibi iodo ei savulu sobo pantasa savulu pantasa timana pantasa (666).

## 14

*Vanunua ma tavivine mine Natuna Sipsip sou ale a inala alaba*

<sup>1</sup> Eau gemu lou, me eau ite e Natuna Sipsip ei magili na loena e Saion, ma vanunua ma tavivine savuluvulu savulu sobo tasa timana savuluvulu savulu iva timana savuluvulu iva (144,000) sou magili pilu e ei. Aisane Natuna Sipsip ma aisane Tamana ino na palalane sou.

<sup>2</sup> Me eau longe a tinangi tasa maino na langi, ei tomane a mala mina nanu taula i sali ue a tupagana sima. Eau longe a tagogolona do ei tomane sou labe a hap ma tatangina doana sele ei palea.

<sup>3</sup> Sou a vanunua ma tavivine do sou magili na laguna niugugu a mapana mine Salemo me na matana golu iva ino mauili me na matane sou a vanua buobuo, me sou ale a inala tasa alaba. Vanunua ma tavivine savuluvulu savulu sobo tasa timana savuluvulu savulu iva timana savuluvulu iva (144,000) Salemo ei oliliuale sou balivua ne sou a vanunua ma tavivine mina magamaga, sou moni mapigogoi ne sou guale a muadana mina inala do. Ma bibi tasa lou boasi ni guale a muadana ie.

<sup>4</sup> Vanunua do sou ma ngolo pilu oto a tavivine me sou ma palea mumugu oto, me sou maolo sele. Aububuna vuso Natuna Sipsip ei kale ni asuale, io sou a vanunua do sou ogomuli e ei usino. Salemo ei oliliuale sou a abuna do balivua na vanunua ma tavivine mina magamaga me sou a munugana abuna Salemo ei gualeliu, ne sou muina a abuabuna minei oto me mine Natuna Sipsip.

<sup>5</sup> Sou ma goli ete a aualana inade, me sou ma isa oto a mamauna na golu tasa.

*Bineanea tolu sou veipale a inade*

<sup>6</sup> Io eau ite a bineanea tasa sea ei lovo usino balivua na langi. Ei isa a malongolongona kubaana mina minaluna taliuliu taliuliu ei ni veipale iedo ane sou a vanunua ma tavivine na magamaga, sou a vanunua ma tavivine mine sou a abuna vanua vuso, ma aveavena vuso buobuo, me sou a matamatana inadene vuso, me sou a matamatana vovo vuso.

<sup>7</sup> Ei tola sagali maido, “Ilala ei paleasi e Salemo ni vavasa a inigogona mina vanua vuso. Maido me namutou lae e ei me mu beilange a aisane ei. Namutou totopatuliale Salemo, ei mapale a langi, magamaga, dasi ma aopu na nanu vuso.”

<sup>8</sup> A bineanea tasa sea, maluana ei ogomuli a munugana bineanea me ei vei maido,

“Aubu taula Babilon ei mamauosi! E, ei mamauosi! Babilon moni iedo ei toe a vanunua ma tavivine vuso ne sou ogomuli sagali a inigogona sualolona minei. Ei tomane ei bilii e sou a vain sagaligali me sou ini.”

<sup>9</sup> Ma bineanea tasa sea, matoluna ei ogomuli a bineanea lua do, me ei tola sagali maido, “Mane sei bibi ei totopatuliale a viuviu masivo odo ma puigolo ne ei, me ei guale a matailala na palala ne ei me na limane ei,

<sup>10</sup> io ei ni ini a vain mina lilotivulana mine Salemo. Me Salemo ei ma sauvulepale ete a nanu pilu a vain do. Ei ni singi a lilotivulana minei na taogo mina maliuna mapa pagu, ma bibi iedo ei ni ini. Me na matane sou a bineanea mine Salemo, me na matane Natuna Sipsip, a bibi iedo ei ni guale a davutina pagu a oavi ma vatu loiloi ei lululu.

<sup>11</sup> Ma muo ei palea na oavi odo ei bilii e sou a davutina, ei ni vele uata taliuliu taliuliu. Sou a vanunua sou totopatuliale a viuviu masivo ma puigolo ne ei me sou guale a matailala mina aisane ei, ne sou ma guale ete a manoana na oaso me na lodo.”

<sup>12</sup> Ilala a inigogona maido ei palea, a vanunua ma tavivine mine Salemo ne sou magili sagali, iede sou a vanunua ma tavivine sou ogomulimuli a binea vuso mine Salemo me sou lapitole a silimulina mine sou ne Iesu.

<sup>13</sup> Eau longe a baligoluna bibi tasa ei tola muata na langi maido, “Oo niage a inade maido, ‘Seidei ma ilala vuso mulimuli, a vanunua ma tavivine sou silimuli e Bibi Taula me sou mate, ne sou mongemonge.’” Ma Maolona Nunu tamai ei vei, “E, ne sou mapuli a pipigona mavaa mine sou me ne sou manoa. Inigogona ma pipigona doana sou goli odo ei ni asu pilu e sou.”

*Ilala ei palea mina valiutina gona inani vuso sou matuasi na magamaga*

<sup>14</sup> Io eau gemu lou, me eau ite a ausa tasa i keakea, ma bibi tasa ei tomane eitou a vanua mina magamaga ei ugu ino na ausa do. Ei isa a kele a gol na letene ei, me na limane ei, ei lapitole a viso a sikel i binaso sele.

<sup>15</sup> Ma bineanea tasa sea ei gali usala na luma mine Salemo, mei tola sagali sele ana bibi iodo ei ugu na ausa maido, “Guale a viso a sikel minio mo valiuti a gona inani. Gona inani vuso na magamaga sou matuasi, seidei ei a ilala mina valiutina gona inani.”

<sup>16</sup> Io a bibi ei ugu na ausa do ei lapitole a viso a sikel minei mei motudu utano na magamaga, mei valiuti a gona inani vuso ino matuasi na magamaga.

<sup>17</sup>Ma bineanea tasa sea ei ilisitase a luma mine Salemo ino na langi me ei gali usala. Ei tamai ei lapitole a viso i binaso sele.

<sup>18</sup>Ma bineanea tasa lou ei ilisitase a poso na niabi mei asu maino, ei a bineanea do ei isa a sagagalina mina niitealena oavi. Ei tola sagali ane a bineanea ei lapitole a viso i binaso sele. Ei vei maido, “Sou vuavua na vain mina magamaga sou matuasi, maido me oo guale a viso minio i binaso sele do, mo valiuti a vuavua na obu a vain, me mu taupili e sou.”

<sup>19</sup>Io a bineanea do ei guale a viso minei mei motudu utano na magamaga, mei valiuti a vuavua na vain vuso mina magamaga, mei taupili e sou. Mei lange sou a vuavua na vain iodo ulilo na taogo buo a vatu mina soetolena vuavua na vain. Ielili a matailala mina lilotivulana mine Salemo.

<sup>20</sup>Me sou soetole a vuavua na vain na taogo do ino sala na aubu buobuo, ma daladala i palea mei sali usala na taogo, mei avisobe a magamaga vuso mapigogoi a kilomita i savulu sobo tolu (300) mei asu uata mapigogoi na tabuna hos.

## 15

*Bineanea padilua sou lapitole a golu padilua pagu sele*

<sup>1</sup>Io eau ite a matana matailala tasa sea ei palea na langi, me eau saga sele. Eau ite a bineanea padilua ino, me sou lapitole a golu padilua pagu sele, ei a punuluna golu pagu. Na golu padilua pagu odo, lilotivulana mine Salemo ni pulu sele.

<sup>2</sup>Me eau ite a golu tasa tomane a dasi buo sou goli a glas pilu a oavi. Vanunua ma tavivine sou vululusi a maubina me sou toebose a viuvui masivo do pilu a puigolo ne ei ma savulu ei matailale a aisane ei, sou magili na lili maino na dasi odo tomane a glas, me sou lapitole a hap Salemo ei bilii e sou.

<sup>3</sup>Sou ale a inala mine Moses, ei a bibi na pipigona mine Salemo, ma inala mine Natuna Sipsip. Inala do ei maido,

“Bibi Taula, oo Salemo ei isa a sagagalina vuso,  
oo goli a matamatana pipigona buo,  
me na ilala amiteu ite, amiteu saga ma-  
mau sele.

Oo mapana mine sou a aveavena vuso,  
inigogona vuso minio sou bilesi me sou  
patotona vuso.

<sup>4</sup>Bibi Taula, oo tasa moni oo maolo.

Maido ma vanunua ma tavivine vuso ne sou  
lae e oo  
me sou beilange a aisamu.

A abuna vanunua vuso ne sou asu usi-  
nani me sou totopatuliale oo.

Vuna, a inigogona bilesi minio ei palea muadasi.”

<sup>5</sup>Tauluna golu ieli eau gemu lou mea ite a luma mine Salemo na langi i peo. Luma mine Salemo iedo ei a luma bale, me a inade ivu mine Salemo ino lilo na luma bale do.

<sup>6</sup>Ma bineanea padilua do sou lapitole a golu padilua pagu sele mina toegegeline sou a vanunua ma tavivine, sou ilisitase a luma mine Salemo me sou gali usala. Sou kai a malasana kinainai i alaba mei lada sele. Me sou pale e sou a palaai a gol i saiiili a madalone sou.

<sup>7</sup>Me tasa mine sou a golu iva sou mauli odo ei bilii e sou a bineanea padilua a taogo padilua a gol. Ma lilotivulana mine Salemo ei mauli taliuliu taliuliu, iede i vonu na taogo padilua do.

<sup>8</sup>Ma muo maino na malasana buo mine Salemo ma sagagalina mine Salemo, iede i vonu na luma minei. Me tasa ma mapigogoi ete ni gali ulilo na luma minei i mapigogoi a bineanea padilua ne sou mapuli muge a pipigona mina golu pagu padilua do.

## 16

*A taogo padilua mina lilotivulana mine Salemo*

<sup>1</sup>Io eau longe a baligoluna bibi tasa i palea lilo na luma mine Salemo. Ei tola sagali ana bineanea padilua do maido, “Amutou asu me mu singitase a taogo padilua ei isa a lilotivulana mine Salemo do utano na magamaga.”

<sup>2</sup>Ma munugana bineanea ei asu singitase a taogo minei muata na magamaga. Maido me matamatana tuutuu sagaligali pagu sele sou palea na vovona vanunua sou isa a matailala na viuvui masivo me sou totopatuliale a puigolo minei.

<sup>3</sup>Ma maluana bineanea ei singitase a taogo minei muata na dasi, ma dasi i savvule tomane a daladala na bibi ei matesi. Maido ma golugolu vuso sou mauli ino na dasi sou mamate.

<sup>4</sup>Ma matoluna bineanea ei singitase a taogo minei muata ne sou a nanu buobuo me sou a aoppu na nanu, maido ma nanu vuso do sou palea a daladala.

<sup>5</sup>Me eau longe a bineanea ei iteale a nanu vuso do ei vei maido,  
“Salemo, oo eili seidei, me lisa otosi oo eili.  
Me oo maolo sele.

Oo vilemulialesi a inigogona mina vanunua do a vea maido, inigogona vilemulialena minio i bilesi sele.

<sup>6</sup>Vanunua do sou valiputemate sou a vanunua ma tavivine minio pilu e sou a profet, ma dalane sou i singi.  
Maido me oo bilii a daladalane sou usino na vanua pagupagu odo ne sou



ini. Ma daladala sou ini odo ei malii bilesi a inigogona pagu sou goli.”

<sup>7</sup> Me eau longe a poso na niabi ei tola maido, “Bibi Taula, oo e Salemo oo isa a sagagalina vuso.

Vilemulialena minio ei ivu sele me ei bilesi vuso.”

<sup>8</sup> Io maivana bineanea ei singitase a taogo minei muata na oaso, me Salemo ei longo a tuntunu na oaso ni tununi a vanunua ma tavivine.

<sup>9</sup> Tuntunu na oaso do ei tununi gegeli sele sou a vanunua do. Me sou adegegeli a aisane Salemo i isa a sagagalina mina itealena golugolu i pagu ni palea, me sou ma sauvule ete a lilone sou me sou ma beilange ete a aisane ei.

<sup>10</sup> Ma malimana bineanea ei singitase a taogo minei muata na niugugu a mapana mina viuvii masivo. Ma tunuui ei palea le sou a abuna vanua ino matano na sagagalina mina viuvii masivo. Ma davutina sou guale, ei mamau sele, maido me sou aletole a tabelene sou.

<sup>11</sup> Sou damutale a davutina mine sou ma tuutuu i palea le sou, me sou adegegeli e Salemo na langi. Moni e sou ma sauvule ete a inigogona pagu vuso sou goli.

<sup>12</sup> Ma mapantasana bineanea ei singitase a taogo minei muata na nanu taula e Iupretis. Maido ma nanu ei tagasa vuso, me vea i masusuluosi ane sou a mapana sou asu maino na avena oaso tala i.

<sup>13</sup> Me eau ite a nunu tolu mumugu tomene a paso, sou palea maino na asena dregon do me na asena viuvii masivo me na asena aualana profet.

<sup>14</sup> Sou a nunu pagu sou goli a matamatana gona sinaga, me sou asu maisaba usino ne sou a mapana mina avena buobuo vuso mina magamaga. Sou kale ne sou toe sou a mapana ne sou maasi a vanua na maubina mina mailisina maubina na malada buo mine Salemo ei isa a sagagalina vuso.

<sup>15</sup> Bibi Taula vei maido,

“Longe. Eau na asu usinani ne amutou tomene a bibi na paaalina. Maido ma bibi ei ma ngolo oto mei kai a kinainai minei, io a bibi iedo ei ni mongemonge, vuna ei ni ma asu ai sabubu oto mei ni ma maela oto.”

<sup>16</sup> Io sou a nunu pagu tolu sou maasi e sou a mapana ne sou viepili na avena do, na inade Hibru sou vate e Amagedon.

<sup>17</sup> Ma mapadiluana bineanea ei singitase a taogo minei na langi, ma baligolu na bibi tasa ei palea maino na niugugu a mapana mina luma mine Salemo, ei tola vauta maido, “Ei pulosi.”

<sup>18</sup> Ma muada na sima ei vele maisaba ma mangelengena buo ei palea ma ausa ei tupaulu ma malugulugu buo ei vuli. Na ilala

vuso mina vanunua ma tavivine sou ino na magamaga, matana malugulugu buo maido ei ma vuli oto.

<sup>19</sup> Io a aubu taula e Babilon ei mapola a avena tolu, me sou a aububu buobuo mine sou a aveavena buo vuso sou tamai mamau vuso. Salemo ei damutale a inigogona mina aubu taula e Babilon, me ei maini e Babilon a taogo na vain minei, iede a vain mina lilotivulana sele mine Salemo.

<sup>20</sup> Ma lolopatipati vuso sou buale sabubu, ma loena vuso sou buale tamai.

<sup>21</sup> Ma adavu aulabunu vatu buo ei pu utano, aulabunu vatu tastasa ei isa a mavaana mapigogoi a kilogram savulu lima. Aulabunu vatu odo ei asu maino na langi me ei pu utano ne sou a vanunua. Maido me sou adegegeli e Salemo, vuna mavaana odo ei buo mamau sele.

## 17

*Sualolona tavine buo ei guale a mapa pagu*

<sup>1</sup> Tasa mine sou a bineanea padilua ei lapitole a taogo padilua, ei asu maino me ei vei le eau maido, “Oo vele. Tavine na sualolona buo do ei ugu muata na nanu makuba sou ie ei ni guale a mapa pagu minei. Eau kale na maite oo sei mapa pagu ei ni guale.

<sup>2</sup> Sou a mapana mina magamaga sou goli a inigogona sualolona makuba pilu a tavine do ma vanunua mina magamaga sou tamai sou goli a inigogona sualolona pilu e ei, me sou palea vautauta tomene a bibi ei matalilili.”

<sup>3</sup> Ma Maolona Nunu ei palea sagali ne eau, me ei maasi e eau usino na magamaga a vanua boa. Na avena do eau ite a tavine tasa ei ugu muata na viuvii masivo tasa i kasososo. Viuvii do ei isa a aisa makuba i vonu na vovone ei, ma aisa vuso do ei tomene a matamatana adepintolana ma mailobena pagu usino ne Salemo. Viuvii masivo do ei isa a letena padilua, ma siili savulu tasa sou ino na letene sou odo.

<sup>4</sup> Tavine do ei kai a kinainai tatalona kasoso pilu a malavovola, me ei malolome a matamatana malasana gol ma malasana vatu pilu a gapu mapana ei sae sele. Ei lapitole a taogo a gol na limane ei. Ma matamatana inigogona sou mavulu sele na matane Salemo ma matamatana inigogona mumugu mina sualolona mina tavine do sou vuso sou vonu na taogo do.

<sup>5</sup> Me na palalana tavine do sou niage a aisane ei. Aisa do ei tomene a adeoovu, ma malibuuna mine ei maido,

“Aubu taula e Babilon,

ei e tinana sualolona tavine vuso me mina inigogona pagu vuso sele na magamaga.”

<sup>6</sup> Tavine do ei valiputemate a vanunua ma tavivine mine Salemo, iede sou a vanunua ma tavivine sou silimuli e Iesu me sou veipale a aisane ei. Me eau ite a tavine do ei ini a dalane sou me ei vauta tomane a bibi ei matalilili. Eau ite ei mea saga sele mea damutatala papai.

<sup>7</sup> Io a bineanea ei vei le eau maido, “Posa matina oo saga? Eau na maite e oo a malibuuna ovu mina tavine ma viuviu odo. A viuviu masivo do ei masaesae a tavine usino usinani me ei isa a letena padilua ma siilina i savulu tasa.

<sup>8</sup> Viuviu masivo oo itesi odo, lisa ei ino, moni seidei ei ino boa. Moni ei ni ilisitase a aova a sinuana boa do, me ei ni asu uata, me ei ni mamau vuso. Vanunua ma tavivine na magamaga, iede sou a abuna aisane sou ino boa na laulau mina maolina soke na ilala Salemo i mapale a golugolu vuso na magamaga asu pea seidei, ne sou ite a viuviu masivo do me sou saga. Vuna maido, lisa ei ino, me seidei ei ino boa, me mulimuli ei ni palea lou.

<sup>9</sup> “Bibi ei isa a damutatalana doana ei mapigogoi ni muada iiti a golu ie. Letena padilua do sou matailale a loena padilua tavine ei ugu muata ne sou.

<sup>10</sup> Me tamai, lete padilua do sou matailale a mapana padilua. Lima mine sou mamauosi, me tasa seidei ei eili, me tasa ei saboa palea. Ilala ei asu usinani, ei ni ma muina tabaa oto.

<sup>11</sup> Ma viuviu masivo do lisa ei ino, moni seidei boasi, ei a mapantoluna mapana. Ei e tasa mine sou a mapana padilua, me ei ni buale vuso.

<sup>12</sup> “Ma sili savulu tasa mina viuviu masivo oo ite, iede a mapana savulu tasa. Sou saboa palea a mapana. Moni sou pilu a viuviu masivo do ne sou guale a sagagalina mina mapana mapigogoi a maduna ilala tasa moni.

<sup>13</sup> Sou a mapana do sou isa a damutatalana tasa moni, me ne sou bilii a sagagalina vuso ma aisa mine sou oto usino na viuviu masivo do.

<sup>14</sup> Ne sou maubi ane Natuna Sipsip, moni Natuna Sipsip ei ni vululusi sele sou. Ei e Bibi Taula mine sou a vanua buobuo, me ei a Mapana mine sou a mapana. Ma vanua vuso sou ino pilu e ei, iede sou a abuna ei toleale me ei vilealesi minei oto me sou ogomuli iiti a inade minei, ne sou tamai vululusi a maubina do.”

<sup>15</sup> Ma bineanea ei vei lei le eau maido, “Sou a nanu buobuo oo ite a sualolona tavine ei ugu muata ne sou odo, iede sou a abuna vanunua, ma matamatana vovo, ma matamatana inade, ma aveavena buobuo vuso.

<sup>16</sup> Ma siili savulu tasa ma viuviu oo ite do, ne sou butuale a sualolona tavine. Ne sou toegegeli sele ei me sou kaitase a kinainai vuso minei. Me ne sou ani a mainina vovone ei, me sou tuni vuse ei na oavi.

<sup>17</sup> Salemo oto ei bilii a damutatalana usino ne sou a mapana do, ne sou goli a golugolu sou odo ni palea, iede a golugolu lisa Salemo ei adesi i ne sou palea. Ne sou isa a damutatalana tasa moni, me ne sou bilii a sagagalina mine sou a mapana usino na viuviu masivo. Ne sou toe maido asu mapigogoi a ilala Salemo i toeseselesi a golugolu vuso ei ade i.

<sup>18</sup> Ma tavine oo ite do, ei matailale a aubu taula ei iteale a mapana vuso mina magamaga.”

## 18

### *Babilon ei mamauosi*

<sup>1</sup> Tauluna golu ie, eau ite a bineanea tasa lou ei sivosivo utano maino na langi. Ei isa a sagagalina buo sele, ma malasana buo minei i toe a magamaga ei lada sele.

<sup>2</sup> Ei tola sagali sele maido,

“Aubu taula e Babilon ei mamauosi! Ei mamauosi!

Seidei ei palea a aubu mine sou a nunu pagu.

Sou a nunu mumugu, ma manumanu mumugu,

ma manumanu sou pagu sele, sou ino ne ei.

<sup>3</sup> Vuna maido, sou a abuna vanunua sou goli a inigogona sualolona makuba pilu e ei.

Ei tomane sou ini a vain sagaligali minei.

Me sou a mapana mina magamaga tamai sou goli a inigogona sualolona pilu e ei.

Ma vanua na vuvutina sou guale a vatu makuba a matamatana inigogona toetavinevinena ei ma maelaela oto a gunolina.”

<sup>4</sup> Me eau longe a baligolu tasa sea i palea na langi maido,

“Amutou a vanunua ma tavivine minau, namutou ilisitase a aubu iede me mu gai usala.’

Dae ne amutou maitamaina pilu e ei a sinusu vuso ei goli.

Me dae ne amutou maitamaina pilu e ei na ilala ei guale a mapa pagu mina sinusu vuso do tamai.

<sup>5</sup> Ei taupili a sinusu vuso minei i asu pea na langi.

Salemo ei damutale a inigogona pagu vuso ei goli.

<sup>6</sup> Namutou damutale a matana inigogona sualolona tavine do ei goli, me namutou maliu tamai usino ne ei.

Ei matompili a inigogona pagu vuso minei me sou palea makuba sele. Tomane moni ne amutou matompili a mapa pagu minei mapigogoi a inigogona pagu vuso ei goli.

Ei sauvuvule a nanu sagaligali na taogo. Io ne amutou matompili a sagalina nanu sagaligali me mu maini e ei.

<sup>7</sup> Ei beilange a aisane ei oto me ei goli a matamatana inigogona toetavinevina.

Maido me namutou bilii e ei a davutina makuba me namutou matangi ei mapapaina, mapigogoi a inigogona pagu vuso minei.

Ei ade e ei oto maido, 'Eau eili a tavine a mapana. Eau ma buasu oto.

Mavaana ni ma mapigogoi ete i palea le eau mea na tangi. Boa vuso sele.'

<sup>8</sup> Maido ma matamatana golugolu pagu-pagu sele ne sou palea le ei na malada tasa moni.

Minate ni palea usino ne ei, ma vanua makuba ne sou tangi mamau, ma vitolona buo ni sibitala.

Ma oavi ni aani vuse Babilon,

vuna Salemo, Bibi Taula, ei isa a sagalina buo ei ni vavasa a inigogona ne Babilon.

<sup>9</sup> "Sou a mapana mina magamaga sou goli a inigogona sualolona pilu e ei, me sou goli a matamatana inigogona pagu a vatu pilu e ei, ne sou tangi dododo me ne sou lilomavaa ilala sou ite a muo i palea na oavi ei tununi e Babilon.

<sup>10</sup> Ne sou ite a davutina pagu odo ei guale, me ne sou lae sele. Ne sou magili bulago ane ei me sou vei,

'Maula, maula sele e amutou e Babilon,

oo a aubu buobuo taula me oo sagali!

Me saga i a mapa pagu mina sinusu minio ei paleasi ne oo!

<sup>11</sup> "Ma vanunua na vuvutina mina aveavena vuso na magamaga ne sou damutale-tale e Babilon, me ne sou tangi dododo sele e ei me ne sou lilomavaa. Vuna, bibi boasi ni oli a golugolu vuso mine sou.

<sup>12</sup> Golugolu vuso mine sou, iedo a gol, silva me sou a malasana vatu me sou a gapu a mapana i buo sele me sou a malasana malo keakea ma malo malavovola ma matamatana malo kasososo me sou a mata vuvuna malo. Me tamai sou a matamatana obu a manginana doana ma matamatana golu sou goli a livona elepan ma matamatana golu sou goli a obu a mapana ei oata ma bras ma ain ma mabel.

<sup>13</sup> Ma sinamon ma laia na inani ma kavou na mapalena muo ei isa a manginana doana ma mira ma nanu i manginangina doana ma vain ma bulu na oliv ma ulalu doana ma vit. Me sou a bulmakau, sipsip, ma hos pilu a karis. Me sou a vanua na pipigona sabubu, iede sou a vanunua sou mau.

<sup>14</sup> "Vanua na vuvutina ne sou vei maido, 'Gona inani oo kale sele no guale, ede sou vuso ino bulago ane oo. Golugolu vuso doana a mapane sou i buo sele ma golugolu vuso doana mina malolomene oo, iede sou vuso sou bualesi, me oo no ma mapiogoi ete no ite lei e sou.'

<sup>15</sup> Ma vanua na vuvutina sou guale a vatu makuba na aubu buobuo do, ne sou lae sele a niitena davutina pagu a aubu buobuo do ei guale. Me ne sou magili bulago, me ne sou tangi dododo me sou lilomavaa.

<sup>16</sup> Ne sou vei maido,

'Maula, maula a aubu taula do!

Lisa ei tau a malasana kinainai keakea ma matamatana malo malavovola ma kasososo, me ei toemalase a vovone ei a gol ma malasana vatu pilu a gapu a mapana i sae sele.

<sup>17</sup> Moni saga i a vuvutina vuso do sou mamau vuso.'

"Ma bibi na matetengina vuso na maivelena kuta ma vanunua sou gaga a kuta ma vanunua na pipigona na dasi ma vanunua vuso sou pipigo a vuvutina na dasi, ne sou tamai magili bulago ane Babilon.

<sup>18</sup> Me ne sou ite a muo ma oavi e aani e ei, me ne sou tola maido, 'Sei aubu buobuo eili ei tomene a aubu taula ie?'

<sup>19</sup> Me ne sou lange a kavou muata na letene sou oto, me ne sou tangi dododo me sou lilomavaa. Me ne sou tola maido, 'Maula, maule oo a aubu taula ie!

Tamatamana kuta na dasi sou palea a vanua na vuvutina sele a golugolu vuso sou a mapa buo sele maino na aubu buobuo do.

Maula! Moni saga i ei mamau vuso!

<sup>20</sup> Oo a langi pilu a vanunua ma tavivine mine Salemo,

me amutou a aposel me amutou a profet, amutou vuso namutou mongemonge a golu seidei ei palea na aubu buobuo do.

Salemo ei maliuosi a inigogona pagu vuso a aubu buobuo do ei goli le amutou.'

<sup>21</sup> Inade do ei pulosi, io a bineanea sagali tasa ei guale a vatu buo tasa tomene a vatu mina valipopolena vit. Ei beilange a vatu odo me ei lange utano na dasi. Me ei vei maido,

"Tomane na vea moni iedo ne sou lange sagali a aubu taula e Babilon utano, ma vanunua ne sou ma ite etesi e ei.

<sup>22</sup> Ma tinangina hap ma tuai ma vivigo ma baligoluna vanunua na inala, ei ni ma palea otosi lilo na bigomu minio.

Ma vanunua sou gualesi a muadana na gunolina matana pipigona vuso, ne sou ma ino otosi lilo minio.

Tagogolo na vatu ei valipopole a vit, ei ni ma palea otosi lilo ne oo.

<sup>23</sup> A muada mina lada, ei ni ma lada otosi ne oo.

Ma inadenade mina bibi ni taulai alaba ma tavine ni taulai alaba, iede tamai ei ni ma palea otosi lilo ne oo.

Lisa, a vanunua na vuvutina minio sou a bibi buo sele na matene sou a abuna vanunua ma tavivine sanii sea.

Me oo goli a matamatana milolo i auala ane a vanunua ma tavivine mina aveavena vuso.

<sup>24</sup> Sou poge a daladalane sou a profet ma vanunua ma tavivine mine Salemo me sou a vanunua ma tavivine vuso sou mate na magamaga lilo na aubu buobuo e Babilon."

## 19

*Vanunua ma tavivine mine Salemo sou beilange a aisane Salemo*

<sup>1</sup> Tauluna golu ieli, eau longe a tinola buo mina abuna vanunua ma tavivine buo na langi. Sou vei maido, "Haleluia!

Salemo mine eitou ei tasa moni ei gualeliu e eitou. Ei isa a aisa buo ma sagagalina.

<sup>2</sup> Vavasana mine Salemo ei patotona me ei bilesi vuso.

Salemo ei maliuosi a mapa pagu usino na sualolona tavine buo ei toegegeli a vanunua ma tavivine na magamaga a inigogona sualolona minei.

Tavine ieli ei isa tamai a sinusu mina valiputematene sou a vanunua na pipigona mine Salemo, me Salemo ei adovesi a sinusu minei iedo."

<sup>3</sup> Me sou tola lou maido, "Haleluia!

Muo na oavi ei tununi a tavine do ei vele uata taliulu taliulu!"

<sup>4</sup> Ma vanunua buobuo savulu lua timana iva pila a golu iva ino mauili sou totopatulu me sou kaka ane Salemo ei ino ugu na niugugu a mapana minei. Sou vei maido, "Amen! Haleluia!"

<sup>5</sup> Me na niugugu a mapana mine Salemo a baligolu tasa ei tola maido, "Amutou a vanua na pipigona mine Salemo, amutou a abuabuna amutou laelae e Salemo me amutou matano moni ne ei,

amutou a vanua sabubu pila e amutou mu isa a sagagalina, amutou vuso namutou beilange a aisane Salemo!"

*Inani buo mina taulaina mine Natuna Sipsip*

<sup>6</sup> Io eau longe a baligolu tomene a abuna vanunua ma tavivine makuba sou adeade, me ei tamai tomene a mala na nanu buo ei tagogolo, me ei tamai tomene sou a ausa sou tupaulu sagali sele. Sou tola maido, "Haleluia!

Bibi Taula, Salemo mine eitou ei isa a sagagalina vuso, seidei ei iteale sou.

<sup>7</sup> Seidei neitou lilokuba me neitou mongemonge sele me neitou beilange a aisane ei,

vuna ilala i sibalatala ne Natuna Sipsip ei taulai, me susuna ei masusuluosi.

<sup>8</sup> Salemo ei bilii a tavine do a malasana kinainai kea sele mei alaba."

Malasana kinainai keakea do ei matailale a inigogona bilesi mina vanunua ma tavivine maolo mine Salemo.

<sup>9</sup> Ma bineanea ei vei le eau maido, "Oo niage a inade maido, 'Sou a vanunua ma tavivine Salemo ei toleale usinan na inani taula mina taulaina mine Natuna Sipsip, ne sou mongemonge.'" Me ei vei lei le eau maido, "Inade do ei a inade patotona mine Salemo."

<sup>10</sup> Io eau totopatulu agavuale a ubuna bineanea, me eau kale na kaka ane ei. Moni ei vei, "Oo ma gologoli lei maido! Eau tamai eita a pipigona tasa moni pila e tamta-maimu, iede amutou a abuabuna amutou silimuli a inade Iesu ei veipale. Oo no totopatuliale Salemo tasa moni. Eitou muada a inade Iesu ei veipale ei a inade na profet."

*A bibi ei ugu na hos keakea*

<sup>11</sup> Eau ite a langi i peo, ma hos keakea tasa ino. Ma aisana bibi ei ugu na hos iodo ei maido, "Bibi ei iteale kube a pipigona minei," ma "Bibi ei goli moni a inigogona i patotona." Ilala ei vavasa ana vanunua ma tavivine mei maubi, ei ogomuli moni a inigogona bilesi.

<sup>12</sup> Matana ei tomene a oavi ei lulu, me ei isa a kele a mapana papaina na letene ei. Na vovone ei sou niage a aisa tasa, moni ei tasa moni ei muada a aisa do.

<sup>13</sup> Daladala ei avipope a kinainai lagolago ei kai, me sou vate a aisana "A inade mine Salemo."

<sup>14</sup> Sou a vanua na maubina mina langi sou ugu na hos keakea mine sou, me sou ogomuli e ei usino. Sou kai a malasana malo keakea i alaba sele.

<sup>15</sup> A viso tasa ei binaso sele, ei palea usala na asena, na viso do ei ni taupui a vanunua

ma tavivine mina abuna vuso. Ei ni lapitole a butu a ain mei iteale sagali e sou. Me ei ni soetole a vuavua na vain na taogo a vatu buo ei matailale a lilotivulana buo mine Salemo ei isa a sagagalina vuso.

<sup>16</sup> Na kinainai lagolago minei me na ubene ei sou niage a aisa maido, “Mapana mine sou a mapana, me Bibi Taula mine sou a vanua buobuo.”

<sup>17</sup> Io eau ite a bineanea tasa ei magili oata na oaso. Ei tola sagali ana manumanu sou lovolovo balivua na langi maido, “Amutou asu usinani mu viepilu a inani taula mine Salemo.

<sup>18</sup> Ne amutou ani a mainine sou a mapana, ma mainine sou a munuganuga mina vanua na maubina ma sagalina vanua, ma mainina hos pilu a vanua sou ugu na hos. Ne amutou ani tamai a mainine sou a vanunua vuso, iede sou a vanua sou malamala pilu a vanua na pipigona sabubu, ma vanua sabubu pilu a vanua sou isa a sagagalina.”

<sup>19</sup> Me eau ite a viuvuu masivo do me sou a mapana mina magamaga pilu a vanua na maubina mine sou sou asu maino me sou viepiluosi. Sou kale ne sou maubi ana bibi ei ugu na hos ma vanunua na maubina minei.

<sup>20</sup> Moni ei paletole a viuvuu masivo do pilu a aualana profet, ei goli a gona sinaga makuba na matana avula masivo, me na inigogona li ei auala ana vanunua sou guale a matailala mina viuvuu masivo me sou totopatulialale a puigolo minei. Viuvuu masivo pilu a aualana profet, sulu ino mau, me sou lange sulu utano na aova taula i bubuli ma vatu loiloi i vonu ne ei me sou lululu.

<sup>21</sup> Ma bibi ei ugu na hos odo, ei valiputemate a gegene ne sou odo a viso lago na asene ei iodo. Ma manumanu sou ani a maini ne sou, me sou masu sele.

## 20

*Satan ei muina na aova a sinuana boa na avala savuluvulu tasa (1,000)*

<sup>1</sup> Io eau ite a bineanea tasa ei ilisitase a langi mei sivo utano. Na limana ei lapitole a ki mina aova a sinuana boa pilu a sen buo.

<sup>2</sup> Ei saavi obi a dregon odo, ei a aliusu ei lisasi, ei a Munugana nunu pagu, ei e Satan. Ma bineanea ei papale ei a sen sagaligali me ei ni muina mapigogoi a avala savuluvulu tasa (1,000).

<sup>3</sup> Ma bineanea ei lange ei utano na aova a sinuana boa, mei kapi a aova do mei paletole sagali. Maido me Satan ei ni ma mapigogoi ete ni auala lou ana vanunua ma tavivine mina abuna vuso. Ei ni magitali a avala savuluvulu tasa ni pulu, me mulimuli

ne sou lubetase ei, me na ilala boto moni ei ni asu maisaba.

<sup>4</sup> Me eau ite a niugugu a mapana, ma vanua sou ugugu na niugugu odo. Salemo ei bilii e sou a sagagalina mina vavasana. Me eau ite a nunune sou a vanunua ma tavivine makuba sou silimuli e Iesu me sou veipale a aisana me sou lapitole sagali a inade mine Salemo, me na vuna moni iedo sou a butu sou uti a loone sou me sou valiputemate sou. Me eau ite a nunune sou a vanunua ma tavivine sou ma totopatuliale ete a viuvuu masivo ma puigolo minei, me sou ma guale ete a matailala ne ei na palalane sou ma limane sou. Vanunua ma tavivine do sou guale a maulina, me sou muina a mapana pilu e Krai mapigogoi a avala savuluvulu tasa.

<sup>5</sup> Moni vanunua ma tavivine sanii sea sou matesi sou ma guale ete a maulina na ilala do, ne sou magitali a avala savuluvulu tasa ni pulu muga. Ieli a munugana ilisiliu na minate.

<sup>6</sup> Vanunua ma tavivine sou ilisiliu na munugana ilala do, Salemo ei vileale sou minei oto, ne sou mongemonge. Maluana minate ma mapigogoi ete ni toebose a abuna do. Ne sou muina a prist mine Salemo me mine Krai. Me ne sou muina a mapana pilu e Krai na avala savuluvulu tasa.

*Satan ei ni mamau*

<sup>7</sup> Ilala a avala savuluvulu tasa i pulosi, io ne sou lubetase e Satan na aova a sinuana boa.

<sup>8</sup> Me ei ni asu usala mina niitona aene sou a abuna vanunua ma tavivine mina aveavena vuso na magamaga, iede sou a abuna mine Gok pilu e Magok. Satan ei ni viepipili e sou mina mailisina maubina. Savulu na vanua na maubina mine sou ei makuba tomane a magamaga na mado.

<sup>9</sup> Ne sou asu maino na aveavena vuso na magamaga, me sou polo saili a balebale mina vanunua ma tavivine mine Salemo ma aubu buobuo do Salemo ei kale mamai. Moni a oavi ei pu muata na langi me ei aani vuse sele a vanunua na maubina do.

<sup>10</sup> Munugana nunu pagu ei aualatase sou, Salemo ei lange ei utano na aova buo ei isa a oavi tuntunu pilu a vatu loiloi. Viuvuu masivo pilu a aualana profet sulu inosi na aova do, maido me ne sou guale a davutina na oaso me na lodo taliulu taliulu.

*Vavasana taula ni palea*

<sup>11</sup> Io eau ite a niugugu a mapana i keakea me buo ino, me eau ite a bibi ei ugu na niugugu odo. Ma magamaga pilu a langi sulu oavetase ei, me sou ino boasi.

<sup>12</sup> Me eau ite sou a vanunua ma tavivine sou matesi, iedo a vanunua ma tavivine sou

isa a sagagalina ma vanunua ma tavivine sabubu, sou magili masae na niugugu a mapana. Me sou a bineanea sou pee a laulau sou isa a inade mina inigogona vanunua ma tavivine sou goli. Me sou pee a laulau tasa sea tamai, iedo a laulau na maulina. Ma bibi ei ugu na niugugu a mapana ei ite a inade ino na laulau sou odo, me ei vilemuliale a inigogona mine sou a vanunua ma tavivine sou matesi iodo.

<sup>13</sup> Dasi ei itetase a vanunua ma tavivine sou matesi me sou ino ne ei sou asu. Ma minate pilu a aubu mine sou a vanua sou matesi, sulu tamai sou itetase a vanunua ma tavivine sou matesi me sou ino na limane sulu sou asu. Ma bibi ei ugu na niugugu a mapana ei ite a inigogona mina vanunua tastasa sou goligoli, me ei vilemuliale sou na vavasana minei.

<sup>14</sup> Me mulimuli ei lange a minate pilu a aubu mine sou a vanua sou matesi utano na aova buo ei isa a oavi iodo. Aova buo odo ei a maluana minate.

<sup>15</sup> Me sei ei aisana boa lilona laulau mina maulina, ne sou lange tamai e ei utano na aova taula a oavi ino i.

## 21

### *Langi alaba ma magamaga alaba*

<sup>1</sup> Seidei eau ite a langi alaba ma magamaga alaba. Munugana langi ma munugana magamaga su bualevusosi. Ma dasi tamai bualevusosi.

<sup>2</sup> Eau ite a Aubu buobuo maolo, ei e Ierusalem alaba. Ei ilisitase a langi maino ne Salemo me ei sivo utano. Ei isa a malolomena doana tomane a tavine na taulaina i malolome a malasana golu ane suana.

<sup>3</sup> Me na niugugu a mapana eau longe a baligolu tasa ei tola sagali maido, "Longe. Seidei a luma mine Salemo ei muina pilu a vanunua ma tavivine. Salemo ei ino balivua ne sou, me ne sou muina a vanunua ma tavivine mine Salemo. E, Salemo oto ei ni pilu e sou, me ei ni muina e Salemo mine sou.

<sup>4</sup> Ei ni saveitagase a matananu ne sou tastasa. Ma minate ei ni ma palea oto lou, me ne sou ma lilmavaa oto me ne sou ma tangi lou oto, me ne sou ma guale lei ete a davutina. Golugolu lisa sou odo sou pulu vuso."

<sup>5</sup> Ma Bibi ei ugu na niugugu a mapana, ei ade maido, "Longe. Eau na toe a golugolu vuso sou palea alaba." Me ei ade lou maido, "Oo niage utano a inade ie. Inade li ei patotona vuso mapigogoi a vanua vuso ne sou silimuli."

<sup>6</sup> Me ei vei lei le eau maido, "Golugolu vuso sou pulosi. Eau a Alpa me eau a Omega, eau a munugana sele me eau a

punuluna sele. Mane sei bibi ei malou, io eau na longo ei ni inu na aopu na nanu na maulina. Ei ni ma oli ete.

<sup>7</sup> Mane a bibi ei vululusi a maubina, io eau na bilii e ei a golugolu vuso do, me eau na muina e Salemo minei, me ei ni muina e natugu.

<sup>8</sup> "Moni a vanunua sou lae me sou suduliliu, ma vanunua sou ma silimuli ete, ma vanunua sou goli a matamatana inigogona pagu sele, ma vanunua mina valiputene sou a vanunua sea, ma vanunua sou goli a inigogona sualolona, ma vanunua sou goli a milolo, ma vanunua sou totopatuliale sou a salemo auala, ma vanua vuso sou goli a aualana inade, ne sou asu usino na aubu mine sou, iede a aova taula ei isa a tuntununa loioli pilu a oavi. Ielili a maluana minate."

### *Ierusalem alaba*

<sup>9</sup> Io a bineanea tasa ei asuale eau. Ei tasa mine sou a bineanea padilua sou lapitole a taogo padilua sou isa a golu pagu padilua mina mapulina lilotivulana mine Salemo. Ma bineanea ei vei le eau maido, "Oo vele. Eau na maite oo e susune Natuna Sipsip, ei kale ni tavui ei."

<sup>10</sup> Ma Maolona Nunu ei palea sagali ne eau, ma bineanea ei maasi e eau usino na loena tasa buo ei oata oto sele. Me ei maite eau e Ierusalem, Aubu buobuo Maolo i maino ne Salemo, me ei ilisitase a langi me ei sivo utano.

<sup>11</sup> A muada buo mina malasana mine Salemo ei lada na aubu buobuo do tomane a vatu doana ei isa a mapa buo sele tomane a iaspa, me ei lada sele tomane a kristal.

<sup>12</sup> Aubu buobuo do ei isa a bigomu i buo me ei oata oto. A tema savulu tasa timana lua ino na bigomu odo, ma bineanea savulu tasa timana lua sou magili agavuale a tema sou odo, me na tema do sou niage a aisane sou a abuna savulu tasa timana lua mine Israel.

<sup>13</sup> A tema tolu ino na avena oaso tala i, me na avena malau ei isa a tema tolu, me na avena malolo ei isa a tema tolu, me na avena oaso i solo i ei isa a tema tolu.

<sup>14</sup> Bigomu mina aubu buobuo odo ei isa a vatu savulu tasa timana lua mina toesagalina vune ei, ma aisana aposel savulu tasa timana lua mine Natuna Sipsip ei ino na vatu sou odo.

<sup>15</sup> A bineanea ei ade pilu eau odo, ei lapitole a butu a gol mina nilovena aubu buobuo do pilu a bigomu taula ma tematema mina bigomu odo.

<sup>16</sup> Ma aubu buobuo do sou isa aisusuna iva, ma lovana mina nilagona ma balbalana su tasa moni. Bineanea ei love a aubu

buobuo a butu na nilovena minei, ma nilagona mina aubu buobuo ei a kilomita savuluvulu lua savulu sobo lua (2,200). Ma nilagona uata na aubu buobuo tamai ei tasa bilesi pilu a nilagona ma balbalana mina aubu buobuo do.

<sup>17</sup> Ei love a bigomu na aubu buobuo tamai, ma nilagona ulilona bigomu ei mapigogoi kubit\* savulu sobo tasa savulu iva timana iva (144). Lovana nilagona do ei a matana lovana a vanua sou love love a golugolu i tomane a bineanea ei love a bigomu a lovana moni iodo.

<sup>18</sup> Bigomu na aubu buobuo, iede Salemo ei goli a vatu a iaspa. Me ei goli a aubu buobuo oto a gol alaba sele i muada tomane a glas.

<sup>19</sup> Vatu na toesagalina bigomu mina aubu buobuo, iede Salemo ei malolome a matamatana vatu, a mapane sou i buo. Munugana malasana vatu mina vuna bigomu ei a iaspa, me maluanai ei a sapaia, matolunai ei a aget, maivanai ei a emeral esaesa.

<sup>20</sup> Malimanai ei a sadonikis, ei kasososo mei keakea tamai. Mapantasanai ei a konilian, ei kasososo. Mapadiluanai ei a krisolait, ei iangango. Mapantolunai ei a beril, ei esaesa. Maialasuenai ei a topas, ei iangango. Masavulu tasanai, ei a krisopres. Masavulu tasa timana tasanai, ei a haiasin. Masavulu tasa timana luanai ei a ametis, ei kasososo.

<sup>21</sup> Tema savulu tasa timana lua do sou a gapu doana savulu tasa timana lua, ma tema tastasa do sou goli moni a gapu doana tastasa. A vea taula mina aubu buobuo do, sou goli moni a gol alaba sele, ma gol odo ei muada sele tomane a glas.

<sup>22</sup> Eau ma ite ete a luma mine Salemo tasa ino na aubu buobuo do. Boa. Vuna, Bibi Taula, ei e Salemo ei isa a sagagalina vuso, pilu e Natuna Sipsip, sulu olu a luma mine Salemo bilesi.

<sup>23</sup> Ma aubu buobuo do ei ma masage ete a oaso ue a game ni silidavei. Boa. Vuna, muada buo mina malasana mine Salemo oto i silidavei a aubu buobuo me Natuna Sipsip ei tomane a lada mina aubu buobuo do.

<sup>24</sup> Vanunua ma tavivine mine sou a abuna vuso ne sou asu na muada mina aubu buobuo do. Ma mapamapana mina avena vuso mina magamaga ne sou maasi a golugolu doanana mine sou usinani ne ei.

<sup>25</sup> Ne sou ma kapi ete a tematema mina bigomu na aubu buobuo do. Tematema ne sou peo taliuliu, vuna, lodo ni ma palea oto na aubu buobuo do.

<sup>26</sup> Malasana buo ma golugolu doana mine sou a avevena vuso, ne sou maasi odo ulilo ne ei.

<sup>27</sup> Moni a golugolu ei mumugu ma vanua sou goli a matamatana inigogona pagu ma vanua mina adeaualana, ne sou ma mapigogoi ete ne sou gali ulilo na aubu buobuo do. Boa vuso sele. Vanunua ma tavivine, aisane sou ino na laulau mina maulina, iede a laulau mine Natuna Sipsip, sou moni sou mapigogoi ne sou gali ulilo na aubu buobuo do.

## 22

*A nanu mina maulina ma obu mina maulina*

<sup>1</sup> Io a bineanea li ei maite eau a nanu tasa buo, iede a nanu mina biliina maulina, ei muada mamau tomane a kristal. Nanu odo ei sali maino na niugugu a mapana mine Salemo pilu e Natuna Sipsip, me ei sali usino

<sup>2</sup> balivua sele na vea buobuo mina aubu buobuo do. Na lili na nanu, mainani me maino, a obu mina biliina maulina ino. Obu odo ei vualale a vuavuaana masavulu tasa timana lua na avala tasa. Ei vua na gamegame vuso. Ma laulau na obu odo sou mina toekubena vanunua ma tavivine mina abuna vanunua vuso.

<sup>3</sup> A inade na toegegelina ei ni ma muina otosi.

Niugugu a mapana mine Salemo me Natuna Sipsip ei ni muina na aubu buobuo do. Ma vanunua na pipigona mine Salemo ne sou totpatuliale ei,

<sup>4</sup> me ne sou ite a lagune ei, ma aisane ei ni muina na palalane sou.

<sup>5</sup> Lodo ei ni ma palea otosi, ma muada mina sulu ma muada mina oaso ne sulu ma pipigo otosi. Vuna, Salemo e Bibi Taula, ei ni bilii a muada usino ne sou. Ne sou iteale taliuliu taliuliu tomane a mapana.

*Iesu ei ni asu asi usinani*

<sup>6</sup> Bineanea do ei vei le eau maido, "Inade do ei patotona vuso, puiale sou a vanua vuso ne sou silimuli sele ei. Salemo e Bibi Taula, ei maillisi a nunu mine sou a profet mina veipalena inade minei, ei peltase a bineanea minei usinani mina maitena vanua na pipigona minei a golugolu vuso ne sou palea asi."

<sup>7</sup> Iesu ei vei "Mu longe, eau na asu asi usinani ne amutou. Vanunua ma tavivine sou ogomuli a inade mina malongolonga vuso eili na laulau ie, ne sou mongemonge."

<sup>8</sup> Eau e Ioanes, eau longe a inade do me eau ite a golugolu sou odo. Eau longesi mea itesi, io eau totpatulu agavuale a ubuna

\* 21:17 Kubit tasa ei tomane 0.5 mita.

bineanea ei maite eau a golugolu odo, mea kale na totopatuliale ei.

<sup>9</sup> Moni ei vei le eau, “Oo ma goligoli lei maido! Eau tamai eau a maitamaina a pipigona minio pilu e sou e tamtamaimu, ede sou a profet. Me eau a maitamaina mine sou a vanunua sou ogomuli a inade na laulau ieli. Oo no totopatuliale Salemo tasa moni.”

<sup>10</sup> Me ei vei lei le eau maido, “Inade mina malongolongona ei eili na laulau ie, iede oo ma bulutole sobesobe lei, vuna matailala i agaviosi.

<sup>11</sup> Maido ma vanunua ma tavivine sou goligoli a inigogona pagu, ne sou goli moni a inigogona pagu. Ma vanunua ma tavivine sou goligoli a inigogona mumugu, ne sou goli moni a inigogona mumugu. Ma vanunua ma tavivine sou goligoli a inigogona bilesi, ne sou goli moni a inigogona bilesi. Ma vanunua ma tavivine Salemo ei vileale minei oto me sou ino maolo, ne sou goli moni a inigogona maolo.”

<sup>12</sup> Iesu ei vei maido, “Longe. Eau na asu asi usinani. Me eau na maasi a mapa mina biliine sou a vanunua. Eau na maliu a mapa ne sou a vanua tastasa mapigogoi a inigogona sou goli.

<sup>13</sup> Eau a Alpa me eau a Omega. Eau a munugana ivu me eau a punuluna sele. Eau a sinokona me eau a punuluna.

<sup>14</sup> “Vanunua ma tavivine sou loloi a kinainai mine sou, ne sou mongemonge. Sou mapigogoi ne sou guale a vuavua na obu mina biliina maolina. Me sou mapigogoi ne sou gali ulilo na tematema na aubu buobuo do.

<sup>15</sup> Moni a vanunua pagu tomane a busebuse ma vanunua sou goligoli a milolo ma vanunua sou goli a inigogona sualolona ma

vanunua sou valiputemate a vanua sea ma vanunua sou totopatuliale sou a salemo auala ma vanunua sou kale a inigogona mina aualana me sou ogomuli, a vanunua sou odo ne sou muine sou sala na aubu buobuo mine Salemo.

<sup>16</sup> “Eau e Iesu, eau peltase a bineanea minau usino ne amutou, me ei veipale a inade do usino ne amutou a vanunua ma tavivine mina viepiluna kinaka. Eau moni eau a uusina ei palea le sou a abuna mine Devit, me eau e tubune Devit. Me eau a mataidoido toseose do ei lada mamau na autupola siisii sele.”

<sup>17</sup> Maolona Nunu pilu e susune Natuna Sipsip sulu vei, “Oo vele.” Ma vanunua vuso sou longe a inade do sou tamai ne sou vei, “Oo vele.” Me sei bibi ei malou ei ni asu usinani. Bibi ei kale ni inu ei ni asu usinani ni guale a nanu na biliina maolina, ei a niabi sabubu moni.

*Abamulina mine Ioanes*

<sup>18</sup> Eau bilii a inade sagali usino na vanunua vuso sou longe a inade na malongolongona eili na laulau ie. Mane a bibi tasa ei adesui a inade tasa na inade li, io Salemo ei ni adesui na bibi iedo a golugolu pagu sele Salemo ei ade i na laulau ie.

<sup>19</sup> Mane a bibi tasa ei taulele sanii mine sou a inade na malongolongona eili na laulau ie, io ei ni ma mapigogoi ete ni guale a vuavua na obu mina biliina maolina mei ni ma muina oto na aubu buobuo maolo mine Salemo tomane a laulau ieli ei ade i.

<sup>20</sup> Bibi ei veipale a golugolu sou odo ei vei, “Ivu sele, eau na asu asi usinani.”

Ei moliana. Bibi Taula Iesu, oo vele!

<sup>21</sup> Dinodo mine Bibi Taula Iesu ei ni muina pilu a vanunua ma tavivine vuso mine Salemo. Moliana.